

**Chyoiyúng chyumlaiká: dangshikaq asik;
Zaiwa**

Zaiwa New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Mahte	4
Markuq.....	39
Lukaq.....	61
Yohan.....	98
Lagyo.....	126
Romaq.....	159
1 Korinhtuq.....	174
2 Korinhtuq.....	189
Galatiq.....	199
Ehpesu.....	205
Hpilipi	210
Kolose.....	214
1 Htesaloni.....	218
2 Htesaloni.....	222
1 Timohti	224
2 Timohti	228
Tituq	231
Hpilemon	233
Hebre.....	234
Yakuq.....	245
1 Petruq	249
2 Petruq	254
1 Yohan	257
2 Yohan	261
3 Yohan	262
Yude.....	263
Shing-rán	265

Mahte

(The Gospel of Matthew)

Yesuq É Byùxik Shap Kyô É Hkyô

Luk 3:23-38

1 Abraham é awut ashín, Dawiq é yhangzo yhangshu, † Yesuq Hkrisduq é byùxik labaû gi, a-ô mâ é eq rajung za nghut lhê.

² Abraham gi, Isak lé hkû;

Isak gi, Yakup lé hkû;

Yakup gi, Yudaq eq yhanggu yhangmâng pé lé hku é ri; nghut lhê;

³ Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;

Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruhtaq nghut ri.

Obet gi, Yese lé hkû;

⁶ Yese gi, Hkohkâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû;

Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniasq eq yhanggu yhangmâng pé lé hku é nghut ri.

¹² Babelon má shúm dut huí é htâng má,

Yehkoniasq gi, Shalahtila lé hkû;

Shalahtila gi, Zerubabelaq lé hkû;

¹³ Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

¹⁶ Yakup gi, Mariq é yhanglâng Yosep lé hku é nghut

ri;

Mariq gi, Hkrisduq gâ é Yesuq lé hku é sù nghut ri.

¹⁷ Haú mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq † é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô

Luk 2:1-7

¹⁸ Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep eq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogûng dut bê nghut ri. ¹⁹ Yhâng é yhumsíng hpó Yosep gi, dingmán sù nghut luí, yhang lé byu pê hí má hoq a kâm lhoq hpu nau é yanmai, tsik za lhoq kâng pyám râ dâ ri.

²⁰ Nghut kôlhang, yhang haú su myit nyi é hkûn, yhupmoq má, haú Yhumsíng é maumang lagyo gi, yhang lé, lé htoq shit luí, "Dawiq é yhangzo yhangshu Yosep ê, haú náng é yhumsíng myhí Mariq lé hâng yù râ hkyô lé, hkâ-myit chiq; haí mù gâ le, yhang wun tô é zoshâng gûng gi, Chyoiyúng Woi-nyí dông lo é nghut lhê. ²¹ Yhang gi, yuqzo rayuq hkû râ nghut luí, náng gi, zoshâng haú lé, Yesuq nghú myíng myhíng byi ra râ nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga taí ri.

²² Shí hkyô banshoq gi, Garai Gasâng èq, haú myiqh-toi dông taí é dang lé lhoq dik é nghut ri. ²³ Myiqh-toi dang haú gi, "Haú zomyi gyíng gi, zogûng dut luí, yuqzo rayuq hkû râ nghut lhê; Yhâng é myíng lé gi, Emanuelaq ga kó râ nghut lhê." ‡ gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

† Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

†† Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê. ‡ 1:23 Esai 7:14

²⁴ Yosep gi, yhup bûn lo é hkûn, haû Yhumsing é maumang lagyo taî é eq rajung za, Mariq lé, yhangmyi dông yhûm má shuî yù bê nghut ri. ²⁵ Nghut kôhang, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haû lé, yhang gi, Yesuq ga myhing byî ri.

Buihtoq Hkyam Mã É Hpaqchyî Bò Bang

2 Herut hkohkâm up nyi é u lé, Yuda mau mã é Betlehem wà má Yesuq lé hku é nghut ri. Hau htâng, buihtoq hkyam mã é hpaqchyî bò bang gi, Yerusalem wà mó má jé lé kômù, ² "Haû hku lé lô bê Yudaq byu pê é Hkohlâm gi, hkâmá nghut lhê lhú? Yhâng é kyî lé, buihtoq hkyam má ngamoq myàng luî, Yhang lé noq râ matú jé lé é nghut lhê." ga luî, myî akô nghut ri.

³ Herut hkohkâm gi, haû hkyô lé wó gyo jáng myit myô nyi ri; hau htoq agó, Yerusalem wà mó mã é lhunglhâng bang le, myit myô bum akô nghut ri. ⁴ Haû mù luî, yhang gi, byu pê é hkyangjong agyi pé eq tarâ sará pé banshoq lé, ji tsîng yù mù, haû Hkrisduq hkâmá hku lé lô râ nghut é hkyô lé myî ri. ⁵ Haû hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luî, haû myiqhtoi kê tô é má,

⁶ 'Yudaq mau mã é Betlehem wà ê, nàng gi, Yudaq mau mã é wà pé má, je tiq sù a nghut;

hkâsu mù gâ le, ngá é Israelaq byu pé lé upzúng râ Zau gi, náng chyáng mai htoq lô râ nghut lhê.' [†] ga bo tô ri." ga tú taî akô.

⁷ Hau htâng, Herut gi, haû hpaqchyî bò bang lé haq ji yù mù, kyî lé htoq shit é ahkyíng lé, yhangmoq chyáng mai hkyak wó myî sê yù bê nghut ri. ⁸ Haû mù, yhang gi, "Nungmoq, zoshâng haû lé rago ê ho wú keq. Ngò le, Yhang lé ê wó noq râ matú, Yhang lé nungmoq ê myâng eq yhang, ngo lé lo shit kyo keq." ga taî luî, haû bang lé Betlehem wà shut nhang kat bê nghut ri.

⁹ Yhangmoq gi, haû hkohkam é dang lé gyô yu é htâng má, htoq e ló bekô nghut ri. Haû buihtoq hkyam má yhangmoq myang é kyî gi, haû zonú nyi é ahtoq ang ang má ló nô é jé shoq, yhangmoq é hí má e ló byî ri. ¹⁰ Yhangmoq gi, kyî haû lé myàng jáng, gyai yhang gabú bum akô nghut ri. ¹¹ Yhangmoq gi, haû yhûm má wang e ló kê é hkûn, zonú eq yhângnu Mariq lé myàng kômù, hkyihput htuq luî, haû zonú lé noqkuq akô; hau htâng, yhangmoq é sutdek pé lé le hpóng luî, hîng, namngón jung loban eq mura ^{††} pé lé yù mù, Yhang lé chyunghuq byî akô nghut ri. ¹² Yhangmoq gi, Herut chyáng a dum taû ló râ matú, yhapmoq má, yhangmoq lé sidiq byî é hui kômù, hkyô gó hkat dông yhangmoq é mau shut taû ló bekô nghut ri.

Egutuq Ming Shut H pang E É Hkyô

¹³ Yhangmoq ló byuq é htâng má, haû Yhumsing é maumang lagyo rayuq gi, Yosep lé yhapmoq má htoq shit mù, "Toq aq! Haû zoshâng eq yhângnu lé, Egutuq

ming shut shuî hpang ê aq. Ngò, nang lé dum ji yu é ahkyíng jé shoq, haû má nyi nyi keq. Haî mù gâ le, Herut gi, zoshâng haû lé sat râ matú, ho nyi bê nghut ri." ga taî ri.

¹⁴ Haû mù, yhang gi, toq luî, myín lé yhang, zôshang me lé shuî chûng mù, Egutuq ming shut e ló bê nghut ri. ¹⁵ Yhangmoq gi, Herut shi é jé shoq, haû má nyi nyi akô. Haû gi, "Ngá zo lé, ngò, Egutuq ming mai wut htoq yù bê nghut lhê." [‡] ga, haû Yhumsing eq myiqhtoi dông taî é dang lé lhoq dik é ru nghut lhê.

¹⁶ Herut gi, yhang lé, hpaqchyî bò bâng eq mhaû pyâm tô é lé sé jáng, nhikmo-yo bê nghut ri; haû mù, yhang gi, haû hpaqchyî bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayâm mã é wà pé má nyi é, í zân mai a-ô mã é yuqzo pé banshoq lé, sat pyám nhang ri. ¹⁷ Haû gi,

"Ramaq gâ é jowò má, yón kuq é eq ngau garû é htê lé wó gyô ri;

Rahkelaq gi, yhang zô pé a nyi byuq lo kê é yanmai, ngau nyi é eq nhik a wó tîng dut ri." ^{††} ga luî, ¹⁸ myiqhtoi Yereimiaq dông taî tô é dang lé lhoq dik é nghut ri.

Nazaret Wà Má Dum Taû Lo É Hkyô

¹⁹ Herut shi byuq é htâng, Egutuq ming má, haû Yhumsing é maumang lagyo gi, Yosep chyáng yhapmoq dông lé htoq shit mù, ²⁰ "Toq aq, haû zôshang me lé shuî chûng mù, Israelaq ming má taû ló aq; hkâsu mù gâ le, haû zoshâng lé sat naû bang shi byuq bekô nghut ri." ga taî ri.

²¹ Haû mù, Yosep gi, zôshang me lé shuî chûng mù, Israelaq ming shut taû ló bê nghut ri. ²² Nghut kôhang, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haû má a wám ló lo nghut ri. Yhapmoq má sidiq byî é huî é eq rajung za, yhang gi, Galile mau shut e ló mù, ²³ Nazaret gâ é wà má ló nyi nyi bê nghut ri. Haû mù, "Yhang lé, Nazaret wà byù ga râ nghut lhê." ga luî, haû myiqhtoi pé dông taî tô é dang lé lhoq dik é nghut ri.

Wui-myhup Sará Yohan Shui Hen É Hkyô

Mrk 1:1-8; Luk 3:1-18; Yhn 1:19-28

3 Haû yoq má, Wui-myhup Sará Yohan htoq lô mù, Yuda mau mã é yoso má hko kyô é gi, ² "Myit lhîng keq; hkâsu mù gâ le, mauhkûng mingdán gi, chyâng lò bê [‡] nghut ri." gâ ri. ³ Haû yuq gi, "Haû yoso má, byù rayuq garû taî é htê gi, 'Haû Yhumsing é matú, hkyô hen to keq; Yhâng é matú, hkyô lhoq nyhang to keq.' gâ ri." ^{†††} ga myiqhtoi Esai-aq taî tô é sù yuq nghut ri.

⁴ Yohan gi, gola-uq shomaú eq saî é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé nghut ri.

⁵ Yerusalem wà mó mã é bang, Yuda mau banshoq mã é bang eq Yodan làng awui ayâm lhunglhâng mã é

[‡] 2:15 Hos 11:1 ^{††} 2:17 Yer 31:15 ^{†††} Mauhkûng mingdán gi, chyâng lò bê gâ é lichyúm gi, Garai up râ ahkyíng chyâng lò bê gâ é nghut lhê. ^{†††} 3:3 Esai 40:3

[†] 2:6 Mihka 5:2 ^{††} Mura gi, chi wó kut jung xû nghut lhê.

bang gi, yhang chyáng htoq e bum akô. ⁶Yhangmoq gi, yhumsing é mara lé yín yû kôluî, yhang chyáng mai Yodan làng má wui-myhup hkâm yu bum akô nghut ri.

⁷Nghut kôlhang, yhang gi, yhang wui-myhup hkâm byî é jang má, Hparishe pé eq Saduke pé myo myo lé lo nyi kô é lé myàng jáng, yhangmoq lé taí é gi, "Duq htân lhangmuì amyû pé ê, jé lô râ yubak dam mai wó hpang lut kó sháng gaq ga, nungmoq lé ó yuq taí pûn é lhú? ⁸Myit lhîng hkyô eq gingdán é ashi pé zui keq. ⁹'Ngamoq gi, Abraham é yhangzo yhangshû pé nghut lhê.' nghû luî, yhumsing é i-myit unghkaû má hkâlum to kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ¹⁰Ahkuî lháng, Garai Gasang gi, Yhâng é wazung lé haû sigâm wang pé má tô to bê nghut ri; haû mù, ge é ashi a zuî é agàm hkangmó lé gi, htuq lhêng pyám mù, myi má dú kat pyám râ nghut lhê.

¹¹Ngò gi, nungmoq myit lhîng kó sháng gaq nghû, wui èq za wui-myhup hkâm byî lhê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirâ nghut luî, ngò gi, Yhâng é hkyî-tsung chung byi râ lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê. ¹²Yhang gi, loq má byò chung to mù, guq chyârâng mâ é guq bùm lé hik sân pyám luî, já é guq cham lé gi, guqchyí má tsíng kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." gâ ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³Haú hkûn, Yesuq gi, Yohan chyáng wui-myhup hkâm yû râ ga, Galile mau mai Yodan làng má jé lé lo ri. ¹⁴Nghut kôlhang, Yohan gi, "Ngò sheq Náng chyáng wui-myhup hkâm yû râ sù ru nghut lhê nhíng! Nàng sheq ngá chyáng lé lo lhê lhú?" ga luî, lhom taí hkûm ri.

¹⁵Haú hkûn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkâm byi laq." ga tû taí ri. Haû mù, Yohan le, gyo byi bê nghut ri.

¹⁶Yesuq gi, wui-myhup hkâm yû eq yhang, wui mai htoq lo ri. Haú hkûn, mauhkûng bóng lô mù, Garai Gasang é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri. ¹⁷Haú hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

Yesuq, Gúnglaú Huí É Hkyô

Mrk 1:12-13; Luk 4:1-13

4 Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuí ê ri. ²Yesuq gi, zoshuq gám é myi xê nyí myi xê myin jé jáng, zòmut hui bê nghut ri. ³Haú hkûn, gunglaú sù gi, Yhâng chyáng lé mù, "Nàng, Garai

Gasang é Yhangzo nghut le gi, luqgok shí pé lé muk dut nhâng aq." ga taí ri.

⁴Haú jáng, Yesuq gi, "'Byù gi, muk èq za asak duì râ a nghut; Garai Gasang é nhut mai htoq lo é mungdang hkangmó èq sheq asak duì râ nghut lhê.' † ga luî, Chyúmdang má kê tô ri." ga yhang lé tû taí ri.

⁵Haú hkûn, nat Tsadán gi, Yesuq lé, chyoiyúng myuq †† má shuí ê mù, noqkuq yhum je myhang é shúhtâng htoq má yap nhang to luî, ⁶"Nàng, Garai Gasang é Yhangzo nghut le gi, byam gyó kat wú aq. Hkâsu mù gâ le,

'Náng é matú, Garai Gasang gi, Yhâng é maumang lagyô pé lé taí to râ nghut mù,

luqgok má Náng é hkyî a ló htung shoq, yhangmoq é loq èq Nang lé lhom bún yû kó râ nghut lhê.' ‡

ga luî, Chyúmdang má kê tô ri." ga taí ri.

⁷Nghut kôlhang, Yesuq gi, "'Haú Yhumsing, nungmoq é Garai Gasang lé, wó chyam wú râ a nghut.' †† ga luî le, Chyúmdang má kê tô ri." ga, yhang lé tû taí ri.

⁸Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pé é hkikhâm hkyô lé tûn shít ri.

⁹Hau htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taí ri.

¹⁰Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsing náng é Garai Gasang lé za, nàng noqkuq dojaú ra râ nghut lhê.' †† ga luî, Chyúmdang má kê tô ri." ga, yhang lé taí ri.

¹¹Haú mù, nat Tsadán gi, ló byuq bê nghut luî, mau-mang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Lô É Hkyô

Mrk 1:14-15; Luk 4:14-15

¹²Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taû ló bê nghut ri. ¹³Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló nyi nyi ri. ¹⁴Haú gi, myiqhtoi Esai-aq laiká má,

¹⁵"Zebulun mau eq Nahtali mau, wuimau mâ é hkyô, Yodan làng yàm, tûngbaù pé nyi é Galile mau ê,

¹⁶mauchut hkaû má nyi nyi é bang, maubó mó lé myàng bê nghut ri;

shí wup hkaû má nyi to bâng é matú, maubó lô bê nghut ri." †††

ga kê tô é dang lé lhoq dik râ matú nghut ri.

¹⁷Haú hkûn mai, Yesuq gi, "Myit lhîng keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

Yesuq É Chángzo Hí Dut Bang

¹⁸Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng

† 4:4 Tarâ Pun 8:3 †† chyoiyúng myuq gi, Yerusalem lé gâ lhê. ‡ 4:6 Hkya-on 91:11-12 †† 4:7 Tarâ Pun 6:16 †† 4:10 Tarâ Pun 6:13 ††† 4:16 Esai 9:1-2

lé myang ri. Yhangnhik tâng gi, ngozo kóng zo su nhik nghut mù luî, nhông má gùn dú nyi akô nghut ri.

¹⁹ Haû mù, Yhang gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taî ri. ²⁰ Haû hkûn, yhangnhik gi, radá dâm, gùn pé lé tô pyâm to luî, Yhang htâng cháng bekô nghut ri.

²¹ Yesuq gi, jowò haû mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaî hkaû má gùn hpo nyi akô. Yhangnhik lé, Yesuq wut kat jáng, ²² yhangnhik gi, radá dâm, yhangnhik é yhângwa eq lhaî haû lé, tô pyâm to kôluî Yesuq htâng cháng bekô nghut ri.

Nò Bang Lé, Yesuq Lhoq Gê Byî É Hkyô

Luk 6:17-19

²³ Yesuq gi, Galile mau ramau gón má htoq ê mù, tarajong pé má, mhoqshit luî, mauhkûng mingdán eq sêng é gabú danglù lé, hko kyo uchyang, byu pê chyáng mâ é nòhpyo ajung jung hui bang eq nolì nõ-jàng amyû myû dap bang lé, lhoq gê byî wún ri.

²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nõhpyo ajung jung huî é bang, hkê-nhò jamjaû nyi é bang, nat gang wang júng é bang, mhûngtuq tuq é bang, gùngjum shi é bang lé, shuî lé lô kôluî, Yhang gi, haû bang lé lhoq gê byî ri. ²⁵ Galile mau, Dekapoli, † Yerusalem, Yuda mau eq, Yodan làng tû tap mâ é byù moq mó gi, Yesuq htâng châng bum akô nghut ri.

Hkungsô Wó É Tarâ

Luk 6:20-23

5 Yesuq gi, byù moq mó lé myàng jáng, bùm má doq ló luî, ló zung tô ri. Haû hkûn, Yhâng é chángzô pé gi, Yhâng chyáng lé lô kôjáng, ² Yhang nhut hkum hpóng luî, yhangmoq lé mhoqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é mingdán nghut nyi ri.

⁴ Myit iyon huî é bang gi, hkungsô wó nyi ri; hkâsu mù gà le, yhangmoq gi, nhik lhoq tîng é hui kó râ nghut lhê.

⁵ I-myit nú-nhâm é bang gi, hkungsô wó nyi ri; hkâsu mù gà le, yhangmoq gi, mingkan lé wó sîng kó râ nghut lhê.

⁶ Dingmán hkyô lé mut shit nyi é bang gi, hkungsô wó nyi ri; hkâsu mù gà le, yhangmoq gi, nhik dik shoq myàng zo kó râ nghut lhê.

⁷ Shogyo nhikmyin myit bo é bang gi, hkungsô wó nyi ri; hkâsu mù gà le, yhangmoq gi, shogyo nhikmyin yu é hui kó râ nghut lhê.

⁸ Myit sansêng é bang gi, hkungsô wó nyi ri; hkâsu mù gà le, yhangmoq gi, Garai Gasang lé myàng kó râ nghut lhê.

⁹ Nguingón hkyô sô xoq byî é bang gi, hkungsô wó nyi ri; hkâsu mù gà le, yhangmoq gi, Garai Gasang é yhangzô pé gà é hui kó râ nghut lhê.

¹⁰ Dingmán hkyô é yanmai zing-ri huî é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é nghut nyi ri.

¹¹ Ngá é yanmai, byu pê èq, nungmoq lé rhoi é, zing-rî é, a teng a mán é đông agè ashop é dang amyû myû taí tso kô é hkûn, nungmoq hkungsô wó nyi ri. ¹² Nguingón gabú nyî keq, hkâsu mù gà le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoî pé lé le, yhangmoq gi, haû đông zing-rî laî lo wú bekô nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidàm htoq mâ é xo nghut nyi lhê. Nghut kôlhang, xo gi, mán kân byuq jáng, haû lé hai èq dum wó lhoq ngam yù râ lhú? Shinggan shut dú pyám mù, byu pê èq nâng pyeq pyâm é mai lai luî, hai akýû le bò râ a nghut lo.

¹⁴ Nungmoq gi, mingkân é maubó nghut akô; bùm htoq mâ é myuq lé gi, wó nghop to râ a nghut. ¹⁵ Myi-bung lé tap mù, mûng èq nghop tô é ó a kut wú kó; haû su kut râ malaî, yhúmhaû má lúng tô é bang yuq hkangmó myoq wó myâng râ matú, tsungjang má kúm tsung to râ nghut lhê. ¹⁶ Haû eq rajung za, byu pé gi, nungmoq é ge é muzó pé lé byu-myàng luî, mauhkûng htoq mâ é nungmoq é İwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷ Ngò gi, myiqhtoî pê é dang eq jep é tarâ lé lhoq hpoyq pyám râ matú, jé lé é nghut nhò hkâ-ngâm kó; haû pé lé lhoq dik râ matú sheq jé lé é ru nghut lhê.

¹⁸ Ngò, nungmoq lé teng za taí kôlé, mauhkûng eq myigùng byuq byuq le lháng, haû pé a ban lhoq dik dik gi, jep é tarâ mâ é tiq dik é dangjí eq myihkyet zo ralhum lháng byuq byuq râ a nghut. ¹⁹ Jep é tarâ shí pé mâ é tiq dik é dang rahkun lé lu lai luî, góbang lé le, haû su kut râ matú mhoq byî é sù ó yuq nghut kôle, mauhkûng mingdán má tiq dik sù gà é hui râ nghut lhê; nghut kôlhang, jep é tarâ shí pé lé châng kut luî, mhoq byi sù kúm gi, mauhkûng mingdán má, hkik sù gà é hui râ nghut lhê. ²⁰ Ngò, nungmoq lé taí kôlé, nungmoq dingmán é hkyô má, haû Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó râ a nghut.

Byù Hkâsat

²¹ 'Byù hkâsat, †† sat é sù gi, jéyáng é hui râ nghut lhê' ga, hí hpyang lhê é bang lé taî tô é dang, nungmoq wó gyô wú bê nghut lhê. ²² Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang

† Dekapoli gà é gi, Grik đông myuq raxê lé gà lhê.

†† 5:21 Htoq Ló 20:13

hpó lé, 'Byù gang' † ga taí é sù gi, Yudaq byìn tú wap-doq má jéyáng é hui rã nghut lhê; 'Byù bam ê' ga wut é sù gi, ngaraî myi eq gingdán nyi ri.

²³ Haù mù, hkungga gyap má, nàng hkungga nhông rã dâ é hkùn, náng é gumang rayuq yuq, nang lé mara hun é hkyô rajung jung joq é lé, myit bân kat é nghut jáng, ²⁴ náng é hkungga lé, haù hkungga gyap hí má tô pyâm to mù, náng é gumang hpó haù yuq eq hí nguingón hkyô ló yù luí sheq, hkungga lé nhông byi aq.

²⁵ Nang lé yui tsuq sù gi, nang lé tarã rùng má dé e ló é hkùn, hkyô má ru nghut nyi ashî u lé, yhang eq ngu-ingón hkyô hí hân yù aq. Haù a nghut jáng, haù yuq gi, nang lé, tarã agyi chyáng ê ap pyám mù, haù tarã agyi gi, nang lé htóng hkyô pyám rã matú, htóng suwún hpô é loq má ap pyám rã nghut lhê. ²⁶ Ngò, nang lé teng za taí lé, yuichyín haù a ban xap xap gi, htóng haù mai nàng wó htoq ló rã a nghut.

Su-myi Sulàng Lú É Hkyô Eq Séng Luí Mhoqshit É Dang

²⁷ 'Su-myi sulàng hkâlú' †† gâ é dang lé, nungmoq wó gyo wú bê nghut lhê. ²⁸ Nghut kôle, Ngò, nungmoq lé taí kôlé, myiwe rayuq lé shut nau é myit èq wú é sù gi, yhang é myit hkaù má, myiwe haù yuq eq su-myi sulàng lú hkyô kut é sù nghut bê. ²⁹ Haù mù, náng é loqyo myoq èq, nang lé mara kut shut nhang é nghut le gi, haù lé lap choq yù mù, dú pyám aq. Hkâsu mù gâ le, náng é ragùngdu gón ngaraî ming gyó rã htoq má, náng é gungsho rajung jung za htên byuq é nghut le gi, náng é matú je ge ri. ³⁰ Haù eq rajung za, náng é loqyo loq èq, nang lé mara kut shut nhang é nghut le gi, haù lé hpyit yù mù, dú pyám aq. Hkâsu mù gâ le, náng é ragùngdu gón ngaraî ming gyó rã htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luí Mhoqshit É Hkyô

Mht 19:9; Mrk 10:11-12; Luk 16:18

³¹ 'Yhumsing é yhangmyi lé kâng é sù gi, lhoq kang laiká byi rã dut lhê.' † gâ é dang joq lhê. ³² Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haù lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmû; Yhum-sing lé byi tô é danggidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê. ³⁴ Nghut kôlhang, Ngò, nungmoq lé taí kôlé, hai èq le hkâdakâm kó: mauhkûng lé lang luí le, hkâdakâm kó; hkâsu mù gâ le, haù gi, Garai Gasâng é zùng tanghkuq nghut lhê; ³⁵ myigùng lé lang luí le, hkâdakâm kó; hkâsu mù gâ le, haù gi, Garaî é

† Byù gang gâ é lé, Grik dông "Raka" gâ lhê. †† 5:27 Htoq Ló 20:14 ‡ 5:31 Tarã Pun 24:1

hkyi nang jang nghut lhê; Yerusalem lé lang luí le, hkâ-dakâm kó; hkâsu mù gâ le, haù gi, Hkohkâm mó é myuq nghut lhê. ³⁶ Hau htoq agó, yhumsing é ulhùm èq le, hkâdakâm kó; hkâsu mù gâ le, xâm rahkat lé lhang hpyù shoq noq shoq, nàng wó kut é a nghut. ³⁷ Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haù mai laí é gi, haù agè ashop su chyáng mã é nghut ri.

Lató Hpuq É Hkyô

Luk 6:29-30

³⁸ 'Myoqjí matú myoqjí xap, zui matú zui xap' †† gâ é dang lé, nungmoq wó gyô wú bê nghut lhê. ³⁹ Nghut kôlhang, Ngò, nungmoq lé taí kôlé, agè ashop kut é sù lé lató hkâhpuq. Náng é loqyo bowâm má pyuq byi sù lé, loqpaî hkyam le hkâm byi shi aq. ⁴⁰ Byù rayuq yuq, nang lé mara tsuq mù, náng é buzo lé yu pyám byi é nghut jáng, bumó lé le, hkyut byi shi aq. ⁴¹ Byù rayuq yuq, nang lé zik mù, radéng é nhâng jáng, yhang eq rahá í déng châng ê byi aq. ⁴² Nang lé dung sù lé, byi aq; náng chyáng mai chyí naù sù lé le, nunghtáng hkâlhik pyám.

Gyè Lé Chyitdap Rã É Hkyô

Luk 6:27-28, 32-36

⁴³ 'Náng é chyangnâm mã é bang lé gi, chyitdap mù, náng é gyè lé gi, a jú kut aq' †† gâ é dang lé, nungmoq wó gyô wú bê nghut lhê. ⁴⁴ Nghut kôlhang, Ngò, nungmoq lé taí kôlé, nungmoq gi, mauhkûng htoq mã é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq; ⁴⁵ hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri. ⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó rã lhú? Kang guq bang lhang, haù su kut lhê a nghut kó lhú? ⁴⁷ Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbâng htoq má haí wá laklaí rã lhú? Tung-baù pé lhang haù su kut lhê a nghut kó lhú? ⁴⁸ Haù mù, mauhkûng htoq mã é nungmoq é Íwa gumjup é su, nungmoq le gumjup nyi keq.

Alu Byi É Hkyô

6 Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haù su kut é nghut jáng, mauhkûng htoq mã é nungmoq é Íwâ chyáng mai, chyunghuq wó yù kó rã a nghut.

² Haù mù, haù gegùn labyoq kut bang gi, byu pé èq shigyaù é hui sháng gaq ga, tarajong pé hká, hkyô pé hká kut é su, nàng gi, alu byi é hkùn, tut htê su hkâl-hoq htoq. Ngò, nungmoq lé teng za taí kôlé, haù bang gi, yhangmoq é chyunghuq lé hkúm shoq wó yù bekô

†† 5:38 Htoq Ló 21:24 †† 5:43 Nhong 19:18

nghut lhê. ³ Ra châ to bang lé nàng alu byî é hkûn, náng é loqyo loq kut é hkyô lé, loqpaî loq lé lhang hkâsé nhâng. ⁴ Haú hkûn, nàng alu byî é lé, ó a châng sé râ nghut lhê. Haú jáng sheq, ó a sé loshoq kut é hkyô lé myang é sù, náng é Îwa gi, nang lé chyunghuq shigyaú râ nghut lhê.

Kyûdûng É Hkyô

Luk 11:2-4

⁵ Nungmoq kyûdûng le, gegùn labyoq kut bang su hkâkut kó; hkâsu mù gà le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za taí kôlé, haú bang gi, yhangmoq é chyunghuq lé wó yû bekô nghut ri. ⁶ Nghut kôlhang, nàng kyûdûng le, náng é gok hkaú má wang ló mù, hkum myhî pyám luî, a byu-myang é náng é Îwâ chyáng dung aq. Haú jáng, ó a byu-myang é lé myàng sù, náng é Îwa gi, nang lé jeju dum tau byi râ nghut lhê. ⁷ Haú mù, kyûdûng le, tûngbaù pé su kut luî, dang puq hkâhtau kó; hkâsu mù gà le, yhangmoq gi, dang hîng chín luî dung jáng sheq, gyo byi nhô ngam akô nghut ri. ⁸ Haú bang su hkâkut kó; hkâsu mù gà le, nungmoq é Îwa gi, nungmoq râ é hkyô lé, nungmoq a dung shi mai sê to Sù nghut lhê.

⁹ Haú mù, nungmoq kyûdûng le, 'Mauhkûng htoq tsáng myhâng mâ é ngamoq é Áwa ê,

Náng é mying gi, chyoiyúng nyí sháng gaq,

¹⁰ Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹ Ngamoq nyí wuî râ é zoshuq lé, ngamoq lé hkû-nyí byi laq.

¹² Ngamoq lé shut é bâng é mara lé ngamoq hkyut pyám byî é su,

ngamoq é mara lé le hkyut pyám byi laq.

¹³ Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô.

(Hkâsu mù gà le, kô dik é up sîng hkyô, a-tsam eq hpungwup shinggang gi, pyat dedu ahtum abyuq Náng chyáng ru joq nyi ri ô! Amen.)[†]

ngû dung keq. ¹⁴ Supê èq, nungmoq lé kut shut é mara lé, nungmoq hkyut pyám byî é nghut le gi, mauhkûng htoq mâ é nungmoq é Îwa le, nungmoq lé mara hkyut pyám byi râ nghut lhê. ¹⁵ Nghut kôlhang, haú bâng é mara lé, nungmoq a hkyut pyám byî é nghut le gi, nungmoq é Îwa le, nungmoq é mara lé hkyut pyám byi râ a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gà le, haú bang gi, yhangmoq zoshuq gám é hkyô lé, tûn shit râ matú myoqdong lhoq nyhuî shit akô nghut

ri. Ngò, nungmoq lé teng za taí kôlé, haú bang gi, yhangmoq é chyunghuq wó yû bekô nghut ri. ¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pé hí má de de a dut é za, nungmoq a byu-myang é Îwa za myàng sháng gaq, myoq chî pyám luî, u xû but keq; ¹⁸ haú jáng sheq, ó a sé loshoq kut é hkyô lé myang é Sù, nungmoq é Îwa gi, nungmoq lé chyunghuq shigyaú râ nghut lhê.

Mauhkûng Htoq Mâ É Sutzè

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byî é myigùng htoq má, nungmoq é matú, sutzè lé hkâhkong to kó.

²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byî é mauhkûng htoq má sheq, nungmoq é matú sutzè hkong to keq. ²¹ Hkâsu mù gà le, náng é sutzè joq jang má, náng é i-myt le jé nyi râ nghut lhê.

²² Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó bying mui to râ nghut lhê. ²³ Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyi râ nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htû râ lhâ!

²⁴ Ó yuq nghut kôle, yhumsîng í yuq lé wó dojaú râ a nghut. Hkâsu mù gà le, yhang gi, rayuq lé a jú kut mù, rayuq lé gi, chyitdap râ nghut lhê; haú a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

Hkâ-myt Chiq Kó

Luk 12:22-31

²⁵ Haú mù luî, Ngò, nungmoq lé taí kôlé, nungmoq é asak matú haî zo haî shuq râ eq nungmoq é gungdû matú haî wut haî tsang râ lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú? ²⁶ Maulat mâ é nghoqzô pé lé wú wú keq; yhangmoq gi, kyô hkyô kyô shu a kut é htoq agó, chyí pé má le haî a tsing kat to kô é nghut le lhang, mauhkûng htoq mâ é nungmoq é Îwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpauhap nyi lhê a nghut kó lhú? ²⁷ Nungmoq má, ó yuq wá, myit chiq é èq, yhumsîng é asak lé radúng kô wó jat yù kó râ lhú?

²⁸ Haú nghut le nhîng, haî mù, mebû matú myit chiq akô lhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkying le a duì kó nghut ri. ²⁹ Nghut kôlhang, Ngò, nungmoq lé taí kyo kôlé, hkohkâm Sholumon hpung kô dik u lé wut é mebu lhang, ban haú rabó lé a hkyit nghut ri. ³⁰ Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haú su kut hut é nghut le gi, nungmoq lé je riyhang hut râ a nghut kó lhú? ³¹ Haú mù, 'Haî zo râ lhi?' 'Haî shuq râ lhi?' 'Haî

† Chyúmlaíká ra-am má, shí tûm a bo é nghut lhê.

wut rã lhi?' nghũ hkã-myt chiq myhíng kó. ³² Tungbaũ pé kúm gi, haũ pé banshoq lé chãng hkat ho nyi akô; nghut kôlhang, mauhkũng htoq mã é nungmoq é İwa gi, haũ pé lé nungmoq rã é hkyô, sé byi nyi lhê.

³³ Nghut kôlhang, Yhãng é mingdãn eq dıngmãn hkyô lé hí hõ keq, haũ jãng, haũ pé banshoq, nungmoq lé puq byi rã nghut lhê. ³⁴ Haũ mù, napmã lhê é matú hkã-myt chiq kó; hkãsu mù gã le, napmã gi, yhãng é yhang myit chiq rã nghut lhê. Hkũ-nyí é wuĩhke hkyô gi, hkũ-nyí é matú gé bê nghut ri.

A Jéyãng Rã Hkyô

Luk 6:37-38, 41-42

7 Nungmoq jéyãng é a hui kó shãng gaq, ó lé le, hkãjéyãng kó. ² Hkãsu mù gã le, nungmoq jéyãng é su, nungmoq le, jéyãng é hui kó rã nghut é htoq agó, nungmoq lik byi é bung eq, nungmoq lé dum lik byi rã nghut lhê.

³ Yhumsing myoq hkaũ má lúng tô é siktúm lé lhãng a myit wú é nhĩng, haĩ mù luĩ, nunggu nungmãng é myoqwãng lé myang lhê lhú? ⁴ Yhumsing é myoq má siktúm lhũng to luĩ nhĩng, 'Nãng myoq má lúng tô é myoqwãng lé, ngò choq pyãm byi lé.' nghũ luĩ, nãng é gumang hpó lé hkãsu wó taĩ rã lhú? ⁵ Gegũn labyoq kut sũ ê, nãng é myoq má lúng tô é siktúm lé hí choq pyãm aq. Haũ jãng sheq, nunggu nungmãng é myoq má wang tô é myoqwãng choq pyãm byi rã matú, nãng san za myãng rã nghut lhê.

⁶ Hkuĩ pé lé, yunglhõ é zê hkãbyi kó; waq pê hí má, nungmoq é palhé wuizo lé hkãdú byi kó. Haũ su kut jãng, haũ bang gi, zê haũ pé lé nãng pyeq pyãm mù, nungmoq lé dum taũ ngat lò rã nghut lhê.

Dung Keq, Hõ Keq, Hkum Má Kok Keq

Luk 11:9-13

⁷ Dung keq, haũ jãng, nungmoq lé byi rã nghut lhê; hõ keq, haũ jãng, nungmoq myãng kó rã nghut lhê; hkum má kok keq, haũ jãng, nungmoq lé hpóng byi rã nghut lhê. ⁸ Hkãsu mù gã le, ó yuq nghut kôle, dung sũ wó rã; hõ sũ myãng rã; hkum kok sũ lé gi, hpóng byi rã nghut lhê.

⁹ Nungmoq má, ó yuq wá, yhumsing yhangzo muk dũng le, luqgok byi kó rã lhú? ¹⁰ Ngozo dũng le, lhang-muĩ † byi kó rã lhú? ¹¹ Agè ashop é bang nungmoq lhãng gi, nungmoq é zo wuĩ lé, ge é chyunghuq dat byi kô le nhĩng, mauhkũng htoq tsãng myhãng mã é nungmoq é İwa gi, Yhang lé dũng é bang lé, je riyhang ge é chyunghuq byi rã nghut lhê! ¹² Haũ mù, hai hkyô má nghut kôlhang, nungmoq gi, yhumsing ô nau é dõng supé lé kut nhãng nau é su, yhangmoq lé le kut byi keq. Haĩ mù gã le, haũ gi, jep é tarã eq myiqhtoĩ pê é dang lo jup tô é nghut ri.

† Garai Gasang gi, lhangmuĩ a zo rã matú, Yudaq byu pé lé hkunmó hkyô tô é nghut lhê.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wãng keq. Hkãsu mù gã le, lam é hkúmdong eq hkyô mó gi, htên byoq hkyô shut shuĩ e é nghut mù luĩ, haũ dõng wãng bang gi, myô akô nghut ri. ¹⁴ Chyap é hkúmdong eq hkyô zo kúm gi, asak hkyô shut shuĩ e é nghut mù luĩ, haũ lé myang ho é bang gi, shaũ akô nghut ri.

Agãm Eq Ashi

Luk 6:43-45

¹⁵ Nungmoq chyãng jé lé lo é myiqhtoi pyoq pé lé, sidiq nyi keq; yhangmoq gi, sau-kuq wut mù, nungmoq chyãng jé lé kôlhang, myaq zo myaq shuq nau é wamhkuĩ pé nghut akô. ¹⁶ Yhangmoq é muzó jizó lé wú mù, nungmoq gi, yhangmoq lé wú sé kó rã nghut lhê. Zubyap mai tsibiyi shi, zugãm mai maihpãng-shi wó yu wú akô lhú? ¹⁷ Ge é agãm gi, ge é ashı zui mù, a ge é agãm gi, a ge é ashı za dat zui ri. ¹⁸ Ge é agãm gi, a ge é ashı a wó zui, a ge é agãm le, ge é ashı a wó zui nghut ri. ¹⁹ Ge é ashı a zuĩ é shigãm hkangmó lé gi, htuoq pyãm mù, myi má dú kat pyãm rã nghut lhê. ²⁰ Haũ mù, yhangmoq é muzó jizó lé wú mù, nungmoq gi, yhangmoq lé wú sé kó rã nghut lhê.

²¹ Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkũng mingdãn mã myang wãng kó rã a nghut; haũ mauhkũng htoq mã é Ngã Wa ô nau é dõng kut sũ za sheq, myang wãng rã nghut lhê. ²² Haũ buinyi má, byũ myo myo gi, 'Yhumsing ê, Yhumsing ê, Nãng é mying mai, ngamoq gi, myiqhtoi le htoi bê; nat gang lé hkat htoq bê; laklaĩ kumlhá ajung jung lé, kut bê a nghut lhú?' ga luĩ, Ngo lé myi kó rã nghut lhê. ²³ Haũ hkũn, Ngò gi, 'Nungmoq lé, Ngò hkã-nhãm le a sé; agè ashop hkyô kut é bang nungmoq, Ngã chyãng mai gãng ló byuq keq.' nghũ, yhangmoq lé san za tũ taĩ kat rã nghut lhê.

Hpaqchyĩ Bõ Sũ Eq Ngok Sũ

Luk 6:47-49

²⁴ Haũ mù, Ngã é dang shı pé lé wó gyô yũ luĩ, chãng kut é sũ gi, hpaqchyĩ bò mù, lunghtãn htoq mã, yhũm saĩ é sũ eq wuĩ nyi ri. ²⁵ Mau wõ, wuĩ je, laidun lò mù, yhũm haũ lé lo htung kôlhang, yhũm haũ gi, a htên byoq byuq rã nghut lhê; hkãsu mù gã le, yhũm haũ gi, lunghtãn htoq mã tsuq tô é yanmai nghut ri. ²⁶ Nghut kôlhang, Ngã é dang lé, wó gyô yũ mù, a chãng sũ gi, semuĩ-jãng mã, yhũm saĩ é byũ ngok eq wuĩ nyi rã nghut lhê. ²⁷ Mau wõ, wuĩ je, laidun wò yup dut lò mù, yhũm haũ lé lo htung jãng, yũ whuĩ a mù loshoq htên byoq byuq rã nghut lhê." gã ri.

²⁸ Yesuq mungdang ban taĩ é hkũn, shıwa byu pé gi, Yhang mhoqshit é hkyô lé maũhong bum akô; ²⁹ hkãsu mù gã le, Yhang gi, yhangmoq é tarã sarã pé eq a pung é za, ahkãng ayã wó sũ rayuq su, mhoqshit é yanmai nghut ri.

Manggâm Dap É Byù Rayuq

Mrk 1:40-45; Luk 5:12-16

8 Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri.
² Haú hkûn, manggâm dap é byù rayuq gi, Yhâng é hí má, lé mù, hkyihput htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taí ri.
³ Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoi." ga taí kat ri. Haú hkûn jáng, haú yuq é manggâm gi, ge byuq bê nghut ri. ⁴ Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlháng, náng é gungdu lé, hkyangjong hpô chyáng ló tûn shit mù, yhangmoq é matú saksé dut sháng gaq, Mosheq taí tô é eq rajung za, hkungga ló hông byi aq." ga haú yuq lé taí kat ri.

Gyezau Hpô É Lumjîng Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù, ⁶ "Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyaí no jamjaû leq tô ri." ga garúm lé dung ri.
⁷ Haú hkûn, Yesuq gi, yhang lé, "Ngò, lé lhoq gê byi râ." ga taí kat ri.
⁸ Gyezau hpó haú, Yhang lé dum tû taí é gi, "Yhumsîng ê, Nàng, ngá é laishîn-htâng má, lé nang râ lháng ngò má a gingdán. Nàng, dang rahkun za taí kat laq; haú hkûn, ngá é dui-nhâng zoshâng ge ló râ nghut lhê. ⁹ Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shî kut aq!' nghu le, yhang kut lhê." gâ ri.
¹⁰ Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za taí kôlé, Israelaq amyû má lháng, shí í lumjîng é sù lé, Ngò, rayuq lé le a myàng wú é nghut lhê. ¹¹ Ngò, nungmoq lé taí kôlé, buihtoq buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poí mó má myang zùng kó râ nghut lhê. ¹² Nghut kôlháng, mingdán haú má wàng âng é bang kúm gi, shinggan mauchut hkaú shut dú pyâm é hui luí, haú jowò má ngaubyi ngaù nhap eq zuí kyik kyik shoq hpuzô nyi bùm bekô râ nghut lhê." ga taí ri.
¹³ Hau htâng, Yesuq gi, gyezau lé, "Ló aq hkoi! Nàng lumjîng é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byí É Hkyô

Mrk 1:29-34; Luk 4:38-41

¹⁴ Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, ê myang ri. ¹⁵ Yesuq gi, yhâng é loq má ê záng kat é

hkûn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gaí huq bê nghut ri.

¹⁶ Myinhâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dâng eq hkat htoq pyám mù, nõhpyo huí é bang banshoq lé lhoq gê byí ri. ¹⁷ Haú gi, "Yhang gi, nga-nhûng é noli nojàng lé yu pyám byi mù, nga-nhûng é noli nojàng lé, wùn waq pyám byi bê nghut ri." †
 ga, myiqhtoi Esai-aq taí tô é dang lhoq dik râ matú nghut ri.

Yesuq Htâng Cháng Râ Bang

Luk 9:57-62

¹⁸ Yesuq gi, Yhâng é lhîngkhyuq má byù moq mó zup míng nyi é lé myàng jáng, Yhâng é chángzô pé lé, hông hé hpoq shut gû dap ê sháng gâ ri. ¹⁹ Haú hkûn, tarâ sará rayuq gi, lé lô mù, "Sará ê, ngò gi, Nàng hká e le hká cháng râ nghut lhê." ga Yhang lé lé taí ri.
²⁰ Haú jáng, Yesuq gi, "Wamhkuí pé gi, hkyûng wó akô; nghoq pé le, nghoqsut wó akô. Nghut kôlháng, haú Byu Yhangzo gi, u nghê jowò lháng a wó nghut ri." ga lhom taí kat ri.
²¹ Haú hkûn, chángzo rayuq gi, "Yhumsîng ê, ngá wa lé ló yhûm pyám râ ahkáng hí byi shilaq." ga taí kat ri.
²² Nghut kôlháng, Yesuq gi, "Shî bê bang gi, shî bê bang yhangchang yhûm lhum kó sháng gaq, nàng gi, Ngá htâng cháng aq." ga dum taú taí ri.

Laidun Lhoq Zîm É Hkyô

Mrk 4:35-41; Luk 8:22-25

²³ Hau htâng, Yesuq lhaí hkaú má wàng mù, Yhâng é chángzô pé le, Yhâng htâng châng wàng bekô nghut ri. ²⁴ Haú hkûn, hông má byodan-htik laidun mó lò mù, wuìlhêng pé gi, lhaí má bat ùm lò bê nghut ri. Nghut kôlháng, Yesuq gi, yhup myhî tô ri. ²⁵ Chángzô pé gi, Yhâng chyáng jé ê mù, Yhang lé nhaú pun luí, "Yhumsîng ê, hkyi yù laq ô! Nga-nhúng myup ló nyi ri." ga taí akô.
²⁶ Yhang gi, "Lumjîng myit shaú é bang ê! Haí mù, haú-í gyuq bum akô lhú?" ga taí kat ri. Hau htâng, Yhang gi, toq luí, laidun eq wuìlhêng pé lé tân kat jáng, banshoq zîm byuq bê nghut ri.
²⁷ Byù haú bang gi, maúhong byuq kômù, "Shí yuq gi, hkasú é byù lhà? Làì eq wuìlhêng pé lháng gi, Yhâng é dang lé gyo byí ri myhi-nhung!" ga luí, rayuq eq rayuq myí lhûm bum akô nghut ri.

Nat Wang Júng Su Nhik Lé, Lhoq Gê Byí É Hkyô

Mrk 5:1-20; Luk 8:26-39

²⁸ Yesuq gi, Gadara byu pé é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lháng a wám lai loshoq wuì é su nhik

† 8:17 Esai 53:4

nghut akô. ²⁹ Yhangnhik gi, Yesuq lé, "Garaî Yhangzo ê, Nàng, ngamoq eq haî sêng lhê lhú? Ahkyíng a jé shimá, ngamoq lé zing-ri rã matú jé lé lo é nghut lhê lhú?" ga taî garû akô.

³⁰ Haú mai a lûm wê é jowò má, waq rajùm mó gi, myí dû but zô nyi bum akô nghut ri. ³¹ Nat gâng pé gi, Yesuq lé, "Nàng, ngamoq lé hkat htoq rã nghut jáng, hê waq pê chyáng wàng nhâng laq." ga dúng akô.

³² Yesuq gi, "Htoq ló keq!" ga taî kat ri. Haú mù, yhangmoq gi, htoq ló luí, waq pê chyáng wàng mù, waq haú jùm gi, gampyoq mai nhông hkaú shut din yán wang ló kôluí, wui hkaú má myup shi byuq bekô nghut ri. ³³ Waq zúng bang gi, myuq hkaú shut hpang din wang ló kômù, dut laî lo é hkyô banshoq lé le, nat gang wang júng huí su nhik hkâsu dut é hkyô lé le, ló taî kyo akô nghut ri. ³⁴ Haú mù, rawa bang gi, Yesuq lé hui rã matú htoq lé lo bùm kômù, Yhang lé myàng jáng, yhangmoq é mau mai htoq ló byuq rã matú, chôm dúng tôngbán akô nghut ri.

Gungjum Shî Sû Lé Lhoq Gê Byí É Hkyô

Mrk 2:1-12; Luk 5:17-26

9 Yesuq gi, lhaî má wàng mù, yhumsing é wà shut jî dap ló bê nghut ri. ² Byù ra-am gi, gùngjum shî sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjíng myit lé byu-myàng jáng, haú gùngjum shî sù lé, "Ngá zo ê, nhik hkâ-ngê; náng é yubak mara lé hkyut pyám byi bê." ga taî ri.

³ Haú hkûn, tarã sará pé ra-am gi, yhangmoq é i-myit hkaú má, "Byù shí yuq gi, Garaî Gasang lé rhoî dang taî nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myit hkaú má, haú su agè ashop é dông haî mù myit nyi akô lhú?" ⁵ "Náng é yubak mara lé hkyut pyám byi bê." nghû taî rã eq 'Toq luí, hkyô so aq.' nghû taî rã má, hká hkun je taî lui lhê lhú? ⁶ Nghut kôlhang, haú Byu Yhangzo gi, mingkan htoq má, mara hkyut byi rã ahkáng wó Sû nghut é lé, nungmoq lé sé nhâng nau lhê." ga taî luí, haú gùngjum shî sù lé, "Toq aq, náng é taphkang yu chûng luí, yhûm taú ló aq hkoi." ga taî kat ri. ⁷ Haú mù, haú yuq gi, toq mù, yhûm shut ló byuq bê nghut ri. ⁸ Byù hpûng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garaî Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

⁹ Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga taî jáng, haú yuq gi, toq luí, Yhâng htâng cháng bê nghut ri.

¹⁰ Yesuq gi, Mahte é yhûm má myinzang zô nyi é hkûn, kang guq bang myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. ¹¹ Haú lé, Hparishe pé myàng kôjáng, Yhâng é chángzô pé lé, "Nungmoq é sará gi,

haî mù luí, kang guq bang eq yubak dap bang eq rahá zo shuq nyi lhê lhú?" ga myí akô.

¹² Yesuq gi, haú su ga kô é lé wó gyo jáng, "Wángzán bang gi, chi sará a ra kó; nõhpyo hui bang za sheq ru rã lhê. ¹³ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.' † gâ é lichyúm lé mhoq yû keq. Hkâsu mù gâ le, Ngò gi, dingmán bang lé wut yù rã matú jé lé é a nghut, yubak dap bang lé ji yù rã matú sheq jé lé é ru nghut lhê." ga tû taî kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haî mù a gám kô é lhú?" ga luí, lé myí akô.

¹⁵ Haú mù, Yesuq tû taî é gi, "Bíng pé gi, lusik eq rahá nghut nyi to ashî hkûn, hkâsu ge yón kó rã lhú? Lusik lé, yhangmoq chyáng mai shuí yu pyâm é hkyíng jé rã nghut lhê; haú hkûn kúm gi, yhangmoq zoshuq gám kó rã nghut lhê.

¹⁶ Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám rã nghut lhê. ¹⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik soq htân luí, htûng buq goq byuq mù, tsibiyiq wing le yui shun byuq, htûng le htên byuq, dut rã nghut lhê. Haú mù, tsibiyiq wing asik lé, shokuq htûng sik má kat jáng sheq, haú í júng é a hten rã nghut lhê." gâ ri.

Shî Bê Myiwe Zo Eq No É Myiwe Myhí

Mrk 5:21-43; Luk 8:40-56

¹⁸ Yesuq haú su ga taî nyi é hkûn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shi byuq bê. Nghut kôlhang, Nàng lé mù, yhâng é ahtoq má loq lé ke byi laq, haú jáng, yhang, asak dum dui lò rã nghut lhê." ga taî ri. ¹⁹ Yesuq gi, toq mù, Yhâng é chángzô pé eq rahá, haú yuq htâng châng e ló akô.

²⁰ Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má ê záng kat ri. ²¹ Myiwe myhí haú gi, yhang gûng yhang, "Ngò, Yhâng é buhtâng má é wó záng jáng gi, ge byuq rã nghut lhê." ga, wó myit é yanmai nghut ri.

²² Yesuq gi, lhing wú kat luí, yhang lé myàng jáng, "Ngá zo ê, nhik hkâ-ngê, náng é lumjíng myit gi, nang lé lhoq gê byi bê nghut ri." ga taî ri. Haú hkûn jáng yhang, myiwe myhí haú gi, ge byuq bê nghut ri.

²³ Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, è myàng mù, ²⁴ yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lhê." ga taî jáng, yhangmoq gi, Yhang lé wuizui kut pyám

† 9:13 Hos 6:6

byi akô. ²⁵ Yesuq gi, byù hpûng lé, shinggan shut htoq ló nhâng mù, Yhang wang ê luî, myiwe zo haú lé loq èq zuî kat jáng, myiwe zo haú gi, dum dui toq lo ri. ²⁶ Haú hkyo é danglù gi, ramau gón yhang jam ló byuq bê nghut ri.

Myoqjit Í Yuq Eq Nhut Jit Sû Rayuq Lé, Lhoq Gê Byi É Hkyô

²⁷ Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dìn uchyang, "Dawiq é Yhangzo ê, ngá-nhik lé shogyô yù laq ô!" ga wut taí akô.

²⁸ Yesuq gi, yhúmhaú má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byi é lé, nungnhik lumjínng akô luq?" ga myí ri.

Haú hkûn, yhangnhik gi, "Lumjínng lhê ô, Yhumsîng ê." ga tû taí akô.

²⁹ Hau htâng, Yhang gi, haú nhik é myoqjí má ê záng htung luî, "Nungnhik lumjínng é eq rajung za dut sháng gaq." ga taí ri. ³⁰ Haú mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byi ri.

³¹ Nghut kôlhang, yhangnhik gi, haú hkyô lé, haú mau ramau gón yhang taí pyo ló bekô nghut ri.

³² Haú nhik htoq ló nyi kô é hkûn, nat gang wang júng luî, dang a wó nyô sù rayuq lé, Yesuq chyáng shuí lé lo akô. ³³ Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shí su dut é hkyô lé, Israe-laq amyû má radàm lháng a myang wú." ga taí bum akô.

³⁴ Nghut kôlhang, Hparishe pé kúm gi, "Nat gâng pê é zaú é wum-o a-tsam èq za, nat gâng pé lé hkat htoq pyâm é nghut ri." ga taí bum akô nghut ri.

Mû Zui Byù Shaú Ri

³⁵ Yesuq gi, myuq pé eq wà pé banshoq má wàng luî, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq noli nojàng hui bang yuq hkangmó lé, Lhoq gê byi wún ri. ³⁶ Yesuq gi, byù moq mó lé myàng jáng, wú shogyô nyi ri. Hkâ-su mù gâ le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri. ³⁷ Haú mù, Yhang gi, Yhâng é chángzô pé lé, "Kyôshú yù râ myo shoq joq kôlhang, mù zui râ byù gi, shaú nyi ri. ³⁸ Haú mù, haú kyô Yhumsîng lé, Yhâng é kyô yô má, kyô shu byù myo myo nhâng byi râ matú, dung keq." ga taí ri.

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

10 Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nõhpyo ajung jung lé wó Lhoq gê râ ahko ahkáng yhangmoq lé byi ri.

² Haú lagyo raxe í yuq é mying gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; ³ Hpilip eq Barhtolume; Htomaq eq kang guq sù Mahte; Alhpe é yhangzo Yakuq, Htade, ⁴ Zelutuq † dut é Simun eq, Yesuq lé ap pyám râ sù, Yudaq Iskarut pé nghut akô.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbaú pê chyáng le hkâ-ê kó; Samariq wà rawà má le hkâwâng kó. ⁶ Haú byuq byuq é sau pé su nghut nyi é Israe-laq byu pê chyáng sheq ê keq. ⁷ Nungmoq gi, ê mù, 'Mauhkûng mingdán gi, chyâng lò bê nghut ri.' nghu é danglù lé hko kyo keq. ⁸ Nò bang lé Lhoq gê byi, shí bê bang lé Lhoq dui toq, manggâm dap bang lé Lhoq san Lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq. ⁹ Nungmoq é hpyihit má, hîng, ngùn eq gyi pé hkâkat chûng kó; ¹⁰ hkyowui é matú, etap, mebu htaí, hkyi-tsung eq dumbáng pé hkâyú chûng kó; hkâsu mù gâ le, mù zui sù gi, zoshuq wó gíng lhê.

¹¹ Hká wâ hkâ dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhúm má za nyi nyi keq. ¹² Haú yhúm má wang é hkûn, shichyên yù keq. ¹³ Haú yhúm gi, gingdán é nghut jáng, nungmoq shimân byi é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taú lò sháng gaq. ¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhúm haú wâ mai htoq ló é hkûn, nungmoq é hkyiwa má dap é hpuilhaú lé ko hkyô pyâm to keq. ¹⁵ Ngò, nungmoq lé teng za taí kôlé, tarâ jéyáng é buinyi má, haú wâ gi, Sodom eq Gomoraq myuq htoq má je hpuzo râ nghut lhê. ¹⁶ Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmui su hpaqchyí bò luî, hpûngkyui su nú-nhâm nyi keq.

¹⁷ Byu pé lé sidiq keq; hkâsu mù gâ le, yhangmoq gi, nungmoq lé, tarâ rûng pé má é ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê. ¹⁸ Nungmoq gi, Ngá é yanmai, mauzau wui eq hkohkam pê é hí má shuí jé é hui luî, yhangmoq é hí má le, tûngbaú pê é hí má le, saksé myang hkám kó râ nghut lhê. ¹⁹ Nghut kôlhang, nungmoq lé ap pyám kô é hkûn, nungmoq hkâsu taí râ eq haí taí râ lé, hkâ-myit chiq kó. Haú hkûn taí râ dang, nungmoq wó kó râ nghut lhê. ²⁰ Hkâsu mù gâ le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí râ ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó râ nghut lhê; zo wui gi, mó wui lé gumlau toq mù, sat pyám nhâng kó râ nghut lhê. ²² Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut kôl-

† Zelutuq gâ é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israe-laq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

hang, jìhtùm jé shoq wó hkam jân nyi é sù gi, hkyi yu é hui rà nghut lhê. ²³ Rawò má zing-ri é hui jáng, rawò shut hpang é keq. Ngò, nungmoq lé teng za taí kôlé, Israelaq byu pé é myuq pé má, nungmoq a ban wang ngap shimá, haû Byu Yhangzo jé rà nghut lhê.

²⁴ Jongzo gi, sará htoq, dui-nhâng zoshâng gi, yhum-sing htoq, gyaú rà a nghut. ²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lháng Bezebulaq † ga kô le gi, Yhâng é yhumbyù wuì lé gi, je riyhang nghú kô rà a nghut lhú?

²⁶ Haû mù, yhangmoq lé hkâgyuq kó. A byông htoq loshoq wó zaú nghop tô é haí le a joq rà nghut lhê; a sé loshoq wó haq tô é le, haí a joq rà nghut lhê. ²⁷ Ngò, nungmoq lé mauchut hkaû má taí é hkyô lé, myoq myàng maubó má taí kyo keq; Ngò, nungmoq lé dang-soq soq kyo é hkyô lé, yhumhkûng htoq mai taí pyô keq. ²⁸ Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyí keq. ²⁹ Johkyáng í du lé, gyi htingchap rachap èq wó ùng pyâm lhê a nghut kô lhú? Nghut kôlhâng, haû radu lháng, nungmoq é Íwâ é myit èq a nghut jáng, myigùng má wó byit gyó rà a nghut. ³⁰ Nungmoq é ulhum má é xâm banshoq lé lháng, nghap to gù nghut lhê. ³¹ Haû mù, hkâgyuq kó; nungmoq gi, haû johkyáng myo myô htoq má lháng gù je bo é bang nghut lhê.

³² Byu pé hí má, Ngo lé lhom yín yu é sù ó yuq lé nghut kôle, mauhkûng htoq mà é Ngá Wâ é hí má, Ngò lhom yín yu rà nghut lhê. ³³ Byu pé é hí má, Ngo lé he-ngik pyám é sù ó yuq lé nghut kôle, mauhkûng htoq mà é Ngá Wâ é hí má, Ngò he-ngik pyám rà nghut lhê.

³⁴ Ngo lé, haû myidàm htoq má simsaq hkyô byi rà matú lé lo é sù su hkâ-ngâm kó. Ngò gi, simsaq hkyô byi rà matú lé lo é a nghut, shâm byi rà matú sheq lé lo é ru nghut lhê. ††³⁵ Hkâsu mù gâ le,

'Yuzqo gi, yhângwa eq, byizo gi, yhângnu eq, dumó gi, yhângmhoí eq, byoq lhum kó rà nghut lhê.

³⁶ Yhumsing é yhumbyù wuì gi, yhumsing é gyè taú dut rà nghut lhê.' ‡ gâ tô é matú sheq, Ngò jé lé é ru nghut lhê.

³⁷ Ngo lé chyt é htoq yhumsing é înu îwa lé je chyt é sù ó yuq nghut kôle, Ngá é chángzo kut rà gingdán sù a nghut; Ngo lé chyt é htoq yhumsing é zo wuì lé je chyt é sù ó yuq nghut kôle, Ngá é chángzo kut rà gingdán sù a nghut; ³⁸ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut rà gingdán sù a nghut. ³⁹ Yhumsing é asak lé ha bûn é sù ó yuq nghut kôle, asak sum rà nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó rà nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haû Ngo lé nhang kat Sù lé hap yu é sù nghut bê. ⁴¹ Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yù rà nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yù rà nghut lhê. ⁴² Shî, tiq bang mà é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù rà za nghut lhê." gâ ri.

Yesuq Eq Wui-myhup Sará Yohan

Luk 7:18-35

11 Yesuq gi, Yhâng é chángzo raxe í yuq lé dang ban pying é htâng má, Galile mau mà é wà pé má mhoqshit rà matú eq hko kyo rà matú, haû jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaû má wó gyo jáng, ³ "Nàng gi, haû jé lé lô rà Sù nghut lhê lhú? Haû a nghut jáng, ngamoq gi, góyuq lé lánng ra shirâ lhú?" ga, yhâng é chángzô pé lé myí nhang kat ri.

⁴ Yesuq tû taí é gi, "Nungmoq wó gyo wó myang é hkyô, Yohan lé ló taí kyo keq; ⁵ myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gè byî é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

⁷ Yohan é chángzô pé taú ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haí lé hpuq wú rà matú, haû yoso shut e akô lhú? Laì èq hik nhùn é jamgâm lé wú rà matú nghut akô lhú? ⁸ Haû a nghut jáng, haí lé wú rà matú e akô lhú? Nú-nhâm é mebu wut sù lé wú rà matú e akô lhú? A nghut. Nú-nhâm é mebu wut bang gi, hkohkâm-wâng pé má sheq rû nyi lhê. ⁹ Haû nghut lé gi, haí lé wú rà matú é kô é lhú? Myiqhtoi rayuq lé lhú? Haû kúm nghut ri; Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê. ¹⁰ Haú yuq é hkyô lé, Chyúm-dang má kâ tô é gi,

"Wú aq, Náng é hkyô lajang lánng rà matú, Ngá é lagyo lé, Náng é hí má Ngò nhang kat rà nghut lhê.' ‡† gâ ri. ¹¹ Ngò, nungmoq lé teng za taí kôlé, myiwe wui mai hku kat é bang má, Wui-myhup Sará Yohan htoq je kô é rayuq lháng a htoq wú shi; nghut kôlhâng, Garai Gasâng é mauhkûng mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyi mai ahkuí jé shoq, mauhkûng mingdán gi, lú chyín wang nyi é hui mù, sarhé pé gi, haú lé wó yù bekô nghut ri. ¹³ Hkâsu mù gâ le, Yohan é ahkýing jé shoq, haû myiqhtoi pé banshoq eq tarâ gi, haú hkyô eq séng luí, myiqhtoi htoí to gù nghut lhê. ¹⁴ Nungmoq hap yù nau é nghut jáng, Yohan gi, haû jé lé lô rà ga sù

† Bezebulaq gâ é gi, Tsadân é myíng rajà nghut lhê. †† Yesuq gi, simsaq hkyô byi sù nghut lhê. Nghut kôlhâng, Yhang é yanmai, byu pé mabyoq htoq rà nghut é hkyô lé sé mù, haû su ga taí é nghut lhê. ‡ 10:36 Mihka 7:6

‡† 11:10 Mal 3:1

Eliyaq nghut lhê. ¹⁵ Gyô yù râ nohkyap dap sù gi, gyô yù sháng gaq.

¹⁶ Shí ipyat lhê é byu pé lé, Ngò, hai eq taí kê wú râ lhú? ¹⁷ Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gó kó; ngamoq, ngaù hkyangsâng kôlhang, nungmoq gi, a ngaù kó.'

ga luí, gai pé má zùng mù, góbang lé wut taí lhùm nyi é zoshâng wui eq wuí akô. ¹⁸ Hkâsu mù gà le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô.

¹⁹ Haù Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. Nghut kôlhang, hpaqchyí byéng-yá gi, yhâng é muzó èq saksé tûn shit nyi ri." gà ri.

Myit A Lhing É Wà Mó Pê Hkyô

Luk 10:13-15

²⁰ Hau htâng, Yesuq gi, laklaí kumlhá pé je myo kut shit bê nghut kôlhang, myit a lhing é myuq pé lé tân é gi, ²¹ "Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tû wut lhê, myiwap kyaq gyûn lhê kut bekô râ nghut lhê. ²² Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê. ²³ Dum mù, Kaperna-um wà nàng ê, nàng gi, mauhkûng jé shoq waq toq é hui râ lhú? A nghut, mosumhkung má sheq gyó râ nghut lhê. Náng chyáng kut shit é laklaí kumlhá lé, haù Sodom wà má kut shit é ru nghut le gi, myuq haù hkû-nyí jé shoq joq nyi râ nghut lhê. ²⁴ Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." gà ri.

Ngú Nyí Bâng É Matú Bánno Jang

Luk 10:21-22

²⁵ Haù u lé, Yesuq taí é gi, "Mauhkûng eq myigung é Yhumsîng, Áwa ê, Nàng gi, haù pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wui lé tûn shit bê nghut é yanmai, Ngò, Nang lé hkya-on lhê ô. ²⁶ Nghut bê, Áwa ê, haù gi, Nàng ô nau é hkyô nghut ri.

²⁷ Ngá Wa gi, lhunglhang lé Ngá é loq má ap byí to bê. Haù Zo lé, Áwa mai lai luí ó le a sé; Áwa lé le, haù Zo eq haù Zo mai sé nhâng râ matú hkyin yu é bang mai lai luí ó a sé.

²⁸ Ngú é eq wôlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê. ²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haù hkûn, nungmoq é asak woi-nyí bánno kó râ nghut lhê. ³⁰ Haí mù gà le,

Ngá é kandang gi, waq lui é htoq agó, Ngá é wò le sôm lhê." gà ri.

Bánno Buinyi É Yhumsîng

Mrk 2:23-28; 3:1-6; Luk 6:1-5, 6-11

12 Haù yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaù mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yù mù, zô akô nghut ri. ² Hparishe pé gi, haù lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akô." ga taí kat akô.

³ Haù hkûn, Yesuq tû taí é gi, "Dawiq lhang gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lhú? ⁴ Dawiq gi, Garai Gasâng é yhúmhaù má wang ê mù, hkyangjông pé mai lai luí, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lhú? ⁵ Hau htoq agó, Bánno buinyi má, hkyangjông pé gi, noqkuq yhúmhaù má Bánno buinyi é tarâ lé shut kôlhang mara a wó é lé, haù tarâ laiká má nungmoq a nghap wú kó lhú? ⁶ Ngò, nungmoq lé taí kôlé, haù noqkuq yhùm htoq je ko sù gi, shí má nghut nyi lhê. ⁷ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê' †† gà é lichyúm lé nungmoq sé kô é ru nghut le gi, mara a bò bang lé mara hùn kó râ a nghut. ⁸ Hkâsu mù gà le, haù Byu Yhangzo gi, haù Bánno buinyi é Yhumsîng nghut lhê." gà ri.

⁹ Hau htâng, Yhang gi, haù jowò mai e ló mù, yhangmoq é tarajong má wang e ló ri. ¹⁰ Loq rahkyam ajum shi byuq é byù rayuq le, haù má nyi tô ri. Yhangmoq gi, Yesuq lé, "Bánno buinyi má, nõhpyo lhoq gê byi le, tarâ wang lhê lhú?" ga myi é dõng, Yhang lé mara hùn râ hkyô ho akô nghut ri.

¹¹ Haù hkûn, Yesuq gi, "Nungmoq chyáng mâ é ó yuq wá, yhumsîng é sau radu, Bánno buinyi má dong gyó tô le, a xe htoq yu é nyi kó râ lhú? ¹² Byù gi, saù htoq má hpaudap dik é nghut lhê! Haù mù, Bánno buinyi má ge é hkyô kut le, tarâ wang lhê." ga yhangmoq lé tû taí ri.

¹³ Hau htâng, Yhang gi, haù loq jum shí sù lé, "Náng é loq nyhang kat aq." ga taí kat jáng, haù yuq gi, loq nyhang kat jáng, loq haù gi, a no é loq su ge byuq bê nghut ri. ¹⁴ Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chòm hpyè lhùm bum akô nghut ri.

Garai Hkyin Tô É Dui-nhâng Zoshâng

¹⁵ Yesuq gi, haù hkyô lé sé jáng, haù jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nõhpyo hui bang banshoq lé lhoq gê byi luí, ¹⁶ Yhang ó yuq nghut é hkyô lé, a taí byông htoq râ matú, yhangmoq lé taí hkûm tô ri. ¹⁷ Haù gi, myiqhtoi Esai-aq é nhut dõng mai taí tô é dang lé lhoq dik râ matú nghut ri. Dang haù pé gi,

¹⁸ "Shí yuq gi, Ngò chyt, Ngò myit nguì luí, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù, Yhang gi, tarâ dingmán é hkyô lé byù myû banshoq pé má taí kyo râ nghut lhê.

¹⁹ Yhang gi, haí a hpuq tú é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

²⁰ Yhang gi, tarâ dingmán é hkyô lhoq ung é hkûn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyí bê myi lé le, lhoq sat pyám râ a nghut.

²¹ Byù myû chângjup gi, Yhâng é mying má myit myoqbyù kó râ nghut lhê." †
gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

²² Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gè byí ri; haú mù, haú yuq gi, dang le wó nyô, myoq le wó myâng dut bê nghut ri. ²³ Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga taí bum akô.

²⁴ Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pè é zau Bezebulaq †† é wum-o a-tsam eq za nat gâng pé lé wó hkat htoq é nghut ri." ga taí bum akô nghut ri.

²⁵ Yhangmoq myit nyi é hkyô lé Yesuq sé mù, yhangmoq lé taí é gi, "Hká mingdán nghut kôle, ahkaú má byoq gâng lhûm nyi kô é nghut jáng, htên byoq byuq râ za nghut lhê; haú eq rajung za, myuq ralhum nghut nghut, yhumhtu ralhum nghut nghut, yhangchang byoq lhûm nyi kô é nghut jáng, haú gi, wó gîng nyi râ a nghut. ²⁶ Tsadán gi, Tsadán lé hkat htoq pyâm é nghut jáng, yhumsing gung yhumsing lhoq hpyoq nyi gù bê nghut ri. Haú su nghut jáng, yhâng é mingdán gi, hkâsu kut wó gîng to râ lhú? ²⁷ Haú mù luí, Ngò gi, Bezebulaq é wum-o a-tsam eq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam eq hkat htoq pyám kô é nghut lhê lhú? Haú su nghut jáng, haú bang gi, nungmoq lé tarâ jéyáng bang dut kó râ nghut lhê. ²⁸ Nghut kôlhang, Ngò gi, Garai Gasâng é Woi-nyí eq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

²⁹ Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhûm má lú wâng mù, yhâng é sutzè lé hkâsu wó lú yú râ lhú? Haú yuq lé hí tuí zing pyám jáng sheq, yhâng é sutzè lé wó lú yú râ nghut lhê.

³⁰ Ngá hkyam shut a dap sù gi, Ngo lé gyè kut sù nghut lhê; Ngò eq rahá a shûm tsing sù gi, lhoq pyo pyâm é sù nghut nyi ri. ³¹ Haú mù, Ngò, nungmoq lé taí kôlé, byu pé é yubak mara hkangmó eq Garai

† 12:21 Esai 42:1-4 †† Bezebulaq gâ é gi, Tsadán é mying rajà nghut lhê.

Gasang lé rhoí dang taí pyâm é lhunglhang gi, mara hkyut byí é wó hui râ nghut lhê. Nghut kôlhang, haú Chyoiyúng Woi-nyí lé rhoí dang taí pyâm é gi, mara hkyut byí é hui râ a nghut. ³² Haú Byu Yhangzo lé dang dông shut é sù gi, mara hkyut byí é wó hui râ nghut lhê; nghut kôlhang, haú Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

³³ Ashi lé wú luí, agàm lé sé râ nghut é yanmai, agàm lé lhoq gè jáng, ashi le gè râ nghut lhê; agàm lé a lhoq gè jáng, ashi le gè râ a nghut; ³⁴ Duq htân lhangmui amyû ê, nungmoq gi, agè ashop é bang nghut to kôluí nhîng, dang gè hkâsu wó taí kó râ lhú? Hkâsu mù gâ le, i-myit unghkaú má byíng mui tô é lé za, nhut mai taí htoq lo é nghut lhê. ³⁵ Ge é sù gi, yhumsing é i-myit unghkaú má é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaú má é agè ashop é sutdò mai, agè ashop é zè pé lé lhoq htoq shit lhê. ³⁶ Ngò, nungmoq lé taí kôlé, byù gi, yhumsing taí kat é akyû a bo é dang pè é matú, tarâ jéyáng é buinyi má taí sân kyo ra kó râ nghut lhê.

³⁷ Hkâsu mù gâ le, yhumsing mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê." gâ ri.

Limik Kumlhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tarâ sará pé ra-am gi, "Sará ê, ngamoq gi, Nàng, limik kumlhá kut shit râ lé myàng nau ri." ga Yhang lé dúng akô.

³⁹ Haú mù, Yhang tú taí é gi, "Agè ashop é eq lhum a zuí é ipyat shí gi, limik kumlhá dung nyi ri myhi-nhung! Myiqhtoi Yonaq é kumlhá mai lai luí, gotú haí le tûn shit râ a nghut. ⁴⁰ Hkâsu mù gâ le, Yonaq gi, ngo mó é wamdau hkaú má sum nyí sum myín lúng é su, haú Byu Yhangzo le, myigùng káng má sum nyí sum myín lúng râ nghut lhê. ⁴¹ Ninewe wà byu wuì gi, Yonaq mungdang hko kyô é hkûn myit lhîng kô é nghut mù, tarâ jéyáng é buinyi má, ipyat shí má é bang eq rahá toq lò luí, ipyat shí má é bang lé mara hûn kó râ nghut lhê; haú Yonaq htoq ko sù gi, ahkuí shí má jé nyi to bê. ⁴² Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haú tarâ jéyáng é buinyi má, ipyat shí má é bang eq rahá toq lò luí, ipyat shí má é bang lé mara hûn râ nghut lhê; haú Sholumon htoq ko sù gi, ahkuí shí má jé nyi to bê.

⁴³ Haú agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri. ⁴⁴ Haú hkûn, yhang gi, 'Ngò nyi lai lo é yhûm má dum taú ló wú rá.' ga taí ri. Yhang dum taú jé ló wú le, yhûm haú lé, ó le a sing yu hpyuq é htoq agó, san za rago dut to lánng é lé ló myang ri. ⁴⁵ Haú jáng, yhang gi, dum taú ê mù, yhâng htoq je wuì é nat nyhit nat lé shuí lò luí, haú má lo wang nyi to bekô. Haú mù, haú yuq é nyi yap sâmlai gi, hí lhê htoq má je wuì lò bê nghut ri; agè

ashop é ipyat shî le, haû eq rajung za dut râ nghut lhê." gâ ri.

Yesuq É Yhângnu Eq Yhanggû Pé

Mrk 3:31-35; Luk 8:19-21

⁴⁶ Yesuq, shiwa byu pé lé dang rû nyo nyi ashî hkûn, yhangnu eq yhanggu pé gi, Yhang lé nyò naù kômù, shinggan má lé yap tô akô nghut ri. ⁴⁷ Haû mù, Yesuq lé, "Náng nu eq nunggu pé gi, Nang lé nyò naù mù, shinggan má lánng yap bum akô." ga taî kyô akô.

⁴⁸ Haû hkûn, Yhang gi, "Ô pé gi, Ngá nu eq Ngá gu pé nghut akô lhú?" ga tû taî kat ri. ⁴⁹ Hau htâng, Yhang gi, Yhâng é chángzô pé lé loq tun luî, "Wú keq, shí bang gi, Ngá nu eq Ngá é gumang wuì nghut bê.

⁵⁰ Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taî ri.

Kyôshi Sân É Dangtú

Mrk 4:1-20; Luk 8:4-15

13 Haú nyí má yhang, Yesuq gi, yhúmhkaû mai htoq ló mù, wuì nhông yàm má ê zung tô ri.

² Byù hpûng mó gi, Yhâng é lhîngghkyuq má zup zîng lé bûm kô é yanmai, Yhang gi, lhaî hkaû má doq zûng tô ri. Shiwa byu pé kúm gi, gin-gau htoq má yap tô bum akô. ³ Hau htâng, Yhang gi, haú bang lé, dangtú pé dông myo myo taî é má, "Kyô hkyô sù rayuq gi, kyôshi san râ ga htoq e ló ri. ⁴ Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, luì za yuq htoq lô kôle, ⁶ amyit a wó chîn hing é nghut mù, buì htoq lô jáng, lhap kyuq pyám bê nghut ri. ⁷ Dum ra-am gi, zuyóom hkaû má gyó ang luî, zubyap haú pé kô lò mù, wup pyám ri. ⁸ Ra-am dum nghut jáng, myihpún bo é jang má gyó ang luî, ashi zuí lo é gi, sân kat é htoq rashô tú, hkyuq xê tú, sum xê tú, myô jat lo é nghut ri. ⁹ Gyô yù râ nohkyap dap sù gi, gyô yù sháng gaq." ga le taî ri.

¹⁰ Haú hkûn, chángzô pé gi, Yhâng chyáng lé mù, "Nàng gi, haî mù, shí bang lé, dangtú dông taî lhê lhú?" ga myí akô.

¹¹ Haú jáng, Yhang tû taî é gi, "Mauhkûng mingdán eq sêng é sê gyo wuì é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a byi shî é nghut lhê. ¹² Wó to sù lé gi, yhang agùn agó wó râ matú, jat byi shirâ nghut lhê. A wó su chyáng mai kúm gi, yhang wó tô é lé lháng yu pyám byi shirâ nghut lhê. ¹³ Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yhangmoq lé Ngò dangtú dông taî râ é nghut lhê. ¹⁴ Haû gi,

'Nungmoq gi, wó gyô tô nyi kôlhang, sê gyo kó râ a nghut;

myang tô nyi kôlhang, wú sé kó râ a nghut.

¹⁵ Hkâsu mù gâ le, byù shí bang gi, myit nhikshi jit byuq bê;

yhangmoq é nohkyap gi, a wó gyo kó, myoqjí le chûm byuq bekô nghut ri.

Haû su a nghut le gi, yhangmoq, myoq myàng no gyo mù,

i-myit bun bóng luî, lhîng lò kômù,

Ngò, yhangmoq lé yâ gè byi berâ nghut lhê.' † gâ é, Esai-aq é myiqhtoi dang lé lhoq dik é nghut ri.

¹⁶ Nghut kôlhang, nungmoq é myoq gi, wó myàng mù, nungmoq é nohkyap gi, wó gyô é yanmai, nungmoq gi, hkungsô wó nyi ri. ¹⁷ Hkâsu mù gâ le, Ngò, nungmoq lé teng za taî kôlé, nungmoq wó myàng, wó gyô é pé lé, myiqhtoi pé eq dingmán bang myo myo gi, myàng naù gyo naù kôlhang, a wó myàng, a wó gyo kó nghut ri.

¹⁸ Ahkuî, kyôshi san sù eq sêng é dangtú é lichyúm lé rago gyô wú keq; ¹⁹ Hkyô má gyó âng é kyôshi gi, mauhkûng mingdán eq sêng é danglù lé wó gyo kôlhang, a sê gyô é yanmai, haû agè ashop sù lé lô mù, yhâng é i-myit hkaû má san kat tô é kyôshi lé, lé yu pyám byí é hui sù lé gá nau é nghut lhê. ²⁰ Luqgok yò pé má gyó âng é kyôshi gi, mungdang lé wó gyo jáng, radá dâm gabú myit èq hap yù kôlhang, ²¹ amyit a wó chîn é yanmai, razup zo za yuq mù, mungdang é yanmai, wuîhkê é eq zing-rí é hui kôjáng, hân hân htak ló byuq é sù lé gá nau é nghut lhê. ²² Zuyóom má gyó âng é kyôshi gi, haû mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuí nghoq jung ngùn hing zèhkoq èq hup pyám é yanmai, ashi a wó zuí é sù lé gá nau é nghut lhê. ²³ Nghut kôlhang, myihpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haú yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taî kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri. ²⁵ Byu pé yhup myhî tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luî, taù ló byuq bê nghut ri. ²⁶ Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

²⁷ Yhumsîng hpô é dui-nhâng zoshâng wuì gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myi kôjáng, ²⁸ haû yhumsîng hpó gi, 'Gum-lau gye èq kut é nghut ri.' ga tû taî ri.

Haû jáng, dui-nhâng zoshâng wuì gi, 'Ngamoq, myoq haú pé lé è nut pyám râ lé, nàng ô nau ri lhú?' ga myí akô.

²⁹ Haú hkûn, yhang gi, 'Hká nut pyám kó; hkâsu mù gâ le, nungmoq, myoq haú pé lé nut é hkûn, guq gàm pé lé le bo záng nut pyám kó râ nghut lhê. ³⁰ Kyôshu yoq jé shoq rahá yuq to kó sháng gaq; haú hkûn, myoqgàm pé lé hí hkyin tsîng yù mù, nyhê hkyô pyám râ matú hkyom dîng to luî, guq lé kúm gi, shù yù mù, ngá

† 13:15 Esai 6:9-10

é chyí má tsing kat to râ matú, kyô shu bang lé ngò taí râ nghut lhê. ' ga tũ taí ri." gâ ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhum dum xoq taí é gi; "Mauhkûng mingdán gi, byù rayuq èq, yhâng hkyâm má hô tô é angshi cham eq wuí ri. ³² Angshi cham haû gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taí é gi, "Mauhkûng mingdán gi, myiwe rayuq èq sungso mún sum bûng má yu nyhó luí, haú pé banshoq lé wó lhoq dau nhang é múnchi eq wuí ri." gâ ri.

³⁴ Yesuq gi, byù moq mó lé, haú pé banshoq dangtú dông mai chyat taí ri; yhangmoq lé, dangtú a bo é haí lháng a taí wú nghut ri. ³⁵ Haû gi,

"Ngá nhut lé hpóng mù, dangtú dông mai taí râ; mingkan lé sângh-hi hpan é mai zaú tô é hkyô pé lé taí sân kyo râ nghut lhê." †
ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq ló mù, yhúmhkaû má wang ló ri. Haú hkûn, Yhâng é chángzô pé gi, Yhâng chyáng lé lô kômù, "Yò mâ é myoqgàm dangtú eq sêng é hkyô lé taí sân kyo laq." ga taí akô.

³⁷ Haû jáng, Yhang tũ taí é gi, "Ge é kyôshi san sũ gi, haû Byu Yhangzo nghut ri. ³⁸ Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haû Tsadán é yhangzô pé nghut akô; ³⁹ haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

⁴⁰ Haû myoqgàm pé lé, nut yù mù, myi má nyhê pyâm é su, haû mingkan htûm é ahkyíng má dut râ nghut lhê. ⁴¹ Haû Byu Yhangzo gi, Yhâng é maumang lagyô pé lé nhâng râ nghut lhê; haû mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglháng lé, Yhâng é mingdán mai hkyin she htoq yù mù, ⁴² gyúng nyi é myibung hkyûng hkaû má dú kat pyám kó râ nghut lhê; hau má, ngaubyi ngaù nhap eq zuí kyik kyik shoq hpuzô nyi kó râ nghut lhê. ⁴³ Haú hkûn, dingmán bang gi, yhangmoq Yhângwâ é mingdán má bui su duqbó nyi kó râ nghut lhê. Nohkyap dap sũ gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè haú lé myang é sũ gi, haú lé saí haq to

mù, gabú myit èq taú ló luí, yhang wó é banshoq lé ùng pyám mù, yò haú lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó eq wuí ri. ⁴⁶ Yhang gi, gyai hpaù é palhé lé myàng jáng, yhang wó é banshoq lé ló ùng pyám mù, haú lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri. ⁴⁸ Gùn haú má ngozo byíng jáng, ngo kóng bang gi, wui yàm má she htoq yù mù, zung to luí, ge é pé lé gi, ngo-pyap má guq kat yù luí, a ge é pé lé gi, dú pyâm akô. ⁴⁹ Haû eq rajung za, mingkan htûm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yù luí, ⁵⁰ ngaubyi ngaù nhap eq zuí kyik kyik shoq hpuzô nyi râ nghut é, gyúng nyi é myibung hkyûng hkaû má dú kat pyám kó râ nghut lhê.

⁵¹ Shí hkyô banshoq lé nungmoq sê gyo bekô lhú?" gâ ri.

Haú hkûn, yhangmoq gi, "Sê gyo bê." ga tũ taí akô nghut ri.

⁵² Hau htâng, Yesuq gi, yhangmoq lé, "Mauhkûng mingdán eq séng luí mhoq yù bê é tarâ sará ó nghut kôle, yhang mhoq é hkyô gi, yhum-sing é sut-púngl-húng hkaû mai zè sik zè xau lé yu htoq é yhum-sing hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú haú pé lé ban taí jáng, haú jowò mai htoq e ló bê nghut ri. ⁵⁴ Yhang gi, Yhâng é yhum-mau má jé ló jáng, byu pé lé, yhangmoq é tarajong má mhoqshit ri; haú hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê lhà? ⁵⁵ Yhang gi, laksîma hpô é yhangzo a nghut lhú? Yhângnũ é myíng gi, Mariq gâ lhê a nghut lhú? Yhanggũ pé gi, Yakuq, Yosep, Simun eq Yudaq gâ é bang a nghut kó lhú? ⁵⁶ Yhâng nhammó pé le, nganhúng eq rahá nghut nyi lhê a nghut kó lhú? Haú su nghut le nhíng, haú pé banshoq lé, Yhang hkâmai wó yu é nghut lhê lhà?" ga myí bùm kômù, ⁵⁷ Yesuq lé my-it a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhum-sing é yhum-mau eq yhum-sing é yhũm má za, myoqdong a lhaq wó wú é nghut lhê." ga tũ taí kat ri.

⁵⁸ Yhangmoq lumjíng myit a bò kô é yanmai, Yesuq gi, haú má, laklaí kumlhá myo myo a kut shit lo nghut ri.

Wui-myhup Sará Yohan Shi Byuq É Hkyô

Mrk 6:14-29; Luk 9:7-9

14 Haú hkûn, mauzau Herut gi, Yesuq eq sêng é ludang lé wó gyo jáng, ² yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung;

† 13:35 Hkya-on 78:2

Yhang gi, shi é mai dum dui toq lo é nghut mù, hpung-wup a-tsam haú pé lé wó kut é nghut ri." ga taí ri.

³ Herut haú su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri. ⁴ Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byí nyi é yanmai nghut ri.

⁵ Herut gi, Yohan lé sat pyám naú kôlhang, mingbyû wuì lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyí kô é yanmai nghut ri.

⁶ Nghut kôlhang, Herut é hkû ladu hkyúm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù, ⁷ byizo haú lé, yhang haí dung le haí byi râ ga dakam é dang-gidiq byí ri. ⁸ Byizo haú gi, yhangnu hpaqchyí byí é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹ Mauzau hpô gi, myit a ngón dut byuq kôlhang, yhang dakam é dang-gidiq é yanmai le, bíng pé é myoqdong lé tê nau é yanmai le, yhang dúng é lé, byi râ matú, ¹⁰ htóng hkaú má lúng tô é Yohan é ulhum lé hpyit râ hkunmó hkyô kat bê nghut ri. ¹¹ Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhangnu chyáng yu ló byí ri. ¹² Haú mù, Yohan é chángzô pé gi, yhang é mâng lé lé yù luí, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyíng Lé Byi Tsô É Hkyô

Mrk 6:30-44; Luk 9:10-17; Yhn 6:1-14

¹³ Yesuq gi, haú hkyô lé wó gyo jáng, haú mai lhaí ji mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e ló akô nghut ri.

¹⁴ Yesuq gi, lhaí mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byí ri.

¹⁵ Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuì kó sháng gaq, yhangmoq lé nhang kat aq hkoí." ga taí akô.

¹⁶ Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

¹⁷ Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

¹⁸ Haú jáng, Yesuq gi, "Yu lò keq." ga tû taí mù, ¹⁹ shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkúng shut tu wú to luí, jeju ban hkyá-on jáng, muk lé hpê gàm mù, chángzô pé lé byí ri. Haú chángzô pé gi, shiwa byu pé lé gàm byí akô nghut ri. ²⁰ Yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri. ²¹ Haú má zô é

bang gi, myiwe wuì eq zoshâng wuì lé a nghap lhôm é za, yuqgè baú ngo hkyíng kô bo ri.

Yesuq, Wuì Htoq Má Sô É Hkyô

Mrk 6:45-56; Yhn 6:15-21

²² Yesuq gi, haú shiwa byu pé lé byo ló nhang nyi é hkûn jáng, chángzô pé lé lhaí má wang ji nhâng mù, tû tap shut dap ló lánng nhang ri. ²³ Shiwa byu pé lé nhang pyâm é htâng má, Yhang gi, kyûdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haú má nyi nyi ri. ²⁴ Haú u lé, lhaí gi, gin-gau mai tsómra wê é jowò má jé é hkûn, lai tau mut é yanmai, wuìheng eq gyai yhang lo bat nhún é hui zô ri.

²⁵ Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Haú mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é eq taí garú akô nghut ri.

²⁷ Haú jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

²⁸ Haú hkûn, Petruq gi, "Yhumsíng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taí kat ri.

²⁹ Haú jáng, Yesuq gi, "Lé lô aq." ga tû taí kat ri.

Haú mù, Petruq gi, lhaí mai gyó mù, wuì htoq mai Yesuq chyáng sô e ló ri. ³⁰ Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyí mù, "Yhumsíng ê, ngo lé hkyi yù laq." ga wut garú kat ri.

³¹ Yesuq gi, radá dâm yhâng é loq lhâm kat luí, Petruq lé lánng zing to mù, "Lumjíng myit shau sù ê, nàng haí mù úng-âng lhê lhú?" ga taí ri.

³² Yhangnhik, lhaí má wàng kôjáng, laidun le zím byuq bê nghut ri. ³³ Hau htâng, haú lhaí má lúng tô é bang gi, Yhang lé paí gop mù, "Nàng gi, gè gè yhang, Garai Gasâng é Yhangzo nghut bê." ga taí akô nghut ri.

³⁴ Yhangmoq gi, gû dap ló kômù, Genesarat mau má jé wang ló bekô nghut ri. ³⁵ Haú mau mà é bang gi, Yesuq lé wú sé kôjáng, awui ayàm mà é bang banshoq lé kyô kat akô. Haú mù, byu pé gi, nòhpyo hui bang lhunglháng lé, shuí lé lô kômù, ³⁶ nòhpyo hui bang lé, Yhâng é bushi htâng má za lháng záng nhâng râ matú dúng tôngbán akô; Yhang lé záng é lhunglhâng bang gi, lhoq gê byí é huí bekô nghut ri.

Sansêng É Hkyô Eq A Sansêng É Hkyô

Mrk 7:1-23

15 Hau htâng má, Hparishe pé eq tarâ sará pé ram gi, Yerusalem wà mó mai Yesuq chyáng jé lé lô kômù, ² "Nàng é chángzô pé gi, haí mù luí, íchyí íwa pé é htungli lé a cháng kut akô lhú? Yhangmoq gi, loq hí a chí é zang zô akô nghut ri." ga, lé taí akô.

³ Haú jáng, Yesuq tû taí é gi, "Nungmoq gi, haí mù, nungmoq é htungli é yanmai, Garai Gasâng é hkunmó

lé a cháng kô é lhú? ⁴ Hkâsu mù gà le, Garai Gasang gi, 'Nungmoq é ìnu ìwa lé, hkungga keq.' † ga le, 'Ìnu ìwa lé, nhîng é sú ó yuq nghut kôle, sat pyâm é hui râ lhê.' †† ga le, taî tô é nghut lhê. ⁵ Nghut kôlhang, nungmoq taî é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taî é nghut jâng, ⁶ haú yuq gi, yhângwa lé hkungga nó a ra.' gà akô nghut ri. Haú đông mai, nungmoq gi, nungmoq é htônglê é yanmai, Garai Gasang é mungdang lé he-ngik pyâm akô nghut ri. ⁷ Gegùn labyoq kut bang ê! Nungmoq eq séng luí, myiqhtoi Esai-aq htoî tô é dang gi, têng ri. ⁸ Myiqhtoi dang haú gi,

'Byù shí bang gi, nhut htoq mai za Ngo lé hkunggâ akô;

yangmoq é myit nhiklhum gi, Ngò eq wê gâng nyi akô.

⁹ Yangmoq, Ngo lé noquq nyi kô é gi, akôm má za nghut nyi ri;

hkâsu mù gà le, yangmoq é mhoqshit hkyô pé gi, byù đông mai mhoqshit é hkyô pé za nghut nyi ri.' ‡ gà é nghut lhê." gà ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq. ¹¹ Nhut má wang lo é haí jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taî ri.

¹² Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lhú?" ga myi kôjáng,

¹³ Yang gi, "Mauhkûng htoq tsáng myhâng má é Ngá Wa a hô tô é agàm hkangmó gi, apûn eq roq nut pyâm é hui râ nghut lhê. ¹⁴ Yangmoq é yanmai, myit hkâ-myô kó; yangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yangchang hkyô-u she lhûm é nghut le gi, í yuq é yang donghkong má byit gyó kó râ za nghut lhê." ga tû taî ri.

¹⁵ Haú hkûn, Petruq gi, "Ngamoq lé, dangtú hau é lichyúm taî sân kyo laq." ga taí jáng, ¹⁶ Yesuq gi, "Nungmoq, ahkuí le haú-í yang go nyi ashi kô luq?

¹⁷ Nhut má wang lo é haí jung le, wamdau hkaú má jé wang ló mù, gungdu mai dum htoq ló é nghut lhê.

¹⁸ Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri. ¹⁹ Hkâsu mù gà le, myit nhiklhum mai htoq lo é gi, agè ashop é đông myit é hkyô pé, byù sat é hkyô, su-myi sulàng lú hkyô, ashop é đông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri. ²⁰ Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taî ri.

Hkanan Myiwe Myhí Rayuq É Lumjín Myit

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri. ²² Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsing ê, ngo lé shogyô yù laq ô! Ngá byizo gi, nat gang wang júng mù, gyai yangh nô gyín nyi ri." ga taî garû ri.

²³ Nghut kôlhang, Yesuq gi, dang rahkun le a tû taí nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí haú lé ló nhang pyám aq; haí mù gà le, yang gi, nga-nhông é htâng má châng garû nyi ri." ga taî akô.

²⁴ Yesuq gi, "Byuq byuq é sau pé su nghut nyi é Israe-laq byu pé chyáng sheq, Ngo lé nhang kat é ru nghut lhê." ga taî ri.

²⁵ Haú hkûn, myiwe myhí haú gi, Yhâng é hí má lé mù hkyihput htuaq luí, "Yhumsing ê, ngo lé garúm yù laq ô!" ga taî ri.

²⁶ Yesuq gi, "Zô wui chyáng mâ é zoshuq lé yù mù, hkuí pé lé byi tsô é jung a nghut." ga tû taí jáng, ²⁷ myiwe myhí haú gi, "Yhumsing ê, haú kúm nghut ri; nghut kôlhang, hkuí pé lháng, yhumsing hpô é zohpoq mai gyó é zang cham zang htâng lé, zô akô mhaí." ga dum taî ri.

²⁸ Haú mù, Yesuq gi, "Myiwe zo ê, náng é lumjín myit gi, kô nyi ri! Nàng dúng é hkyô lé gyo byi bê nghut lhê." ga tû taî ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô

Mrk 8:1-10

²⁹ Yesuq gi, haú mai htoq ló luí, Galile nhông yàm má ê jé mù, bùm shut doq ló luí, ló zung nyi ri. ³⁰ Haú hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nô bang gotû myo lé shuí lé lô kômù, Yhâng é hkyî wang má lé nyhi to kô é nghut luí, Yang gi, haú bang lé lhoq gê byí ri.

³¹ Haú shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yangmoq, hkyolat má mut yut ló yut kó abe, yangmoq zòmút to gû lé, Ngò a nhang kat naù." ga taî ri.

³³ Haú hkûn, Yhâng é chángzô pé gi, "Isù é yoso má nhîng, byù shí myhò bang lé luq shoq byi tso râ zoshuq gi, hkarâ é wó râ lhú?" ga myí akô.

³⁴ Yang gi, "Nungmoq, muk hkâ-myhó long wó akô lhú?" ga tau myi jáng, yangmoq gi, "Muk nyhit long eq ngo-nú zo ratsuí wó lhê." ga tû taí akô.

³⁵ Haú mù, Yang gi, byù hpúng lé, myigùng htoq má zùng nhang ri. ³⁶ Hau htâng, Yang gi, haú muk

† 15:4 Htoq Ló 20:12 †† 15:4 Htoq Ló 21:17 ‡ 15:9 Esai 29:13

nyhit long eq ngozo lé yù mù, jeju ban hkya-on jáng, myhik hpé luí, haù chángzô pé lé byi jáng, yhangmoq gi, byù hpúng lé gàm byi akô nghut ri. ³⁷ Yhangmoq lhunglhang bang zô gyí bùm kô é htâng má, haù chángzô pé gi, amyit ahtâng lé nyhit mung byíng shoq wó guq tsíng yu ashî kô nghut ri. ³⁸ Haù hkûn zô é bang má, myiwe wuì eq zoshâng wuì lé a nghap lhôm é za, yuqgè wuì baú myi hkyíng yuq bo ri. ³⁹ Yesuq gi, byù hpúng lé ló nhang pyâm é htâng má, lhaí má wang ji mù, Magadan mau shut dap e ló bê nghut ri.

Kumlhá Dung Kô É Hkyô

Mrk 8:11-13; Luk 12:54-56

16 Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng má é kumlhá kut shit râ matú, dúng akô.

² Haù mù, Yhang gi, yhangmoq lé, "Nungmoq gi, my-inhtâng jé jáng, 'Mau hpong râ nghut lhê, hkâsu mù gà le, mauhkûng ne ri.' ga le, ³ napkyó lé nghut jáng, 'Hkû-nyí laidun lò râ nghut lhê, hkâsu mù gà le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yú kô é nghut kôlhang, shí ipyat lhê é kumlhá lé gi, a sê gam hkoq yú kó nghut ri. ⁴ Agè ashop é eq lhum a zuí é ipyat shî gi, limik kumlhá lé ho nyi akô; nghut kôlhang, Yonaq é kumlhá mai lai luí, gotû haí le tân shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pê É Múnchi

Mrk 8:14-21

⁵ Yhangmoq, nhông hé hpoq shut gû dap ló kô é hkûn, haù chángzô pé gi, muk yu chûng râ lé tô-myhî pyâm akô. ⁶ Haù hkûn, Yesuq gi, "Hparishe pé eq Saduke pê é múnchi lé, sidiq luí, koi pyâm nyi keq." ga, yhangmoq lé taí kat ri.

⁷ Yhangmoq gi, "Nga-nhúng, muk a yu chung é yan-mai, haù su ga taí é nghut ri." ga luí, taí lhum bum akô nghut ri.

⁸ Yhangmoq haù su taí lhûm nyi kô é lé Yesuq sé jáng, yhangmoq lé, "Lumjíng myit shaù é bang ê, muk a bo é hkyô lé, haí mù taí lhûm nyi akô lhú? ⁹ Ahkuí jé shoq, nungmoq gi, a sê gyo shi kó lhú? Muk ngo lông èq byù ngo hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le, ¹⁰ muk nyhit lông èq byu myi hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le, nungmoq a myit bun kó lhú? ¹¹ Ngò gi, muk eq séng luí taí é a nghut é lé, nungmoq, hkâsu mù a sê gyo kô é lhú? Hparishe pé eq Saduke pê é múnchi lé koi pyám keq nghû taí é ru nghut lhê." ga taí ri. ¹² Haù hkûn sheq, Yhang taí é gi, muk má chung é múnchi lé koi pyám râ matú taí é a nghut e za, Hparishe pé eq Saduke pê é mhoqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô

Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haù Byu Yhangzo gi, ó yuq nghut lhê ga, byu pé taí akô lhú?" ga myí ri.

¹⁴ Haù hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taí akô." ga tû taí kôjáng, ¹⁵ Yhang gi, "Haù jáng, nungmoq gi, Ngo lé ó yuq nghut lhê nghu akô lhú?" ga, yhangmoq lé xoq myí ri.

¹⁶ Haù hkûn, Simun Petruq gi, "Nàng gi, rû dui nyi é Garai Gasâng é Yhangzo, Hkrisduq nghut ri." ga tû taí ri.

¹⁷ Haù mù, Yesuq tû taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gà le, nang lé haù hkyô tân shit é gi, byù mai a nghut, mauhkûng htoq má nyi é Ngá é Íwa mai tân shit é ru nghut lhê.

¹⁸ Ngò, nang lé taí lé, nàng gi, Petruq † nghut luí, luq-gok shî má, Ngò, Ngá é noqkuq hpúng lé xuq to râ nghut mù, haù moming hkúmdong pé gi, hpúng haù lé wó úng râ a nghut. ¹⁹ Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi râ nghut lhê." gà ri. ²⁰ Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûm kat ri.

Yesuq Gi, Yhang Shî Râ Lé Hí Te Taí É Hkyô

Mrk 8:31—9:1; Luk 9:22-27

²¹ Yesuq gi, Yhang Yerusalem wà mó má ló mù, suwún wuì, hkyangjong agyi pé eq tarâ sará pê é loq má, zing-rí é myo myo hui zo luí, sat pyâm é hui ra râ nghut kôle, sum nyí nghû râ buinyi má, lhoq toq yu é hui râ nghut é hkyô lé, haù hkûn mai, Yhâng é chángzô pé lé taí kyo hi ló bê nghut ri.

²² Haù mù, Petruq gi, Yhang lé rahkyam shut shuí htoq yù mù, "Yhumsíng ê, haù hkyô Náng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga taí ri.

²⁴ Hau htâng, Yhang gi, Yhâng é chángzô pé lé, "Ngá htâng cháng naù sù ó yuq nghut kôle, yhumsing gùng yhumsing he-ngik pyám mù, yhumsing é tapzìng lé waq chûng luí, cháng ra râ nghut lhê. ²⁵ Hkâsu mù gà le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sùm pyâm é sù kúm gi, asak wó yú râ nghut lhê. ²⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyû bò râ lhú? Byù gi,

† Grik dông Petruq gà é gi, luqgok lé gà é nghut lhê.

yhumsing é asak woi-nyí lé, hai èq wó htaí yù râ l hú?
²⁷ Haú Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkangmó lé, yhumsing kut lai bê eq rajung za akyû byi râ nghut lhê. ²⁸ Ngò, nungmoq lé teng za taí kôlé, ahkuí shí má yap to bang ra-am gi, haú Byu Yhangzo, Yhâng é mingdán eq jé lé lo é lé, a myang é za shí kó râ a nghut." ga taí ri.

Yesuq, Isâm Htaí Lo É Hkyô

Mrk 9:2-13; Luk 9:28-36

17 Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhum má doq ló akô. ² Haú má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri. ³ Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dâng nyo lhûm nyi akô.

⁴ Haú mù, Petruq gi, Yesuq lé, "Yhumsing ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum saí bá." ga taí ri.

⁵ Petruq dang ru taí nyi ashî le, duqbó é mhut gi, yhangmoq lé htup zing lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

⁶ Haú su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri. ⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga taí ri. ⁸ Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹ Bùm mai taú gyó lô kô é hkûn, Yesuq gi, "Ahkuí nungmoq myang é hkyô lé, haú Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tô ri.

¹⁰ Haú jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é l hú?" ga, Yesuq lé myí akô.

¹¹ Haú hkûn, Yesuq gi, "Eliyaq hí lé luí, lhunglhang lé hen lajâng to râ gâ é gi, têng lhê. ¹² Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haú eq rajung za, haú Byu Yhangzo le, yhangmoq é loq má hpuzo râ nghut lhê." ga tû taí ri. ¹³ Haú hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haú chángzô pé sê gyô akô nghut ri.

Nat Wang Júng Sû Lé Lhoq Gê Byí É Hkyô

Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taú jé lô kô é hkûn, byù rayuq gi, Yesuq chyáng lé jé mù, hkyih-

put htuq luí, ¹⁵ "Yhumsing ê, ngá é yuqzo lé shogyô yù laq; yhang gi, mhúngtuq tuq luí, gyai yhang jamjaú nyi ri. Myihkyóm má le, wui má le, anum num lêng wàng wàng dut nyi ri. ¹⁶ Yhang lé, Náng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga taí ri.

¹⁷ Haú mù, Yesuq gi, "Lumjín myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ l hú? Yuqgè zo haú lé, Ngá chyáng shuí lé lô keq." ga tû taí kat ri. ¹⁸ Yesuq gi, nat gang lé tân kat jáng, nat gang haú gi, yuqgè zo haú yuq chyáng mai htoq ló byuq bê nghut mù, haú hkûn jáng, yuqgè zo haú gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haú lé a wó hkat htoq é l hú?" ga, lé myi kôjáng, ²⁰ Yhang gi, "Nungmoq é lumjín myit shaú é yanmai nghut ri. Ngò, nungmoq lé teng za taí kôlé, nungmoq é lumjín myit anghsi cham í za hkâlhang bò kô é nghut le gi, bùm shí lé, 'Hé shut htot ló aq.' ga taí le, htot râ nghut lhê. Nungmoq a wó kut é haí lhang joq râ a nghut.

²¹ Shí jung gi, kyúdung é eq zoshuq gám é dông za a nghut jáng, a htoq ló é nghut lhê. [†] ga dum tû taí ri.

²² Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haú Byu Yhangzo gi, byu pé é loq má ap pyâm é hui zo râ nghut lhê. ²³ Haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghú râ nyí má lhoq dui toq é hui râ nghut lhê." ga taí ri. Haú mù, haú chángzô pé gi, gyai yhang gyô yón nyí bekô nghut ri.

Noqkuq Yhûm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuí bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat l hú?" ga myí akô.

²⁵ Petruq gi, "Kat lhê." ga tû taí ri.

Hau htâng, Petruq yhúmhaú má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pé chyáng mai guq yu akô l hú? Yhumsing byu pé chyáng mai l hú? Haú a nghut jáng, góbâng chyáng mai l hú? Nàng, hkâsu wó myit lhê l hú?" gâ ri.

²⁶ Haú mù, Petruq gi, "Góbâng chyáng mai nghut ri." ga tû taí jáng, Yesuq gi, "Haú su nghut le gi, yhumsing byu pé gi, lut akô nghut ri. ²⁷ Nghut kôlhang, yhangmoq é i-myt a ngón a dut kó sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé lêng há kat jáng, ngùn htingchap rachap lé myàng râ nghut lhê. Haú lé yù mù, Ngá é matú eq náng é matú, yhangmoq lé ló byi aq." ga taí ri.

† Chyúmbun shí gi, chyúmding myo myo má a bo é nghut lhê.

Kô Dik Sû Gi, Ó Yuq Nghut Lhê Lhú?

Mrk 9:33-37, 42-48; Luk 9:46-48; 17:1-2

18 Haú hkûn, haú chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lhê lhú?" ga myí akô.

² Yesuq gi, zoshâng zo rayuq lé wut yù mù, yhang-moq é gung gûng má shap to luí, ³ taí é gi, "Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuí su dut kô é za a nghut jáng, mauhkûng mingdán má hkâ-nhám le wó wâng kó rà a nghut. ⁴ Haú mù, zoshâng zo shí yuq su, yhumsing é i-myit wó lhoq nyhum é sù ó yuq nghut kôle, mauhkûng mingdán má, kô dik sû nghut ri.

⁵ Shí sù é zoshâng lé, Ngá é mying mai hap yu é sù ó yuq nghut kôle, Ngo lé hap yu é sù nghut bê. ⁶ Nghut kôlhang, Ngo lé lumjíng é zoshâng wuí mâ é rayuq yuq lé, mara kut shut nhang é sù gi, yhâng é lingzing má luqluí long mó tuí hut byi luí, nik é wuimau má, dú hkyô pyâm é huí é nghut le gi, yhâng é matú je gè rà nghut lhê.

⁷ Haú mingkan gi, byu pé lé mara kut shut nhâng jang joq é yanmai, dingnyé wó ri. Haú mara kut shut nhâng hkyô gi, htoq lugù bê; nghut kôlhang, haú lé lhoq htoq sù gi, dingnyé wó ri. ⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyi hkúm loq hkúm gû dú hkyô pyâm é huí rà htoq má, hkyi loq a hkúm é za, asak wó yu é nghut le gi, náng é matú je ge ri. ⁹ Náng é myoqjí èq, nang lé mara kut shut nhang é nghut le gi, haú lé lap choq yù mù, dú pyám aq; myoqjí í jí dap gû ngaraí myi má dú hkyô pyâm é huí rà htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shí sù é zoshâng zo wuí mâ é rayuq lé lhang a wú tiq rà matú, sidiq nyi keq. Hkâsu mù gà le, Ngò, nungmoq lé taí kôlé, mauhkûng mâ é yhangmoq é mau-mang lagyô pé gi, mauhkûng htoq mâ é Ngá Wá é myoqdong lé, hkâ-nhám le myang nyi akô. ¹¹ (Hkâsu mù gà le, haú Byu Yhangzo gi, byuq byuq bê bang lé hkyi yù rà matú, jé lé é nghut lhê.) †

¹² Byù rayuq gi, sau rashô du wó é nghu sháng, sau haú gû mâ é radu byuq byuq é nghut jáng, haú gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi rà lhú? Haú lé, nungmoq hkâsu wó myit ngam akô lhú? ¹³ Ngò, nungmoq lé teng za taí kôlé, yhang gi, haú byuq byuq é sau haú lé myang ho é hkûn, a lám byuq é sau gaú xe gaú dù é matú gabú é htoq má, haú dù matú je riyhang gabú ri. ¹⁴ Haú eq rajung za, mauhkûng htoq mâ é nungmoq é Îwa gi, shí tiq bang mâ é rayuq htên byoq byuq rà lé lhang, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tún shit aq. Yhang, náng é dang lé gyô é nghut jáng, nang gi, gumang rayuq dum wó bê nghut ri. ¹⁶ Nghut kôlhang, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq.' †† gà tô é eq rajung za, nang, gotú byù ra-í yuq lé shuí chùng aq. ¹⁷ Yhang gi, haú bang é dang lé le a lhom yu é nghut jáng, haú hkyô lé, no-qkuq hpúng má shit kyo aq; hpùng é dang lé le a gyô é nghut jáng, yhang lé, a lumjíng é byù rayuq đông le, kang guq sù rayuq đông le sôn pyám aq.

¹⁸ Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkûng htoq má le, tuí to rà nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi rà nghut lhê.

¹⁹ Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haú lé dung kôlhang, mauhkûng htoq mâ é Ngá Wa gi, haú nhik lé gyo byi rà nghut lhê. ²⁰ Hkâsu mù gà le, Ngá mying lé lang luí, í yuq sum yuq zup zing é jang hkâmá nghut kôlhang, haú bang é gyoro má Ngò nyi lhê." gà ri.

Shogyo Nhikmyin A Sê É Jùn Hpó É Dangtú

²¹ Haú hkûn, Petruq gi, Yesuq chyáng huí ê mù, "Yhumsing ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra rà lhú? Nyhit dâm jé shoq hkyut byi ra rà lhí?" ga myí ri.

²² Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi rà lhê.

²³ Mauhkûng mingdán gi, yhumsing é dui-nhâng zoshâng wui é jihpán lé jep nau é hkohkâm rayuq eq du ri. ²⁴ Yhang gi, jihpán lé jep hi ló é u lé, yhâng chyáng ngùn wan myo myo chyín dap to sù lé shuí lé lo akô. ²⁵ Haú yhumsing hpó gi, haú yuq chyín a wó xap é yanmai, chyín wó yù rà matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyám rà hkunmó hkyô kat ri.

²⁶ Haú mù, dui-nhâng zoshâng haú yuq gi, yhâng é hí má hkyihput htuq luí, 'Ngo lé myit hing byi shi laq; banshoq lé, ngò xap rà.' ga dúng tôngbán ri. ²⁷ Haú dui-nhâng zôshang é yhumsing hpó gi, haú yuq lé wú shogyo luí, chyín banshoq lhut pyám byi mù, nhang kat ri.

²⁸ Nghut kôlhang, dui-nhâng zoshâng haú gi, htoq ló mù, yhang lé, denari ‡ rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyín hân xap aq!' ga taí ri.

† Bun zo shí gi, chyúmding myo myo má a bo é nghut lhê.

†† 18:16 Tarâ Pun 19:15 ‡ Denari rachap gi, ra-nyí lhê é byù rayuq é zuihpau eq wuí ri.

²⁹ Haú hkûn, yhâng é luzúm dui-nhâng zoshâng haú gi, yhâng é hí má hkyihput htuq luí, 'Ngo lé myit hîng byi shi laq; ngò xap rã.' ga dúng tôngbán ri.

³⁰ Nghut kôlhang, yhang gi, a gyo byí e za, yhâng é chyín dum wó xap é hkûn jé shoq, haú yuq lé htóng hkyô pyám nhâng ri. ³¹ Gotû dui-nhâng zoshâng wui gi, haú hkyô lé myàng kôjáng, i-myt wú nô kôluí, yhangmoq é yhumsing hpó lé, haú hkyô banshoq ló taí kyô akô.

³² Haú mù, haú yhumsing hpó gi, dui-nhâng zoshâng haú lé wut hâng yù mù, 'Agé ashop é dui-nhâng zoshâng ê, nàng, ngo lé dúng tôngbán é yanmai, nàng, ngo lé dap é chyín banshoq lé, ngò lhut pyám byi bê nghut lhê mhaí. ³³ Haú su é nhîng, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut lhú?' ga taí luí, ³⁴ yhang gi, nhikjum yo mù, yhâng é chyín ban xap é hkûn jé shoq, jamjau hui zo rã matú, yhang lé, htóng suwún pê chyáng ap byí pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mã é Ngá Wa le, nungmoq lé haú đông kut rã nghut lhê." gâ ri.

Myi Làng Gâng É Hkyô

Mrk 10:1-12

19 Yesuq gi, mhoqshit é dang haú pé lé ban taí jáng, Galile mau mai htoq ló mù, Yodan làng tû tap mã é Yuda mau mã é jé ri. ² Byù moq mó gi, Yhâng htâng cháng kô é nghut mù, Yhang gi, haú bang mã é nòhpyo hui bang lé, haú má lhoq gê byí ri.

³ Haú hkûn, Hparishe pé ra-am gi, Yhâng chyáng lé jé kômù, Yhang lé chyam wú é đông, "Byù rayuq gi, hai hkyô mai nghut nghut, yhumsing é yhangmyi lé lhoq kang pyám le, tarã wang lhê lhú?" ga myí akô.

⁴ Haú jáng, Yhang tû taí é gi, "A-nham sâng-hi lé, Hpân Sû, 'byu hpan é hkûn, yuqgê eq myiwe lé hpan é nghut lhê.' ⁵ 'Hau é yanmai, yuqgê gi, yhumsing é înu îwã chyáng mai htoq luí, yhangmyi eq rahá rading ralhum za kut nyí mù, yhangnhik gi, gungsho ralhum za dut byuq kó rã nghut lhê.' ⁶ ga kã tô é lé, nungmoq a nghap wú kó lhú? ⁷ Haú mù luí, yhangnhik gi, í yuq a nghut lô e za, rayuq za dut bê nghut ri. Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

⁸ Haú mù, Yesuq gi, "A-nham sâng-hi mai gi, haú đông a nghut. Nghut kôlhang, nungmoq é myit nhiklum htân kô é yanmai, nungmoq é yhangmyí pé lé lhoq kang rã ahkáng, Mosheq byí tô é ru nghut lhê. ⁹ Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kang pyám mù, myiwe gotû dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tû taí ri.

¹⁰ Haú mù, Yesuq gi, "A-nham sâng-hi mai gi, haú đông a nghut. Nghut kôlhang, nungmoq é myit nhiklum htân kô é yanmai, nungmoq é yhangmyí pé lé lhoq kang rã ahkáng, Mosheq byí tô é ru nghut lhê. ¹¹ Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kang pyám mù, myiwe gotû dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tû taí ri.

¹² Byù ra-am gi, înu unghkaú mai yhang, yuqgê a jé gû hku lé lo é bang nghut akô; ra-am gi, góbâng èq kut é yanmai, yuqgê a jé dut byuq akô; ra-am nghut jáng, mauhkûng mingdán é matú, yuqgê a jé rã đông kut yu pyám akô nghut ri. Shí hkyô lé wó hap yù sù gi, hap yù sháng gaq." ga dum taí ri.

Zoshâng Wui Eq Yesuq

Mrk 10:13-16; Luk 18:15-17

¹³ Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haú chángzô pé kúm gi, haú shuí lé lô bang lé lhom tân hkûm akô nghut ri.

¹⁴ Nghut kôlhang, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, haú sù é bâng é mingdán ru nghut lhê." ga taí kat ri. ¹⁵ Yhang gi, zoshâng wui htoq má loq ke shimân byi mù, haú jowò mai htoq ló bê nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

¹⁶ Byù rayuq gi, Yesuq chyáng lé jé mù, "Sarã ê, ah-tum abyuq é asak wó yù rã matú, ge é muzó haí kut ra rã lhú?" ga myí ri.

¹⁷ Haú jáng, Yesuq gi, "Ge é hkyô eq séng luí, haí mù Ngo lé myí lhê lhú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tarã pé lé cháng aq." ga tû taí ri.

¹⁸ Haú yuq gi, "Hká gû lé lhú?" ga dum myi jáng, Yesuq gi, "Byù hkâsat, su-myi hkâlú, hkâhkau, a teng a mán é saksé hkâhkâm, ¹⁹ nángnu nángwa lé hkungga aq, ²⁰ ga le, 'náng gûng lé nàng chyitdap e su, náng é chyangnâm mã é bang lé le chyitdap aq.' ²¹ ga le bo tô ri." ga taí kat ri.

²⁰ Haú hkûn, zorâm hpó haú gi, "Haú pé banshoq lé, ngò cháng bê nghut lhê; haí kut rã ashí lhú?" ga dum taú myí ri.

²¹ Yesuq gi, "Nàng, gumjup sù dut nau le gi, ló mù, nàng wó é sutzè pé lé ùng pyám luí, myùng bang lé byí pyám aq; haú jáng, nàng, mauhkûng htoq má sutzè wó rã nghut lhê; haú mù, Ngá htâng lé cháng aq." ga tû taí ri.

²² Zorâm hpó haú gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq ló byuq bê nghut ri.

²³ Hau htâng, Yesuq gi, Yhâng é chángzô pé lé, "Ngò, nungmoq lé teng za taí kôlé, sutzè wó bang gi, mauhkûng mingdán wó wàng rã gyai yhang wui ri.

²⁴ Hau htoq agó, Ngò, nungmoq lé taí kôlé, sutzè wó

† 19:4 Apûn 1:27†† 19:5 Apûn 2:24

‡ 19:19 Htoq Ló 20:12-16; Tarã Pun 5:16-20†† 19:19 Nhung 19:18

sû rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga taí ri.

²⁵ Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lhê lhú?" ga Yhang lé myí akô nghut ri.

²⁶ Haû hkûn, Yesuq gi, yhangmoq lé wú kat mù, "Haú hkyô lé byù mai gi, wó kut râ a nghut; nghut kôlhang, Garai Gasang gi, lhungháng lé wó kut é Sû nghut lhê." ga taí ri.

²⁷ Haû hkûn, Petruq gi, Yhang lé, "Ngamoq gi, wó é gû lhungháng lé tô pyâm to lui, Náng htâng cháng bê nghut lhê. Ngamoq, haí wá wó râ nghut lhê lhú?" ga myí kat ri.

²⁸ Haû mù, Yesuq tû taí é gi, "Ngò, nungmoq lé teng za taí kôlé, lhungháng lé asik dum saí dut nhang é má, haû Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhûm htoq má zùng to kômù, Israelaq amyû raxe í hú lé jéyáng kó râ nghut lhê. ²⁹ Ngá é yanmai, yhumsing é yhûm, nhiktâng wui, înu îwa, zo dù wui eq yò pé rajung jung lé tô pyâm tô é sú ó yuq nghut kôle, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê. ³⁰ Nghut kôlhang, hí nghut nyí é bang myo myo gi, htâng gyó byuq kó râ nghut mù, htâng gyó nyí bang yuq gi, hí bekô râ nghut lhê.

Tsibiyiq Hkyâm Mû Zui Bang Lé Dangtú Yu É Hkyô

20 Hkâsu mù gâ le, mauhkûng mingdán gi, yhum-sing é tsibiyiq hkyâm má mû zui nhâng râ langchyáng ê lung râ ga, napsûn noq le htoq e ló é hkyâm yhumsing eq du ri. ² Yhang gi, ra-nyí é matú denari rachap byi râ đông, haú bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

³ Napkyó gau hkyíng † kô má, yhang gi, htoq e ló le, hai mù le a kut é za, gai má yap tô é bang ra-am lé ê myang ri. ⁴ Haû mù, yhang gi, haú bang lé, 'Nungmoq le, ngá é hkyâm má mû ê zui keq; byi âng é ahpau, ngò, nungmoq lé byi râ nghut lhê.' ga taí jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myin-htâng sum hkyíng kô má le, dum htoq ê mù, haû eq rajung za langchyáng pé ê lung kat ri. ⁶ Myinhâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akô lhú?' ga myi jáng, ⁷ haú bang gi, 'Ngamoq lé, ó yuq eq le a lung kô é yanmai nghut lhê.' ga tû taí akô.

Haú hkûn, yhang gi, 'Nungmoq le, ngá é hkyâm má mû ê zui keq.' ga taí ri.

† Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hí lhê.

⁸ Myinhâng jé jáng, tsibiyiq hkyâm yhumsing gi, yhâng é mù shuí u sù lé, 'Haû langchyáng pé lé ji yù mù, je htâng má lung yu é bang mai hí lui, sâng-hi lung yu é bang jé shoq, mù zui hpau byi aq.' ga taí ri.

⁹ Myinhâng ngo hkyíng má mû wàng bang le, denari rachap chap wó yu bum akô. ¹⁰ Haû mù, je hí má mû wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri. ¹¹ Yhangmoq gi, haú myhó za wó yu bum kô é yanmai, haû hkyâm yhumsing lé, ¹² 'Shí bang gi, je htâng má mû lé wâng mù, nayí rahkum za mù zui kôlhang, nàng gi, ra-nyí buigyum chap buí htân yò má mù zui é bang ngamoq eq rajung za byí ri.' ga mara hûn dang taí akô.

¹³ Nghut kôlhang, haû hkyâm yhumsing gi, haú bang má é rayuq lé, 'Buinùm hpó ê, ngò, nang lé a tarâ é đông kut é a nghut. Denari rachap byi râ nghú, nàng eq ngò myit huí to bê a nghut lhú? ¹⁴ Nàng wó âng é lé yu chûng mù, ló aq. Je htâng má mû lé wang é sù lé le, nang lé byí é myhó, ngò byí nau ri. ¹⁵ Ngá é ngùn lé, ngò kut nau é su a ge kut lhú? Ngò, ge é kut le, nàng manôn ri lhú?' ga taí ri.

¹⁶ Haû mù lui, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó râ nghut lhê." gâ ri.

Yesuq Gi, Yhang Shí Râ Hkyô Lé Dum Taí Ri

Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyi é u lé, haû chángzo raxe í yuq lé, gotû kut wut yù mù, ¹⁸ "Nga-nhúng gi, Yerusalem wà mó shut doq ló nyi lhê; haû Byu Yhangzo gi, hkyangjong agyi pé eq tarâ sará pé é loq má ap byí pyâm é hui râ nghut lhê; haú bang gi, Yhang lé, shí râ mara byi kó râ nghut é htoq agó, ¹⁹ jóng pyâm é, nhuq bat é eq tapzîng má jén sat pyâm é hui râ matú, haû tûngbaù pé é loq má ap pyám kó râ nghut lhê. Nghut kôlhang, Yhang gi, sum nyí nghú râ buinyi má, lhoq dui toq é dum hui râ nghut lhê." ga taí ri.

Zô Nhik Matú Înu Êq Dung Byí É Hkyô

Mrk 10:35-45

²⁰ Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômù, rajung dung râ matú, Yesuq é hí má hkyihput htuq nyi ri.

²¹ Haû mù, Yesuq gi, "Nàng, haí ô nau ri lhú?" ga yhang lé myi jáng, yhang gi, "Náng é mingdán má, shí ngá zô nhiktâng lé, Náng é loqyò hkyam má rayuq, lo-qpáí hkyam má rayuq kut, zùng râ ahkáng byi laq." ga taí ri.

²² Haú hkûn, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm †† lé, nungnhik wó shuq kó râ lhú?" ga myi jáng, yhangnhik tâng gi, "Wó shuq lhê." ga tû taí akô nghut ri.

²³ Haû mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôl-

†† Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

hang, Ngá é loqyò, loqpaî hkyam má zùng râ ahkáng lé gi, Ngò byî jung a nghut. Jowò haú pé gi, Ngá Wa hen to byi bâng é matú za ru nghut lhê." ga taí ri.

²⁴ Gotû chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri. ²⁵ Haú mù, Yesuq gi, yhangmoq banshoq bang lé wut tsíng yù luí, "Tùngbaù pé lé uphkang é ga bang gi, tùngbaù pé lé up zô nyi kô é hkyô lé le, haú eq rajung za, yhangmoq é ming up suwún wuî le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê. ²⁶ Nungmoq chyáng gi, haú su a dut kó sháng gaq; haú Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shíhtaí gunglik hkungga đông, Yhâng é asak lé byi pyám râ matú sheq, jé lé é ru nghut é su, ²⁷ nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê. ²⁸ Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra râ nghut lhê." ga taí ri.

Myoqjit Í Yuq Myoq Dum Myang É Hkyô

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má châng e ló bum akô. ³⁰ Haú hkyô yàm má zung tô é myoqjit í yuq gi, Yesuq laí ló nyi é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garû kat akô nghut ri.

³¹ Byù moq mó gi, yhangnhik zîm byuq râ matú tân hkúm kôlhâng, yhangnhik gi, "Dawiq é Yhangzo, Yhumsing ê, ngá-nhik lé shogyô yù laq ô!" ga, je riy-hang htê mó èq wut garû kat akô nghut ri.

³² Haú mù, Yesuq gi, yap kat mù, "Ngò, nungnhik lé haí kut byi râ ô nau akô lhú?" ga, yhangnhik lé wut myí kut ri.

³³ Haú hkûn, yhangnhik gi, "Yhumsing ê, ngá-nhik myoq myàng nau ri." ga tû taí akô.

³⁴ Yesuq gi, yhangnhik lé wú shogyo luí, yhangnhik é myoqjí má é záng byî ri. Haú hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

Yesuq, Yerusalem Wà Mó Má Wang E Ló É Hkyô

Mrk 11:1-11; Luk 19:28-38; Yhn 12:12-19

21 Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm má é Bethpage wà má jé ló kôjáng, Yesuq gi, chángzo í yuq lé, ² "Nungnhik, hí mâ é wà má ê keq; wà haú má, logúng zîng radu lé, logúng zo eq rahá tuí to láng é lé, é myàng kó râ nghut lhê; haú lé hpyi yù mù, Ngá chyáng she lò keq. ³ Byù rayuq yuq, nungnhik lé rajung jung gà lò jáng, 'Shí í du lé, haú Yhumsing chùng râ ri.' gà nghut tû taí keq; haú jáng, yhang, radá dâm nhâng byi râ nghut lhê." ga Yesuq taí luí, nhang kat ri.

⁴ Haú gi, myiqhtoi dang lhoq dik râ matú dut lo é nghut ri. ⁵ Myiqhtoi dang haú gi,

"Zi-un byizo † lé, shî su nghut keq; 'Wú aq, náng é hkohkâm gi,

nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'" ††

⁶ Haú chángzô nhik gi, e ló mù, Yesuq taí kat é eq rajung za ê kut bekô nghut ri. ⁷ Yhangnhik gi, logúng me lé she lò mù, yhangnhik é buhîng pé lé, haú logúng mê é htoq má ke byi kôjáng, Yesuq gi, doq jî ri. ⁸ Byù moq mó mâ é myo myo gi, yhangmoq é buhîng lé, hkyô má hkyut hkang byî akô; ra-am gi, mhanding pé lé zân hkyô yù mù, hkyô má hkang byî akô nghut ri.

⁹ Yhâng é hí má htâng má châng sô nyi bum é bang gi, "Dawiq é Yhangzo gi, hosana ‡ nghut nyí sháng gaq ô!"

"Haú Yhumsing é mying mai jé lé lô Sù gi, hkungsô wó nyí sháng gaq ô!" ††

"Htoq tsáng myhâng má, hosana nghut nyí sháng gaq ô!"

ga luí, taí garû bum akô nghut ri.

¹⁰ Yesuq, Yerusalem wà mó má wang ló é hkûn, rawá gón é bang gi, gabyông lo bùm kômù, "Shí yuq gi, ó wá nghut lhê lhà?" ga luí, myi lhùm bum akô.

¹¹ Haú hkûn, byù moq mó gi, "Shí yuq gi, Galile mau, Nazaret wà byù Yesuq gà é myiqhtoi nghut lhê." ga taí akô nghut ri.

Yesuq, Noqkuq Yhùm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

¹² Yesuq gi, noqkuq yhùm má wang ê mù, haú mâ é zè ung zè wuî kut nyi é bang banshoq lé, hkat htoq pyám luí, ngùn htaí zo bâng é siboî pé eq hpûngkyui ung zo bâng é tangkuq pé lé, tu mhuq pyám byî ri.

¹³ Haú hkûn, Yhang gi, "'Ngá yhùm gi, kyûdung yhùm ga râ nghut lhê.' †† ga kê to kôlhâng, nungmoq gi, jowò shí lé 'damaq hkyûng' ††† kut nyi akô." ga, yhangmoq lé taí ri.

¹⁴ Yesuq, noqkuq yhùm má nyi tô é hkûn, myoqjit bang eq hkyí hten bang Yhâng chyáng lé lô kômù, Yhang gi, haú bang lé lhom lhoq gê byî ri. ¹⁵ Nghut kôlhâng, hkyangjong agyi pé eq tarâ sará pé gi, Yhang kut é mauho muzó pé lé le, "Dawiq é Yhangzo gi, hosana nghut sháng gaq." ga, noqkuq yhùm má zoshâng wuî garû nyi bùm kô é lé le, myàng kôjáng, wú nhik-yô bum akô nghut ri.

¹⁶ Haú mù, yhangmoq gi, "Zoshâng shí bang haí taí nyi kô é lé, Nàng wó gyô lhê lhú?" ga, Yesuq lé myi kôjáng, Yhang gi, "Wó gyô ri. Nungmoq gi, 'Zoshâng wuî eq nyheqnú pé é nhut mai hkya-on kungtôn râ matú, nàng lajâng to bê nghut ri.' ††† ga kê tô é lé, Chyúmdang má a nghap wú kó lhú?" ga yhangmoq lé taí ri.

† Zi-un byizo gà é lichyúm gi, Yerusalem byu pé gà é nghut lhê.

†† 21:5 Zhk 9:9 † Hebre dang má, hosana gà é gi, "ahkuî hkyi yù laq" gà é nghut lhê. Nghut kôlhâng, bun zo 9 má gi, hkya-on dang đông chung é nghut lhê. ††† 21:9 Hkya-on 118:26 ††

21:13 Esai 56:7 ††† 21:13 Yer 7:11 ††† 21:16 Hkya-on 8:2

¹⁷ Hau htâng má, Yhang gi, haú bang lé nyhi to luí, wà hkaú mai htoq ló mù, Behtani wà má ê jé luí, haú myín, haú má bíng yu ri.

Maih páng Gâm Nyhuí Kyuq Shi Byuq É Hkyô
Mrk 11:12-14, 20-24

¹⁸ Yhang gi, htang napkyó noq le, Yerusalem wà mó shut dum taú ló é hkûn, hkyô má zòmút hui bê nghut ri. ¹⁹ Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, "Nàng má, hkâ-nhám le ashi a zui sháng gaq." ga taí kat ri. Haú hkûn jáng, agàm haú gi, nyhuí kyuq shi ló byuq bê nghut ri.

²⁰ Haú chángzô pé gi, haú lé myàng kôjáng, maú byuq kômù, "Maih páng gâm shí gi, haí mù haú-í hàn nyhuí kyuq shi ló lhê lhà?" ga myí akô.

²¹ Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjínng kô é nghut le gi, maihpáng gâm má Ngò kut é muzó lé, nungmoq wó kut kó rã nghut é htoq agó, bùm shí lé, 'Htot mù, wuimau má ló gyó wàng aq.' ga taí jáng, taí é eq rajung za dut rã nghut lhê. ²² Nungmoq, lumjínng myit eq dung kô é nghut jáng, haí dúng le le wó yú kó rã nghut lhê." ga tũ taí ri.

Yesuq É Ahkáng Ayá Lé Myí Chyam É Hkyô
Mrk 11:27-33; Luk 20:1-8

²³ Yesuq gi, noqkuq yhùm wàng hkaú má wang é mù, mhòqshit nyi é hkûn, hkyangjong agyi pé eq mingbyu é suwún wuí gi, Yhâng chyáng lé jé kômù, "Hai ahko ahkàng èq, Nàng, shí pé lé kut nyi lhê lhú? Ahko ahkáng shí, Nàng lé ó yuq byí é lhú?" ga myí akô.

²⁴ Haú hkûn, Yesuq gi, "Ngò le, nungmoq lé rajung myí wú kôlé, nungmoq wó tũ taí kô é nghut jáng, hai ahko ahkàng èq, Ngò, shí pé kut é hkyô lé taí kyo rã nghut lhê. ²⁵ Yohan byí é baptyisma gi, ó yuq é ahko ahkáng mai nghut lhê lhú? Mauhkúng mai lhú? A nghut jáng, byu chyáng mai lhú?" ga taú myí kat ri.

Haú hkûn, yhangmoq, chòm hpyê lhum kô é gi, "'Mauhkúng mai nghut lhê.' nghú, nga-nhúng taí jáng le, 'Haú nghut le nhing, haí mù, yhang lé a lumjínng kô é lhú?' ga rã nghut; ²⁶ 'Byu chyáng mai nghut lhê.' nghú jáng le, yhangmoq lhunglhâng bang gi, Yohan lé, myiqhtoi rayuq ga lumjínng bùm kô é nghut lhê yan-mai, haú bang lé, nga-nhúng gyuq rã lhê nghut." gâ akô.

²⁷ Haú mù, yhangmoq gi, Yesuq lé, "Ngamoq a sé." ga tũ taí akô.

Haú hkûn, Yesuq gi, "Haú jáng, Ngò le, hai ahko ahkàng èq shí pé kut é hkyô lé, nungmoq lé a taí kyo." ga, yhangmoq lé taí ri.

Yuzô Nhiktâng Lé Dangtú Yu É Hkyô

²⁸ Yesuq xoq taí é gi, "Nungmoq hkâsu wó myit akô lhú? Byù rayuq gi, yuqzô í yuq wó ri. Yhang gi, ko sũ yuq chyáng ê mù, 'Ngá zo ê, nàng, hkû-nyí tsibiyiq

hkyâm má mù ê zui aq.' ga taí jáng, ²⁹ yuqzô haú gi, 'Ngò a kâm ê.' ga tũ taí ri; nghut kôlhâng, htâng má, yhang gi, myit dum lhing mù, ê bê nghut ri.

³⁰ Hau htâng, yhângwa gi, yhang zo tiq sũ yuq chyáng ê mù, rajung za ga ê dum taí jáng, yuqzô haú gi, 'É rã, âwa!' ga yín yú kôlhâng, a ê kut ri.

³¹ Haú nhiktâng mâ é hká yuq sheq, yhângwa ô nau é hkyô lé kut sũ nghut ri lhú?" gâ ri.

Haú hkûn, yhangmoq gi, "Ko sũ nghut ri." ga tũ taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhí pé gi, Garai Gasâng é mingdán má, nungmoq a wàng shimá, wang ló nyi bùm kó rã nghut lhê. ³² Hkâsu mù gâ le, Yohan gi, nungmoq chyáng lé jé mù, dingmán hkyô lé tũn shit kôlhâng, nungmoq gi, yhang lé a jínng kut akô nghut ri; nghut kôlhâng, haú kang guq bang eq shiwa myhí pé gi, yhâng dang lé jínng akô nghut ri. Nungmoq gi, haú hkyô lé myang é nghut kôlhâng, myit a lhing kô é htoq agó, yhang lé a lumjínng shi kó nghut ri.

Tsibiyiq Hkyâm Saí Bang Lé Dangtú Yu É Hkyô
Mrk 12:1-12; Luk 20:9-19

³³ Gotũ dangtú lé gyô wú shi keq; hkyâm yhumsing rayuq gi, tsibiyiq hkyâm ralhum saí to mù, lhinghkyuq kyâm to luí, tsibiyiq wing pyik htoq rã donghkong dũ to mù, machya ralhum saí tũ ri. Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri. ³⁴ Kyôshu yoq jé jáng, yhang gi, yhang eq sêng é tsibiyiq shi ê yú rã matú, yhâng é dui-nhâng zoshâng wuí lé, haú hkyâm saí zo bâng chyáng nhang kat ri.

³⁵ Haú hkyâm saí zo bang gi, dui-nhâng zoshâng wuí lé, lhom chyup yú kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqqok èq lhom dú sat pyám, kut akô nghut ri. ³⁶ Hau htâng má, yhang gi, hí dam lhê htoq je myo shoq gotũ dui-nhâng zoshâng wuí lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri. ³⁷ Ló htáng má, yhang gi, 'Ngá zo lé gi, yhangmoq lhom hkungga kó rã nghut lhê.' ga, yhang zo lé, haú bâng chyáng nhang kat ri.

³⁸ Nghut kôlhâng, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yú rã sũ nghut lhê; lé keq, yhang lé sat pyám mù, yhâng é silí wunlí lé yu pyám byi sháng.' ga, rayuq eq rayuq taí lhùm bum akô nghut ri. ³⁹ Haú mù, yhangmoq gi, yhang lé, chyup yú luí, hkyâm shinggan shut dú htoq kômù, sat pyám bekô nghut ri.

⁴⁰ Haú mù luí, tsibiyiq hkyâm yhumsing lé jé é hkûn lé, haú hkyâm saí zo bang lé hkâsu kut nhò ngam akô lhú?" ga Yesuq myí ri.

⁴¹ Haú hkûn, haú hkyangjong agyi pé eq suwún wuí gi, "Haú agè ashop bang lé gi, agè ashop é dông sat pyám rã nghut lhê. Haú tsibiyiq hkyâm lé gi, kyô shu yoq má, yhâng é gambùm lé byi rã bang lé, htot ngho byí pyám rã nghut lhê." ga, tũ taí akô nghut ri.

⁴² Haú jáng, Yesuq dum taí é gi, "Chyúmdang má,

'Yhûm saí bãng eq hkyin htoq pyâm é luqgok gi, htungchyûn mã é ahkyak dik é luqgok dut bê.

Shí hkyô gi, haû Yhumsîng kut é nghut luî, nga-nhông é myoq hí má mauhpo dut bê nghut ri.' † ga bo tô é lé, nungmoq a nghap wú kó lhú?

⁴³ Haû mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashí wó zui râ byuhú lé byí pyám râ nghut lhê. ⁴⁴ Luqgok haú má gyó záng é sù gi, gyuí gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." gâ ri.

⁴⁵ Hkyangjong agyi pé eq Hparishe pé gi, haû Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri. ⁴⁶ Haû mù, yhangmoq gi, Yhang lé chyup yû râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

Myiháng Poî Dangtú Pé

Luk 14:15-24

22 Yesuq, dangtú pé dông yhangmoq lé dum taí é gi, ² "Mauhkûng mingdán gi, yhumsing yhangzô é matú myiháng poî hen lajâng to byí é hkohkâm rayuq eq du ri. ³ Hkohkâm hpó haû gi, yhang ji tô é bang, haû poî má lé lô râ matú, yhang é dui-nhông zoshâng wuî lé ê tsing taí nhang ri; nghut kôlhang, haú bang gi, a lé kut akô nghut ri.

⁴ Hau htâng má, yhang gi, gotû dui-nhông zoshâng wuî lé, 'Ngò haí le hen to bê; ngá é no eq xu-myum é gau-nyhaú pé lé sat mù, jung hkangmó rì rì nghut to bê. Myiháng poî má lé lò keq hkoi nghû, haû ji tô é bang lé ê taí keq.' ga pyîng luî, nhang kat ri.

⁵ Nghut kôlhang, haû ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dinggá hkyô shut ê byuq bekô nghut ri. ⁶ Ra-am dum nghut jáng, yhang é dui-nhông zoshâng wuî lé lhom chyup yû kômù, nhuq bat luî, sat pyám byí akô nghut ri. ⁷ Haû mù, hkohkâm gi, nhikjum yo luî, yhang é gyezô pé lé, haû byù sat bang lé sat pyám nhông mù, yhangmoq é myuq lé nyhê hkyô pyám nhang ri.

⁸ Hau htâng má, yhang gi, yhang é dui-nhông zoshâng wuî lé, 'Myiháng poî gi, rì rì nghut to bê; nghut kôlhang, haû ji to huí é bang gi, lé râ a gingdán kó nghut ri. ⁹ Haû mù, hkyô kang pé má ê luî, myang é yuq hkangmó lé, poî má lé râ matú ê jî keq.' ga taí ri.

¹⁰ Haû jáng, dui-nhông zoshâng haú bang gi, hkyô kang pé má htoq ê luî, myang é byù gè byù gang lhunglhang lé ji tsîng yù kô é nghut mù, myiháng poî gi, bíng pé zung byîng bùm bê nghut ri.

¹¹ Nghut kôlhang, bíng haú bang lé, hkohkâm hpó, lé wang wú é hkûn, myiháng poî wàng hking a wut tô é byù rayuq lé, yhang byu-myang ri. ¹² Haû mù, yhang gi, haú yuq lé, 'Buinùm hpó ê, nàng gi, myiháng poî wàng hking le a wut é nhîng, shí má hkâsu kut wang lo

é lhú?' ga myi jáng, haú yuq gi, haí le a dat tû taí lo nghut ri.

¹³ Haû hkûn, hkohkâm hpó gi, yhang é dui-nhông zoshâng wuî lé, 'Yhang é hkyí loq má tui luî, haû ngaubyi ngaù nhap eq zui kyik kyik shoq hpuzô nyi râ nghut é shinggan mauchut hkaû má, dú htoq pyám keq.' gâ ri.

¹⁴ Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaù ri." gâ ri.

Kehtaq Lé Kang Kat Byí É Hkyô

Mrk 12:13-17; Luk 20:20-26

¹⁵ Hau htâng má, Hparishe pé gi, htoq ló kômù, Yhang é dang pé má mara chyup râ hpaqchyí dâ akô nghut ri. ¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é dông mhoqshit é sù nghut é lé le, Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷ Haû mù, hkoséng Kehtaq lé kang kat byí le gi, ge lhê lhú? A gè lhú? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haí mù, Ngo lé lé chyam wú akô lhú? ¹⁹ Kang kat râ ngùn htingchap rachap, Ngo lé byí wú keq." ga taí kat ri.

Haú hkûn, yhangmoq gi, denari rachap yù byí akô. ²⁰ Haû mù, Yhang gi, yhangmoq lé, "Shí má, ó yuq é al-hô eq masat laiká dap tô ri lhú?" ga myi jáng, ²¹ yhangmoq gi, "Kehtaq é nghut ri." ga tû taí akô. Haû mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí kat ri.

²² Haû su gâ é lé, wó gyo kôjáng, haú bang gi, maú byuq kômù, Yhang chyáng mai htoq ló byuq bekô nghut ri.

Saduke Pé, Yesuq Lé Myí Chyam É Hkyô

Mrk 12:18-27; Luk 20:27-40

²³ Haú nyí má yhang, haû dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô. ²⁴ Yhangmoq myi kô é gi, "Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhang rhat lé chui gon ra râ nghut lhê.' ga, nga-nhông lé, Mosheq taí tô é nghut lhê. ²⁵ Hí hpyang lé, ngamoq chyáng, gumang nhiktâng wuî nyhit yuq nyi akô.

Lagám yuq gi, myiwe yù luî, zo dù a dap é za yhangmyi lé shi lhuí pyâm to bê nghut ri. ²⁶ Haû eq rajung za, Lanong, Lalaq mai Lahkâ jé shoq, chuimó haú lé gon luî, ó le zo dù a dap é za shi ló byuq bùm bekô nghut ri. ²⁷ Ló htáng má, myiwe myhí haú le châng shi ló byuq bê nghut ri. ²⁸ Haû mù luî, haû dum dui toq é buinyi má, myiwe myhí haú gi, haú nhiktâng wuî nyhit yuq mã é hká yuq é yhangmyi nghut râ lhú? Hkâsu mù

† 21:42 Hkya-on 118:22-23

gâ le, yhang gi, haú nhiktâng wuì banshoq bâng é yhangmyi dut wú bê sù nghut ri." gâ akô.

²⁹ Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô ngoq akô nghut ri. ³⁰ Haú dum dui toq é buinyi má gi, myi byi myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kô râ nghut lhê. ³¹ Shi é mai dum dui toq bang eq séng luí, ³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.' † ga, nungmoq lé taí tô é lé, nungmoq a nghap wú kô lhú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taí ri.

³³ Byù moq mó gi, dang haú wó gyo kôjáng, Yhang mhoqshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô. ³⁵ Yhangmoq má bo é tarâ sará rayuq gi, Yesuq lé chyam wú é dông, ³⁶ "Sarâ ê, jep é tarâ má, hkâ lhum gi, je ahkyak dik lhê lhú?" ga myí ri.

³⁷ Haú mù, Yesuq gi, "Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq eq, chyitdap râ lhê. †† gâ é nghut lhê. ³⁸ Tarâ haú gi, je hî lhum eq je ahkyak dik é lhum nghut lhê. ³⁹ Hau htang lhum le haú eq du é nghut mù, 'Náng gûng lé náng chyitdap é su, náng é chyangnâm mâ é bang lé le chyitdap aq.' ‡ gâ é nghut lhê. ⁴⁰ Tarâ haú í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yhang lé taí kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

⁴¹ Hparishe pé zup zîng to kô é hkûn, Yesuq gi, yhangmoq lé, ⁴² "Nungmoq gi, Hkrisduq eq séng luí hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tû taí akô.

⁴³ Haú mù, Yhang gi, yhangmoq lé, "Haú hkûn, Dawiq gi, Woi-nyí dông mai, Yhang lé, 'Yhumsîng' ga, haí mù wut lhê lhú? Hkâsu mù gâ le, Dawiq taí é gi,

⁴⁴ 'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq,

Ngá é loqyo hkyam shut zung nyi shi aq." ga taí ri. †† gâ ri. ⁴⁵ Haú mù, Dawiq yhang lhang, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lhú?" ga taí ri. ⁴⁶ Haú mù, ó yuq le, dang rahkun lhang a wó tû taí lo kô é nghut mù luí, haú nyi mai, ó yuq lhang Yhang lé dangmyi a wám myi lo kô nghut ri.

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

23 Hau htâng, Yesuq gi, byù moq mó eq Yhâng é chángzô pé lé taí é má, ² "Tarâ sará pé eq Hparishe pé gi, Mosheq é tanghkuq má zung akô. ³ Haú mù, yhangmoq mhoqshit é hkyô chângjiup lé, nungmoq châng kut ra kô râ nghut lhê. Nghut kôlhang, yhangmoq kut é dông gi, hkâkut kô; hkâsu mù gâ le, yhangmoq gi, yhangmoq taí é dông a kut kô nghut ri. ⁴ Yhangmoq gi, byu pé é goqsân má wòlai ke byi kôlhang, yhangmoq yhang gi, wò haú pé lé bo waq râ matú, loqnyhui lhang a kâm lhoq tuí kô nghut ri.

⁵ Yhangmoq kut é hkyô lhunglhang gi, byu pé myàng râ matú za kut shit é nghut akô; haú chyúmbun bo é showuí-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri; ⁶ yhangmoq gi, poí pé mâ é réng é jowò pé eq tarajong pé mâ é ahkyak dik é zûng jang pé má, myang zûng râ lé ô nau nyi akô; ⁷ yhangmoq gi, gai pé má lhom shi-kyâm yù kô râ eq, byu pé mai, yhangmoq lé, 'Rabai' †† ga lhom wut kô râ lé ô nau nyi bum akô.

⁸ Nungmoq kúm gi, 'Rabai' ga wut râ lé hkâ-ô nau kô; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. ⁹ Haú mù, myidàm htoq má, ó yuq lé le, 'âwa' hkâ-nghû kô; hkâsu mù gâ le, mauhkûng htoq mâ é Îwa rayuq za, nungmoq é Îwa nghut lhê. ¹⁰ Hau htoq agó, 'sarâ' ga wut râ lé, hkâ-ô nau kô; hkâsu mù gâ le, Hkrisduq za, nungmoq é Sará nghut lhê. ¹¹ Nungmoq mâ é je gyaú sù gi, nungmoq é dui-nhâng zoshâng dut râ nghut lhê. ¹² Hkâsu mù gâ le, yhumsîng gûng lé waq toq sù ó yuq nghut kôle, lhoq nyhum pyâm é hui râ nghut lhê, yhumsîng gûng lé lhoq nyhûm sù kúm gi, waq toq é hui râ nghut lhê.

¹³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pé hí má, mauhkûng mingdán hkyô lé xaú tô akô; nungmoq yhang le a wàng kô, wàng nau nyi bang lé le a wàng nhâng kô nghut ri. ¹⁴ (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, chuimó pé é yhûm-yò pé lé hpyoq zo hpyoq shuq é eq kyû hîng hîng dúng shit mhaú é bang nghut akô; haú mù, dam byí é je myo hui zo kô râ nghut lhê.) †††

¹⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu rayuq lé nungmoq é noqkuq htûng má wó lhoq lhik yû râ matú, myi hkyô, wuì hkyô, châng jón wún kômù, wó lhoq lhik yu é sù lé gi, nungmoq su ngaraí byù í tú shuí dut akô nghut ri.

¹⁶ Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luí dakam é sù gi, haí a ra; noqkuq yhûm mâ é hîng lé lang mù dakam é sù kúm gi, cháng ra bê.' ga lhaq taí akô.

¹⁷ Myoqjit é byù nâ pé ê! Haú hîng eq hîng lé lhoq

† 22:32 Htoq Ló 3:6 †† 22:37 Tarâ Pun 6:5 ‡ 22:39 Nhung 19:18 †† 22:44 Hkya-on 110:1

†† Aramaik dang dông rabai gâ é gi, sará gâ é lichyûm nghut lhê. ††† Chyúmding ra-am má gi, bun zo 14 shi a bo é nghut lhê.

yúnglhô é noqkuq yhûm gi, hká lhum je ahkyak lhê lhú? ¹⁸ Hau htoq agó, nungmoq gi, 'Haû hkungga gyap lé lang luí dakam é sù gi, haí a ra, nghut kôlhang, haû hkungga zè lé lang mù dakam é sù gi, cháng ra bê.' ga le, lhaq taí akô nghut ri. ¹⁹ Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lhú? ²⁰ Haû mù, haû hkungga gyap lé lang luí dakam é sù gi, haû hkungga gyap eq hau é ahtoq má ke tô é zè banshoq lé lang luí dakam é sù dut bê nghut ri. ²¹ Noqkuq yhûm lé lang luí dakam é sù gi, haû noqkuq yhûm eq haú má nyi é Sù lé lang luí dakam é sù dut bê nghut ri. ²² Hau htoq agó, mauhkûng lé lang luí dakam é sù gi, Garai Gasâng é tanghkuq eq haú má zung é Sù lé lang luí dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shingtón, bantsaí, hpakkyí pé mâ é xê gambùm ragambùm lé gi, byí nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê. ²⁴ Hkyô-u she é myoqjit pé ê! Nungmoq, pyup lé gi, jân pyám kômù, gola-ug lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing mai-wáng zat é myit byíng zan tô ri. ²⁶ Hparishe myoqjit pé ê! Zo hkoq shuq góm é ahte lé hí chí yúng pyám keq, haû jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akô; haú pé gi, ahtoq má wú yúng kôlhang, ahkaû má gi, màng bup showui pé eq achayut é chângjup byíng tô é nghut ri. ²⁸ Haû eq rajung za, nungmoq gi, byu pê hí má, ahtoq pyâm dingmán é su kut shit kôlhang, ahkaû má gi, gegùn labyoq kut é eq agè ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoí pê é lup lé luptsuq tsuq kômù, dingmán bâng é lup pé lé mhón byi kôluí, ³⁰ 'Ngamoq gi, ngamoq é îchyí îwa pê é ipyat má nyi âng é ru nghut le gi, haû myiqhtoí pê é sui lhoq shun é bang má, ngamoq bo lóm râ a nghut.' ga lhaq taí akô. ³¹ Haû su mù, nungmoq gi, haû myiqhtoí pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri. ³² Haû mù, nungmoq é îchyí îwa pé hi tô é muzó lé, banshoq châng kut pán keq!

³³ Lhangmuí pé ê, duq htân lhangmuí amyû pé ê! Ngarai ming é dam byi hkyô mai, hkâsu wó hpang lut kó râ lhú? ³⁴ Hau é yanmai, myiqhtoí pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang mâ é ra-am lé gi,

nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rí wún kó râ nghut lhê. ³⁵ Hau é yanmai, haû dingmán sù Abelaq é sui mai hí luí, noqkuq yhûm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê. ³⁶ Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé luq-gok eq dú sat sat kut é myuq nàng ê, woqzîng gi, yhangzô pé lé, yhâng é dùng hkaû má tsîng lhûng yu é su, nungzô pé lé, Ngò, hkâ-myhó dâm shuí tsîng yu naû kôlhang, nàng a dóng nghut ri. ³⁸ Wú keq, nungmoq é yhûm gi, nungmoq é matú chamchuyiui dut pyâm tô berâ nghut lhê. ³⁹ Hkâsu mù gà le, Ngò, nungmoq lé taí kôlé, 'Yhumsing é mying mai jé lo é Sù gi, hkungsô wó nyí sháng gaq.' † ga, nungmoq a taí taí gi, Ngo lé wó myâng kó râ a nghut lo." gâ ri.

Ló Htâng Buinyi Má Dut Lò Râ Hkyô

Mrk 13:1-31; Luk 21:5-33

24 Yesuq gi, noqkuq yhûm mai htoq e ló é u lé, Yhâng é chángzô pé gi, Yhâng é nàm má haú lé lô kômù, haû noqkuq yhum é loqmú pé lé tân shit akô. ² Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lhú? Ngò, nungmoq lé teng za taí kôlé, luqgok haú pé gi, rachâm htoq racham háng a kê lhum loshoq, hpyoq hpyi pyâm é hui râ nghut lhê." ga taí ri.

³ Yesuq gi, Tsanlun Bùm má zung tô é hkûn, haû chángzô pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhám dut lò râ lhú? Nàng gyó lé râ hkûn eq ló htâng buinyi má, hkasú é kumlhá htoq lô râ nghut lhê lhú? Ngamoq lé taí kyô wú laq." ga, Yhang lé myí akô.

⁴ Haú hkûn, Yesuq, yhangmoq lé tû taí é gi, "Nungmoq lé, ó yuq eq le a wó shuí nghoq sháng gaq, sidiq nyi keq. ⁵ Hkâsu mù gà le, 'Ngò gi, haû Hkrisduq nghut lhê.' ga, Ngá myíng lé lãng é byù myo myo pô htoq lô mù, byù myo myo lé hkyô shuí nghoq kó râ nghut lhê. ⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlhang, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyi gi, a nghut shi. ⁷ Byù ra-myû eq ra-myû, mingdán ralhumm eq ralhumm majan zân lhûm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê. ⁸ Haú pé gi, wúhke jamjau hkyo é apùn awang za ru nghut ashí. ††

⁹ Haú hkûn, nungmoq gi, zing-rí é eq sat pyâm é hui zo râ matú, ap pyâm é hui kó râ nghut lhê. Byù myú lhunglhâng bang gi, Ngá é yanmai, nungmoq lé a ngui kut kó râ nghut lhê. ¹⁰ Haú u lé, byù myo myo gi,

† 23:39 Hkya-on 118:26 †† 24:8 Esai 19:2

lumjínq myit lé tô pyám kômù, rayuq eq rayuq a ngui lhum dut é htoq agó, rayuq eq rayuq ap pyám lhum kó râ nghut lhê. ¹¹ Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuí ng-hoq kó râ nghut lhê. ¹² Agè ashop é hkyô myô jat lo é yanmai, byù myo myô é chyitdap myit gi, kân ló byuq râ nghut lhê; ¹³ nghut kôlháng, jihtôm jé shoq wó hkam jân nyi é sù gi, hkyi yu é hui râ nghut lhê. ¹⁴ Byù myô banshoq má saksé dut râ matú, haù mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyi jé râ nghut lhê.

¹⁵ Haù mù luí, myiqhtoi Danielaq dông mai taí tô é eq rajung za, 'haù lhoq hten lhoq hpyoq é acháq achyut hkyô' † gi, chyoyúng jowò má shap tô é lé, nungmoq myàng kó râ nghut lhê. (Chyúmlaika nghap sù gi, sê gyo sháng gaq). ¹⁶ Haù hkùn, Yuda mau má nyi é bang gi, bùm pé shut hpang doq ló kó sháng gaq.

¹⁷ Yhumhkùng htoq má nyi tô é sù gi, yúmhaù má é zè haí lé le, a ló gyó wang yù lo sháng gaq. ¹⁸ Yò má nyi tô é sù gi, yhâng é buhíng lé a ló taú yu nyi lo sháng gaq. ¹⁹ Haù buinyi pé má, zogúng dut é myiwe eq naú huq ashí nghut é ìnu wui gi, gyai yhang wuìhke jamjau kó râ nghut lhê. ²⁰ Haù nungmoq hpàng râ buinyi gi, gyoqmyò, †† a nghut jáng, Bánno buinyi má a ang râ matú, kyùdúng nyi keq. ²¹ Hkâsu mù gâ le, mingkan lé joq é hkùn mai ahkuí jé shoq, hkâ-nhám le a dut wú shí é wuìhke jamjau mó gi, haù buinyi pé má dut lò râ nghut lhê; haù sù é hkyô gi, htàngnùng má hkâ-nhám le dum dut lo râ a nghut. ²² Buinyi haù pé lé lhoq shaù pyám é za a nghut le gi, ó yuq le asak wó lut râ a nghut; nghut kôlháng, Garai Gasang èq hkyin yù hui bâng é matú gi, buinyi haù pé lé, lhoq shaù pyám byi râ nghut lhê. ²³ Haù ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haù a nghut jáng, 'Wú keq, Yhang hê má nyi ri.' ga taí jáng, nungmoq hkâjínq kó. ²⁴ Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklaí kumlhá pé lé kut shit kó râ nghut lhê. ²⁵ Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

²⁶ Haù mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gok hkaù má lúng tô ri.' ga jáng le, hkâjínq kó. ²⁷ Hkâsu mù gâ le, bui htoq hkyam má lháp hpyat é gi, bui wang hkyam má lhang jé shoq duqbó é su, haù Byu Yhangzo jé lé é hkùn le, dut râ nghut lhê. ²⁸ Màng leq é jang má, langdâ pé, lé zîng bùm râ nghut lhê.

²⁹ Buinyi haù pé má é wuìhke jamjau lai eq yhang, 'Bui gi, noq byuq mù, lhamó gi, a tsò dut byuq râ nghut lhê;

kyí pé gi, mauhkùng mai byit gyó lo bùm mù, mauhkùng má é wum-o a-tsam pé gi, lhoq nhùn é huí bùm kó râ nghut lhê.' †

† 24:15 Dan 9:27; 11:31; 12:11 †† Israelaq mau má gi, gyoqmyò lé hkyô htoq le gyai wuìhke é ahkyíng nghut lhê. † 24:29 Esai 13:10; 34:4

³⁰ Haù hkùn, haù Byu Yhangzô é kumlhá gi, mauhkùng má htoq shit lô râ nghut mù, myidàm htoq má é byù myô lhunglhang gi, yón ngau bùm kó râ nghut lhê. Haù Byu Yhangzo gi, mauhkùng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó râ nghut lhê. ³¹ Hau htâng má, Yhang gi, Yhâng é maumang lagyô pé lé, tut htê mó èq nhang kat luí, yhangmoq gi, maumyí chyùn myi chyùn eq mauhkùng rahkyam mai, gó hkyam htum shoq má é, Yhang hkyin yu tô é bang lé shuí tsíng yù kó râ nghut lhê.

³² Maihpáng gam lé wú mù, mhoq yù keq; agàm mai a-nyuq nyùn lô mù, ahaq htut lô jáng, bui nyé nám chyâng lò bê lé, nungmoq sê lhê. ³³ Haù eq rajung za, shí hkyô banshoq †† lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyí bê hkyô lé, nungmoq sé lo keq. ³⁴ Ngò, nungmoq lé teng za taí kôlé, shí pyat má é byu pé a ban shi byuq shimá, haù hkyô pé †† banshoq dut byuq râ nghut lhê. ³⁵ Mauhkùng eq myigùng gi, a joq lo dut byuq râ nghut lhê; nghut kôlháng, Ngá é dang gi, ru joq nyí râ nghut lhê.

Haù Buinyi Eq Ahkyíng Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyi eq ahkyíng haù lé gi, ó yuq le a sé; mauhkùng htoq má é maumang lagyô pé lhang a sé; haù Zo le a sé; haù Íwa za ru sê lhê. ³⁷ Noaq é tsín pyat má dut é su, haù Byu Yhangzo lé lo é hkùn le, dut râ nghut lhê. ³⁸ Hkâsu mù gâ le, dowuí a dínq shí é buinyi pé má, byu pé gi, Noaq, wui-sanghpo mó hkaù má wang é hkùn jé shoq, zo zo shuq shuq, myi byi myi yù, kut nyi bum akò nghut ri; ³⁹ yhangmoq gi, dowuí dínq lò mù, yhangmoq banshoq lé ùm sat pyám é hkùn jé shoq, haí dut lò râ lé, a sé kó dut bùm é su, haù Byu Yhangzo lé lo é hkùn le, dut râ nghut lhê. ⁴⁰ Haù hkùn, yò má rahá nyi tô é byù í yuq má é rayuq gi, shuí yu é hui mù, rayuq gi, myit gyó to râ nghut lhê. ⁴¹ Luquíu chòm llang nyi é myiwe í yuq má é rayuq gi, shuí yu é hui mù, rayuq gi, myit gyó pyám to râ nghut lhê.

⁴² Haù su mù, haù nungmoq é Yhumsíng gi, hká nyí jé lé lô râ lé, nungmoq a sê kô é yanmai, sidiq machya nyi keq. ⁴³ Myín hká u má hkau sù jé lé lò râ lé, yhum-síng sê é ru nghut le gi, yhâng é yhùm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. ⁴⁴ Haù mù, nungmoq le rí rí nghut nyí keq; hkâsu mù gâ le, haù Byu Yhangzo gi, a bunnùng má jé lé lô râ nghut lhê.

⁴⁵ Yhumsíng hpô é dui-nhâng zoshâng wui lé, uphkâng râ eq ahkyíng jé jáng zoshuq gam byi râ matú, yhumsíng hpô èq mù nhang tô é, lhumzui luí, hpaqchyí bo é dui-nhâng zoshâng gi, ó yuq nghut râ lhú? ⁴⁶ Yhumsíng hpó dum taú lo é hkùn, haù su kut nyí lánq é dui-nhâng zoshâng gi, hkungsô wó nyi ri. ⁴⁷ Ngò, nungmoq lé teng za taí kôlé, yhumsíng hpô

†† Shí hkyô banshoq gâ é gi, Yesuq jé lé râ hí má dut râ hkyô pé lé taí é nghut lhê. †† Haù hkyô pé gâ é gi, Yerusalem noqkuq yhùm htên byoq râ lé taí é nghut lhê.

haù gi, yhang é sutzè banshoq, dui-nhâng zoshâng haù yuq lé ap to râ nghut lhê. ⁴⁸ Nghut kôlhang, laqma mù, dui-nhâng zoshâng haù yuq gi, agè ashop sù nghut luî, 'Ngá é yhumsîng hpô jé lô râ gyai myáng ashî.' ga, yhang é i-myt unghkaù má myit yù mù, ⁴⁹ gotù dui-nhâng zoshâng luzúm wuî lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi, ⁵⁰ dui-nhâng zoshâng hau é yhumsîng hpó gi, yhang a myitngam tô é buinyi eq yhang a sê tô é ahkýng má jé lô mù, ⁵¹ yhang lé jap pyám luî, gegùn labyoq kut bang hkâm zô é, ngaubyi ngaù nhap eq zuì kyik kyik shoq hpuzô nyi râ jowò má hkyô pyám râ nghut lhê.

Zomyi Raxê Yuq Lé Dangtú Yu É Hkyô

25 Haù hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê. ² Haù bang má, ngo yuq gi, nhik a gyîng kó; ngo yuq gi, nhik gyîng akô nghut ri. ³ Haù nhik a gyîng é bang gi, myibung yu chûng kôlhang, xû a yu chûng kó nghut ri. ⁴ Nghut kôlhang, haù nhik gyîng é bang kúm gi, yhangmoq é myibung lé le, xû bo é bông lé le yu chung akô nghut ri. ⁵ Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.

⁶ Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoï ô!' ga, garû é htê htoq lo ri.

⁷ Haù hkûn, zomyi haù bang banshoq gi, toq lô mù, yhangmoq é myibung lé hen lajâng akô nghut ri. ⁸ Haù nhik a gyîng bang gi, 'Ngamoq lé, xû ratsuí byi kó laq; hkâsu mù gâ le, ngamoq é myibung shi lô nyi ri.' ga, haù nhik gyîng bâng chyáng dúng akô.

⁹ Haù hkûn, haù nhik gyîng bang gi, 'Nungmoq eq ngamoq é matú ga jáng, luq râ a nghut. Haù mù, nungmoq é matú, xû ung bâng chyáng ê wui yù keq.' ga tû taï kat akô.

¹⁰ Yhangmoq, xû wui e ló kô é hkûn, lusik gi, jé lé lô mù, haù rì rì hen tô é zomyi wui gi, yhang eq rahá myiháng poï má wang ló bekô. Hkum le myhî byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taï akô.

¹² Nghut kôlhang, haù lusik gi, 'Ngò, nungmoq lé teng za taï kôlé, nungmoq lé ngò a sé.' ga tû taï kat ri.

¹³ Haù mù luî, haù Byu Yhangzo jé lé râ buinyi eq ahkýng lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

¹⁴ Mauhkûng mingdán gi, byù rayuq byìn we htoq râ hen nyi é nghut mù, yhang é dui-nhâng zoshâng wui lé wut yù luî, yhang é sutzè lé ap byi to sù eq pung ashî nghut ri. ¹⁵ Yhang gi, yhangmoq é a-tsam má cháng luî, rayuq lé gi, ngùn ngo jói, rayuq lé gi, í jói,

htâng rayuq lé gi, rajoï kut byi to mù, byìn we shut htoq ló byuq bê nghut ri. ¹⁶ Ngùn ngo jói wó yù sù gi, haù hkûn jáng htoq ló mù, hpugá gá luî, ngùn ngo jói wó myat yù bê nghut ri. ¹⁷ Haù eq rajung za, ngùn í jói wó yù sù le, í jói wó myat yù bê nghut ri. ¹⁸ Nghut kôlhang, rajoï za wó yù sù gi, htoq e ló mù, myigùng má du luî, yhang yhumsîng hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haù bâng é yhumsîng hpó gi, dum taù jé lô mù, yhangmoq é ngùn chyarâng lé, lo jep ri. ²⁰ Ngùn ngo jói wó yù sù gi, amyat ngo jói lé le yu lé lô mù, 'Yhumsîng ê, nàng, ngo lé, ngùn ngo jói ap tô é nghut lhê. Wú aq, amyat ngo jói wó ho jat yù bê.' ga taï ri.

²¹ Haù hkûn, haù yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lháng wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lòm aq hkoï!' ga tû taï ri.

²² Haù eq rajung za, í jói wó yù sù le, lé lô mù, 'Yhumsîng ê, nàng, ngo lé ngùn í jói ap tô é nghut lhê. Wú aq, amyat í jói wó ho jat yù bê.' ga, lé taï ri.

²³ Haù hkûn, haù yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lháng wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lòm aq hkoï!' ga tû taï ri.

²⁴ Hau htâng, rajoï wó yù sù le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang mâ é shù yù nau é htoq agó, yhumsîng, kyôshi a sân hkyô tô é jang mâ é tsíng yù nau sù nghut é lé, ngò sê lhê. ²⁵ Haù mù, ngò gi, gyuq luî, htoq ê mù, náng é ngùn lé, myigùng má ê haq myhup tô é nghut lhê. Wú aq, shî gi, nàng é ngùn nghut lhê.' ga taï ri.

²⁶ Haù mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shù yù nau é eq, yhumsîng, kyôshi a sân hkyô tô é jang mâ é tsíng yù nau sù nghut é lé, nàng sê to gù nghut le nhîng, ²⁷ ngá é ngùn lé, ngò dum taù jé lô jáng, aráng eq amyat wó yù shoq, ngùn hpún kat jang má, haï mù a kat tô é lhú?

²⁸ Haù mù, haù ngùn rajoï lé, náng chyáng mai yù luî, raxê jói wó to sù lé, byi pyám nhâng râ nghut lhê.

²⁹ Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lháng yu pyám byi shirâ nghut lhê. ³⁰ Haù mù, haù akyù a bo é dui-nhâng zoshâng lé gi, ngaubyi ngaù nhap eq zuì kyik kyik shoq hpuzô nyi râ jowò nghut é, shinggan mauchut hkaù má dú htoq pyám keq.' gâ ri.

Sau Eq Bainám

³¹ Haù Byu Yhangzo gi, Yhang é hpungwup shingkang mai, maumang lagyo lhunglhâng bang eq rahá jé lé lo é hkûn, Yhang é hpungwup shingkang bo é hkohkâm-tanghkuq htoq má zùng râ nghut lhê.

³² Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotû tû kut gam hkoq é su, byu pé lé gam hkoq pyám râ nghut lhê. ³³ Yhang gi, sau pé lé, loqyo hkyam shut, bainám pé lé, loqpaî hkyam shut kut, nyhi to râ nghut lhê.

³⁴ Hau htâng má, haú Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muí mingdán má wang ló keq. ³⁵ Hkâsu mù gà le, Ngò zòmut é u lé, nungmoq, Ngo lé byi tso kô é nghut lhê; Ngò wuishit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê; ³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nòhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taí râ nghut lhê.

³⁷ Haú hkûn, haú dingmán bang gi, Yhang lé, 'Yhum-sîng ê, Nàng zòmut huí é lé, ngamoq, hkâ-nhám myàng luí, byi tsò wú é lhú? Nàng wuishit é lé, ngamoq, hkâ-nhám myàng luí, byi huq wú é lhú? ³⁸ Nàng bíng kut wún é lé, ngamoq, hkâ-nhám myàng luí, lhom hkulum wú é lhú? Nàng gùngchîn dut é hkûn, ngamoq, hkâ-nhám byi hut wú é lhú? ³⁹ Nàng nòhpyo huí é lé le, htóng lúng é lé le, ngamoq, hkâ-nhám myàng luí, lé gon lé kum wú é lhú?' ga myi kó râ nghut lhê.

⁴⁰ Haú hkûn, haú hkohkâm gi, 'Ngò, nungmoq lé teng za taí kôlé, shî, Ngá gumang wui mâ é je tiq sù lé, nungmoq kut byí é hkyô haí le, Ngo lé kut byí é nghut bê.' ga tû taí râ nghut lhê.

⁴¹ Hau htâng má, Yhang gi, Yhâng é loqpaî hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq.

⁴² Hkâsu mù gà le, Ngò zòmut é u lé, nungmoq, Ngo lé a byi tso kó; Ngò wuishit é u lé, nungmoq, Ngo lé a byi huq kó; ⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nòhpyo huí é eq htóng lúng é u lé, nungmoq, Ngo lé a gon kó nghut ri.' ga taí râ nghut lhê.

⁴⁴ Haú hkûn, yhangmoq gi, 'Yhumsîng ê, nàng zòmut wuishit é, bíng kut wún é, gùngchîn dut é, nòhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lhú?' ga taú myi kó râ nghut lhê.

⁴⁵ Haú hkûn, Yhang gi, 'Ngò, nungmoq lé teng za taí kôlé, shí bang mâ é je tiq sù lé, nungmoq, a kut byí é hkyô haí le, Ngo lé a kut byí é nghut bê.' ga, yhangmoq lé tû taí râ nghut lhê.

⁴⁶ Haú mù luí, haú bang gi, ahtum abyuq mara dam byí é má wang ló kó râ nghut lhê; haú dingmán bang kúm gi, ahtum abyuq é asak má wang ló kó râ nghut lhê." ga Yesuq taí ri.

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

26 Yesuq gi, haú hkyô pé lé ban taí é htâng má, Yhâng é chángzô pé lé, ² "Nungmoq sê tô é eq rajung za, í nyí laí é htâng má, Lhoqlhai Poí jé râ nghut mù, haú Byu Yhangzo gi, tapzîng má jén sat é hui râ matú, ap pyâm é hui râ nghut lhê." ga taí ri.

³ Haú u lé, hkyangjong agyi pé eq suwún wuî gi, Kayahpaq gâ é hkyangjong mó rayuq é yhumwàng má zup zîng to kômù, ⁴ Yesuq lé haq chyup yû râ eq sat pyám râ hkyô lé, hpyê lhùm bum akô nghut ri. ⁵ Nghut kôlhang, yhangmoq gi, "Byu pé gabyông lò kó abe, poí gyo-ro má gi, a kut shi sháng." ga, taí lhùm akô nghut ri.

Yesuq, Xû Hut Gyun Huí É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhùm má nyi tô é hkûn, ⁷ myiwe myhí rayuq gi, gyai hpaú é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byí ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haí mù luí, haú lé aha agó kut pyâm lhê lhú? ⁹ Xû haú lé, ahpaú myo myô èq ùng pyám mù, myùng bang lé byí le ge lhê mhaí!" ga taí kat akô.

¹⁰ Yesuq gi, haú hkyô lé sé luí, "Haí mù, myiwe zo haú lé, i-myit lhoq myô nyi akô lhú? Yhang gi, Ngá é ahtoq má ge é hkyô kut bê nghut ri. ¹¹ Haú myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut. ¹² Yhang, Ngá gûng má namngón xû hut gyûn é gi, Ngá gûng lé yhum râ matú, hen lajâng é hkyô nghut ri. ¹³ Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkang-mó má, yhang lé myit bûn é đông, yhang kut é hkyô shî lé, taí kyo bekô râ nghut lhê." ga taí kyo ri.

Yesuq Lé, Yudaq Èq Ung Zô Pyâm É Hkyô

Mrk 14:10-11; Luk 22:3-6

¹⁴ Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pê chyáng ê mù, ¹⁵ "Ngò, Yesuq lé nungmoq é loq má ap byí é nghut jáng, nungmoq, ngo lé haí byi kó râ lhú?" ga myí ri. Haú mù, yhangmoq gi, yhang lé ngùn denggá sum xê chap nghap byí akô. ¹⁶ Haú hkûn mai, Yudaq gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poí sâng-hi nyí má, haú chángzô pé gi, Yesuq chyáng lé lô kômù, "Nàng zo râ Lhoqlhai Poí zoshuq lé, ngamoq hkâmá món to râ lhú?" ga myí akô.

¹⁸ Haú mù, Yhang gi, "Myuq hkaú shut wang ló mù, byù rayuq chyáng ê luí, haú yuq lé, 'Ngá é ahkýing chyáng bê; Ngá é chángzô pé eq rahá, Ngò, náng é

yhôm má Lhoqlhai Poî kut râ nghut lhê.' gâ Sará taî ri nghû, ê taí keq." ga pying kat ri. ¹⁹ Haû mù, haû chángzô pé gi, Yesuq pying kat é eq rajung za ê taí kômù, Lhoqlhai Poî lé món to bekô nghut ri.

²⁰ Myinhâng jé lô jáng, Yesuq gi, haû chángzo raxe í yuq eq rahá, zohpoq má zung tô ri. ²¹ Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." ga taî ri.

²² Haû hkûn, yhangmoq gi, gyai gyô yón kômù, rayuq htâng rayuq, "Yhumsing ê, ngò a nghut hkaí?" ga, Yhang lé chòm myí akô.

²³ Haû hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám râ sù nghut lhê. ²⁴ Haû Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhàng, haû Byu Yhangzo lé ap pyám é sù gi, dingnyé wó ri; haû yuq gi, a hku lé le lháng, je ge ri." ga dum taí kat ri.

²⁵ Hau htâng, Yhang lé ap pyám râ sù, Yudaq gi, "Rabai ê, ngò a nghut hkaí?" ga myi jáng, Yesuq gi, "Nàng nghut ri." ga tû taí kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

²⁷ Hau htâng, Yhang gi, góm lé le, yù mù, jeju hkya-on luí, yhangmoq lé byi mù, taí é gi, "Nungmoq ban-shoq bang, shuq keq. ²⁸ Shí gi, yubak mara hkyut pyám byi râ, byù myo myô é matú htoq pyám é, dangshikaq eq sêng é Ngá sui nghut lhê. ²⁹ Ngò, nungmoq lé taí kôlé, ahkuí mai gi, Ngò, Ngá Wâ é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

³⁰ Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Lé, Te Taí É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yhangmoq lé, "Nungmoq lhunglhâng bang gi, hkû-myîn yhang jáng, Ngá é yan-mai, myit lingbat kó râ nghut lhê; hkâsu mù gâ le, 'Haû sau zúng sù lé, Ngò bat sat pyám mù, sau hpúng mâ é sau pé gi, Lhoq pyo pyám é hui kó râ nghut lhê.' †

ga kâ tô ri. ³² Nghut kôlhàng, Ngò gi, Lhoq dui toq é huí htâng má, Galile mau shut, nungmoq é hí má e ló lánng râ nghut lhê." gâ ri.

³³ Haû hkûn, Petruq gi, "Náng é yanmai, góbang ban-shoq myit lingbat kôlhàng, ngò gi, hkâ-nhám le myit lingbat râ a nghut." ga tû taí ri.

³⁴ Yesuq gi, "Ngò, nang lé teng za taí lé, hkû-myîn yhang jáng, woq a tûn shimá, nàng, Ngo lé sum dâm he-ngik pyám râ nghut lhê." ga tû taí ri.

³⁵ Nghut kôlhàng, Petruq gi, "Ngò, Nàng eq rahá shí râ dut kôlhàng, Nang lé ngò he-ngik pyám râ a nghut." ga saí taí ri. Haû chángzô pé góbang ban-shoq le, haû su ga châng taí bum akô nghut ri.

Get-samane Gâ É Jowò Má Kyûdûng É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gâ é jowò má ê kômù, yhangmoq lé, "Ngò, hé má ê mù, kyûdûng nyi é u lé, nungmoq shí má zùng lánng keq." ga taí ri. ³⁷ Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri. ³⁸ Hau htâng, Yhang gi, yhangmoq lé, "Ngò gi, shí râ í yhang myit yón nyi ri; nungmoq gi, Ngò su machyâ luí, shí má lánng nyí keq." ga taí ri.

³⁹ Yesuq gi, haû mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm † shí lé, Ngá chyáng mai lhaí pyám byi laq. Nghut kôlhàng, Ngò ô nau é đông a nghut, Nàng ô nau é đông sheq nghut sháng gaq." ga kyûdûng ri.

⁴⁰ Hau htâng, Yhang gi, Yhâng é chángzô pè chyáng dum taû lo le, yhangmoq yhup myhî to kô é lé lo myàng ri. Haû mù, Yhang gi, Petruq lé, "Nungmoq gi, hkyíng hkum rahkum za lháng, Ngò eq rahá a wó machya nyi kó lhú? ⁴¹ Gunlaú é a hui sháng gaq, machyâ luí, kyûdûng nyi keq. Haû woi-nyí gi, kâm nyi kôlhàng, gungsho gi, wum nyhôm nyi ri." ga taí ri.

⁴² Yhang gi, radàm dum ê mù, "Áwa ê, góm shí lé, Ngò a shuq é a wó lai râ nghut jáng gi, Nàng ô nau é đông nghut sháng gaq hkoí." ga kyû dum dúng ri.

⁴³ Yhang dum taû lo le, yhangmoq gi, myoqkuq lai kô é yanmai, yhup myhî to lánng kô é lé, lo dum myàng ri.

⁴⁴ Haû mù, Yhang gi, yhangmoq lé tô pyám to mù, sum dâm nghut râ dàm dum ê luí, hí lé dúng é dang lé roq é dum dúng ri.

⁴⁵ Haû mù, Yhang gi, haû chángzô pè chyáng dum taû jé lô mù, yhangmoq lé, "Nungmoq gi, ahkuí jé shoq yhup ngón nyi ashî kó lhú? Wú keq! Haû ahkyíng gi, jé bê nghut luí, haû Byu Yhangzo gi, yubak dap bâng é loq má ap pyám é hui râ nghut bê. ⁴⁶ Toq keq! Ló losháng hkoí! Ngo lé ap pyám râ sù gi, jé lé bê nghut ri." ga taí ri.

Yesuq, Chyup Yû Huí É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dáng nyo nyi ashî u lé, haû chángzo raxe í yuq má bo é Yudaq gi, jé lé lo ri; haû hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô. ⁴⁸ Yesuq lé ap pyám râ sù gi, haû bang lé, "Ngò, bopuq puq é sù gi, haû yuq nghut bê; Yhang lé chyup yû keq." ga kumlhá byí tô ri. ⁴⁹ Yudaq gi, Yesuq chyáng hkyê za ê mù, "Rabai ê, wángzán nyi lhê lhú?" ga taí luí, Yhang lé bopuq puq byí ri.

⁵⁰ Haû hkûn, Yesuq gi, "Buinùm hpó ê, nàng kut râ muzó lé kut aq hkoí." ga tû taí kat ri.

Hau htâng, yhangmoq gi, hí shut huí ê luí, Yesuq lé chòm zûi zing mù, chyup yû bekô nghut ri. ⁵¹ Haû mù,

† 26:31 Zhk 13:7

†† Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

Yesuq eq rahá nyi bang mâ é rayuq gi, shâm she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haû jáng, Yesuq gi, haû yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham èq shî rà nghut lhê. ⁵³ Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi rà nghut é lé, nungmoq a sé kó lhú? ⁵⁴ Nghut kôlhang, haû su nghut é nghut jáng, shí hkyô dut lò rà nghut lhê ga Chyúmdang pé má bò tô é hkyô gi, hkâsu wó dik lò rà lhú?" ga taí kat ri.

⁵⁵ Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup rà matú, shâm eq dumbáng pé chùng mù, lé lo akò lhú? Ngò gi, nyí wuî, noqkuq yhùm má zùng mù, mhoqshit nyí kôlhang, nungmoq, Ngo lé a chyup yû kô é nghut lhê.

⁵⁶ Nghut kôlhang, shí su dut é hkyô pé banshoq gi, haû myiqhtoí pé kâ tô é hkyô pé lo dik rà matú dut é nghut ri." ga taí ri. Haû hkûn, haû chángzô pé banshoq gi, Yesuq lé tô pyâm to kôluí, hpang byo byuq bekò nghut ri.

Yudaq Byìn Tú Wapdoq Má Jep Huí É Hkyô

Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haû tarâ sará pé eq suwún wuî zup zing nyi é jang, hkyangjong mó Kayah-paq é yhùm má, Yhang lé shuí e akò. ⁵⁸ Petruq gi, hkyangjong mó é yhumwàng hkaû má châng jé wàng shoq, we we mai Yesuq htâng châng tô ri. Yhang gi, hkâsu dut lò rà lé myàng naù luí, wàng hkaû má wang é mù, zung bang eq rahá zung tô ri.

⁵⁹ Haû hkyangjong agyi pé eq Yudaq byìn tú wapdoq má é góbang gi, Yesuq lé sat pyám nhâng rà matú, a têng é saksé ho nyi akò. ⁶⁰ A têng é saksé myo myo htoq lô kôlhang, wó sat rà í é saksé a myàng kó nghut ri.

Ló htáng má, byù í yuq gi, lé lô kômù, ⁶¹ "Shí yuq gi, 'Ngò gi, haû Garai Gasâng é noqkuq yhùm lé lhoq ht-en pyám mù, sum nyí gyoro má dum wó saí lhê,' ga taí sù nghut ri." ga taí akò.

⁶² Haû hkûn, haû hkyangjong mó gi, toq yap mù, "Nàng, haí le a tú taí luq? Shí bang, Nang lé mara hun nyi é saksé gi, hká đông nghut lhê lhú?" ga, Yesuq lé myí ri. ⁶³ Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yhang lé, "Haû rû dui nyi é Garai Gasâng é mying lé lang luí, ngò, Nang lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jáng, ⁶⁴ Yesuq gi, "Nàng taí é eq rajung za nghut lhê. Ngò, nungmoq banshoq lé taí kôlé, nungmoq gi, ahkuí mai htâng hpyang má, haû Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkúng mai lé lo é lé le, nungmoq myàng kó rà nghut lhê." ga taí ri.

⁶⁵ Haû hkûn, hkyangjong mó gi, yhang é bu lé lạng cheq pyám mù, "Yhang gi, Garai Gasang lé rhoí dang taí bê nghut ri! Nga-nhúng, hai saksé rà ashí lhú?

Yhang, Garai Gasang lé rhoí dang taí é lé, nungmoq, ahkuí wó gyo bekò nghut lhê. ⁶⁶ Nungmoq hkâsu wó myit akò lhú?" ga myi jáng, yhangmoq gi, "Yhang gi, shí gíng sù nghut lhê." ga tú taí akò nghut ri.

⁶⁷ Hau htâng má, yhangmoq gi, Yesuq é myoqdong má sôkan byé gyun luí, loqtsup èq htui byí akò nghut ri. Góbang gi, Yhang lé bo-pyuq pyuq byi luí, ⁶⁸ "Hkrisduq Nàng, Nàng lé bat sù ó yuq nghut é lé, myiqhtoí htoí wú aq." ga taí akò.

Yesuq Lé, Petruq He-ngik Pyâm É Hkyô

Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaû má nyi tô é u lé, dui-nhâng zoshâng myhí rayuq gi, yhang chyáng lé jé mù, "Nàng le, haû Galile byù Yesuq eq rahá nyi sù nghut ri." ga taí ri.

⁷⁰ Nghut kôlhang, Petruq gi, haû bang banshoq é hí má yhang, "Nàng haí taí nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haû jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haû mâ é bang lé taí kat ri.

⁷² Haû hkûn, yhang gi, "Byù haû yuq lé, ngò a sé!" ga dakam é đông he pyâm ri.

⁷³ Hau htâng razup zo má, haû jowò má yap to bang gi, Petruq chyáng huí ê kômù, "Nàng le, haû bang má bò sù yhang nghut ri; náng é danghtê lé sê gyô ri." ga taí akò.

⁷⁴ Haû hkûn, yhang gi, yhanggùng yhang nhing luí, "Haû yuq lé, ngò a sé." ga dakam dang taí ri.

Haû-u yhang, woq tân bê nghut ri. ⁷⁵ Haû mù, Petruq gi, "Woq a tân shi má, nàng, Ngo lé sum dâm he pyám rà nghut lhê." ga, Yesuq, yhang lé taí é dang lé, myit bûn kat mù, shinggan shut htoq ê luí, gyai yhang é ngaug ri.

Yudaq Juíshi É Hkyô

Mrk 15:1; Luk 23:1-2; Yhn 18:28-32

27 Napsûn noq le, hkyangjong agyi pé banshoq bang eq mingbyu é suwún wuî gi, Yesuq lé sat pyám nhâng rà matú chôm myit hpyit yû bekò nghut ri. ² Haû mù, yhangmoq gi, Yhang lé tuí yù luí, shuí htoq ê kômù, mauzau Pilat chyáng ê ap byí akò nghut ri.

³ Yesuq lé ap pyâm é sù Yudaq gi, Yesuq lé jéyáng do-qdân é hkyô lé myang sé jáng, nungngham wó mù, haû ngùn sum xê chap lé, hkyangjong agyi pé eq suwún wui chyáng ló dum taù byí ri. ⁴ Haû mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haû hkyô, ngamoq eq haí sêng lhê lhú? Haû gi, nàng eq sheq ru sêng lhê." ga lhom taí kat akò nghut ri.

⁵ Haû mù, Yudaq gi, ngùn haû lé, noqkuq yhùmhkaû má dú pyâm to luí, htoq ló mù, yhang gùng yhang é juíshi byuq bê nghut ri.

⁶ Haû hkyangjong agyi pé gi, ngùn chap haû pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga taí akô. ⁷ Haû mù, yhangmoq gi, tungbaù pé é lupdùng kut râ matú, au saí zo su é maumyí lé, ngùn hau eq wui hpyit yù râ đông, chôm myit hpyit to bekô nghut ri. ⁸ Hau é yanmai, ahkuí jé shoq, haû jowò lé, sui myigùng ga myhîng tô akô nghut ri. ⁹ Haû gi, "Haû Israellaq byu pé mai, Yhang lé gù hpyit tô é ngùn sum xê chap lé, yhangmoq yù mù, haû Yhumsíng Garai, ngo lé pying tô é eq rajung za, ¹⁰ haû au saí zo su é maumyí lé, yhangmoq wui yù bekô nghut ri." ga myiqhtoi Yeremiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

Mrk 15:2-15; Luk 23:3-5, 13-26; Yhn 18:33—19:16

¹¹ Haû u lé, Yesuq gi, mauzau hpô é hí má yap tô é nghut mù, haû mauzau hpó gi, Yhang lé, "Nàng gi, Yudaq byu pé é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga tû taí ri.

¹² Haû hkyangjong agyi pé eq suwún wuí gi, Yhang lé, mara hûn kôjáng, Yhang gi, haí le a tû taí nghut ri. ¹³ Haû hkûn, Pilat gi, Yhang lé, "Yhangmoq, Nàng lé mara hûn saksé haû-í hkâm nyi kô é lé, Nàng a wó gyo lhú?" ga saí myí ri. ¹⁴ Nghut kôlhang, Yesuq gi, dang rahkun lháng a tû taí é yanmai, haû mauzau hpó gi, gyai maú byuq bê nghut ri.

¹⁵ Haû Lhoqlhai Poí u lé, mingbyû wui ô nau é má cháng luí, haû mauzau hpó gi, htóng byû rayuq yuq lé nhâng byí é htông joq ri. ¹⁶ Haû u lé, a gè mying htoq é htóng byû, Barabaq ga sù rayuq nyi ri. ¹⁷ Haû mù, byû moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lhú? Barabaq luq? Haû a nghut jáng, Hkrisduq gâ é Yesuq lé luq?" ga myí ri. ¹⁸ Yhang lé haû su ga myí é gi, yhangmoq, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri.

¹⁹ Pilat gi, tarâ jéyang tingnyâng htoq má zung tô ashí hkûn, yhangmyí gi, "Haû mara a bò Sù lé, haí le hkâkut; hkâsu mù gâ le, hkû-nyí za lháng, yhupmoq má, haû yuq é yanmai, ngò tsómra hpuzô pyám bê nghut lhê." ga, yhâng chyáng dang pying kat ri.

²⁰ Nghut kôlhang, haû hkyangjong agyi pé eq suwún wuí gi, Barabaq lé dúng htoq yù râ eq Yesuq lé sat pyám nhâng râ matú, shiwa byu pé lé wum byi bekô nghut ri.

²¹ Haû mauzau hpó gi, "Shí í yuq mâ é hká yuq lé, nhâng byi nhâng nau akô lhú?" ga myi jáng, yhangmoq gi, "Barabaq!" ga tû taí akô nghut ri.

²² Haû mù, Pilat gi, "Haû jáng gi, Hkrisduq gâ é Yesuq lé, ngò hkâsu kut râ lhú?" ga dum myí kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taí akô nghut ri.

²³ Nghut kôlhang, yhang gi, "Haí mù luí lhú? Yhang gi, haí mara kut shut bê lhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garû lo bum akô nghut ri.

²⁴ Pilat gi, hká đông le a dat kut lô é eq byu pé gabyông lò kô râ nghut é hkyô lé myàng luí, uchyam yù mù, shiwa byu pé hí má loq chi luí, taí é gi, "Shí yuq é sui gi, ngò eq haí a séng; nungmoq eq za ru sêng lhê." gâ ri.

²⁵ Haû shiwa byù lhunglhâng bang gi, "Yhâng é sui gi, ngamoq eq ngamoq é yhangzo yhangshû pé htoq má joq nyi sháng gaq." ga, dum tû taí kat akô nghut ri.

²⁶ Haû hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byí kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

²⁷ Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shuî wang lô kômù, Yhâng é lhîngkyuq má, gyedap gón lé ji tsîng tô akô. ²⁸ Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù, ²⁹ zujanmaú ralhum saí yù kôluí, Yhâng é ulhum má tsung byí akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuoq kôluí, "Yudaq byu pé é hkohkâm hpó ê! Chyung hîng xê hing nyi sháng gaq ô!" ga, jihpoi dang taí akô.

³⁰ Yhangmoq gi, Yhang lé sôkan byé gyun luí, Yhâng é loq mai jàm-yang lú yù mù, Yhâng é ulhum má dum bat bat kut akô nghut ri. ³¹ Yhangmoq gi, Yhang lé rhoi jihkyoí ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuî htoq e lô bekô nghut ri.

Yesuq Lé Jén Pyâm É Hkyô

Mrk 15:22-32; Luk 23:27-43; Yhn 19:17-27

³² Yhangmoq htoq e lô nyi le, Kuruni myuq byû nghut é Simun ga sù lé myàng kômù, yhang lé, zik luí tapzîng waq nhang akô nghut ri. ³³ Yhangmoq gi, Golgahta gâ é jowò má jé e lô bekô nghut ri. Golgahta gâ é lichyúm gi, ugyap joq é jowò lé gâ é nghut lhê. ³⁴ Haû má jé jáng, yhangmoq gi, Yesuq lé, hkô jung eq nyhò tô é tsi-biyiq wing lé byi huq akô; nghut kôlhang, Yhang gi, haû lé chyam wú mù, a shuq byi kut pyâm ri. ³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyín shosé shé é đông gam yu pyâm byí akô. ³⁶ Hau htâng, yhangmoq gi, haû jowò má zung to mù, Yhang lé zúng nyi akô nghut ri. ³⁷ Yhâng é u htoq má, "SHÍ YUQ GI, YUDAQ BYU PÉ É HKOHKÂM, YESUQ NGHUT LHÊ." ga, Yhang lé mara hun é laiká kâ tap tô akô. ³⁸ Haû hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri. ³⁹ Hkyô sô laí lô é bang gi, nyhap é đông u-ngut ngut mù, taí kô é gi, ⁴⁰ "Noquq yhûm lé hpyoq pyám luí, sum nyí gyoro má dum wó saí lhê ga Sù ê! Nàng, Garai Gasâng é Yhangzo nghut le gi, Náng gûng nàng hkyi yù luí, tapzîng mai gyó lo wú aq mhaí!" ga akô nghut ri.

⁴¹ Haû eq rajung za, hkyangjong agyi pé, tarâ sará pé eq suwún wuî le, Yhang lé rhoî jihkyoî kut mù, taí kô é gi, ⁴² "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! Yhang gi, Israelaq byu pê é hkohkâm nghut lhê lhâ! Ngamoq wó lumjîng râ matú, Yhang, tapzîng mai gyó lo wú sháng gaq. ⁴³ Yhang gi, Garai Gasang lé lumhkaû sù nghut lhê mù, Garai ô nau é sù nghut le gi, ahkuî Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri. ⁴⁴ Haû eq rajung za, Yhang eq rahá tapzîng má jén to huî é damyaq í yuq le, Yhang lé rhoî dang taí akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ⁴⁶ Myinhâng sum hkyíng kô má, Yesuq gi, "Eloi, Eloi, lama sabakhtani?" ga, htê mó èq garû kat ri. Hau é lichyúm gi, "Ngá Garai ê, Ngá Garai ê, Nàng, haî mù, Ngo lé tô pyâm tô lhê lhu?" gâ é nghut ri. [†]

⁴⁷ Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

⁴⁸ Haú hkûn jáng, yhangmoq mâ é rayuq gi, din e ló mù, wuimaù lé è yu ri. Yhang gi, haú lé tsibiyiq wing chyín má jum yù luí, jàm-yang má tuî tap mù, Yesuq shuq râ matú yhun byî ri. ⁴⁹ Góbang gi, "Yhang lé, Eliyaq, lé hkyi yu lhê laq, nga-nhúng chôm láng wú sháng." ga taí akô nghut ri.

⁵⁰ Haú hkûn, Yesuq gi, htê mó èq dum garû kat luí, Yhâng é soqkâng byit bê nghut ri.

⁵¹ Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri. ⁵² Lup pé gi, bóng lô mù, shí byuq bê é chyoyúng bang myo myo gi, lhoq dui é hui akô. ⁵³ Haú bang gi, Yesuq dum dui toq é htâng, lup mai htoq lô kômù, chyoyúng myuq ^{††} má wang ê luí, byù myo myô hí má htoq shít akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô ban-shoq lé myàng kôjáng, gyuq dàn kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

⁵⁵ Myiwe wuî myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô.

⁵⁶ Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnu pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri. ⁵⁸ Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri. ⁵⁹ Yosep gi, gungsôm lé yù mù, pán yúng èq htup yup luí, ⁶⁰ luqgok lé kyúng tô é, yhâng é lup sik hkaû má ê kat tô ri. Hau htâng, yhang gi, luphkum má, luqlông èq lhêng chî pyâm to luí, ló byuq bê nghut ri. ⁶¹ Magadalaq wà mâ é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Haú Hên Lajang Buinyi laí é htâng nyí lé, hkyangjong agyi pé eq Hparishe pé gi, Pilat chyáng ê mù, ⁶³ "Yhumsîng ê, Yhang, asak dui nyi ashî hkûn, 'Sum nyí nghû râ buinyi má, Ngò dum dui toq lô râ.' ga, haú byù mhaú taí é dang lé, ngamoq bún nyi lhê. ⁶⁴ Haú mù, haú sum nyí nghû râ buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaû yu ló mù, Yhang shi é mai dum dui toq lô bê ga, byu pé lé taí kó râ nghut lhê. Shí, ló htâng dâm mhaú é hkyô gi, sâng-hi dâm htoq je wui râ nghut lhê." ga, lé taí akô nghut ri.

⁶⁵ Haú hkûn, Pilat gi, "Nungmoq sê é dông, lup lé haî a dut loshoq, gyezô pé lé zúng nhang to keq." ga tú taí kat ri. ⁶⁶ Haú mù, yhangmoq gi, ê luí, lup lé gau shoq ga, luqgok má dizik htung mù, lup zúng byù nyhi to bekô nghut ri.

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

28 Bánno buinyi lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má è wú râ ga, e ló akô.

² Haú hkûn, layàng mó nún lo ri; hkâsu mù gâ le, Yhumsîng Garaí é maumang lagyo rayuq gi, mauhkûng mai gyó lé lô mù, lup má è luí, haú luqlong lé tu lheng mù, hau ahtoq má zung tô ri. ³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. ⁴ Zúng nyi é bang gi, yhang lé lûm wú gyuq kômù, pyik pyik nán luí, shí gùng su dut bùm bekô nghut ri.

⁵ Haú maumang lagyo gi, myiwe haú nhik lé, "Hkâ-gyuq kó! Haú tapzîng má jén sat huî é Yesuq lé, nungnhik ho nyi kô é lé, ngò sê lhê. ⁶ Yhang gi, shí má a nyi lo; Yhang taí tô é eq rajung za, lhoq dui toq é hui bê nghut ri. Yhang lé lhez é jowò lé, lé wú keq. ⁷ Haú mù, hân taù ló luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut ló láng berâ. Nungmoq, Yhang lé, haú má ló myâng kó râ nghut lhê.' nghû ló taí kyo keq. Nungnhik lé, ngò taí é lé matsîng chûng keq." ga taí kat ri.

[†] 27:46 Hkya-on 22:1 ^{††} Chyoyúng myuq gâ é gi, Yerusalem wà mó lé gâ é nghut lhê.

⁸ Haû mù luî, myiwe myhí haú nhik gi, gyuq kôlhang, gyai gabú é myit èq lup mai hân taû ló mù, Yhâng é chángzô pé lé ló taí kyo râ matú, din ló bê nghut ri. ⁹ Haú hkûn, Yesuq gi, radá dâm yhangnhik lé lhom tê mù, "Wángzán nyí kó sháng gaq." ga taí ri. Haû mù, yhangnhik gi, huî ê luî, Yhâng é hkyî má po zing to mù, Yhang lé noqkuq akô. ¹⁰ Haú hkûn, Yesuq gi, yhangnhik lé, "Hkâgyuq kó. Ngá é gumang wuî lé, Galile mau shut e ló keq nghû ló taí kyo keq; haú má, yhangmoq, Ngo lé myàng kó râ nghut lhê." ga taí kat ri.

Zúng Nyi É Gyezô Pé Taí É Danglù

¹¹ Myiwe haú nhik hkyô má ru nghut nyi ashê le, lup zúng é gyezô pé ra-am gi, myuq hkaû má wang ló mù, dut lai lo é hkyô banshoq lé, haú hkyangjong agyi pé lé ló taí kyo akô nghut ri. ¹² Haú hkyangjong agyi pé gi, suwún wuî eq huî lhum luî, hpyê lhûm é htâng má, haú gyezô pé lé, ngùn myo myo tsup byi mù, ¹³ "Myín lé, ngamoq yhup myhí tô é hkûn, Yhâng é chángzô pé lé lô mù, mâng lé, lé hkaû yu ló bekô nghut ri." nghû taí keq. ¹⁴ Shí hkyô lé, haú mauzau hpó wó gyô é nghut jáng, yhang myit ngón shoq, ngamoq taí râ nghut lhê; haú hkûn, nungmoq gi, hai manghkáng a htoq râ

nghut lhê." ga taí kat ri. ¹⁵ Haû mù, gyezô pé gi, ngùn haú pé lé yù luî, yhangmoq lé taí kat é eq rajung za kut bekô nghut ri. Haû su mù, haú hkyô gi, Yudaq byu pé má taí pyo myhín ló bê nghut mù, ahkuî jé shoq taí nyi bum akô nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶ Hau htâng má, haú chángzo raxe rayuq gi, yhangmoq lé, Yesuq ê nhang tô é Galile mau mâ é bùm shut e ló bekô nghut ri. ¹⁷ Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jing kó nghut ri. ¹⁸ Hau htâng, Yesuq gi, yhangmoq chyáng lé lô mù, "Mauhkûng eq myigùng htoq mâ é ahkáng ayá banshoq, Ngo lé byí to bê nghut lhê. ¹⁹ Haû mù, nungmoq gi, htoq ê luî, byù myû chângjup lé, Ngá é chángzô pé dut nhâng mù, haú Îwa, Yhangzo, Chyoiyúng Woi-nyí é myìng lang luî, wui-myhup hkám byi mù, ²⁰ nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htûm é hkûn jé shoq lhang, nungmoq eq rahá ru nghut nyí râ nghut lhê." ga pying tô ri.

Markuq

(The Gospel of Mark)

Yesuq É Matú Hkyô Htong Byî É Hkyô

Mht 3:1-12; Luk 3:1-18; Yhn 1:19-28

1 Haû Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haû myiqhtoi Esai-aq laiká má:

"Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê." [†] ga luí le,

³ "Haû yoso má, byù rayuq garû taí é htê gi, 'Haû Yhumsing é matú, hkyô hen to keq; Yhâng é matú hkyô lhoq nyhang to keq.'" ^{††} ga luí le, kê tô é eq rajung za nghut lhê. ⁴ Haû mù, Wui-myhup Sará Yohan gi, yoso hkaû má jé lé luí, wui-myhup hkám byî nyi é eq, yubak mara hkyut pyám byî é hui râ matú myit lhîng mù, wui-myhup hkâm yù râ hkyô lé, hko kyô nyi ri. ⁵ Haû hkûn, Yuda mau jowò hkanmó mâ é bang eq Yerusalem wà mó mâ é ban-shoq bang gi, yhâng chyáng htoq e bum akô. Yhang-moq gi, yhumsing é mara lé yín yù kôluí, yhâng chyáng mai Yodan làng má wui-myhup hkâm yu bum akô nghut ri. ⁶ Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri. ⁷ Yhang taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê. ⁸ Ngò gi, nungmoq lé, wui èq za wui-myhup wó hkám byi lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê." gâ ri.

Yesuq, Wui-myhup Hkâm Yu É Hkyô Eq Gunglaú Huí É Hkyô

Mht 3:13-17; 4:1-11; Luk 3:21-22; 4:1-13

⁹ Haû yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkâm yu ri. ¹⁰ Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri. ¹¹ Haû hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

¹² Haû hkûn jáng, Woi-nyí gi, Yhang lé yoso shut wang e ló nhang ri. ¹³ Haû mù, Yhang gi, yoso má myi xê nyí nyi luí, Tsadán èq gunglaú é huí ri; tân jung yosô

† 1:2 Mal 3:1 †† 1:3 Esai 40:3

zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

¹⁴ Yohan htóng gyó é htâng má, Yesuq gi, Galile mau má ló jé mù, ¹⁵ "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhîng mù, haû gabú danglù lé lumjîng keq hkoi." ga luí, Garai Gasâng é gabú danglù lé hkô kyo wún ri.

¹⁶ Yesuq gi, Galile nhông yàm mai sô laí ló le, Simun eq yhanggu Andre nhiktâng, nhông má gùn dú nyi kô é lé, myang ri; haû nhik gi, ngozo kóng zo su nhik nghut akô. ¹⁷ Haû mù, Yesuq gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri. ¹⁸ Haû hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

¹⁹ Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhaí hkaû má gùn hpo nyi kô é lé, myang ri. ²⁰ Haû hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyâng pé lé, lhaí hkaû má nyhi pyâm to kôluí, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

²¹ Yhangmoq gi, Kaperna-um wà má e akô; Bánno buinyi nyí jé jáng, Yesuq gi, tarajong má wang ê mù, mhoqshit hi ló bê nghut ri. ²² Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri. ²³ Haû u lé, agè ashop é nat wang júng é byù rayuq tarajong má bo lom nyi luí, wut garû kat é gi, ²⁴ "Nazaret wà byù Yesuq ê, ngamoq gi, Nàng eq haí sêng lhê lhú? Ngamoq lé lhoq hten râ matú, Nàng jé lé é nghut lhê lhú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

²⁵ Haû hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat ri. ²⁶ Haû hkûn, agè ashop é nat haû gi, byù haû yuq lé wum kat langhtân nhâng luí, htê mó èq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é

dang wá nghut lhê lhú? Ahko ahkáng bo é dōng mhoqshit é hkyô asik nghut ri-nhung! Yhang gi, agè ashop é nat pé lé hknúmó hkyó jáng, haú bang lháng gyo byí akô nghut ri." ga luí, taí lhúm bum akô nghut ri.

²⁸ Yesuq eq sêng é ludang gi, Galile mau jam shoq, yang é dōng byo myín ló bê nghut ri.

Byù Myo Myo Lé, Yesuq Lhoq Gê Byí É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luí, haú hkún jáng, Yakuq eq Yohan nhik le mù, Simun eq Andre nhiktàng é yhúm má wang e ló bekô nghut ri. ³⁰ Simûn é yhâng-aumó gi, gyai yhang nò leq tô é nghut mù luí, yhangmoq gi, Yesuq lé haú yuq no é hkyô lhóm taí kyô akô nghut ri. ³¹ Haú mù luí, Yesuq gi, yhâng chyáng huí ê mù, yhâng é loq má zui luí tu tsung ri; haú hkún jáng, nò ge byuq luí, yhang gi, yhangmoq lé gaí tso gaí huq bê nghut ri.

³² Haú nyí buiwang é htàng má, byu pé gi, no é bang eq nat gang wang júng nyi é bang banshoq lé, Yesuq chyáng shuí lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkat htoq pyâm ri; nghut kôlháng, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

³⁵ Yesuq gi, htang napkyó mau lháng a bó shimá, toq mù, gaú é jowò ralhúm má htoq ê luí, kyú ê dūng ri.

³⁶ Simun eq yhâng é luzúm wuí kúm gi, Yhang lé châng hô kômù, ³⁷ Yhang lé myang hô kôjáng, "Yuq hkangmó gi, Nang lé châng hkat ho nyi akô." ga luí, taí kyô akô nghut ri.

³⁸ Haú hkún, Yesuq gi, yhangmoq lé, "Awui ayàm má é wà pé má le, ngò, mungdang wó hkô rã matú ê sháng, hau é matú ngò lé é ru nghut lhê." ga tũ taí ri.

³⁹ Haú mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byí wún ri.

Manggâm Dap Sû Lé, Yesuq Lhoq Gê Byí É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq luí, "Nàng dōng é nghut le gi, ngò lé Nàng wó lhoq sân-yúng byi rã nghut lhê." ga dung wut ri.

⁴¹ Haú hkún, Yesuq gi, yhang lé wú shogyo luí, loq lhâm kat mù, haú yuq lé ê záng luí, "Ngò dōng lhê, sân-yúng aq hko." ga taí ri. ⁴² Haú hkún jáng, manggâm ana byuq byuq luí, yhang gi, gè bê nghut ri.

⁴³ Yesuq gi, "Nàng, shí hkyô ó lé le hkãtaí kyo. Nghut kôlháng, náng é gungdu lé, hkyangjong hpò chyáng ló tũn shit mù, náng sân-yúng bê hkyô lé yhangmoq é matú saksé dut sháng gaq, Mosheq tarã tô tô é eq rajung za, hkungga ló nhōng byi aq." ga, yhang lé gyai yhang sidiq byi mù, radá dãm nhang kat bê nghut ri.

⁴⁵ Nghut kôlháng, haú yuq gi, htoq ló mù, haú hkyô lé je taí pyo myhín ló bê nghut ri. Hau é yanmai, Yesuq

gi, wà hkaú má de de a ge wang ló lo mù, shinggan mã é chamchyuyiui dut é jowò má za nyi nyi ri. Nghut kôlháng, byu pé gi, jowò hkangmó mai Yhâng chyáng ru zing lé nyi bum ashí kó nghut ri.

Gùngjum Shí Sû Lé, Yesuq Lhoq Gê Byí É Hkyô

Mht 9:1-8; Luk 5:17-26

² Buinyi hkã-myháng a myáng má, Yesuq gi, Kaper-na-um wà má dum wang lò jáng, Yhang yhúm dum taú jé lô bê gâ é hkyô lé, byu pé wó gyô bum akô nghut ri. ² Haú mù, byù myo myo zing lé lô kôluí, yhúm hkaú má jowò a joq lô é htoq agó, hkumtot má lháng a joq lo nghut ri; Yesuq gi, yhangmoq lé mungdang hko kyô nyi ri. ³ Haú hkún, byù myi yuq gi, gùngjum shí sù rayuq lé chòm dang waq luí, Yhâng chyáng lé lo akô. ⁴ Yhangmoq gi, byù lùm myô chyín chyap to mù, byù haú yuq lé Yesuq chyáng a wó shuí jé ê kô é yanmai, Yesuq é u htoq mã é yhumhkung lé dong htông yù luí, gùngjum shí sù lé taphkang eq roq hkyô kat akô nghut ri. ⁵ Yesuq gi, yhangmoq é lumjìng myit lé byu-myàng jáng, gùngjum shí sù lé, "Ngá zo ê, náng é yubak mara lé hkyut pyám byi bê." ga taí ri.

⁶ Haú hkún, tarã sará pé ra-am gi, haú má zung to kôluí, yhangmoq é i-myit unghkaú má, ⁷ "Byù shí yuq gi, haí mù luí haú su gâ lhê laq? Yhang gi, Garai Gasang lé rhoí dang taí nyi ri; Garai Gasang mai lai luí, ó yuq wá mara wó hkyut byi rã lhú?" ga luí, myit sòn wui nyi bum akô nghut ri.

⁸ Yesuq gi, yhangmoq é unghkaú má myit wú nyí kô é hkyô lé, radá dãm Yhang é myit mai sé mù, "Nungmoq é i-myit hkaú má, haí mù haú su nghu myit sòn wui nyi bum akô lhú? ⁹ Haú gùngjum shí sù lé, "Náng é yubak mara lé hkyut pyám byi bê." nghu taí é dang eq, "Toq aq, náng é taphkang lé yù mù, hkyô so aq." nghu taí rã má, hkã hkn je taí lui lhê lhú? ¹⁰ Nghut kôlháng, haú Byu Yhangzo † gi, mingkan htoq má, mara hkyut byi rã ahkáng wó Sû nghut é lé, nungmoq lé sé nhâng nau lhê." ga, yhangmoq lé taí kat ri. ¹¹ Hau htàng, Yhang gi, haú gùngjum shí sù lé, "Ngò, nang lé taí bá, toq aq, náng é taphkang lé yu chùng luí, yhúm taú ló aq hko." ga taí ri. ¹² Haú yuq gi, toq mù, yhâng é taphkang lé yu chùng luí, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkangmó gi, mauhong bùm kômù, "Isú é hkyô gi, hkã-nhám lháng a myàng wú shi." ga, Garai Gasang lé hkyã-on kungton bum akô nghut ri.

Lewiq (Mahte) Lé Wut Yu É Hkyô

Mht 9:9-13; Luk 5:27-32

¹³ Yesuq gi, nhōng yàm má radàm dum htoq e ri. Haú hkún, byù moq mó gi, Yhâng chyáng jé lé lo bùm kômù, Yhang gi, haú bang lé lhóm mhoqshit nyi ri.

¹⁴ Yhang gi, sô yōng ló nyi é hkún, kang guq zúm má zung tô é, Alhpe yhangzo Lewiq lé myang kat luí, "Ngá htàng cháng aq." ga taí ri. Haú hkún, Lewiq gi, toq luí, Yhang htàng cháng bê nghut ri.

† Byu Yhangzo gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

¹⁵ Yesuq gi, Lewiq é yhûm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri. ¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haî mù luî, kang guq bang eq yubak dap bang eq rahá zo shuq nyi lhê lú?" ga myî bum akô nghut ri.

¹⁷ Haû su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chí sará a ra kó, nõh-pyo hui bang za sheq ru râ lhê. Haû eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga taî kat ri.

Zoshuq Gám É Eq Sêng É Hkyô

Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Haû mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haî mù a gám kô é lhú?" ga luî, myî akô nghut ri.

¹⁹ Haû hkûn, Yesuq tû taî é gi, "Bíng pé gi, lusik eq rahá nghut nyi tô ashî hkûn, zoshuq hkâsu wó gám râ lhú? Yhangmoq gi, lusik eq rahá nghut nyi é u lé, zoshuq gám kó râ a nghut. ²⁰ Nghut kôlhang, lusik lé yhangmoq chyáng mai shuî yu pyâm é hkyíng jé râ nghut lhê; haû buinyi pé má kúm gi, yhangmoq, zoshuq gám kó râ nghut lhê.

²¹ Ó yuq le, mebu xau má pán sik èq a lhaq hpo wú kó; haû su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê. ²² Haû eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luî, tsibiyiq wing eq shokuq htûng htên byuq râ nghut lhê. Haû mù, tsibiyiq wing asik gi, shokuq htûng sik má za ge kat é nghut lhê.

Bánno Buinyi É Yhumsíng

Mht 12:1-14; Luk 6:1-11

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaû mai sô laî ló é hkûn, Yhâng é chángzô pé gi, kyôshi ratsuí langshap yu akô nghut ri.

²⁴ Haû mù, Hparishe pé gi, Yesuq lé, "Wú aq, Bánno buinyi má a ge kut jung lé, haî mù, náng é chángzô pé kut nyi akô lhú?" ga taî akô.

²⁵ Haû hkûn, Yesuq gi, yhangmoq lé, "Dawiq lháng gi, yhang htâng châng é bang eq rahá zòmüt hui luî, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lhú? ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúmhkaû má wang è mù, hkyangjông pé mai lai luî, ó le a ge zô é, kyâng tô é muk lé yù zo mù, yhang

htâng châng é bang lé le ratsuí tsuí byi tso é nghut lhê." ga tû taî ri.

²⁷ Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. ²⁸ Haû mù, haû Byu Yhangzo gi, haû Bánno buinyi é Yhumsíng lháng nghut lhê." ga xoq taî ri.

3 Yesuq gi, tarajong má radàm dum wang e le, loq raloq ajum shi byuq é byù rayuq nyi to lánq ri.

² Haû hkûn, haû má nyi tô é bang ra-am gi, Bánno buinyi má, Yesuq mai haû yuq lé lhoq gê byi râ lhú ga, mara hûn râ matú gyám wú nyi akô nghut ri. ³ Yesuq gi, haû loq jum shî sù lé, "Banshoq bâng é hí má, toq yap shit aq." ga taî kat ri.

⁴ Hau htâng, Yhang gi, haû má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyí râ eq byù sat râ hkyô pé má, hká lhum kut le sheq tarâ wang lhê lhú?" ga myî kat jáng, yhangmoq kúm gi, jit le a ga kó nghut ri.

⁵ Haû mù, Yhang gi, nhik-yô nau é myit èq haû bang lé lhíng wú mù, yhangmoq myit htan é hkyô lé, wú yón luî, haû loq jum shî sù lé, "Náng é loq nyhang kat aq." ga taî kat jáng, haû yuq gi, loq nyhang kat luî, yhang é loq gi, shoq za ge byuq bè nghut ri. ⁶ Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhûm bum akô nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhâng é chángzô pé eq rahá, nõng shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri. ⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayâm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri. ⁹ Yesuq gi, byù myo myo lé lhoq gê byî é yanmai, nõhpyo hui to bang gi, Yhang lé wó záng shoq ga, chyín chyap wang ló bum akô. Byù lûm myo luî, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhaî ralhûm hen to nhang ri. ¹¹ Agè ashop é nat pé gi, Yhang lé myàng hkangmó, Yhâng é hí má lêng ngop to luî, "Nàng gi, Garai Gasâng é Yhangzo nghut ri." ga luî, taî garû akô. ¹² Nghut kôlhang, Yesuq gi, Yhang ó yuq nghut é hkyô lé a taî byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luî, haû bang gi, Yhâng chyáng jé lé lo bum akô nghut ri. ¹⁴ Haû hkûn, Yesuq gi, byù raxe í yuq lé hkyin yù luî, lagyo ayá byî ri; haû bang gi, Yhang eq rahá nyi râ matú le, mungdang hkô râ matú Yhang nhang htoq kat râ eq, ¹⁵ nat gâng pé lé hkat htoq râ ahko ahkáng wó râ matú le, nghut akô nghut ri. ¹⁶ Haû raxe í yuq gi, Simun (Yesuq mai Petruq ga myìng myhíng byi sù);

¹⁷ Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga mying myhíng byí ri; hau é lichyúm gi, maugum zô nhik gâ é nghut lhê.); ¹⁸ Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelu-tuq † dut é Simun eq, ¹⁹ Yhang lé ap pyám râ sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhûm má wang ló le, byù ajùm ayò dum zîng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri. ²¹ Yhâng é yhumbyù wui gi, haú hkyô lé wó gyo kôjáng, "Yhang, myit a gyíng lo nghut ri." ga luí, Yhang lé hung shuí yù râ matú, e akô nghut ri. ²² Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaú é wum-o a-tsam eq za, nat gâng pé lé hkat htoq pyâm é nghut ri." ga taí bum akô nghut ri. ²³ Haú mù luí, Yesuq, yhangmoq lé wut yù mù, dangtú dong taí é gi, "Tsadán gi, Tsadán lé hkâsu kut wó hkat htoq râ lhú? ²⁴ Mingdán ralhum gi, ahkaú má by-oq gâng lhûm nyi kô é nghut jáng, mingdán haú wó gíng nyi râ a nghut. ²⁵ Yhumhtu ralhum má le, ikun byù yhangchang byoq gâng lhûm nyi é nghut le gi, yhumhtu haú wó gíng nyi râ a nghut. ²⁶ Haú eq rajung za, Tsadán le, yhânggung yhang lhoq hpyoq luí, gam hkoq nyi é nghut le gi, yhang wó nyi nyi râ a nghut, htûm byuq râ za nghut lhê. ²⁷ Ó yuq nghut kôle, wum-o bò sù lé hí tui zing pyâm é a nghut le gi, yhâng é yhûm má lú wâng mù, yhâng é sutzè lé wó lú yù râ a nghut: Haú yuq lé hí tui zing pyám jáng sheq, yhâng é sutzè lé wó lú yù râ nghut lhê. ²⁸ Ngò, nungmoq lé teng za taí kôlé, byu pé kut shut é mara banshoq eq rhoí dang taí pyâm é pé lé gi, mara wó hkyut pyám byí lhê. ²⁹ Nghut kôlhang, haú Chyoiyúng Woi-nyí lé rhoí dang taí pyâm é sù gi, hkâ-nhám le, mara hkyut byí é wó hui râ a nghut; haú yuq gi, ahtum abyuq yubak wó sù nghut nyi ri." gâ ri. ³⁰ Yhang haú su ga taí é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹ Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluí, Yesuq htoq lô râ matú, byù rayuq lé wang taí nhang akô nghut ri. ³² Byù ajùm ayò gi, Yhâng é lhîngkhyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naú luí, shinggan má láng bum akô." ga taí kyô akô nghut ri.

† Zelutuq gâ é lichyúm gi, yhumsíng zui saí é hkyô má gyai yhang myit lóm shirong é sù lé gâ lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

³³ Haú hkûn, Yhang gi, "Ô pé gi, Ngá nu eq Ngá gu pé nghut akô lhú?" ga myi kat ri.

³⁴ Hau htâng, Yhang gi, Yhâng é lhîngkhyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wui nghut bê! ³⁵ Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

Kyôshi Sân É Dangtú

Mht 13:1-23; Luk 8:4-15

4 Yesuq gi, nhông yàm má radàm dum mhoqshit hi ló bê nghut ri. Haú hkûn, Yhâng é lhîngkhyuq má byù moq mó lúm yán zîng lé lo bùm kô é yanmai, Yhang gi, nhông hkaú mâ é lhai má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri. ² Yhang gi, haú bang lé, dangtú pé dông myo myo mhoqshit byí nyi ri; Yhang mhoqshit é má, ³ "Gyo wú keq! Kyô hkyó sù rayuq gi, kyôshi san râ gâ htoq e ló ri. ⁴ Yhang, kyôshi sân kat é hkûn, ra-am gi, hkyô má gyó ang mù, nghoq pê eq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq ló kôle, ⁶ amyit a wó chîn hing é nghut mù, bui htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaú má gyó ang luí, zubyap haú pé kô lò mù, wup pyâm é yanmai, ashi a wó zui nghut ri. ⁸ Nghut kôlhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lháng, zui myô lo é nghut ri." gâ ri. ⁹ Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri. ¹⁰ Yhang baú za nghut nyi é hkûn, haú lagyo raxe í yuq eq Yhang nam má nyi tô é bang gi, dangtú haú eq sêng é hkyô lé, lé myí akô. ¹¹ Haú hkûn, Yhang, yhangmoq lé taí kyô é gi, "Garai Gasang é mingdán eq sêng é sê gyo wui é hkyô lé sé gyo râ ahko ahkáng, nungmoq lé byí to lugù nghut bê. Nghut kôlhang, góbâng é matú gi, jung hkangmó lé dangtú dông chyat taí é nghut lhê. ¹² Haú mù luí, "Yhangmoq gi, myang nyi kôlhang, a wú sé kó, gyô nyi kôlhang, a sê gyo kó; sé wú sê gyo kô é ru nghut le gi, lhîng taú lò mù, mara hkyut pyám byí é hui kó râ nghut lhê!" †† gâ ri." ga tô ri. ¹³ Hau htâng, Yhang, yhangmoq lé dum xoq taí é gi, "Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó râ lhú? ¹⁴ Yò mù zui sù san kat é kyôshi gi, mungdang nghut lhê. ¹⁵ Byù ra-am gi, hkyô má gyó âng é kyôshi eq wui akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mâ é mungdang lé lé yù pyám byí ri. ¹⁶ Ra-am gi, luqgok yò pé má gyó âng é kyôshi eq wui akô; yhangmoq gi, mungdang lé wó gyo jáng, radá dâm gabú myit eq hap yù akô. ¹⁷ Nghut kôlhang, yhangmoq gi, amyit a wó chîn é yanmai, razup zo za yuq kômù, mungdang é yanmai, wuihke é eq zing-rí é pé hui kôjáng, hân hân

†† 4:12 Esai 6:9-10

htak ló byuq kó râ nghut lhê. ¹⁸ Dum ra-am nghut jáng, zugyóm hkaû má gyó âng é kyôshi eq wuí akô; yhangmoq gi, mungdang lé wó gyô yù kôlhang, ¹⁹ shí ipyat lhê é myit wuí myit hke hkyô, hkyô shuí nghoq jung ngùn hîng zèhkoq eq gotû zè pé lé ô nau é hkyô pé, yhangmoq chyáng wang lò jáng, haû mungdang lé hup pyâm é yanmai, ashi a wó zui dut kó râ nghut lhê. ²⁰ Ra-am kúm gi, myihpún bo é jang má gyó âng é kyôshi eq wuí akô; yhangmoq gi, haû mungdang lé gyô yù mù, lhom yù luî, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

Myibung Htûn É Hkyô

Luk 8:16-18

²¹ Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mûng èq nghop tô é, a nghut jáng, yhupchong ô má tsung tô é, ó yuq wá kut wú akô lhú? ²² Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ nghut lhê. ²³ Gyô yù râ nohkyap dap sù ó yuq nghut kôle, gyô yù sháng gaq." gâ ri.

²⁴ Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byi é bung èq, nungmoq lé dum lik byi râ nghut lhê; hau htoq lhang myo shoq wó kó râ nghut lhê. ²⁵ Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

Kyôshi Yuq Kô Lo É Dangtú

²⁶ Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷ Byù haú yuq gi, myín lé yhup tô é nghut nghut, nyí lé toq lo é nghut nghut, kyôshi gi, zui htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri. ²⁸ Myigùng gi, yhang baú yhang, kyôshi lé, sânghi má abum bum nhâng, hau htâng má a-nhâm htoq nhâng mù luî, ashi zui shoq kut é nghut lhê. ²⁹ Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

Angshi Cham Lé Dangtú Yu É Hkyô

Mht 13:31-32; Luk 13:18-19

³⁰ Yesuq dum xoq taí é gi, "Garai Gasâng é mingdán lé, hai èq lhoq whuí wú râ lhú? Haí jung dangtú yù mù, shit wú râ lhú? ³¹ Garai Gasâng é mingdán gi, angshi cham eq wuí ri. Angshi cham haû gi, myigùng má hô é kyômyui jí pé má je tiq é nghut lhê. ³² Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luî, hau é buishûm hkaû má, maulat nghoq zô pé lé wó zung nô nyi é nghut lhê." gâ ri.

³³ Haû sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴ Yhang gi, yhangmoq lé, dangtú a bo é haí lhang a

taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkangmó é lichyúm lé taí sân kyô ri.

Laidun Mó Lé, Yesuq Lhoq Zîm Pyâm É Hkyô

Mht 8:23-27; Luk 8:22-25

³⁵ Haû nyí, myinhêng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e ló sháng." ga taí ri. ³⁶ Haú hkûn, chángzô pé gi, byù moq mó lé nyi pyâm to luî, Yhang zung tô é lhaí mai yhang, Yhang lé shuí gû dap ló bekô; gotû lhaí pé le, yhangmoq eq rahá bo gû dap ló akô nghut ri. ³⁷ Haú u lé, laidun mó jé lô mù, wuilhêng hta toq lô luî, lhaí má lo bat hâng é yanmai, wuí byíng lô bê nghut ri. ³⁸ Haú hkûn, Yesuq gi, lhaí htâng má uhkuq hkuq mù yhup myhî tô ri; haû chángzô pé gi, Yhang lé nhaû pun luî "Sarâ ê, nga-nhúng myup shi ló râ dut é lé, nàng a chiq byi lhú?" ga taí akô nghut ri.

³⁹ Yesuq gi, toq mù, laidun lé tan luî, wuilhêng lé, "Zim aq." ga taí kat jáng, haû laidun num ló byuq luî, banshoq zîm byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Haí mù, haû-í gyuq bum akô lhú? Nungmoq gi, lumjîng myit a bò shi kó lhú?" ga taí ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkâsú é byù nghut lhê lhà? Lai eq wuilhêng pé lhang gi, Yhâng é dang lé gyo byi ri-nhung!" ga luî, rayuq eq rayuq myí lhùm bum akô nghut ri.

Nat Gang Hkat Htoq Pyâm É Hkyô

Mht 8:28-34; Luk 8:26-39

5 Yhangmoq gi, nhông hé hpoq mâ é Gerase byu pè é mau má jé dap e ló akô. ² Yesuq lhaí mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri. ³ Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuî èq lhang a wó tuî zing wú kó nghut ri. ⁴ Hkâsu mù gâ le, adàm dàm, yhâng é loq eq hkyî má shamtoq-tuî èq tuî tô wú kôlhang, yhang gi, loq mâ é shamtoq-tui pé lé lhang hpyit pyám pyám kut mù, hkyî mâ é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri. ⁵ Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dùn cheq wún ri.

⁶ Yhang gi, Yesuq lé, we mai myang kat jáng, din e ló mù, Yhâng é hí má hkyihput htuoq ngop luî, ⁷ htê mó èq, "Myhang htâng é Garaí Yhangzo Yesuq è! Nàng gi, ngò eq haí sêng lhê lhú? Nàng gi, ngo lé a zing-ri râ matú, Garaí Gasâng hí má danggidiq byi laq." ga taí garú ri. ⁸ Haí mù gâ le, Yesuq gi, yhang lé, "Agè ashop é nat nàng ê, byù shí yuq chyáng mai htoq ló aq." ga taí kat é yanmai nghut ri.

⁹ Hau htâng, Yesuq gi, "Nàng myíng haí gâ lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gâ lhê." ga tú taí ri. ¹⁰ Hau htâng, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

¹¹ Haú u lé, waq rajùm mó gi, bùm yàm má dû but zô nyi bum akô nghut ri. ¹² Haú mù luí, nat gâng pé gi, "Ngamoq lé, waq pê chyáng nhang kat luí, yhangmoq chyáng wàng nhâng laq." ga luí, Yesuq lé dung akô. ¹³ Haú hkûn, Yesuq gi, yhangmoq lé ahkáng byí kat jáng, haú agè ashop é nat pé gi, haú yuq chyáng mai htoq ló kôluí, waq pê chyáng wang ló byuq bekô nghut ri. Haú mù, haú í hkyíng kô bo é waq hpúng gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

¹⁴ Waq zúng bang gi, h pang din wang ló kômù, myuq hkaú mâ é bang eq awui ayàm mâ é bang lé, haú hkyô ló shit kyo kô é yanmai, byù haú bang gi, dut lai lò bê hkyô lé, ê htoq wú akô nghut ri. ¹⁵ Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luí, byù gè rayuq su zung to láng é lé myàng kômù, gyuq dan bùm bekô nghut ri. ¹⁶ Haú hkyô lé myang é bang gi, nat gâng pé wang júng sù eq waq pê chyáng hkâsu dut é hkyô, góbang lé taí kyo akô nghut ri. ¹⁷ Hau htâng, byu pé gi, Yesuq lé yhangmoq é mau mai htoq ló byuq râ matú, chòm dúng tôngbán akô nghut ri.

¹⁸ Yesuq lhaí hkaú má wang ló é u lé, haú nat gâng pé wang júng lai lò bê sù gi, Yesuq htâng cháng râ matú, Yesuq lé dung tôngbán ri. ¹⁹ Nghut kôlhang, Yesuq gi, yhang lé ahkáng a byi e za, "Nàng, yhùm shut sheq ló mù, haú Yhumsing, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, náng é yhumbyù buinùm ji-myi wui lé ló taí kyo aq." ga taí kat ri. ²⁰ Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli † mau bang lé ló taí kyô ri. Haú hkûn, wó gyô é bang banshoq gi, mauhong bum akô nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

²¹ Yesuq gi, lhaí ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lhinghkyuq má lé zing bum akô nghut ri; ²² haú hkûn, Ya-iruoq gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyí wang má paí gop to mù, ²³ "Ngá zo byizo gi, kâng byit ló nyi ri; yhang ge lò mù asak dum dui shi sháng gaq, náng lé mù, yhâng é ahtoq má loq lé ke byi laq." ga, wum kat dúng tôngbán nyi ri. ²⁴ Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyín chyap wún bum akô.

²⁵ Haú hkûn, raxe í zân suí yui nyi é myiwe myhí rayuq le haú hpúng má bo tô ri. ²⁶ Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je l háng wúihke lò ri. ²⁷ Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, Yhâng é bu má ê záng kat ri. ²⁸ Haí mù luí gâ le, yhang gi, "Ngò, Yhang é bu má za

l háng é wó záng é nghut le gi, ge byuq râ nghut lhê." ga wó myit é yanmai, haú su kut é nghut ri. ²⁹ Haú hkûn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lhú?" ga myi kat ri.

³¹ Haú hkûn, Yhâng é chángzô pé gi, "Náng é lhinghkyuq má byù ajùm ayò chyín chyap nyi é lé, myang to luí nhing, 'Ngo lé, ó yuq záng bê lhú?' nghú myi lhê lhú?" ga tũ taí kat akô.

³² Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashí nghut ri. ³³ Haú hkûn, myiwe myhí haú gi, yhâng chyáng hkâsu dut lai lò bê hkyô lé sê é yanmai, Yesuq é hí má lé mù, gyuq nán é èq Yhang é hkyí wang má ngóm gop to luí, yhâng chyáng dut lai lò bê hkyô banshoq lé taí kyô ri.

³⁴ Haú mù, Yesuq gi, myiwe myhí haú lé, "Byizo ê, náng é lumjing myit gi, náng lé lhoq gè byi bê nghut ri; náng é nòhpyo ge byuq bê nghut ri; ngón za ló aq hko!" ga taí ri.

³⁵ Yesuq gi, dang ru taí nyi ashí hkûn, tarajong má up sù Ya-iruoq é yhùm mai byù ra-am jé lé mù, "Nang é byizo gi, shi byuq bê; haí mù luí, haú sará lé lhoq hkyik nyi lhê lhú?" ga luí, lé taí kat akô.

³⁶ Yesuq gi, haú bang taí é dang lé gyô lhaí pyám mù, "Hkagyuoq, za lumjing aq." ga, haú tarajong má up sù lé taí kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri. ³⁸ Yhangmoq, haú tarajong má up sù é yhùm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. ³⁹ Yhang gi, yhúm hkaú shut wang ló mù, haú bang lé, "Haí mù, yón ngau gabyông nyi bum akô lhú? Haú zoshâng gi, shi byuq é a nghut, yhup myhí tô é sheq ru nghut lhê." ga taí ri. ⁴⁰ Nghut kôlhang, yhangmoq gi, Yhang lé wuizui kut pyám byí akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lheq tô é gok má wang e akô nghut ri. ⁴¹ Yesuq gi, myiwe zo hau é loq má zui to mù, "Talihta ku-mi" (haú é lichyúm gi, "Myiwe zo ê, ngò, nang lé taí bá, toq aq." gâ é nghut lhê.) ga taí ri. ⁴² Myiwe zo haú gi, haú hkûn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yhang maú byuq bùm bekô nghut ri. ⁴³ Yhang gi, haú hkyô ó lé le a sé nhâng râ matú, yhangmoq lé taí hkúm kat luí, myiwe zo haú lé, zô jung byi tso râ matú le, yhangmoq lé taí ri.

Yhumsing Wà Má Myoqdong A Wó É Hkyô

Mht 13:53-58; Luk 4:16-30

6 Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le,

† Dekapoli gâ é gi, Grik đông myuq raxê lé gâ lhê.

Yhang eq rahá bo châng ló akô nghut ri. ² Bánno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasú é wá nghut mù luí, laklaí kumlhá lé lhang kut lhê laq?" ³ Shí yuq gi, Mariq é yhangzo, laksíma hpó nghut lhê, a nghut lhú? Yhang gi, Yakuq, Yose, Yudaq, Simun pê é yhangmang nghut lhê, a nghut lhú? Yhâng nhammó pé le, nga-nhúng eq rahá nghut nyi lhê, a nghut kó lhú?" ga luí, Yhang lé myit a ngón dut bùm bekô nghut ri.

⁴ Yesuq, yhangmoq lé taí é gi, "Myiqhtoi rayuq gi, yhumsing é yhum mau, yhâng é buinùm ji-myi wui eq yhumsing é yhùm má za, myoqdong a lhaq wó wú é nghut lhê." ga ri. ⁵ Yhang gi, nò byù ra-am lé loq ke byi mù, lhoq gê byí é mai lai luí, gotú laklaí kumlhá haí le, haú má a wó kut shit nghut ri. ⁶ Haú mù, Yesuq gi, yhangmoq lumjínng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yù mù, agè ashop é nat pé lé ùng rã a-tsam byi luí, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotú haí le, hkâyü chùng kó; ⁹ hkyî-tsung kúm gi, tsúng chùng keq; nghut kôlhang, bu í dung hkâwut chùng kó. ¹⁰ Hká má nghut kôlhang, ray-hùm yhùm má nungmoq wang bíng kô é nghut le gi, haú wà mai dum htoq ló é buinyi jé shoq, haú yhùm má za nyi nyi keq. ¹¹ Jowò rawò wò mã é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm tò mù, haú jowò mai htoq ló keq." ga ri.

¹² Haú mù, yhangmoq gi, htoq e ló luí, myit lhing rã é hkyô, byu pé lé hkô kyô akô. ¹³ Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xù but byi luí, lhoq ge byí akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

¹⁴ Yesuq é mying hù lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luí, taí bum akô nghut ri.

¹⁵ Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoi pé su, myiqhtoi rayuq nghut ri." ga ri.

¹⁶ Herut kúm gi, haú lé wó gyo jáng, "Ngò, ulhum hpyit pyám byí é Yohan gi, shi é mai dum dui toq bu-nhung!" ga taí ri.

¹⁷ Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyám nhang wú é sù nghut lhê. ¹⁸ Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luí, taí byí nyi é yanmai nghut ri. ¹⁹ Haú mù, Herudiaq gi, Yohan lé gyai a jú dut byuq luí, sat pyám naú kôlhang, a wó sat dut nyi ri. ²⁰ Haí mù gâ le, Herut gi, Yohan, dngmán chyoyúng é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhang, yhang taí é dang pé lé ru gyô nau nyi ashí nghut ri.

²¹ Nghut kôlhang, Herut gi, yhâng é hkû ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyí gi, Herudiaq é matú, buinyi gè dut bê nghut ri.

²² Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haí nghut kôle, dung aq, ngò nàng lé byi rã nghut lhê." ga, dakam é danggidiq byí ri. ²³ Hau htoq agó, yhang gi, myiwe zo haú lé, "Nàng dung é haí nghut kôle, ngò byi rã; ngá é mingdán rawuí gû lhang, byi rã nghut lhê." ga, dakam é danggidiq byí ri.

²⁴ Haú hkûn, myiwe zo haú gi, htoq ló mù, yhâng nu lé, "Haí dúng le gè rã laq?" ga myi jáng, yhângnu gi, "Wui-myhup Sará Yohan é ulhum dung aq." ga tũ taí kat ri.

²⁵ Myiwe zo haú gi, radá dâm hân hân wang ló mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

²⁶ Haú su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, myiwe zo haú taí é dang lé a kâm he pyám lo nghut ri. ²⁷ Haú mù, hkohkâm gi, zúng é gyezo rayuq lé, Yohan é ulhum ê hpyit lô rã matú, radá dâm hkunmó hkyô mù nhang kat ri. Haú mù, haú yuq gi, htóng hkaú má ê luí, Yohan é ulhum lé, ê hpyit mù, ²⁸ bó má kat luí, myiwe zo haú lé lo byí ri; myiwe zo haú gi, ulhum haú lé, yhângnũ chyáng yu ló byí ri. ²⁹ Yohan é chángzô pé gi, haú hkyô lé wó gyo kôjáng, yhâng é mâng lé lé yù luí, lup má ló myhup pyám bekô nghut ri.

Byù Ngo Hkyîng Lé Byi Tsô É Hkyô

Mht 14:13-21; Luk 9:10-17; Yhn 6:1-14

³⁰ Lagyo pé gi, Yesuq chyáng dum jé zîng lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taí kyô akô nghut ri. ³¹ Hau htâng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo ahkyíng lhang a wó kó nghut ri. Haú mù, Yesuq gi,

chángzô pé lé, "Nga-nhúng, tsím tsâm é jowò ralhum má ê mù, ê nô yù sháng." ga taí ri.

³² Haù mù, yhangmoq gi, yhangmoq baú lhaí racham má ji mù, tsím tsâm é jowò shut e ló akô nghut ri.

³³ Nghut kôhang, yhangmoq e ló é lé châng myang é bang myo myo gi, yhangmoq lé wú sé kôluí, wà hkangmó mai hkyí hkyô châng din ê kômù, yhangmoq é hí má jé to lánng akô nghut ri. ³⁴ Yesuq gi, lhaí mai gyó dap ló é hkùn, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yan-mai, yhangmoq lé wú shogyo luí, myo myo mhoqshit byí hi ló bê nghut ri.

³⁵ Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, buí le gyum ló bê; ³⁶ yhangmoq gi, awui ayàm mâ é yhùm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoi." ga taí akô nghut ri.

³⁷ Haù hkùn, Yhang gi, "Nungmoq, yhangmoq lé ra-jung jung byi tso keq." ga tú taí jáng, yhangmoq gi, "Shí myhò é bang zo rà matú, ngamoq gi, ê luí, denari † í sho èq muk ê wuí byi ra rà luq?" ga dum taú myí akô nghut ri.

³⁸ Nghut kôhang, Yhang gi, "Nungmoq chyáng muk hkâ-myhó wó akô? Ê wú wú keq." ga myí ri. Haù mù, yhangmoq gi, myang hô jáng, "Muk ngo long eq ngo-zo í du wó lhê." ga, dum tú taí akô nghut ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zùng nhâng rà matú, Yhâng é chángzô pé lé taí kat ri. ⁴⁰ Haù mù, shiwa byu pé gi, rashô shò kut le, ngo xê xê kut le, ahpúng hpúng zung tô bùm bekô nghut ri. ⁴¹ Yesuq gi, haù muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi rà matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gàm byí ri. ⁴² Yhangmoq banshoq bang gi, zô gyí bùm bekô nghut ri. ⁴³ Hau htâng, haù chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri. ⁴⁴ Haù hkùn, zô é bang gi, yuqgè wui baú lháng, byù du ngo hkyíng nghut ri.

Yesuq, Wui Htoq Má Sô É Hkyô

Mht 14:22-33; Yhn 6:15-21

⁴⁵ Yesuq gi, haù shiwa byu pé lé byo ló nhang nyi é hkùn jáng, Yhâng é chángzô pé lé lhaí má wang ji nhâng mù, tú tap mâ é Bet-saida wà mó shut dap ló lánng nhang ri. ⁴⁶ Yhangmoq lé shi-kyâm kat é htâng, Yhang gi, kyúdung rà ga, Yhang baú bùm shut doq e ló bê nghut ri.

⁴⁷ Buigyum htâng, lhaí gi, nhông gùng má jé tô é u lé, Yesuq gi, Yhang baú za myi htoq má nyi tô ashí nghut ri. ⁴⁸ Lài tau mut é yanmai, haù chángzô pé gi, lhaí lhu wuíhkê nyi kô é lé, Yesuq myang ri. Napsún maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló

luí, yhangmoq é nàm mai laí ló rà dâ ri. ⁴⁹ Nghut kôhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyeq garú bum akô nghut ri. ⁵⁰ Hkâsu mù gà le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

Nghut kôhang, Yhang, radá dâm yhangmoq lé dáng nyo kat é gi, "Hkâgyuq kó. Ngò ru nghut lhê; zim za nyi keq." gà ri. ⁵¹ Hau htâng, Yhang gi, lhaí htoq má yhangmoq eq rahá é doq ji jáng, lài gi, zím byuq bê nghut ri; haù mù, yhangmoq gi, gyai yhang mauhong byuq bùm bekô nghut ri. ⁵² Hkâsu mù gà lé, yhangmoq gi, muk gam é laklái kumlhá eq séng luí a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gú dap ló kômù, Genesarat mau má jé wang lò jáng, lhaí lé haù má ló shap tô akô nghut ri.

⁵⁴ Yhangmoq lhaí mai gyó é hkùn jáng, byu pé gi, Yesuq lé lhom wú sê akô nghut ri. ⁵⁵ Haù mù, yhangmoq gi, haù mau ramau gón má din jón mù, nò bang lé taphkang mai waq luí, Yesuq nyi rí gà é jowò hkangmó má, shuí lé lo bum akô nghut ri. ⁵⁶ Yesuq jé é wà hkangmó, myuq hkangmó, awui ayàm mâ é wà hkangmó pé má, yhangmoq gi, nò byù lé gai pé má lé lhez to kôluí, Yhâng é bushi htâng má za lháng, haù bang lé byi záng nhâng rà matú, Yhang lé dùng tông-bán akô. Yhang lé záng é lhunghâng bang gi, lhoq gè byí é huí akô nghut ri.

A Sanséng Dut Nhang É Hkyô Pé

Mht 15:1-20

7 Haù Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé zup zíng bum akô. ² Haù hkùn, Yhâng é chángzô pé ra-am gi, htungli đông a chî pyâm é, a sanséng é loq èq zo shuq nyí kô é lé, yhangmoq myang akô nghut ri. ³ (Hparishe pé eq Yudaq byù banshoq bang gi, yhangmoq é îchyí îwâ pé é htungli lé châng é bang nghut lhê mù luí, loq hí a chî é gi, haí le a zô wú kó nghut ri. ⁴ Yhangmoq gi, gai pé mai taú lò jáng le, gùng hí a chî pyâm é, zojung a zo kó nghut é htoq agó, góm pé, hkoq pé, gyi chòkon pé lé chî é htungli gotú pé lé le, châng akô nghut ri.)

⁵ Haù mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, îchyí îwâ pé é htungli lé a châng e za, a sanséng é loq èq zo shuq nyi akô lhú?" ga myí akô.

⁶ Haù hkùn, Yesuq gi, yhangmoq lé, "Gegùn labyoq kut bang ê, nungmoq eq séng luí myiqhtoí Esai-aq htoí tô é dang má,

'Byù shí bang gi, nhut htoq mai za Ngo lé hkunggâ akô; yhangmoq é myit nhikhum gi, Ngò eq wê gâng nyi akô.

⁷ Yhangmoq gi, akôm má za, Ngo lé noqkuq nyi akô; hkâsu mù gà le, yhangmoq é mhoqshit hkyô pé gi, byù đông mai mhoqshit é hkyô pé za nghut nyi ri.' ††

† Denari rachap gi, byù rayuq é ra-nyí lhê é zuihpau eq wuí ri.

†† 7:7 Esai 29:13

ga kâ tô é gi, têng ri. ⁸ Nungmoq gi, Garai Gasang tô tô é hkunmó lé tô pyám luî, byu é htungli lé za, myhik zing tô akô nghut ri." ga luî tû taî ri.

⁹ Hau htâng, Yhang xoq taî é gi, "Nungmoq gi, yhum-sing é htungli lé za cháng râ matú, Garai Gasang é hkunmó lé he-ngik pyâm é má, hpaqchyî gyai bo akô nghut ri. ¹⁰ Hkâsu mù gà le, Mosheq gi, 'Nungmoq é înu îwa lé, hkungga keq.' † ga le, 'Înu îwa lé, nhîng é sù ó yuq nghut kôle, sat pyâm é hui râ lhê.' †† ga le, kâ tô é nghut lhê. ¹¹ Nghut kôlhang, nungmoq taî é gi, byù rayuq yuq, yhumsing é yhangnu yhangwa lé byi âng é zè lé, Korban za (Garai Gasang lé byi râ chyunghuq) nghut lhê gá nhang akô. ¹² Haû mù, haû yuq lé, yhangnu yhangwâ é matú, haî a kut byi nhâng lô é dông dut bê nghut ri. ¹³ Haû dông mai, nungmoq gi, nungmoq chung gyó lo é htungli é yanmai, Garai Gasang é mungdang lé he-ngik pyâm akô; haû sù é hkyô myo lé le, nungmoq kut akô nghut ri." gâ ri.

¹⁴ Yesuq gi, shiwa byu pé lé Yhâng chyáng dum wut yù mù, taî é gi, "Nungmoq banshoq bang, ngò taî é lé gyô yù mù, sé lo keq; ¹⁵ Shinggan mai wang lo é haî jung le, byù lé a sanséng dut nhang é a nghut, nghut kôlhang, byu é unghkaû mai htoq lô é zè kúm gi, byù lé a sanséng dut nhang lhê." gâ ri. ¹⁶ (Gyo râ nohkyap dap é sù gi, gyô yù sháng gaq.)" ga taî ri. †

¹⁷ Yhang gi, byù moq mó mai htoq lô mù, yhúmkaû má jé wang lô é hkûn, Yhâng é chángzô pé gi, dangtú haû eq séng luî, Yhang lé lhom myî akô nghut ri.

¹⁸ Haû mù, Yhang gi, yhangmoq lé, "Nungmoq gi, haû-í yhang go akô luq? Shinggan mai wang lo é haî jung le, byù lé a sanséng nhâng wó dut râ a nghut é hkyô lé, a sé kó lhú? ¹⁹ Hkâsu mù gà lé, haû gi, byu é myit nhikhum hkaû má wang lô é a nghut e za, wamdau hkaû má sheq wang lô é nghut mù, shinggan shut dum lhoq htoq pyâm é nghut lhê." ga taî ri. (Yhang isu ga taî é gi, zoshuq lhungháng sanséng lhê gá nau é dông nghut ri.)

²⁰ Hau htoq agó, Yhang xoq taî é gi, "Byù mai htoq lô é haî jung le, byù lé a sanséng nhâng wó dut é nghut lhê. ²¹ Hkâsu mù gà lé, ahkaû mai htoq lo é gi, byu pé é myit mai htoq lô é nghut mù, agè ashop é dông myit é hkyô pé, ashop é dông gungsho zùm yap é hkyô, hkaû é hkyô, byù sat é hkyô, su-myi sulàng lú hkyô, ²² my-oqnoq é hkyô, agè ashop é hkyô, mhaû zô é hkyô, achaq achyut zùm yap lhûm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; ²³ Agè ashop é hkyô shí pé banshoq gi, byu é unghkaû mai htoq lo é nghut mù, byù lé a sanséng dut nhang ri." gâ ri.

Tûngbaù Myiwe Myhí Rayuq É Lumjîng Myit

Mht 15:21-28

²⁴ Yesuq gi, haû jowò mai htoq lô mù, Turuq eq Sidun maukyo shut e lô luî, yhûm ralhûm má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri. ²⁵ Haû mù, agè ashop é nat

wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyî wang má lé paî gop to luî, ²⁶ yhang zô chyáng mai nat gang lé hkat htoq pyám byi râ matú, Yhang lé dông tôngbán ri. Myiwe haû gi, Suru-Hpiniki mau mâ é Grik byuhú nghut ri.

²⁷ Yesuq gi, "Zo wuî †† hí zô gyi kó sháng gaq; haî mù gà le, zô wui chyáng mâ é zoshuq lé yù mù, hkuî pé †† lé byi tsô é jung a nghut." ga yhang lé taî kyô ri.

²⁸ Haû hkûn, yhang gi, "Yhumsing ê! Haû kúm nghut ri; nghut kôlhang, siboî ô mâ é hkuî lháng, zô wui é zô myhit shuq htâng lé, ge zo lhê a nghut lhú?" ga dum tû taî ri.

²⁹ Haû mù, Yesuq gi, yhang lé, "Nàng tû taî é dang hau é yanmai, lô lo aq hkoî; haû nat gang gi, nung zô chyáng mai htoq lô byuq bê nghut ri." ga taî kat ri.

³⁰ Myiwe myhí haû gi, yhûm má dum taû jé lo é hkûn, yhang zo chong htoq má leq to láng é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sù Lé Lhoq Gê Byî É Hkyô

³¹ Yesuq gi, Turuq mau mai dum htoq lô mù, Sidun mai sô laî lô luî, Dekapoli mau hkaû dông laî byit mù, Galile nhông shut gyó jé lô ri. ³² Haû hkûn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haû yuq é ahtoq má loq ke byi râ matú, Yhang lé dông tôngbán akô nghut ri.

³³ Yesuq gi, haû yuq lé baú za byù hpúng mai shuí htoq yù mù, yhâng é nohkyûng má loqnyhui htaû háng byi luî, sôkan byé tik yù mù, haû yuq é shô má htau byî ri. ³⁴ Hau htâng, Yhang gi, mauhkûng shut tu wú mù, soq mó shê luî, "Ehpahta!" (Lichyúm gi, "Bóng aq hkoî!") ga luî, haû yuq lé taî kat ri. ³⁵ Haû hkûn, haû yuq é nohkyap le bóng byuq luî, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haû hkyô ó lé le a taî kyo râ matú, yhangmoq lé hkúm kôlhang, yhangmoq gi, je hkúm le, je taî pyo akô nghut ri. ³⁷ Byu pé gi, gyai yhang mauhong byuq bùm kôluî, "Yhang gi, haî lé le, ge é dông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luî, taî bum akô nghut ri.

Byù Myi Hkyîng Lé Byi Tsô É Hkyô

Mht 15:32-39

8 Haû yoq má, gotú byù moq mó gi, lé zîng bum akô; haû bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, ² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haî le a myàng zo kó nghut ri. ³ Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmut gû yhûm shut nhang kat é nghut le gi, hkyolat má mutyut yut é lô hui kó râ nghut lhê." ga taî ri.

† 7:10 Htoq Lô 20:12 †† 7:10 Htoq Lô 21:17 † Bun zo shí gi, Chyúmlaíkâ ra-am má bo lhê, ra-am má a bò.

†† Zo wuî gà é gi, Yudaq byu pé lé gà é nghut lhê. †† Hkuî pé gà é gi, tûngbaù pé lé gà é nghut lhê.

⁴ Haú hkûn, Yhâng é chángzô pé gi, Yhang lé, "Ísu é yoso má nhîng, shî myhò bang lé luq shoq byi tso rá zoshuq gi, hkâmá é yú rá lhú?" ga taí akô.

⁵ Yesuq gi, "Nungmoq, muk hkâ-myhó long wó akô lhú?" ga taú myi jáng, yhangmoq gi, "Nyhit long." ga, dum tú taí akô nghut ri.

⁶ Haú mù, Yhang gi, byù hpûng lé myigùng htoq má zùng nhang to luí, muk haú nyhit long lé yù mù, jeju ban hkya-on jáng, myhik hpé luí, haú bang lé gàm byi rá matú, Yhâng é chángzô pé lé byí kat ri; haú mù, yhangmoq gi, haú bang lé gàm byí akô nghut ri.

⁷ Yhangmoq gi, ngo-nú zo ratsuí le wó akô nghut ri; haú mù, Yhang gi, ngozo haú pé é matú jeju hkya-on luí, chángzô pé lé dum gàm byí nhang ri. ⁸ Yuq hking-mó zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashî kó nghut ri. ⁹ Zô é bang gi, byù myi hkyíng kô nghut ri; Yesuq gi, haú bang lé, nhang kat luí, ¹⁰ Yhâng é chángzô pé eq rahá, lhaí má wang ji mù, Dala-manuhta mau má é jé akô nghut ri.

¹¹ Hparishe pé gi, lé mù, Yesuq eq dang htíng htíng lhûm akô; hau htoq agó, yhangmoq gi, mauhkûng má é kumlhá lé dúng é dông, Yhang lé chyam wú akô nghut ri. ¹² Yesuq gi, myit nò-kyíng kyíng luí, yhangmoq lé taí é gi, "Haí mù luí, shí ipyat lhê é byu pé gi, limik kumlhá dúng akô lhú? Ngò teng za taí kólé, shí ipyat má é bang lé, hai kumlhá le tún shit rá a nghut." gâ ri. ¹³ Hau htâng, Yhang gi, yhangmoq lé pyâm to mù, lhaí má dum taú wang ló luí, tú tap shut gú dap e ló bê nghut ri.

Hparishe Pé Eq Herut É Múnchi

Mht 16:5-12

¹⁴ Haú chángzô pé gi, muk yu chûng rá lé tô-myhî pyâm kôluí, lhaí hkaú má muk ralong za ru wó akô nghut ri. ¹⁵ Yesuq gi, yhangmoq lé, "Nungmoq gi, Hparishe pé eq Herut é múnchi † lé, sidiq luí, koi pyâm nyi keq." ga taí ri.

¹⁶ Haú hkûn, yhangmoq gi, "Nga-nhûng chyáng muk a bo é yanmai, haú su ga taí é nghut ri." ga luí, rayuq eq rayuq taí lhûm bum akô nghut ri.

¹⁷ Haú su ga taí lhûm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù taí lhûm nyi akô lhú? Ahkuí jé shoq, nungmoq gi, a byu-myàng, a sê gyo shi kó lhú? Nungmoq é myit nhiklum gi, ru htan nyi ashî kó lhú? ¹⁸ Myoq dap to kôluí nhîng, a myàng kó lhú? Nohkyap dap to kôluí nhîng, a wó gyo kó lhú? ¹⁹ Ngò, muk ngo long lé myhik hpé mù, byù ngo hkyíng lé byi tsô é hkûn, zô myhit shuq htâng lé, nungmoq hkâ-myhó mung wó guq tsíng yu é lé, bun ashî kó lhú?" ga myi jáng, yhangmoq gi, "Raxe í mung." ga tú taí akô.

²⁰ Dum, Yesuq gi, "Ngò, muk nyhit long lé myhik hpé mù, byù myi hkyíng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsíng

yù kô é lhú?" ga myi jáng, yhangmoq gi, "Nyhit mung." ga dum tú taí akô.

²¹ Haú hkûn, Yesuq gi, "Haú nghut le nhîng, ahkuí le, a sê gyo shi kó lhú?" ga, yhangmoq lé myí ri.

Myoqjit Sû Rayuq Lé Lhoq Gê Byí É Hkyô

²² Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi rá matú, dúng tông-bán akô. ²³ Yesuq gi, myoqjit sù haú yuq é loq lé zui mù, wà shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myí kat ri.

²⁴ Haú jáng, yhang gi, tu wú kat luí, "Byu pé gi, sikhâm su dut luí, hkyô sô wún é lé, ngò myang ri." ga taí ri.

²⁵ Hau htâng, Yesuq gi, haú yuq é myoq má Yhâng é loq dum ke byí ri; haú hkûn, haú yuq é myoq gi, bóng lô mù, ge byuq luí, haí lé le san za myàng bê nghut ri. ²⁶ Yesuq gi, haú yuq lé, "Wà hkaú má hkâwang ló lo." ga taí luí, yhâng é yhûm shut ló nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi wà mó awui ayâm má é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lhú?" ga myí ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akô." ga, Yhang lé tú taí akô.

²⁹ Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq †† nghut ri." ga tú taí ri.

³⁰ Yesuq gi, haú hkyô ó lé le a taí kyo rá matú, yhangmoq lé taí hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rí é myo myo hui zo luí, suwún wuí, hkyangjong agyi pé, tarâ sará pé eq he-ngik pyâm é hui mù, sat pyâm é hui ra rá nghut lhê; nghut kôhang, sum nyí nghû rá buinyi má, dum dui toq rá nghut lhê." gâ ri. ³² Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yú mù, Yhang lé tân ri.

³³ Nghut kôhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

† Shî má taí é múnchi gi, Hparishe pé eq Herut é mhoqshit hkyô lé, Lhoq pyo é lé gâ lhê.

†† Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng naù sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chûng luî, cháng ra rà nghut lhê. ³⁵ Hkâsu mù gâ le, yhumsing é asak lé hkyi yù naù sù ó yuq nghut kôle, asak sum rà nghut lhê; nghut kôlhang, Ngá é yanmai le, haù gabú danglù é yanmai le, yhumsing é asak sùm pyám é sù kúm gi, asak hkyi yu é hui rà nghut lhê. ³⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyù bò rà lhú? ³⁷ Byù gi, yhumsing é asak woi-nyí lé, hai èq wó htaí yù rà lhú? ³⁸ Yubak mara myô é eq sumyi sulàng shut é ipyat shî má, Ngò eq Ngá é dang lé hoq pyám é sù ó yuq lé le, haù Byu Yhangzo gi, Yhâng Wâ é hpungwup shingkan bo é èq, haù chyoyúng maumang lagyô pé eq rahá jé lé é hkûn, hoq pyám rà nghut lhê." † gâ ri.

9 Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ram gi, Garai Gasâng é mingdán, hpungwup a-tsâm èq jé lé lo é lé, a myang é za shî kó rà a nghut." ga taí ri.

Yesuq É Ihpyô Isâm Htaí Lo É Hkyô

Mht 17:1-13; Luk 9:28-36

² Hkyuq nyí laí htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm ralhum má doq ló akô; haù hkûn, yhangmoq é myoq hí tê má, Yesuq é ihpyô isâm htaí lo ri. ³ Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haù-í hpyù shoq a wó xaù hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dâng nyo lhûm nyi akô.

⁵ Haù mù, Petruq gi, Yesuq lé, "Rabai ê, shí jowò má nga-nhúng nyi le ge ri; haù mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí ri. ⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haí taí rà le a sé mù, haù su gâ é nghut ri.

⁷ Hau htâng, mhut htoq lô luî, yhangmoq lé htup zîng lô mù, mhut hkaù mai htoq lo é htê gi, "Shí yuq gi, Ngò chytadap é Ngá Zo nghut lhê; Yhâng é dang gyo keq." gâ ri.

⁸ Haù hkûn jáng, chángzô pé gi, lhîngkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taù gyó lô kô é hkûn, Yesuq gi, haù Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo rà matú taí hkûm tô ri. ¹⁰ Chángzô pé gi, dang haù lé myit má kat to kôluí, "Shi é mai dum dui toq rà." gâ é lichyúm lé, rayuq eq rayuq myí lhûm bum akô nghut ri.

¹¹ Hau htâng, yhangmoq gi, "Eliyaq hí lé ra rà nghut lhê ga, tarâ sará pé haí mù taí kô é lhú?" ga, Yesuq lé myí akô.

¹² Haù hkûn, Yesuq gi, "Eliyaq hí jé lé é gi, teng bê nghut luî, lhunglhang lé dum lajâng tô é nghut ri. Nghut kôlhang, haù Byu Yhangzo gi, myo myo hpuzo luî, he-ngik pyám é hui ra nghut lhê ga le, Chyúmdang má kâ to ashí, a nghut kó lhú? ¹³ Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kâ tô é eq rajung za, yhangmoq gi, ô nau é dông banshoq kut bekô nghut ri." ga tû taí ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pê chyáng dum taù jé lô kô é hkûn, haù bâng é lhîngkyuq má byù moq mó zîng lé é lé le, tarâ sará pé, haù bang eq dang htíng htíng lhûm nyi kô é lé le, myang akô. ¹⁵ Haù má nyi tô é lhunglhang bang gi, Yesuq lé myang kat é eq, maú byuq kôluí, din ê mù, ê shi-kyâm akô nghut ri.

¹⁶ Haù hkûn, Yesuq gi, yhangmoq lé, "Nungmoq gi, yhangmoq eq haí lé dang htíng htíng lhûm nyi akô lhú?" ga myí ri.

¹⁷ Byù hpúng hkaù mâ é rayuq tû taí kat é gi, "Sarâ ê! Nhut jit nhang é nat wang júng tô é ngâ é yuqzo lé, Náng chyáng shuí lé lo lhê. ¹⁸ Nat haù gi, yhâng chyáng wàng hkangmó, yhang lé myi htoq má lhoq leqbat nhang ri; haù mù, yhang gi, nhut mai guttsú htoq lhê, zui kyik kyik lhê, langhtan lo lhê, dut ri; hau é yanmai, nat haù lé hkat htoq pyám byi rà matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

¹⁹ Haù hkûn, Yesuq gi, "Lumjîng myit a bo é amyù pé ê, Ngò gi, hkâ-myháng jé shoq nungmoq eq rahá nyi mù, wó jân nyi rà lhú? Yuqgè zo haù lé, Ngá chyáng shuí lé lô keq." ga taí kat ri.

²⁰ Haù mù, yhangmoq gi, yuqgè zo haù lé shuí lé lo akô; nat haù gi, Yesuq lé myang kat é eq yhang, yuqgè zo haù lé langhtân nhang ri; yuqgè zo haù gi, myigùng má lêng leq luí goleng leng mù, nhut mai tsú-myup htoq nyi ri.

²¹ Haù hkûn, Yesuq gi, yhângwa lé, "Yhang, isu dut é hkâ-myháng myáng bê lhú?" ga myi jáng, yhâng wa gi, "Zoshâng hkûn mai nghut bê. ²² Nat haù gi, yhang lé lhoq sat pyám naù mù, myi má le, wui má le, anum num lêng wàng nhang wú bê nghut lhê; nghut kôlhang, Nang, rajung jung wó kut byí é nghut le gi, ngá hpe lé shogyo yù laq, garúm yù laq." ga tû taí ri.

²³ Yesuq gi, "'Nàng, wó kut byí é nghut le gi,' nghú, haí mù taí lhê lhú? Lumjîng myit bò su é matú gi, haí le wó dut lhê." ga, yhang lé taí ri.

²⁴ Haù zôshang é yhângwa gi, radá dâm, "Ngò lumjîng lhê; nghut kôlhang, ngá é lumjîng myit gi, shaù ashí nghut é yanmai garúm yù laq." ga taí garú ri.

²⁵ Yesuq gi, byù hpúng din zîng lé lô kô é lé, myàng jáng, haù agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhâng chyáng mai htoq ló aq; hkâ-nhám le, yhâng chyáng hkâdum wàng lo." ga tân kat ri.

† 8:38 Yer 3:8; Ezk 23:37; Hos 2:2-10

²⁶ Haú hkûn, nat haú gi, garu mù, zoshâng haú lé wum kat langhtân nhâng luí, htoq ló byuq bê. Zoshâng haú gi, shí mâng gùng su dut byuq é yanmai, byù myo myo gi, "Yhang shí bê nghut ri." ga taí akô.

²⁷ Nghut kôlhâng, Yesuq gi, zôshâng é loq má zui luí, tu toq kat ri; haú mù, zoshâng gi, yap to bê nghut ri.

²⁸ Yesuq, yhúmhkaú má wang ló é htâng, Yhâng é chángzô pé gi, "Ngamoq gi, haí mù, nat haú lé a wó hkat htoq é lhú?" ga, tsik za Yhang lé myí akô.

²⁹ Yesuq gi, "Haú jung nat lé gi, kyúdùng é dông za a nghut jáng, wó hkat htoq râ a nghut." ga, yhangmoq lé tû taí ri.

³⁰ Yhangmoq gi, haú jowò mai htoq ló mù, Galile mau mai laí ló akô; nghut kôlhâng, Yesuq gi, ó lé le a sé nhâng naù nghut ri. ³¹ Haí mù gà le, Yhang gi, "Haú Byu Yhangzo gi, byu pê é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôlhâng, Yhang gi, shi é htâng sum nyí nghû râ nyí má, dum dui toq râ nghut lhê." ga, Yhâng é chángzô pé lé mhoqshit byí nyi é yanmai nghut ri.

³² Yhâng é chángzô pé gi, dang haú lé a sê gyo kôlhâng, Yhâng chyáng a wám myi kó nghut ri.

Kô Dik Sû Gi, Ó Yuq Nghut Lhê Lhú?

Mht 18:1-5; Luk 9:46-48

³³ Yhangmoq gi, Kaperna-um wà má jé e akô nghut ri. Yesuq gi, yhúmhkaú má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyín lhum kô é lhú?" ga myí ri. ³⁴ Nghut kôlhâng, yhangmoq gi, zim za nyi tô akô; hkâsu mù gà le, ko dik sû gi, ó yuq nghut lhê nghû é hkyô lé, hkyolat má, yhangmoq dang chyin chyín lhum kô é yanmai nghut ri.

³⁵ Yesuq gi, zùng mù, haú chángzo raxe í yuq lé, wut yù luí, "Kô dik naù sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga taí ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gùng má shap to luí, dum bún yù mù, yhangmoq lé taí é gi, ³⁷ "Shí sù é zoshâng lé, Ngá é myíng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gà ri.

Nga-nhúng Lé Gyè A Kut É Sù Gi, Nga-nhông É Hkyam Shut Nghut Lhê Gà É Hkyô

Luk 9:49-50

³⁸ Haú hkûn, Yohan gi, "Sarà ê! Náng é myíng lang luí, nat gâng pé lé hkat pyám byí wún é byù rayuq lé, ngamoq myang ri. Yhang gi, nga-nhông chyáng a lòm sù nghut é yanmai, yhang lé ngamoq hkúm pyâm é nghut lhê." ga taí ri.

³⁹ Yesuq kúm gi, "Yhang lé hkâhkúm kó; Ngá myíng lé lang luí, laklaí kumlhá kut é sù gi, razup za má, Ngò eq séng luí, a ge é hkyô pé lé taí râ a nghut; ⁴⁰ Hkâsu mù gà le, nga-nhúng lé gyè a kut é sù gi, nga-nhông é hkyam shut nghut lhê. ⁴¹ Ngò, nungmoq lé teng za taí kôlé, nungmoq gi, Hkrisduq eq séng é bang nghut lhê

gâ é yanmai, ngá é myíng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô

Mht 18:6-9; Luk 17:1-2

⁴² Ngo lé lumjíng é zoshâng wuì mà é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dú hkyó pyâm é huí é nghut lé gi, yhang é matú je gè râ nghut lhê.

⁴³ Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduoq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri. ⁴⁴ (Haú ngaraí ming gi, 'yhangmoq lé hkê nyi é luq le a shí, myiduoq le a shúm' é jowò nghut lhê.) ⁴⁵ Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyi í hkyi dap luí, hkâ-nhám le, myiduoq a dat shum é ngaraí ming má dú hkyô pyâm é hui râ htoq má, hkyi rahkyi za dap luí, ahtum abyuq é asak wó râ shut wang le gi, náng é matú je ge ri. ⁴⁶ (Haú ngaraí ming gi, 'yhangmoq lé hkê nyi é luq le a shí, myiduoq le a shúm' é jowò nghut lhê.) ⁴⁷ Náng é myoqjí èq, nang lé mara kut shut nhang é nghut le gi, haú lé lap choq pyám aq; myoqjí í jí dap gù, ngaraí ming má dú hkyó pyâm é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.

⁴⁸ (Haú ngaraí ming gi, 'yhangmoq lé hkê nyi é luq le a shí, myiduoq lé a shúm' é jowò nghut lhê.) ††

⁴⁹ Hkâsu mù gà le, hkungga sho lé xo kat luí lhoq sansêng é su, myi gi, yuq hkangmó lé lhoq sanséng râ nghut lhê. ‡

⁵⁰ Xo gi, ge lhê. Nghut kôlhâng, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuq eq rayuq nguingón nyí keq." ga taí ri.

Myi, Làng Gâng É Hkyô

Mht 19:1-12; Luk 16:18

10 Hau htâng má, Yesuq gi, Kaperna-um mai htoq ló mù, Yuda mau mà é maukyo má ê jé luí, Yodan làng tû tap má dap ló bê nghut ri; byù myo myo gi, Yhâng chyáng dum zíng lé lô kôluí, Yesuq gi, Yhang lhaq kut nyi é eq rajung za, haú bang lé mhoqshit byí ri.

² Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lhú?" ga myí é dong, Yhang lé chyam wú akô.

³ Yesuq gi, "Mosheq gi, nungmoq lé, hkâsu ga hkunmó hkyó tô é lhú?" ga taú myí ri.

⁴ Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byí tô ri." ga tû taí akô.

† Bun zo 44, 46, gi, Chyúmlaika myo myo má a bo é nghut lhê.
†† 9:48 Esai 66:24 ‡ 9:49 Nhong 2:13

⁵ Yesuq dum tũ taí é gi, "Nungmoq é myit nhikhlum htãn kô é yanmai, Mosheq gi, tarã haú lé kã tô é nghut lhê. ⁶ Nghut kôlhang, mau htoq xãng hkun lé, Garai Gasang gi, 'yuqgè eq myiwe lé hpan é nghut lhê'.

⁷ 'Hau é yanmai, yuqgè gi, yhumsing ìnu ìwã chyáng mai htoq luí, yhangmyi eq rahá rading ralhum za kut nyí mù, ⁸ yhangnhik gi, gungsho ralhum za dut byuq kó rã nghut lhê.' ^{††} Haú mù luí, yhangnhik gi, í yuq a nghut lo é za, rayuq za dut bê nghut ri. ⁹ Haú mù luí, Garai Gasang lhoq tsũm tô é lé, byù gi, a lhoq kang sháng gaq." gã ri.

¹⁰ Yhumhkaú má, yhangmoq nyi tô é hkũn lé, chángzô pé gi, haú hkyô eq séng luí, Yhang lé dum saí myí akô. ¹¹ Haú hkũn, Yhang gi, "Yhumsing é yhangmyi lé kãng pyám mù, myiwe gotũ dum hâng yu é sũ ó yuq nghut kôle, su-myi lú é sũ dut bê nghut mù, yhangmyi lé shut é sũ nghut bê. ¹² Myiwe rayuq le, yhumsing é yhanglãng lé kãng pyám mù, yuqgè góyuq eq dum hâng é nghut le gi, sulãng lú é hkyô lé kut bê nghut ri." ga tũ taí ri.

Zoshâng Wuí Eq Yesuq É Hkyô

Mht 19:13-15; Luk 18:15-17

¹³ Byu pé gi, zoshâng wuí lé Yesuq záng byi sháng gaq ga, Yesuq chyáng shuí lé lo akô; nghut kôlhang, chángzô pé gi, yhangmoq lé lhom tân hkũm akô nghut ri. ¹⁴ Haú lé Yesuq myàng jáng, Yhang gi, wú nhik-yo naú luí, "Haú zoshâng wuí lé, Ngá chyáng lé nhâng keq; yhangmoq lé hkãhkũm zing to kó; hkãsu mù gã le, Garai Gasâng é mingdán gi, haú su é bãng é mingdán ru nghut lhê. ¹⁵ Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wãng rã a nghut." ga yhangmoq lé taí ri. ¹⁶ Hau htâng, Yesuq gi, zoshâng wuí lé bún yú mù, yhangmoq ahtoq má loq ke luí, shimãn byí ri.

Sùt Wó É Zorãm Rayuq É Hkyô

Mht 19:16-30; Luk 18:18-30

¹⁷ Yesuq gi, hkyô dum so xoq e ló é hkũn, byù rayuq gi, din lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yú rã matú, ngò haí kut ra rã lhú?" ga myí ri.

¹⁸ Haú mù, Yesuq gi, "Haí mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyí. ¹⁹ Jep e tarã má, 'Byù hkãsat, su-myi sulãng hkãlú, hkãhkau, a teng a mán é saksé hkãhkám, hkãmô zo, nãngnu nãngwa lé hkungga aq!' * ga bo tô é lé, nãng sê lhê." ga tũ taí ri.

²⁰ Haú hkũn, haú yuq gi, "Sará ê, haú pé banshoq lé, ngò, zoshâng hkũn mai cháng bê nghut lhê." ga taí ri.

²¹ Yesuq gi, haú yuq lé wú tsuq to mù, yhang lé chyt-dap luí, taí é gi, "Nãng kut rã rajung rã tô ashí; ló mù, nãng wó miwó lé ùng pyám luí, myùng bang lé byí pyám aq; haú jáng, nãng, mauhkũng htoq má sutzè

wó rã nghut lhê; haú mù, Ngá htâng lé cháng aq." gã ri.

²² Haú yuq gi, dang haú lé wó gyo jáng, sutzè gyai wó sũ nghut é yanmai, myoqdong shum byuq mù, gyai yhang myit a ngón é èq ló byuq bê nghut ri.

²³ Yesuq gi, lhĩnghkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wãng rã matú, haú-í yhang wuí ri-nhung!" ga taí ri.

²⁴ Chángzô pé gi, Yhang taí é dãng é yanmai, mauhong bum akô nghut ri. Nghut kôlhang, Yesuq dum xoq taí é gi, "Zo wuí ê, Garai Gasâng é mingdán má wãng rã matú, haú-í yhang wuí ri-nhung!" ²⁵ Sutzè wó sũ rayuq, Garai Gasâng é mingdán má wó wãng rã htoq, gola-uq radu ãpno mai wó wang lai rã gi, je luí rã nghut lhê." gã taí ri.

²⁶ Haú hkũn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui rã nghut lhê lhú?" ga, taí lhũm bum akô nghut ri.

²⁷ Haú hkũn, Yesuq gi, yhangmoq lé wú kat mù, "Haú hkyô lé, byù mai gi, wó kut rã a nghut; nghut kôlhang, Garai Gasang gi, wó dut lhê; hkãsu mù gã le, Garai Gasang gi, lhunglhang lé wó kut é Sũ nghut lhê." ga taí ri.

²⁸ Haú hkũn, Petruq gi, Yhang lé, "Ngamoq gi, wó é gũ lhunglhang lé tô pyãm to luí, Nãng htâng cháng bê nghut lhê." ga taí ri.

²⁹ Haú mù, Yesuq tũ taí é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhũm, gumang gu-nhá, ìnu ìwã, zo dù wuí eq yò pé lé tô pyãm tô é sũ ó yuq nghut kôle, ³⁰ shí py-at lhê é yhũm pé, gumang gu-nhá wuí, ìnu pé, zo dù wuí eq yò pé lé, rashô tú wó hkam yù luí, zing-rí é hkyô pé lé le hui kó rã nghut é htoq agó, htang pyat má le, ahtum abyuq é asak wó yú rã nghut lhê. ³¹ Nghut kôlhang, hí nghut nyi é bang myo myo gi, htâng gyó byuq kó rã nghut mù, htâng gyó nyi bang yuq gi, hí bekô rã nghut lhê." gã ri.

Yesuq, Yhang Shĩ Rã Hkyô Lé Dum Taí É Hkyô

Mht 20:17-19; Luk 18:31-34

³² Yhangmoq gi, Yerusalem wã mó shut doq ló nyí kô é u lé, Yesuq gi, yhangmoq é hí má sô tô ri; haú hkũn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzô raxe í yuq lé gotũ kut dum wut yù mù, Yhâng chyáng dut lò rã hkyô, yhangmoq lé taí kyô é gi, ³³ "Wú keq, nga-nhúng gi, Yerusalem wã mó shut doq ló nyi lhê; haú Byu Yhangzo gi, hkyangjong agyi pé eq tarã sará pê é loq má ap byí pyãm é hui rã nghut lhê; haú bang gi, Yhang lé, shĩ rã mara byi luí, tũngbaù pê é loq má ap byí pyám kó rã nghut lhê. ³⁴ Haú bang gi, Yhang lé, wuizui kut pyãm é, sòkan byé gyũn é, nhuq bat é kut yù mù, sat pyám kó rã nghut lhê. Hau htâng sum nyí má, Yhang dum dui toq lô rã nghut lhê." gã ri.

† 10:6 Apũn 1:27 †† 10:8 Apũn 2:24 ‡ 10:19 Htoq Ló 20:12-16

Yakuq eq Yohan nhik dung é hkyô

Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ ê, ngá-nhik dúng é gû banshoq, Nàng kut byi râ lé, ngá-nhik ô nau ri." ga taí akô.

³⁶ Haú hkûn, Yhang gi, "Ngò, nungnhik lé haí kut byi râ ô naú akô lhú?" ga myí ri.

³⁷ Yhangnhik gi, "Náng é hpungwup shing kang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tú taí akô.

³⁸ Nghut kôlhang, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm † lé, nungnhik wó shuq kó râ lhú? Ngò hkam yù râ bap-tisma lé, nungnhik wó hkam yù kó râ lhú?" ga yhangnhik lé tú taí ri.

³⁹ Haú hkûn, yhangnhik gi, "Nga-nhik wó dut lhê." ga tú taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ bap-tisma lé le, nungnhik hkam yù kó râ nghut lhê. ⁴⁰ Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haú pé gi, hen to byí é hui bâng matú za nghut lhê." ga yhangnhik lé taí ri.

⁴¹ Haú su gâ é hkyô lé, haú gotú chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri. ⁴² Yesuq gi, yhangmoq banshoq bang lé wut tsing yù luí, "Tùngbaù pé lé uphkang é ga bang gi, tùngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê. ⁴³ Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut naú sù ó yuq nghut kôle, nungmoq é dui-nhâng zoshâng dut ra râ nghut lhê. ⁴⁴ Hau htoq agó, nungmoq má ushuq dut naú sù ó yuq nghut kôle, banshoq bâng é jùn dut ra râ nghut lhê. ⁴⁵ Hkâsu mù gâ le, haú Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shíhtaí gunglik hkungga dông, Yhâng é asak lé byí pyám râ matú sheq, jé lé é ru nghut lhê." ga, yhangmoq lé taí ri.

Myoqjit Sû Barateme, Myoq Dum Myang É Hkyô

Mht 20:29-34; Luk 18:35-43

⁴⁶ Hau htâng, yhangmoq gi, Yerihko wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyí kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri. ⁴⁷ Yhang gi, Nazaret wà byù Yesuq laí ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

⁴⁸ Haú mù, byù myo myo gi, zim za nyi râ matú yhang lé tân hkûm akô; nghut kôlhang, yhang gi,

† Góm eq bap-tisma gâ é gi, jamjau hui râ eq shí râ lé, taí nau é nghut lhê.

"Dawiq é Yhangzo ê, ngo lé shogyo yù laq ô!" ga, je riy-hang garû kat ri.

⁴⁹ Haú mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoi; Yhang, nàng lé ji nyi ri; toq aq." ga myoqjit sù haú lé taí akô. ⁵⁰ Haú hkûn, haú yuq gi, yhâng é buhíng lé hkyut pyám mù, byam chy luí, Yesuq chyáng lé jé ri.

⁵¹ Yesuq gi, yhang lé, "Ngò, nang lé haí kut byi râ ô nau ri lhú?" ga myí jáng, yhang gi, "Sarâ ê, ngò myoq myàng nau ri." ga tú taí ri.

⁵² Yesuq gi, "Ló aq hkoi, náng é lumjíng myit gi, nàng lé lhoq gê byi bê nghut ri." ga taí kat é hkûn jáng, yhang gi, myoq wó myàng mù, Yesuq e ló é hkyô shut cháng e ló bê nghut ri.

Yesuq, Yerusalem Wà Mó Má Wang Ló É Hkyô

Mht 21:1-11; Luk 19:28-40; Yhn 12:12-19

11 Yesuq eq Yhâng é chángzô pé gi, Yerusalem wà mó eq chyáng lo nyi kô é hkûn, Tsanlun Bùm má é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé, ² "Nungnhik, hí má é wà má é keq; wà haú má wang é hkûn jáng, ó le a jì wú shí é logúng zo tuí to lánng é lé, ê myàng kó râ nghut lhê; haú lé hpyi yù mù, Ngá chyáng she lò keq. ³ Byù rayuq yuq mai, 'Haí mù, haú su kut nyi akô lhú?' ga nungnhik lé lhom myi jáng, 'Shí du lé, haú Yhumsing râ ri ga, razup má dum taú dé byi râ nghut lhê.' nghut tú taí keq." ga pyíng luí, nhang kat ri.

⁴ Haú nhik gi, e ló mù, hkyô mó yàm má é hkumdong nàm má tuí tô é logúng zo radu lé, ê myàng kôluí, haú lé tuí hpyi nyi akô. ⁵ Haú hkûn, haú má yap tô é bang ra-am gi, "Haí mù, logúng tuí hpyi nyi akô lhú?" ga myí akô. ⁶ Haú jáng, yhangnhik gi, Yesuq pying kat é eq rajung za taí kyo kôjáng, yhangmoq gi, she ló râ ahkáng byí kat akô nghut ri. ⁷ Yhangnhik, logúng zo haú lé Yesuq chyáng she jé lo é hkûn, logúng hau é gùng htoq má, yhangmoq é buhíng pé buí jáng, hau é ahtoq má, Yesuq doq jì ri. ⁸ Byù myo myo gi, yhangmoq é buhíng pé lé, hkyô má hkyut hkang byí akô; ra-am gi, yò pé má zân yu é mhandíng lé hkang byí akô nghut ri. ⁹ Hí má so bang eq htâng má châng é bang gi,

"Hosana! ††

Haú Yhumsing é myìng mai jé lé lô Sù gi, hkungsô wó nyí sháng gaq ô!

¹⁰ Jé lé lô râ nghut é, nga-nhùng é ìwa Dawiq é mingdán gi, hkungsô wó nyí sháng gaq ô!

Htoq tsáng myhâng má hosana nghut sháng gaq ô!" ‡ ga luí, taí garû bum akô nghut ri.

¹¹ Yesuq gi, Yerusalem wà mó má jé mù, noqkuq yhùm má wang ê luí, lhíngkyuq má é jung hkangmó lé wú ri; nghut kôlhang, buí gyum ló bê nghut é yan-mai, Yhâng é chángzo raxé í yuq eq rahá, Behtani wà shut htoq e ló bekô nghut ri.

†† Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9, 10 má gi, hkyá-on dang dông chung é nghut lhê. ‡ 11:10 Hkyá-on 118:25-26

Maihpáng Gâm Ashi A Zui Râ Matú Taí É Hkyô

Mht 21:18-19

¹² Hau htang nyí, yhangmoq, Behtani wà mai htoq ló kô é hkûn, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú má ashí zuí lhê laq ga ê jé wú le, ahaq mai lai luí, haí le a myàng nghut ri. Haí mù gâ le, maihpáng-shi zui yâm a nghut é yanmai nghut ri. ¹⁴ Haú mù, Yesuq gi, shigâm haú lé, "Ahkuí mai gi, náng chyáng mâ é ashí, ó yuq le a myàng zo lo kó sháng gaq." ga taí ri. Yhâng é chángzô pé gi, haú su ga taí é dang lé wó gyô yu akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haú mâ é zè ung zè wuì kut nyi é bang lé, hkat htoq pyám luí, ngùn htaí zo bâng é siboí pé eq hpúngkyui ung zo bâng é tanghkuq pé lé tu mhuq pyám byí ri. ¹⁶ Hau htoq agó, Yhang gi, ó yuq lé nghut kôle, ung zê lé noqkuq yhûm mai a waq lai nhâng kut pyâm ri. ¹⁷ Yesuq, yhangmoq lé mhoqshit é gi,

"Ngá yhûm gi, byù myû lhunglhâng bâng é matú, kyûdung yhûm ga râ nghut lhê." †

ga kâ tô é a nghut kó lhú? Nghut kôlhâng, nungmoq gi, 'damaq hkyûng' kut pyám bekô nghut ri." gâ ri. ††

¹⁸ Hkyangjong agyi pé eq tarâ sará pé gi, haú lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhâng, shiwa byu pé gi, Yhang mhoqshit é hkyô má, myit zing zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, wà hkaú mai htoq ló bekô nghut ri.

Maihpáng Gâm Nyhuí Shi Byuq É Hkyô

Mht 21:20-22

²⁰ Htang napkyó, yhangmoq sô lai ló le, maihpáng gâm gi, amyit mai yhang nyhuí kyuq shi byuq é lé myang akô. ²¹ Petruq gi, myit bûn kat luí, "Rabai ê, wú aq! Nàng nhîng pyâm é maihpáng gâm gi, nyhuí shi byuq bê nghut ri." ga luí, Yesuq lé taí ri.

²² Haú hkûn, Yesuq gi, "Garai Gasang lé lumjîng keq. ²³ Ngò, nungmoq lé teng za taí kôlé, ó yuq nghut kôle, i-myit má úng-âng é hkyô a bo é za, yhumsîng taí é hkyô gi, dut lò râ nghut lhê ga lumjîng kô é nghut le gi, bùm shî lé, 'Htot mù, wuimau má ló gyô wâng aq.' ga taí le lháng, haú hkyô dut byi râ nghut lhê. ²⁴ Haú mù luí, Ngò, nungmoq lé taí kôlé, nungmoq haí dúng le le wó yû râ nghut lhê nghû lumjîng kô é nghut le gi, wó yû kó râ za nghut lhê. ²⁵ Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq gi, kyûdung yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶ (Nghut kôlhâng, nung-

moq mai mara a hkyut pyám byí é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)" ga tâ taí ri. ‡

Yesuq É Ahko Ahkáng Lé Myí Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaú má sô yông wún é u lé, hkyangjong agyi pé, tarâ sará pé eq suwún wuì gi, Yhâng chyáng lé jé kômù, ²⁸ "Hai ahko ahkâng èq, Nàng, shí pé lé kut nyi lhê lhú? Haú su kut râ ahko ahkáng, Nang lé ó yuq byí é lhú?" ga myí akô.

²⁹ Haú jáng, Yesuq gi, "Ngò le, nungmoq lé rajung myí wú kôlé, tâ taí wú keq; haú hkûn, hai ahko ahkâng èq, Ngò, shí pé kut é hkyô lé taí kyo râ nghut lhê.

³⁰ Yohan byí é baptisma gi, mauhkûng mai lhú? A nghut jáng, byu chyáng mai lhú? Taí wú keq!" ga taú myí kat ri.

³¹ Haú hkûn, yhangmoq chòm hpyê lhûm kô é gi, "'Mauhkûng mai nghut lhê' nghû nga-nhúng taí jáng le, 'Haú nghut le nhîng, haí mù, yhang lé a lumjîng kô é lhú?' ga râ nghut; ³² 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhâng bang lumjîng bùm kô é yanmai, yhangmoq gi, haú byu pé lé gyuq bum akô nghut ri.)

³³ Haú mù, yhangmoq gi, Yesuq lé, "Ngamoq a sé." ga tâ taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Tsibiyiq Hkyâm Saí Bang Lé Dangtú Yu É Hkyô

Mht 21:33-46; Luk 20:9-19

12 Hau htâng, Yesuq, dangtú dông yhangmoq lé taí é gi, "Byù rayuq gi, tsibiyiq hkyâm rahkyam saí to mù, lhîngkyuq kyâm to luí, tsibiyiq wing pyik htoq râ dongkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri. ² Kyôshu yoq jé jáng, yhang gi, yhang yù âng é tsibiyiq shî ê yû râ matú, dui-nhâng zoshâng rayuq lé, hkyâm saí zo bâng chyáng nhang kat ri. ³ Nghut kôlhâng, haú bang gi, haú yuq lé lhom chyup bat luí, loq kôm taú nhang kat akô. ⁴ Haú mù, yhang gi, gotû dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpû kat akô nghut ri. ⁵ Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashí nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htáng má, yhang gi, yhang chyitdap é zo lé nhang kat râ za ru nghut alô; haú mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

† 11:17 Esai 56:7 †† 11:17 Yer 7:11

‡ Bun zo shî gi, Chyúmlaiká ra-am má za bo lhê.

⁷ Nghut kôlhang, haú bang gi, 'Shí yuq gi, silí wunlí sing yù rà sù nghut lhê; lé keq, yhang lé sat pyám sháng, haú jáng sheq, silí wunlí pé lé nga-nhúng wó yù rà nghut lhê.' ga rayuq eq rayuq taí lhùm bum akô.

⁸ Haú mù, yhang lé chyup yù luí, sat pyám mù, hkyâm shinggan shut dú htoq pyâm akô nghut ri.

⁹ Haú jáng, tsibiyiq hkyâm yhumsing gi, yhangmoq lé hkâsu kut rà lhú? Yhang gi, ê mù, haú hkyâm saí zo bang lé sat pyám luí, hkyâm haú lé, góbang lé htot ng-ho byí pyám rà nghut lhê. ¹⁰ Chyúmdang má, 'Yhùm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

¹¹ Shí hkyô gi, haú Yhumsing kut é nghut luí, nga-nhúng é myoq hí má mauhpo dut bê nghut ri.' ga bò tô é lé, nungmoq a nghap wú kó lhú?†

¹² Hau htâng, yhangmoq gi, dangtú haú, yhangmoq lé lhoq ang luí taí é hkyô lé, sé kô é yanmai, Yhang lé chyup yù rà matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

Kehtaq †† Lé Kang Kat Byí É Hkyô

Mht 22:15-22; Luk 20:20-26

¹³ Hau htâng má, yhangmoq gi, Yesuq é dang má mara hô luí Yhang lé chyup yù rà matú, Hparishe pé ra-am eq Herut é byu pé ra-am lé, Yesuq chyáng nhang kat akô. ¹⁴ Haú bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga rà lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é đông mhoqshit é sù nghut ri. Haú mù, Kehtaq lé kang kat byí le gi, ge lhê lhú? ¹⁵ Ngamoq kat ra rà lhú? A kat ra rà lhú?" ga Yhang lé taí akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, haí mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taí kat ri. ¹⁶ Haú hkùn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhú?" ga myí ri.

Yhangmoq gi, "Kehtaq é nghut ri." ga tú taí akô.

¹⁷ Haú mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

Saduke Pé, Yesuq Lé Myí Chyam É Hkyô

Mht 22:23-33; Luk 20:27-40

¹⁸ Haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô.

¹⁹ Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggi gi, yhangmang é awut ashín xoq byi rà matú, yhâng rhat lé chui gon ra rà nghut lhê ga, nga-nhúng lé, Mosheq kê to byí ri. ²⁰ Hí hpyang lé, gumang nhik-

† 12:11 Hkya-on 118:22-23 †† Kehtaq gâ é gi, "hkoséng" gâ é nghut lhê.

tâng wùi nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haú eq rajung za dut byuq bê nghut ri. ²² Haú nhiktâng wùi nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haú le châng shi ló byuq bê nghut ri. ²³ Haú mù luí, haú dum dui toq é buinyi má, myiwe myhí haú gi, hká yuq é yhangmyi nghut rà lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

²⁴ Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú? ²⁵ Haú shi byuq bê bang dum dui toq é hkùn gi, myi byi myi yù hkyô joq lo rà a nghut; yhangmoq gi, mauhkùng htoq mâ é maumang lagyô pé su dut byuq kô rà nghut lhê.

²⁶ Shi é mai dum lhoq dui toq é hkyô eq séng luí, Mosheq kê tô é laiká má lháng, haú nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.' † ga kê tô é lé, nungmoq a nghap wú kó lhú? ²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taí ri.

Ahkyak Dik É Jep É Tarâ

Mht 22:34-40; Luk 10:25-28

²⁸ Tarâ sarâ rayuq gi, lé lô mù, yhangmoq taí htîng lhum nyi kô é lé, lé wó gyô ri. Yhang gi, haú bang lé, Yesuq rago tú taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhú?" ga myí ri.

²⁹ Haú jáng, Yesuq gi, "Ahkyak dik é jep é tarâ gi, 'Is-raelaq byu pé ê, gyo wú keq! Nga-nhúng é Yhumsing Garai Gasang za, Garai Gasang nghut lhê. ³⁰ Haú Yhumsing náng é Garai Gasang lé, náng é myit nhikhum banshoq, náng é asak woi-nyí lhum gôn, nàng myit é hkyô banshoq, náng é wum-o banshoq èq, chyitdap rà lhê.' †† gâ é nghut lhê. ³¹ Hau htang lhum gi, 'Náng gùng lé nàng chyitdap é su, náng é chyangnâm mâ é bang lé le chyitdap aq.' †† gâ é nghut lhê. Shí í lhùm htoq kô é tarâ gotú a joq lo." ga yhangmoq lé tú taí ri.

³² Haú hkùn, tarâ sarâ haú yuq gi, "Gyo naú bê, Sarâ ê! Garai Gasang rayuq za nghut lhê, gotú a nyi lo ga nàng taí é gi, têng ri. ³³ Garai Gasang lé, náng é myit nhikhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap rà lhê gâ é eq, náng gùng lé nàng chyitdap é su, náng é chyangnâm mâ é bang lé le chyitdap rà lhê gâ é gi, myi nyhé hkungga eq gotú hkungga pé banshoq htoq má, je ahkyak lhê." ga taí ri.

³⁴ Yesuq gi, yhang hpaqchyí bo é đông tú taí nyi é lé myàng jáng, "Nàng gi, Garai Gasâng é mingdán eq a

† 12:26 Htoq Ló 3:6 †† 12:30 Tarâ Pun 6:4-5 †† 12:31 Nhong 19:18

we lo nghut ri." ga yhang lé taí kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

³⁵ Yesuq, noqkuq yhûm má mhoqshit nyi é hkûn lé taí é dang gi, "Haí mù, haú tarâ sará pé gi, Hkrisduq lé, Dawiq é yhangzo za nghut lhê gà akô lhú? ³⁶ Dawiq gi, Chyoiyúng Woi-nyí èq taí nhang é má,

'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé,

náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taí ri.' †
gâ ri. ³⁷ Haú mù, Dawiq yhang lháng, Hkrisduq lé, Yhumsîng gà é nghut le gi, yhangzo za hkâsu ge nghut râ lhú?" gâ ri.

Byù hpûng mó gi, Yhâng é dang lé, gabú myit èq gyò nyi bum akô nghut ri.

³⁸ Yesuq gi, mhoqshit uchyang taí é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gai pé má lhom shi-kyâm yù râ lé le, ³⁹ tarajong pé mâ é ahkyak dik é zùng jang pé eq poí pé mâ é réng é zùng jowò pé má myang zùng râ lé le, ô nau nyi bum akô. ⁴⁰ Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dúng shit mhaú é bang nghut akô. Haú su é bang gi, dam byí é je riyhang hui zo kó râ nghut lhê." gâ ri.

Chuimó Myhí Kat É Alu Ngùn

Luk 21:1-4

⁴¹ Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn gamyó myhó kat bum akô. ⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za taí kôlé, shî myung é chuimó myhí gi, góbang banshoq htoq má je myo kat bê nghut ri.

⁴⁴ Haú góbang banshoq gi, yhumsîng agùn agó wó é má é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga taí ri.

Ló Htâng Buinyi Má Dut Lò Râ Hkyô

Mht 24:1-21, 29-35; Luk 21:5-33

13 Yesuq, noqkuq yhûm mai htoq ló é hkûn, Yhâng é chángzo rayuq gi, "Sarâ ê, wú aq; hkâ-í ko é luqqok pé! Hkâ-í hkik é yhûm pé!" ga Yhang lé taí kat ri.

² Haú hkûn, Yesuq gi, "Nàng, yhûm mó shí pé lé myàng lhê a nghut lhú? Luqqok shí pé gi, rachâm htoq rachâm lháng a kê lhum loshoq, hpyoq hpyi pyâm é hui râ nghut lhê." gâ tû taí ri.

³ Yesuq gi, Tsanlun Bùm má, noqkuq yhûm shut hù mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, ⁴ "Haú hkyô pé gi, hkâ-nhám dut lò râ lhú? Haú dut lò râ hkûn, hkâsû é kumlhá htoq lô râ nghut lhê lhú? Ngamoq lé taí kyô wú laq." ga Yhang lé baú myí akô nghut ri.

⁵ Haú mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyi keq.

⁶ Hkâsu mù gà le, 'Ngò gi, haú yuq †† nghut lhê.' ga, Ngá myíng lé lîng é byù myo myo pô htoq lô mù, byù myo myo lé shuí nghoq kó râ nghut lhê. ⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyi gi, a nghut shi. ⁸ Byù ra-myû eq ra-myû, mingdán ralhum eq ralhum majan zân lhûm lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuîhke jamjau hkyo é apùn awang za ru nghut ashî.

⁹ Nungmoq gùng nungmoq sidiq nyi keq. Hkâsu mù gà le, yhangmoq gi, nungmoq lé, tarâ rûng pé má é pyám kó râ nghut é htoq agó, tarajong pé má nungmoq lé nhuq bat kó râ nghut lhê. Hau htoq agó, nungmoq gi, Ngá mying é yanmai, mauzau wui eq hkohkam pé é hí má, saksé dông yap ra kó râ nghut lhê. ¹⁰ Haú gabú danglù gi, amyû banshoq lé hí hko kyo ra râ nghut lhê. ¹¹ Nungmoq gi, chyup yu é hui luí, jep huí é hkûn, haí taí râ lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gà le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.

¹² Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyám nhâng kó râ nghut lhê. ¹³ Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut kôlhang, jhtâm jé shoq wó hkam jân nyi é sù gi, hkyi yu é hui râ nghut lhê.

¹⁴ 'Haú lhoq hten lhoq hpyoq é achâq achyut hkyô' † gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpang doq ló kó sháng gaq. ¹⁵ Yhumhkûng htoq má nyi tô é sù gi, yhúmhkaú mâ é zè haí lé le, a ló gyó wang yù lo sháng gaq. ¹⁶ Yò má nyi tô é sù gi, yhâng é buhîng lé a ló taú yu nyi lo sháng gaq. ¹⁷ Haú buinyi pé má, zogùng dut é myiwe wui eq naú huq ashî nghut é înu wui gi, hkâ-í yhang wuîhke bekó nghut ri myhi-nhung. ¹⁸ Haú hkyô gi, gyoqmyò má a dut sháng gaq, kyûdùng nyi keq. ¹⁹ Hkâsu mù gà le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shî é wuîhke jamjau mó gi, haú buinyi pé má dut lò râ nghut lhê; haú su é hkyô gi, htàngnùng má hkâ-nhám le dum dut lo râ a nghut. ²⁰ Buinyi haú pé lé, haú Yhumsîng Garai mai a lhoq shaú é nghut le gi, ó yuq le

† 12:36 Hkya-on 110:2

†† Haú yuq gà é gi, Hkrisduq lé gà é nghut lhê. † 13:14 Dan 9:27; 11:31; 12:11

asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyi haú pé lé, Yhang lhoq shaú pyám byi bê nghut ri. ²¹ Haú ahkying má, byù rayuq yuq mai, nungmoq lé, 'Wú keq, shí má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjng kó. ²² Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lhê. ²³ Haú mù, nungmoq sidiq nyi keq; ahkying a jé shi mai, ngò, nungmoq lé, jung hkgangmó taí kyô nyi gù nghut lhê.

²⁴ Buinyi haú pé má, wuñhke jamjau haú pé laí é htâng,

'Buí gi, noq byuq mù, lhamó gi, a tsô dut byuq râ nghut lhê;

²⁵ kyí pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huí bùm kó râ nghut lhê.' †

²⁶ Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shinggang eq le, gyó lé lo é lé, byu pé byu-myàng kó râ nghut lhê.

²⁷ Hau htâng má, Yhang gi, Yhâng é maumang lagyô pé lé nhang kat mù, maumyí chyún hkgangmó eq myigùng htum shoq, mauhkûng htáng shoq mai, Yhang hkyin yu tô é bang lé shuí tsing yù nhâng râ nghut lhê.

²⁸ Maihpáng gam lé wú mù, mhoq yú keq; agàm mai a-nyuq nún lô mù, ahaq htut lô jáng, bui nyé nám chyâng lò bê lé, nungmoq sê lhê. ²⁹ Haú eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sé lo keq. ³⁰ Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê. ³¹ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyí râ nghut lhê.

Haú Buinyi Eq Ahkying Lé, Ó Le A Sé

Mht 24:36-44

³² Buinyi eq ahkying haú lé gi, ó yuq le a sé; mauhkûng htoq mâ é maumang lagyô pé lhang a sé; haú Zo le a sé; haú Iwa za ru sê lhê. ³³ Haú mù, nungmoq gi, ahkying haú hkâ-nhám jé râ lé, a sé kó é yan-mai, sidiq nyi keq! Machya nyí keq! ³⁴ Haú gi, byù rayuq, yhâng é dui-nhâng zoshâng wui lé, ó le ó eq sêng é mù lé gàm byí to mù, hkum zúng sù lé le, machya nyi râ matú pying to luí, yhâng yhûm lé, haú dui-nhâng zoshâng wui chyáng ap pyám to mù, byin we shut htoq ló byuq é sù eq pung ri.

³⁵ Haú mù, haú Yhumsing hpó gi, myinhtâng laq, myín gunggàm laq, woqtún hkun laq, maubó zó laq, hkâ-nhám jé lô râ lé nungmoq a sê kó é yanmai, sidiq machya nyi keq. ³⁶ Haú a nghut jáng, Yhang, dàn loq tung tau jé lo é hkûn, nungmoq yhup myhî tô é lé, lo myang pyám râ nghut lhê. ³⁷ Ngò, nungmoq lé, 'sidiq

machya nyi keq,' nghû taí é eq rajung za, yuq hkgang-mó lé le, taí é nghut lhê." ga taí ri.

Yesuq, Xû But Byi Huí É Hkyô

Mht 26:1-16; Luk 22:1-6; Yhn 11:45-53; 12:1-8

14 Ahkuí, haú Lhoqlhai Poí eq múmchi a kat é Muk Zo Poí jé râ í nyi za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yú mù, sat pyám râ matú, hkyô ho nyi akô nghut ri. ² Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akô.

³ Yesuq gi, Behtani wà má nyi é manggâm dap wú sù Simûn é yhûm, siboí má nghe zung tô é hkûn, myiwe myhí rayuq gi, nardu amyit mai za saí yu é, gyai hpaú é namngón xû bo é alabasta (luq hpyû) bông yu lé lô mù, bông haú lé lhang hkyui luí, namngón xû haú lé Yesuq é ulhum má hut gyun byí ri.

⁴ Haú má nyi tô é bang ra-am gi, wú nhik-yô é myit èq, rayuq eq rayuq taí lhum kô é gi, "Haí mù, namngón xû lé aha agó kut pyám lhê laq?" ⁵ Haú namngón xû lé, denari †† sùm sho èq ung luí, myùng bang lé byí le ge lhê mhaí!" gâ akô. Yhangmoq gi, myiwe myhí hau lé le, gyai chôm tân akô.

⁶ Nghut kôlhang, Yesuq gi, yhangmoq lé, "Myiwe zo haú lé, hkâtân nyi kó; haí mù, yhang lé i-myit lhoq myo nhang nyi akô lhú? Yhang gi, Ngá é ahtoq má ge é hkyô kut bê nghut ri. ⁷ Haú myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shí má nungmoq eq rahá ayang nyi nyi râ sù a nghut. ⁸ Yhang gi, yhang wó dut é í kut bê nghut ri. Yhang, Ngá gùng má, namngón xû hut gyún é gi, Ngá gùng lé yhum râ matú, hí hen lajâng tô é ru nghut lhê. ⁹ Ngò, nungmoq lé teng za taí kôlé, haú gabú danglù lé mingkan gón hko kyô é jowô hkgangmó má, yhang lé myit bûn é đông, yhang kut é hkyô shí lé, taí kyo bekô râ nghut lhê." ga taí kyo ri.

¹⁰ Hau htâng, haú chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pé chyáng e ri. ¹¹ Haú bang gi, haú hkyô lé lhom wó gyo kôjáng, gyô gabú luí, yhang lé ngùn byi râ ga, dang-gidiq byí akô. Haú mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹² Haú htungli joq é eq rajung za, Lhoqlhai Poí hkungga sauzo jaú byí é, múmchi a kat é Muk Zo Poí sâng-hi nyí má, Yesuq é chángzô pé gi, Yesuq lé, "Nàng zo râ Lhoqlhai Poí lé, ngamoq hkâmá é món to râ lhú?" ga myí akô.

¹³ Haú mù, Yhang gi, chángzo í yuq lé, "Nungnhik, myuq hkaú shut wang ló keq, wui yambú waq é byù rayuq lhom hui râ nghut lhê; haú hkûn, nungnhik gi, yhâng htâng cháng keq. ¹⁴ Haú yuq, wang ló é yhûm mâ é yhumsing lé, 'Ngò, Ngá é chángzô pé eq rahá,

† 13:25 Esai 13:10; 34:4

†† Denari rachap gi, byù rayuq é ra-nyí lhê é zuihpau eq wui ri.

Lhoqlhai Poî lé zo râ bing wap hkâmá nghut lhê lhu ga, Sará myí nhang kat ri.' nghu tái keq. ¹⁵ Haú hkûn, hen to gû nghut é, ahtoq mã é wap mó lé lhom tân shit râ nghut lhê. Wap haú mã, nga-nhông é matú é hen to keq." ga tái luí, nhang kat ri.

¹⁶ Chángzo haú nhik gi, htoq e ló mù, myuq hkaú má wang e ló le, Yesuq tái kat é eq roq za ê myâng kômù luí, Lhoqlhai Poî lé, món to bekô nghut ri.

¹⁷ Myinhâng jé lô jáng, Yesuq gi, haú chángzo raxe í yuq eq rahá, haú mã lé jé bekô nghut ri. ¹⁸ Yhangmoq gi, siboi mã nghê mù, zô nyi bùm kô é u lé, Yesuq gi, "Ngò, nungmoq lé teng za tái kôlé, Ngò eq rahá zô nyi é bang nungmoq mã é rayuq sũ gi, Ngo lé ap pyám râ nghut lhê." ga tái ri.

¹⁹ Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

²⁰ Haú hkûn, Yhang gi, "Haú yuq gi, haú raxe í yuq mã é rayuq nghut lhê. Ngò eq rahá, hkoq shí mã muk jùmzo sũ nghut lhê. ²¹ Haú Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhang, haú Byu Yhangzo lé ap pyám é sũ gi, dingnyé wó ri; haú yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga tái uchyang, Yhâng é chángzô pé lé gàm byí ri.

²³ Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akô nghut ri.

²⁴ Yesuq gi, yhangmoq lé, "Shí gi, byù myo myô é matú htoq pyám é, dangshikaq eq sêng é Ngá sui nghut lhê. ²⁵ Ngò, nungmoq lé teng za tái kôlé, Ngò, Garai Gasâng é mingdán mã, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga tái ri.

²⁶ Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Hkyô Lé, Te Tái É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lhunglhang bang gi, myit lingbat kó râ nghut lhê; hkâsu mù gâ le, 'Haú sau zúng sũ lé, Ngò bat sat pyám mù, sau pé gi, lhoq pyo pyám é hui kó râ nghut lhê.' † ga tái ri. ²⁸ Nghut kôlhang, Ngò gi, lhoq dui toq é huí htâng mã, Galile mau shut, nungmoq é hí mã e ló lánng râ nghut lhê." ga tái ri.

²⁹ Haú hkûn, Petruq gi, "Góbang banshoq myit lingbat kôlhang, ngò gi, myit lingbat râ a nghut." ga tái kat ri.

³⁰ Haú mù, Yesuq gi, "Ngò, nàng lé teng za tái lé, hkû-nyí, hkû-myín yhang jáng, woq í dâm a tân shimá, nàng, Ngo lé sum dâm he-ngik pyám râ nghut lhê." ga tái ri.

³¹ Nghut kôlhang, Petruq gi, "Ngò, Nàng eq rahá shí râ dut kôlhang, Nang lé ngò he-ngik pyám râ a nghut."

† 14:27 Zhk 13:7

ga zuq zuq tái ri. Góbang banshoq le, haú su ga châng tái bum akô nghut ri.

Get-samane Gâ é Jowò Mã Kyûdông É Hkyô

Mht 26:36-46; Luk 22:39-46

³² Yhangmoq gi, Get-samane gâ é jowò mã jé ló kômù, Yesuq gi, Yhâng é chángzô pé lé, "Ngò, kyû ê dông nyi é u lé, shí mã zùng lánng keq." ga tái ri.

³³ Yesuq gi, Yhang eq rahá Petruq, Yakuq, Yohan pé lé, shuí chông ri. Haú hkûn, Yhang gi, myit gyai a ngón é eq myit wuínke é hui mù, ³⁴ yhangmoq lé, "Ngò gi, shí râ í yhang myit yón nyi ri; nungmoq gi, machyâ luí, shí mã lánng nyí keq." ga tái ri.

³⁵ Yesuq gi, haú mai ratsuí zo sô ê mù, myigùng má gop byên to luí, ahkyíng haú lé ge lhoq lhai pyám byí le gi, Yhâng chyáng mai lhoq lhai pyám byi râ matú, ³⁶ "Aba, † Áwa ê, Nàng gi, haí le wó dut é Sũ nghut lhê. Góm ‡ shí lé, Ngá chyáng mai yu pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdông ri.

³⁷ Hau htâng, Yhang gi, Yhâng é chángzô pé chyáng dum taú lo le, yhangmoq yhup myhí to kô é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lhu? Razup za lhang a wó machya nyi lhu? ³⁸ Gunglaú é a hui sháng gaq, machyâ luí, kyûdông nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga tái ri.

³⁹ Yesuq gi, radâm dum ê mù, hí lé dông é dang lé za, ê dung ri. ⁴⁰ Yhang dum taú lo le, yhangmoq gi, myoqkuq lai kô é yanmai, yhup myhí to lánng kô é lé, lo dum myang ri. Yhangmoq gi, Yhang lé haí tái râ a sé dut byuq akô nghut ri.

⁴¹ Yesuq gi, sum dâm nghu râ lhing mã, yhangmoq chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lhu? Gé bê! Haú ahkyíng gi, jé bê nghut luí, haú Byu Yhangzo gi, yubak dap bâng é loq mã ap pyám é hui râ nghut bê. ⁴² Toq keq! Ló losháng hkoí! Ngo lé ap pyám râ sũ gi, jé lé lô bê nghut ri." ga tái ri.

Yesuq, Chyup Yû Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dáng nyo nyi ashí u lé, haú chángzo raxe í yuq mã bo é Yudaq gi, haú hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lo ri.

⁴⁴ Yesuq lé ap pyám râ sũ gi, yhangmoq lé, "Ngò bopuq puq é sũ gi, haú yuq nghut bê; Yhang lé chyup yû mù, zúng shuí ló keq." ga kumlhá byí to bê nghut ri.

⁴⁵ Yudaq gi, Yesuq chyáng hkyê za ê mù, "Rabai ê." ga tái luí, Yhang lé bopuq puq byí ri. ⁴⁶ Haú hkûn, yhangmoq gi, Yesuq lé chôm zúí zing mù, chyup yû bekô nghut ri. ⁴⁷ Haú mù, nàm mã yap tô é byù rayuq gi, yhâng é shâm lé she htoq yû mù, hkyangjong mó é

†† Aba gâ é gi, Aramaik dang dông "Áwa" gâ é lichyúm nghut lhê. ‡ Góm gâ é gi, Yesuq, jamjau hui râ hkyô eq shí râ hkyô lé, tái nau é nghut lhê.

dui-nhang zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lhú?" ⁴⁹ Ngò gi, nyí wuî, nungmoq eq rahá nyi luî, noqkuq yhûm má mhô-qshit byí nyi kôlhang, nungmoq, Ngo lé a chyup yû kô é nghut lhê. Nghut kôlhang, Chyúmdang pé gi, dik ra râ nghut lhê." ga taí ri. ⁵⁰ Haú hkûn, haú chángzô pé gi, Yesuq lé tô pyâm to kôluî, hpang byo byuq bekô nghut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn, ⁵² yhang gi, buhîng lé hkyut hkyô pyâm to mù, gùngchîn hpang ló byuq bê nghut ri.

Yudaq Byin Tú Wapdoq Má Jéyang Huí É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akô; haú hkyangjong agyi pé lhunglhang bang, suwún wuî eq tarâ sará pé le, lé zup zîng bum akô.

⁵⁴ Petruq gi, hkyangjong mó é yhumwàng hkaú má châng jé wàng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵ Haú hkyangjong agyi pé eq Yudaq byin tú wapdoq gón gi, Yesuq lé sat râ saksé hô kôlhang, haí le a myàng kó nghut ri. ⁵⁶ Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq saí é noqkuq yhûm shí lé, Ngò hpyoq hpyi pyám mù, sum nyí gyoro má, byu loq èq a saí é, gotú ralhum dum saí râ nghut lhê.' ga taí é lé, ngamoq wó gyô ri." ga akô. ⁵⁹ Nghut kôlhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haí le a tû taí luq? Shí bang, Nang lé mara hun nyi é saksé gi, hká dông nghut lhê lhú?" ga luî, Yesuq lé myí ri. ⁶¹ Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lhú?" ga dum myí ri.

⁶² Haú hkûn, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyam † má zung tô é lé le, mhuthtui ji mù, mauhkûng mai lé lo é †† lé le, nungmoq myàng kó râ nghut lhê." ga taí ri.

⁶³ Haú hkûn, hkyangjong mó gi, yhang é bu lé lêng cheq pyám mù, "Nga-nhung, haí saksé râ ashí lhú?"

⁶⁴ Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu wó myit akô lhú?" ga myí ri; yhangmoq banshoq bang gi, shí gíng sù nghut ri ga, chôm myit huí akô. ⁶⁵ Haú mù, ra-am gi,

† Loqyo hkyam gâ é gi, ahko ahkáng wó é jowò lé gâ é nghut lhê. †† Mhuthtui ji mù, mauhkûng mai lé lo é gâ é gi, Danielaq 7:14 má bò lhê.

Yhang lé sôkan byé gyun é eq, myoq má nghop pyám byi luî, loqtsup èq htui byí lhê kut mù, "Nang lé ó yuq htui é, myiqhtoi htoí wú aq." ga taí akô. Haú zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaú má nyi tô é u lé, haú hkyangjong mó é dui-nhang zoshâng myhí rayuq jé lé lo ri. ⁶⁷ Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taí ri.

⁶⁸ Nghut kôlhang, yhang gi, "Nàng taí é hkyô lé, ngò, sé le a sé, gyo le a sê gyo." ga he pyám luî, wàng hkúmdong shut htoq e ló bê nghut ri. †

⁶⁹ Dui-nhang zoshâng myhí haú gi, Petruq lé, haú má dum myàng jáng, awui ayâm má yap tô é bang lé, "Shí yuq le, haú hpúng má lom é sù rayuq nghut ri." ga dum taí ri. ⁷⁰ Petruq gi, radàm dum he pyâm ri; hau htâng razup zo má, haú nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng mâ é byù rayuq hkyak nghut lhê." ga taí akô.

⁷¹ Haú hkûn, yhang gi, yhanggùng yhang nhing luî, "Haú nungmoq taí é byù lé, ngò a sé." ga dakam ri.

⁷² Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tûn shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taí é dang lé, myit bûn kat mù, wum kat ngau ri.

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

15 Haú napkyó noq za má, hkyangjong agyi pé gi, suwún wuî, tarâ sará pé, Yudaq byin tú wapdoq gón bang eq rahá kut, chôm bóng yû kômù, Yesuq lé tuí yû luî, shuí htoq é kômù, mauzau Pilat chyáng ê ap byí akô nghut ri.

² Pilat gi, Yesuq lé, "Nàng gi, Yudaq byu pé é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga, tû taí ri.

³ Haú hkyangjong agyi pé gi, Yhang lé mara gyai myo shoq chôm hun akô. ⁴ Haú mù, Pilat gi, Yesuq lé, "Wú aq, yhangmoq, nàng lé mara haú myhó hun nyi le, nàng, haí le a tû taí lhú?" ga myí ri.

⁵ Nghut kôlhang, Yesuq gi, haí le a tû taí kut jáng, Pilat gi, maú byuq bê nghut ri.

⁶ Haú Lhoqlhai Poí u lé, mingbyû wui dúng é htóng byû rayuq yuq lé, mauzau mai lhaq lhoq htoq byi byi kut é htúng joq ri. ⁷ Haú hkûn, Barabaq gâ é byù rayuq gi, gumlau gabyông é hkûn, byù sat é gumlau bang eq rahá, htóng gyó tô ri. ⁸ Byù hpúng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

⁹ Haú mù, yhang gi, "Yudaq byu pé é hkohkâm lé nhang htoq kat byi râ lé, nungmoq ô nau akô lhú?" ga

‡ Chyúmding ra-am má Haú hkûn jáng, woq tûn bê nghut ri gâ é le bo ri.

myi ri. ¹⁰ Pilat, haû su ga myi é gi, haû hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri. ¹¹ Nghut kôlhang, haû hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haû byù moq mó lé i-myt lhoq toq byi akô.

¹² Pilat gi, "Haû jáng, nungmoq mai Yudaq byu pè é hkohkâm ga sù yuq lé, ngò hkâsu kut râ lhú?" ga yhangmoq lé myi ri.

¹³ Haû hkûn, yhangmoq gi, "Yhang lé tapzîng má jén sat pyám aq." ga chôm garu akô.

¹⁴ Haû jáng, Pilat gi, "Haí mù luí lhú? Yhang haí kut shut bê lhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riy-hang garú lo bum akô nghut ri.

¹⁵ Pilat gi, haû byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byi kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang ló kômù, gyedap gón lé ji tsîng yu akô. ¹⁷ Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byi akô. ¹⁸ Hau htâng, yhangmoq gi, "Yudaq byu pè é hkohkâm hpô è! Chyung hîng xê hîng nyi sháng gaq ô!" ga wut garú akô. ¹⁹ Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luí, Yhâng hí má hkyihput htuoq mù, paí mhaû akô nghut ri. ²⁰ Yhangmoq gi, Yhang lé rhoi jihkyoî ban kut yù kôjáng, Yhang wut tô é buhîng nè lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyám É Hkyô

Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhangwa, Kuruni myuq byù nghut é Simun ga sù gi, yosô wà mai lò mù, haú jowò mai laí ló ri. Haû hkûn, gyezô pé gi, yhang lé, tapzîng waq nhang akô nghut ri. ²² Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri). ²³ Hau htâng, yhangmoq gi, Yhang lé, mura † eq nyhò tô é tsi-biyiq wing huq akô; nghut kôlhang, Yhang gi, a lhom shuq byi nghut ri. ²⁴ Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é đông gam yu pyám byi akô nghut ri.

²⁵ Yhangmoq, Yesuq lé tapzîng má jén tap pyám é hkûn gi, napkyó gau hkyíng nghut bê nghut ri. ²⁶ Hau htoq agó, Yhang lé mara hun é đông kê tap to kô é gi, "YUDAQ BYU PÉ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq,

† Mura gi, chi wó kut jung xù nghut lhê.

loqpaí hkyam shut rayuq kut, tapzîng htoq má jén tap tô akô nghut ri. ²⁸ (Haû gi, "Yhang gi, yubak dap bâng chyáng nghap lhôm é hui bê nghut ri." †† gâ é Chyúmdang lé lhoq dik é nghut ri.) ²⁹ Hkyô sô laí ló é bang gi, nyhap é đông u-ngut ngut mù, taí kô é gi, "Noqkuq yhûm lé hpyoq pyám luí, sum nyi gyoro má dum wó saí lhê ga Sù ê! ³⁰ Náng gùng nàng hkyi yù luí, tapzîng mai gyó lò wú aq mhaí!" ga akô nghut ri.

³¹ Haû eq rajung za, hkyangjong agyi pé eq tarâ sará pé le, yhangmoq hkaû má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! ³² Nga-nhúng wó myâng mù, lumjîng râ matú, shí, Israelaq byu pè é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang taí akô. Yhang eq rahá tapzîng má jén tap to huí é su nhik le, Yhang lé rhoi dang taí akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

³³ Nyi-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri.

³⁴ Myinhtâng sum hkyíng jé é hkûn, Yesuq gi, "Eloi, Eloi, lama sabakhtani." †† ga, htê mó èq garú kat ri. Haú é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyám tô lhê lhú?" gâ é nghut ri.

³⁵ Haû nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

³⁶ Haû hkûn, byù rayuq gi, din e ló mù, wuimaù lé tsi-biyiq wing chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga taí ri.

³⁷ Yesuq gi, htê mó èq garú kat luí, kâng byit byuq bê nghut ri.

³⁸ Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri. ³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taí ri.

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose nhiktang é yhangnu Mariq eq Salome pé le bo akô nghut ri. ⁴¹ Haú bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byi é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyám É Hkyô

Mht 27:57-61; Luk 23:50-56; Yhn 19:38-42

⁴² Haú nyi gi, Hên Lajang Buinyi (Bánno buinyi é hí nyi) nghut ri. Haû mù, myinhtâng jé lô jáng, ⁴³ Yudaq uphkàng hpúng má bo é, aróng wó é, Garai Gasâng é

†† 15:28 Esai 53:12 † Bun zo shí gi, chyúmding axau ra-am pé má za bo é nghut lhê. †† 15:34 Hkyá-on 22:1

mingdán lé lánq nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng luî, Yesuq é gungšôm lé ê dŭng ri. ⁴⁴ Pilat gi, Yesuq shî bê gâ é hkyô lé wó gyo jáng, maú byuq ri; haû mù, yhang gi, shô up gyezau lé wut yù mù, Yesuq shî teng bê lhú ga myî ri. ⁴⁵ Shî teng bê hkyô lé, shô up gyezau chyáng mai wó sê yù jáng, Pilat gi, Yesuq é gungšôm lé yù râ ahkáng, Yosep lé byi kat ri. ⁴⁶ Haû mù, Yosep gi, pán yúng lé wui yù luî, gungšôm lé yu hkyó mù, htup yup luî, luqgok lé kyûng tô é lup hkaû má ê kat tô ri. Hau htâng, yhang gi, luphkum má, luqlông èq lhêng chî pyâm tô ri. ⁴⁷ Magadalaq wà mâ é Mariq eq Yose é yhangnu Mariq gi, Yesuq lé, hkâmá lheq tô é lé, ê myang akô nghut ri.

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

16 Bánno buinyi lai jáng, Magadalaq wà mâ é Mariq, Yakuq é yhangnu Mariq eq Salome pé gi, Yesuq é gùng má, ê but byi râ matú namngón jung ê wui akô. ² Bánno buinyi htang napkyó bui htoq lo é hkûn yhang, yhangmoq gi, lup shut e ló akô. ³ Yhangmoq gi, "Luphkum mâ é luqgok lé, ó yuq chyûn lhêng pyám byi râ lhú?" ga, rayuq eq rayuq taí lhum akô. ⁴ Nghut kôlháng, yhangmoq tu wú kat kô é hkûn, luqlong haû gi, lhoq lhêng to lánq é lé, myàng akô nghut ri; luqlong haû gi, gyai kô é nghut lhê. ⁵ Yhangmoq gi, lup hkaû má wang ê kô é hkûn, hpyu é buhíng wut é zorâm rayuq, loqyo hkyam má zung tô é lé, myàng kôjáng, gyuq dan bum akô. ⁶ Haú hkûn, haú yuq gi, "Hkâgyuq dàn kó! Nungmoq gi, haû tapzîng má jén sat huí é, Nazaret wà byù Yesuq lé ho akô, a nghut lhú? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq. ⁷ Ahkuí, nungmoq gi, ló mù, 'Yesuq gi, nungmoq hí má, Galile mau shut so lánq râ nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myàng kó râ nghut lhê.' nghû, Yhâng é chángzô pé eq Petruq lé ló taí kyo keq." ga lhom taí kat ri. ⁸ Haû mù, myiwe myhí haú bang gi, byòdàn gyuq nán é eq, lup mai hpang htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyi htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mâ é Mariq lé hí htoq shit ri. ¹⁰ Mariq haû gi, ló mù, haû Yesuq eq nyi lai lò bê bang, yón ngau nyi kô é hkûn, haú hkyô lé ló taí kyô ri. ¹¹ Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlháng, a jíng kó nghut ri. ¹² Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri. ¹³ Haú nhik gi, taú lò mù, gotû chángzô pé lé haú hkyô lò shit kyo akô; nghut kôlháng, yhangmoq gi, haú lé le a jíng byi kó nghut ri.

¹⁴ Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjíng myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jíng é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jàm shoq htoq ê mù, waxâng zo wuî lhunglháng lé, haú gabú danglù hko kyo keq. ¹⁶ Lumjíng mù, wui-my-hup hkâm yu é sù ó yuq nghut kôle, hkyi yu é hui râ nghut lhê. Nghut kôlháng, a lumjíng é sù ó yuq nghut kôle, mara byi é hui râ nghut lhê. ¹⁷ Lumjíng é bang wó kut shit râ kumlhá pé gi, Ngá é myíng lé lang luî, nat gâng pé lé wó hkat htoq kó râ eq laklaí é myíng pé lé dat nyò kó râ nghut lhê; ¹⁸ yhangmoq gi, lhangmuí pé lé le, wó kui zui kó râ nghut lhê; muí shi jung duq lé, shuq kôlháng, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

¹⁹ Haû Yhumsíng Yesuq gi, yhangmoq lé dang ban taí é htâng má, mauhkûng shut shuî toq yu é hui luî, Garai Gasâng é loqyo hkyam má zung to bê nghut ri. ²⁰ Hau htâng, haú chángzô pé gi, htoq ê mù, jowò hkanmó má mungdang ê hko kyô akô nghut ri; haû Yhumsíng gi, yhangmoq eq rahá nghut nyí mù luî, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byi é nghut ri. Amen.

Lukaq

(The Gospel of Luke)

1 Aróng wó dik é sù Htohpiluaq ê, ngamoq chyáng dut laí lò bê hkyô pé lé, sâng-hi mai yhumsing myoq èq yhang, myang é bang eq, mungdang wùn waq é bang mai shap kyô gyó lô mù luí, ² byù myo myo gi, shikut luí kê to bekô nghut ri. ³ Ngò le haú pé banshoq lé awang mai aphyo hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gîng é dut sháng gaq nghû, nàng é matú banshoq tok za kê kat byi râ lé, ngò wó myit ri.

Wui-myhup Sará Yohan Hku Lé Lô Râ Gâ É Hkyô

⁵ Yuda mau má Herut hkohkâm up é u lé, Abiyag hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû mâ é, Elizabet ga sù nghut ri. ⁶ Haú nhik gi, Yhumsîng Garaî é jep é tarâ eq htûngtarâ banshoq lé, rago za cháng mù, Garai Gasâng é hí má dingmán é su nhik nghut akô. ⁷ Nghut kôlhâng, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garai Gasâng é hí má lé zui le, ⁹ haú Yhumsing é noqkuq yhûm ahkaú má namngón hkungga ê wang nyhé râ matú, hká yuq nghut râ lé hkyangjông pé é htûngli eq rajung za byù hkyín shosé she wú é hkûn, yhâng chyáng âng ri. ¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdung nyi akô.

¹¹ Haú hkûn, Yhumsîng Garaî é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri. ¹² Zahkariq gi, maumang lagyo haú lé myàng jáng, dan gyuq nyi ri. ¹³ Nghut kôlhâng, maumang lagyo gi, "Zahkariq ê, hkâgyuq, nàng é kyûdung dang lé Garai Gasang gyo byi bê. Haú mù luí, nàng é yhumsîng myhí Elizabet gi, nàng é matú yuqzo rayuq bau byi berâ nghut lhê; nàng gi, yhang lé Yohan nghû myhíng byi ra râ nghut lhê. ¹⁴ Yhang gi, nàng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. ¹⁵ Hkâsu mù gâ le, yhang gi, haú Yhumsîng Garaî é hí má ahko ahkáng wó mù luí, byù mó dut râ sù nghut lhê. Yhang gi, tsíbyiq wing eq îhpe lé ge shuq râ sù a nghut; yhâng nû é unghkaú mai yhang, Chyoiyúng Woi-nyí èq byíng nyí râ sù nghut lhê. ¹⁶ Yhang gi, Israelaq yhangzo yhangshû pé myo myo lé, Yhumsîng yhangmoq é Garai Gasâng

chyáng lhing lò nhâng râ sù nghut lhê. ¹⁷ Íwâ pê é myit nhiklum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsîng jé lé râ matú hen tô é byù myú dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e lô râ nghut lhê." ga luí, yhang lé taí ri.

¹⁸ Haú hkûn, Zahkariq gi, "Haú hkyô lé ngò hkâsu kut wó sé râ lhú? Ngò le mang byuq bê, ngâ é yhumsîng myhí le asak ipyat ko bê." ga luí, maumang lagyo lé tú taí ri.

¹⁹ Maumang lagyo haú gi, "Ngò gi, Garai Gasang eq rahá nyi é sù Gabrielaq nghut lhê. Nang lé gabú danglù shí taí kyo aq ga luí, Yhang, ngo lé nhang kat é nghut lhê. ²⁰ Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjîng é yanmai, mù haú dut lo é buinyi jé shoq, nàng gi, nhut jit byuq râ nghut lhê." ga luí, yhang lé tú taí ri.

²¹ Haú u, shiwa byu pé gi, Zahkariq noqkuq yhûm ahkaú má haú-í myáng shoq lúng byuq é hkyô lé láng maú nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhûm ahkaú má yhang myoqwup shing-rán rajung jung myàng ang bê lé, wú sê yu akô nghut ri.

²³ Ahkuí, Zahkariq gi, hkyangjong jong âng é buinyi ngap jáng, yhûm shut dum taú ló byuq bê. ²⁴ Hau htâng má, yhâng é yhumsîng myhí Elizabet gi, zogûng dut lò mù luí, hká le a htoq e za lhamó ngo hkyap yhûmhkaú má lúng byuq ri. ²⁵ Haú hkûn, yhang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dông mai huí sêng pyám byí é buinyi má, Yhang ge é hkyô lé, ngo lé tûn shit bê nghut ri." ga taí ri.

Yesuq Hku Lé Lô Berâ Gâ É Hkyô

²⁶ Ahkuí, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é myíng gi, Mariq gâ ri; yhang gi, Dawiq amyû mâ é Yosep gá su èq dúng tô é zomyi nghut ri. ²⁸ Maumang haú gi, Mariq chyáng jé jáng, "Mariq ê, nguingón nyí sháng gaq; Nàng, hkungsô wó nyi ri; Haú Yhumsîng Garaî gi, nàng eq rahá nyi nyi ri ò!" ga taí ri.

²⁹ Mariq gi, dang haú lé gyo sing nán mù, shí su gâ é dang gi, haí jung gá naú é nghut lhê lhú ga luí, myit

maú nyi ri. ³⁰ Haú hkûn, haú maumang lagyo gi, "Mariq ê, hkâgyuq, nàng gi, Garai Gasang é hí má myoqdong wó bê nghut ri. ³¹ Wú aq, nàng zogûng dut lò mù luí, yuqzo rayuq bau râ nghut lhê. Yhâng é myiêng lé gi, 'Yesuq' nghû luí, nàng myhíng byi ra râ nghut lhê. ³² Yhang gi, hpung bô sù dut râ nghut mù, Myhang htáng htúm Su é Yhangzo gâ é hui râ nghut lhê. Yhumsíng Garai Gasang gi, yhang lé, yhâng é îchýí îwa Dawiq é hkohkâm tanghkuq lé, byi râ nghut mù luí, ³³ Yhang gi, Yakup yhûm † lé hkâ-nhám le ru-up nyi râ nghut lhê. Yhâng é mingdán le htum nghu é joq râ a nghut." ga luí, yhang lé taí ri.

³⁴ Haú hkûn, Mariq gi, "Ngò gi, zomyi gyíng ru nghut ashí, haú gi, hkâsu wó dut râ lhú?" ga luí, maumang lagyo lé tú taí ri.

³⁵ Haú maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haú baú lò râ Chyoiyúng sù le gi, Garai Gasang é Yhangzo ga kó râ nghut lhê. ³⁶ Hau htoq agó, wú aq, náng é amyû su-isho baúdung myhí Elizabet lháng, mang bê le yuqgè zo wun to bê. Ahkuí, zogûng dut é lhamó hkyuq hkyap wàng bê nghut ri. ³⁷ Hkâsu mù gâ le, Garai Gasang a wó kut é haí le a joq." ga luí, yhang lé tú taí ri.

³⁸ Haú hkûn, Mariq gi, "Yhumsíng é jùnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tú taí ri. Hau htàng, maumang lagyo gi, yhang chyáng mai ló byuq bê.

Elizabet Lé Mariq Ê Huí É Hkyô

³⁹ Hau htàng hkâ-í a myáng má, Mariq gi, Yuda mau bum mau mâ é wà rawà shut hân hân e ló luí, ⁴⁰ Zahkariq é yhûm má wàng mù, Elizabet eq huí nyo lhûm ri. ⁴¹ Mariq é danghtê lé Elizabet wó gyo jáng, yhâng é unghkaú mâ é zoshâng gi, byam chyû lo ri. ⁴² Elizabet le, Chyoiyúng Woi-nyí byíng to mù luí, Mariq lé htê mó èq taí é gi, "Myiwe banshoq má, nàng gi, hkungsô wó dik sù nghut ri. Náng é unghkaú mâ é zoshâng le hkungsô wó nyi ri ô! ⁴³ Ngá Yhumsing é yhângnu ngá chyáng jé lé é jeju gi, hai é yanmai nghut bê lhú? ⁴⁴ Wú aq, náng danghtê lé wó gyo kat jáng, ngá unghkaú mâ é zoshâng gi, gabú luí byam chyû nyi ri. ⁴⁵ Haú Yhumsíng taí é dang gi, gè gè dik lò râ nghut lhê ga luí, lumjíng é myiwe gi, hkungsô wó nyi ri." gâ ri.

Mariq É Hkya-on Dang

⁴⁶ Haú hkûn, Mariq gi, "Ngá é i-myt mai haú Yhumsíng lé hkya-on nyi lhê,

⁴⁷ ngá é woi-nyí le, Garai Gasang ngá é hkyi yù Sù má gabú nyi lhê.

⁴⁸ Ngò Yhâng é jùnmyhí myit nyhum nyi é lé, Yhang myàng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyí sù, gâ nyi bekô râ nghut lhê.

⁴⁹ hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri, Yhâng é myiêng gi, chyoiyúng nyi ri ô.

⁵⁰ Yhang lé gyuq hoq nyí bâng é ahtoq má, Yhang shogyo nhikmyín é hkyô gi, pyat bán hkangmó jé shoq hkâ-nhám le joq nyi râ nghut lhê.

⁵¹ Yhâng é wum-o bo é loq èq mauhpo mù mó pé lé tûn shit bê.

Yhumsíng myit é hkyô má nghutbûn nyi é bang lé, Yhang lhoq pyo pyám bê.

⁵² Zaugun suwún wuí lé gi, zau zûng tanghkuq mai lhoq hkyô pyám mù,

i-myt nyhûm bang lé gi, lhoq myhâng bê nghut ri.

⁵³ Zòmut hui bang lé gi, ge é zoshuq gyi shoq byi tso mù,

sutzè wó bang lé gi, akôm nhang kat bê nghut ri.

⁵⁴ Nga-nhûng é îchýí îwâ pé lé taí tô é dang eq rajung za, Abraham eq yhangzo yhangshu pé lé, hkâ-nhám le shogyo nhikmyín nyi râ gâ é lé myit bûn nyi é yanmai,

Yhâng é dui-nhâng zoshâng Israelaq byu pé lé hku baú nyi ri."

ga luí, taí ri.

⁵⁶ Mariq gi, Elizabet chyáng lhamó sum hkyap kô nyi mù luí, yhûm shut dum taú lò byuq bê.

Wui-myhup Sará Yohan Baú É Hkyô

⁵⁷ Hau htàng, Elizabet gi, zoshâng bau râ buinyí jé mù, yuqgè zo bau bê. ⁵⁸ Yhang lé haú-í kô é jeju Yhumsíng tûn shit é hkyô lé, yhâng é yhumkyo buinùm wuì eq mung moq gumang wuì wó gyo kojáng, yhang eq rahá gabú nyi akô.

⁵⁹ Ahkuí shit nyí jé jáng, yhangmoq gi, zoshâng haú lé aphyo-kuq hpyit byi râ matú lé kôluí, yhâng wâ é myiêng eq rajung za, Zahkariq ga myhíng byi râ dâ akô.

⁶⁰ Nghut kôlháng, yhâng nu gi, "A nghut, Yohan nghû sheq myhíng râ nghut lhê." ga tú taí ri.

⁶¹ Yhangmoq gi, "Náng é amyû suisho má le, haú su gâ é myiêng rayuq le a bo wú shi." ga luí, yhang lé taí akô.

⁶² Haú hkûn, zoshâng haú lé hkâsu nghû myhíng nau lhê laq ga, yhâng wa lé loq lik lik shit mù myí akô.

⁶³ Zahkariq gi, kâ jung longpá dũng yù mù, "Yhâng é myiêng gi, Yohan nghut lhê." ga kâ shit ri. Haú mù,

lhunglhâng bang gi, maú byuq bum akô. ⁶⁴ Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri. ⁶⁵ Haú su dut é hkyô lé, wó gyô é awui ayâm lhíngghkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo ló bum akô. ⁶⁶ Wó gyô é lhunglhâng bang gi, haú hkyô lé yhumsing é i-myt unghkaú má kat to mù, "Zoshâng shí gi, hkâsu dut lò râ sù nghut lhê lhú?" ga myit wú nyi akô. Haí mù gâ le, haú Yhumsing é loq gi, yhang eq rahá nghut nyi é yanmai nghut ri.

† Yakup yhûm nghu e gi, Israelaq amyû lé gâ lhê.

Zahkariq É Myiqhtoi Dang

⁶⁷ Haú hkûn, zôshang é yhangwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

⁶⁸ "Haú Yhumsîng, Israelaq é Garai Gasang lé hkya-on sháng ô!

Haí mù gà le, Yhang gi, Yhang é amyû lé, lé kûm wú mù luí, lé hkyi yù bê nghut ri.

⁶⁹ Garai Gasang gi, Yhang é dui-nhang zoshâng, Dawiq é amyû mai nga-nhung é matú

wum-o bo é hkyi yu é hkyuî † lé, yuq htoq lô nhâng bê.

⁷⁰ Shí hkyô gi, a-nham pyat mai yhang é chyoiyúng myiqhtoi pé é nhut mai taí tô é eq rajung za nghut ri.

⁷¹ Haú hkyuî gi, nga-nhung lé nga-nhung é gye pé chyáng mai le, a nguí a nau bang banshoq é loq mai le, hkyi yù râ nghut lhê.

⁷² Íwa Garai gi, nga-nhung é îchyí îwa pé lé shogyo nhikmyin hkyô lé tân shit râ matú, Yhang byí tô é chyoiyúng dangshikaq lé a tô-myhí nghut ri.

⁷³ Haú gi, nga-nhung é chyiké Abraham lé byi tô é danggidiq nghut lhê.

⁷⁴ Nga-nhung lé gye pé loq mai hkyi yù râ eq, nga-nhung asak dui tô é buinyi banshoq má,

Yhang é hí má a gyuq a kyum é za, chyoiyúng é eq dingmán é hkyô mai,

Yhang lé wó dojaú nyí nhâng râ matú, Yhang jé lé é nghut lhê.

⁷⁶ Ngá zo ê, nàng gi, Yhumsing é hí má, e ló mù luí, Yhang é hkyô lé hen lajang byi râ sù nghut é yanmai, nang lé Myhang htáng htúm Su é myiqhtoi ga kó râ nghut lhê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byí é dong,

hkyi yu é hui râ hkyô lé taí kyo râ sù nghut lhê.

⁷⁸ Haí mù gà le, Garai Gasâng é shogyo nhikmyin é yanmai, napsûn bui †† gi, mauhkûng mai nga-nhung chyáng htoq lé lô râ nghut lhê.

⁷⁹ Yhang gi, mauchut hkaú ‡ eq shí wup hkaú má lúng to bang lé builoq su duqbó byi râ eq,

nga-nhung lé nguigón simsaq é hkyô shut shuí e ló râ sù nghut lhê." ga ri.

⁸⁰ Zoshâng haú gi, kô lò mù, woi-nyí wum-o bo lò luí, Israelaq byu pé chyáng htoq shit lo é buinyi jé shoq, yoso pé má nyi nyi ri.

Betlehem Wà Mó Má Yesuq Hku Lo É Hkyô

Mht 1:18-25

2 Buinyi haú pé má, Romaq hkoséng ming banshoq má é byù lhunglhâng bang gi, myíng jihpán kat râ matú, hkoséng Kehtaq Augustuq chyáng mai mungdang htoq ri. ² Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é

† Hkyi yu é hkyuî gi, Yhumsîng Yesuq lé taí é nghut ri. †† Napsûn bui gà é gi, Yesuq lé taí é nghut lhê. ‡ Mauchut hkaú gà é gi, Garai lé a sé mù woi-nyí má shi tô é bang lé gà lhê.

hkûn nghut ri. ³ Haú hkûn, byù du jup gi, myíng jihpán kat râ matú, ó le ô é wà shut lô bum akô.

⁴ Haú mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gà é Dawiq é wà shut, ⁵ yhang dúng tô é myiwe Mariq eq rahá myíng kat lhóm râ matú jé doq lô akô; Mariq kúm gi, gungloq laí to bê nghut ri. ⁶ Haú Betlehem má nyi tô ashí le, Mariq gi, zo hkû râ buinyi jé mù, zomún yuqzo lé bau bê. ⁷ Yhang gi, zoshâng haú lé panchoq èq htup mù no tso langhkang má lheq tô ri; haí mù gà le, bíng yhùm má yhangmoq nyi râ jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahkuî, haú ginwáng má é sau zúng zo bang gi, sau zúng jang má yhangmoq é sau hpúng lé, myín lé zúng nyi akô. ⁹ Haú hkûn, Yhumsîng é maumang lagyo gi, yhangmoq é hí má lé htoq yap shit to mù, Yhumsing é hpungwup shingkang gi, awui ayàm má duqbang lò luí, yhangmoq gyai gyuq bum akô. ¹⁰ Maumang lagyo gi, "Hkâgyuq kó, byù lhunglhâng bâng é matú, gyai yhang gabú é danglù, ngò nungmoq chyáng wun lé lo lhê. ¹¹ Hkû-nyí lhê buinyi má, Hkrisduq †† nghu é Yhumsîng nghut é hkyi yù Sù gi, Dawiq é wà má nungmoq é matú hku to bê. ¹² Nungmoq é matú kumlhá gi, zoshâng nyheqnú rayuq panchoq èq htup mù, no tso langhkang má lheq to lánng ra nghut lhê." ga luí, yhangmoq lé taí ri.

¹³ Haú hkûn jáng yhang, mauhkûng bang rajùm rayò htoq lô mù, maumang lagyo haú eq rahá Garai Gasang lé hkya-ôn é dang gi,

¹⁴ "Htoq tsáng myhâng má, Garai Gasang gi, hpungwup shingkang bo nyi sháng gaq ô!

Myigùng htoq má le, Yhang ô nau é byu pé má, nguigón é gi, hkâ-nhám le joq nyi sháng gaq ô" ga akô.

¹⁵ Maumang lagyo pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhung ê mù, ahkuî za Yhumsîng nga-nhung lé lé shit kyô laí lô bê hkyô lé é gôn wú sháng." ga luí, rayuq eq rayuq taí lhùm akô.

¹⁶ Hau htâng, yhangmoq gi, hân hân ê luí, Mariq eq Yosep lé le, no tso langhkang má lheq tô é zoshâng nyheqnú lé le, ê myàng akô. ¹⁷ Zoshâng haú lé, yhangmoq myàng kôjáng, zoshâng haú eq séng luí yhangmoq lé, lé taí kyô é dang lé, taí pyô kat bekô. ¹⁸ Wó gyô é bang banshoq gi, haú sau zúng bang taí kyô é dang lé, maú byuq bum akô. ¹⁹ Mariq kúm gi, dut lo é hkyô pé eq wó gyô é dang banshoq lé unghkaú má matsíng yù mù luí, nik nik myit wú nyi ri. ²⁰ Sau zúng bang gi, yhangmoq lé maumang lagyo taí kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum taú ló bekô nghut ri.

†† Grik dong Hkrisduq gà é gi, xù but hui Sù gà é lichyúm nghut mù, Hebre dong "Mesaia" gà é eq rajung za nghut lhê.

Yesuq Lé, Noqkuq Yhûm Má Shuî E É Hkyô

²¹ Zoshâng haû, shit nyí jé mù ahyo-kuq hpyit byi râ buinyí má, yhang unghkaû má a lúng shi mai mau-mang lagyo myhîng tô é myîng eq rajung za, yhang lé, "Yesuq" ga luî, myhîng byí akô.

²² Mosheq é tarâ eq rajung za, yhangmoq é lhoq san lhoq sêng é buinyi byíng jáng, Yhumsing é tarâ má, "Zomún yuqzo hkangmó gi, haû Yhumsing é hí má chyoiyúng sù wó nghû râ matú, Yhumsing chyáng ê ap byi râ lhê." † gâ é eq, ²³ "Hpûngkyui razúm, haû a nghut jáng, nghoqmyhû zo í du," †† hkungga byi râ lhê ga kê tô é eq rajung za, ²⁴ Mariq eq Yosep gi, zoshâng haû lé shui mù Yerusalem wà mó shut ê akô.

²⁵ Haû hkûn, Simeon gâ é mangzo rayuq, Yerusalem wà mó má nyi ri. Haû yuq gi, dingmán é eq tarâ cháng sù nghut mù, Israellaq lé nhik lhoq tíng râ ahkýing lé lánng nyí sù nghut ri; haû Chyoiyúng Woi-nyí le, yhang é ahtoq má nyi nyi ri. ²⁶ Yhang gi, haû Yhumsîng Hkris-duq lé a myang é za, shî râ a nghut, ga Chyoiyúng Woi-nyí èq tân shit tô é hui sù nghut lhê. ²⁷ Yhang gi, Chyoiyúng Woi-nyí èq shui mù, noqkuq yhúmhaû má ê jé nyi tô é hkûn lé, Mariq eq Yosep gi, zoshâng Yesuq lé htûng tarâ eq rajung za kut byi râ matú, noqkuq yhúmhaû má shuî wang ló kêjáng, ²⁸ Simeon gi, zoshâng lé loq èq lhom bún yû mù, Garai Gasang lé hkya-ôn é dang gi,

²⁹ "Yhumsîng ê, náng é danggidiq gi, dik bê nghut ri; hkû-nyí náng é jùn ngò gi, nguîngón é èq wó shi ló berâ nghut lhê.

³⁰ Haî mù gâ le, byû lhunglhâng bâng é matú, nàng lajang tô é hkyi yû hkyô lé, ngá myoq èq yhang wó myâng bê.

³¹ Haû gi, byû myû chângjup wó myâng râ matú, nàng lajang to byí é nghut mù,

³² tûngbaû pé lé, tengmán hkyô má búi su duqbó mù hpông shit râ matú le, náng é amyû Israellaq é hpung-wup shingkâng matú le nghut nyi ri." gâ ri.

³³ Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô. ³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shî gi, Israellaq ming mâ é byû myo myô é matú lingbat jowò eq myo myô é matú kô lò myhang lò râ hkyô le, byû myo myo taí he pyám râ kumlhá matú le, hkyin tô é hui sù nghut ri. ³⁵ Haû mù, byû myo myô é unghkaû má, myit mi-myit lé lhoq htoq shit râ nghut lhê. Náng é myit nhiklum má, shâm chûn èq htaû kyâng kat é su gâ é lé, nàng hui zo râ nghut lhê." ga taí ri.

³⁶ Ashe amyû mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyí pyat mai, yhanglâng eq nyhit zân za nyi luî, shit xe myi zân jé shoq chuimó mó nyi to sù nghut ri. ³⁷ Myiwe haû gi, noqkuq yhûm mai a htoq ê za, nyí myín a ga noqkuq dojaú nyí mù, zoshuq gám luî kyûdûng nyi ri. ³⁸ Simeon dang ban taí jáng, Annaq

gi, hui lé lô mù, Garai Gasâng jeju lé hkya-on luî, Yerusalem wà mó lé Garai Gasang hkyi yû râ gâ é lé, myit lum to bang lhunglháng lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taû ló bekô. ⁴⁰ Zoshâng haû gi, kô lò mù, wum-o bò lo é eq, hpaqchyî byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhaû Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poî jé hkangmó, zàn wui Yerusalem wà mó má é ê kut akô. ⁴² Yesuq raxe í zân jé jáng, poî haû, ê bo lòm ra htûngli joq é eq rajung za, yhangme wui yhanghpe wui doq ló akô.

⁴³ Haû poî buinyi lai luî, dum taû lo é hkûn, zoshâng Yesuq gi, Yerusalem wà mó má nyi gyó tô ri; nghut kôlhâng, yhângnu yhângwâ nhik gi, a sé kó. ⁴⁴ Yesuq lé rahá lo é luzúm wui chyáng bò râ su ngàm kômù luî, Yosep eq Mariq gi, ra-nyí buigyum chap sô ló bê htàng má, mung moq wui eq, sê lhûm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kêjáng, Yhang lé châng hô uchyang, Yerusalem wà mó má dum taû jé e ló bekô. ⁴⁶ Ahkuî, sum nyí nghû râ nyí sheq, noqkuq yhúmhaû má, tarâ sará pê é gung gung má zùng to mù, yhangmoq é dang lé gyo yû luî, dum taû myi myi kut nyi é lé, yhangnhik é myàng akô. ⁴⁷ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tû taí é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luî, yhângnu gi, "Ngá zo ê, haî mù luî ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é èq, nàng lé jaq châng ho pyám bê." ga luî, Yhang lé taí ri.

⁴⁹ Yhang gi, "Haî mù luî, ngo lé châng ho akô lhú? mauhkûng mâ é ngá Wâ é yhûm má ngò nyi râ lhê le gi, nungnhik a sé kó lhú?" ga luî, yhangnhik lé tû taí ri. ⁵⁰ Nghut kôlhâng, yhangnhik gi, Yesuq taí é dang lichyúm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taû jé gyó ló luî, yhangnhik nyo é dang lé gyo mù nyi tô ri. Yhângnu Mariq gi, dut laí lò bê hkyô pé banshoq lé, yhâng é myit nhiklum má matsîng tô ri. ⁵² Yesuq gi, hpaqchyî byéng-yá kûng zet lo é eq, gungkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

3 Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mù má, kut nyi akô. Haû hkûn, Garai Gasâng é mungdang gi, yoso má nyi tô é, Zahkariq é

† 2:22 Htoq Ló 13:2,12 †† 2:23 Nhung 12:8

yhangzo Yohan chyáng jé lé ri. ³ Haû mù, yhang gi, Yodan làng yàm jowò hkangmó má, sô jón wún luí, yubak mara hkyut pyám byí é hui râ matú myit lhîng mù, wui-myhup hkâm † yù râ hkyô lé, hko kyô nyi ri.

⁴ Haû gi, myiqhtoi Esai-aq laiká má,
"Haû yoso má, byù rayuq garû taí é htê gi,
'Haû Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuihkung langhkop hkangmó lé lhoq pyíng ra râ nghut lhê;

bùm eq wingkáng hkangmó lé hpyit pyám ra râ nghut lhê;

agoí aguq é hkyô hkat hkangmó lé lhoq nyhâng ra râ nghut lhê;

ahkung ahkop dut é hkyô hkat hkangmó lé lhoq rhá ra râ nghut lhê.

⁶ Haû hkûn, byù banshoq gi, Garai Gasâng é hkyi yù hkyô lé myàng râ nghut lhê." ††
ga luí, kê tô é eq rajung za nghut ri.

⁷ Shiwa byù rajung rayò gi, Yohan é loq má wui-myhup hkâm yù râ ga luí htoq lé lô kôjáng, Yohan taí é gi, "Duq htan é lhangmuí amyú pé † è, jé lô râ yubak dam mai wó hpang lut kó sháng gaq ga, nungmoq lé ó yuq taí pôn é lhú? ⁸ Myit lhîng hkyô eq gingdán é ashi zui keq. 'Nga-nhúng gi, Abraham é yhangzo yhangshú pé nghut lhê.' †† nghû luí, yhumsing é i-myyit unghkaû má hkâtaí kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ⁹ Ahkuí lháng, Garai Gasang gi, Yhâng é wazung lé haû sikkâm wang pé má tô to bê nghut ri; haû mù, ge é ashi a zui é agàm hkangmó lé gi, htuq lhêng pyám mù, myi má dú kat pyám râ nghut lhê." gâ ri. ††

¹⁰ Haû hkûn, shiwa byu pé gi, "Haû nghut le gi, ngamoq hkâsu kut le gè râ lhú?" ga luí, yhang lé myí akô.

¹¹ Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tû taí kat ri.

¹² Kang guq bang le, wui-myhup hkâm yù râ ga lé lô mù, "Sarâ è, ngamoq gi, hkâsu kut le ge râ lhú?" ga luí, yhang lé myí akô.

¹³ Yhang gi, "Nungmoq hkyui yù râ masat tô é htoq lai shoq hkâyû kó." ga luí, yhangmoq lé taí ri.

¹⁴ Gyezô pé ra-am le, "Ngamoq gi, hkâsu kut le gè râ lhú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpau èq gé bûn nyi keq." ga luí, yhangmoq lé taí ri.

¹⁵ Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haû yuq nghut lhê laq ga yhumsing é i-myyit unghkaû má myit wú nyi bum

† Wui-myhup hkâm gâ é gi, baptisma lé gâ é nghut lhê. †† 3:6 Esai 40:3-5 † Lhangmuí amyú pé gâ é gi, Lukaq 3:7-10 má bo é Hparishe eq Saduke pé lé taí é nghut ri. †† Nga-nhúng gi, Abraham é yhangzo yhangshú pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. †† Bun zo shí lhûm é lichyúm gi, myit a lhîng bang lé, Garai Gasang jéyáng é buinyi jé râ nghut lhê ga naû é nghut ri.

akô. ¹⁶ Haû hkûn, banshoq bang lé Yohan taí é gi, "Ngò gi, nungmoq lé, wui èq za wui-myhup hkâm byí lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhâng é hkyi-tsung tui lé hpyí râ lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê. ¹⁷ Yhang gi, loq má byò chung to mù, guq chyârâng mâ é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." gâ ri. ††¹⁸ Haû mù, Yohan gi, byù haû bang lé gotû dang myo myo èq lhoq pun lhoq kying mù, gabú danglù lé hko kyô nyi ri.

¹⁹ Nghut kôlhang, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mù banshoq é yanmai, Yohan gi, yhang lé tân mhoqshit bê nghut ri. ²⁰ Mara haû pê htoq agó, Herut dum kut jat yu é mara gi, Yohan lé htóng má lhûng kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

²¹ Yohan lé htóng má a lhûng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdûng nyi le, mauhkúng bóng lô mù, ²² haû Chyoiyúng Woi-nyí gi, hpûngkyui gunghkyâng sù é dông mai Yhâng ah-toq má lé gyó nô ri. Haû hkûn, "Nàng gi, Ngò chyitdap é Ngá zo nghut lhê; Nàng é ahtoq má Ngò gabú myit ngón nyi lhê." ga mauhkúng mai danghtê htoq lo ri.

Yesuq É Byù Xik Shap Kyô É Hkyô

Mht 1:1-17

²³ Yesuq gi, Yhang mù zuí hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, ²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹ Eliakim gi,

††† Haû eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Eruk é yhangzo, Eruk gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, ³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

Yesuq Lé Tsadán Gunlaú É Hkyô

Mht 4:1-11; Mrk 1:12-13

4 Yesuq gi, Chyoiyúng Woi-nyí èq byíng mù, Yodan làng mai dum taû lo é hkûn, Chyoiyúng Woi-nyí gi, Yhang lé yoso shut shuî e ri. ² Haú má, Yesuq gi, buinyí myi xê nyí jé shoq, nat Tsadán èq gunlaú é huî ri. Buinyí haú gyoro má, Yesuq gi, haî le a zô é yanmai, zòmüt hui bê nghut ri.

³ Haú mù luî, nat Tsadán gi, "Nàng, Garai Gasâng é Yhangzo nghut le gi, luqgok shî lé muk dut nhâng aq." ga luî, Yhang lé taî ri.

⁴ Haú hkûn, Yesuq gi, "Byù gi, muk èq za asak duì rã a nghut." ga luî, Chyúmdang má kã tô ri." [†] ga yhang lé tũ taî ri.

⁵ Hau htâng, nat Tsadán gi, Yesuq lé, gyai yhang myhang é bùm htoq má shuî doq ló mù, mingkan má joq é mingdán pé banshoq lé razup má za tũn shit luî,

⁶ "Shî ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkãsu mù gã le, haú pé banshoq gi, ngo lé ap byí to bê nghut mù, ngò byí nau é sũ ó yuq lé nghut kôlhang, byi rã nghut lhê. ⁷ Haú mù, Nàng, ngo lé noq é nghut jáng, shí pé banshoq Náng é dut rã nghut lhê." ga, Yesuq lé taî ri.

⁸ Haú hkûn, Yesuq gi, "Haú Yhumsîng náng é Garai Gasang lé za, nàng noqkuq dojaú ra rã nghut lhê." ^{††} ga luî, Chyúmdang má kã tô ri." ga luî, yhang lé tũ taî ri.

⁹ Nat Tsadán gi, Yesuq lé Yerusalem wã mó má shuî é mù, noqkuq yhum je myhang é shũhtâng htoq má yap nhang to luî, "Nàng, Garai Gasâng é Yhangzo nghut le gi, shí mai byam gyó kat wú aq. ¹⁰ Hkãsu mù gã le, 'Nang lé upzúng byí nyi rã matú, Garai Gasang gi, Yhâng é maumang lagyô pé lé taî to rã nghut mù,

¹¹ luqgok má náng é hkyî a ló htung shoq, yhangmoq é loq èq Nang lé lhóm bún yû kó rã nghut lhê.' [‡] ga luî, Chyúmdang má kã tô ri." ga taî ri. ¹² Nghut kôlhang, Yesuq gi, "Haú Yhumsîng, nungmoq é Garai Gasang lé, wó chyam wú rã a nghut." ^{††} ga luî, Chyúmdang má bo tô ri." ga, yhang lé tũ taî ri.

¹³ Nat Tsadán gi, gunlaú é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Wã Bang He-ngik Pyâm É Hkyô

Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woi-nyí wum-o byíng é èq Galile mau shut dum taû lo ri. Haú mau jowò hkangmó má, Yhâng é hkyô lé taî pyo ló bùm bekô.

¹⁵ Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taî hkya-ôn nyi bum akô.

¹⁶ Hau htâng má, Yhang nyi kô lo é Nazaret wã má dum taû jé ló bê; Yhang gi, hkã-nhám le kut nyi é eq rajung za, Bánno buinyí ^{††} lé tarajong má wang ê mù, laiká nghap rã ga toq yap é hkûn, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,

¹⁸ "Yhumsîng é Woi-nyí gi, ngá é ahtoq má nyi nyi ri; hkãsu mù gã le, asho awuî é bang lé gabú danglù hkô kyo rã matú, Yhang ngo lé hkyin yù bê.

Htóng lúng bang lé lhoq htoq rã hkyô eq, myoqjit bang lé myoq dum myàng nhâng rã hkyô hkô kyo rã matú le,

zik zo huî é bang lé nhang kat nhâng rã eq,

¹⁹ Yhumsîng, Yhâng é byu pé lé hkyi yù rã ahkýing zanwut lé hkô kyo rã matú le, Yhang, ngo lé nhang kat bê nghut ri." ^{†††}

ga luî, kã tô é jowò lé myang záng mù nghap ri.

²⁰ Hau htâng, Yesuq gi, chyúmding haú lé ding mù, shuî-u sũ lé tau byí pyám luî, dum zung tô ri; tarajong mã é byù lhunglhâng bang gi, Yesuq lé chôm wú tô é hkûn, ²¹ Yesuq gi, "Nungmoq é nohkyap má, ahkuî wó gyô é Chyúmdang shî gi, hkû-nyí yhang lo dik bê." ga luî, yhangmoq lé taî hi kat ri.

²² Lhunglhâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluî, "Shí yuq gi, Yosep é yhangzo a nghut lhú?" ga taî bum akô.

²³ Haú mù luî, Yesuq gi, "Nungmoq gè gè yhang, 'Chi sará ê, yhumsîng gùng lé lhoq ge yù aq.' ^{†††} gã é sanghkyang èq le, 'Nàng, Kaperna-um wã má kut shit wú é hkyô ngamoq wó gyo bê, haú eq rajung za, nàng, náng é yhum mau má le, kut shit wú aq.' ga luî le, ngo lé taí kó rã nghut lhê." ga taî ri.

²⁴ Yhang dum xoq taî é gi, "Ngò, nungmoq lé teng za taí kôlé, myiqhtoi ó yuq le yhumsîng é yhum mau má

[†] 4:11 Hkyá-on 91:11-12 ^{††} 4:12 Tarã Pun 6:16 ^{†††} Bánno buinyí gã é gi, Yudaq byu pé nòmu é buinyí lé gã lhê. Ahkuî lhê é dông ga jáng, Bánno buinyí gi, bat htoq hkyuq nyí lé àng ri. ^{†††} 4:19 Esai 61:1-2 ^{††††} Chí sará ê, yhumsîng gùng lé lhoq ge yù aq gã é sanghkyang gi, "Mesaia nghut le gi, mauhpo mù wó tũn shit rã nghut lhê." gã é nghut lhê.

myoqdong wó wú é a nghut. ²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô. ²⁶ Nghut kôlhang, haú ming má súm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta wà mâ é, chuimó myhí rayuq chyáng sheq nhang kat byí é nghut lhê. ²⁷ Myiqhtoi El-isha é pyat má le, Israelaq ming má, manggâm dap é byù myo myo nyi kôlhang, yhangmoq chyáng mâ é rayuq le wó sân-yúng yù kô é a nghut; Suriq byù Naman ga sù tûngbaù hpó za sheq wó sân-yúng é nghut lhê." ga taí ri.

²⁸ Tarajong hkaù mâ é lhunglhang bang gi, haú hkyô lé wó gyo kôjáng, gyai yhang nhik-yo nau bùm kômù, ²⁹ toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq mâ é gampyoq má, ê chyûn hpyit hkyô pyám rà ga shuí e ló akô. ³⁰ Nghut kôlhang, Yesuq kúm gi, byù hpûng haú mai so hkoq htoq ló byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

³¹ Hau htàng, Yesuq gi, Galile mau mâ é Kaperna-um wà má jé ê mù, Bánno buinyi má byu pé lé mhoqshit hi ló bê nghut ri. ³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

³³ Yesuq, tarajong hkaù má mhoqshit byí nyi é hkûn, nat gang wang júng é byù rayuq htê mó o mó èq taí é gi, ³⁴ "Ê, Nazaret wà byù Yesuq ê, ngamoq gi, Nàng eq haí sêng lhê lhú? Ngamoq lé lhoq hten rà matú, Nàng jé lé é nghut lhê lhú? Nàng gi, Garai Gasâng é Chy-oiyúng Sù nghut é lé, ngò sê lhê." gâ ri.

³⁵ Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gùng má lhoq lheq to mù, a nô nhang é za, yhâng chyáng mai htoq ló byuq ri.

³⁶ Haú mù luí, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lhú? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhùm bum akô. ³⁷ Haú hkûn, haú mau mâ é awui ayàm jowò hkangmó má jàm shoq, Yhâng é hkyô lé taí pyo hú ló bùm bekô nghut ri.

Yesuq Nòhpyo Lhoq Gê Byí É Hkyô

Mht 8:14-17; Mrk 1:29-34

³⁸ Yesuq gi, haú tarajong mai toq ló mù, Simun é yhùm má wang ló ri. Simun é yhâng-aumó gi, ali gyai nyé no nyi é nghut mù luí, lhoq gê byí rà matú, Yesuq lé garúm dung byí akô. ³⁹ Yesuq gi, Simun é yhâng-aumó nam má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htàng rayuq é ahtòq má Yesuq gi, loq ke byi luí, lhoq gê byí ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaù má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq rà matú châng hkùm wú akô. ⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo rà rà ashí, haú é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri. ⁴⁴ Haú mù, Yesuq gi, Yuda mau mâ é tarajong pé má, hko kyô wún nyi ri.

Sâng-hi Ji Yù Huí É Chángzô Pé

Mht 4:18-22; Mrk 1:16-20

5 Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo rà ga, shiwa byu pé, Yhâng chyáng chyín chyap wang lé lô kô é hkûn, ² nhông gin-gau yàm má lhaí razúm joq tô é lé, Yhang myang kat ri. Ngogûn dú bang kúm gi, lhaí mai htoq mù, yhangmoq é gùn pé lé chí nyi akô.

³ Yesuq gi, Simùn é lhaí má wàng mù gin-gau mai racyit lhoq kang nhâng luí, haú lhaí htoq má zung to mù, shiwa byu pé lé mhoqshit taí kyô nyi ri.

⁴ Dang ban taí jáng, Yesuq gi, Simun lé, "Wui nik é shut hui luí, ngozo wó kông yù rà matú, nungmoq é gùn pé lé dú hkyô kat keq." ga taí ri.

⁵ Simun gi, "Yhumsíng ê, ngamoq amàn ra-myin mau shikut wú kôlhang, haí le a wó; nghut kôlhang, náng dang é yanmai, ngò gùn dú hkyô kat rà nghut lhê." ga tú taí ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló rà su dut é yanmai, ⁷ lhaí gó lhum mâ é luzúm wuí lé, lé garúm yù rà matú loq lik lik kat kôjáng, haú bang lé lô mù, haú lhaí í lhum aluq myup ló shoq ngozo lé kat pyíng bekô.

⁸ Simun Petruq gi, haú lé myàng jáng, Yesuq é hkyí wang má hkyihput htuq mù, "Yhumsíng ê, ngá chyáng mai ló byuq aq, haí mù gâ le, ngò gi, yubak dap é byù nghut nyi lhê." ga taí ri. ⁹ Haí mù luí gâ le, Simun le, yhang eq nyi tô é lhunglhang bang le, haú su ngozo wó yu é yanmai, maú nyi bùm kômù nghut ri. ¹⁰ Simùn é luzúm nhik, Zebedi é yhangzo Yakuq eq Yohan le, haú su chôm maú byuq akô.

Hau htàng, Yesuq gi, "Hkâgyuq, ahkuí mai nàng gi, byù lé châng kóng sù dut rà nghut lhê." ga luí, Simun lé taí ri. ¹¹ Yhangmoq gi, wuiyàm má jé jáng, lhaí pé eq yhangmoq é zè banshoq lé tô pyâm to luí, Yesuq htàng cháng bekô nghut ri.

Manggâm Dap Bang Lé Yesuq Lhoq Gê Byí É Hkyô

Mht 8:1-4; Mrk 1:40-45

¹² Radàm lé, Yesuq gi, wà rawà má nyi tô lé, ragùngdú é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luí, "Yhum-sîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

¹³ Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoi." ga taí ri; haú hkûn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taí hkûm kat ri.

¹⁵ Nghut kôlhang, Yesuq é hkyô gi, je riyhang taí pyo hû jam ló mù luí, shiwa byù rajùm rayò gi, Yhâng é dang gyo râ matú le, yhangmoq é nõhpyo lhoq gê byí nhâng râ matú le, lé zup míng tô akô. ¹⁶ Yesuq kúm gi, Yhang baú tsik za yoso shut htoq ê mù, kyû ê dung dung kut ri.

Gùngjum Shí Sû Lé, Yesuq Lhoq Gê Byí É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsîng Garaí é wum-o a-tsam le nõhpyo lhoq gê râ matú Yesuq eq rahá nghut nyi ri. ¹⁸ Haú hkûn, byù ram gi, gùngjum shí sù rayuq lé taphkang mai waq lé ló kômù, haú yuq lé, yhúmhkaú má nyi tô é Yesuq é hí má, wó lheq byi shoq ga hkyô ho nyi akô. ¹⁹ Byù lùm myô chyín chyap to mù, haú nõ sù lé hká dông le a wó shuí wàng kôluí, haú yhumhkûng htoq shut waq doq ló mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

²⁰ Yesuq gi, yhangmoq é lumjîng myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

²¹ Haú hkûn, Hparishe pé eq tarâ sará pé gi, "Shí su ga luí, Garai Gasang lé rhoí dang taí é sù gi, ó yuq wá nghut lhê lhú? Garai Gasang za a nghut jáng, yubak mara wó hkyut pyám byi sù gi, ó yuq wá nghut lhê lhú?" ga luí, myit sôn wuî nyi bum akô.

²² Yesuq gi, yhangmoq myit sôn wuî nyi é hkyô lé sé mù, "Nungmoq é i-myt hkaú má, haí mù shí pé lé myit sôn wuî nyi akô lhú? ²³ 'Náng é yubak mara lé hkyut pyám byi bê.' nghú taí râ eq, 'Toq luí, hkyô so aq.' nghú taí râ má, hká hkun je taí lhê lhú? ²⁴ Nghut kôlhang, haú Byu Yhangzo † gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haú gùngjum shí sù lé, "Ngò, nàng lé taí bá, toq aq, náng é taphkang yu chûng luí, yhûm taú

† Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

ló aq hkoi." ga taí ri. ²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chûng luí, yhâng é yhûm shut Garai Gasang lé hkya-on kungtôn uchyang ló byuq bê. ²⁶ Byù banshoq bang gi, gyai maú byuq kômù luí, Garai Gasang lé hkya-on kungton akô nghut ri. Yhangmoq gyai gyuq maú dik é eq le, "Hkû-nyí, nga-nhúng, mauhpo amû pé lé myàng bê." ga taí nyi akô.

Yesuq Gi, Lewiq É Yhûm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé é myàng mù, haú yuq lé, "Ngá htâng cháng aq." ga taí ri. ²⁸ Lewiq gi, haú mâ é zè banshoq lé tô pyâm to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhûm má Yesuq é matú zoshuq poí mó kut byí ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng mâ é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lhú?" ga, Yhâng é chángzô pé lé mara hûn dang taí akô.

³¹ Yesuq gi, yhangmoq lé, "Wángzán bang chi sará a ra kó, nõhpyo hui bang za sheq ru râ lhê. ³² Ngò gi, dingmán bang lé wut yù râ matú jé lé é a nghut, yubak dap bang myit lhîng râ matú sheq jé lé é ru nghut lhê." ga tû taí ri.

Zoshuq Gám Hkyô Eq Séng Luí, Yesuq Taí É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lhú?" ga Yesuq lé taí akô.

³⁴ Yesuq, yhangmoq lé tû taí é gi, "Bíng pé gi, lusik eq rahá nghut nyi to ashî hkûn, yhangmoq lé zo shuq wó gám nhâng râ lhú? ³⁵ Nghut kôlhang, lusik †† lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê." gâ ri.

³⁶ Dangtú dông mai le, Yesuq, yhangmoq lé taí é gi, "Mebu sik mâ é lîng cheq yû mù, mebu xau má hpo é gi, ó a kut wú kó; haú su kut é nghut jáng, mebu sik lé le lîng cheq pyâm é dut mù, pán jap sik le mebu xau eq du lhum râ a nghut. ³⁷ Tsibiyiq wing asik lé le, shokuq htûng axau má ó a kut wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê. ³⁸ Haú su a dut shoq gi, tsibiyiq wing asik lé, shokuq htûng asik má kat ra râ nghut lhê. ³⁹ Tsibiyiq wing axau shuq nyí bê sù gi, asik lé a shuq nau nghut râ; hkâsu mù gâ le, 'Axau sheq je nghâm ri.' ga taí râ." gâ ri.

†† Lusik gâ é gi, Yesuq lé taí nau é nghut lhê.

Bánno Buinyì Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

6 Bánno buinyì ra-nyí má, Yesuq gi, Yhâng é chángzô pé eq yò hkaû mai sô lâi lô é hkûn, Yhâng é chángzô pé gi, kyôshi ratsuí langshap yû mù, loq èq nè hpuq zô akô. ² Haû mù luî, Hparishe pé ram gi, "Bánno buinyì má a ge kut jung lé, nungmoq gi, haî mù luî haû su kut akô lhú?" ga taî akô.

³ Yesuq gi, yhangmoq lé, "Dawiq lháng gi, yhâng htâng châng é bang eq rahá zòmút huí é hkûn, hkâsu kut é hkyô lé, nungmoq a nghap wú kó lhú?" ⁴ Dawiq gi, Garai Gasâng é yhûm † hkaû má wang ê mù, hkyangjông pé mai lai luî, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lhú?" ga tû taî ri. ⁵ Hau htâng, Yhang gi, "Haû Byu Yhangzo gi, haû Bánno buinyi é Yhum-sing nghut lhê." ga yhangmoq lé taî ri.

Loq Jum Shî Sû Lé Yesuq Lhoq Gê Byî É Hkyô

Mht 12:9-14; Mrk 3:1-6

⁶ Gotû Bánno buinyì má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haû má nyi tô ri. ⁷ Haû hkûn, tarâ sará pé eq Hparishe pé gi, Bánno buinyì má nõhpyo lhoq gê byi râ lhú ga luî, Yhang lé mara wó hûn shoq ga gyám wú nyi akô. ⁸ Yesuq kúm gi, yhangmoq é i-myt lé sé sù nghut luî, loq jum shî sù lé, "Toq mù, ban-shoq bâng é hí má, yap shit aq." ga taî kat ri. Haû yuq le, toq mù yap tô ri.

⁹ Haû hkûn, Yesuq gi, "Ngò nungmoq lé myî wú kôlé, Bánno buinyì má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lhú?" ga luî, yhangmoq lé taî ri.

¹⁰ Hau htâng má, yhangmoq banshoq lé lhing wú mù, haû loq jum shî sù lé "Náng é loq nyhang kat aq." ga taî kat é hkûn lé, yhang le loq nyhang kat luî, yhâng é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nhô chik yhang nhik-yo naû kômù luî, "Yesuq lé hkâsu wá kut pyám râ lhú?" ga luî, rayuq eq rayuq taî lhûm nyi akô.

Raxe Í Yuq Lé Lagyo Ga Myhîng Yu É Hkyô

Mht 10:1-4; Mrk 3:13-19

¹² Haû yoq ra-nyí má, Yesuq gi, kyûdung râ ga bùm shut htoq e lô luî, ra-myin mau Garai Gasang lé kyûdung nyi ri. ¹³ Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luî, lagyo pé ga myhîng to byî ri. ¹⁴ Haû bang gi, Yesuq èq Petruq ga myîng myhîng byî é Simun eq, yhanggu Andre, Yakuq eq Yohan, Hpilip eq Barhtol-ume, ¹⁵ Mahte eq Htomaq, Alhpe é yhangzo Yakuq eq

† Garai Gasâng é yhûm nghu é gi, Yerusalem wà mó má joq é saksé zúm lé gâ é nghut lhê.

Zelutuq †† dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

¹⁷ Yesuq gi, yhangmoq eq rahá gyó lô mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuîshuq lung-aû ayàm mâ é Turuq myuq eq Sidun myuq mâ é bang, rajùm rayò gi, ¹⁸ Yhâng é dang gyô yù râ eq yhangmoq é nõhpyo lhoq gê nhâng râ matú, rahá za zup míng tô akô. Agè ashop é nat èq zing-ri huí é bang le ge byuq akô. ¹⁹ Yhâng é gùng mai htoq é wum-ô èq byù banshoq lé lhoq gê byî nyi é yan-mai shiwa byu pé le Yhang lé wó záng shoq ga, ho nyi akô.

²⁰ Haû hkûn, Yesuq gi, Yhâng é chángzô pé lé wú kat luî taî é gi,

"Myùng bang nungmoq gi, hkungsô wó nyi ri, hkâsu mù gâ le, Garai Gasâng é mingdán † gi, nungmoq é mingdán nghut nyi ri.

²¹ Ahkuî, zòmút wuîshit huí nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó râ nghut lhê.

Ahkuî, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wuî kó râ nghut lhê.

²² Haû Byu Yhangzô é yanmai nungmoq lé su èq a nguí é, lhoq hpyoq lhoq kâng é, hoq hpu nhang é, agè ashop nghut é dong jihpoi gamhkui huí é hkûn, nungmoq gi, hkungsô wó nyi ri.

²³ Haû hkûn lé, gabú byam chyû nyi keq, hkâsu mù gâ le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taî lhê, hkâsu mù gâ le, yhangmoq é îchyí îwa pé le myiqhtoí pé †† lé haû su kut wú bekô."

²⁴ Nghut kôlhang, sùt wó bang nungmoq gi, dingnyé wó râ, hkâsu mù gâ le, nungmoq gi, yhum-sing gùng má nhik shî nhik dik é hkyô lé huí yù bekô.

²⁵ Ahkuî, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gâ le, nungmoq zòmút wuîshit é hui kó râ nghut lhê.

Ahkuî, wui nyi é bang nungmoq gi, dingnyé wó râ, hkâsu mù gâ le, iyon yôn é eq ngaubyi ngau-nhap htoq é hui kó râ nghut lhê.

²⁶ Byù banshoq bang, nungmoq lé ge é byù ga kôjáng, nungmoq gi, dingnyé wó râ,

hkâsu mù gâ le, yhangmoq é îchyí îwâ pé le, myiqh-toi pyoq pé †† lé, haû su ga taî wú bekô.

†† Zelutuq gâ é lichyúm gi, yhum-sing zui saî é hkyô má gyai yhang myit lòm shirong é sù lé ga lhê. Haû u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê. † Garai Gasâng é mingdán gâ é gi, Garai Gasang up é lé gâ lhê. †† Myiqhtoí pé le zing-ri huí é yanmai, yhangmoq chyunghuq wó nyi akô. Haû eq rajung za, jamjau huí é bang nga-nhúng le chyunghuq wó râ nghut lhê. †† Myiqhtoí pyoq pé gi, Garai Gasang jéyáng é hui râ.

Gye Pé Lé Chyitdap Râ Hkyô

Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò taí kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq; ²⁸ nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq. ²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; ³⁰ nang lé rajung jung dîng é sù lé le, byî pyám aq; náng zè yu pyám byî é su chyáng mai le, hkâdûng yù lo. ³¹ Nungmoq ô nau é dông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó râ lhú? Yubak dap bang le, yhumsîng lé chyitdap é bang lé gi, chyitdap nyi akô. ³³ Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó râ lhú? Yubak dap bang le haù su kut nyi akô. ³⁴ Supé lé zè chyî byî le, dum wó tau byi râ su dut é bang lé za, chyî byî le gi, nungmoq é matú hai akyû bò kó râ lhú? Yubak dap bang lháng chyî byî é myhó dum wó yù shoq, yubak dap é bang lé chyî byî akô. ³⁵ Nghut kôlhang, nungmoq gi, nungmoq é gye pé lé chyitdap mù, ge é dông kut byî nyi keq. Dum wó tau yù râ lé myoq a byu é za, chyî ngho byi keq; haù su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é İwa Garai Gasang shogyo nhikmyin sê é su, nungmoq le shogyo nhik-myî nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haù jáng, nungmoq le jéyáng é a hui kó râ nghut lhê. A doqdân é za nyi keq; haù jáng, nungmoq le doqdân é a hui kó râ nghut lhê. Mara hkyut byi keq; haù jáng, nungmoq le mara hkyut byî é hui kó râ nghut lhê. ³⁸ Byi keq, haù jáng, nungmoq le dum byî é hui kó râ nghut lhê. Mán é bûng mai byíng mui shûn shoq nhûn chyîng, dún chyîng kat mù, nungmoq é tanghkoí hkaù má lik kat byî é hui kó râ. Hkâsu mù gâ le, nungmoq lik byî é bung èq, nungmoq lé dum lik byi râ nghut lhê." gâ ri.

³⁹ Hau htoq agó, Yhang dangtú ralhum dông yhangmoq lé dum taí é gi, "Myoqjit sù gi, myoqjit sù lé hkyô wó tûn shit lhê lhú? Yhangnhik í yuq é donghkong má byit gyó kó râ nghut lhê, a nghut kó lhú? ⁴⁰ Jongzo gi, sará htoq gyaù râ a nghut; nghut kôlhang, gúm shoq mhoq yù bê sù ó nghut kôlhang, yhumsîng é sará su dut râ nghut lhê.

⁴¹ Yhumsîng myoq hkaù má lúng tô é siktúm † lé lháng a myit wú é nhîng, haì mù luí, nunggu nungmâng é myoqwàng †† lé myang lhê lhú? ⁴² Yhumsîng é

† Siktúm nghu e gi, yubak mara kô é lé taí lhê. †† Myoqwàng nghu e gi, yubak mara atiq azo lé taí é nghut lhê.

myoq má lúng tô é siktúm lé lháng a myàng sù nhîng, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghu luí, náng é gumang hpó lé hkâsu wó taí râ lhú? Gegùn labyoq kut sù ê, náng é myoq má lúng tô é siktúm lé hí choq pyám aq. Haù jáng sheq, nunggu nungmang é myoq má wang tô é myoqwàng lé choq pyám byi râ matú, nàng san za myàng râ nghut lhê.

Agàm Eq Ashi

Mht 7:17-20; 12:34-35

⁴³ A ge é ashi zuí é, ge é shigâm hkâmá le a joq. Ge é ashi zuí é, a ge é shigâm le a joq. ⁴⁴ Haù mù luí, shigâm hkangmó lé, zuí é ashi lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú. ⁴⁵ Ge é sù gi, yhumsîng é i-myit unghkaù mâ é sutdò mai ge é zè pé lé lhoq htoq shit lhê. Agè ashop é sù gi, yhumsîng é i-myit unghkaù mâ é agè ashop é sutdò mai, agè ashop é zè pé lé lhoq htoq shit lhê. Haì mù gâ le, yhâng é i-myit unghkaù má byíng mui tô é lé za, yhâng é nhut mai taí htoq lo é nghut lhê.

Luqhtân Htoq Má Yhûm Saí Sù Eq Myî Chîn Dum Má Yhûm Saí Su É Hkyô

Mht 7:24-27

⁴⁶ Ngò taí é eq rajung za lháng a wó châng kut kô é nhîng, haì mù luí, nungmoq Ngo lé 'Yhumsîng ê, Yhumsîng ê.' nghu nyi akô lhú? ⁴⁷ Ngá chyáng lé mù, ngá dang gyô yù luí, châng kut é sù ó nghut kôle, hkasú é sù eq wuí é lé ngò nungmoq lé shit kyo kôle. ⁴⁸ Haù yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuí jê lò luí wuibaù pê èq yhûm haù lé lo gùn kôlhang, ging ging tíng tíng saí to bê nghut luí, haù lé a wó gun nhún. ⁴⁹ Ngá dang gyô yù mù, a cháng sù gi, apûn awang a saí é za myî chîn dum má wahpang yhûm saí sù eq wuí nyi ri. Wuibaù pê èq yhûm haù lé lo gun kat é eq, haù hkûn jáng, lêng gyop byuq ri. Yhûm haù byoq hten byuq é gi, yù whuí a bò loshoq dut byuq râ nghut lhê." gâ ri.

Romaq Gyezau Rayuq É Lumjîng Myit

Mht 8:5-13; Yhn 4:43-54

7 Yesuq gi, shiwa byu pé lé ban mhoqshit é htâng má, Kaperna-um wà shut wang ló ri. ² Haù hkûn, Romaq gyezau rayuq é chyitdap dui-nhâng zoshâng gi, shî-nò no nyi ri. ³ Haù u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gè byi râ matú, Yesuq lé ê ji lò keq ga, Yudaq suwún wuí lé nhang kat ri. ⁴ Haù bang gi, Yesuq chyáng jé ê kô é hkûn, "Yhang gi, nàng shí hkyô kut byi râ matú gingdán é sù, yhang nghut nyi ri; ⁵ hkâsu mù gâ le, yhang gi, nga-nhûng amyû lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dîng wut nyi akô. ⁶ Haù mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuî lé taí nhang kat é gi, "Yhumsîng Yesuq ê, náng gûng lé hkálhoq hkyik lo. Nàng, ngá é laishîn-htâng má, lé nang rà lháng ngò má a gingdán. ⁷ Haú mù, ngò, náng chyáng jé lé rà matú gingdán é sù a nghut; Nàng, dang rahkun za taí kat laq, haú hkûn, ngá é dui-nhâng zoshâng ge ló rà nghut lhê. ⁸ Hkâsu mù gà le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'É aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gà ri.

⁹ Yesuq gi, dang haú lé wó gyo jáng, haú yuq é hkyô lé maú byuq luî, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lháng, shî í lumjîng é sù lé, Ngò a myang wú." ga taí ri. ¹⁰ Nhang kat é bang yhûm má dum taú jé jáng, no nyi é dui-nhâng zoshâng gi, ge to lánng é lé ló myang akô.

Shî Sù Lé Dum Lhoq Tui É Hkyô

¹¹ Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gà é wà shut e ló akô. ¹² Haú wà wàng hkum má jé lo é hkûn lé, chuimó myhî é yuqzo te gi, shî mù, yhâng é mâng lé waq htoq lé lo akô. Wà byù myo myo le, chuimó myhî haú eq rahá châng lé lo akô. ¹³ Yhumsîng gi, haú chuimó myhî lé myàng jáng, yhang lé wú shogyo luî, "Hkâ-ngaú." ga taí ri.

¹⁴ Yesuq gi, gung shut huî é mù, loq èq è záng kat ri. Haú hkûn, waq tô é bang le jâng yap to byî akô. Yhang gi, "Zorâm ê, ngò, nang lé taí lhê, toq aq." ga taí ri.

¹⁵ Haú hkûn, shî bê sù gi, toq zûng mù dang taí lo ri. Yesuq gi, zorâm haú lé yhângnû chyáng dum ap byî ri.

¹⁶ Byù lhunglhâng bang gyuq maú bùm kôluî, Garai Gasang lé hkya-ôn é dang gi, "Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garúm rà ga lé kûm wú nyi ri." ga taí nyi akô. ¹⁷ Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn ló bum akô.

Yesuq Eq Wui-myhup Sará Yohan É Hkyô

Mht 11:1-19

¹⁸ Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô. ¹⁹ Haú mù luî, Yohan gi, yhâng é chángzo í yuq lé ji yù mù, haú Yhumsing chyáng nhang kat luî, "Nàng gi, haú jé lé lô rà Sù nghut lhê lhú? Haú a nghut jáng, ngamoq, góyuq lé lánng ra shirâ lhú?" ga, myí nhang kat ri.

²⁰ Haú nhik gi, Yesuq chyáng jé jáng, "Nàng gi, haú jé lé lô rà sù nghut lhê lhú? Haú a nghut jáng, ngamoq góyuq lé myoqbyu lánng nyi ra shirâ lhú?" ga luî, Wui-myhup Sará Yohan gi, ngá-nhik lé náng chyáng myí nhang kat ri." ga taí akô.

²¹ Haú u yhang, Yesuq gi, nò zo hpyo zo, noli nojàng huî é bang eq agè ashop é nat dap jun dap é byù myo myo lé, lhoq gê byî ri. Myoqjit bang myo myo lé le, my-

oq dum myàng nhang ri. ²² Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myàng bekô; hkyî hten bang le, wó so bekô; manggâm dap bang le, lhoq gê byî é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ²³ Ngá é yanmai, Ngo lé lum shut é hkyô a bò sù gi, hkuingsô wó nyi ri." ga taí ri.

²⁴ Yohan é chángzô nhik ló byuq é htâng má, Yesuq gi, Yohan eq séng luî, byù moq mó lé taí é gi, "Nungmoq gi, haí lé hpuq wú rà matú, haú yoso shut e akô lhú? Lai èq hik nhûn é jamgâm lé wú rà matú nghut akô lhú? ²⁵ Haú a nghut jáng, haí lé wú rà matú e akô lhú? Nú-nhâm é mebu wut sù lé wú rà matú e akô lhú? A nghut! Wú keq, gyai hpaú é mebu wut luî agùn agó wó bang gi, hkohkâm-wâng pé má sheq ru nyi lhê.

²⁶ Haú nghut le gi, haí lé wú rà matú ê kô é lhú? Myiqh-toi rayuq lé lhú? Haú kúm nghut ri. Ngò, nungmoq lé taí kôlé, Yohan gi, myiqhtoî htoq lháng gyaú sù nghut lhê. ²⁷ Haú yuq é hkyô lé, Chyúmdang má kê tô é gi,

"Wú aq, Náng é hkyô lajang lánng rà matú, Ngá é lagyo lé, Náng é hí má Ngò nhang kat rà nghut lhê." † gà ri. ²⁸ Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lháng a nyi, nghut kôlhâng, Garai Gasâng é mingdán má je tiq dik sù gi, Yohan htoq je kô lhê." gà ri.

²⁹ Mingbyù lhunglhâng bang eq kang guq bang gi, dang haú pé lé wó gyo kôjáng, Yohan byî é bapisma lé hkâm yù kô é nghut mù luî, Garai Gasâng é dingmán é hkyô lé sê gyô yu akô. ³⁰ Hparishe pé eq tarâ sará pé kúm gi, Yohan byî é bapisma a hkâm yù kômù luî, Garai Gasang hen lajang é hkyô lé yhumsing gung é matú he-ngik pyâm akô.

³¹ Yesuq dum taí é gi, "Haú mù luî, byù myû shî lé, Ngò, hai èq taí kê wú rà lhú? Yhangmoq hai eq wuí akô lhú? ³² Yhangmoq gi,

'Nungmoq é matú, ngamoq sampyí mut byi kôlhâng, nungmoq gi, a gó kó,

ngamoq ngaú hkyangsâng kôlhâng, nungmoq gi, a ngaú kó.'

ga luî, gai pé má zùng uchyang rayuq eq rayuq wut taí lhûm nyi é zoshâng wuî eq wuí akô. ³³ Hkâsu mù gà le, Wui-myhup Sará Yohan jé lé luî, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luî, nungmoq taí akô. ³⁴ Haú Byu Yhangzo jé lé luî, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. ³⁵ Nghut kôlhâng, hpaqchyî byéng-yá é yhangzô pé gi, hpaqchyî byéng-yá tengmán é hkyô lé saksé hkâm byî nyi akô." †† gà ri.

† 7:27 Mal 3:1 †† Nghut kôlhâng, Garai Gasâng é hpaqchyî byéng-yá lé lhom hap yu é banshoq bang gi, Garai Gasâng é hpaqchyî byéng-yá haú, tengmán ri ga saksé hkâm nyi akô.

Yubak Dap É Myiwe Rayuq, Yesuq Lé Xû But Byî É Hkyô

³⁶ Hparishe rayuq gi, Yesuq lé yhang chyáng zang zo râ matú ji kat ri. Haû mù, Yesuq gi, haû Hparishe é yhûm má wàng luí zo râ matú zung tô ri. ³⁷ Haú hkûn, wú keq, haú wâ mâ é yubak dap é myiwe rayuq gi, Yesuq haû Hparishe é yhûm má zô zung tô é lé sé jáng, gyai hpau dap é namngón xû bo é luq hpyû bông yu lé luí, ³⁸ Yesuq é nunghtáng hkyî wàng má ngau yap to mù, Yhang é hkyî má ngaubyî eq záng lhoq teq byi jáng, úxam eq but sut pyám byî ri. Dum nghut jáng, nhut eq puq luí mura lé but byî ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htûng é sù, ó yuq nghut é eq hkâsû é yubak dap é myiwe nghut é lé, Yhang sé râ nghut lhê." ga luí, yhang é unghkaû má myit nyi ri.

⁴⁰ Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

⁴¹ Haú hkûn, Yesuq gi, "Ngùn chyí zo sù rayuq chyáng, chyín dap é byù í yuq nyi ri. Rayuq gi, denari † ngo shô chap, rayuq gi, ngo xê chap dap ri. ⁴² Haú nhik gi, chyín xap râ ngùn a wó kôluí, chyín yhumsîng gi, yhangnhik lé xap a ra lò gâ pyâm ri. Haú mù luí, haú nhik mâ é hká yuq gi, yhang lé je chyitdap râ lhú?" ga myí ri.

⁴³ Simun gi, "Je myo lhoq lhut hui sù, nghut râ su ngam ri." ga tû taí ri.

Yesuq gi, "Nàng myit e đông jô ri." ga taí ri.

⁴⁴ Haú hkûn, Yesuq, myiwe zo haû lé lhing wú luí, Simun lé, "Nàng myiwe zo shí lé myang lhê lhú? Ngò, nàng é yhûm má wang le, hkyî chí râ uchyam, nàng a byi, yhang kúm gi, ngaubyî eq ngá hkyî lé tik byi luí, yhang é xam eq sut pyám byi bê. ⁴⁵ Nàng gi, ngo lé nhut eq a puq nghut ri; yhang kúm gi, ngò yhúmkaû má wang é mai ngá hkyî má a no loshoq puq nyi râ.

⁴⁶ Nàng gi, ngá ulhum má xû a but byî wú, yhang kúm gi, ngá é hkyî má nàm ngón é mura but byi bê nghut ri. ⁴⁷ Haú su mù, ngò, nàng lé taí lé, haú myiwe gi, je chyitdap luí, yhang wó é yubak myo myo lé hkyut pyám byî é hui bê. Shau za mara hkyut pyám byî é hui sù gi, shau za chyitdap sù nghut ri." ga taí ri.

⁴⁸ Yesuq gi, myiwe haú lé le, "Ngò, náng é yubak mara hkyut pyám byi bê." ga taí ri.

⁴⁹ Rahá zung tô é bang gi, "Yubak mara lhang wó hkyut pyám byi sù, shí yuq gi, ó wá nghut lhê lhú?" ga luí, myit nyi bum akô.

⁵⁰ Yesuq gi, "Náng é lumjîng myit eq nang lé hkyi yù bê, ngón za ló aq hkoi." ga luí, myiwe haú lé taí kat ri.

Yesuq Htâng Châng É Myiwe Wui

8 Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhang é lagyo raxe í yuq eq rahá za, rawa htâng rawà jé e ló ri. ² Hau htoq agó, nat

gang dap é mai le, nõhpyo mai le Yesuq eq lhoq ge yu é myiwe wui, nat nyhit nat lhoq htoq pyám byi huí é, Magadalaq wâ mâ é Mariq le, ³ Herut é ikun zum sù Kuza é yhumsîng myhí Yoanaq le, Susannaq le, gotû myiwe wui myo myo le, Yesuq eq rahá nghut akô. Haú bang gi, yhumsîng wó du é í Yesuq eq lagyo pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴ Wâ hkang wâ mó mâ é bang gi, Yesuq chyáng zup zîng lé lo bùm kômù shiwa byù moq mó zup míng tô é hkûn, Yesuq dangtú đông taí kyô é gi, ⁵ "Kyô hkyô sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu eq záng nâng pyeq pyâm lhê, maulat nghoq pê eq hte zo pyâm lhê dut ri. ⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. ⁷ Ra-am gi, zugyóm hkaû má gyó ang luí, zubyap eq rahá yuq htoq lô mù, wup pyâm é hui bê nghut ri. ⁸ Nghut kôlhang, ra-am gi, myihpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haû su ga taí nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó eq taí kat ri.

⁹ Haú hkûn, Yhang é chángzô pé gi, dangtú shí hai lichyúm nghut lhê lhú ga, Yhang lé myí akô. ¹⁰ Yhang gi, "Garai Gasâng é mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byi to bê. Nghut kôlhang, góbâng matú gi,

'Wú to kôlhang, a myàng kó sháng, gyô nyi kôlhang, a sê gyo kó sháng.' ††
ngò, ngò dangtú đông taí lhê.

¹¹ Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê.

¹² Hkyô má gyó âng é kyôshi gi, haí eq wuí lhê lhú gâ le, haú mungdang lé byu pé wó gyô é htâng má, lumjîng é má le, hkyi yu é má le, a jé kó sháng gaq ga luí, yhangmoq é i-myt hkaû mai nat Tsadán eq mungdang haú lé, lé yu pyâm é hui bang eq wuí lhê. ¹³ Luqgok yò pé má gyó âng é kyôshi gi, haí eq wuí lhê lhú gâ le, haú mungdang lé wó gyo jáng, gabú myit eq hap yù kôlhang, amyit a wó chín mù, rayoq rabun za lumjîng luí, gungláú huí é nyí má, dum htak ló byuq é bang eq wuí lhê. ¹⁴ Zugyóm má gyó âng é kyôshi gi, haí eq wuí lhê lhú gâ le, haú mungdang lé gyô yù luí, yhumsîng é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashí a zuí é bang eq wuí lhê. ¹⁵ Hpún bo é myigùng má gyó é kyôshi kúm gi, haí eq wuí lhê lhú gâ le, haú mungdang lé lhumzui luí ge é i-myt eq ban gyô yù mù, ging tîng shoq zuí zîng luí, wó jân é i-myt eq ashí zuí é bang eq wuí lhê.

† Denari rachap gi, ra-nyí lhê é byù rayuq é zuihpau eq wuí ri.

†† 8:10 Esai 6:9

Myibung Htûn É Hkyô

Mrk 4:21-25

¹⁶ Myibung lé tap mù, aû èq nghop tô é le, yhup-chong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷ Hkâsu mù gê le, a htoqzê loshoq haq tô é zè haî le a joq, a sé a byông htoq loshoq wó zaú tô é zè le haî a joq nghut ri. ¹⁸ Haû mù luî, nungmoq hkâsu wó gyô yu é hkyô lé sidiq nyi keq, haî mù gê le, wó to sù lé gi, jat byi shirâ, a wó su chyáng mai kúm gi, yhang wó to bûn é mâ é lé lháng, yu pyám byi shirâ nghut lhê." ga taî ri.

Yesuq É Yhangnu Eq Yhanggu Pé

Mht 12:46-50; Mrk 3:31-35

¹⁹ Haû hkûn, Yesuq é yhangnu eq yhanggu pé gi, Yhang chyáng lé lô kê le, shiwa byu pé lûm chyûn chyap to kômù, Yhang chyáng a wó wang ê kó nghut ri. ²⁰ Haû hkûn, Yhang lé, "Náng nu eq nunggu pé gi, nang lé hui naû luî, shinggan má láng yap bum akô." ga taî kyo akô.

²¹ Yesuq gi, yhangmoq lé, "Garai Gasâng é mung-dang lé gyô yu luî, châng é bang gi, Ngá nu eq Ngá gû pé nghut akô." ga luî, yhangmoq lé tû taî kat ri.

Laidun Mó Lé Yesuq Lhoq Zîm É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhang é chángzô pé lé, "Nga-nhúng nhông he hpoq shut dap e ló sháng." ga taî luî, lhaî má wàng mù gû dap e ló akô. ²³ Yhangmoq gû dap e ló é hkûn lé, Yesuq gi, yhup myhî tô ri. Haû u lé, nhông haû má laidun mó lò luî, lhaî má wuî byíng lô mù, yhangmoq myup shî râ su dut lò nyi bekô nghut ri.

²⁴ Haû mù, yhangmoq gi, Yesuq chyáng huî ê luî, Yhang lé nhaû pun mù, "Yhumsîng ê, Yhumsîng ê, nga-nhúng myup ló nyi ri." ga taî akô.

Haû hkûn, Yhang toq luî, laidun eq wuîlhêng pé lé tân kat jáng, haû pé gi, zim za dut ló byuq bê. ²⁵ Haû mù, Yesuq gi, "Nungmoq é lumjîng myit gi, hkâmá nghut akô lhú?" ga luî, yhangmoq lé myî ri.

Yhangmoq kúm gi, gyuq maú byuq bûm kôluî, "Shí yuq gi, hkasû é byû nghut lhê lhà? Yhang hkunmó hkyó jáng, lai eq wuîlhêng pé lháng gyo byi ri-nhung!" ga luî, rayuq eq rayuq myî lhûm bum akô nghut ri.

Nat Lé Hkat Htoq Byî É Hkyô

Mht 8:28-34; Mrk 5:1-20

²⁶ Hau htâng, yhangmoq gi, Galile mau tû tap mâ é Gerase byu pê é mau má jé dap e ló bekô. ²⁷ Yesuq kong shut doq ló le, haû wâ mâ é nat gang dap é sù rayuq gi, Yhang lé hui ri. Haû yuq gi, yhûm má le a nyi é za, mebu a dap é, lupdùng má myáng myáng nyi nyi sù nghut ri. ²⁸ Haû yuq gi, Yesuq lé myàng jáng, wut garu luî, yhang é hkyî wang má paî gop to mù, "Myhang htâng é Garaî Yhangzo Yesuq ê, Nàng gi, ngò eq haî séng lhê lhú? Ngo lé a zing-ri râ matú, ngò nang lé

dùng nyi lhê." ga luî, htê mó èq taî garû nyi ri. ²⁹ Hkâsu mù gê le, Yesuq gi, agè ashop é nat lé haû yuq gùng mai htoq ló râ matú, tân pyâm é yanmai nghut ri. Byû haû yuq lé nat gâng èq adàm dàm wang júng hkang-mó, loq eq hkyî má toqjâng tuî èq tuî shung, kyum xâng tô é eq, zúng tô é nghut kôlhang, lêng hpyit pyám pyám kut é htoq ago, nat gâng èq yhang lé yoso hkaû shut lêngmhap yû yû kut nyi ri.

³⁰ Yesuq gi, yhang lé, "Náng myîng haî gê lhê?" ga myî kat é hkûn, yhang gi, "Legio † gê lhê." ga tû taî ri. Haî mù gê le, yhang chyáng nat gang myo myo wang lúng tô é yanmai nghut ri. ³¹ Nat jùm gi, yhangmoq lé nik dik htûm é Lasang-dong shut a kôn kat râ matú, Yesuq lé chôm dùng nyi bum akô.

³² Haû u lé, waq rajùm mó gi, bûm yàm má dû but zô nyi bum akô nghut ri. Haû mù, yhangmoq gi, waq pê chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. ³³ Haû mù luî, nat gang jùm gi, byû haû yuq chyáng mai htoq ló kôluî, waq pê chyáng wàng byuq bekô nghut ri. Haû hkûn, waq haû jûm gi, gampyoq mai nhông hkaû shut rut din yán wang ló kôluî, myup shi byuq bekô nghut ri.

³⁴ Waq zúng bang gi, haû su dut é lé myàng jáng, hpang din ló kômù, myuq hkaû mâ é bang eq awuî ayàm mâ é bang lé ló taî kyô akô nghut ri. ³⁵ Haû mù, wó gyô é bang gi, haû hkyô lé wú râ matú htoq lé lo akô. Yhangmoq gi, Yesuq chyáng jé lé kê é hkûn, nat gang htoq byuq hui sù, Yesuq é hkyî wang má mebu wut to luî, byû gè rayuq su zùng to láng é lé myàng kômù, gyuq dan bûm bekô nghut ri. ³⁶ Nat dap sù lé hkâsu kut luî lhoq ge yu é hkyô lé myang é bang gi, góbang lé taî kyô akô nghut ri. ³⁷ Haû hkûn, Gerase byu pê é mau mâ é lhunglhâng bang gi, gyuq dan dik kôluî, Yesuq lé yhangmoq é mau mai htoq ló byuq râ matú, chôm dùng tôngbán akô. Haû mù luî, Yesuq gi, taû ló byuq râ matú lhaî má wàng bê nghut ri.

³⁸ Nat htoq byuq huî é sù gi, Yesuq htâng cháng râ matú, Yesuq lé dùng tôngbán ri. ³⁹ Nghut kôlhang, Yesuq gi, "Nàng, yhûm shut sheq ló mù, Garai Gasang, nang lé hkâ-í kut byi bê hkyô lé, ló taî kyo aq." ga luî, yhang lé ló nhâng bê nghut ri. Haû hkûn, yhang htoq ló mù, Yesuq yhang lé hkâ-í kut byi bê hkyô lé, haû wà rawà bang lé ló taî kyô ri.

Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

⁴⁰ Ahkuî, Galile byu pé gi, Yesuq dum taû lò râ lé láng nyi kê é nghut mù, Yhang dum taû gû dap lo é hkûn gabú myit eq lhóm te yu akô. ⁴¹ Haû hkûn, Ya-iruaq gê é tarajong má up sù rayuq gi, jé lé lô mù, Yesuq é hkyî wang má hkyihput htuq luî, yhang yhûm má lé râ matú ji nyi ri. ⁴² Hkâsu mù gê le, raxe í zân bò bê é, yhangzo byizo te gi, shi ló nyi é yanmai nghut ri.

† Legio gê é lichyúm gi, gyezo 4000 eq 6000 gyoro bo é gyedap lé taî ri.

Haû mù, Yesuq cháng e ló le, shiwa byu pé gi, Yhang lé záng htông lo bum akô. ⁴³ Haú u lé, raxe í zân sui yuít luí ngunzè lhungháng ban pyám shoq chi sará pè chyáng yâ wú kôlhang, hká yuq le a wó yâ gè byi é † myiwe myhí rayuq le haú hkaû má bo tô ri. ⁴⁴ Myiwe haû gi, Yesuq é nunghtáng má huí lé mù, Yhâng é bushi htông má ê záng kat eq, suí yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhú?" ga luí myi jáng, lhunghâng bang gi, a sé ga he nyi bùm kô é hkûn lé, Petruq gi, "Yhumsîng ê, shiwa byu pé gi, náng é lhîngkhyuq mai náng chyáng chyîn chyap wang lo bùm kô é yanmai, nang lé záng bekô râ nghut lhê?" ga taí ri.

⁴⁶ Yesuq gi, "Byù rayuq ngo lé lé záng mù, ngá chyáng mà é hpungwup a-tsam htoq ló é lé, ngò châng sé kat ri." ga taí ri.

⁴⁷ Haú jáng, myiwe myhí haû gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyí wang má ngóm gop kat luí, haí mù Yhang lé záng é hkyô eq, hká dông ge ló byuq é hkyô pé lé, shiwa byù banshoq bâng é hí má Yesuq lé taí kyô nyi ri.

⁴⁸ Yesuq gi, "Ngá zo ê, náng é lumjîng myit gi, nang lé lhoq gè byi bê nghut ri, ngón za ló aq hko!" ga luí, myiwe haû lé taí kat ri.

⁴⁹ Yesuq gi, dang ru taí nyi ashí hkûn, tarajong má up sù Ya-iruy é yhûm mai byù rayuq jé lé lô luí, "Nung zo gi, shi byuq bê, haú sará lé hkâlhoq hkyik nyi lo." ga luí, Ya-iruy lé taí kyô ri.

⁵⁰ Yesuq gi, dang haû lé wó gyo jáng, "Hkâgyuq, za lumjîng aq, haú jáng, yhang ge byuq râ nghut lhê." ga luí, Ya-iruy lé taí ri.

⁵¹ Yesuq gi, Ya-iruy é yhûm má jé é hkûn lé, Petruq, Yohan, Yakuq, eq haû myiwe zô é yhângnu eq yhâng-wa mai lai luí, yhûm haú má, ó lé le a wàng nhâng kut ri. ⁵² Haú u lé, lhunghâng bang zoshâng hau é yanmai, ngaubyi ngau-nhap èq yón nyi akô. Yesuq kúm gi, "Hkâ-ngaû kó, yhang shi byuq é a nghut, yhup myhí to é sheq ru nghut lhê." ga luí, yhangmoq lé taí ri.

⁵³ Zoshâng gi, shi byuq bê lé yhangmoq sé kôluí, yhangmoq gi, Yesuq lé wuizui kut pyám byi akô.

⁵⁴ Yhang kúm gi, myiwe zo hau é loq má zuí to mù, "Zoshâng ê, toq aq." ga taí kat ri. ⁵⁵ Haû mù luí, yhâng woi-nyí dum taû wàng mù, haú hkûn jáng toq yap ri. Haú jáng, Yesuq gi, zoshâng haû lé zôjung byi keq, ga yhangmoq lé taí kat ri. ⁵⁶ Haû myiwe zô é yhângnu eq yhângwa nhik gi, gyai má byuq akô. Nghut kôlhang, Yesuq gi, haû dut é hkyô ó lé le a taí kyo râ matú, yhangnhik lé taí hkûm tô ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

9 Yesuq gi, haû lagyo raxe í yuq lé wut yù mù, nat gang banshoq lé wó hkat htoq pyám râ matú eq, nolì nojàng wó lhoq gè râ matú, yhangmoq lé wum-o

† Ngunzè lhungháng ban pyám shoq chi sará pè chyáng yâ wú kôlhang, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

a-tsam eq ahko ahkáng byi ri. ² Hau htông má, Garai Gasâng é mingdán hkyô hko kyo râ eq, nõhpyo lhoq gè byi râ matú nhang htoq kat ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lháng hkâwûn hkâchûng kó. ⁴ Nungmoq hká yhûm má wàng kôlhang, haú wâ mai dum htoq ló é buinyi jé shoq, haú yhûm má za nyi nyi keq. ⁵ Nungmoq lé a lhóm hap yu é bang lé gi, yhangmoq é wâ mai htoq ló é hkûn, nungmoq lé a lhóm hap yu é saksé dut sháng gaq, nungmoq é hkyiwa má dap é hpuilhaû lé yhangmoq é myoq hí má ko hkyô pyám to keq." ga taí kat ri. ⁶ Haû mù, yhangmoq gi, htoq e ló luí, wâ hking wâ mó má haû gabú danglù hko kyo uchyang, hká jé hkâmá nõhpyo lhoq gè byi wún akô.

Herut Má Úng-âng É Hkyô

Mht 14:1-12; Mrk 6:14-29

⁷ Haû su dut é hkyô banshoq lé, mauzau Herut wó gyô yù luí myit wuí nyi ri. Hkâsu mù gâ le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haû mai, ra-am gi, hí hpyang lhê é myiqhtoi rayuq yuq dum dui toq lô bê ga luí, taí bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shí í wâ taí byông bùm kô é gi, ó wá nghut lhê lhú?" ga luí, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyo pé dum taû lo é hkûn, yhangmoq kut lai lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuí chûng mù, Bet-saida gâ é wâ mó shut tsik za e ló byuq ri. ¹¹ Shiwa byu pé gi, haú hkyô lé châng sé kômù, Yhâng htông châng e ló akô. Yesuq le yhangmoq lé lhóm hap yù mù, Garai Gasâng é mingdán hkyô lé taí kyo luí, nõhpyo gè naù bang lé, lhoq gè byi ri.

¹² Buigyùm zó má, lagyo raxe í yuq gi, Yhâng chyáng huí ê mù, "Haû shiwa byu pé lé, awui ayám mà é yhûm pé eq wâ pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nga-nhúng gi, yoso má nghut nyi ri." ga luí, Yhang lé taí akô.

¹³ Haú hkûn, Yesuq gi, "Nungmoq, yhangmoq lé ra-jung jung byi tso keq." ga tû taí ri.

Yhangmoq gi, "Shí myhò bang lé tso râ zoshuq a é wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gâ le, yuqgè wui baú lháng ngo hkyîng kô nghut ri.)

¹⁴ Nghut kôlhang, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri. ¹⁵ Yhangmoq lé Yesuq taí é eq ra-jung za, banshoq bang lé zùng nhang to bekô. ¹⁶ Haú hkûn, Yesuq gi, haú muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi râ matú, Yhâng é chángzô pé lé byi kat ri. ¹⁷ Haú

hkûn, yhangmoq banshoq bang zô gyî bùm kô é htâng má, haû chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri.

Yesuq Gi, Hkrisduq Nghut Lhê Ga Petruq Taí É Hkyô

Mht 16:13-28; Mrk 8:27—9:1

¹⁸ Radàm lé, Yesuq gi, Yhang baú kyûdung nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akô lhú?" ga myí ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô." ga luí, yhangmoq tû taí akô.

²⁰ Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhú?" ga myí ri.

Haú hkûn, Petruq gi, "Nàng gi, Garai Gasang nhâng byí é Hkrisduq nghut ri." ga tû taí ri.

²¹ Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri. ²² Haú mù, Yhang gi, "Haú Byu Yhangzo gi, zing-rí é myo myo hui zo luí, suwún wuî, hkyangjong agyi pé, tarâ sará pè èq he-ngik pyâm é hui mù, sat pyâm é hui ra râ nghut lhê, hau htâng sum nyí nghû râ buinyi má, lhoq toq yu é hui râ nghut lhê." ga taí ri.

²³ Hau htâng, banshoq bang lé Yhang dum xoq taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, nyí wuî yhumsing é tapzîng lé waq chûng † luí, cháng ra râ nghut lhê.

²⁴ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê. ²⁵ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haí akyû bò râ lhú? ²⁶ Ngò eq Ngá é dang lé, lhom hap yù râ lé hoq é sù ó yuq lé le, haú Byu Yhangzo gi, yhumsing é hpungwup shingkan eq, Yhâng Wâ é hpungwup shingkan, haú chyoiyúng maumang lagyô pè é hpungwup shingkan èq jé lé é hkûn, hoq pyâm râ nghut lhê. ²⁷ Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shî kó râ a nghut." gâ ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

²⁸ Dang haú taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri. ²⁹ Kyû dung nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri. ³⁰ Haú hkûn, wú keq, Mosheq eq Eliyaq gi, hpungwup shingkan eq htoq lé lô luí, Yesuq eq dáng nyo lhûm nyi akô. ³¹ Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dong mai dik lò râ nghut é hkyô lé

† Tapzîng lé waq chûng nghu é gi, Yesuq é yanmai jamjau huí é lé taí é nghut lhê.

taí lhûm nyi akô. ³² Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shingkan lé le, Yhang eq rahá yap to su nhik lé le, myang kat akô. ³³ Haú nhik Yesuq chyáng mai gâng ló nyi é hkûn, Petruq gi, Yesuq lé, "Yhumsing ê, shí jowò má nga-nhúng nyi le ge ri, haú mù, Nàng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí kat kôlhang, yhang haí taí nyi é lé, yhang a sé.

³⁴ Petruq dang taí nyi ashî hkûn lé, mhut jé mù, yhangmoq lé htup zing lo nyi ri. Mhut haú htup lo nyi é yanmai, yhangmoq gi, gyuq byuq akô. ³⁵ Haú mhut hkaú mai htoq lo é htê gi, "Shí yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq." gâ ri. ³⁶ Dang htê haú zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haú bun haú yoq má, ó lé le a taí kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byí É Hkyô

Mht 17:14-18; Mrk 9:14-27

³⁷ Hau htâng nyí, yhangmoq bùm haú mai gyó ló kô le, byù moq mó gi, Yesuq lé lhom te yu akô. ³⁸ Haú hkûn, byù hpúng haú mâ é byù rayuq wut garû htoq ló é gi, ³⁹ "Sará ê, wú aq, ngá é zo te yuqzo gi, nat wang júng mù dàn so dàn loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rí yù yù kut nyi ri. ⁴⁰ Nat haú lé hkat pyâm byi kó laq nghû luí, Náng é chángzô pé lé ngò dung wú kôlhang, yhangmoq a wó hkat pyâm byi kó. Haú mù, ngá zo lé lhoq gê byi râ matú, ngò gi, nang lé gyai myit lum é eq dung kat lhê." gâ ri.

⁴¹ Haú mù luí, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Nung zo lé, shí shut shuí lé lô aq." ga tû taí ri.

⁴² Zoshâng haú, lé lo nyi le lháng, nat gang gi, yhang lé lhoq lhêng to mù langhtân nhang ashí. Yesuq kúm gi, haú agè ashop é nat lé tân kat luí, zoshâng haú lé lhoq gê byi mù, yhang wa lé dum ap byí ri. ⁴³ Nyi mi-nyí gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haú lé maú nyi bùm kô le, Yesuq gi, ⁴⁴ "Haú Byu Yhangzo gi, byu pè é loq má ap pyâm é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri. ⁴⁵ Yhangmoq kúm gi, dang haú lé a sê gyo kó, hkâsu mù ga le, haú gi, yhangmoq é matú a sê gyo sháng gaq ga luí, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sù Nghut Râ Lhú?

Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sù nghut lhê lhú ga, rayuq eq rayuq taí myíng myô lhûm

nyi akô. ⁴⁷ Yesuq kúm gi, yhangmoq é unghkaû má myit nyi é hkyô lé sé byi luî, zoshâng rayuq lé shuî yù mù, Yhâng nàm má shap to luî, ⁴⁸ "Shî zoshâng lé Ngá é mying mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haû Ngo lé nhang kat é Sù lé hap yu é le nghut lhê. Haû mù luî, nungmoq banshoq má, je tiq sù gi, je ko sù nghut lhê." ga luî, yhangmoq lé taî ri.

⁴⁹ Haû hkûn, Yohan gi, "Yhumsîng ê, Náng é mying láng luî, nat gâng pé lé hkat pyám byî wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkûm pyâm é nghut lhê." ga taî ri.

⁵⁰ Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luî, yhang lé taî ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuî, Yesuq gi, Yhang lé mauhkûng shut shuî toq yù râ buinyi chyâng lò bê nghut mù, Yerusalem wà mó shut ê râ lé myit hpyit to luî, Yhâng é hí má lagyo nhang kat ri. ⁵² Lagyo haû bang gi, Yhâng matú râ é hkyô lajang láng râ ga, Samariq wà rawà má wang ló akô. ⁵³ Nghut kôlhang, Yesuq gi, Yerusalem wà mó shut laî e ló é sù nghut é yanmai, haû wâ bang gi, Yhang lé a lhom hap yù kó. ⁵⁴ Haû hkûn, lagyo Yakuq eq Yohan nhik gi, haû lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lhú?" ga luî, Yesuq lé myî akô. ⁵⁵ Yhang kúm gi, lhing wú luî yhangnhik lé, tân pyâm ri, ⁵⁶ haû mù luî, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô

Mht 8:19-22

⁵⁷ Yhangmoq haû hkyô má e ló kô le, byù rayuq gi, "Nàng hká e le hká ngò cháng râ." ga luî, Yesuq lé taî ri.

⁵⁸ Yesuq gi, haû yuq lé, "Wamhkuî pé gi, hkyûng wó akô, nghoq pé le, nghoqsut wó akô. Nghut kôlhang, haû Byu Yhangzo gi, ulhum to jang lháng a wó é nghut ri." ga taî pyám ri.

⁵⁹ Dum rayuq lé, "Ngá htâng cháng aq." ga taî jáng, haû yuq gi, "Yhumsîng ê, ngá wa lé, ló yhûm pyám râ ahkáng hí byi shi laq." ga taî ri.

⁶⁰ Yesuq gi, yhang lé, "Shî bê bang † gi, shî bê bang yhangchang yhûm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga taî ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhang, ngá yhumbyù lé hí hkyang ló shit to râ ahkáng byi shi laq." ga taî ri.

⁶² Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luî, yhang lé taî ri.

Yesuq, Chángzô Pé Nyhit Xê Yuq Lé, Nhang Htoq Kat É Hkyô

10 Hau htâng má, Yhumsîng gi, gotû chángzô pé nyhit xê yuq †† lé hkyin yù mù, Yhang e ló râ wà eq jowò hkanmó shut í yuq razúm zúm kut luî, Yhâng é hí má ê nhang kat ri. ² Yesuq gi, yhangmoq lé, "Kyô ‡ shù yù râ myo shoq joq kôlhang, mù zui râ byù gi, shaû nyi ri. Haû mù, haû kyô Yhumsîng lé, Yhâng é kyô yò má, kyô shu byù †† myo myo nhâng byi râ matú, dung keq. ³ Nungmoq e ló keq! Wamhkuî hpúng má nhang hâng kat é sau zô pé lé su, Ngò, nungmoq lé nhang kat é nghut lhê. ⁴ Ngùn htûng eq, etap, hkyî-tsung pé hkâyü chûng kó, hkyô má ó lé le hkâshichyên kûn nyi kó.

⁵ Nungmoq gi, hká yhûm má wàng e ló kô le, 'Shi yhûm nguingón nyî sháng gaq.' nghû luî, hí taî keq. ⁶ Haû yhûm má nguingón hkyô eq gingdán sù nyi é nghut le gi, nguingón hkyô haû gi, haû yuq é ahtôq má joq to râ nghut lhê. Haû a nghut jáng, nguingón hkyô haû gi, nungmoq chyáng dum taû lo byuq râ nghut lhê. ⁷ Haû yhûm má nyi to mù, yhangmoq haî byî le haî zo haî shuq keq; hkâsu mù gâ le, mù zui sù gi, zuihpau wó yù gíng lhê; haû mù, nungmoq rayhum htâng rayhûm hkâhtot nyi wún kó.

⁸ Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byî é zoshuq lé, zo keq, shuq keq. ⁹ Haû mâ é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghû luî, yhangmoq lé taî kyo keq. ¹⁰ Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haû wâ mâ é hkyô mó má htoq ê mù, ¹¹ 'Ngamoq é hkyî má dap tô é nungmoq wà mâ é hpuilhaû lháng, nungmoq lé hkyang pû tsô nyi râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghû luî taî keq. ¹² Ngò, nungmoq lé taî kôlé, haû buinyi †† lé, haû wâ gi, Sodom wà htoq má je hpuzo râ nghut lhê.

¹³ Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut zung ngûng to bekô râ nghut lhê. ¹⁴ Haû mù, tarâ jéyáng é nyî jé jáng, nungnhik gi, Turuq myuq eq Sidun myuq htoq má je hpuzo ††† kó râ nghut lhê.

¹⁵ Dum mù, Kaperna-um wà nàng ê, nàng gi, mauhkûng jé shoq waq toq é hui râ lhú? A nghut, mosumhkung má sheq gyó râ nghut lhê." ga taî ri.

†† Chyûmdang ra-am má gi, chángzo nyhit xê í yuq ga le kâ tô ri. ‡ Kyô nghû é gi, Yesuq lé lumjîng nàu kôlhang taî kyo râ bang a nyi lú láng tô é bang nghut ri. †† Kyô shu byù nghu é gi, Yesuq é hkyô gabú danglù lé taî kyo bang nghut ri. †† Haû buinyi gâ é gi, Garai Gasâng tarâ jéyáng é buinyi lé gâ lhê. ††† Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lhîng kô é yanmai nghut ri.

† Shî bê bang gâ é gi, woi-nyî má shi to bang lé gâ lhê.

¹⁶ Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhit Xê Yuq Dum Taû Jé Lo É Hkyô

¹⁷ Hau htâng, haû chángzo nyhit xê yuq gi, gabú myit èq dum taû lò mù, "Yhumsîng ê, náng é mying lé lang jáng, nat gâng pé lhang ngamoq é dang lé gyô bum akô." ga taí akô.

¹⁸ Haû su ga taí kôjáng, Yesuq tû taí é gi, "Tsadán gi, mauhkûng htoq mai lhap hpyat é su byit gyó lo é lé ngò myang kat bê. ¹⁹ Wú keq! Ngò gi, nungmoq lé, lhangmuì eq gogok pé lé wó nang râ eq gumlau gyê pé é wum-o a-tsam banshoq lé wó ûng râ ahko ahkáng lé byi bê nghut mù luí, hai èq le nungmoq lé wó lhoq hten râ a nghut lo. ²⁰ Nghut kôlhang, nat pé nungmoq é dang gyô é lé za hkâgabú nyí kó, mauhkûng htoq mã é asak jihpán laiká buk má nungmoq é mying bo to bê lé sheq gabú nyí keq." ga taí ri.

²¹ Haû u lé, Yesuq gi, Choyiýung Woi-nyí má gabú é myit byíng lô mù, "Mauhkûng eq myigung é Yhum-sîng, Áwa ê, Nàng gi, haû pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wuì lé tûn shit bê nghut é yanmai, Ngò, Nang lé hkyâ-ôn lhê ô. Nghut bê, Áwa ê, haû gi, Nàng ô nau é hkyô nghut ri.

²² Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haû Zo eq haû Zo mai sé nhâng râ matú hkyin yu é bang mai lai luí, ó a sé." ga taí ri.

²³ Hau htâng má, Yhâng é chángzô pé shut lhing wú luí, yhangmoq lé baú za haq taí kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. ²⁴ Hkâsu mù gâ le, Ngò, nungmoq lé taí kôlé, nungmoq wó myàng, wó gyô é pé lé, myiqhtoí pé eq hkohkam pé myo myo gi, myàng naù gyo naù kôlhang, a wó myàng, a wó gyo kó nghut ri." ga taí ri.

Gè É Samariq Byù

²⁵ Haû hkûn, wú keq, tarâ sará rayuq gi, toq luí, Yesuq lé, "Sará ê, ahtum abyuq é asak lé wó yû shoq, ngò hkâsu kut râ râ lhê lhú?" ga luí, Yhang lé myí chyam wú ri.

²⁶ Yesuq gi, "Mosheq é tarâ má hkâsu ga kâ tô ri lhú? Nàng haû lé hkâsu nghap yu nyi lhê lhú?" ga luí, yhang lé myí ri.

²⁷ Haû yuq gi, "Haû Yhumsîng náng é Garai Gasang lé, náng é myit nhikhum banshoq, náng é asak woi-nyí lhum gón, náng é wum-o banshoq, náng myit é hkyô banshoq èq, chyitdap râ lhê; † náng gûng lé nàng chyitdap é su, náng é chyangnâm mã é bang lé le chyitdap aq. ††† ga tû taí ri.

²⁸ Yesuq gi, "Nàng tû taí é dang jô ri; haû su yhang kut aq, haû jáng nàng gi, asak duì râ nghut lhê." ga yhang lé taí ri.

²⁹ Nghut kôlhang, haû yuq gi, yhâng gungdu dingmán é lé, tûn shit naù luí, "Ngá é chyangnâm mã é sù gi, ó yuq nghut lhê lhú?" ga luí, Yesuq lé myí ri.

³⁰ Yesuq tû taí é gi, "Byù rayuq gi, Yerusalem wà mó mai Yeriho wà shut gyó lô le, damyaq eq htûng huí ri. Damyaq haû bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyâm to kôluí lô byuq bekô.

³¹ Haû u lé, hkyangjong rayuq gi, haû hkyô mai lai ânng lô le, haû damyaq hui sù lé myàng jáng, koi lai lô byuq ri. ³² Haû eq rajung za, Lewiq rayuq le, haû mai lai lô é hkûn, haû yuq lé myàng jáng, koi lai lô byuq ri.

³³ Nghut kôlhang, Samariq byù rayuq le, haû mai lai lô é hkûn, haû yuq leq tô é lé myàng jáng, wú shogyo luí yhâng chyáng huí ê mù, ³⁴ yhâng é dâm mã, xû eq tsi-byiq wing shoq gyun luí, rago za htpu byi mù, yhâng é logúng má, haû yuq lé bún ke luí, bing-yhûm ralhûm má jé shoq shuít lô mù, gôn lajang byí ri. ³⁵ Htang nyí lé, yhang gi, haû bing-yhûm yhumsîng lé ngùn Denari í chap shê byi mù, taí é gi, 'Shí yuq lé wú lajang byi laq, yhâng gûng má nàng myo chung záng é banshoq lé ngò dum taû lò jáng, lo xap râ.' gâ ri." gâ ri.

³⁶ Hau htâng, tarâ sará lé, "Nàng gi, byù haû bang sum yuq má damyaq huí sù é chyangnâm mã é đông nghut sù gi, hká yuq nghut râ su ngam ri lhú?" ga luí, Yesuq myí ri.

³⁷ Haû tarâ sará gi, "Haû yuq lé shogyo sù nghut ri." ga taí ri.

Yesuq gi, "Nàng le haû đông lô kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq É Jé É Hkyô

³⁸ Ahkuí, Yesuq eq Yhâng é chángzô pé hkyô xoq sô e lô kô le, wà rawà má jé wang lô é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri. ³⁹ Mahtaq gi, Mariq gâ é yhanggu myiwe zo rayuq wó ri. Mariq haû gi, Yhumsîng Yesuq é hkyí wang má zung to mù, Yhang mhoqshit é dang lé gyô nyi ri.

⁴⁰ Mahtaq kúm gi, saí tso saí huq é amû myo luí, gyin bûn nyi ri. Haû mù luí, yhang huí ê mù, "Yhumsîng ê, ngá gu gi, saí tso saí huq é amû mã, ngo lé baú za rap kut tô é lé, nàng a bo myàng byi lhú? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

⁴¹ Haû hkûn, Yhumsîng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri. ⁴² Nghut kôlhang, je ahkyak é hkyô gi, rahkat za nghut lhê. Mariq kúm gi, haû je ge é hkyô lé hkyin yù bê nghut ri. Haû lé yhâng chyáng mai wó yu pyám byi râ a nghut." ga luí, yhang lé tû taí ri.

Yesuq Mhoqshit É Kyûdung Dang

Mht 6:9-13; 7:7-11

11 Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsîng ê, Yohan gi, yhâng é chángzô pé

lé kyûdung râ hkyô mhoq byi é su, ngamoq lé le mhoq byi laq." ga Yhang lé taí ri.

² Haú hkûn, Yhang gi, "Nungmoq kyûdung le, 'Mauhkûng htoq tsáng myhâng mâ é ngamoq é Áwa ê,

Náng é mying gi, chyoiyúng nyí sháng gaq.

Náng é mingdán jé lô sháng gaq.

³ Ngamoq nyí wuî râ é zoshuq lé, ngamoq lé nyí wuî byi laq.

⁴ Ngamoq lé shut é byù banshoq bâng é mara lé, ngamoq hkyut pyám byi é yanmai, ngamoq é mara lé le hkyut pyám byi laq.

Ngamoq lé, agúng alau hkyô má hkâwâng nhâng.' nghû keq." ga luí, yhangmoq lé mhoqshit ri.

⁵ Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é nghû sháng, yhang gi, gunggâm yoq má haú yuq chyáng ê luí, 'Buinùm hpó ê, ngo lé muk sùm long byam chyí byi kat laq, ⁶ haí mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso râ haí le a joq byam dut tô ri.' ga taí é hkûn, ⁷ yhúmhkaú shut mâ é sù gi, 'Ngo lé, hkâlê lhoq hkyik lo, hkum le myhí pyám bê, ngá zoshâng wuî le ngò eq rahá yhupjang má yhup to bekô. Ngò, nang lé haí le a wó toq yû byi lo.' ga tu kat ri. ⁸ Ngò, nungmoq lé taí kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra châ é banshoq toq yû byi râ nghut lhê.

⁹ Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê.

¹⁰ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

¹¹ Nungmoq îwâ pé má, ó yuq wá, yhumsing yhangzo muk dúng le, luqgok byi kó râ lhú? Ngozo dúng le, lhangmuí byi kó râ lhú? ¹² Woq-ú dúng le, gogok byi kó râ lhú? ¹³ Agè ashop é bang nungmoq lhang gi, nungmoq é zo wuî lé, ge é chyunghuq dat byi kô le nhing, mauhkûng htoq tsáng myhâng mâ é nungmoq é Íwa gi, Yhang lé dúng é bang lé, je riyhang haú Chyoiyúng Woi-nyí byi râ nghut lhê." ga taí ri.

Mara Hûn É Dang Lé Yesuq Tô Taí É Hkyô

Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyám ri. Nat haú htoq ló byuq é htáng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô. ¹⁵ Nghut kôlhang, yhangmoq chyáng mâ é ra-am gi, "Yhang gi, nat gâng pé é zau Bezebulaq é wum-o a-tsâm èq za, nat gâng pé lé wó hkat pyám é nghut ri." ga taí bum akô nghut ri. ¹⁶ Ra-am le, Yhang lé, mauhkûng mâ é kumlhá tûn shit wú laq ga dúng chyam wú akô. †

† Byu pé gi, Yesuq lé Garai Gasang nhang kat é hkyô lé saksé myàng nauí, mauhpo kumlhá dúng nyi akô.

¹⁷ Yesuq kúm yhangmoq myit nyi é hkyô lé sé mù taí é gi, "Ikun byoq é mingdán hká lhum nghut kôle, hten byuq râ za nghut lhê; haú eq rajung za, ikun byù yhangchang rayuq eq rayuq byoq lhùm é yhùm htu gi, byoq gâng lhum râ za nghut lhê. ¹⁸ Nat pé le yhangmoq yhangchang byoq gâng lhùm nyi kô é nghut le gi, Tsadán é mingdán gi, hkâsu kut wó gîng to râ lhú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyám ri ga kô é yanmai nghut lhê. ¹⁹ Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyám kô é nghut lhê lhú? Haú mù luí, yhangmoq gi, nungmoq lé jéyáng é bang dut bekô râ nghut lhê. ²⁰ Nghut kôlhang, Ngò gi, Garai Gasâng é wum-ô èq nat gâng pé lé hkat htoq pyám é nghut jáng, Garai Gasâng é mingdán †† gi, nungmoq chyáng jé bê nghut ri.

²¹ Wum-o bo é sù rayuq gi, yhâng é yhùm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê. ²² Nghut kôlhang, yhâng htoq wum je bo é sù lé luí, haú yuq lé, lé zân ung pyám é nghut le gi, yhang lum tô é shâm, lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê. ‡

²³ Ngá hkyam shut a dap sù gi, Ngo lé gye kut sù nghut lhê. Ngò eq rahá a shuí tsing sù gi, lhoq pyo pyám é sù nghut nyi ri.

²⁴ Haú agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi laí lo é yhùm má dum taú ló wú râ.' ga taí ri. ²⁵ Yhang dum taú jé ló wú le, yhùm haú gi, shum pyám mù san za rago dut to lánng é lé ló myang ri. ²⁶ Haú jáng, yhang gi, dum taú ê mù, yhâng htoq je wuî é nat nyhit nat lé shuí lò luí, haú má lo wàng nyi to bekô. Haú mù, haú yuq é nyi yap sâmlai gi, hí lhê htoq má je wuî lò bê nghut ri." ga taí ri.

²⁷ Haú su ga, Yesuq taí nyi é hkûn, haú shiwa hpong mâ é, myiwe zo rayuq htê mó o mó èq Yhang lé taí é gi, "Nang lé wun é úng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zing lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlhang, Yonaq é kumlhá mai lai luí, gotû haí le tûn shit râ a nghut. ³⁰ Yonaq gi, Ninewe wà byù pé hí má kumlhá †† dut é su, haú Byu Yhangzo gi, shí pyat lhê é

†† Garai Gasâng é mingdán gâ é gi, byù htoq má le, nat htoq má le, Garai Gasâng yhang uphâng é lé gâ é nghut lhê. ‡ Haú eq rajung za, Yesuq gi, Tsadán lé zân úng bê nghut é yanmai, agè ashop é nat pé lé byu pé chyáng mai, wó hkat pyám bê nghut ri.

byu pê hí má, kumlhá dut râ nghut lhê. ³¹ Maupyî mâ é hkohkâm myhí gi, maumyî lô htâng é mai lé lô mù, Sholumon é hpaqchyî dang lé, lé gyô yù bê nghut mù, haû tarâ jéyang é buinyi má, shí ipyat mâ é byu pé eq rahá toq lô luî, yhangmoq lé mara hûn râ nghut lhê. Wú keq, Sholumon htoq ko sù gi, ahkuî shí má jé nyi to bê. ³² Ninewe wà byu pé gi, Yonaq, mungdang hko kyô é hkûn myit lhîng kô é nghut mù, tarâ jéyang é buinyi má, shí ipyat eq rahá toq lô luî, yhangmoq lé mara hûn kó râ nghut lhê. Wú keq, Yonaq htoq ko sù gi, ahkuî shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhâng, wang lé lô bang myoq wó myâng râ matú kúm gi, tsungjang má tsung to to chyat kut akô. ³⁴ Náng é myoq gi, náng gungdû é myibung † nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. Nghut kôlhâng, náng myoq a ge é nghut le gi, náng é gungdu gón gi, mauchut tuq dut nyi râ nghut lhê. ³⁵ Haû mù, náng chyáng bo é maubó gi, mauchut byuq é, a chut byuq é lé wú nyí aq. Nàng lumjîng é hkyô eq nàng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragùngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyí râ nghut lhê." ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq haû su ga ban taí é htâng má, Hparishe rayuq gi, yhang eq zang rahá zo râ matú, Yesuq lé ji ri. Haû mù, Yesuq gi, haû yhûm má wang ê mù zang zo râ ga siboî nàm má zung tô ri. ³⁸ Nghut kôlhâng, Hparishe wá gi, zang zo râ hí má Yesuq loq a chí é lé, myàng luî maú nyi ri. ††

³⁹ Haû mù luî, Yhumsîng Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chí yúng nyí kômù, nungmoq é unghkaû má gi, lú zo lú shuq é eq agè ashop é hkyô pé byíng zan tô ri. ⁴⁰ Byù bâm pé ê, ahte † lé le, ahtoq †† lé le, saí sù gi, Garai Gasang rayuq za nghut é lé, a sé kó lhú?

⁴¹ Nghut kôlhâng, ahte má bo é zè pé lé, ra châ é bang lé byí pyám keq; haû hkûn, nungmoq é matú banshoq gi, sân-yúng lô râ nghut lhê.

⁴² Hparishe pé ê, nungmoq gi, dingnyé wó ri, hkâsu mù gà le, nungmoq gi, gau-tsáng, shingtón pé eq zangxun mhan-haq ajù jù mã é, xê gambùm ragam-

†† Kumlhá gi, Yonaq, ngozô wamdaú má sum nyí lúng é su, Yesuq le, shí bê mai sum nyí nghû râ nyí má, dum dui toq lô râ hkyô lé taí nau é nghut ri. † Myibung gà é gi, tengmán é mungdang lé wó sê yu é a-tsam lé, taí é nghut ri. †† Yudaq htûng tarâ má gi, zang a zo shí má loq chí râ lhê. † Ahte † gi, i-myt unghkaû lé taí ri. †† Ahtoq gà é gi, gungdu lé taí ri.

bùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhaí pyâm tô akô. Xê gambùm ragambùm byí é lé le cháng luî, tarâ dingmán é hkyô eq Garai Gasang lé chyitdap é hkyô lé le, kut nyí râ lhê.

⁴³ Hparishe pé ê, nungmoq gi, dingnyé wó ri, hkâsu mù gà le, tarajong pé mã é ahkyak dik é zùng jang pé lé le, gai pé má hkunggâ é èq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gà le, nungmoq gi, ahkô a dong lo mù, byu pé a sé luî, ahtoq mai sô laí é lupdùng eq du akô." ga taí ri.

⁴⁵ Haû hkûn, tarâ sará rayuq gi, "Sarâ ê, nàng haû su gà é gi, ngamoq lé le rhoi lhôm nyi é nghut bê." ga Yhang lé tû taí ri.

⁴⁶ Haû su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gà le, nungmoq gi, byu pé lé, wùn waq râ wuí é noqkuq htûng tarâ wòlai lé wùn nhâng luî, yhumsîng yhang gi, wò haû lé loqnyhuí èq lháng, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gà le, nungmoq gi, nungmoq é îchyí îwâ pé sat pyâm é myiqhtoí pé é lup lé luqtsuq tsuq akô. ⁴⁸ Haû mù luî, nungmoq gi, nungmoq é îchyí îwa pé é muzó lé, myit bo huí é bang nghut nyi akô. Hkâsu mù gà le, yhangmoq gi, myiqhtoí pé lé sat pyám mù, nungmoq gi, lup haû pé lé luqtsuq tsuq akô. ⁴⁹ Haû mù luî, Garai Gasang, Yhâng é hpaqchyí byéng-yá mai taí é gi, 'Myiqhtoí pé eq lagyô pé lé, ngò yhangmoq chyáng nhang kat râ nghut lhê; haû bang mã é ra-am lé gi, yhangmoq lhom sat pyám mù, ra-am lé gi, zing-ri kó râ nghut lhê.' gà ri. ⁵⁰ Haû su mù luî, mau htoq xâng hkûn lhê é, Abelaq é sui mai, hkungga gyap eq noqkuq yhûm gyoro má sat pyám huí é Zahkariq é sui jé shoq, shun pyâm é myiqhtoí pé é sui banshoq bâng é manglat gi, shí pyat mã é byu pé lé hûn râ nghut lhê. ⁵¹ Ngò, nungmoq lé taí kôlé, manglat haû pé lé gi, shí pyat mã é byu pé lé, gè gè yhang hûn râ nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gà le, nungmoq gi, byu pé Garai Gasang lé sé ra zoqshi lé yu pyám byi kômù, yhumsîng yhang le a sé, sé naû bang lé le, hkûm zing tô akô nghut ri." ga taí ri.

⁵³ Yesuq haû mai htoq ló é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuí é dangmyi myo myo myi luî, gyám wú nyi akô nghut ri.

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

12 Haû u, byù hkyíng mun zup zîng lò mù, rayuq eq rayuq lháng záng nàng lhum shoq dut nyi é hkûn, Yesuq, Yhâng é chángzô pé lé taí hi é gi, "Gegùn labyoq kut é Hparishe pé é múmchi lé koi sidiq pyám keq. ² A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê. ³ Haû mù luî, nungmoq, mauchut hkaû má haq taí é dang banshoq lé, myoq myàng maubó má wó gyô bùm kó râ nghut lhê. Gok hkaû má, dang-

soq soq é lé le, yhumhkûng htoq mai taí pyo bùm bekô râ nghut lhê.

⁴ Ngá buinùm wui ê, Ngò, nungmoq lé taí kôlé, gungdu lé za wó sat pyám mù, woi-nyí lé haí le a wó kut é bang lé, hkâgyuq kó. ⁵ Nghut kôlhang, nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyâm é htâng má, woi-nyí lé ngaraí ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, haú yuq lé za, gyuq nyi keq. ⁶ Johkyáng ngo du lé, gyi ht-ingchap í chap eq wó ùng pyâm lhê a nghut kó lhú? Haú johkyáng radu lé lháng, Garai Gasang gi, tô-myhí pyâm é a nghut. ⁷ Garai Gasang gi, nungmoq é ulhum mâ é xâm banshoq lé lháng, nghap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má lháng gù je bo é bang nghut lhê.

⁸ Ngò, nungmoq lé taí kôlé, byu pè hí má Ngo lé lhom yín yu é sù ó yuq nghut kôle, Garai Gasang é maumang lagyô pè é hí má, haú Byu Yhangzo gi, haú yuq lé lhom yín yû râ nghut lhê. ⁹ Nghut kôlhang, byu pè é hí má Ngo lé he-ngik pyâm é sù lé chyaú gi, Garai Gasang é maumang lagyô pè é hí má, he-ngik pyâm râ nghut lhê. ¹⁰ Haú Byu Yhangzo lé dang dông shut é sù gi, mara hkyut byí é wó hui ra nghut lhê; nghut kôlhang, haú Chyoiyúng Woi-nyí lé rhoí dang taí pyâm é sù gi, mara hkyut byí é hui râ a nghut.

¹¹ Byu pé nungmoq lé jéyang râ matú tarajong pé má le, agyi suwún wui eq ahkáng ayá wó bâng é hí má le, shuí e ló kô é hkûn, hkâsu kut râ lé le, hkâsu nghu tú taí râ lé le, hkâ-myt chiq kó. ¹² Hkâsu mù gâ le, haú u lé yhang, Chyoiyúng Woi-nyí gi, nungmoq hkâsu taí râ hkyô lé mhoqshit byi râ nghut lhê." ga taí ri.

Hpaqchyí A Bo É Sahtê Hpó Lé Dangtú Yu É Hkyô

¹³ Haú hkûn, shiwa hpúng hkaú mai, byù rayuq gi, "Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo taí byi laq." ga luí, Yesuq lé taí ri.

¹⁴ Yesuq gi, "Byù nàng ê, nungnhik tang ahtoq má tarâ agyi kut luí, ikun zè gàm byi râ gi, ngo lé ó hkyin tô é lhú?" ga luí, yhang lé tú taí ri. ¹⁵ Yesuq yhangmoq lé taí é gi, "Myoqnoq é hkyô banshoq mai, nungmoq é i-myt lé hkûm zìng luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

¹⁶ Dangtú ralhum dông mai le, yhangmoq lé Yesuq taí é gi, "Sahtê rayuq gi, yhang é yò pé má guqzo muilhum gyaf já ri. ¹⁷ Haú mù luí, yhang é unghkaú má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

¹⁸ Dum nghut jáng, yhang gi, 'Ngò ísu kut wú râ abe, ngá é chyí xau pé lé hpyoq pyám luí, je kô é chyí pé lé saí râ nghut lhê. Chyí haú pé má ngá é guqzo muilhum pé eq sutzè banshoq lé, tsìng kat to luí, ¹⁹ ngá é i-myt lé ísu nghu taí râ, "I-myt ê, zanwut myáng myáng é matú, zè gè myo myo ngò tsìng to bê. I-myt nàng zim za kut nyi aq hkoí. Zo mù, shuq mù, ngón ngón nyi aq." ga' gâ ri.

²⁰ Nghut kôlhang, Garai Gasang gi, 'Byù gò ê, náng é asak lé, hkû-myín yhang, wup yu pyám byí é nghut jáng, nàng tsing hkong tô é zè pé gi, ó yuq é matú dut râ lhú?' ga luí, yhang lé taí ri.

²¹ Haú eq rajung za, yhumsing é matú sutzè hkong to mù luí, Garai Gasang é hí má myung nyi sù gi, haú yuq su nghut râ nghut lhê." gâ ri.

Myit A Chiq É Za Garai Lé Lumjíng Râ Hkyô

Mht 6:25-34, 19-21

²² Yesuq, Yhang é chángzô pé lé dum taí é gi, "Haú mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myt chiq kó. ²³ Asak gi, zoshuq htoq má, gungdu gi, mebù htoq má, je ahkyak lhê. ²⁴ Nghonoq pè é hkyô lé myit wú keq; yhangmoq gi, kyô hkyó kyô shu a kut kó; guqchyí eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pè htoq má je riyhang hpaudap nyi lhê a nghut kó lhú?

²⁵ Nungmoq má, ó yuq wá, myit chiq é eq, yhumsing é asak lé radúng kô wó jat yù kó râ lhú? ²⁶ Haú su mù luí, tiq dik é hkyô lé lháng, nungmoq a wó kut kô é nhîng, haí mù luí gotù hkyô pé lé, myit myô nyi akô lhú?

²⁷ Htutbó ban † pé hkâsu kut kô lo é lé, myit wú keq. Haú pé gi, mù le a zui, hkyîng le a duí kó nghut ri. Nghut kôlhang, Ngò, nungmoq lé taí kyo kôlé, Hkohkâm Sholumon hpúng kô dik u lé wut é mebu lháng, ban haú rabó lé a hkyit nghut ri. ²⁸ Lumjíng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lháng, Garai Gasang haú su kut hut é nghut le gi, nungmoq lé, je riyhang hut râ a nghut kó lhú? ²⁹ Nungmoq gi, haú zo haí shuq râ lé hkâho nyi kó; haú eq séng luí lé hkâ-myt chiq nyí kó. ³⁰ Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Íwa Garai Gasang gi, haú pé lé nungmoq râ é hkyô, sé byí nyi lhê. ³¹ Nungmoq kúm gi, Yhang é mingdán lé ho nyi keq, haú jáng, haú pé, nungmoq lé puq byi râ nghut lhê.

³² Sau hpúng zô pé ê, hkâgyuq ko, hkâsu mù gâ le, nungmoq é Íwa Garai Gasang gi, Yhang é mingdán nungmoq lé byí nau nyi ri. ³³ Nungmoq wó é zè pé lé ùng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot eq le a wó zô é sutzè lé mauhkûng htoq má hkong to keq. ³⁴ Hkâsu mù gâ le, náng é sutzè joq jang má, náng é i-myt le jé nyí râ nghut lhê.

Yesuq Dum Jé Lé Lô Râ Hkyíng Lé Machya Nyí Râ Hkyô

Mht 24:45-51

³⁵ Nungmoq gi, hpyihit hit luí, (mù zui râ matú rì rì kut to keq); nungmoq é myibung lé tuq to mù, ³⁶ myi-háng poí mai dum taú lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wui su kut nyí keq. ³⁷ Haú yhumsing jé lo le, machya nyi láng é dui-nhâng

† Htutbó ban gi, yúng dik é yosô ban nghut lhê.

zoshâng wuì gi, hkungsô wó nyi râ. Hkâsu mù gê le, ngò, nungmoq lé teng za taí kôlé, haû yhumsîng hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq râ nghut lhê. ³⁸ Gunggàm yoq lé nghut kôlhang, woq tân hkûn lé nghut kôlhang, haû su kut machya nyi é lé, yhumsîng hpó lo myang é nghut le gi, dui-nhâng zoshâng haû bang hkungsô wó nyi ri. ³⁹ Yhumsîng hpó rayuq, hká u má hkau sù lé lô râ lé, sê tô é ru nghut le gi, yhang machya nyi luí, yhang yhûm lé a wó hput htong nhâng râ nghut é lé, bûn sê nyi keq. ⁴⁰ Haû mù, nungmoq le rì rì nghut nyí keq; hkâsu mù gê le, haû Byu Yhangzo gi, a bûn nùng má jé lé lô râ nghut lhê." gâ ri.

⁴¹ Haû hkûn, Petruq gi, "Yhumsîng ê, dangtú shí gi, ngamoq lé za, taí é nghut lhê lhú? Haû a nghut jáng, lhunglhâng bang lé taí é dông nghut lhê lhú?" ga myí ri.

⁴² Haû jáng, Yesuq gi, "Lumgíng é eq hpaqchyí bo é sùt zum sù gi, hká yuq nghut lhê lhú? Haû yuq gi, yhang yhumsîng é dui-nhâng zoshâng wuì lé ahkýng jé jáng zoshuq gâm byi râ matú, yhumsîng hpô èq hkyin to sù dut râ nghut lhê. ⁴³ Yhumsîng hpô dum taú lo é hkûn, haû su kut nyí lánng é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za taí kôlé, yhumsîng hpó haû gi, yhang é sutzè banshoq, dui-nhâng zoshâng haû lé ap to râ nghut lhê. ⁴⁵ Nghut kôlhang, dui-nhâng zoshâng haû gi, yhang é i-myt unghkaû má, 'Ngá é yhumsîng hpó jé lô râ gyai myáng ashí.' ga myit pyám mù, dui-nhâng zoshâng luzúm wuì myiwe, yuqgè lé nhuq bat é eq, zo yê shuq yê í shuq wut nyi é nghut jáng, ⁴⁶ dui-nhâng zoshâng hau é yhumsîng hpó gi, yhang a myitbyu tô é buinyi eq yhang a sé tô é ahkýng má jé lô mù, yhang lé jap pyám luí a lumjíng bang eq rahá nyhi pyám râ nghut lhê.

⁴⁷ Yhumsîng hpô é i-myt lé sê to kôlhang, yhang ô nau é dông a cháng, rì rì le a hen tô é dui-nhâng zoshâng gi, yhang yhumsîng èq nhuq bat é lé, myo myo hui zo râ nghut lhê. ⁴⁸ Nghut kôlhang, a sé mù kut shut sù kúm gi, shau za bat é hui râ nghut lhê. Haû eq rajung za, Garai Gasang gi, myo shoq wó yû su chyáng mai, myo shoq dúng yû râ nghut lhê. Myo myo ap byí tô é hui su chyáng mai, je myo shoq dum dúng yû râ nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng râ matú nghut lhê. Myi haû dap to lánng é nghut le gi, ngò ô nau é hkyô jup byíng bê. ⁵⁰ Nghut kôlhang, ngò hkam yû râ é baptisma † rajung joq ashí, haû a hkam yû yû gi, ngò gyai yhang hkâm zo wuí nyi ri. ⁵¹ Ngò jé lé é gi, myidàm htoq má simsaq hkyô byi râ matú nghut nhô ngam akô lhú? Haû dông a nghut, Ngò,

† Shí mã é baptisma gi, Yesuq, ajung jung hpuzo mù shí hkâm é hkyô lé taí é nghut lhê.

nungmoq lé taí kôlé, byu pé lé lhoq pyô lhoq kang râ matú sheq ru nghut lhê. ⁵² Haû su mù, ahkuí mai rayhûm za mã é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê. ⁵³ Yhângwa gi, yhang é yuqzo eq, yuqzo gi, yhangwa eq, yhangnu gi, yhang é byizo eq, byizo gi, yhangnu eq, yhangmhoí gi, yhang dumó eq, yhang dumó gi, yhangmhoí eq kut, ngá é yanmai, rayuq eq rayuq byoq gâng lhûm bùm bekô râ nghut lhê." ga taí ri.

Dut Lò Râ Hkyô É Kumlhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berâ.' ga radá dâm lhaq taí taí mu akô, haû eq rajung za le, dut lò lò mu ri. ⁵⁵ Dum nghut jáng, maupyí shut mã é lài lo le, 'Bui htân berâ.' ga lhaq taí taí mu akô, haû eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haû su nghut kô le nhîng, haí mù luí, shí ipyat mã é kumlhá lé gi, a sê gam hkoq dut tô akô lhú?

⁵⁷ Haû eq rajung za, haí mù haû dingmán é hkyô lé yhumsîng yhang yhang a wó doqdân yû kô é lhú? ⁵⁸ Dangké, nang lé yui tsuq sù eq rahá, tarâ agyi wá chyáng e ló le, hkyô má yhang eq ngón shoq byin hpyé huí yû aq. Haû a nghut jáng, yui yhumsîng gi, nang lé tarâ agyi chyáng é dé pyám luí, tarâ agyi gi, htóng hkyó su chyáng, nang lé ap pyám luí, yhang gi, nang lé htóng má lhûng pyám râ nghut lhê. ⁵⁹ Ngò, nang lé taí lé, yuichyín haû a ban xap xap gi, htóng haû mai nàng wó htoq ló râ a nghut." ga taí ri.

Myit A Lhîng Jáng Shi Hten Byuq Râ

13 Haû hkûn, haû má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyám é hkyô, Yesuq lé lé taí kyô akô. ² Yesuq gi, "Galile byù haû bang haû su kut hui zo kô é yanmai, yhangmoq gi, gotú Galile byu pé banshoq htoq má, yubak je myô akô nghû, nungmoq myit ngam akô lhú? ³ Haû su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haû eq rajung za shi hten byuq kó râ nghut lhê. ⁴ Haû htoq agó, Siloam wà mã é machya gyop gyó luí, nhê sat huí é byù raxe shit yuq gi, Yerusalem wà mó mã é byù banshoq bang htoq má mara je kô akô nghû, nungmoq myit ngam nyi akô lhú? ⁵ Haû su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haû eq rajung za shi hten byuq kó râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhang é tsibiyiq hkyâm má, maihpáng gâm ragàm hò tô ri. Yhang agàm haû má, ashí ê ho wú le, zui tô é a myàng nghut ri. ⁷ Haû hkûn, yhang gi, 'Wú aq, ngò sum zân tup maihpáng gâm haû má ashí ê ho wú le, a

myàng nghut ri; haû lé htuaq pyám aq. Haî mù, maumyî aha agó kut yuq nhang tô lhê lhú?' ga luî, tsibiyiq hkyâm zúng sù lé taî ri.

⁸ Hkyâm zúng sù gi, 'Yhumsîng ê, hkûzân za gi, yuq tô wú shi sháng gaq, shigâm hau é lhîngkhyuq má ngò du lhîng to mù, myîhpún kat luî bóm byi wú shirâ. ⁹ Htang zàn má ashi zuî é nghut le gi, yuq to sháng gaq, ashi a zui é nghut le kúm gi, htuaq pyám râ nghut lhê.' ga luî, hkyâm yhumsîng lé tâ taî ri." gâ ri.

Bánno Buinyî Má Gùng Loq Hten Sù Lé, Lhoq Gê Byî É Hkyô

¹⁰ Bánno buinyî lé, Yesuq gi, tarajong ralhuma má, mhoqshit nyi ri. ¹¹ Haú hkûn, haú má raxe shit zân tup nat dap luî, gùng loq lhoq hten huî é myiwe rayuq le nyi tô ri. Yhang gi, dàngngóm luî, gungdu ratsuí lháng a wó lhoq nyhâng lô é sù nghut ri. ¹² Yesuq gi, myiwe haû lé myàng jáng, yhâng chyáng wut yù mù, "Myiwe myhî ê, nàng, nòhpyo mai gè berâ." ga luî, ¹³ yhâng é ahtoq má loq ke byî ri. Haú hkûn jáng, myiwe haû gi, nyàng za dum wó yap luî, Garai Gasang lé hkya-ôn nyi ri.

¹⁴ Haû mù, Bánno buinyî lé, Yesuq nòhpyo lhoq gê byî é yanmai, tarajong má up sù gi, wú nhik-yo luî, "Mù wó zuî é buinyî hkyuq nyí joq tô le, buinyî haú pé má, lé wó lhoq ge yù lhê. Haû mù, Bánno buinyî má gi, hkâkut kó." ga luî, shiwa byu pé lé taî kat ri.

¹⁵ Haú hkûn, Yhumsîng Yesuq gi, "Gegùn labyoq kut bang ê, nungmoq yuq hkangmó gi, Bánno buinyî lé, yhumsîng é no, logúng pé lé, hkup mai hpông htoq yù mù uchyam byi huq huq kut akô a nghut lhú? ¹⁶ Haû nghut le gi, raxe shit zân gón Tsadán èq tuî to huî é, Abraham é yhangzo yhangshu myiwe zo shî lé, Bánno buinyî má Tsadán loq mai, hkyut byi a gíng râ lhú?" ga tâ taî ri.

¹⁷ Haû su ga taí jáng, Yhang eq i-myit shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

Angshi Cham Eq Munchi Dangké

Mht 13:31-33; Mrk 4:30-32

¹⁸ Haú hkûn, Yesuq taî é gi, "Garai Gasâng é mingdán gi, haî eq wuí lhê lhú? Ngò hai eq taî kê wú râ lhú?

¹⁹ Haû gi, byù rayuq mai, yhâng é hkyâm má hô tô é angshi cham eq wuí ri. Angshi cham haû gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

²⁰ Yhang dum xoq taî é gi, "Garai Gasâng é mingdán lé, ngò hai eq taî kê wú râ lhú? ²¹ Haû gi, myiwe zo rayuq èq sungso mún sum bûng má yu nyhó luî, haú pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong

Mht 7:13-14, 21-23

²² Hau htàng, Yesuq gi, Yerusalem wà mó shut laî e ló uchyang, rawà bàn rawà má wàng mù, mhoqshit byî ri. ²³ Haú hkûn, byù rayuq gi, "Yhumsîng ê, hkyi yu é hui râ bang gi, shau za nghut râ lhú?" ga luî, Yesuq lé myî ri.

²⁴ Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq ga shikut wú kó râ. Nghut kôlhang, a wó wâng kó râ nghut lhê. ²⁵ Yhumsîng hpó, † hkum toq myhî pyâm é htàng má sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô!' ga luî, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tâ taî râ nghut lhê.

²⁶ Haû jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byî wú bê nghut lhê.' ga taí bekô râ.

²⁷ Nghut kôlhang, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tâ taî kat râ nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtoî pé banshoq bang nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luî, haú jowò má ngaubyi ngaú nhap eq zuî kyik kyik shoq hpuzô nyi bùm bekô râ nghut lhê. ²⁹ Hau hkûn, buihtoq, buiwàng, maupyî, mautsûng mâ é mingdán myo myo mai byu pé lé luî, Garai Gasâng é mingdán zoshuq poî má myang zùng kó râ nghut lhê. ³⁰ Haú hkûn, ahkuî htàng gyó nyî bang gi, hí bekô râ; ahkuî hî to bang gi, htàng gyó bekô râ." ga luî, yhangmoq lé taî ri.

Yerusalem Wà Mó Eq Séng Luî, Yesuq Taî É Hkyô

³¹ Haú u lé, Hparishe pé ra-am gi, Yesuq chyáng lé luî, "Shî jowò mai htoq ló byuq aq. Hkâsu mù gâ le, Herut gi, nang lé sat râ hen nyi ri." ga luî, Yhang lé taî akô.

³² Haû jáng, Yesuq gi, "Hkû-nyí, napmá, †† ngò nat gang hkat pyám luî, nô zo hpýo zo lhoq gê byi râ nghut lhê; sum nyí nghû râ buinyî ‡ má sheq, ngá mù bàn râ nghut lhê.' nghû luî, agè ashop é wamhkui haû lé ló taî kyo keq. ³³ Haî wá dut kôlhang, hkû-nyí, napmá, sânghe nyí, ngò gi, e ló râ dut ashî. Hkâsu mù gâ le, myiqhtoî pé gi, Yerusalem wà mó mai lai luî gotú jowò má a shi wú kó nghut ri.

³⁴ Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang lé, luq-

† Yhumsîng hpó gi, Garai nghut lhê. Yhûm gi, Garai é mingdán lé taî é nghut lhê. †† Hkû-nyí, napmá gâ é gi, Yesuq mingkan htoq má mù zui râ ahkyíng lé taî é nghut lhê. ‡ Sum nyí nghû râ buinyî gâ é gi, Yesuq mingkan htoq má mù ban zuî é buinyî lé taî é nghut lhê.

gok èq dú sat sat kut é myuq nàng ê, woqzìng gi, yhangzò pé lé, yhâng é dùng hkaù má tsìng lhùng yu é su, nungzò pé lé, Ngò hkâ-myhó dâm shuì tsìng yù naù kôlhang, nàng a dóng nghut ri. ³⁵ Wú keq, nungmoq é yhùm gi, nungmoq é matú chamchuyiui dut pyâm to berâ nghut lhê; Ngò, nungmoq lé taí kôlé; 'Yhumsìng é myìng mai jé lé lo é Sù gi, hkungsô wó nyì sháng gaq.' † nghù, nungmoq a taí taí gi, Ngo lé wó myáng kó rà a nghut lo." ga luí, yhangmoq lé taí ri.

Hparishe Rayuq É Yhùm Má Yesuq Jé Nyi É Hkyô

14 Bánno buinyì ra-nyí má, Yesuq gi, zang zo rà ga Hparishe suwún rayuq é yhùm má, ê wang nyi tô le, haù má é bang gi, Yhang lé gyui gyui chòm wú nyi bum akô. ² Haù u lé, wuì wam ana dut sù rayuq gi, Yesuq é hí má jé nyi tô ri. ³ Haù mù, Yesuq gi, "Bánno buinyì má nòhpyo lé lhoq gê byí é gi, tarâ wang lhê lhú, a wang é lhú?" ga luí, tarâ sará pé eq Hparishe pé lé myí kat ri. ⁴ Nghut kôlhang, yhangmoq gi, zim za dut byuq akô. Haù hkùn, Yesuq gi, nòhpyo hui sù lé, zuì to mù, lhoq gê byi luí, nhang kat ri.

⁵ Hau htàng, Yesuq gi, yhangmoq lé, "Nungmoq chyáng má é rayuq yuq gi, yhumsìng é yhangzo rayuq yuq, haù a nghut jáng, no myang radu du, Bánno buinyì má, wuìhtung má byit gyó le, haù hkùn jáng, a xe htoq yu é za, wó nyí kó rà nghut lhê lhú?" ga myí kat ri. ⁶ Yhangmoq kúm gi, dang haù hkun lé, haì le a wó tũ taí kó nghut ri.

⁷ Haù hkùn, Yesuq gi, ji tô é bang jé réng é zùng jowò pé hkyin yu nyi kô é lé myàng jáng, yhangmoq lé dangtú dōng taí é gi, ⁸ "Byù rayuq yuq nang lé, myiháng poí má ji é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, ji to shirâ abe. ⁹ Ji tô é nghut jáng gi, nungnhik lé ji tô é yhumsìng hpó lé lô mù, 'Shí yuq lé jowò hui byi aq.' ga luí, náng lé lé taí jáng, nàng hoq hpu luí, hkyí htàng shut huì zùng ra rà nghut lhê. ¹⁰ Haù mù luí, supé nang lé ji le, hkyí htàng má é zùng aq; haù hkùn, nang lé ji sù lé mù luí, 'Buinùm hpó ê, shí je réng é jowò má huì doq zùng aq.' ga luí, nang lé taí jáng, nàng eq rahá zung tô é bíng lhunglhâng bâng é hí má, nàng gi, myoqdong wó rà nghut lhê. ¹¹ Hkâsu mù gâ le, yhumsìng gùng lé waq toq é sù ó yuq nghut kôle, lhoq nyhum pyâm é hui rà nghut lhê; yhumsìng gùng lé, lhoq nyhum é sù kúm gi, waq toq é hui rà nghut lhê." ga taí ri.

¹² Hau htàng, Yesuq yhang lé ji é yhumsìng hpó lé taí é gi, "Napzang, a nghut jáng, myinxùn lé nàng byi tso nau le gi, náng é buinùm wuì, âgu âmâng pé, mungmoq wuì, sùt wó é yhumkyo chang pé lé hkâjì tso. Haù bang lé jì tsò é nghut jáng gi, yhangmoq nang lé dum jì tsò é èq, jeju dum tau kó rà nghut lhê. ¹³ Nghut kôlhang, nàng poí kut mù, byi tso byi huq nau é nghut le gi, myùng bang, hkyí gyui loq hten bang eq myoqjit é bang lé, jì tso aq. ¹⁴ Haù su kut jáng, nàng hkungsô wó nyí rà nghut lhê. Yhangmoq nang lé jeju a wó tau kôlhang, dingmán bang dum dui toq lo é buinyì má, hau é akyù lé, nàng wó hkam yù rà nghut lhê." gâ ri.

Zoshuq Poí Mó Lé Dangtú Yu É Hkyô

Mht 22:1-10

¹⁵ Yesuq eq rahá zò zung tô é byù rayuq gi, dang haù wó gyo jáng, "Garai Gasàng é mingdán má é zoshuq poí má wó zo rà sù gi, hkungsô wó nyí sù nghut rà." ga luí, Yesuq lé taí ri.

¹⁶ Yesuq haù yuq lé tũ taí é gi, "Byù rayuq gi, myinzang byi tso rà ga, zoshuq poí mó ralhūm hen to mù, byù myo myo lé ji tô ri. ¹⁷ Zang byi tso rà yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga ê châng wut nhang ri.

¹⁸ Nghut kôlhang, haù bang banshoq gi, zoshuq poí má a ê rà dōng chyat he pyâm akô. Rayuq sù gi, 'Ngò yohtung rahkyang wui tô lhê; haù lé ê wú rà dut ri. Haù mù, ngo lé ahkáng byi shi laq.' ga yhang lé taí ri.

¹⁹ Dum rayuq le, 'Ngò, nohtó ngo zúm wui tô lhê; haù pé lé dui nhang chyam wú rà dut ri; ngo lé ahkáng byi shi laq.' ga taí wô ho ri.

²⁰ Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

²¹ Haù jáng, dui-nhâng zoshâng taù lò mù, yhâng é yhumsìng lé haù hkyô banshoq lò taí kyô ri. Haù hkùn, yhumsìng hpó gi, nhikmó gyô yo mù, 'Wà má é hkyô mó hkyô zo hkat hkangmó má hân hân ê mù luí, myùng bang, hkyí gyui loq hten bang eq myoqjit bang lé, ê ji lò aq.' ga luí, yhâng é dui-nhâng zoshâng lé nhang kat ri.

²² Hau htàng má, dui-nhâng zoshâng gi, 'Yhumsìng ê, nàng nhang é eq rajung za ban kut bê; nghut kôlhang, zùng rà jowò gi, mân tô ashí.' ga taí ri.

²³ Haù su ga jáng, yhumsìng hpó gi, 'Ngá yhùm byíng rà matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuì lò aq. ²⁴ Nang lé ngò taí lé, hí lé ji to huì é bang rayuq lháng, ngá é zoshuq poí lé wó chyim wú rà a nghut.' ga luí, yhâng é dui-nhâng zoshâng lé taí ri." gâ ri.

Yesuq É Chángzo Wó Dut Rà Matú

Mht 10:37-38; 5:13; Mrk 9:50

²⁵ Byù hpûng mó Yesuq eq rahá é ló kô é hkùn, Yesuq gi, haù bang lé lhing wú luí, ²⁶ "Ngá chyáng lé sù ó yuq nghut kôle, yhumsìng é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haù htoq agó, yhumsìng é asak lé le, ngo lé chytidap é htoq má je chytidap sù gi, ngá é chángzo a wó dut.

²⁷ Yhumsìng é tapzîng lé a waq é za, Ngá htàng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng má é byù rayuq yuq, tsehtung yhùm ralhūm saí nau le, yhang gi, yhùm haù ban saí rà matú, ngùn hkâ-myhó bàn rà eq yhang wó tô é ngùn luq a luq é lé, zùng mù luí, hí a sôn wú é byù nyi kó rà lhú? ²⁹ Laq má mù, apùn awang gi, saí hi to mù luí, a wó lhoq pân é nghut jáng, ³⁰ myàng é bang banshoq èq, 'Shí yuq gi, apùn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô rà nghut lhê.

† 13:35 Hkya-on 118:26

³¹ Dangké, hkohkâm rayuq gi, gyè zan râ hen le, gyezo í mun eq lé sù hkohkâm lé, gyezo ramûn eq za lhom wó zân ûng râ, a wó zân ûng râ lé, zùng mù luí, hí a myit wú é nyi râ lhú? ³² A ûng râ dut le gi, gyè pé we we má nyi tô ashî hkûn lé, lagyo suwún pé lé nhang kat luí, simsaq râ matú htingrám pyám ra râ nghut lhê. ³³ Haû eq rajung za, nungmoq chyáng mà é ó yuq nghut kôlhang, yhumsîng wó é zè banshoq lé, a pyâm to sù gi, ngá é chángzo wó dut râ a nghut.

³⁴ Xo gi, gè lhê. Nghut kôlhang, xomân kân byuq jáng gi, haû lé hai èq dum wó lhoq ngam yù râ lhú? ³⁵ Haû gi, myigung matú le, myihpún kut râ matú le, akyû a bò lo. Haû mù luí, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga taí ri.

Byuq Byuq É Sau

Mht 18:12-14

15 Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zîng bum akô. ² Haû hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

³ Haû mù, Yesuq yhangmoq lé dangtú dông taí é gi, ⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haû lé, myàng shoq a châng ho yu é, ó yuq wá nyi kó râ lhú? ⁵ Byuq byuq é sau haû lé myang hô jáng, gyaí gau é i-myit èq goqsân htoq má bún kê chûng mù, ⁶ yhûm má jé jáng, yhâng é buinùm ji-myi wuî eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí râ nghut lhê. ⁷ Haû eq rajung za, Ngò, nungmoq lé taí kôlé, myit lhîng a râ é dingmán bang gaú xe gau yuq lé gabú é htoq, myit lhîng é yubak dap sù rayuq é yanmai, mauhkûng htoq má, je riyhang gabú jowò dut râ nghut lhê.

Byuq Byuq É Ngùn Chap

⁸ Dum nghut jáng, dangtú ralhum gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum ê shum luí, myang yù shoq rago za, ho wú râ a nghut lhú? ⁹ Haû lé ho myàng jáng le, yhâng é buinùm ji-myi wuî eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga taí râ nghut lhê. ¹⁰ Haû eq rajung za, Ngò, nungmoq lé taí kôlé, myit lhîng é yubak dap sù rayuq é yanmai, Garai Gasâng é maumang lagyô pé hí má, gabú jowò dut râ nghut lhê." gâ ri.

Byuq Byuq É Yuqzo

¹¹ Yesuq xoq taí é gi, "Byù rayuq gi, yuqzo í yuq wó ri. ¹² Haû nhik mà é tiq sù yuq gi, yhâng wa lé, 'Áwa ê,

ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byí kat ri.

¹³ Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsa pyám bê. ¹⁴ Haû su kut ngunzè wó mi-wó lé ban langsa pyám é htâng má, haú mau má mutmó gyo é yanmai, yhang gi, asho awui dut lo nyi bê nghut ri. ¹⁵ Haû mù, haú mau mà é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri. ¹⁶ Haú hkûn, yhang gi, waq jùm zô é shigyang cham pé lé lháng, zo naû shoq dut kôlhang, ó yuq le a byi zo kó nghut ri.

¹⁷ Haû mù, yhang myit bún lo é gi, 'Ngá wâ chyáng nyi é langchyáng pé gi, agùn agó myàng zô nyi kó râ nghut lhê. Nghut kôlhang, ngò gi, shí jowò má, zo mut wuîshít é eq shi ló râ dut bê. ¹⁸ Ahkuí, ngò toq mù, ngá wâ chyáng taú ló luí, 'Áwa ê, ngò gi, Garai Gasang lé le, nang lé le, shut bê. ¹⁹ Ahkuí mai ngò gi, nung zo nghû râ a gíng lo, hau é yanmai, náng é langchyáng rayuq dông za ngo lé nyi nhâng laq." nghû luí, ló taí râ.' gâ ri. ²⁰ Hau htâng, yhang toq luí, yhâng wâ chyáng ló le, yhang we we má ru nghut ashî hkûn mai, yhâng wa gi, yhang lé lhom myàng jáng, wú shogyo luí, dín ê mù, yhangzô é lingzing má è po pyik dap to luí, bopuq puq byí ri.

²¹ Haû hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû râ a gíng lo.' ga luí, yhâng wa lé dúng tóngbán ri.

²² Yhângwa kúm gi, yhâng é langchyáng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyí má le hkyí-tsung tsung byi keq. ²³ Tsô myum tô é nojûng zo le yu sat keq. Haû mù, nga-nhúng gi, zoshuq poí kut mù chôm ngón sháng. ²⁴ Haû mù gâ le, ngá zo shí yuq gi, shi byuq é mai, ahkuí dum dui bê; byuq byuq é mai le, ahkuí dum myàng bê.' ga taí ri. Haû mù, yhangmoq gi, ngón ngón zo shuq ló bekô.

²⁵ Haû u lé, yhangzo ko sù yuq kúm gi, yò má nyi tô ri. Yhang gi, yò mai yhûm shut jé lo nyi é hkûn, zîng út bat luí gó nyi é htê lé lò wó gyô ri. ²⁶ Haû mù, langchyáng rayuq lé wut yù luí, haú hkyô lé yhang myí wú le, ²⁷ langchyáng haû gi, 'Nung gu dum taú jé lô bê. Haû mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

²⁸ Dang haû lé wó gyo jáng, yhang gi, gyô nhik-yo luí, yhúmhkaû shut a wàng lo kut ri. Haû mù, yhâng wa htoq ê luí, yhang lé ê chyúq ri. ²⁹ Yhangzo kúm gi, 'Wú aq, ngò, shî-myháng shílo náng é jùn dông kut luí, hkâ-nhám le náng dang lé a lu laí wú. Nghut kôlhang, ngò ngá é luzúm wuî eq ngón kún râ matú, bainám zo radu lháng radàm le nàng a byi wú shi. ³⁰ Shiwa myhî pé eq zum yap wún luí, náng é sutzè lé lhoq pân pyâm é sù nung zo haû dum taú jé lô jáng kúm gi, tsô myum

tô é nojông zo lé, yhang é matú nàng sat byi bu-nhung!' ga luí, yhang wa lé tũ taí ri.

³¹ Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, nàng é chyat nghut lhê. ³² Nghut kôlhang, shí nung gu gi, shi byuq é mai ahkuí dum duì bê; byuq byuq é mai le, dum myàng bê. Haû mù, gabú hpo nghut bê.' ga luí, yhang lé taí ri." gâ ri.

Hpaqchyí Ge Dâ É Sùt Zum Sû

16 Yesuq, Yhâng é chángzô pé lé taí é gi, "Sahtê rayuq chyáng sùt zum sũ rayuq nyi ri. Haú yuq gi, yhang yhumsing é sutzè pé lé jai hpyuq pyám ri ga, yhang yhumsing é hí má, yhang lé mara lé hun akô. ² Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haû gi, hkâsu lhú? Nàng sùt zûm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sũ wó kut lo râ a nghut lo.' ga taí ri.

³ Haû jáng, sùt zum sũ gi, 'Ahkuí, ngò hkâsu kut lo râ lhú? Ngá é yhumsing gi, ngo lé sùt zum ayá mai lhoq hkyô pyám bê. Myí du myí hkop zo râ le ngò wum a bò; dung zo dung shuq râ le ngò hoq ri. ⁴ Ngo lé sùt zûm é ayá mai hkyô pyám htàng má, supé ngo lé yhangmoq é yhûm má lhóm hap yù râ matú, hkâsu kut râ hkyô lé ngò sé bê.' ga wó myit rot jáng, ⁵ yhang gi, yhang yhumsing hpó lé chyín dap tô é bang rayuq htàng rayuq lé wut yù mù, sâng-hi yuq lé, 'Ngá yhum-sing hpô chyáng nàng chyín hkâ-myhó dap tô lhê lhú?' ga myi jáng, ⁶ haú yuq gi, 'Xû rashô pûng dap lhê.' ga tũ taí ri.

Haû jáng, sùt zum sũ gi, 'Náng é jihpán yù luí, hân zùng mù, ngo xê pûng kut kâ to aq.' ga yhang lé taí ri.

⁷ Dum rayuq lé, 'Nàng hkâ-myhó dap tô lhê lhú?' ga myi jáng, haú yuq gi, 'Sungsô rashô bûng dap lhê.' ga tũ taí ri. Sutzum sũ gi, haú yuq lé, 'Náng é jihpán má shit xê bûng kut kâ to aq.' ga taí ri.

⁸ Haû a dingmán é sùt zum sũ lé, yhumsing hpó gi, hpaqchyí ge da sũ nghut ri ga hkya-ôn ri. Ngò shí lé taí é gi, mingkan zo wuí gi, yhangmoq é mingkan eq séng é hkyô pé má, maubó gung é yhangzo pé † htoq hpaqchyí je bò kô é yanmai nghut lhê. ⁹ Haû mù luí, Ngò nungmoq lé taí kyo kôle, a tara é sutzè pé èq buinùm ho nyi keq, haû mù, sutzè haû htûm byuq jáng, nungmoq lé, ahtum abyuq joq tô é yhûm má, lhóm hap yu é hui kó râ nghut lhê.

¹⁰ Tiq é mù má wó lum é sũ ó yuq nghut kôlhang, mù mó má le wó lûm râ nghut lhê. Tiq é mù má lhóm a zuí é sũ ó yuq nghut kôlhang, mù mó má le lhumzui râ a nghut. ¹¹ Haû mù, mingkan sutzè má lháng nungmoq lé a wó lûm kô é nghut le gi, haû tengmán é sutzè lé, nungmoq chyáng ó yuq wá kâm ap byi râ lhú? ¹² Supé é sutzè má, nungmoq lé a wó lûm kô é nghut le gi, nungmoq síng âng é sutzè lé, nungmoq chyáng ó yuq wá kâm ap byi râ lhú?

† Maubó gung é yhangzô pé nghu é gi, Garai Gasàng é yhangzô pé lé taí é nghut lhê.

¹³ Dui-nhâng zoshâng ó yuq nghut kôlhang, yhum-sing í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhê; haû a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga taí ri.

¹⁴ Ngùn myoqnoq é Hparishe pé gi, dang haû banshoq lé wó gyo kôjáng, Yesuq lé wuizui kut pyám byí akô. ¹⁵ Haû mù luí, Yesuq gi, yhangmoq lé, "Nungmoq gi, byu pé hí má yhumsing gùng lé yhumsing dingmán bang su kut shit mhaû é bang nghut akô; nghut kôlhang, Garai Gasang gi, nungmoq é i-myit unghkaû lé sé sũ nghut lhê. Byù é hí má hpaudap é pé gi, Garai Gasàng é hí má achay achyut é nghut nyi ri.

¹⁶ Jep é tarâ †† eq myiqhtoí pé é dang, ahko ahkáng wó tô é ahkyíng gi, wui-myhup sará Yohan jé lé é buinyí jé shoq nghut bê. Haú hkyíng mai gi, Garai Gasàng é mingdán hkyô gabú danglù lé, hko kyô nyi mù, yuq du jup gi, haú hkyô má htung chyíng wang ló bum akô. ¹⁷ Jep é tarâ mâ é tiq dik é dangjí eq myihkyet zo ralhum lé wó lhoq hten râ htoq, mauhkung eq myigùng hten râ gi, je lui râ nghut lhê.

¹⁸ Dangké, yhumsing é yhangmyi lé kàng pyám mù, myiwe gotú dum hâng yu é sũ ó yuq nghut kôle, su-myi lú é sũ nghut bê; yhumsing é yhanglàng eq gang bê myiwe lé hâng yu é sũ le, su-myi lú é sũ dut bê nghut ri." ga taí ri.

Sahtê Hpó Eq Lazaruq

¹⁹ Yesuq dum xoq taí é gi, "Radàm lé, sahtê rayuq gi, nè é eq nú-nhâm é mebu wut mù luí, nyí nyí bui bui zo ngón shuq ngón nyi ri. ²⁰ Yhâng é hkúmdong má gi, ragùngdũ é jeq byi tô é Lazaruq gâ é dung zo sũ rayuq lé, lé nyhi tô akô. ²¹ Haú yuq gi, sahtê wá é siboí mai gyó é agyó ahtàng lé, wú zô nau nyi ri. Hkui pé le yhang é dàm pé má, lé yoq byí nyi akô.

²² Htàng má, haû dung zo sũ shi byuq jáng, mau-mang lagyô pé gi, mauhkung má nyi é Abraham é tanghkoí má yhang lé shuí ló byí akô. Sahtê wá le shi byuq luí, yhûm pyám bekô nghut ri. ²³ Sahtê wá gi, ngaraí ming má dik shoq hpuzô nyi mù luí, tu wú kat le, we we má Abraham lé le, yhang é tanghkoí mâ é Lazaruq lé le, myàng kat ri. ²⁴ Haû mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achyí aku nyé é hui zô nyi ri. Haû mù, Lazaruq gi, yhang é loqnyhui ù èq wuì má tik yù mù, ngá é shô má wuì ra-poq zo hkâlhang lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

²⁵ Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyi bê.

²⁶ Haû mai gotú gi, shí mai nungmoq chyáng dap lé naû bang a wó dap shoq le, haû mai ngamoq chyáng

†† Jep é tarâ gâ é gi, Garai Gasang, Mosheq mai nga-nhúng lé byí tô é tarâ lé gâ lhê.

ó a wó dap lé rã matú le, ngamoq eq nungmoq é gyoro má, nik dik é langkung mó èq kyo pyâm to bê nghut ri.' ga tũ taí ri.

²⁷ Sahtê wá gi, 'Áwa ê, haũ nghut le gi, ngò, nang lé dúng nau ri. Ngá gũ pé ngo yuq nyi ashĩ; yhangmoq le ísu hpuzò é jowò má a jé sháng gaq, ²⁸ yhangmoq myit lhĩng shoq ló taí pun rã matú, Lazaruq lé ngá wã yhũm shut nhang kat byi laq ô!' ga luĩ, dũng wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoĩ pé nyi lhê; haũ bãng dang lé gyô yũ kó sháng gaq.' ga taí ri.

³⁰ Sahtê wá gi, 'Áwa Abraham ê, haũ su a nghut. Shi byuq é bang mã é rayuq yuq yhangmoq chyáng dum taũ lo é nghut le kũm gi, yhangmoq myit lhĩng kó rã nghut lhê.' ga taí ri.

³¹ Abraham gi, 'Mosheq eq myiqhtoĩ pé é dang lé yhangmoq a gyo kô é nghut le gi, shi byuq é bang mã é rayuq yuq dum dui toq ló mù, ló taí kyo kôlhãng, kãm gyo kó rã a nghut.' ga luĩ, yhang lé tũ taí ri.'" gã ri.

Mara Hkyut É Hkyô Eq Lumjĩng Myit

Mht 18:6-7, 21-22; Mrk 9:42

17 Yesuq, Yhãng chãngzô pé lé taí é gi, "Byu pé lé mara kut shut nhang é hkyô gi, joq htoq lô rã za nghut lhê. Nghut kôlhãng, mara kut shut nhang é hkyô lé lhoq htoq é sũ gi, dingnyé wó rã. ² Zoshãng shĩ bang mã é rayuq lé, mara kut shut nhang é sũ gi, yhãng é lingzing má luqluí long mó tuĩ hut byi luĩ, wuimau má é dú hkyô pyâm é huĩ é nghut le gi, yhang é matú je gè rã nghut lhê. ³ Nungmoq gi, yhumsĩng gũng yhumsĩng sidiq keq.

Nunggu nungmang nãng lé mara kut shut é nghut le gi, yhang lé tan luĩ, mhoqshit aq; yhang myit lhĩng é nghut le gi, yhang lé mara hkyut pyãm byi aq. ⁴ Ra-nyĩ má za, yhang nang lé nyhit dãm shut mù, 'Ngò myit lhĩng bê.' ga luĩ, nang lé nyhit dãm dum tũngbãn le, tũngbãn hkãngmó, nãng, yhãng é mara lé hkyut pyãm byi aq.'" gã ri.

⁵ Haũ hkũn, lãgyô pé gi, "Ngamoq é lumjĩng myit lé lhoq ko byi laq." ga Yhumsĩng lé dũng akô.

⁶ Haũ jãng, Yhumsĩng gi, "Nungmoq é lumjĩng myit angshi cham í za hkãlhãng bò kô é nghut le gi, shĩ hangwã gãm lé, 'Sikgãm ê, amyit eq roq bún luĩ, wuĩshuq lung-aũ má, ê yuq to aq ô.' gã le, nungmoq é dang lé siggãm haũ gyo byi rã nghut lhê.

⁷ Dangké, nungmoq mã é rayuq yuq chyáng, yò hpueq é, a nghut jãng, sau zũng é dui-nhãng zoshãng rayuq nyi é nghut le, dui-nhãng zoshãng haũ yohtung pá mai jé lo é hkũn, yhang lé, 'Hãn zũng mù zang zo aq.' ga luĩ, ó yuq wá taí kó rã lhú? ⁸ Haũ dui-nhãng zoshãng lé sheq, 'Ngò zo rã myinzang lajang aq. Ngò bàn zo shoq hpyidum má hpyihit hit mù, xun zang wú nyĩ aq. Ngò bàn zo jãng sheq nãng wó zo rã nghut lhê.' ga luĩ, taí rã a nghut kó lhú? ⁹ Taí mitaĩ banshoq lé, dui-nhãng zoshãng ban zui saĩ byĩ é nghut kôlhãng, yhang lé jeju bũn é dang ó yuq wá taí wú akô lhú?

¹⁰ Haũ eq rajung za, nungmoq gi, taí mitaĩ ban kut jãng sheq, 'Nga-nhũng gi, jeju bun a gĩng é dui-nhãng

zoshãng pé nghut nyi lhê; kut rã é mũ lé za lhoq pãn é bang nghut lhê.' nghũ taí keq." ga taí ri.

Manggãm Dap Bang Raxê Yuq Lé, Yesuq Lhoq Gê Byĩ É Hkyô

¹¹ Ahkuĩ, Yesuq gi, Yerusalem wã mó shut e ló nyi le, Samariq mau eq Galile mau gyoro mai laĩ e ló ri.

¹² Yhang, wã rawã shut wang ló é hkũn, manggãm dap é byũ raxê yuq eq huĩ ri. Haũ bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yũ laq ô." ga luĩ, wut garũ bum akô.

¹⁴ Yesuq gi, yhangmoq lé myàng jãng, "Nungmoq é gungdu lé, hkyangjũng pê chyáng ló tũn shit keq." ga yhangmoq lé taí ri. Yhangmoq gi, hkyô má ru sũ nyi ashĩ le lhãng, sãn-yũng ló byuq bekô.

¹⁵ Yhangmoq chyáng mã é rayuq gi, yhumsĩng gungdu ge byuq é lé myàng jãng, Yesuq chyáng dum taũ é mù, htê mó èq Garai Gasang lé hkya-ôn é eq, ¹⁶ Yesuq é hkyĩ wang má paĩ gop to luĩ, Yhang lé jeju hkya-ôn nyi ri. Haũ yuq gi, Samariq byũ nghut ri.

¹⁷ Haũ mù, Yesuq gi, "Sãn-yũng byuq é gi, raxê yuq a nghut lhú? Gau yuq gi, hká ló byuq bekô? ¹⁸ Shĩ tũngbãu rayuq mai lai luĩ, dum taũ lé mù Garai Gasang lé hkya-ôn é byũ, rayuq le a nyi lo kó lhú?" ga taí ri. ¹⁹ Hau htãng, Yesuq gi, haũ yuq lé, "Toq mù ló aq, nãng é lumjĩng myit gi, nang lé lhoq sãn-yũng byi bê nghut ri." ga taí ri.

Garai Gasãng É Mingdãn Jé Lô Rã Hkyô

Mht 24:23-28, 37-41

²⁰ Radãm lé, Hparishe pé gi, Garai Gasãng é mingdãn hkã-nhãm jé rã hkyô, Yesuq lé myĩ akô. Haũ jãng, Yesuq gi, "Garai Gasãng é mingdãn jé lé rã gi, myoq èq wũ luĩ myàng rã a nghut. ²¹ Garai Gasãng é mingdãn gi, nungmoq yuq jup é ahkãũ má nghut nyi é yanmai, 'Wũ keq, shĩ má joq ri, mhó má joq ri.' ga luĩ le, byu pé gi, wó taí kó rã a nghut." ga luĩ, yhangmoq lé tũ taí ri.

²² Chãngzô pé lé le Yesuq taí é gi, "Haũ Byu Yhangzô é buinyi ra-nyĩ lé, nungmoq myàng nau dik é ahkyĩng jé rã. Nghut kôlhãng, nungmoq gi, Byu Yhangzo lé wó myàng kó rã a nghut. ²³ Haũ buinyi má, byu pé gi, nungmoq lé, 'Yhang shĩ má nyi ri.' haũ a nghut jãng, 'Yhang hê má nyi ri.' ga taí kó rã nghut lhê. Nghut kôlhãng, hkã-ê; hkãchãng kó. ²⁴ Hkãsu mù gã le, maumyĩ rahkyam má hpyat é maulhap gi, maumyĩ gó hkyam jé shoq duqbó é su, haũ Byu Yhangzo dum jé lé é buinyi má le dut rã nghut lhê. ²⁵ Nghut kôlhãng, haũ su a dut htoq shimá, Yhang gi, zing-rĩ é myo myo lé le, ipyat shi mã é byu pê èq he-ngik pyãm é lé le, hui shirã nghut lhê.

²⁶ Noaq é tsĩn pyat má dut é su, haũ Byu Yhangzo jé lé é buinyi má le dut rã nghut lhê. ²⁷ Byu pé gi, Noaq, wuĩ-sanghpo mó hkaũ má wang é hkũn jé shoq, zo zo shuq shuq, myi byi myi yũ, myihãng kut luĩ, nyi nyi bum akô. Haũ hkũn, dowuĩ dĩng lô mù, yhangmoq banshoq lé lo lhoq htên pyãm bê nghut ri.

²⁸ Haũ eq rajung za, Lot é pyat má le, byu pé gi, zo mù, shuq mù, ung zo wuĩ zo, ho zo ho shuq, yhũm kut

luî nyi nyi akô. ²⁹ Nghut kôlhang, Sodom wà mai Lot htoq ló é buinyi má, mauhkûng mai, myi eq hang gi, mau su wò gyó lô luî, lhunglhang lé lhoq htên pyám bê nghut ri.

³⁰ Haû Byu Yhangzo, lé htoq shit é buinyi má le, haû eq rajung za dut râ nghut lhê. ³¹ Haû buinyi má, yhumhkûng † htoq má nyi tô é sù gi, yhúmhkaû mà é zè lé, a ló gyó wang yù lo sháng gaq. Yò má nyi tô é sù gi, haû eq rajung za, yhûm shut a taû ló lo sháng gaq. ³² Lot é yhangmyi †† lé bûn nyi keq. ³³ Yhumsing é asak duì hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duî râ nghut lhê. ³⁴ Ngò, nungmoq lé taí kyo kôlé, haû myín lé, yhupjang ralhum má byù í yuq nyi to kô le, rayuq gi, shuí yu é hui mù, rayuq gi, myit gyó to râ nghut lhê. ³⁵ Myiwe í yuq luí má rahá za chòm luí nyi tô le; rayuq gi, shuí yu é hui mù, rayuq gi, myit gyó pyâm to râ nghut lhê. ³⁶ Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyâm to berâ nghut lhê." gâ ri.

³⁷ Haû hkûn, chángzô pé gi, "Yhumsing Yesuq ê, haû gi, hká gyo má dut râ lhú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zing bùm râ nghut lhê." ga luí, yhangmoq lé tâ taí ri.

Chuimó Myhí Eq Tarâ Agyi É Hkyô Lé Dangtú Yù É Hkyô

18 Yesuq, Yhâng é chángzô pé lé, myit wum a gyuî é za, hkâ-nhám le kyûdung nyi râ hkyô lé, dangtú dông mhoqshit é gi, ² "Wà rawà má, Garai Gasang lé le a gyuq hoq, byù lé le haí su a ngàm é tarâ agyi rayuq nyi ri. ³ Haû wâ má chuimó myhí rayuq le nyi ri. Yhang gi, haû tarâ agyi wá chyáng ê luí, 'Ngò eq amû htoq sù lé, yhâng é mara eq rajung za, jéyáng byi laq.' ga luí, é dum taí taí kut nyi ri.

⁴ Nghut kôlhang, tarâ agyi wá gi, ahkyíng rayoq zo jé shoq tarâ a jéyáng byi é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, ⁵ nghut kôlhang, chuimó myhí shí yuq é amû lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng râ dut ri. Haû mù, ngò yhâng é amû lé jéyáng byi râ.' ga, yhâng é unghkaû má myit yu ri." gâ ri.

⁶ Haû mù luí, Yhumsing Yesuq gi, "A ding a mán é tarâ agyi wá taí é dang mai mhoq yû keq. ⁷ Garai Gasang gi, Yhang lé nyi myín wut dúng nyi é, Yhang hkyin yu to bê bang lé, tarâ é dông a kut byi é gi, myáng myáng nyi to râ lhú? ⁸ Ngò, nungmoq lé taí kôlé, Garai Gasang gi, yhangmoq lé hân yhang teng-mán é dông jéyáng byi berâ nghut lhê. Nghut kôlhang, haû Byu Yhangzo jé lé é buinyi má, lumjáng hkyô lé gi, mingkan htoq má myang wú shirâ lhú?" ga taí ri.

Hparishe Eq Kang Guq Sù Kyûdung É Hkyô

⁹ Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi,

† Yudaq byu pé é yhumhkûng gi, rá é nghut lhê mù, nyi kún jang kut akô. †† Lot é yhangmyi gi, Sodom wà shut dum taû lhing wú é yanmai, Garai Gasang lhoq hten pyâm é hui sù nghut lhê.

¹⁰ "Byù í yuq kyûdung kó râ ga, noqkuq yhûm má doq e akô. Rayuq gi, Hparishe, rayuq gi, kang guq sù nghut ri. ¹¹ Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shí kang guq sù su le, a nghut é yanmai, ngò nàng lé jeju bûn lhê ô! ¹² Ngò gi, rabat má zoshuq í dâm gám nyi lhê; ngò wó yu é gû mà é xê gambùm ragambùm le kat nyi lhê.' ga luí, yhang baú yhang gotû kut dúng nyi ri.

¹³ Kang guq sù kúm gi, we we má yap to mù, mauhkûng shut lháng a wám tu wú é za, wànggàng bat luí, 'Garai Gasang ê, shí yubak dap sù ngo lé, shogyô yù laq ò!' ga dúng ri.

¹⁴ Ngò, nungmoq lé taí kôlé, kang guq sù kúm gi, Garai Gasang é hí má mara hkyut san byi é lé wó yù luí, yhûm shut dum taû lô bê; nghut kôlhang, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga taí ri.

Zoshâng Wuì Lé Yesuq Shimân Byi É Hkyô

Mht 19:13-15; Mrk 10:13-16

¹⁵ Byu pé gi, zonú wuì lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haû lé myàng jáng, lhóm tân hkûm akô nghut ri.

¹⁶ Nghut kôlhang, Yesuq gi, zoshâng wuì lé, wut yù luí, "Haû zoshâng wuì lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasang é mingdán gi, haû sù é bâng é mingdán ru nghut lhê. ¹⁷ Ngò, nungmoq lé teng za taí kôlé, Garai Gasang é mingdán lé, zoshâng su kut a lhóm hap yu é nghut le gi, mingdán haû má gè gè yhang wó wâng râ a nghut." ga taí ri.

Ayá Wó É Sahtê Hpó

Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, "Ge é Sará ê, ah-tum abyuq é asak wó yû râ matú, ngò haí kut ra râ lhú?" ga myi ri.

¹⁹ Yesuq gi, "Haí mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyi. ²⁰ Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.' † gâ é dang pé lé, nàng sé gû bê." ga luí, yhang lé tâ taí ri.

²¹ Haû yuq gi, "Haû pé banshoq lé, ngò, zoshâng hkûn mai cháng bê nghut lhê." ga taí ri.

²² Yesuq gi, dang haû lé wó gyo jáng, "Nàng kut râ rajung râ tô ashí; nàng wó miwó lé ùng pyám luí, myùng bang lé byi pyám aq; haû jáng, nàng, mauhkûng htoq má sutzè wó râ nghut lhê; haû mù, Ngá htâng lé cháng aq." ga luí, yhang lé taí ri.

²³ Haû yuq gi, dang haû lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. ²⁴ Yesuq gi, haû yuq lé wú luí, "Sutzè wó bang

‡ 18:20 Htoq Ló 20:12-16

gi, Garai Gasâng é mingdán má wàng rã matú, haú-í yhang wuî ri-nhung! ²⁵ Sutzè wó sũ rayuq, Garai Gasâng é mingdán má wó wâng rã htoq, gola-uq radu âpno mai wó wang lai rã gi, je lui rã nghut lhê." ga taí ri.

²⁶ Dang haú lé wó gyô é bang gi, "Haú su ru nghut le gi, ó yuq za hkyi yu é hui rã nghut lhê lhú?" ga myí bum akô nghut ri.

²⁷ Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga taí kyô ri.

²⁸ Haú hkûn, Petruq gi, Yesuq lé, "Wú aq, ngamoq gi, wó miwó tô pyâm to lui, Náng htâng cháng bê nghut lhê." ga taí jáng,

²⁹ Yesuq gi, "Ngò, nungmoq lé teng za taí kôlé, Garai Gasâng é mingdán é yanmai, yhumsing é yhûm, yhumsing é yhangmyi, yhumsing é âgu âmang, yhumsing é ïnu ïwa, yhumsing é yhangzô pé lé, pyâm to sũ ó yuq nghut kôle, ³⁰ shí pyat má, akyû myo myo wó hkam yû rã htoq agó, htang pyat má le, ahtum abyuq é asak a wó yu é gi, a nyi rã nghut lhê." ga lui, yhangmoq lé taí ri.

Yesuq, Yhang Shî Hkám Rã Lé Dum Taí É Hkyô

Mht 20:29-34; Mrk 10:46-52

³¹ Yesuq gi, Yhâng é lagyô pé raxe í yuq lé gotú kut wut yù mù, "Gyô wú keq, nga-nhúng gi, Yerusalem wà mó shut doq lô nyi é nghut lhê. Haú má jé jáng, haú Byu Yhangzo eq séng lui, myihtoí pé kã tô é banshoq gi, dik lò berã nghut lhê. ³² Hkãsu mù gã le, Byu Yhangzo gi, tungbaù pé é loq má ap pyâm é hui lui, haú bang èq Yhang lé, wuizuì kut pyâm é, rhoi rip e, sôkan byé gyûn é, nhuq bat é kut yù mù, sat pyám kó rã nghut lhê. ³³ Hau htâng sum nyi nghû rã buinyi má, Yhang gi, dum dui toq lô rã nghut lhê." ga lui, yhangmoq lé taí ri.

³⁴ Lagyo pé gi, dang haú pé rahkun lé lháng a sê gyo kó; dang hau é lichyúm gi, yhangmoq é hí má zaú ng-hop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

Dung Zo É Myoqjit Sũ Lé, Yesuq, Myoq Dum Myàng Nhang É Hkyô

³⁵ Ahkuî, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. ³⁶ Yhang gi, byù rajùm rayò sô lai lô é htê lé wó gyo jáng, haú haí dut nyi é hkyô lé, myi kat ri. ³⁷ Haú hkûn, yhangmoq gi, "Nazaret wà byù Yesuq lai lô ri." ga lui, yhang lé taí kyo akô.

³⁸ Haú su gã é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

³⁹ Hí má lai lô é bang gi, zim za nyi rã matú yhang lé tân hkûm akô; nghut kôlháng, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó èq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuî lé lô nhang kat ri. Myoqjit sũ Yhâng

nàm má jé lé jáng, Yesuq gi, ⁴¹ "Ngò, nàng lé haí kut byi rã ô nau ri lhú?" ga, yhang lé myi kat ri.

Haú yuq gi, "Yhumsing ê, ngò myoq myàng nau ri." ga tũ taí ri.

⁴² Hau hkûn, Yesuq gi, "Náng myoq myàng sháng gaq! Náng é lumjínng myit gi, nang lé lhoq gè byi bê nghut ri." ga, yhang lé taí ri. ⁴³ Haú yuq gi, haú hkûn jáng, yhang myoq wó myâng mù, Garai Gasang lé hkya-on uchyang Yesuq htâng cháng bê. Lhunglhâng bang haú lé myàng kôjáng, Garai Gasang lé hkya-ôn nyi bum akô.

Yesuq Eq Zake

19 Yesuq gi, Yerihko wà má wàng mù, sô lai lô nyi ri. ² Haú hkûn, haú wã má, Zake gã é kang guq agyi rayuq nyi ri; haú yuq gi, sutzè wó sũ nghut ri. ³ Yhang gi, Yesuq hkã yuq nghut é lé myàng nau kôlháng, nyhûm sũ nghut é htoq agó, byù rajùm rayò chyín chyap tô é yanmai, a wó myâng nghut ri. ⁴ Haú mù, yhang gi, Yesuq lé wó myâng shoq ga, Yesuq lai lô rã hkyô hí shut din é mù, hkohúm gãm htoq má ê doq zung tô ri.

⁵ Yesuq gi, haú jowò má jé jáng, tu wú kat lui, "Zake ê, hân gyô lô aq; hkû-nyi ngò náng yhûm má bínng rã nghut lhê." ga taí ri. ⁶ Haú jáng, Zake gi, hân hân gyô lô mù, gabú dik é èq Yesuq lé lhom hkulum yu ri.

⁷ Haú má nyi bang banshoq gi, haú lé myàng jáng, "Yhang gi, yubak dap sũ rayuq chyáng bínng kut rã ga wang e lô bê." ga lui, mara hûn dang taí nyi bum akô.

⁸ Zake kúm gi, toq yap mù, "Yhumsing Yesuq ê, ngò wó é sutzè rawuí gû myùng bang lé gãm byi pyám rã; ngò záng mop zô pyâm é byù rayuq yuq nyi le gi, myi tú dum tau byi rã." ga Yhumsing Yesuq lé taí ri.

⁹ Haú hkûn, Yesuq gi, "Shí yuq le, Abraham é yhangzo † rayuq nghut é yanmai, hkû-nyi shí yhûm má hkyi yù hkyô jé bê, ¹⁰ hkãsu mù gã le, haú Byu Yhangzo gi, byuq byuq bê bang lé, hkat hô mù hkyi yù rã matú, jé lé sũ nghut lhê." ga lui, Zake lé taí ri.

Hkohkam É Dui-nhâng Zoshâng Raxê Yuq

Mht 25:14-30

¹¹ Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé rã chyâng lò bê nghut é yanmai le, Garai Gasâng é mingdán gi, radá dâm htoq shit lô berã ga, byu pé myit ngam tô bùm kô é yanmai le, dangtú ralhum dông dum taí jat é gi,

¹² "Aróng wó sũ byù rayuq gi, hkohkâm ayá ê hkam yù lui, dum taù lò rã ga, wê é ming shut ê rã matú hen nyi ri. ¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi lui, 'Ngò dum taù jé lô shoq, shi èq hpugá gá nyi láng keq.' ga lui, yhangmoq lé pying tô ri.

¹⁴ Yhâng é mingbyù wui kúm gi, yhang lé a ngui bum é nghut mù lui, yhang e lô é htâng má, 'Shí yuq ng-amoq ahtoq má up nyi rã lé, ngamoq a ô naù.' ga lui, ê taí rã matú lagyo châng nhang kat akô.

† Abraham é yhangzo nghû é lichyúm gi, Abraham su Garai Gasang lé lumjínng é sũ lé gã lhê.

¹⁵ Nghut kôlhang, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byí tô é dui-nhâng zoshâng wuì lé, hpugá gá luí, amyat hkâ-myhó wó ho jat bê hkyô lé sé naú luí, yhangmoq lé wut nhang kat ri.

¹⁶ Haú hkûn, sâng-hî yuq gi, lé mù luí, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, nàng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' ga ri.

¹⁹ Yhumsîng gi, haú yuq lé, 'Nàng gi, wà ngo wà lé up lo aq hkoi.' ga taí ri.

²⁰ Dum rayuq le, lé mù luí, 'Yhumsîng ê, náng é ngùn rajoí lé a byuq shoq, ngò panchoq eq htup tô lhê; wú aq, shí nghut lhê. ²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

²² Haú hkûn, yhumsîng gi, 'Agè ashop é dui-nhâng zoshâng ê, náng nhut mà é dang eq rajung za, ngò, nang lé jéyáng rà nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô lé, nàng sê to gù nghut le nhîng, ²³ ngá ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lúhú?' ga yhang lé taí ri.

²⁴ Haú htâng, yhumsîng hpó gi, ayàm má yap tô é bang lé, 'Haú ngùn rajoí lé yhâng chyáng mai taú yù luí, raxê joí wó sù lé jat byi keq.' ga taí ri.

²⁵ Haú bang gi, 'Yhumsîng ê, yhang gi, raxê joí wó to bê lé nhîng.' ga akô.

²⁶ Haú jáng, yhang gi, 'Ngò, nungmoq lé taí kôlé, wó sù † ó yuq le, jat byí é hui shirâ nghut lhê; a wó su chyáng mai kúm gi, yhang wó tô é lé lhang, yu pyám byi shirâ nghut lhê. ²⁷ Ahkuí, yhangmoq ahtoq má ngò hkohkâm kut rà lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wàng E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taí jáng, hí má so luí, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsanlun Bùm mà é Bethpage wà eq Behtani wà má jé ló kojáng, Yhâng é chángzo í yuq lé, ³⁰ "Nungnhik, hí mà é wà má ê keq; wà haú má wang é hkûn jáng, ó le a jì wú shí é logúng zo tuí tô lánng é lé, é myâng kó rà nghut lhê; haú lé hpyi yù mù, Ngá chyáng she lò keq. ³¹ Byù rayuq yuq mai, 'Haú haí mù hpyi nyi akô?' ga nungnhik lé myi kôjáng, 'Shí du lé, haú Yhum-

sîng rà ri gâ.' nghû tô taí keq." ga pyîng luí, nhang kat ri.

³² Nhang kat é sù nhik ê jé lé, Yesuq taí kat é dông yhang, dut to lánng é lé ê myang akô. ³³ Yhangnhik logúng zo haú lé hpyi nyi kô é hkûn, yhumsîng wuì gi, "Haú logúng zo lé, haí mù hpyi nyi akô lhú?" ga luí, yhangnhik lé myí akô.

³⁴ Haú jáng, yhangnhik gi, "Shí du lé haú Yhumsîng rà ri gâ." ga taí akô.

³⁵ Yhangnhik gi, haú logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, Yesuq lé doq ji nhang akô. ³⁶ Haú su kut, Yhang ji é ló nyi le, byu pé gi, yhangmoq é buhîng pé lé hkyô má hking byí akô.

³⁷ Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklaí kumlhá pé é yanmai, gabú myit mai htê mó o mó eq Garai Gasang lé hkya-on kô é dang gi,

³⁸ "Haú Yhumsîng é myîng mai jé lé lo é hkohkâm gi, hkungsô wó nyí sháng gaq ô! †† Mauhkûng htoq má, nguîngón nyí sháng gaq ô!

Htoq tsáng myhâng má, Garai Gasang gi, hpungwup shingkang bo nyi sháng gaq ô!" gâ akô.

³⁹ Haú mù luí, haú byù hpûng hkaú má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé taí akô.

⁴⁰ Haú hkûn, Yesuq gi, "Ngò, nungmoq lé taí kôlé, shí bang zim za nyi kó é nghut le gi, luqgok pé garû lô rà nghut lhê." ga tú taí ri.

⁴¹ Ahkuí, Yesuq, Yerusalem wà mó eq chyâng lò luí, wà mó haú lé myàng jáng, haú wà mó é matú ngaù mù, taí é gi, ⁴² "Wà nàng ê! Hkû-nyí lhê é buinyi má, nguîngón é hkyô lé nàng bûn sé tô é nghut le gi, gè rà wá! Ahkuí kúm gi, haú hkyô lé nghop to bê nghut mù luí, nàng a sé lo nghut ri. ⁴³ Hkâsu mù gâ le, náng chyáng Garai Gasang lé kûm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhîng hkyuq mai nang lé lom tô é buinyi jé lô rà nghut lhê. ⁴⁴ Haú hkûn, nang lé lhoq htên pyám luí, nung zo pé lé le, haú ahkaú má yhang dún nhê pyet sat pyám bekô rà; nàng gi, luqgok racham htoq má racham lhang a kê lhum loshoq, dut byuq rà nghut lhê." gâ ri.

Yesuq, Noqkuq Yhûm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "'Ngá yhûm gi, kyû-dung yhûm dut rà nghut lhê.' † ga kâ to kôlhang, ⁴⁶ nungmoq gi, jowò shí lé 'damaq hkyûng' †† kut akô." ga taí uchyang, hkat htoq pyâm ri.

⁴⁷ Yhang gi, nyí wuí noqkuq yhûm má mhoqshit nyi ri. Hkyangjong agyí pé, tarâ sarâ pé eq, byu pé é suwún wuí kúm gi, Yhang lé wó sat pyám rà hkyô ho

† Wó sù nghu é gi, yhumsîng a-tsam lé rago dat chûng sù lé taí é nghut lhê.

†† 19:38 Hkya-on 118:26 † 19:45 Esai 56:7 †† 19:46 Yer 7:11

nyi akô. ⁴⁸ Nghut kôlhang, byù banshoq bang gi, Yhâng mhoqshit é dang lé gyo nau nyi kô é yanmai, wó sat râ hkyô lé, a myang hô kó nghut ri.

Yesuq É Ahko Ahkáng Lé Myî Chyam Wú É Hkyô

Mht 21:23-27; Mrk 11:27-33

20 Ra-nyí lé, Yesuq gi, noqkuq yhûm wàng hkaû má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuí eq rahá kut, Yhâng chyáng lé jé kômù, ² "Hai ahko ahkâng èq Nàng shí pé lé kut nyi lhê lhu? Ahko ahkáng shî, Nang lé ó yuq byî é lhu? Ngamoq lé taí kyô wú aq." ga Yhang lé myî akô.

³ Haú hkûn, Yhang gi, "Ngò le, nungmoq lé rajung myî wú kôlé; ⁴ Yohan byî é baptisma gi, mauhkûng mai lhu? A nghut jáng, byu chyáng mai lhu? Ngo lé taí kyô wú keq?" ga yhangmoq lé myî ri.

⁵ Haú hkûn, yhangmoq chòm hpyê lhum kô é gi, "'Mauhkûng mai nghut lhê.', nghû nga-nhúng taí jáng le, 'Haí mù, yhang lé a lumjîng kô é lhu?' ga râ nghut; ⁶ 'Byu chyáng mai nghut lhê.' nghû jáng le, shiwa byù banshoq gi, Yohan lé, myiqtoi rayuq ga lumjîng to kô é yanmai, yhangmoq, nga-nhúng lé luqgok èq dú sat kô râ nghut." ga akô.

⁷ Haú mù, yhangmoq gi, "Hkâmai nghut é lé, ng-amog a sé." ga tû taí akô.

⁸ Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Tsibiyiq Hkyâm Yhumsîng Eq Hkyâm Saí Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dông xoq taí kyô é gi, "Byù rayuq gi, tsibiyiq hkyâm ralhum saí to mù, hkyâm saí zo bâng chyáng ngho byî to luí, gó ming shut myáng myáng ê nyi byuq ri. ¹⁰ Kyôshu yoq jé jáng, yhang gi, hkyâm saí zo bâng èq, hkyâm mâ é tsibiyiq shi pé lé lhom byî kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhang, hkyâm saí zo bang gi, haú yuq lé lhom bat mù, loq kôm taú nhang kat akô. ¹¹ Gotû dui-nhâng zoshâng rayuq lé, yhangmoq chyáng dum nhang kat ri. Nghut kôlhang, yhangmoq gi, haú yuq lé le, lhom bat mù, hoq lhoq hpu luí, loq kôm dum taú nhang kat akô.

¹² Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luí, hkyâm mai hkat htoq kat akô.

¹³ Haú hkûn, tsibiyiq hkyâm yhumsîng gi, 'Ngò hkâsu kut wú râ lhu? Ngò chyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkung-ga kó abe.' ga taí ri.

¹⁴ Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yù shoq, yhang lé sat pyám sháng.' ga rayuq eq rayuq taí lhum bum akô. ¹⁵ Haú mù, yhang lé hkyâm shinggan shut dú htoq kômù, sat pyám akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ lhu? ¹⁶ Yhang gi, ê mù, haú hkyâm saí zo bang lé sat pyám luí, hkyâm haú lé góbang lé htot ngho byî pyám râ nghut lhê." ga ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" ga akô.

¹⁷ Hau htâng, Yesuq gi, yhangmoq lé byu wú luí, "Haú jáng gi,

'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.' [†] ga Chyúmdang má kâ tô é gi, haí gá nau é nghut lhê lhu? ¹⁸ Luqgok ^{††} haú má gyó záng é sù ó yuq nghut kôle, gyuí gyop byuq râ nghut lhê. Luqgok hau èq gyó nhê záng é sù le, nhê pyeq pyâm é hui râ nghut lhê." ga taí ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí taí é hkyô lé, sé kô é yanmai, haú hkûn jáng lháng Yhang lé chyup yù râ matú hkyô ho nyi akô. Nghut kôlhang, byu pé lé gyuq mù a chyup shi kó nghut ri.

Kang Kat É Hkyô Eq Séng Luí Myi É Dang

Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yù shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaû chyáng Yhang lé wó ap pyám râ matú nghut ri. ²¹ Haú jowú bang gi, "Sarâ ê, nàng gi, dîng dîng mán mán taí mhoqshit é eq, byu é myoqdong lé a tê byî é za, Garai Gasâng é hkyô lé, tengmán é dông mhoqshit é sù nghut é lé, ngamoq sê lhê. ²² Hkoséng Kehtaq lé, ng-amog kang kat râ gi, tarâ wang lhê lhu? A wang é lhu?" ga luí, Yhang lé myî wú akô.

²³ Nghut kôlhang, Yesuq gi, haú bâng é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tûn shit wú keq. Ó yuq é alhò eq masat laiká dap tô ri lhu?" ga myi jáng, ²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taí ri.

²⁶ Yhangmoq gi, byu pé hí má, Yhâng é dang má mara a wó ho myang é eq, Yhang tû taí é dang é yanmai, máu hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myi É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sarâ ê, miyiwé wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kâ to byî ri. ²⁹ Hí hpyang lé, gumang nhiktâng wui nyhit yuq nyi akô. Lagám yuq gi, miyiwé yù luí, zo dù a dap é za shi ló byuq bê nghut ri. ³⁰ Lanong yuq le, yhangmang mó é chui lé gon mù, zo dù a dap é za shi ló byuq bê. ³¹ Hau htâng, Lalaq yuq

† 20:17 Hkya-on 118:22 †† Luqgok nghu é gi, Yesuq lé taí ri.

mai Lahkâ yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi ló byuq bùm bekô nghut ri. ³² Ló htáng má, myiwe myhí haú le châng shi ló byuq bê nghut ri. ³³ Haú mù luí, haú dum dui toq é buinyi má, myiwe myhí haú gi, haú nhiktâng wui mâ é hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." ga luí, Yhang lé myí wú akô.

³⁴ Haú hkûn, Yesuq gi, "Shî mingkan htoq mâ é byu pé gi, ikun kut é eq myi byi myi yú kut nyi bum akô. ³⁵ Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yú hkyô joq lo râ a nghut. ³⁶ Haú bang gi, maumang lagyô pé su dut byuq luí, a dat shî lo kô râ nghut lhê. Yhangmoq gi, dum dui toq lô su é yhangzô pé † nghut é yanmai, Garai Gasâng é yhangzô pé nghut bekô. ³⁷ Haú nyé duq nyi é mhanpúng eq séng luí, Mosheq eq kâ tô é má lháng, Yhumsíng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.' †† ga bo tô é yanmai, shi é bang dum dui toq lô râ hkyô lé tún shit to bê nghut ri. ³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tû taí ri.

³⁹ Haú hkûn, tarâ sará pé ra-am gi, "Sará ê, nàng taí é jô ri." ga akô. ⁴⁰ Haú mù, yhangmoq gi, Yhang lé haí le a wám myí jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lhú? ⁴² Dawiq yhang yhang lháng gi, Hkya-on Kungtôn Laiká má,

'Haú Yhumsíng Garai gi, ngá é Yhumsíng lé, "Ngò, náng é gyè pé lé,

náng é hkyí nang tanghkuq kut pyám byí é hkyíng jé shoq, Ngá é loqyo hkyam ‡ shut zung nyi shi aq." gâ ri.†

ga kâ tô ri. ⁴⁴ Haú mù, Dawiq yhang lháng, Hkrisduq lé, Yhumsíng gâ é nghut le gi, Hkrisduq gi, yhangzo za hkâsu ge nghut râ lhú?" ga taí ri.

Tarâ Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé taí é gi, ⁴⁶ "Tarâ sará pé lé sidiq nyi keq. Yhangmoq gi, réng é buhíng wut chûng mù, sô yông wún luí, gai pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poí pé mâ é je réng é zùng jowò pé má myang zùng râ lé le, ô nau nyi bum akô. ⁴⁷ Yhangmoq gi, chuimó pé é yhûm-

† Dum dui toq lô su é yhangzô pé gâ é gi, Yesuq lé lumjíng luí, shi é htâng má dum dui toq lo é bang lé gâ lhê. †† 20:37 Htoq Ló 3:6 ‡ Loqyo hkyam ngu é gi, ahko ahkáng wó é jowò nghut lhê.

†† 20:42-43 Hkya-on 110:1

yò pé lé hpyoq zo hpyoq shuq kôluí, kyû hîng hîng dîng shit mhaú é bang nghut akô. Haú sù é bang gi, je riyhang htan é dông dam byí é hui zo kó râ nghut lhê." gâ ri.

Chuimó Myhí Kat É Alu

Mrk 12:41-44

21 Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ² Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri. ³ Haú mù, Yhang gi, "Ngò, nungmoq lé teng za taí kôlé, shî myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gâ le, haú góbang banshoq gi, yhumsíng agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglháng lé kat bê nghut ri." ga taí ri.

Ló Htûm Buinyi Má Dut Lò Râ Hkyô

Mht 24:1-21, 29-35; Mrk 13:1-19, 24-31

⁵ Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham lháng a kê lhum loshoq, hpyoq hpyi pyâm é buinyi jé râ nghut lhê." ga taí ri.

⁷ Haú su ga jáng, yhangmoq gi, "Sará ê, haú nghut le gi, haú hkyô pé gi, hkâ-nhám dut lô râ lhú? Haú dut râ chyâng lò jáng, hkasú é kumlhá htoq lô râ nghut lhê lhú?" ga, Yhang lé myí akô.

⁸ Haú hkûn, Yhang gi, "Nungmoq gi, hkyô shuî ng-hoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé lîng é byù myo myo pô htoq lô kó râ nghut lhê. Nghut kôlhang, nungmoq gi, yhangmoq htâng hkácháng kó. ⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haú hkyô pé hí dut lò râ nghut lhê. Nghut kôlhang, lô htâng é buinyi gi, haú hkûn jáng dut râ a nghut shi." ga taí ri.

¹⁰ Hau htâng, Yhang, yhangmoq lé dum taí é gi, "Ra-myû eq ra-myû, mingdán ralhûm eq ralhûm majan zân lhûm lò kó râ nghut lhê. ¹¹ Jowò myo myo má, layàng mó nún lo é, nolì nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkúng htoq mai htoq shit lô râ nghut lhê.

¹² Nghut kôlhang, haú hkyô banshoq a dut shimá, Ngá myíng é yanmai, byu pé gi, nungmoq lé chyup yú luí, zing-rí yú mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkoakam pé eq zau pé chyáng é ap byí é le, hui kó râ nghut lhê. ¹³ Haú su é pé mai, nungmoq gi, ngò eq séng luí, saksé wó hkám râ hkyô htoq lô berâ nghut lhê. ¹⁴ Nghut kôlhang, hkâsu nghû lhóm tû taí râ hkyô lé, hí mai a myit wui nyi râ lé, nungmoq myit hpyit to keq. ¹⁵ Hkâsu mù gâ le, nungmoq é gye pé lhunglhâng bang, haí le a wó lhóm tû taí loshoq, ngò, nungmoq lé

dang eq hpaqchyî byi râ nghut lhê. ¹⁶ Nghut kôlhang, nungmoq gi, înu îwâ pé, âgu âmâng pé, mungmoq eq buinùm ji-myi wui èq lháng, ap pyâm é hui kó râ nghut lhê. Yhangmoq gi, nungmoq chyáng mâ é ra-am lé lháng, sat pyám kó râ nghut lhê. ¹⁷ Byù lhunglhang bang gi, Ngá é yanmai, nungmoq lé a nguì kut kó râ nghut lhê. ¹⁸ Nghut kôlhang, nungmoq é xâm rahkat lháng wó htên byuq râ a nghut. ¹⁹ Nungmoq gi, wó jân é hkyô mai, asak lé wó yû kô râ nghut lhê.

²⁰ Yerusalem wà mó lé gyê hpúng mó èq lóm tô é lé, nungmoq myàng jáng, wà mó haù htên byuq râ ahkýing chyâng lò bê lé, bûn sê nyi keq. ²¹ Haù hkûn lé, Yuda mau má nyi é bang gi, bùm pé shut hpang doq ló kó sháng gaq; haù wà hkaù má nyi é bang le, hpang htoq kó sháng gaq; wà tiq wà zo pé má nyi é bang le, wà hkaù shut a wàng kó sháng gaq. ²² Hkâsu mù gà le, Chyúmdang má kâ to má kâ to banshoq dik lò râ matú, buinyi haù pé gi, mara dam byi é buinyi pé dut râ nghut lhê. ²³ Haù buinyi pé má, zogûng dut é myiwe wui eq naù huq ashí nghut é înu wui gi, gyai yhang wuîhke kô râ nghut lhê; hkâsu mù gà le, shí míng ahtoq má wuîhke mó eq, shí amyua ahtoq má Garai Gasang nhikmó-yô é jé lô râ nghut lhê. ²⁴ Yhangmoq gi, shâm lhâm èq sat pyám hui lhê eq, ming hkan ming mó má chyup shuí ló é le hui kó râ nghut lhê. Tûngbaù pé lé byi tô é buinyi ahkýing htáng shoq, Yerusalem wà mó gi, tûngbaù pé èq nâng zik tô é hui râ nghut lhê.

²⁵ Haù hkûn, bui, kyî, lhamó pé má, kumlhá htoq shit râ nghut lhê. Wuishuq lung-aù mâ é wuîlhêng pé é mying é htê mó é yanmai, myigûng htoq má, byù myú chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê. ²⁶ Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bûm kó râ nghut lhê; hkâsu mù gà le, mauhkûng mâ é wum-o a-tsam pé gi, lhoq nhûn é huî bùm kô râ nghut lhê. ²⁷ Haù hkûn, haù Byu Yhangzo gi, mhut ji mù, hpungwup a-tsam mó eq le, hpungwup shingkan mó eq le, gyó lé lo é lé, yhangmoq byu-myàng kó râ nghut lhê. ²⁸ Haù hkyô pé dut hi lò jáng, ulhum tû mù wú kat keq, hkâsu mù gà le, nungmoq lé hkyi yù râ buinyi gi, chyâng lò bê nghut ri." gà ri.

²⁹ Yhang, yhangmoq lé dangtú dông xoq taî é gi, "Maihpáng gam eq sigâm banshoq lé wú wú keq. ³⁰ Sikbu nyún lo é lé myàng jáng, bui nyé nám chyâng lò bê ga luî, nungmoq yhang dat wú sê akô. ³¹ Haù eq rajung za, haù hkyô pé dut nyi é lé, nungmoq myàng kôjáng, Garai Gasang é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za taî kôlé, shí pyat mâ é byu pé a ban shi byuq shimá, haù hkyô pé banshoq dut byuq râ nghut lhê. ³³ Mauhkûng eq myigûng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

³⁴ "Nghut kôlhang, zo myo shuq myô é, î shuq wut é, mingkan htoq mâ é myit wui myit hkê é pè èq, nung-

moq é i-myt wò laî nyi luî, haù ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyi keq. ³⁵ Hkâsu mù gà le, buinyi haù gi, mingkan htoq má nyi é byù banshoq bâng é ahtoq má, haù su jé lô râ nghut lhê. ³⁶ Haù mù luî, haù dut lò râ hkyô banshoq mai, nungmoq wó lut lai mù, haù Byu Yhangzô é hí má, wó yap gîng é bang dut sháng gaq, hkâ-nhám le kyûdung luî, ahkýing hkanmó má machya nyi keq." gà ri.

³⁷ Yesuq gi, nyi wuî noquq yhûm má mhoqshit nyi luî, myin wuî Tsanlun Bùm gà é bùm shut htoq ê mù, ê nyi to to kut ri. ³⁸ Byù banshoq bang gi, Yhang mhoqshit é dang gyo râ ga, napsûn noq noq mai noquq yhûm má jé lé bum akô nghut ri.

Yesuq Lé, Yudaq Èq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

22 Ahkuî, Lhoqlhai Poî gà é Azuma (múnchi a kat é Muk Zo Poî) jé râ chyâng lò bê. ² Haù mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gà le, yhangmoq gi, mingbyû wui lé gyuq bùm kô é yanmai nghut ri. ³ Haù hkûn, lagyo raxe í yuq má bo é Iskarut gà é Yudaq chyáng Tsadán wàng mù luî, ⁴ yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noquq yhûm zúng é gyezau pé eq, ê hpyê ri. ⁵ Haù mù, yhangmoq gi, gyô nguì luî, Yudaq lé ngùn byi râ hkyô myit hui bekô. ⁶ Yudaq le hap yù luî, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

Lhoqlhai Poî Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuî, haù Lhoqlhai Poî mâ é sauzo shigu hkungga sat nhông byi râ é Azuma buinyi jé bê. ⁸ Haù hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poî é món láng keq." ga luî, nhang kat ri.

⁹ Haù nhik gi, "Hkâmá é món to nhâng nau ri lhu?" ga luî, Yhang lé myi akô.

¹⁰ Haù hkûn, Yesuq gi, "Nungnhik, myuq hkaù shut wang e ló le wui yambú waq é byù rayuq lhom hui râ nghut lhê; haù yuq chyáng châng ló luî, yhang wang ló é yhûm má châng wàng mù, ¹¹ yhumsing lé, 'Ngò Ngá é chángzô pé eq rahá, Lhoqlhai Poî zo râ bíng wap hkâmá nghut lhê lhu ga, Sará myi nhang kat ri.' nghú taí keq. ¹² Haù hkûn, hen tô é ahtoq mâ é wap mó lé, nungnhik lé lhom tûn shit râ nghut lhê; wap haù má é món to keq." ga taí kat ri.

¹³ Haù chángzo nhik htoq e ló le, Yesuq taí kat é eq roq za é myàng kômù, Lhoqlhai Poî lé món to bekô nghut ri.

Yhumsing É Myinzang

¹⁴ Ahkuî, ahkýing jé jáng, Yesuq eq Yhang é chángzô pé rahá za zohpoq má zung tô akô. ¹⁵ Haù hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poî shí lé nungmoq eq rahá zo râ lé, Ngò gyai ô nau

† Shí má gi, asak woi-nyî a shî râ hkyô lé taî é nghut lhê.

nyi lhê. ¹⁶ Hkâsu mù gâ le, ngò, nungmoq lé tái kôlé, Garai Gasâng é mingdán má poî shî a ló dik dik gi, ngò haû lé dum zo râ a nghut ló." ga luí, yhangmoq lé tái ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shî lé yù luí, nungmoq yhangchang gàm shuq lhum keq. ¹⁸ Ngò, nungmoq lé tái kôlé, ahkuí mai gi, Ngò, Garai Gasâng é mingdán a jé jé tsi-biyiq wing lé dum shuq râ a nghut lo." ga tái ri.

¹⁹ Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, "Shî gi, nungmoq é matú byí pyâm é, Ngá é gungdu nghut lhê; Ngo lé bûn nyi râ matú, shî su kut nyí keq." ga tái ri.

²⁰ Haû eq rajung za, myinzang ban zo jáng, góm lé le yù mù, "Góm shî gi, nungmoq é matú htoq pyâm é, Ngá é sui má xuq tô é dangshikaq asik nghut lhê.

²¹ Nghut kôlháng, wú keq, Ngo lé ap pyám râ sù gi, zang bó shî má ngò eq rahá nyi tô ri. ²² Haû Byu Yhangzo gi, hkyin to huí é eq rajung za shî râ nghut lhê; nghut kôlháng, Yhang lé ap pyâm é sù gi, dǐngnyé wó ri." ga tái ri. ²³ Haû su ga jáng, lagyô pé gi, yhangmoq má shí hkyô kut râ sù gi, hká yuq nghut râ lhú ga, rayuq eq rayuq myí lhum bum akô.

²⁴ Haû htoq agó, yhangmoq mâ é hká yuq sheq je kô lhê lhú ga le, rayuq eq rayuq tái htǐng lhûm bum akô. ²⁵ Haû mù luí, Yesuq gi, "Tǔngbàu pé é hkohkam pé gi, yhangmoq byù myú pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, tái hkungga nyi bum akô. ²⁶ Nungmoq kúm gi, haû su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷ Hká yuq sheq je kô lhê lhú? Zô zung nyi sù lhú? Haû a nghut jáng, saí tsô é sù lhú? Zô zung nyi é sù sheq nghut ri. Nghut kôlháng, ngò gi, nungmoq mâ é saí tso sù su za nghut nyi lhê. ²⁸ Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô. ²⁹ Haû su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lhê. ³⁰ Haû mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lhê.

Yesuq Lé, Petruq (Simun) He-ngik Pyâm Râ Hkyô

Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungso cham lé shaí é su, nungmoq lé wó shaí shoq ga, Tsadán wá gi, ahkáng dung bê. ³² Nghut kôlháng, náng é lumjǐng myit a hten sháng gaq nghû, Ngò, náng é matú kyûdung byi bê; nàng dum lǐng bûn lò jáng, nung gu nung mǎng pé lé wum-o lhoq gǐng byi aq." ga tái ri.

³³ Haû hkûn, Simun gi, "Yhumsing ê, htóng wǎng kôlháng, shî kôlháng, ngò gi, nàng eq rahá cháng râ matú myit hpyit to bê." ga tái ri.

³⁴ Yesuq gi, "Petruq ê, nang lé Ngò tái lé, hkû-nyí † lháng woq a tǔn shi má, nàng, Ngo lé a sé ga luí sum dǎm he-ngik pyám râ nghut lhê." ga tái ri.

³⁵ Hau htâng, Yesuq, yhangmoq lé tái é gi, "Ngò, nungmoq lé ngunhtǔng, jǐhtǔng, hkyí-tsung a wùn a chǔng nhang é za, nhang kat é nghut hkûn, nungmoq chyáng haí ra akô lhú?" ga myi jáng, yhangmoq gi, "Haí le a ra lo." ga tái akô.

³⁶ Haû hkûn, Yhang gi, "Ahkuí kúm gi, ngunhtǔng wó sù gi, yù wun sháng gaq, jǐhtǔng wó sù le, yù wùn sháng gaq, shâm a wó sù gi, bumó ung luí wuí sháng gaq. ³⁷ Hkâsu mù gâ le, Ngò, nungmoq lé tái kôlé, Ngò eq séng luí Chyúmdang má kâ tô é gi, dut lò berâ nghut lhê; 'Haû yuq gi, yubak mara wó bang má ng-hap lhôm to bê.' †† ga kâ tô é dang gi, Ngá chyáng dik lò râ nghut lhê." ga luí, yhangmoq lé tái ri.

³⁸ Haû mù, lagyô pé gi, "Yhumsing ê, wú aq, shí má shâm í hkyam joq tô ri." ga tái kôjáng, Yesuq gi, "Gé bê." ga luí, yhangmoq lé tái ri.

Tsanlun Bùm Má Yesuq Kyûdǔng É Hkyô

Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chǎngzô pé le Yhang htâng châng e ló akô. ⁴⁰ Haû jowò má jé jáng, Yhang gi, "Nungmoq, gunglaú é a hui sháng gaq, kyûdǔng nyi keq." ga luí, yhangmoq lé tái to mù, ⁴¹ chǎngzô pé nyi é mai luqgok radú we kô gǎng e ló luí, hkyihput htoq mù, ⁴² "Áwa ê, Náng ô nau é nghut le gi, góm ‡ shî lé Ngá chyáng mai lhaí pyám byi laq. Nghut kôlháng, Ngò ô nau é dǔng a nghut, Nàng ô é dǔng sheq nghut sháng gaq." ga kyûdǔng ri. ⁴³ Haû hkûn, mauhkǔng mai maumang lagyo rayuq htoq lé luí, Yhang lé i-myit nhik lé tái tǐng ri. ⁴⁴ I-myit hkaú má dik shoq hkâm zo wuí é yanmai, Yhang je riy-hang kyûdung wum kat nyi ri; Yhâng é buibù le, sui hkyí nyi pat su myigǔng má yui gyó ri.

⁴⁵ Haû mù, kyû ban dung jáng, Yhang toq luí, chǎngzô pé chyáng ló wú le, yhangmoq gi, myit yón mù luí, yhup myhî to kô é lé ló myǎng mù, ⁴⁶ "Haí mù yhup nyi akô lhú? Toq keq! Gunglaú é a hui sháng gaq, kyûdǔng nyi keq." ga luí, yhangmoq lé tái ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Haû su ga, ru tái nyi ashî le, wú keq, haû chǎngzo raxe í yuq má bo é Yudaq gi, hkyô hí mù byù rajùm rayò lé shuí lé lò luí, yhang gi, Yesuq lé bopuq puq râ ga huí lé lo ri. ⁴⁸ Haû mù luí, Yesuq gi, "Yudaq ê, nàng gi, haû Byu Yhangzo lé bopuq puq é èq gyè pé chyáng ap pyâm lhê lhú?" ga luí, yhang lé lhom myí ri.

⁴⁹ Haû hkûn, Yesuq htâng chǎng bang gi, haí dut lò râ lé bûn sé kô é yanmai, "Yhumsing ê, ngamoq gi, sham èq zǎn le, gè râ lhú?" ga myí akô. ⁵⁰ Yhangmoq

† Yudaq byu pé é ra-nyí gi, myinhtǎng buí wang é mai, htang nyí buí wang é jé shoq nghut lhê. Shî mâ é hkû-nyí gi, nga-nhǔng é matú myín ǎng ri. †† 22:37 Esai 53:12 ‡ góm gâ é gi, Yesuq jamjau hui râ hkyô eq shî râ hkyô lé, tái nau é nghut lhê.

chyang mâ é rayuq gi, hkyangjong mó é dui-nhâng zoshâng lé zân kat luî, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tû taí mù, haú yuq é nohkyap lé é záng luî lhoq gê byî ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuî lé, "Nungmoq gi, damyaq rayuq lé chyup é su, shâm, dumbáng eq kut luî, lé lo akô lhú?" ⁵³ Ngò gi, nyî wuî, noqkuq yhûm má nungmoq eq rahá nyî kôlhâng, nungmoq Ngo lé chyup yû râ ga a hen wú kó; ahkuî gi, mauchut èq up † nyî bê yanmai, nungmoq é ahkyíng nghut nyi ri." ga taí ri.

Yesuq Lé, Petruq Èq He-ngik Pyâm É Hkyô

Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Haú hkûn, yhangmoq gi, Yhang lé chyup yû mù she ló luî, hkyangjong mó é yhûm shut shuî wang ló akô. Petruq le we we mai châng tô ri. ⁵⁵ Ahkuî, yhangmoq gi, wàng hkaû má myi mut yû luî zung tô bum é hkûn, Petruq le yhangmoq é ahkaû má bo tô ri.

⁵⁶ Langchyang myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luî, "Shí yuq le Yesuq eq rahá nyi sù nghut ri." ga taí ri.

⁵⁷ Haú hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

⁵⁸ Hau htâng hkâ-myháng a myáng má, byù rayuq gi, yhang lé dum myàng luî, "Nàng le yhangmoq chyang bo nyi sù nghut ri." ga taí kat jáng, Petruq gi, "Byù hpó ê, ngò a nghut." ga tû taí ri.

⁵⁹ Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq taí ri.

⁶⁰ Petruq gi, "Byù hpó ê, nàng taí nyi é hkyô lé, ngò a sé." ga tû taí ri. Haú su ga ru taí nyi ashî le, woq tún bê nghut ri. ⁶¹ Haú hkûn, Yesuq gi, lhíng luî, Petruq lé wú kat ri. Haú mù, Petruq gi, "Hkû-nyí lháng, woq a tún shí má, nàng Ngo lé sum dâm he pyám râ nghut lhê." ga luî, Yhumsíng yhang lé taí é dang lé bûn kat ri.

⁶² Haú mù, yhang gi, shinggan shut htoq é luî, gyai yhang é ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yhang lé rhoi luî ng-hap myíng nghap htê mu nyi akô. ⁶⁴ Yhangmoq gi, Yhâng é myoqdong nghop pyám byi luî, "Nang lé bat sù gi, ó yuq nghut ri lhú? Myiqhtoi htoí wú aq." ga myí akô. ⁶⁵ Yhangmoq gi, Yhang lé nyhap é dang ajung jung đông taí rhoi nyi akô.

Suwún Wui É Hí Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuî ê mù, ⁶⁷ "Nàng Hkrisduq nghut é têng le gi, ngamoq lé taí kyo laq." gâ akô.

Yesuq gi, "Ngò gi, Hkrisduq nghut lhê nghû taí kôlhâng, nungmoq jíng kó râ a nghut. ⁶⁸ Ngò, nungmoq lé myi kôlhâng, nungmoq gi, tû taí kó râ a nghut. ⁶⁹ Nghut kôlhâng, ahkuî mai haú Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê." ga luî, yhangmoq lé taí ri.

⁷⁰ Haú hkûn, yhangmoq banshoq bang gi, "Haú nghut le gi, Nàng, Garai Gasâng é Yhangzo nghut lhê lhú?" ga myí akô.

Yesuq gi, "Nungmoq taí é eq rajung za Ngò nghut lhê." ga luî, yhangmoq lé tû taí ri.

⁷¹ Haú hkûn, yhangmoq gi, "Nga-nhúng haí jung sak-sé wá râ nyi ashî lhú? Yhâng é nhut mai yhang, taí htoq kat é dang lé, nga-nhúng wó gyo bê nghut lhê." ga akô.

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

23 Haú hkûn, zup zîng tô é bang banshoq gi, htoq mù, Yesuq lé mauzau Pilat chyang shuî wang ê luî, ² "Shí yuq gi, mingbyû wui lé hkyô shuî nghoq é eq, hkoséng Kehtaq chyang kang kat râ hkyô lé le hkûm to luî, Yhânggùng yhang gi, haú Hkrisduq nghû é hkohkâm nghut lhê ga luî, taí nyi é lé ngamoq myang ri." ga luî, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pé é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga tû taí ri.

⁴ Pilat gi, "Shí yuq lé hûn râ mara ngò a myàng." ga luî, hkyangjong agyi pé eq shiwa byu pé lé taí ri.

⁵ Nghut kôlhâng, haú bang gi, "Shí yuq gi, Yuda mau gón má yhang mhoqshit é đông mai, mingbyû wui é i-myt lé shuî gabyông ri. Haú gi, Galile mau mai ahkuî shí má jé shoq nghut bê nghut ri." ga zuq zuq taí bum akô.

⁶ Pilat gi, haú su ga kô é lé wó gyo jáng, Yesuq Galile byù nghut é, a nghut é hkyô lé myí wú ri. ⁷ Yesuq gi, Herut up é mau mâ é byù nghut é lé Pilat sé jáng, haú u lé Yerusalem wà mó má nyi tô é Herut chyang, ê dé kat nhang ri.

⁸ Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhûm lhûm kut shit râ lé, wó myâng shoq ga, myit myoqbyu nyi é nghut luî, Yhang lé myàng nau é gyai yhang myíng bê nghut ri.

⁹ Haú mù, yhang gi, Yesuq lé dangmyi myo myô èq myí wú kôlhâng, Yesuq gi, dang rahkûn lháng a tû taí byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô.

¹¹ Herut eq yhâng é gyezô pé gi, Yesuq lé rhoi jihkyoí

† Mauchut èq up gâ é gi, Tsadán èq up é lé gâ ri.

kut mù, atam é dông taí hpoí kô luí, réng é mebu hut byi mù, Pilat chyáng dum taú dé nhang kat akô. ¹² Haú nyí jáng, hí hpyang gyè dut lhùm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqđân É Hkyô

Mht 27:15-26; Mrk 15:6-15; Yhn 18:39—19:16

¹³ Haú hkùn, Pilat gi, hkyangjong agyi pé eq zau suwún wuít, mingbyú wuít lé wut tsíng to mù, ¹⁴ "Shí yuq gi, mingbyú wuít lé hkyô shuí ngoq ri ga, Yhang lé nungmoq ná chyáng shuí lé lô bekô. Ahkuít, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a myàng mù, shí yuq lé nga-nhùng chyáng dum dé kat byi bê nghut ri; haú mù luí, wú keq, shí yuq gi, shí gíng é mara haí le a kut shut nghut ri. ¹⁶ Haú mù, ngò, Yhang lé dam byi luít, nhang pyám rá." ga luít, yhangmoq lé taí ri.

¹⁷ Nghut kôlhang, Lhoqlhai Poí hkangmó má, Pilat gi, mingbyú wuít lé htongbyú rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luít, chôm wut garu bum akô. ¹⁹ Barabaq gi, wà htum má gumlau kut é eq byú sat é yanmai, htóng gyó nyí sù nghut ri.

²⁰ Pilat gi, Yesuq lé nhang pyám nau é nghut mù luít, yhangmoq lé dum puq taí ri. ²¹ Nghut kôlhang, yhangmoq gi, "Yhang lé tapzîng má jén tap pyám aq, jén tap pyám aq!" ga luít, wut taí garú nyi bum akô.

²² Haú mù luít, sum dâm nghú rá hkùn, Pilat dum taí é gi, "Haí mù luít lhú? Yhang gi, hai mara kut shut bê lhú? Yhang má shí gíng é mara lé ngò a myàng, haú mù, ngò, Yhang lé bat, nhuq, mhoqshit luít, nhang pyám rá." ga luít, yhangmoq lé taí ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taí ung yú bekô nghut ri.

²⁴ Haú mù luít, Pilat gi, yhangmoq dúng é eq rajung za myit hpyit doqđan byí ri. ²⁵ Haú su mù, yhang gi, yhangmoq dúng é eq rajung za, wà htum má gumlau kut é eq byú sat é mai, htóng gyó nyí sù lé nhang kat byi luít; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuí htoq ló kô é hkùn, yosô wà mai lo é, Kuruni myuq byú nghut é Simun ga sù lé, chyup yú mù, tapzîng waq nhâng luít, Yesuq htâng má cháng nhang akô. ²⁷ Byú rajum rayò gi, Yhang htâng má châng e ló bum akô. Yhang é yanmai ngaubyi ngau nhap eq iyon yôn é myiwe zo wuít le haú má bo tô ri. ²⁸ Yesuq gi, yhangmoq shut lhîng wú luít, "Yerusalem byizo wuít ê, Ngá é yanmai hkâ-ngau nyi kó, nungmoq gi, yhumsing gùng eq yhumsing é zo dù wuít lé matú sheq ngau nyi keq. ²⁹ Hkâsu mù gâ le, 'Zogùng a dut wú é eq naú a huq wú é baùdung myhí

pé gi, hkungsô wó nyi ri.' ga luít, taí é buinyi gi, jé lô rá nghut lhê. ³⁰ Haú buinyi má, byu pé gi, bùm pé lé, 'Ngamoq ahtoq má byoq nhé aq!'

ga luít le, kong pé lé,

'Ngamoq ahtoq má nghop aq!' †

ga luít le, wut taí bùm bekô rá nghut lhê. ³¹ Byu pé gi, sikgâm jùm tô ashî le isu kut kô é nghut le gi, màn jáng gi, hkâsu wá dut lò rá lhú?" ga taí ri.

³² Haú hkùn, damyaq í yuq lé le, sat pyám rá ga, Yesuq eq rahá shuí htoq ló akô. ³³ Ahkuít, Ugyap nghu é kong má jé jáng, Yesuq lé tapzîng htoq má jén tap tô é hkùn, damyaq í yuq lé le, loqpai loqyò shut kut luít tapzîng má jén tap tô akô. ³⁴ Haú hkùn, Yesuq gi, "Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lhâng, hkyin shosé she é dông gam yu pyám byí akô.

³⁵ Mingbyú wuít gi, yap to mù tu wú nyi akô. Zau

suwún wuít Yhang lé nyhap é gi, "Yhang gi, byú góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhâng-gùng yhang le hkyi yu wú sháng gaq." ga akô.

³⁶ Gyezô pé le, huít ê mù, rhoí nyaú nyaú akô. Yhangmoq gi, chyín wing lé yhun byi kôluít, ³⁷ "Nàng gi, Yudaq byu pé é hkohkâm nghut é nghut le gi, Nàng gùng yhang nàng, hkyi yu wú aq." ga Yhang lé taí akô.

³⁸ Yhâng é ulhum ahtoq má le, (Grik dông le, Latin dông le, Hebre dông le) "SHÍ YUQ GI, YUFAQ BYU PÊ É HKOHKÂM." gâ é laiká kê tap tô akô.

³⁹ Tapzîng htoq má bat tap lhâng to huít é damyaq rayuq gi, "Nàng gi, Hkrisduq nghut lhê, a nghut lhú? Haú Nàng gùng nàng le, ngá-nhik lé le, hkyi yu aq." ga luít, Yhang lé rhoí ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luít nhîng, Garai Gasang lé a gyuq lhú? ⁴¹ Nga-nhik gi, yhumsîng kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luít, haú yuq lé tân kat ri.

⁴² Hau htâng, yhang Yesuq lé taí é gi, "Yesuq ê, Nàng, Nàng é mingdán má jé ló jáng, ngo lé myit bun laq ô." gâ ri.

⁴³ Haú hkùn, Yesuq gi, "Ngò, nang lé teng za taí lé, hkù-nyí yhang nàng Ngò eq rahá hparadisu †† má nyi rá nghut lhê." ga luít, yhang lé tũ taí kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

⁴⁴ Haú ahkyíng gi, nyí káng raxe í hkyíng nghut luít, myinhtâng sum hkyíng jé shoq ramau gón mauchut tuq dut byuq bê nghut ri; ⁴⁵ hkâsu mù gâ le, builoq shum byuq é yanmai nghut ri. Noqkuq yhùm mâ é pán-gyang le, í hkyam byáng dut byuq bê nghut ri.

⁴⁶ Haú hkùn, Yesuq gi, "Áwa ê, Ngò, Ngá é woi-nyí

† 23:30 Hos 10:8 †† Hparadisu nghu é gi, mauhkùng mingdán lé taí ri. ‡ Nga-nhùng é nyí káng raxe í hkyíng gi, Yudaq byu pé é napkyó hkyuq hkyíng nghut lhê; yhangmoq é gau hkyíng gi, nga-nhùng é myinhtâng sum hkyíng nghut bê.

náng é loq má ap byí lhê." ga htê mó èq garû kat ri. Haû su ga ban taí eq, Yhang kâng byit bê nghut ri.

⁴⁷ Shô up gyezau hpó gi, haû su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkya-on kungton ri. ⁴⁸ Haû hkyô lé wú rã ga, lé zîng tô é byù lhunglhâng bang le, haû su dut é hkyô pé lé myàng kôjáng, myit yón kôluí, wànggàng bat mù, dum taû lô byuq bekô. ⁴⁹ Nghut kôlhâng, Yhang lé sê é bang eq Galile mau mai Yhang htâng châng é myiwe wui gi, we we má yap to mù, haû hkyô pé lé byu wú nyi akô.

Yesuq É Màng Lé Lup Hkaû Má Kat É Hkyô

Mht 27:57-61; Mrk 15:42-47; Yhn 19:38-42

⁵⁰ Haû hkûn, Yuda mau Aramahti gâ é myuq má, Yosep gâ é sù rayuq nyi ri. Haû yuq gi, nhik bo é sù eq dingmán é sù nghut é htoq agó, Garai Gasang é mingdán jé rã hkyô lé myit myoqbyu to sù le, nghut mù luí, ⁵¹ yhang gi, Yudaq uphkâng hpúng mã é rayuq nghut kôlhâng, hpyé lhûm é hkyô má le, zui saí é hkyô má le, myit a bo huí lom é sù nghut ri. ⁵² Yhang gi, Pilat chyáng wàng luí, Yesuq é gungsôm lé dúng yu ri. ⁵³ Haû mù, gungsôm haû lé tapzîng mai hkyut hkyô yù luí, pán yúng èq htup yup mù, ó lé lháng a kat wú shí é, luqgok lé kyûng tô é luqgok lup hkaû má kat tô ri. ⁵⁴ Haû nyí gi, Hên Lajang Buinyi nghut luí, Bánno buinyi jé rã za nghut bê. ⁵⁵ Galile mau mai Yesuq eq rahá htoq lé lo é myiwe zo wui le, Yosep htâng má châng ê luí, lup haû lé le, Yesuq é gungsôm lé le, hkâsu kut tô tô é lé, ê myang akô. ⁵⁶ Hau htâng, yhangmoq gi, yhûm shut taû lò mù, Yesuq é gung sôm lé but byi rã matú, namngón é jung eq mura xù lé hen tô akô. Bánno buinyi má kúm gi, tarã joq é eq rajung za, yhangmoq yuban bân nyi bum akô nghut ri.

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

24 Bánno buinyi htang napsûn noq le, myiwe wui gi, yhangmoq hen tô é namngón jung pé lé yu chûng mù, lup shut e lô akô. ² Yhangmoq gi, lup mã é luqhkum lêng bóng to lánng é lé, ê myâng kômù, ³ wang e wú kô le, haû Yhumsîng Yesuq é gungsôm lé, a myàng lo kó nghut ri. ⁴ Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nãm má yap tô akô. ⁵ Haû mù, myiwe haû bang gi, gyuq dan bum kôluí, myigùng shut myoqdong ngóm gop tô bum é u lé, haû nhik gi, "Nungmoq gi, dui sù lé, shi to bâng chyáng haí mù ho nyi akô lhú?" ⁶ Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashî hkûn lé, ⁷ 'Haû Byu Yhangzo gi, yubak dap bâng é loq má ap pyâm é hui luí, tapzîng má jén sat to huí é htâng, sum nyí nghû é buinyi má lhoq dui toq yu é hui rã nghut lhê.' ga nungmoq lé taí tô é dang lé myit bun keq." ga luí, yhangmoq lé taí ri. ⁸ Haû hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taû lò mù, lagyo raxe rayuq eq gotû lhunglhâng bang lé, haû hkyô banshoq lo taí kyô akô. ¹⁰ Lagyo pé lé lo taí kyo bang gi, Maga-dalaq wã mã é Mariq, Yoanaq, Yakuq é yhângnu Mariq eq, yhangmoq eq rahá nyi é myiwe góbang le nghut akô. ¹¹ Lagyo pé kúm gi, yhangmoq é dang lé dangsôm su ngam pyám kôluí, a jîng byi kó nghut ri. ¹² Nghut kôlhâng, Petruq gi, toq luí lup má din jé ê mù ngóm wú kat le, mâng htup é pán leq tô é lé za myàng mù luí, haû su dut é hkyô lé maú é èq, yhûm shut dum taû lô byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³ Haû ra-nyí má za, Yesuq é chángzô pé mã é í yuq gi, Yerusalem wã mó mai nyhit déng kô wê é Ema-u gâ é wã shut e lô akô. ¹⁴ Yhangnhik gi, dut laí lô é hkyô pé banshoq lé, rayuq eq rayuq taí lhûm nyi akô.

¹⁵ Yhangnhik gi, haû hkyô pé lé rayuq eq rayuq taí hpyé lhûm e lô kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. ¹⁶ Nghut kôlhâng, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, "Nungnhik hkyô so uchyang taí lhûm lé lo é gi, haí jung wá nghut akô lhú?" ga myi kat jáng, yhangnhik gi, myoqdong shûm kut luí, hkyîng yap tô akô. ¹⁸ Yhangnhik mã é Hklupa gâ é sù gi, "Nàng gi, Yerusalem wã mó má lé bíng nyí luí nhîng, shí gyoro lé haû wã má dut lo é hkyô pé lé, a sê é bíng gi, Nàng baú za wá nghut lhê lhú?" ga myi kat ri.

¹⁹ Yhang gi, "Haí jung lhú?" ga dum myí é hkûn lé, yhangnhik gi, "Nazaret wã byù Yesuq é hkyô nghut lhê; haû yuq gi, Garai Gasang é hí má le, byù lhunglhâng bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoí nghut ri.

²⁰ Nghut kôlhâng, hkyangjong agyi pé eq ngamoq é zau suwún wui èq haû yuq lé sat pyám rã matú ap byí pyám kômù, yhangmoq gi, Yhang lé tapzîng má jén sat pyám bekô nghut ri. ²¹ Ngamoq kúm gi, haû yuq lé, Israellaq byù myû lé hkyi yù rã sù nghut lhê nghû luí, myit myoqbyu nyi bum lhê. Nghut kôlhâng, haû su dut laí lô é gi, hkû-nyí sum nyí lháng bò bê. ²² Hau htoq agó, hkû-nap noq le, lup mã é wú é, ngamoq hpúng mã é myiwe wui ra-am gi, ngamoq lé, lo lhoq maú akô. ²³ Yhangmoq gi, Yesuq é gungsôm lé a myàng jáng dum taû lò mù, 'Haû Yhumsîng dui nyi ri.' ga luí, taí kyô é maumang lagyo htoq shit é shing-rán lé, myang é hkyô lé lo taí kyô akô. ²⁴ Haû mù, ngamoq é luzúm wui ra-am gi, lup mã é wú kô le, myiwe wui taí é eq rajung za, dut to lánng é lé é myàng akô. Nghut kôlhâng, haû yuq lé gi, yhangmoq a myàng kó gâ." ga luí, Yhang lé taí kyô akô.

²⁵ Haû hkûn, Yhang gi, "Myiqhtoí pé taí é dang banshoq lé lumjîng rã matú, hpaqchyí a bo é eq ngha é sù nhik ê, ²⁶ Hkrisduq gi, haû su é wuîhke jamjau hkâm zô yu é htâng má sheq, Yhâng é hpungwup shingkang má wó wang nyi to rã, a nghut kó lhú?" ga luí, yhangn-

hik lé myî ri. ²⁷ Yhang gi, yhangnhik lé, Mosheq kê tô é eq myiqhtoi pé banshoq bang kê tô é Chyúmdang pé mai, Yhang má âng é dang banshoq é lichyúm lé, taî hpông kyô ri.

²⁸ Ahkuî, yhangmoq, haú nhik e lô é wà má chyâng lò kôjáng, Yesuq gi, laî lô râ su kut ri. ²⁹ Haú hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luî, Yhang lé wum kat chôm lung nyi akô. Haú mù luî, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo râ ga, yhangnhik eq rahá zung tô é hkûn, muk lé yù luî, jeju hkya-on mù, myhik hpé luî, yhangnhik lé gàm byî ri. ³¹ Haú hkûn, yhangnhik é my-oq bóng lô luî, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haú mù, yhangnhik gi, "Yhang gi, hkyô má ngá-nhik eq dang nyo lhûm é eq Chyúmdang é lichyúm taî hpóng shit é hkûn, ngá-nhik gi, i-myit unghkaû má, achyí aku dut bê a nghut lhú?" ga luî, yhangnhik yhangchang taî lhûm akô.

³³ Yhangnhik gi, toq mù, radá dâm Yerusalem wà mó shut dum taû lô kô le, lagyo raxe rayuq eq, yhangmoq eq rahá nyi é bang zup míng to kô é lé lô myang akô.

³⁴ Haú bang gi, "Haú Yhumsíng gi, teng za yhang dum dui toq lô bê; Simun lé lháng htoq shit bê nghut ri." ga taî lhûm nyi bum akô. ³⁵ Haú hkûn, yhangnhik gi, hkyô má dut laî lô é hkyô pé eq, muk hpé é hkûn má Yesuq lé bûn sé kat é hkyô lé, taî kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haú hkyô lé chôm taî nyi tô bum ashî le, Yesuq gi, Yhang gûng yhang, yhangmoq é agùng má yap to luî, "Nungmoq nguingón yuqyo nyi sháng gaq." ga luî, yhangmoq lé taî ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haú mù luî, Yhang gi, "Nungmoq gi, haî mù dan nyi bum akô lhú? Haî mù nungmoq é i-myit unghkaû má úng-âng nyi bum akô lhú? ³⁹ Ngá é loq eq Ngá é hkyô lé wú wú keq. Ngò yhang nghut nyi lhê. Ngo lé sop wú keq. Sobyô nghú é gi, ngo lé nungmoq myang é su, sho eq

showui showang bo é a nghut." ga luî, yhangmoq lé taî kyô ri.

⁴⁰ Yhang gi, haú su ga taî mù, Yhâng é hkyô loq lé tûn shit ri. ⁴¹ Yhangmoq gi, gabú é eq maú nyi bùm kômù, a wó jíng shi dut tô é hkûn lé, Yesuq gi, "Nungmoq shí má zôhpo rajung jung wó akô lhú?" ga luî, yhangmoq lé myi kat ri. ⁴² Haú hkûn, yhangmoq gi, nyhîn nyhoq tô é ngozo rahtung lé, byî akô. ⁴³ Yhang gi, haú lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taî é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luî kê to má kê to banshoq gi, dik râ chyat nghut lhê nghú luî, nungmoq eq rahá nyi to ashî hkûn lé, Ngò, nungmoq lé taî kyô tô é pé gi, shî nghut bê." ga taî ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myit hkum hpóng byî ri. ⁴⁶ Haú mù, Yhang gi, "Hkrisduq gi, wuîhke jamjau hui zo mù, sum nyí nghú râ buinyi má, shi é mai dum dui toq lô râ hkyô lé le, ⁴⁷ Yerusalem wà mó mai hí luî, byù myú chângjup lé, Yhâng é myìng lé lang luí yubak mara hkyut pyám byi râ hkyô eq myit lhíng râ hkyô lé le, hko kyo râ hkyô lé, kê to bê nghut ri. ⁴⁸ Nungmoq gi, shí pé é saksé pé nghut nyi akô. ⁴⁹ Ngá Wa byî tô é danggidiq † lé, Ngò, nungmoq é ahtog má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyi jé shoq, Yerusalem wà mó má láng nyí keq." ga luî, yhangmoq lé taî ri.

Yesuq Mauhkûng Shut Shuî Toq Yu Huî É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuî htoq ê mù, Yhâng é loq tu toq luî, shimân byî ri. ⁵¹ Haú su kut shimân byî nyi ashî le, Yhang gi, yhangmoq chyáng mai gâng lô byuq luî, mauhkûng shut shuî toq yu é hui bê nghut ri.

⁵² Yhangmoq kúm gi, Yhang lé noqkuq kômù luî, gyai gabú é myit èq Yerusalem wà mó shut dum taû lô akô.

⁵³ Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

† Ngá Wâ byi tô é danggidiq nghu é gi, Chyoiyúng é Woi-nyí lé taî ri.

Yohan

(The Gospel of John)

Haû Mungdang, Xângzo Byù Gùng Lé Dut É Hkyô

1 A-nham sâng-hi má, Mungdang joq ri; Mungdang haû gi, Garai Gasang eq rahá nghut luí, haû Mungdang yhang Garai Gasang nghut ri. ²Yhang gi, a-nham sâng-hi má, Garai Gasang eq rahá nghut nyi ri.

³Nyi mi-nyì, joq mijoq gi, Yhang đông mai hpan tô é chyat nghut lhê; Yhang đông mai a hpan é gi, haí lháng a joq nghut ri. ⁴Asak chyxngxe gi, Yhang má nghut lhê mù, asak haû gi, byu pê é matú maubó nghut ri. ⁵Haû maubó gi, mauchut má duqbo byí nyi kôhang, mauchut gi, haû lé a hap yù nghut ri. ⁶Garai Gasang mai nhang kat é, Yohan gâ é byù rayuq jé lé ri.

⁷Yhang gi, maubó haû eq sêng é hkyô lé, saksé hkám byi luí, yhang é yanmai byù lhunglhâng bang wó lumjìng kó sháng gaq ga, saksé rayuq đông jé lé é sù nghut ri. ⁸Yhang gi, haû maubó a nghut; maubó haû lé saksé hkám byi râ matú za sheq jé lé é ru nghut lhê. ⁹Byù yuq jup lé duqbo byi é, maubó akying haû gi, mingkan htoq má jé nyi to bê.

¹⁰Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôhang, mingkan haû gi, Yhang lé a wú sé nghut ri.

¹¹Yhang gi, yhumsing mau má jé lé kôhang, Yhâng é amyú pé gi, Yhang lé a lhom hap yù kó nghut ri.

¹²Nghut kôhang, Yhang gi, Yhang lé lhom hap yù luí, Yhâng é mying lé lumjìng é bang lhunglháng lé, Garai Gasang é yhangzô pé dut râ ahkáng byi bê nghut ri.

¹³Haû bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴Haû Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haû jeju eq tengmán hkyô bying tô é, Yhang é hpungwup shingkang lé myang wú bê nghut lhê; haû gi, haû Íwâ é zote rayuq đông, Yhang wó yu é hpungwup shingkang nghut ri.

¹⁵Wui-myhup Sará Yohan gi, Yhang eq sêng é hkyô lé saksé hkám é hkùn, garû taí é gi, "'Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghû, ngò taí é sù gi, shí yuq nghut bê." gâ ri. ¹⁶Yhâng é gumjup é jeju ahkaû mai, nga-nhúng banshoq bang gi, shimân jeju lé ral-hùm htoq ralhum myang yu nyi bê nghut lhê. ¹⁷Hkâsu mù gâ lé, haû jep é tarâ gi, Mosheq é loq đông mai byí é nghut lhê; jeju eq tengmán hkyô kúm gi, Yesuq

Hkrisduq é yanmai lé joq é nghut lhê. ¹⁸Garai Gasang lé, ó yuq èq le a myang wú wú é nghut lhê; nghut kôhang, haû Íwâ é tanghkoí má lúng tô é, Yhang Zo zote gi, Garai Gasang é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô

Mht 3:1-12; Mrk 1:1-8; Luk 3:15-17

¹⁹Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkùn, Yohan saksé hkám é gi, a-ô mâ é hkyô pé nghut ri. ²⁰Yhang gi, a hê a zaú tô e za, "Ngò gi, Hkrisduq † a nghut." ga lhom taí kyô ri.

²¹Haû hkùn, yhangmoq gi, "Haû nghut jáng, nàng gi, ó yuq nghut lhê lhú? Nàng gi, Eliyaq lhú?" ga myi kôjáng, yhang gi, "A nghut." ga taí ri; "Nàng gi, haû Myiqhtoi nghut lhê lhú?" ga dum myi kôjáng, yhang gi, "A nghut." ga tû taí ri.

²²Haû mù, yhangmoq gi, "Ngamoq lé nhang kat bâng chyáng ló wó taí kyo râ matú, nàng gi, ó yuq nghut lhê lhú? Náng gùng lé nàng hkâsu nghû lhê lhú? Taí kyô wú laq." ga dum myí akô.

²³Haû hkùn, Yohan gi, myiqhtoi Esai-aq é dang eq rajung za, "Ngò gi, haû yoso má, 'Yhumsing é matú hkyô lhoq nyhang to keq.' gâ é htê lé, garû taí é sù nghut lhê." †† ga tû taí ri.

²⁴Hparishe pé mai nhang kat é bang ra-am gi, yhang lé, ²⁵"Nàng gi, haû Hkrisduq le a nghut, Eliyaq le a nghut, Myiqhtoi le a nghut é nhing, haí mù luí, wui-myhup hkám byi nyi lhê lhú?" ga dangmyi myí akô.

²⁶Haû hkùn, Yohan tû taí é gi, "Ngò gi, wui èq za wui-myhup hkám byi lhê; nghut kôhang, nungmoq a sê é sù rayuq nungmoq chyáng yap tô ri. ²⁷Yhang gi, ngá htâng má lé é sù yuq nghut bê; ngò gi, Yhâng é hkyí-tsung tui lé hpýi râ lháng a gingdán é nghut ri." gâ ri.

²⁸Shí pé banshoq gi, Yohan wui-myhup hkám byí nyi é, Yodan làng hé hpoq mâ é Behtani wà má dut é hkyô pé chyat nghut ri.

Yesuq Gi, Garai Gasang É Sauzo Nghut É Hkyô

²⁹Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, "Mingkan byu pê é yubak mara lé yu pyám byí é Garai Gasang é Sauzo lé, wú keq! ³⁰Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù

† Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. †† 1:23 Esai 40:3

nghut ri.' nghû, ngò taí é sù yhang nghut bê. ³¹ Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghû, ngò lé jé mù, wui eq wui-myhup hkám byí nyi é nghut lhê." gâ ri.

³² Hau htâng, Yohan saksé hkâm é gi, "Haû Woi-nyí gi, mauhkúng mai hpûngkyui gunghkyâng sù é đông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó yuq nghut é lé a sê é nghut kôlhang, wui eq wui-myhup hkám byi râ matú, ngo lé nhang kat é Sù, ngo lé taí kyô é gi, 'Haû Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haû Chyoiyúng Woi-nyí má wui-myhup hkám byi râ sù nghut lhê.' gâ ri. ³⁴ Haû eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghû, ngò saksé hkâm lhê." gâ ri.

Sâng-hi Lhê É Chángzô Pé

³⁵ Hau htang nyí, Yohan gi, yhâng é chángzo í yuq eq rahá, haú má dum nyi tô akô. ³⁶ Haú hkûn, yhang gi, Yesuq lai ló nyi é lé myang kat jáng, "Hê, Garai Gasâng é sauzo lé, wú keq!" ga taí kat ri.

³⁷ Chángzo haû í yuq gi, yhang haû su gâ é lé wó gyo kôjáng, Yesuq é htâng cháng bekô nghut ri. ³⁸ Yesuq gi, lhing wú kat le, yhangnhik châng tô é lé myàng luí, "Nungnhik haí o akô lhú?" ga myi jáng, yhangnhik gi, "Rabai ê, Nàng hkâmá nyi lhê lhú?" ga taú myí kat akô nghut ri. (Rabai gâ é gi, Sará gâ é lichyúm nghut lhê.)

³⁹ Haú hkûn, Yhang gi, "Lé keq, haû jáng, nungnhik myàng kó râ nghut lhê." ga tũ taí ri.

(Haú-u gi, raxê hkyíng † kô nghut ri.) Haû mù luí, yhangnhik gi, châng ê mù, Yhang hkâmá nyi é lé, ê myàng kôluí, haú nyí buigyùm shoq, Yhang eq rahá ê nyi nyi akô nghut ri.

⁴⁰ Yohan taí é dang lé wó gyo luí, Yesuq htâng châng é su nhik mâ é rayuq gi, Simun Petruq é yhanggu Andre nghut ri. ⁴¹ Andre gi, yhangmang Simun lé hí myàng luí, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lhê.) ⁴² Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa †† gâ é myíng lé, nàng wó yũ râ nghut lhê." ga taí ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

⁴³ Hau htang nyí, Yesuq gi, Galile mau shut ê râ matú, myit hpyit yũ bê nghut ri. Yhang gi, Hpilip lé myàng jáng, "Ngá htâng cháng aq." ga taí ri.

⁴⁴ Hpilip gi, Andre eq Petruq nhik nyi é Bet-saida wà mó mâ é byũ nghut ri. ⁴⁵ Yhang gi, Nahtanelaq lé myàng jáng, "Mosheq mai tarâ laiká má kê tô é eq myiqhtoí pé mai le lhoq ang luí kê tô é sù, Yosep é yhang-

zo, Nazaret wà byũ Yesuq lé, ngamoq myàng bê." ga yhang lé taí kyô ri.

⁴⁶ Haú hkûn, Nahtanelaq gi, "Nazaret wà ô! Haû mai, ge é jung haí wa wó htoq lhê lhú?" ga myi jáng, Hpilip gi, "Ru lé wú aq." ga yhang lé taí ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaû é myit a bo é sù, Israelaq byũ akying rayuq nghut ri." ga taí ri.

⁴⁸ Haú hkûn, Nahtanelaq gi, "Nàng, ngo lé hkâsu kut sê é lhú?" ga myi jáng, Yesuq gi, "Nang lé, Hpilip eq a wut yũ shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tũ taí ri.

⁴⁹ Haû mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohkâm le nghut ri." ga taí ri.

⁵⁰ Haú hkûn, Yesuq gi, "Ngò, nang lé, maihpáng gâm ô má myang é nghû taí kyô é yanmai, nàng lumjíng lhê a nghut lhú? Hau htoq je kô é muzó pé lé, nàng myàng râ nghut lhê." ga taí ri. ⁵¹ Hau htâng, Yesuq xoq taí é gi, "Ngò, nungmoq lé teng za taí kôlé, mauhkúng bóng lô luí, haû Byu Yhangzô ahtoq má, Garai Gasâng é maumang lagyô pé doq ló gyó lô kut nyí kô é lé, nungmoq myàng kó râ nghut lhê." gâ ri.

Wuì Lé Tsibiyiq Wing Dut Nhang É Hkyô

2 Hau htâng, í nyí nghû râ nyí má, Galile mau mâ é Hkanaq wà mó má, myiháng poí ralhũm joq ri. Haû má Yesuq é yhângnu le, bo lom ri. ² Yesuq eq Yhâng é chángzô pé lé le, myiháng poí haû má ji akô nghut ri. ³ Tsibiyiq wing jaú tũm to kô é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé taí ri.

⁴ Haú hkûn, Yesuq gi, "Ânu ê, ‡ haû, nàng gi, Ngò eq haí sêng lhê lhú? Ngá é ahkyíng a jé shi é nghut lhê." ga tũ taí ri.

⁵ Nghut kôlhang, Yhâng nu gi, haû dui-nhâng zoshâng wuì lé, "Yhang haí taí le, haí kut keq." ga taí ri.

⁶ Haû nàm má, í sum xê galan kô wang é luqgok wúng hkyuq cham joq tô ri; haû gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haû dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haû mù, yhangmoq gi, wúng haú pé má byíng shoq shoq lhoq pyíng bekô nghut ri.

⁸ Hau htâng, Yhang gi, yhangmoq lé, "Ahkûi, ratsuí hkũ yũ mù, poí-up lé yu ló byi keq." ga taí jáng, yhangmoq gi, yu ló byi akô nghut ri.

⁹ Poí-up hpó gi, wuì mai dut é tsibiyiq wing haû lé, shuq chyam wú ri; wuì hkam é dui-nhâng zoshâng wuì gi, tsibiyiq wing haû hkâmai lo é hkyô lé sê to kôlhang, yhang gi, a sé nghut ri. Haû mù, yhang gi, lusik lé, ji yũ luí, ¹⁰ "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng

† Raxê hkyíng gi, myinhtâng myi hkyíng záng ri. †† Aramaik dang đông Kehpa gâ é eq Grik dang đông "Petruq" gâ é lichyúm gi, luqgok gâ é nghut lhê.

‡ Ânu é gâ é lé, Grik đông gi, "Myiwe myhí ê" ga bo tô é nghut lhê.

lé ru yu htoq lhê; nghut kôlhang, nàng gi, nghâm é tsi-byiq wing lé, ahkuí jé shoq wó hkong tô ri-nhung!" ga taí ri.

¹¹ Galile mau má é Hkanaq wà mó má, Yesuq tân shit é limik kumlhá gi, Yhang kut é limik kumlhá pé má é sâng-hî dàm nghut ri. Yhang gi, Yhâng é hpungwup shing kang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjínq bum akô nghut ri.

Noqkuq Yhâm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htâng má, Yesuq gi, Yhâng nu, Yhâng gu yuq-zo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyí ni akô nghut ri.

¹³ Yudaq byu pé é Lhoqlhai Poí jé rã nghut é hkûn, Yesuq gi, Yerusalem wà mó má doq ló ri. ¹⁴ Haú hkûn, noqkuq yhâm wàng má, nojûng, sau, hpûngkyui pé lé ûng nyí é bang lé le, siboí má ngùn htaí zô zung nyi é bang lé le, Yhang ló myàng ri. ¹⁵ Haú mù, Yhang gi, tui lé, nhuq rã wase saí yù mù, banshoq bang lé le, sau eq nojûng lé le, haú noqkuq yhâm wàng mai hkat htoq luí, ngùn htaí zo bâng é ngùn htingchap lé gi, tũ hut pyám byi mù, yhangmoq é siboí lé gi, tu mhuq pyám byi ri; ¹⁶ haú hpûngkyui ung zô é bang lé le, "Zè shi pé lé yu htoq ló keq! Ngá Wã é yhâm lé, hpugá jowò hkâkut kó!" ga luí nhik-yô ri.

¹⁷ Haú mù, Yhâng é chángzô pé gi, "Ngò, Náng é yhâm lé chyitdap kâng tuí é hkyô gi, Ngo lé myi su ny-hê jôm pyám rã nghut lhê." † ga kã tô é lé, myit bûn kat akô nghut ri.

¹⁸ Yudaq byu pé gi, Yhang lé, "Nàng, shí pé kut rã ahko ahkáng wó é hkyô lé saksé tân shit rã matú, ngamoq lé, haí jung limik kumlhá wó tân shit rã lhú?" ga chôm myí akô nghut ri.

¹⁹ Haú hkûn, Yesuq gi, "Noqkuq yhâm shí lé nungmoq hpyoq pyám keq, sum nyí gyoro má, Ngò, haú lé dum tu shap rã nghut lhê." ga, yhangmoq lé tũ taí ri.

²⁰ Haú Yudaq byu pé gi, "Noqkuq yhâm shí lé, myi xe hkyuq zân tup saí é ru nghut lhê; sum nyí gyoro má za, Nàng wó tu shap rã lhú?" ga tu myí akô nghut ri.

²¹ Nghut kôlhang, Yesuq taí é noqkuq yhâm gi, Yhâng é gùng lé lhoq ang luí taí é nghut ri. ²² Haú mù, Yhang, shí é mai lhoq dui toq huí é hkûn sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjínq akô nghut ri.

²³ Haú Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjínq bum akô nghut ri. ²⁴ Nghut kôlhang, Yesuq gi, byù lhunglhâng bâng é myit lé sê é yanmai, yhangmoq chyáng, Yhânggùng lé a ap to nghut ri. ²⁵ Yhang gi, byu é i-myit unghkaú má haí lúng tô é lé sê é yanmai, byù yhangchang saksé hkám byí é a ra nghut ri.

Nikodimu Lé, Yesuq Mhoqshit É Hkyô

³ Nikodimu gã é Hparishe rayuq nyi ri; yhang gi, Yudaq byu pé é byin tú wapdoq má bo é sũ nghut ri. ² Yhang gi, myín lé, Yesuq chyáng lé mù, "Rabai è, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gã le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut rã a nghut." ga taí ri.

³ Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sũ za a nghut le gi, Garai Gasâng é mingdán lé wó myâng rã a nghut." ga tũ taí ri.

⁴ Haú jáng, Nikodimu gi, "Ipyat kó bê é byù gi, dum hkû é hkâsu kut wó hui rã lhú? Ínũ é unghkaú má dum wàng mù, dum hku é hui rã gi, gè gè yhang wó dut rã a nghut!" ga taí ri.

⁵ Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wui eq Woi-nyí mai hku kat é hui sũ za a nghut le gi, Garai Gasâng é mingdán má wó wâng rã a nghut. ⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷ 'Nungmoq gi, dum hku é hui rã lhê' nghũ Ngò taí é dang lé, nàng hkâmaú nyí. ⁸ Haú, lai gi, yhang nau é shut ló lhê. Lai lò htê lé nàng wó gyo kôlhang, lai hkâ-mai lo é eq, hká shut ló é lé, nàng sé rã a nghut; haú Woi-nyí mai hku kat huí é sũ, ó yuq nghut kôle, haú eq rajung za nghut lhê." ga tũ taí ri.

⁹ Haú hkûn, Nikodimu gi, "Haú gi, hkâsu wó dut rã lhú?" ga myí ri.

¹⁰ Yesuq tũ taí é gi, "Nàng gi, Israelaq byu pé é sará rayuq nghut to luí nhîng, haú hkyô pé lé a sê gyo lhú?"

¹¹ Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. ¹² Ngò gi, nungmoq lé, mingkan eq sêng é hkyô lé taí kyô le lháng, a lumjínq kô é nghut le gi, mauhkûng mingdán eq sêng é hkyô lé taí kyô é nghut le gi, hkâsu kut wó lumjínq kó rã lhú?"

¹³ Mauhkûng mingdán mai gyó lo é sũ, haú Byu Yhangzo mai lai luí, mauhkûng mingdán má ó yuq lháng wó doq ló wú é a nghut. ¹⁴ Mosheq gi, yoso má lhangmuí lé tu shap tô é su, haú Byu Yhangzo le tu shap tô é hui ra rã nghut lhê. ¹⁵ Haú mù, haú Byu Yhangzo lé lumjínq é yuq hkanq mó gi, ahtum abyuq é asak wó yũ rã nghut lhê.

¹⁶ Hkâsu mù gã le, Garai Gasang gi, mingkan lé gyai yhang chyitdap é yanmai, Yhang Zo lé lumjínq é sũ ó yuq nghut kôle, htên byoq é a huí e za, ahtum abyuq é asak wó yũ sháng gaq ga, rayuq za é Yhâng é Zote lé byí pyám bê nghut ri. ¹⁷ Hkâsu mù gã le, Garai Gasang gi, mingkan lé mara byi rã matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui rã matú sheq nhang kat é ru nghut lhê. ¹⁸ Yhang lé lumjínq é sũ gi, mara byí é hui rã a nghut; nghut kôlhang, Yhang lé a lumjínq é sũ kúm gi, Garai Gasâng é Yhangzo zote lé a lumjínq é sũ nghut é yanmai, mara byí é huí to gù bê nghut ri.

† 2:17 Hkya-on 69:9

¹⁹ Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chytit râ malaî, mauchut lé chytit akô nghut ri; haû gi, mara byî é hui râ hkyô yhang nghut ri. ²⁰ Agè ashop hkyô kut é sù ó yuq nghut kôle, maubó lé a nguî nghut ri; haú yuq gi, yhang kut é hkyô lhoq byông htoq kat râ lé gyuq é yanmai, haû maubó shut lé lô râ a nghut. ²¹ Nghut kôlhang, haû tengmán hkyô đông asak dui é sù ó yuq le, yhumsîng kut é hkyô gi, Garai Gasang lom é hkyô lé, san za byu-myàng sháng gaq ga, haû maubó shut lé lo ri." gâ ri.

Yesuq Eq Séng Luî, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haú má rayoq zo nyi luî, wui-myhup hkâm byî ri. ²³ Haú u lé, Yohan gi, Salim nàm mâ é E-nun gâ é jowò má, wui gyai myo joq é yanmai, wui-myhup hkâm byî nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. ²⁴ (Haû gi, Yohan lé htóng a lhoq hkyó shî é hkun lhê é hkyô nghut ri.) ²⁵ Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luî, dang htíng htíng lhûm bum akô nghut ri. ²⁶ Hau htâng, yhangmoq gi, Yohan chyáng lé luî, "Rabai ê, Yodan làng hé hpoq shut nàng eq rahá nyi luî, nàng eq saksé hkâm byî é Sù gi, ahkuî, wui-myhup hkâm byî nyi é nghut mù, yuq hkangmó gi, Yhâng chyáng e bum akô nghut ri mhaî." ga, yhang lé taî akô.

²⁷ Haû eq séng luî, Yohan tû taî é gi, "Byù rayuq gi, mauhkûng mai byî é za a nghut jáng, haî le wó hap yù râ a nghut. ²⁸ 'Ngò gi, Hkrisduq a nghut, Yhang é hí má nhang kat huî é sù za nghut lhê.' nghû, ngò taî é lé, nungmoq yhang saksé nghut bum akô. ²⁹ Myisik wó é sù gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haû sù é gabú hkyô gi, ngá é gabú hkyô nghut mù, ngò má byíng jup nyi bê nghut ri. ³⁰ Yhang gi, kô jat lò ra râ nghut lhê; ngò gi, yom ló ra râ nghut lhê.

³¹ Ahtoq mai lé é Sù gi, lhunghâng é ahtoq má nghut ri; myigùng htoq mâ é sù kúm gi, myigùng htoq eq sêng é nghut luî, myigùng htoq eq sêng é đông za taî ri; mauhkûng mai lé é Sù gi, lhungháng é ahtoq má nghut ri. ³² Yhang gi, wó myàng wó gyô é hkyô lé, saksé hkâm kôlhang, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sù kúm gi, haû Garai Gasang gi, tengmán sù nghut ri ga, saksé shit é sù nghut bê. ³⁴ Garai Gasâng eq nhang kat é hui Sù gi, Garai Gasâng é mungdang lé taî ri; hkâsu mù gâ le, Garai Gasang gi, haû Woi-nyí lé, laké a kat e za byî é yanmai nghut ri. ³⁵ Haû Íwa gi, Zo lé chyitdap luî, jung hkangmó lé Yhâng é loq má ap byi bê nghut ri. ³⁶ Haû Zo lé lumjîng é sù ó yuq nghut kôle, ahtum abyuq é asak wó lhê; nghut kôlhang, haû Zo lé he-ngik pyâm é sù ó yuq nghut kôle, asak haû lé myàng râ a

nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

Yesuq Eq Samariq Myhí Huî É Hkyô

⁴ Yesuq gi, Yohan htoq má, chángzo je lhoq myô é eq wui-myhup hkâm byî nyi ri gâ é hkyô lé, haû Hparishe pé wó gyô akô nghut ri. ² (Nghut kôlhang, gè gè ga jáng, Yesuq gi, Yhang wui-myhup hkâm byî é a nghut, Yhâng é chángzô pé sheq ru nghut akô.) ³ Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taû ló bê nghut ri.

⁴ Ahkuî, Yesuq gi, Samariq mau mai sô laî ló râ dut bê nghut ri. ⁵ Haû mù, Yhang gi, Yakup mai yhang zo Yosep lé byî é maumyí rajap eq chyâng lhûm é, Suhka ga myhîng é, Samariq mau mâ é wà mó ralhum má lo jé ri. ⁶ Haû má, Yakup é wuîtung le joq to luî, Yesuq gi, hkyô sô ngu é yanmai, wuîtung hau é nàm má zung gyó tô ri. Haú u gi, nyí-káng raxe í hkyíng † nghut bê nghut ri.

⁷ Haú hkûn, Samariq myiwe myhí rayuq wuî lé hkam ri; Yesuq gi, yhang lé, "Ngo lé wuî byi shuq laq." ga taî ri. ⁸ (Haú u gi, Yhâng é chángzô pé, zoshuq wuî râ matú wà hkaû shut e byuq kô é ahkyíng nghut ri.)

⁹ Haû Samariq myiwe myhí gi, Yhang lé, "Nàng gi, Yudaq byù rayuq nghut to luî nhîng, ngò Samariq myiwe myhí chyáng, haî mù shuq wuî dúng lhê lhú?" ga taî ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

¹⁰ Haú hkûn, Yesuq gi, yhang lé, "Nàng gi, haû Garai Gasâng é chyunghuq lé le, nang lé wuî dung sù ó yuq nghut é lé le, sê é nghut le gi, noq mai Yhang lé dúng tôngbán luî, Yhang gi, nang lé asak-wuî byi berâ nghut lhê." ga tû taî ri.

¹¹ Myiwe myhí haû gi, "Yhumsîng ê, Nàng gi, wuî hkâm râ zè haî le a wó, wuîtung le nik ri; haû asak-wuî lé, Nàng hkâmâ é wó yù râ lhú? ¹² Ngamoq é íwa Yakup gi, ngamoq lé wuîtung shî byî to bê nghut lhê; yhang yhang le, yhang zo pé le, yhang rém é dusak pé le, wuîtung shî mâ é wuî shuq bekô nghut ri; Nàng gi, Yakup htoq je kô lhê lhú?" ga Yhang lé taî ri.

¹³ Yesuq gi, "Wuî shî lé shuq é sù ó yuq le, wuîshit é dum hui râ nghut lhê. ¹⁴ Nghut kôlhang, Ngò byî é wuî lé shuq é sù ó yuq nghut kôle, wuîshit é hkâ-nhâm a hui lo râ nghut lhê. Ngò byî é wuî haû gi, haú yuq má, ahtum abyuq é asak matú wuîbúm dut râ nghut lhê." ga yhang lé tû taî ri.

¹⁵ Myiwe myhí haû gi, Yhang lé, "Yhumsîng ê, ngò gi, wuî le a shit lo, shî má wuî hkâm le a lé ra lo sháng gaq, wuî haû ngo lé byi laq." ga taî ri.

¹⁶ Haû hkûn, Yesuq gi, "Ló mù, nung làng lé ló wut lò aq." ga, yhang lé taî ri.

¹⁷ Yhang gi, "Ngò, làng a wó." ga taî jáng, Yesuq gi, yhang lé, "Nàng, làng a wó gâ é gi, têng ri. ¹⁸ Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuî wó tô é yuqgè le nung làng a nghut. Nàng gi, têng é dang taî bê nghut ri." ga taî ri.

† Nyí-káng raxe í hkyíng gi, Yudaq byu pé é hkyuq hkyíng nghut ri.

¹⁹ Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê.

²⁰ Ngamoq é îchyí îwâ pé gi, bùm shî má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akò nghut ri." ga taí ri.

²¹ Haú hkûn, Yesuq taí é gi, "Myiwe myhí ê, Ngo lé jîng aq; bùm shî má le a nghut, Yerusalem wà mó má le a nghut e za, haú Îwa lé noqkuq râ ahkýing, jé lò nyi bê nghut ri. ²² Nungmoq Samariq byu pé gi, yhumsîng lháng a sê é lé, noqkuq akò; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê. ²³ Nghut kôlhang, haú têng é dông noqkuq é bang gi, woi-nyí mai le, tengmân hkyô mai le, haú Îwa lé noqkuq râ ahkýing gi, jé lò nyi bê nghut luí, ahkuí lháng jé to bê nghut ri; hkâsu mù gâ le, haú Îwa gi, haú su kut noqkuq é bang lé ô nau ri. ²⁴ Garai Gasang gi, woi-nyí nghut lhê; haú mù, Yhang lé noqkuq é bang gi, woi-nyí mai le, tengmân hkyô mai le, noqkuq ra râ nghut lhê." ga taí ri.

²⁵ Myiwe myhí haú gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê." ga taí ri.

²⁶ Hau htâng, Yesuq gi, "Nàng eq dang nyo nyi é sù ngò gi, haú yuq nghut lhê." ga taí ri.

Haú Chángzô Pé Dum Taú Jé Lo É Hkûn Lhê Hkyô

²⁷ Haú u lé, Yhâng é chángzô pé gi, dum taú jé lo bum akò; yhangmoq gi, Yesuq, myiwe rayuq eq dâng nyo nyi é lé lo myàng luí, maú byuq bum akò. Nghut kôlhang, "Nàng, haí ô ri lhú?" ga le, "Haí mù Yhang eq dâng nyo nyi lhê lhú?" ga le, Yhang lé ó yuq a myi kó nghut ri.

²⁸ Hau htâng, myiwe myhí haú gi, yhâng é wui yambú lé tô pyâm to luí, wà shut taú wang ló mù, wà byu wui lé ló taí kyô é gi, ²⁹ "Ngò kut laí lò bê hkyô pé lhunglháng lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gâ ri. ³⁰ Haú mù, yhangmoq gi, wà mai htoq lé luí, Yesuq chyáng lé lo bum akò nghut ri.

³¹ Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akò.

³² Haú hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tû taí ri.

³³ Haú mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq taí lhâm bum akò.

³⁴ Haú hkûn, Yesuq taí é gi, "Ngo lé nhang kat Sù ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê. ³⁵ 'Kyôshu yoq jé râ gi, lhamó myi hkyap râ ashí.' ga, nungmoq lhaq taí lhê a nghut kó lhú? Ngò, nungmoq lé taí kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. ³⁶ Haú kyô hkyó sù eq kyô shu sù gi, rahá wó gabú kó sháng

† Bun zo shî má, Yesuq taí nau é gi, hkyi yù hkyô lé, Garai Gasang gi, Yudaq byu pé dông danggidiq byi to é nghut é lé taí nau é nghut ri.

gaq ga, ahkuí lháng, haú kyô shu sù gi, yhâng é zuihpau lé myang yù luí, ahtum abyuq é asak é matú, kyôshi shù tsîng to bê nghut ri. ³⁷ Haú su mù, 'Rayuq gi, sân hkyó, góyuq gi, shù yù.' gâ é sanghkyang gi, têng ri. ³⁸ Nungmoq a zui saí tô é jang mâ é shù yù râ matú, nungmoq lé Ngò nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyô lé shu yù bekò nghut ri." gâ ri.

Samariq Byù Myo Myo Lumjîng Kô É Hkyô

³⁹ "Yhang gi, ngò kut laí lò bê hkyô lhunglháng lé, taí kyô ri." ga luí, myiwe myhí haú saksé hkâm é yanmai, haú wà mâ é Samariq byù myo myo gi, Yesuq lé lumjîng bùm bekò nghut ri. ⁴⁰ Haú mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyí bo nyi bê nghut ri. ⁴¹ Yhâng é dang pê é yanmai, byù myo myo gi, lumjîng bang dut jat lò bekò nghut ri.

⁴² Yhangmoq gi, myiwe myhí haú lé, "Ahkuí, ngamoq lumjîng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chôm taí akò nghut ri.

Mingsuwún Hpó É Yhangzo Lé Lhoq Gê Byí É Hkyô

Mht 8:5-13; Luk 7:1-10

⁴³ Í nyí lai jáng, Yesuq gi, haú mai Galile mau shut htoq e ló bê nghut ri. ⁴⁴ "Myiqhtoi gi, yhumsîng é mau má myoqdong a wó wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hkulum yu akò; yhangmoq gi, Yerusalem wà mó má, Lhoqlhai Poí ê lòm kô é nghut é yanmai, poí u lé, Yesuq kut é hkyô lhunglháng lé, myàng kô é bang nghut ri.

⁴⁶ Yesuq gi, Yhang mai haú wui lé tsibiyiq wing dut nhang é, Galile mau mâ é Hkanaq wà mó má, ê dum kûm ri. Haú ming suwún rayuq é yhangzo yuqzo gi, Kaperna-um wà má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haú wó gyo jáng, yhang gi, Yesuq chyáng ê mù, shî-nò no nyi é yhangzo lé, lé lhoq gê byi râ matú, Yhang lé dúng tôngbán ri.

⁴⁸ Haú hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjîng kó râ a nghut." ga taí ri.

⁴⁹ Mingsuwún haú gi, "Yhumsîng ê, ngá zo a shî shimá gyó lé laq." ga taí ri.

⁵⁰ Haú hkûn, Yesuq gi, "Nàng wó ló bê; nung zo byùn râ nghut lhê." ga tû taí ri.

Suwún haú gi, Yesuq taí é dang haú lé gyô jîng luí, tau ló bê nghut ri. ⁵¹ Yhang gi, hkyô má ru nghut nyi ashí hkûn, yhâng é dui-nhâng zoshâng wui gi, yhang lé lé hui luí, zoshâng haú gè byuq é hkyô, lé taí kyô akò nghut ri. ⁵² Yhang gi, yhang zo hkâ-nhám gè byuq é ahkýing lé myi wú é hkûn, yhangmoq gi, "A-nyí nap nyi

hkyuí rahkyíng má, gùng nyé é chàm ló byuq bê nghut ri." ga taí kyô akô.

⁵³ Haú hkûn, ahkyíng haú gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haú yhangwa bûn sé bê nghut ri. Haú mù, yhang eq yhang yhumbyù banshoq bang gi, lumjíng bekô nghut ri.

⁵⁴ Haú gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

Wuihtum Yàm Má, Nòhpyo Lhoq Gê Byí É Hkyô

5 Hau htâng a myáng má, Yudaq byu pé é poí ralhum joq é yanmai, Yesuq gi, Yerusalem wà mó má doq ló ri. ² Ahkuí, haú Yerusalem wà mó é Sau Hkúmdong nàm má, Hebre myíng dông gi, Betzahta ga myhíng é wuihtum ralhum joq ri; hau é lhíngkyuq má, jiropp ngo lhum joq tô ri. ³ Jiropp haú pé má, myoqjit bang, hkyí hten bang, gùngjum shí bang ajùm ayò leq tô bum akô. (Haú bang gi, wui dui nún râ lé láng tô é bang nghut akô. ⁴ Hkâsu mù gâ le, haú Yhumsing é maumang lagyo gyó lé lé kut mù, wui lé, lé lhu nhún jáng, wuihtum haú má hí wó wang é sù gi, haí jung ana wa dap to kôlhang, ge byuq é huí é yanmai nghut ri.) ⁵ Súm xe shit zân tup no nyi é byù rayuq le, haú má bo tô ri. ⁶ Yesuq gi, haú yuq no leq tô é lé myàng mù, haú su no nyi é gyai myáng bê nghut é hkyô lé sé jáng, yhang lé, "Nàng, gè nau ri lhú?" ga myí ri.

⁷ Nò sù haú yuq gi, "Yhumsing ê, wui dui nún lo é hkûn, wuihtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tũ taí ri.

⁸ Hau htâng, Yesuq gi, yhang lé, "Toq aq! Náng é taphkang yu chûng luí, sô ló aq." ga taí ri. ⁹ Haú yuq gi, radá dâm nò ge byuq bê nghut luí, yhang é taphkang yù mù, sô ló bê nghut ri.

Haú nyí gi, Bánno buinyi nghut ri. ¹⁰ Haú mù, Yudaq byu pé gi, haú nò ge byuq é hui sù lé, "Hkû-nyí gi, Bánno buinyi nyí nghut é yanmai, nàng, taphkang waq é gi, tarâ lu lai bê nghut ri." ga taí akô.

¹¹ Nghut kôlhang, yhang tũ taí é gi, "Haú ngo lé lhoq gê byi sù gi, ngo lé, 'Náng é taphkang yu chûng mù, sô ló aq.' ga taí é nghut lhê." gâ ri.

¹² Haú mù, yhangmoq gi, "'Náng é taphkang yu chûng mù sô ló aq.' ga, nang lé taí é sù gi, ó yuq wá nghut ri lhú?" ga myí akô.

¹³ Nghut kôlhang, haú ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haú má é byù moq mó má wang nyó ló byuq é yanmai nghut ri.

¹⁴ Htâng má, Yesuq gi, haú yuq lé noqkuq yhûm má myàng jáng, "Wú aq, nàng wángzán bê nghut ri; hí lhê htoq má je wuihke é hkyô a hui zo sháng gaq, mara hkâkut shut lo." ga luí, yhang lé taí ri. ¹⁵ Haú yuq gi, htoq ló mù, yhang lé lhoq gê byí é sù gi, Yesuq nghut ri ga, Yudaq byu pé lé taí kyô ri.

Asak Wó Yû Râ Hkyô

¹⁶ Haú mù, Yudaq byu pé gi, Bánno buinyi nyí má, Yesuq, haú hkyô kut é yanmai, Yhang lé gunjang lo akô nghut ri. ¹⁷ Haú hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mú zúí nyi é nghut mù, Ngò le mú zúí nyi lhê." ga taí ri. ¹⁸ Haú mù luí, Yesuq gi, Bánno buinyi lé lhoq htên é htoq agó, Garai Gasang lé lháng, Yhang Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

¹⁹ Yesuq, yhangmoq lé tũ taí é gi, "Ngò, nungmoq lé teng za taí kôlé, haú Zo gi, yhumsing é myit dông haí le a wó kut; Yhang Wa kut é hkyô lé myang é gù za wó kut é nghut lhê; hkâsu mù gâ le, haú Íwa kut é hkyô lé za, haú Zo châng kut é yanmai nghut lhê. ²⁰ Hkâsu mù gâ le, haú Íwa gi, Zo lé chyitdap é nghut luí, Yhang kut é hkyô lhunglháng, haú Zo lé tũn shit ri; nungmoq maú hông shoq, shí pé htoq je ko é hkyô pé lé lháng, haú Zo lé tũn shit shirâ nghut lhê. ²¹ Haú Íwa gi, shí bê bang lé lhoq dui toq mù, yhangmoq lé asak byí é eq rajung za, haú Zo le, Yhang byí nau é bang lé, asak byi râ nghut lhê. ²² Hau htoq agó, haú Íwa lé hkunggâ é eq rajung za, haú Zo lé le, lhunglhâng bang hkungga kó sháng gaq ga, haú Íwa gi, ó yuq lé le a jéyáng e za, jéyáng é hkyô lhunglháng, haú Zo lé lum to bê nghut ri. ²³ Haú Zo lé a hkunggâ é sù gi, haú Yhang lé nhang kat é sù Íwa lé le, a hkunggâ é sù nghut ri.

²⁴ Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjíng é sù, ó yuq nghut kôlé, mara byí é a hui e za, ahtum abyuq é asak wó é nghut lhê; haú yuq gi, shi é mai lut luí, asak dui bê sù nghut ri. ²⁵ Ngò, nungmoq lé teng za taí kôlé, haú Garai Gasang é Yhangzô é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lháng jé to bê nghut ri. Htê haú lé gyô é bang gi, asak dui kó râ nghut lhê. ²⁶ Hkâsu mù gâ le, Garai Gasang gi, Yhanggùng má yhang, asak bo é eq rajung za, Yhang Zo lé le, Yhanggùng má yhang, asak bò nhang é yanmai nghut ri. ²⁷ Hau htoq agó, Yhang gi, haú Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

²⁸ Shí hkyô lé hkâ-maú hong nyi kó: lup pé má lúng tô é bang banshoq gi, Yhang é htê lé wó gyo kôluí, htoq ló râ ahkyíng jé lò râ nghut lhê. ²⁹ Ge é hkyô kut é bang gi, asak dui râ matú, dui toq kó râ nghut lhê; agè ashop hkyô kut é bang gi, mara byí é hui zo râ matú, dui toq kó râ nghut lhê. ³⁰ Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é dông châng é a nghut e za, Ngo lé nhang kat é Sù ô nau é dông châng é sheq ru nghut lhê.

† Bun zo 3 lhum mâ é ahtang túm eq bun zo 4 lhum gi, chúymding myo myo má a bo é nghut lhê.

Yesuq Eq Séng Luí, Saksé Hkâm É Hkyô

³¹ Ngá gûng lé ngò saksé hkâm é nghut jáng, ngò za saksé hkâm é hkyô gi, teng rã a nghut. ³² Ngá é hkyô lé saksé hkâm byí é SÚ (Ngá Wa) góyuq nyi lhê; Ngò eq séng luí, haú yuq hkâm é saksé gi, teng é hkyô lé, Ngò sê lhê.

³³ Nungmoq gi, Yohan † chyáng byù nhang kat wú bekô nghut ri; yhang gi, haú tengmán hkyô lé saksé hkâm byi bê nghut lhê. ³⁴ Ngò gi, xângzo byu pé mai saksé hkâm byi rã lé, ra luí a nghut, nghut kôhang, nungmoq hkyi yu é wó hui rã matú sheq, haú su nghu taí é ru nghut lhê. ³⁵ Yohan gi, duq nyi é myibung su duqbó byí é nghut mù luí, nungmoq gi, haú duqbó é hkaú má, rayoq zo ngón nau nyi akô nghut ri.

³⁶ Nghut kôhang, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán rã matú, haú Íwa, Ngo lé ap byí tô é nghut luí, haú Íwa, Ngo lé nhang kat é hkyô lé, saksé hkâm byí nyi ri. ³⁷ Hau htoq agó, haú Ngo lé nhang kat é sù Íwa le, Ngò eq séng luí saksé hkâm byí ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó; ³⁸ haú Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sù lé a lumjíng kô é yanmai nghut ri. ³⁹ Nungmoq gi, haú Chyúmdang mai ahtum abyuq é asak wó yú rã nghut lhê ga myit yú kô é yanmai, haú Chyúmdang má ho wú akô nghut ri; nghut kôhang, Chyúmdang haú gi, Ngò eq séng luí saksé hkâm byí ri; ⁴⁰ nghut kôhang, asak wó yú rã matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkyá-ôn é lé a lhom yu é nghut lhê. ⁴² Nghut kôhang, nungmoq lé gi, Ngò sê lhê; nungmoq é i-myt hkaú má, Garai Gasang lé chyitdap é myit a bò kó nghut ri. ⁴³ Ngò gi, Ngá Wã é mying mai jé lé é sù nghut kôhang, nungmoq gi, Ngo lé a lhom hap yú kó; yhâng mying yhang lang é byù, gotú rayuq jé lé é ru nghut le gi, haú yuq lé, nungmoq lhom hap yú kó rã nghut lhê. ⁴⁴ Nungmoq gi, rayuq eq rayuq hkyá-ôn lhôm é lé za hap yú luí, rayuq za nghut é Garai Gasang chyáng mai lo é hkyá-ôn hkyô lé gi, a hô kô é bang nhing, hkâsu kut wó lumjíng kó rã lhú?

⁴⁵ Nghut kôhang, haú Íwã é hí má, Ngò, nungmoq lé mara hùn nhô hkâ-ngâm kó; nungmoq lé mara hun é sù gi, haú nungmoq mai myit myoqbyu tô é Mosheq ru nghut lhê. ⁴⁶ Mosheq lé nungmoq gè gè yhang lumjíng kô é ru nghut le gi, Ngo lé le lumjíng kó rã nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri. ⁴⁷ Nghut kôhang, nungmoq gi, yhang kâ tô é pé lé lhang a lumjíng kô é nhing, Ngá dang lé, hkâsu kut wó lumjíng kó rã lhú?" gâ ri.

Byù Ngo Hkyîng Lé Zoshuq Byi Tsô É Hkyô

Mht 14:13-21; Mrk 6:30-44; Luk 9:10-17

6 Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri. ² Haú hkûn, byù ajùm ayò gi, haú nò bang htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri. ³ Yesuq gi, bùm shut doq ló mù, Yhâng é chángzô pé eq rahá zung tô ri. ⁴ Yudaq byu pé é Lhoqlhai Poí gi, chyâng lo nyi bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo rã muk, nga-nhúng, hkâmá ê wó wú rã lhú?" ga taí ri. ⁶ Yesuq, haú su ga taí é gi, yhang lé chyam wú rã matú za nghut ri; hkâsu mù gâ le, hkâsu kut rã hkyô gi, Yhâng é myit má bo to gù bê nghut ri.

⁷ Hpilip gi, Yhang lé, "Denari †† í sho eq muk wui le lhang, rayuq ratsuí tsuí ngap rã a nghut." ga tũ taí ri.

⁸ Haú hkûn, Yhâng é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozo í du wó é yuqgè zo rayuq, shí má nyi ri; nghut kôhang, byù shí myhò bang lé luq shoq, hkâsu kut wó gâm byi rã lhú?" ga taí htoq kat ri.

¹⁰ Yesuq gi, "Haú shiwa byu pé lé, zùng nhâng keq." ga taí ri. Jowò haú gi, mhán htu é jang nghut mù, yuqgè wuì baú lhang, ngo hkyîng kô zung tô bùm bekô nghut ri; ¹¹ hau htâng, Yesuq gi, muk long pé lé yú mù, jeju hkyá-on luí, zung tô é bang lé, yhangmoq o é myhó tsing gâm byí ri. Haú eq rajung za, ngozo lé le haú su kut ri.

¹² Yhangmoq banshoq bang zô gyí bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsing yú keq. Haí le a langsâ pyám sháng gaq." ga taí ri. ¹³ Haú mù, yhangmoq gi, zô myhit tô é muk-yo muk ngo long mã é ajap azo pé lé châng guq tsing le, raxe í mung bying shoq wó guq tsing yu akô nghut ri.

¹⁴ Haú shiwa byu pé gi, Yesuq kut é limik kumlhá lé myàng kô é hkûn, "Shí yuq gi, mingkan htoq má jé lé lô rã gâ é, Myiqhtoi yhang nghut ri-nhung!" ga taí bum akô. ¹⁵ Yesuq gi, yhangmoq lé mù, Yhang lé hkohkâm zik kut nhâng kó rã dâ é hkyô lé, sê é yanmai, Yhang baú tsik za bùm shut dum haq doq ló bê nghut ri.

Yesuq, Wuì Htoq Má Sô É Hkyô

Mht 14:22-27; Mrk 6:45-52

¹⁶ Buigyum htâng, Yhâng é chángzô pé gi, haú nhông shut gyó ló mù, ¹⁷ lhaí má wang ji luí, nhông hé hpoq mã é Kaperna-um wà shut gû e ló akô; haú hkûn, mauchut bê nghut kôhang, Yesuq gi, yhangmoq chyáng a jé gyó lo shi nghut ri. ¹⁸ Haú u lé, laidun htan lo é yanmai, wuìlhêng toq lô bê nghut ri.

¹⁹ Yhangmoq gi, sum myi déng kô lhaí kôn e ló kô é hkûn, Yesuq gi, nhông htoq má so luí, haú lhaí shut chyâng lé lo nyi é lé myàng kômù, gyuq dan bùm bekô

† Yohan shí yuq gi, Wui-myhup Sará Yohan nghut lhê.

†† Denari rachap gi, byù rayuq é ra-nyí é zuihpau eq wuì é nghut lhê.

nghut ri. ²⁰ Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé taí ri. ²¹ Haû mù, yhangmoq gi, Yesuq lé gabú myit eq lhaí hkaû má shuí hâng yù nau akò. Haû hkûn, lhaí haû gi, radá dâm yhangmoq jé nau é jang wuiyàm má jé bê nghut ri.

²² Nhông hé hpoq má nyi tô é byù moq mó gi, haû má lhaí racham za joq laí lo é hkyô eq, lhaí haû má Yesuq a bo doq jî e za, chángzô pé baú ji htoq ló kô é hkyô lé, hau htang nyí, bûn sê kat akò nghut ri. ²³ Haû hkûn, haû Yhumsîng, jeju hkya-ôn é htâng, byu pé muk zô é jowò nàm má, Tiberi myuq mâ é lhaí pé jé lé bum ri. ²⁴ Haû byù moq mó gi, Yesuq eq Yhâng é chángzô pé, haû má a nyi lo kô é hkyô lé sé kô é yan-mai, Yesuq lé châng hô râ matú lhaí haû pé má wang ji mù, Kaperna-um wà shut e ló akò nghut ri.

Yesuq, Asak Muk Nghut É Hkyô

²⁵ Yhangmoq gi, nhông hé hpoq má Yesuq lé myàng kôjáng, "Rabai ê, Nàng gi, shí má hkâ-nhám jé lé é lhú?" ga, Yhang lé myí akò.

²⁶ Haû hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yan-mai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. ²⁷ Htên byuq sê é zoshuq é matú, hkâshikut kó; haû Byu Yhangzo byi râ nghut é ahtum abyuq é asak é matú, ru gîng nyi é zoshuq wó yù râ lé sheq shikut nyi keq. Yhâng chyáng gi, haû Íwa Garai Gasang mai Yhâng é saksé dizik tap to bê nghut lhê." ga tû taí ri.

²⁸ Haû mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ lhú?" ga Yhang lé myí akò.

²⁹ Haû hkûn, Yesuq gi, "Garai Gasang nhang kat é Sû lé, lumjîng é gi, Garai Gasang ô nau é muzó nghut bê." ga tû taí ri.

³⁰ Haû mù luí, yhangmoq gi, Yhang lé, "Ngamoq my-oq eq wó myâng luí, Nàng lé lumjîng râ matú, Nàng, haí jung limik kumlhá kut shit râ lhú? Nàng, haí jung kut shit râ lhú? ³¹ Haû Chyúmdang má, 'Yhang gi, yhangmoq zo râ matú, mauhkûng mai muk byí ri.' † ga kâ tô é eq rajung za, ngamoq é îchyí îwa pé gi, haû yoso hkaû má mannaq muk zo bekô nghut lhê." ga taí akò.

³² Haû hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byí é Sû gi, Mosheq a nghut, haû Ngá Wa sheq, nungmoq lé mauhkûng mai tengmán é muk byí é Sû ru nghut lhê. ³³ Hkâsu mù gâ le, Garai Gasang byí é muk gi, mauhkûng mai gyó lé luí, haû mingkan lé asak byí é Sû nghut lhê." ga taí ri.

³⁴ Yhangmoq gi, "Yhumsîng ê, ahkuí mai, ngamoq lé muk haû hkâ-nhám le byí nyi laq." ga chôm taí bum akò.

³⁵ Haû mù, Yesuq taí kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmút é hui râ a nghut; Ngo lé lumjîng é sù le, hkâ-nhám le wuîshit é hui râ a nghut. ³⁶ Nghut kôlhang, Ngò, nung-

moq lé taí wú bê eq rajung za, nungmoq gi, Ngo lé myang wú é nghut kôlhang, a lumjîng shí kó nghut ri. ³⁷ Haû Íwa mai Ngo lé ap byí tô é byù lhunglhang bang gi, Ngá chyáng lé kó râ nghut luí, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut. ³⁸ Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. ³⁹ Haû Ngo lé nhang kat Sû ô nau é hkyô gi, Yhang mai Ngo lé ap byí tô é bang mâ é rayuq lé lhang, Ngò, a lhoq hpyuq pyâm e za, jihtûm buinyi má yhangmoq lé dum lhoq dui toq yù râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haû Zo lé wú mù, Yhang lé lumjîng é sù yuq hkangmó, ahtum abyuq é asak lé wó yù râ matú nghut lhê; Ngò le, jihtûm buinyi má haû bang lé lhoq dui toq râ nghut lhê." gâ ri.

⁴¹ Haû mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi, ⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lhú? Haû sù é nhîng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lhú?" gâ bum akò.

⁴³ Haû hkûn, Yesuq gi, "Nungmoq ahkaû má hkâtaí put nyi kó. ⁴⁴ Haû Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé rá a nghut; jé lé é sù lé gi, jihtûm buinyi má, Ngò lhoq dui toq râ nghut lhê. ⁴⁵ Myiqhtoi laiká pé má, 'Yhangmoq lhunglhang bang gi, Garai Gasâng eq mhoq byí é hui kó râ nghut lhê.' †† ga kâ tô é eq rajung za, haû Íwa chyáng mai gyo yù, mhoq yu é bang yuq hkangmó gi, Ngá chyáng lé kó râ nghut lhê. ⁴⁶ Haû gi, rayuq yuq mai, haû Íwa lé myang wú bê nghû nau é a nghut; Garai Gasâng chyáng mâ é Sû za sheq, haû Íwa lé myang wú é Sû nghut lhê. ⁴⁷ Ngò, nungmoq lé teng za taí kôlé, lumjîng é sù gi, ahtum abyuq é asak wó lhê.

⁴⁸ Ngò gi, asak muk nghut lhê. ⁴⁹ Nungmoq é îchyí îwâ pé gi, haû yoso hkaû má mannaq muk zo bekô nghut lhê; nghut kôle, shi byuq bekô nghut ri. ⁵⁰ Nghut kôlhang, shí gi, mauhkûng mai gyó lé lo é muk nghut lhê; haû lé zô é sù gi, a shí lo râ nghut lhê. ⁵¹ Ngò gi, mauhkûng mai gyó lé lo é, haû asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyi râ nghut lhê; muk shí gi, mingkan zô wui é asak matú, Ngò byi râ nghut é Ngá gungsho nghut lhê." ga tû taí ri.

⁵² Haû mù, haû Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso râ lhú?" ga, yhangmoq yhangchang dang htîng htîng lhûm bum akò.

⁵³ Haû hkûn, Yesuq gi, yhangmoq lé, "Ngò, nungmoq lé teng za taí kôlé, haû Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut. ⁵⁴ Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jihtûm buinyi má, haû yuq lé lhoq dui toq yù râ nghut lhê. ⁵⁵ Hkâsu mù gâ le,

† 6:31 Htoq Lô 16:4

†† 6:45 Esai 54:13

Ngá é gungsho gi, zojung yangh nghut lhê; Ngá é sui gi, shuqjung yangh nghut lhê. ⁵⁶ Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyi luî, Ngò le haú yuq má nghut nyi bê nghut lhê. ⁵⁷ Haú rû dui nyi é Îwa gi, Ngo lé nhang kat luî, Ngò gi, haú Îwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lhê. ⁵⁸ Shî gi, mauhkung mai gyó lé lo é muk nghut lhê. Nungmoq é îchýí îwâ pé gi, mannaq muk zo kôle, shi byuq bekô nghut ri; nghut kôlhang, muk shî lé zô é sù gi, ahtum abyuq dui nyi râ nghut lhê." ga taí ri. ⁵⁹ Dang haú pé gi, Yesuq, Kaperna-um wâ mâ é tarajong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

⁶⁰ Yhâng é chángzô pé myo myo gi, haú lé wó gyo kôjáng, "Dang shî gi, gyai wuí ri. Ó yuq wá wó cháng râ lhú?" ga taí bum akô.

⁶¹ Yesuq gi, haú eq séng luî, Yhâng é chángzô pé taí put nyi bùm kô é lé Yhâng é myit má sé luî, yanghmoq lé, "Dang shi é yanmai, nungmoq myit htên bum akô lhú? ⁶² Haú Byu Yangzo gi, Yangh nyi laí lò bê jowò shut taú doq ló é lé, nungmoq myàng kô é nghut le gi, hkâsu nghû kó râ lhú? ⁶³ Haú Woi-nyí gi, asak byî lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê. ⁶⁴ Nghut kôle, nungmoq chyáng mâ é ra-am gi, a lumjínng kó nghut ri." ga taí ri. Hkâsu mù gâ le, ô pé gi, a lumjínng kó râ eq, ó yuq gi, Yangh lé ap pyám râ nghut é hkyô lé, Yesuq gi, sâng-hi mai sê to gù bê nghut ri. ⁶⁵ Yangh xoq taí é gi, "Haú su mù, haú Îwâ èq ahkáng byî é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lhê." gâ ri.

⁶⁶ Haú dâm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekô nghut ri.

⁶⁷ Haú su mù, Yesuq gi, haú chángzo raxe í yuq lé, "Nungmoq le, ló byuq nau akô, a nghut lhú?" ga myí ri.

⁶⁸ Haú hkûn, Simun Petruq gi, "Yhumsíng ê, Nàng gi, ahtum abyuq é asak mungdang wó Sù nghut to bê lé nhîng, ngamoq gi, ó yuq chyáng ê shirâ lhú? ⁶⁹ Nàng gi, Garai Gasâng é Chyoiyúng Sù nghut é lé, ngamoq, lumjínng lhê, sê nyi lhê." ga, Yangh lé tû taí ri.

⁷⁰ Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lhú? Nghut kôle, nungmoq mâ é rayuq gi, nat nghut ri." ga tû taí ri. ⁷¹ (Yangh gi, haú Simun Iskarut é yangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôle, htâng má, Yangh lé ap pyám râ sù nghut ri.)

Yesuq Eq Yhâng É Gumang Wuì

7 Hau htâng má, Yesuq gi, Yangh lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri. ² Nghut kôlhang, haú Yudaq byu pé é Saksé Zúm Poí

chyâng lo nyi é hkûn, ³ Yesuq é yanggu yuqzô pé gi, Yangh lé, "Náng é chángzô pé gi, Nàng kut é laklaí kumlhá pé lé myàng kó sháng gaq, Nàng, shî mai htoq ló luî, Yuda mau shut e ló aq. ⁴ Myíng hu nau é sù gi, hkaú zaú luî haí le a kut wú é nghut lhê. Nàng gi, haú pé lé kut nyi bê nghut é yanmai, mingkan lé, Náng gûng tûn shit aq." ga taí akô. ⁵ Hkâsu mù gâ le, yangg-gu síng yuqzô pé lháng, Yangh lé a lumjínng kó nghut ri.

⁶ Haú mù luî, Yesuq gi, yanghmoq lé, "Ngá é ahkyíng gi, a jé shi nghut ri; nungmoq é ahkyíng kúm gi, hká hkûn le joq nyi ri. ⁷ Haú mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haí mù gâ le, yangh kut é hkyô gi, agè ashop é nghut é lé, Ngò, saksé tûn shit é yanmai nghut ri. ⁸ Nungmoq gi, poí haú shut doq ló keq. Ngò kúm gi, Ngá é ahkyíng a jé shi nghut é yanmai, poí haú shut a doq ló shirâ nghut lhê." ga taí ri. ⁹ Haú su ga taí luî, Yangh gi, Galile mau má nyi gyó to bê nghut ri.

¹⁰ Nghut kôlhang, Yangh gu pé, haú poí shut doq ló byuq é htâng má, Yangh gi, de de a nghut é dông, tsik za châng doq ló bê nghut ri. ¹¹ Yudaq byu pé gi, haú poí má, Yangh lé châng hô kômù, "Haú yuq gi, hkâmá nghut lhê lhú?" ga, myi wún akô nghut ri.

¹² Haú byù hpûng hkaú má, Yangh eq séng luî taí lhûm bùm kô é má, ra-am gi, "Yangh gi, byu gè nghut ri." ga taí kôjáng, ra-am gi, "A nghut, Yangh gi, byu pé lé hkyô shuí ngoq sù nghut ri." ga tû taí akô. ¹³ Nghut kôlhang, haú Yudaq suwún wuí lé gyuq kô é yanmai, ó yuq le, Yangh eq séng é hkyô lé de de a wám taí kó nghut ri.

Haú Poí Má, Yesuq Mhoqshit É Hkyô

¹⁴ Haú poí rawuí nghut ló é hkûn, Yesuq gi, noqkuq yhûm má doq ê luî, mhoqshit hi ló bê nghut ri. ¹⁵ Haú hkûn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haú-í hkâsu mù sê lhê laq?" ga myi bum akô.

¹⁶ Haú mù, Yesuq tû taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. ¹⁷ Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasâng chyáng mâ é nghut a nghut é eq, Ngá é myit dông taí é dang nghut a nghut é lé, yangh sê gàm hkoq yû râ nghut lhê. ¹⁸ Yhumsíng é myit dông taí é sù gi, yhumsíng é matú aróng hô sù nghut ri; nghut kôlhang, yhumsíng lé nhang kat su é matú, aróng ho é sù gi, tengmán é byû nghut ri; yangh má, a tengmán é hkyô haí le a bò nghut ri. ¹⁹ Mosheq gi, nungmoq lé jep é tarâ byî to bê, a nghut kó lhú? Nghut kôlhang, nungmoq ó yuq le, jep é tarâ haú lé a cháng kó nghut ri. Hái mù luî, Ngo lé sat nau nyi akô lhú?" gâ ri.

²⁰ Haú hkûn, haú byù hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lhú?" ga tû taí akô.

²¹ Yesuq gi, yanghmoq lé, "Ngò, laklaí kumlhá ralhum kut jáng, nungmoq banshoq bang gi, maú byuq bum akô. ²² Nghut kôlhang, nungmoq gi, ahpyo-kuq hpyit

byî é hkyô lé, Mosheq byî é nghut lhê ga luî, Bánno buinyî má, zoshâng lé ahpyo-kuq hpyit byî akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, îchyí îwâ pê chyáng mai lo é ru nghut lhê.).²³ Haû, Mosheq é jep é tarâ lé a lhoq htên pyám sháng gaq nghû, Bánno buinyî má, zoshâng lé ahpyo-kuq hpyit byî é nghut le gi, haî mù luî, Bánno buinyî má, byù rayuq é gùng gón lé, Ngò lhoq gè byî é yanmai, Ngo lé nhikjum yô akô lhú?²⁴ Byù du lé wú luî hkâjéyáng kó; tengmán é dông sheq jéyáng keq." ga taî ri.

Yesuq Gi, Hkrisduq Nghut Lhê Lhú?

²⁵ Haû mù luî, Yerusalem wà mó mâ é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi?²⁶ Yhang gi, shí má de de dâng nyo nyi le, yhangmoq gi, Yhang lé, haî le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe?²⁷ Haû Hkrisduq jé lé é hkûn gi, Yhang hkâmai lé lo é lé, ó yuq lháng sé râ a nghut." ga taî bum akô. Nghut kôlháng, shí yuq gi, hkâmâ é sù nghut é lé, nga-nhúng sê lhê;

²⁸ Haû mù, Yesuq gi, noqkuq yhûm wàng má mhoqshít uchyang, htê mó èq taî kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlháng, Ngo lé nhang kat é Sù gi, tengmán lhê; nungmoq gi, Yhang lé a sé kôlháng,²⁹ Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

³⁰ Haû mù, yhangmoq gi, Yhang lé chyup râ dâ akô; nghut kôlháng, Yhâng é ahkýing a jé shi é yanmai, Yhang lé chyup râ matú, ó yuq le loq a jé kó nghut ri.

³¹ Nghut kôlháng, byù hpûng hkaû mâ é bang myo myo gi, Yhang lé lumjîng bûm kôluî, "Haû Hkrisduq jé lé é hkûn, Yhang gi, shí yuq htoq má, limik kumlhá pé jé wó kut shit râ lhú?" ga taî bum akô nghut ri.

³² Haû Hparishe pé gi, haû byù hpûng hkaû má, Yesuq eq sêng é hkyô lé, haû su ga dangsoq soq lhûm nyi kô é hkyô lé wó gyô yu akô. Haû mù, haû hkyangjong agyi pé eq Hparishe pé gi, Yhang lé ê chyup râ matú, noqkuq yhûm zúng é bang lé nhang kat akô.

³³ Haû hkûn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taû lô râ nghut lhê.³⁴ Haû hkûn, nungmoq gi, Ngo lé hô kôlháng, myang hô kó râ a nghut; Ngò nyi é jang má, nungmoq wó jé kó râ a nghut." ga taî ri.

³⁵ Hau é yanmai, Yudaq byu pé, rayuq eq rayuq taî lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq râ dâ lhê lhú? Yhang gi, Grik byu pé má nyi byo myín tô é nga-nhúng é byu pé nyi é jowô má ê mù, Grik byu pé lé, ê mhoqshít râ dâ lhê lhú?³⁶ Nungmoq gi, Ngo lé hô kôlháng, myang hô kó râ a nghut." gâ é eq, "Ngò nyi é jang má, nungmoq

wó jé kó râ a nghut." gâ é, Yhang taî é dang gi, haî jung wá gá naû é nghut lhê lhú?" gâ akô.

³⁷ Haû lô htâng é eq je ahkyak é Poî buinyî má, Yesuq toq yap luî, htê mó èq taî é gi, "Wuî shit sù gi, Ngá chyáng lé mù, shuq sháng gaq.³⁸ Ngo lé lumjîng é sù ó yuq nghut kôle, haû Chyúmdang má taî tô é eq ra-jung za, 'Yhâng chyáng mai asak uchyâm é wuîlàng yui htoq lô râ nghut lhê.'" gâ ri.³⁹ Yhang haû su gâ é gi, Yhang lé lumjîng é bang myang hap yù râ nghut é, haû Woi-nyí lé taî é nghut ri. Haû hkûn jé shoq, haû Woi-nyí lé a byi kat shi nghut ri. Hkâsu mù gâ le, Yesuq gi, hpungwup shing kang dan hû é a hui nhâng shi é yanmai nghut ri.

⁴⁰ Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haû nghut ri." ga taî akô.

⁴¹ Ra-am gi, "Shí yuq gi, Hkrisduq nghut ri." ga taî akô. Góbang nghut jáng, "Hkrisduq wá Galile mau mai htoq lé râ nghut lhê lhú?⁴² Haû Chyúmdang má, Hkrisduq gi, Dawiq é awut ashín mâ é nghut luî, Dawiq nyi laî lo é Betlehem wà mai htoq lô râ nghut lhê gâ é, a nghut lhú?" ga myí bum akô nghut ri.⁴³ Haû mù luî, Yesuq é yanmai, shiwa byu pé gi, gàm hkoq lò byuq bekô nghut ri.⁴⁴ Ra-am gi, Yhang lé chyup yù nau bùm kôlháng, Yhang lé loq a záng kó nghut ri.

Yudaq Byu Pé Lé Shuí U É Bang A Lumjîng Kô É Hkyô

⁴⁵ Hau htâng má, haû noqkuq yhûm zúng bang gi, haû hkyangjong agyi pé eq Hparishe pê chyáng taû lô kô é hkûn, haû bang gi, yhangmoq lé, "Nungmoq, haî mù luî, Yhang lé a shuí lo kô é lhú?" ga lhom myí akô.

⁴⁶ Haû hkûn, haû noqkuq yhûm zúng bang gi, "Shí yuq su ga taî é byù gi, ó le a nyi wú é nghut lhê." ga taî kyô akô.

⁴⁷ Haû mù, haû Hparishe pé gi, "Nungmoq lé le, Yhang èq mhoq hpyoq yù bekô lhú?⁴⁸ Haû zaû wui chyáng le, Hparishe pê chyáng le, Yhang lé lumjîng é byù bò akô lhú?⁴⁹ A bò! Nghut kôlháng, haû jep é tarâ lé a sê é byù moq mó shí gi, nhîng pyâm é hui bekô nghut ri." ga nhik-yô é dông tû taî kat akô nghut ri.

⁵⁰ Nghut kôlháng, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi,⁵¹ "Nga-nhúng é tarâ gi, byù rayuq lé, yhâng é dang hí a gyô wú é eq, yhang haî kut é lé a sê e za, mara byi lhê lhú?" ga, yhangmoq lé myí ri.

⁵² Haû hkûn, yhangmoq gi, "Nàng le, Galile mau byù nghut lhê lhú? Galile mau mai myiqhtoi rayuq lháng a htoq é hkyô lé, nàng gon wú aq, haû jáng sé râ nghut lhê." ga tû taî akô.

⁵³ Hau htâng, yuq hkangmó gi, ó le ô yhûm shut taû lô byuq bùm bekô nghut ri. †

Yesuq Lé, Lé Myí Chyam Wú Kô É Hkyô

8 Yesuq kúm gi, Tsanlun Bùm shut e lô bê nghut ri.
² Htang napkyó napsûn noq le, Yesuq gi, noqkuq

† Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

yhûm wàng hkaû má dum ê luî, byu pé lhunglhang gi, Yhang é lhinghkyuq má lé zing bum akô; haû mù, Yhang gi, zung to luî, yhangmoq lé mhoqshit ri. ³ Haû hkûn, haû tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gung má shap to kôluî, ⁴ Yesuq lé, "Sarâ ê, myiwe myhí shí lé, sulàng shut nyi é má myang chyup yu é nghut lhê. ⁵ Haû Mosheq é tarâ má gi, shí su é myiwe lé, luqgok eq dú sat pyám keq ga, nga-nhung lé hkunmó hkyô tô ri. Ahkuî, Nang gi, hkâsu nghû râ lhú?" ga myí akô. ⁶ Yhangmoq haû su ga myí é hkyô gi, Yhang lé mara wó hûn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má lo-qnyhuî eq htaû kê nyi ri. ⁷ Yhang lé, yhangmoq ru jang myí nyi kê é hkûn, Yhang gi, yap nyhang kat mù, yhangmoq lé, "Nungmoq mâ é mara a wó é sù hí, myiwe myhí shí yuq lé luqgok eq dú sháng gaq." ga taí ri. ⁸ Hau htang, Yhang gi, dum ngóm luî, myigùng má kê nyi ri.

⁹ Yhangmoq gi, haû su gâ é lé wó gyo kôjáng, je mang bang mai hí luî, rayuq htang rayuq ló byuq bekô nghut luî, Yesuq baú za myit gyó tô é eq, myiwe myhí haû jang yap nân tô ri. ¹⁰ Yesuq gi, yap nyhang kat luî, yhang lé, "Myiwe myhí ê, yhangmoq hká ló bekô lhú? Ó yuq eq le, nang lé mara a byi kó lhú?" ga myí ri.

¹¹ Yhang gi, "Yhumsing ê, ó yuq le mara a byi kó nghut ri." ga tú taí ri.

Haû hkûn, Yesuq gi, "Ngò le, nang lé mara a byi, ló aq hkoî, ahkuî mai mara hkâdum kut shut lo." ga taí kat ri.

Yesuq, Mingkân É Maubó

¹² Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htang châng é sù ó yuq nghut kôle, mauchut hkaû má hkâ-nhám le so râ a nghut, asak maubó lé wó râ nghut lhê." ga taí ri.

¹³ Haû mù, haû Hparishe pé gi, "Wú aq, Náng gung Nang saksé hkâm yu é nghut ri; Náng é saksé gi, teng râ a nghut." ga taí akô.

¹⁴ Haû hkûn, Yesuq gi, "Ngá gung Ngò saksé hkám kôlhang, Ngá é saksé gi, teng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri. ¹⁵ Nungmoq gi, byù hkyam đông za jéyáng akô; Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haû Ngo lé nhang kat é sù Íwa eq rahá nghut nyi lhê. ¹⁷ Haû nungmoq é tarâ má yhang le, í yuq mai hkâm é saksé gi, teng lhê ga kê tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haû Ngo lé nhang kat é sù Íwa le, Ngá é matú saksé hkám byí é nghut lhê." ga tú taí ri.

¹⁹ Haû mù, yhangmoq gi, Yhang lé, "Náng Wa gi, hkâmá lhú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kê é nghut le gi, Ngá Wa lé le, sé kó râ nghut

lhê." ga tú taí ri. ²⁰ Dang haú pé gi, haû noqkuq yhûm wàng hkaû mâ é alu kat jang nàm má, Yhang mhoqshit nyi é u lé taí é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhang é ahkyíng a jé shí é yanmai nghut ri.

²¹ Haû mù luî, Yesuq gi, yhangmoq lé, "Ngò gi, ló byuq râ nghut lhê, haû hkûn, nungmoq Ngo lé hô kó râ, yhumsing é mara má le shí kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taí ri.

²² Hau é yanmai, haû Yudaq byu pé gi, "Ngò ló é jang má, nungmoq wó jé kó râ a nghut." gâ é gi, Yhang-gung yhang sat shí râ gâ é nghut lhê lhú?" ga myi bum akô.

²³ Nghut kôlhang, Yesuq xoq taí é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shí eq sêng é bang nghut akô; Ngò kúm gi, mingkan shí eq sêng é sù a nghut. ²⁴ Haû mù, nungmoq gi, yhumsing é mara má shí kó râ nghut lhê nghû, Ngò taí é nghut lhê. Ngò gi, haû Yuq nghut lhê nghû taí é lé, nungmoq a lumjíng kô é nghut jáng, nungmoq gi, gè gè yhang, yhumsing é mara má shí kó râ nghut lhê." gâ ri.

²⁵ Haû hkûn, yhangmoq gi, "Nang, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyi bê nghut lhê. ²⁶ Ngò gi, nungmoq eq séng luî, taí râ hkyô eq jéyáng râ hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhang chyáng mai wó gyó yu é gû lé, Ngò, mingkan lé taí kyô lhê." ga tú taí ri.

²⁷ Yesuq gi, yhangmoq lé, Yhang Wa eq sêng é hkyô taí kyô nyi é lé, yhangmoq gi, a sê gyo kó nghut ri.

²⁸ Haû mù luî, Yesuq gi, "Haû Byu Yhangzo lé nungmoq tu shap † kat é hkûn sheq, Ngò gi, haû Yuq nghut é hkyô lé le, yhumsing myit đông haí le a kut e za, haû Íwa mhoq byí é đông za taí é hkyô lé le, nungmoq sé kó râ nghut lhê. ²⁹ Haû Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taí ri.

³⁰ Yhang, haû su taí nyi é u lé lhang, byù myo myo gi, Yhang lé lumjíng bûm bekô nghut ri.

Abraham É Awut Ashín Pê Hkyô

³¹ Haû mù, Yesuq gi, Yhang lé lumjíng é Yudaq byu pé lé, "Ngò mhoqshit é hkyô lé châng kut nyí bekô nghut jáng, nungmoq gi, gè gè yhang, Ngá é chángzô pé nghut bekô. ³² Nungmoq gi, haû tengmán hkyô lé sé kó râ nghut luî, haû tengmán hkyô gi, nungmoq lé lhoq lhut kat râ nghut lhê." ga taí ri.

³³ Haû hkûn, yhangmoq gi, "Ngamoq gi, Abraham é awut ashín pé nghut luî, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat râ' nghû Nang hkâsu kut wó taí lhê lhú?" ga tú taí akô.

† Tu shap gâ é lichyúm gi, tapzîng htoq mã jén sat pyám râ gâ é nghut lhê.

³⁴ Yesuq dum tũ taĩ é gi, "Ngò, nungmoq lé teng za taĩ kôlé, mara kut shut é sũ gi, marâ é jùn nghut lhê.
³⁵ Jùn gi, yhũm ikun eq hkâ-nhám le sêng nyi rã a nghut; zo kúm gi, ikun eq ahtum abyuq sêng lhê.
³⁶ Haũ mù luĩ, haũ Zo gi, nungmoq lé lhoq lhut kat é nghut jáng, nungmoq gi, gè gè yhang, lut berã nghut lhê. ³⁷ Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yũ kô é yanmai, Ngo lé sat rã dã akô nghut ri. ³⁸ Ngò gi, Ngá Wã chyáng mai myang yu é eq rajung za, nungmoq lé taĩ kyô nyi lhê; nungmoq le, nungmoq é ìwa chyáng mai wó gyô yu é eq rajung za kut nyi akô nghut ri." gã ri.
³⁹ Haũ hkũn, yhangmoq gi, "Ngamoq é ìwa gi, Abraham nghut lhê." ga tũ taĩ kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó rã nghut lhê. ⁴⁰ Nghut kôlhang, nungmoq gi, haũ Garai Gasang chyáng mai wó gyô yu é tengmán hkyô lé taĩ kyo sũ nghut é Ngo lé, sat pyám nau akô nghut ri. Haũ sũ é hkyô gi, Abraham a kut é nghut lhê. ⁴¹ Nungmoq gi, nungmoq é ìwa kut é muzó lé yhang, kut nyi akô." ga taĩ ri.
 Haũ hkũn, yhangmoq gi, "Ngamoq gi, dezo amyũ a nghut; ngamoq gi, ìwa rayuq za wó lhê; haũ gi, Garai Gasang nghut lhê." ga taĩ he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é ìwa nghut é nghut jáng, nungmoq gi, Ngo lé chyitdap kó rã nghut lhê; hkâsu mù gã le, Ngò gi, Garai Gasang chyáng mai lé jé luĩ, ahkuĩ, shĩ má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê. ⁴³ Nungmoq gi, haĩ mù Ngá é dang lé a sê gyo kô é lhú gã le, Ngò taĩ é dang lé, nungmoq a wó lhom yũ kô é yanmai nghut ri. ⁴⁴ Nungmoq gi, haũ nungmoq é ìwa nghut é nat Tsadán eq sêng é bang nghut luĩ, nungmoq é ìwa ô nau é hkyô lé kut nau bum akô. Yhang gi, a-nham sâng-hi mai byù sat sũ nghut ri. Yhang má tengmán hkyô a bo é yanmai, yhang gi, haũ tengmán hkyô má a yap gĩng nyi nghut ri. Yhang gi, mhaũ é hkũn, yhang é myit má bo é dông taĩ ri; hkâsu mù gã le, Yhang gi, byù mhaũ nghut luĩ, mhaũ hkyô pê é ìwa nghut ri.
⁴⁵ Haũ su mù, Ngò, nungmoq lé, haũ tengmán hkyô taĩ kyô é yanmai, nungmoq gi, Ngo lé a lumjĩng kó nghut ri. ⁴⁶ Nungmoq mã é ó yuq wá, Ngo lé mara bo lhê nghũ saksé wó tũn shit akô lhú? Ngò gi, haũ tengmán hkyô lé taĩ nyi é nghut le nhĩng, nungmoq, Ngo lé haĩ mù a lumjĩng kô é lhú? ⁴⁷ Garai Gasang eq sêng é sũ gi, Garai Gasang taĩ é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga taĩ ri.

Yesuq Eq Abraham

⁴⁸ Haũ hkũn, haũ Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng

to sũ nghut lhê nghũ, ngamoq taĩ é dang gi, jô lhê a nghut lhú?" ga myĩ akô.

⁴⁹ Yesuq gi, "Ngò gi, nat gang wang júng é hui sũ a nghut; Ngò gi, Ngá Wa lé sheq hkunggã é ru nghut lhê; nungmoq kúm gi, Ngo lé taĩ hpoĩ nyi akô nghut ri. ⁵⁰ Ngò gi, Ngá é matú aróng ho nyi é a nghut; nghut kôlhang, hô byi Sũ rayuq nyi lhê, haũ yuq jéyáng sháng gaq. ⁵¹ Ngò, nungmoq lé teng za taĩ kôlé, Ngá dang lé chãng é sũ gi, hkâ-nhám le, shĩ rã a nghut." ga taĩ ri.

⁵² Hau é yanmai, haũ Yudaq byu pé gi, "Nàng gi, nat gang wang júng to sũ nghut é lé, ahkuĩ, ngamoq sé bê! Abraham gi, shi byuq bê; haũ myiqhtoĩ pé le, shi byuq bekô nghut ri; nghut kôlhang, Nàng gi, 'Ngá dang lé chãng é sũ gi, hkâ-nhám le, shĩ rã a nghut.' ga taĩ ri. ⁵³ Nàng gi, ngamoq é ìwa Abraham htoq hkik lhê lhú? Yhang gi, shi byuq bê; haũ myiqhtoĩ pé le, shi byuq bekô nghut ri. Náng gũng nàng ó yuq su ngàm lhê lhú?" ga taĩ akô.

⁵⁴ Yesuq gi, "Ngá gũng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haũ nungmoq é Garai Gasang nghut lhê ga nungmoq taĩ é sũ, Ngá Wa gi, Ngo lé lhoq gyaú é sũ ru nghut lhê. ⁵⁵ Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghũ Ngò taĩ é ru nghut le gi, Ngò le nungmoq su byù mhaũ dut rã nghut lhê; nghut kôlhang, Ngò gi, Yhang lé sé luĩ, Yhang é dang gyo sũ nghut lhê. ⁵⁶ Nungmoq é ìwa Abraham gi, Ngo lé rã buinyi lé myoqbyu gabú nyi é nghut luĩ, myàng mù, gabú bê nghut ri." ga tũ taĩ ri.

⁵⁷ Haũ hkũn, haũ Yudaq byu pé gi, Yhang lé, "Nàng gi, asak ngo xê zàn lháng a nghut shĩ é nhĩng, Abraham lé myàng wú é nghut lhê lhú?" ga taĩ akô.

⁵⁸ Yesuq gi, "Ngò, nungmoq lé teng za taĩ kôlé, Abraham lháng a hkũ shi má, Ngò nyi gũ bê nghut lhê." † ga tũ taĩ ri. ††⁵⁹ Haũ mù luĩ, yhangmoq gi, Yesuq lé, dú rã ga luqgok kui yu akô; nghut kôlhang, Yesuq gi, haũ noqkuq yhũm mai haq htoq ló byuq bê nghut ri.

Myoqjít Sũ Lé Lhoq Gê Byĩ É Hkyô

9 Yesuq gi, sô yông ló nyi é u lé, hku lé é mai myoqjít to gũ nghut é byù rayuq lé myang ri. ² Haũ hkũn, Yhang é chángzô pé gi, Yhang lé, "Rabai ê, shĩ yuq, myoqjít gũ hku lé é gi, ó yuq kut shut é yubak é yanmai nghut lhê lhú? Yhang kut shut é lhú? A nghut jáng, yhang nu yhang wa kut shut é lhú?" ga myĩ akô.

³ Yesuq tũ taĩ é gi, "Haũ gi, yhang kut shut é yanmai le a nghut, yhang nu yhang wa kut shut é yanmai le a nghut; haũ Garai Gasang é muzó lé, yhang má wó lhoq htoq shit rã matú, haũ dut é ru nghut lhê. ⁴ Nganhúng gi, haũ Ngo lé nhang kat Su é muzó lé, nyi nghut tô ashĩ hkũn, zui saĩ nyi ra rã dut lhê; myĩn jé jáng gi, ó yuq le, mũ wó zui saĩ rã a nghut. ⁵ Ngò gi, mingkan htoq má nyi tô é u lé, mingkãn é maubó nghut lhê." gã ri.

† 8:58 Htoq Ló 3:14 †† Bun zo shĩ má, Yesuq gi, Yhanggũng yhang Garai Gasang nghut lhê gã nyi nghut ri.

⁶ Yhang gi, haù su ga taí luí, myigùng má sôkan byé hkyô mù, tse-nyhaq saí yù luí, haù yuq é myoqjí má but byí ri. ⁷ Hau htâng, haù yuq lé, "Haù Siloam wuihtum má ê chí pyám aq." ga taí ri. (Siloam gâ é gi, nhang é gâ é lichyùm nghut lhê.). Haù mù, haù yuq gi, é chí mù, myoq myàng luí, yhùm shut ló bê nghut ri.

⁸ Haù yhâng é yhumkyo bang eq yhang dung zô wún é lé myang wú é bang gi, "Shí yuq gi, haù zung to mù, dung zo zo lhaq kut é sù, a nghut kó lhú?" ga myí bum akô. ⁹ Ra-am gi, "Haù yuq nghut lhê." gâ bum akô.

Góbang gi, "A nghut, haù yuq su dut e za ru nghut lhê." ga taí akô.

Nghut kôlhang, yhang gi, "Ngò, haù yuq yhang nghut lhê." ga taí ri.

¹⁰ Haù hkûn, yhangmoq gi, "Haù nghut le gi, náng myoq hkâsu kut wó myang é lhú?" ga myí akô.

¹¹ Yhang gi, "Haù Yesuq gâ é byù rayuq, tse-nyhaq ratsuí saí yù luí, ngá é myoqjí má but byí mù, 'Siloam wuihtum má ê chí pyám aq.' ga ngo lé taí ri; haù mù, ngò é chí pyám é htâng má, ngá myoq wó myang é nghut lhê." ga tũ taí ri.

¹² Haù hkûn, yhangmoq gi, "Byù haù yuq gi, hkâmá nyi ri lhú?" ga, yhang lé myí akô.

Yhang gi, "Ngò a sé." ga taí ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haù myoqjit wú bê sù lé, Hparishe pê chyáng shuí lé akô. ¹⁴ Yesuq, tse-nyhaq saí yù mù, haù yuq é myoq lé lhoq myâng byí é buinyi gi, Bánno buinyi nghut ri. ¹⁵ Haù mù, yhang, myoq hkâsu kut wó myang é hkyô lé, haù Hparishe pé le dum myí akô. Haù jáng, yhang gi, "Haù yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê." ga tũ taí ri.

¹⁶ Haù Hparishe pé ra-am gi, "Shí yuq gi, Bánno buinyi é tará lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haù su é limik kumlhá pé lé, hkâsu wó kut htoq râ lhú?" ga myí akô. Haù mù, yhangmoq gi, myit a huí lhùm bùm lò kó nghut ri.

¹⁷ Haù mù, yhangmoq gi, haù myoqjit wú sù shut lhîng mù, "Nang lé myoq lhoq myâng byí é sù gi, hkasú é byù nghut lhê nghû, nàng taí râ lhú?" ga dum myi kôjáng, "Yhang gi, myiqhtoi rayuq nghut ri." ga, yhang tũ taí ri.

¹⁸ Haù Yudaq byu pé gi, haù yuq myoqjit wú é hkyô lé le, ahkuí myoq dum myàng bê nghut é hkyô lé le, haù yhâng nu eq yhâng wa lé, ê ji lò nhang é hkûn jé shoq, a lumjîng kó nghut ri. ¹⁹ Haù mù, Yhangmoq gi, haù yhâng nu eq yhâng wa lé, "Shí yuq gi, nungnhik é yhangzo nghut lhê lhú? Hku lé é hkûn mai, myoqjit gù nghut lhê lhú? Yhang, ahkuí, hkâsu kut wó myang é lhú?" ga myí akô.

²⁰ Haù hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê. ²¹ Nghut kôl-

hang, yhang, ahkuí hkâsu kut wó myang é hkyô lé le, yhâng é myoq lé ó yuq eq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo râ nghut lhê." ga tũ taí akô. ²² Haù yhâng nu eq yhâng wâ nhik gi, Yudaq byu pé lé gyuq kô é yanmai, haù su ga taí kô é nghut ri; hkâsu mù gâ le, Yesuq gi, haù Hkrisduq nghut lhê ga yín yu é sù, ó yuq lé nghut kôle, haù tarajong mai lhoq htoq pyám râ nghut lhê ga, haù Yudaq suwún wuí chôm myit hpyit to bekô nghut é yanmai nghut ri.

²³ Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haù Hparishe pé gi, myoqjit wú bê sù haù yuq lé dum ji yù mù, "Garai Gasang lé za hkya-on waq toq aq! Haù yuq gi, yubak dap sù rayuq nghut é lé ngamoq sê lhê." ga taí akô.

²⁵ Haù hkûn, yhang tũ taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

²⁶ Hau htâng, yhangmoq gi, "Yhang, nang lé haí kut byí ri lhú? Náng é myoq lé, yhang, hkâsu kut lhoq myâng byí ri lhú?" ga, yhang lé myí akô.

²⁷ Haù hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lhú? Nungmoq le, Yhâng é chángzô pé dut nau akô lhú?" ga tũ myí ri.

²⁸ Haù mù, yhangmoq gi, yhang lé gyaí rhoí é dông mai, "Nàng gi, haù yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê!

²⁹ Garai Gasang gi, Mosheq lé dâng nyo é hkyô lé, ngamoq sê lhê; nghut kôlhang, haù yuq eq séng luí, Yhang gi, hkâmai lé é sù nghut é lé lháng, ngamoq a sé." ga taí akô.

³⁰ Haù hkûn, haù yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê! ³¹ Garai Gasang gi, yubak dap bâng é dang lé a gyo byí é hkyô lé, nga-nhúng sê lhê. Garai Gasang gi, Yhang lé noqkuq luí, Yhâng ô nau é hkyô lé, kut é sù é dang lé kúm gyo byí lhê. ³² Hku lé é hkûn mai myoqjit gù nghut é byù lé, ó yuq eq myoq lhoq myâng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê. ³³ Haù yuq gi, Garai Gasâng chyáng mai lé é sù za a nghut le gi, haí le wó kut râ a nghut." ga tũ taí ri.

³⁴ Haù su ga jáng, yhangmoq gi, "Nàng gi, yubak htui má hku lé é sù nghut to luí nhîng, ngamoq lé wám mhòqshit lhê lhú?" ga tũ taí kôluí, yhang lé hkat htoq pyám akô nghut ri.

Woi-nyí Má Myoqjit É Hkyô

³⁵ Yesuq gi, haù yuq lé yhangmoq hkat htoq pyám é hkyô lé wó gyo luí, yhang lé myàng hui jáng, "Nàng gi, haù Byu Yhangzo lé lumjîng lhê lhú?" ga myí ri.

³⁶ Haú hkûn, haú yuq gi, "Yhumsing ê, haú gi, ó yuq nghut lhê lhú? Yhang lé, ngò wó lumjǐng sháng gaq, taí kyo laq." ga myí ri.

³⁷ Yesuq gi, "Nàng, haú yuq lé myàng wú bê nghut lhê; ahkuí, nàng eq dáng nyo nyi é sũ gi, haú yuq yhang nghut lhê." ga taí ri.

³⁸ Haú mù, haú yuq gi, "Yhumsing ê, ngò lumjǐng lhê!" ga taí luí, Yhang lé noqkuq ri.

³⁹ Haú hkûn, Yesuq gi, "Haú myoqjit bang myoq myàng kó rá hkyô eq myoq myàng bang myoqjit kó rá hkyô lé, tarâ jéyáng rá matú, mingkan shí má Ngò jé lé é nghut lhê." ga taí ri.

⁴⁰ Yhang eq rahá nghut nyi é Hparishe pé ra-am gi, Yhang haú su ga taí é lé wó gyo kôjáng, "Hkâsu htâ? Ngamoq gi, myoqjit bang dut bê lhú?" ga myí akô.

⁴¹ Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó rá nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

Sau Zúng Sũ Eq Sau Hpúng

10 Ngò, nungmoq lé teng za taí kôlé, haú sau hkup má, hkúmdong mai a wang e za, gó hkyô đông doq lut wang é sũ gi, hkau sũ eq damyaq nghut ri.

² Haú hkúmdong mai wang é sũ kúm gi, sau zúng sũ nghut ri. ³ Haú hkum zúng sũ gi, yhang lé hkum hpóng byí é htoq agó, haú sau pé gi, yhang é htê lé gyo byí akô. Yhang gi, yhang é sau pé lé, myìng lang luí wut yù mù, yhangmoq lé shuí htoq htoq kut nyi ri. ⁴ Yhang é sau pé banshoq lé hpông htoq yù mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htàng má châng akô nghut ri. ⁵ Nghut kôlhang, yhangmoq gi, byù bíng é htàng má, hkâ-nhám lhang cháng kó rá a nghut e za, yhang chyáng mai kúm hpang byuq kó rá nghut lhê; hkâsu mù gâ le, haú byù bíng é htê lé, yhangmoq a sê gyo kô é yanmai nghut ri." ga taí ri. ⁶ Yesuq gi, dangtú haú lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

⁷ Haú mù, Yesuq dum taí é gi, "Ngò, nungmoq lé teng za taí kôlé, Ngò gi, haú sau pé wang é hkúmdong nghut lhê. ⁸ Ngá é hí má lé é lhunglhang bang gi, hkau bang eq damyaq pé nghut akô; haú sau pé kúm gi, yhangmoq é dang lé a lhom gyo byi kó nghut ri. ⁹ Ngò gi, hkúmdong nghut lhê; Ngò mai wang é sũ ó yuq nghut kôle, hkyi yu é hui rá nghut lhê. Haú yuq gi, htoq htoq wàng wàng wó kut rá eq mhan-yô myang hô rá nghut lhê. ¹⁰ Haú hkau sũ gi, hkau rá, sat rá eq lhoq htên pyám rá matú, lé e za nghut lhê. Ngo lé é gi, yhangmoq, asak wó yù rá eq byíngjup é asak lé wó yù rá matú sheq nghut lhê.

¹¹ Ngò gi, ge é sau zúng sũ nghut lhê; haú ge é sau zúng sũ gi, sau pé é matú, yhumsing é asak lé ap byi pyâm é nghut lhê. ¹² Haú langchyáng kut sũ gi, sau pé lé sing é sau zúng sũ a nghut; haú mù, yhang gi, haú wamhkuí lé lo é lé myàng jáng, saú pé lé pyâm to mù hpang ló byuq rá nghut lhê; haú hkûn, wamhkuí gi,

sau hpúng lé é htim luí, lhoq pyo pyám rá nghut lhê.

¹³ Yhang gi, langchyáng hpó nghut luí, haú sau pé é matú haí le a myit chiq byí é yanmai, hpang é nghut ri.

¹⁴ Ngò gi, haú ge é sau zúng sũ nghut lhê; haú İwa gi, Ngo lé sê é nghut luí, Ngò le, haú İwa lé sê é eq ra-jung za, ¹⁵ Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haú sau pé é matú, yhumsing é asak lé ap byí pyâm é nghut lhê. ¹⁶ Ngò gi, sau hkup shí mâ é a nghut é gotú sau pé wó ashí; sau haú pé lé le, Ngò, shuí yù rá rá nghut lhê; sau haú pé le, Ngá é htê lé gyo kó rá nghut lhê; haú hkûn, sau hpúng rahpúng za dut luí, sau zúng sũ le rayuq za, nghut rá nghut lhê. ¹⁷ Ngò gi, Ngá é asak lé dum wó taú yù sháng gaq nghú, yhumsing é asak lé ap byí pyâm é yanmai, Ngá Wa gi, Ngo lé chyitdap é nghut lhê. ¹⁸ Ngá é asak lé, ó yuq eq le wó yu pyâm é a nghut, Ngá é myit đông byi pyâm é ru nghut lhê. Ngò gi, yhumsing asak lé ap byi pyâm rá ahko ahkáng eq haú lé dum taú yù rá ahko ahkáng wó sũ nghut lhê. Haú gi, Ngá Wâ chyáng mai Ngò wó yu é hkunmó nghut lhê." gâ ri.

¹⁹ Dang haú pé é yanmai, haú Yudaq byu pé gi, myit a huí lhum dum dut byuq bekô nghut ri. ²⁰ Haú mâ é bang myo myo gi, "Yhang gi, nat gang wang júng to luí, nâ byuq bê nghut ri. Yhang é dang lé, haí mù gyô nyi akô lhú?" ga taí bum akô.

²¹ Nghut kôlhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sũ lé, myoq wó lhoq myàng nhâng rá lhú?" ga taí bum akô nghut ri.

Yudaq Byu Pé A Lumjǐng Kô É Hkyô

²² Yerusalem wà mó má, Ap Nóng Poí †† jé bê nghut ri. Haú gi, gyoqmyò nám nghut ri. ²³ Haú hkûn, Yesuq gi, haú noqkuq yhũm wàng mâ é, Sholumon é Jirop má sô yông wún ri. ²⁴ Haú u lé, haú Yudaq byu pé gi, Yhang é lĩnghkyuq má lé zĩng bũm kômù, "Nàng gi, ngamoq lé hkâ-myháng jé shoq úng-áng nhang nyi rá lhú? Nàng, Hkrisduq nghut le gi, ngamoq lé san za taí kyô pyám laq." ga taí akô.

²⁵ Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjǐng kó nghut ri. Ngá Wâ é myìng mai, Ngò kut é laklaí kumlhá haú pé gi, Ngá é matú saksé hkám byí nyi ri. ²⁶ Nghut kôlhang, nungmoq gi, Ngá é sau a nghut kô é yanmai, a lumjǐng kó nghut ri. ²⁷ Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htàng châng akô nghut ri. ²⁸ Ngò gi, yhangmoq lé, ahtum abyuq é asak byí é nghut mù, yhangmoq gi, hkâ-nhám le htên byoq kó rá a nghut; ó yuq eq le, yhangmoq lé, Ngá é loq mai wó lú yù rá a nghut. ²⁹ Yhangmoq lé, Ngá é loq má ap byi tô é sũ, haú Ngá Wa gi, lhunglhang htoq má je gyaú Sũ nghut lhê; ó yuq eq le, yhangmoq lé, Ngá Wâ é loq mai wó lú yù rá a nghut. ³⁰ Ngò eq haú İwa gi, rayuq za nghut lhê." ga tũ taí ri.

† 10:16 Esai 56:8 †† Ap Nóng Poí gâ é gi, Garai Gasàng é yhũm lé ap nóng lé gâ lhê.

³¹ Haú hkûn, haú Yudaq byu pé gi, Yesuq lé, dú rá matú luqgok dum kui akô. ³² Nghut kôlhang, Yesuq gi, yhangmoq lé, "Haú Îwâ chyáng mâ é laklaí kumlhá mó pé myo myo, Ngò, nungmoq lé tân shit bê nghut lhê. Nungmoq, Ngo lé dú rá gi, hká lhûm é yanmai nghut akô lhú?" ga myî ri.

³³ Haú Yudaq byu pé gi, "Ngamoq, Nang lé dú rá gi, haú pé hká lhûm é yanmai le a nghut; Nàng gi, byù rayuq nghut to luí, Garai Gasang nghut é đông táí whuí luí, Yhang lé rhoí dang taí é yanmai, dú rá nghut lhê." ga tú taí akô.

³⁴ Haú hkûn, Yesuq gi, yhangmoq lé, "Nungmoq gi, garaí pé nghut akô nghû, Ngò táí bê nghut lhê." † ga nungmoq é tará má kê to lhê a nghut kó lhú?

³⁵ Chyúmdang haú lé gi, a ge lhoq hpyoq pyâm é nghut luí, haú Garai Gasang é mungdang lé wó yu é bang lé, 'garaí pé' gâ é nghut le gi, ³⁶ haú Îwa mai, Yhang é matú hkyin htoq yû luí, mingkan má nhang é Sû eq séng luí gi, hká đông nghû kó rá lhú? 'Ngò gi, Garaí Gasang é Yhangzo nghut lhê.' nghû taí é yanmai, Ngò gi, Garaí Gasang lé taí hpoí ri nghû, nungmoq, haí mù Ngo lé mara hûn akô lhú? ³⁷ Ngá Wâ é muzó pé lé, Ngò kut é a nghut jáng, Ngo lé hkâlumjínng kó. ³⁸ Nghut kôlhang, Ngò, haú pé lé kut é nghut le gi, nungmoq, Ngo lé a lumjínng kôlhang, haú muzó pé lé lumjínng keq; haú hkûn, haú Îwa gi, Ngò má nghut nyi é hkyô lé le, Ngò gi, haú Îwa má nghut nyi é hkyô lé le, nungmoq wó sé luí, sê gyo kó rá nghut lhê." ga tú taí ri. ³⁹ Yhangmoq gi, Yhang lé chyup rá dum hen akô; nghut kôlhang, Yhang gi, yhangmoq é loq mai wó lut lô bê nghut ri.

⁴⁰ Hau htâng, Yesuq gi, haú Yodan làng he hpoq mâ é, Yohan, wui-myhup hkám byí hi é jowò má ló jé ri. Haú má, Yhang nyi nyi é nghut luí, ⁴¹ byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôlhang, shí yuq eq séng luí, Yohan taí é hkyô lhunglháng gi, têng ri." ga taí bum akô. ⁴² Haú jowò má, byù myo myo gi, Yesuq lé lumjínng bùm bekô nghut ri.

Lazaruq Shi Byuq É Hkyô

11 Ahkuí, Lazaruq gâ é byù rayuq gi, no nyi ri. Yhang gi, haú Mariq eq yhângnhá Mahtaq nhik nyi é Behtani wà mâ é sù nghut lhê. ² Mariq haú gi, Yhumsíng lé namngón-xû hut gyun luí, hkyí má yhâng xam eq sùt byí é sù nghut ri; yhang gi, haú no nyi é Lazaruq é yhângnhá nghut ri. ³ Haú mù, haú yhângnhá nhik gi, "Yhumsíng ê, Nàng chyitdap é sù gi, no nyi ri." ga, Yesuq chyáng ê táí nhang akô.

⁴ Yesuq gi, dang haú lé wó gyo jáng, "Nòhpyo haú gi, shí-nò a nghut. Haú Garaí Gasang é Yhangzo gi, hau é yanmai, hpungwup shingkang wó dan hû é hui sháng gaq ga, Garaí Gasang é hpungwup shingkang é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶ Haú su mù, Yhang gi, haú Lazaruq no nyi ri gâ é lé, wó gyô é hkûn, haú Yhang nyi é jowò má, í nyi nyi tô ashî nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taú ló sháng." ga taí ri.

⁸ Haú hkûn, yhangmoq gi, "Rabai ê, hkû-yoq za, haú Yudaq byu pé, Nang lé luqgok eq dú sat rá da kô é nghut le nhing, ahkuí, haú shut dum taú ló rá lhú?" ga Yhang lé myî akô.

⁹ Yesuq gi, "Nyí gi, hkyíng hkum raxe í hkum bo lhê a nghut kó lhú? † Nyí má hkyô sô é sù gi, mingkan shi é maubó é yanmai myoq myàng luí, lengbat rá a nghut. ¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tú taí ri.

¹¹ Haú su ga taí é htâng má, Yhang, yhangmoq lé xoq taí kyô é gi, "Nga-nhúng é luzúm Lazaruq yhup myhí byuq bê nghut ri; nghut kôlhang, Ngò gi, yhang lé ê nhaú toq rá nghut lhê." gâ ri.

¹² Haú hkûn, Yhâng é chángzô pé gi, "Yhumsíng ê, yhang yhup myhí tô é nghut le gi, ge lò rá nghut lhê." gâ taí akô. ¹³ Yesuq gi, Lazaruq shi byuq bê hkyô lé taí é nghut ri; nghut kôlhang, Yhâng é chángzô pé gi, gè gè yhup myhí tô é lé taí é su ngam pyâm akô nghut ri.

¹⁴ Haú mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê. ¹⁵ Ngò haú má a nyi záng é gi, nungmoq wó lumjínng rá matú nghut luí, nungmoq é matú Ngò gabú byí ri; yhâng chyáng e ló sháng hkoi." gâ ri.

¹⁶ Haú mù, haú Zozúm le gâ é Htomaq gi, gotú chángzô pé lé, "Nga-nhúng le, Yhang eq rahá shí sháng gaq, châng e ló sháng." ga taí ri.

Haú Î-nhâ Nhik Lé, Yesuq Nhik Tíng É Hkyô

¹⁷ Yesuq gi, jé e é hkûn, haú Lazaruq lé lup má kat pyâm é myi nyí nghut bê hkyô lé, lhom taí kyô akô.

¹⁸ Behtani wà gi, Yerusalem wà mó eq í déng kô za wê lhûm ri. ¹⁹ Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tíng byi kó rá ga lé jé nyi bum akô nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé ê huí ri; nghut kôlhang, Mariq gi, yhûm má nyi tô ri.

²¹ Mahtaq gi, Yesuq lé, "Yhumsíng ê, Nàng, shí má nyi tô é ru nghut le gi, ngá gu shi byuq rá a nghut. ²² Nghut kôlhang, ahkuí le, Garaí Gasang chyáng Nàng haí dung kôlhang, Yhang byi rá nghut é lé, ngò sê lhê." ga taí ri.

²³ Yesuq gi, yhang lé, "Nung gu, dum dui toq rá nghut lhê." ga taí ri.

²⁴ Haú hkûn, Mahtaq gi, "Haú jiltâm buinyi má dum dui toq é hkûn, yhang le dum dui toq rá nghut é lé, ngò sê lhê." ga tú taí ri.

²⁵ Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjínng é sù gi, shi byuq kôlhang, dum dui rá nghut lhê. ²⁶ Asak dui nyi luí, Ngo lé lumjínng é sù ó yuq nghut kôle, hkâ-nhám le shi é hui rá a nghut. Nàng gi, dang shí lé lumjínng lhê lhú?" ga taí ri.

²⁷ Haú hkûn, yhang gi, "Yhumsíng ê, ngò lumjínng lhê. Nàng gi, haú mingkan má jé lé lô rá nghut é, Garaí

† 10:34 Hkya-on 82:6

†† Nyí gi, hkyíng hkum raxe í hkum bo lhê a nghut kó lhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

Gasâng é Yhangzo, Hkrisduq † nghut é lé, ngò lumjínng lhê." ga, Yhang lé taí kyô ri.

²⁸ Yhang gi, haû su ga taí é htâng má, taû lô mù, yhanggu Mariq lé, tsik za wut yû luí, "Haû Sará jé tô ri; Yhang gi, nang lé myí nyi ri." ga taí kyô ri. ²⁹ Mariq gi, haû lé wó gyo jáng, hân za toq mù, Yesuq chyáng é bê nghut ri. ³⁰ Haû u lé, Yesuq gi, haû wâ hkaû má a wang lô shí e za, Mahtaq eq huí é jowò má ru nyi tô ashî nghut ri. ³¹ Haû yhúmhaû má, Mariq lé nhik tîng nyi é Yudaq byu pé gi, yhang hân za toq luí, htoq lô é lé myàng kôjáng, yhang, lup má é ngaû râ dâ lhê abe ga, myit yû kômù, yhang htâng châng e lô bum akô nghut ri.

³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyí wang má ngóm gop to luí, "Yhumsîng ê, Nàng, shí má nyi tô é ru nghut le gi, ngá gu shi byuq râ a nghut." ga taí ri.

³³ Yesuq gi, Mariq ngaû nyi é lé le, haû yhang eq rahá lé lo é Yudaq byu pé ngaû nyi kô é lé le, myàng jáng, Yhâng é myit má gyai yhang hkâm zo wuí é eq myit wuí myit hke dut nyi ri. ³⁴ Haû mù, Yhang gi, "Yhang lé, hkâmá tô tô akô lhú?" ga myi jáng, yhangmoq gi, "Yhumsîng ê, lé wú wú aq." ga tú taí akô.

³⁵ Yesuq gi, ngaû bê nghut ri.

³⁶ Haû mù, haû Yudaq byu pé gi, "Wú keq, Yhang gi, Lazaruq lé, haû-í yhang chyt ri-nhung!" ga taí akô.

³⁷ Nghut kôhang, ra-am gi, "Haû myoqjit sù lé, myoq wó lhoq myâng byí é Sù gi, shí yuq lé le, a shí lo shoq a wó kut é lhú?" ga taí bum akô nghut ri.

Lazaruq Lé Lhoq Dui Toq É Hkyô

³⁸ Yesuq gi, Yhâng é myit má radàm dum gyai yhang hkâm zo wuí é èq, lup má lé jé ri. Lup haû gi, luqhyûng dong nghut luí, luqgok rachâm èq chí tô akô. ³⁹ Haû mù, Yhang gi, "Luqgok haû lé yu pyám keq." ga taí ri.

Haû hkûn, haû shi byuq su é yhângnhá Mahtaq gi, "Yhumsîng ê, yhang lé, haû má tô tô é myi nyi lháng nghut bê yanmai, ahkuí gi, bup nàm berâ nghut lhê." ga taí ri.

⁴⁰ Haû mù, Yesuq gi, "Nàng, lumjínng é nghut le gi, haû Garai Gasâng é hpungwup shingkanng lé, wó myàng râ nghut lhê nghû, Ngò, nang lé taí kyô wú bê a nghut lhú?" ga taí ri.

⁴¹ Haû mù luí, yhangmoq gi, luqgok haû lé yu pyám akô. Hau htâng, Yesuq gi, mauhkûng shut tu wú luí, "Áwa ê, Nàng, Ngá é dang lé gyo byí é yanmai, Ngò, Nang lé jeju hkya-ôn lhê. ⁴² Nàng gi, hkâ-nhám le, Ngá é dang lé gyo byí nyi é lé, Ngò sê lhê; nghut kôhang, Nàng, Ngo lé nhang kat é hkyô lé, shí má yap tô é bang lumjínng kó sháng gaq nghû, yhangmoq é matú, Ngò, isu nghû taí é nghut lhê." ga taí ri.

⁴³ Yhang gi, haû su ga taí luí, "Lazaruq ê, htoq lô aq." ga htê mó èq wut kat ri. ⁴⁴ Haû hkûn, haû shi byuq bê sù gi, yhâng é loq hkyí pé má pân èq htup yup to gû eq, yhâng é myoqdong má hpajet èq htup to gû htoq lo ri.

Haû mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taí ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

⁴⁵ Haû mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjínng bùm bekô nghut ri. ⁴⁶ Nghut kôhang, yhangmoq chyáng mâ é ra-am gi, haû Hparishe pê chyáng lô mù, Yesuq kut é hkyô lé, lô taí kyô akô. ⁴⁷ Haû mù, haû hkyangjong agyi pé eq Hparishe pé gi, Yudaq byin tú wapdoq †† zuphpong lé ji tsíng to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè râ lhú? ⁴⁸ Nga-nhúng, Yhang lé haû su ru kut nyí nhang é nghut jáng, yuq hkangmó gi, Yhang lé lumjínng kó râ nghut lhê; haû hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq htên pyám kó râ nghut lhê." ga taí akô nghut ri.

⁴⁹ Haû hkûn, yhangmoq chyáng mâ é, haû zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lháng a sé kó nghut ri-nhung! ⁵⁰ Haû byuhú gón htên byoq byuq râ htoq má, byuhú hau é matú, byù rayuq shí hkâm byi le gi, nungmoq é matú je gè râ hkyô lé, nungmoq, a myit jé kó nghut ri." ga taí kat ri.

⁵¹ Yhang haû su ga taí é gi, yhumsing myit đông a nghut e za, haû zân má, yhang gi, hkyangjong mó nghut é eq rajung za, haû Yudaq byuhú é matú, Yesuq shí hkâm byi râ nghut é hkyô lé le, ⁵² byuhú hau é matú baú a nghut e za, haû byo myín tô é, Garai Gasâng é yhangzô pé lé, shuí tsíng yû mù, rading ral-hum za dut nhâng râ matú, shí hkâm byi râ nghut é hkyô lé le, myiqhtoi dang taí é ru nghut lhê. ⁵³ Haû nyí mai, yhangmoq gi, Yesuq lé sat râ matú chôm da bekô nghut ri.

⁵⁴ Hau é yanmai, Yesuq gi, Yudaq byu pé gyo má, de de a sô shit wún e za, haû mai htoq luí, haû yoso eq chyáng lhúm é mau mâ é, Ehprim gâ é wà má ê mù, Yhâng é chángzô pé eq rahá nyi nyi ri.

⁵⁵ Haû Yudaq byu pé é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shí má, lhoq san lhoq yúng hking đông yhumsing gùng lé lhoq sân-yúng yû râ matú, yosô wà pé mai, Yerusalem wà mó shut doq lô bum akô. ⁵⁶ Haû mù, yhangmoq gi, Yesuq lé ho nyi kô é nghut luí, haû noqkuq yhúm wàng má yap to uchyang, rayuq eq rayuq, "Nungmoq, hkâsu wó myit akô lhú? Yhang gi, Poí má a lé lô râ gâ lhê lhà?" ga myí lhúm bum akô. ⁵⁷ Nghut kôhang, haû hkyangjong agyi pé eq Hparishe pé gi, Yesuq lé wó chyup yû râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

Yesuq, Namngón-xû But Byi Huí É Hkyô

Mht 26:6-13; Mrk 14:3-9

12 Haû Lhoqlhai Poí jé râ hkyuq nyí râ ashî hkûn, Yesuq gi, Yhâng èq shi é mai lhoq dui toq yu é

† Hkrisduq lé Mesaia le gâ lhê.

†† Yudaq byin tú wapdoq lé Grik đông gi, San-hedrin gâ lhê.

sû, Lazaruq nyi é Behtani wà má ló jé ri. ² Haû má, Yesuq lé hkunggâ é dông myinzang byi tsô akô; Mah-taq gi, zoshuq jaú ri; Lazaruq gi, haû Yesuq eq rahá si-boí má zô zung nyi bang mâ é rayuq nghut ri. ³ Haû hkûn, Mariq gi, haû nardu amyit mai za saí yu é, gyai hpaú é namngón-xû raxe í rûng kô yu lé mù, Yesuq é hkyí má hut gyun byi luí, yhâng é uxam èq sùt byí ri. Haû mù, yhûm haû gi, namngón-xû shôm byíng to bê nghut ri.

⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi, ⁵ "Haû myùng bang lé byí pyám râ matú, haû namngón-xû lé denari sum sho èq haí mù a ùng pyâm é lhu?" ga taí ri. ⁶ Yhang haû su ga taí é gi, myùng bang lé chiq byí é yanmai taí é a nghut, yhang gi, ngùn htùng chùng sù nghut luí, haû má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taí é nghut ri.

⁷ Yesuq gi, "Nghut shang gaq; yhang gi, Ngo lé my-hup yhum râ buinyi é matú, namngón-xû shí lé hkong to byí é nghut lhê. ⁸ Haû myùng bang gi, nungmoq eq rahá hkâ-nhâm le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut." ga tû taí ri.

⁹ Haû u lé, Yudaq byu pé ajùm ayò gi, haû má Yesuq nyi é lé sé kôluí, lé lo akô; haû bang gi, Yesuq é yanmai za lé kô é a nghut, haû Yhâng èq shí bê mai lhoq dui toq yu é Lazaruq lé, lé myâng nau kô é yanmai le nghut ri. ¹⁰ Haû mù, haû hkyangjong agyi pé gi, Lazaruq lé le, sat pyám râ matú chôm hpyé lhum akô. ¹¹ Hkâsu mù gâ le, yhâng é yanmai, haû Yudaq byu pé myo myo gi, Yesuq chyáng lhing ló kômù, Yhang lé lumjíng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyí, haû Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô. ¹³ Haû mù, yhangmoq gi, byùm-haq pé yu chùng mù, Yhang lé ê tê uchyang, "Hosana! †

Haû Yhumsing é mying mai jé lé lô Sû gi, hkungsô wó nyí sháng gaq ô!

Haû Israelaq byu pé é Hkohkâm gi, hkungsô wó nyí sháng gaq!" ††

ga, taí garû bum akô nghut ri. ¹⁴ Haú hkûn, Yesuq gi, logúng zo radu lé myàng luí, doq jí ri;

¹⁵ haû gi, "Zi-un byizo ‡ è, hkâgyuq; wú keq, nungmoq é hkohkâm gi, logúng zo má ji mù lé lo nyi ri." †† ga, kâ tô é eq rajung za nghut ri.

¹⁶ Haú pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shinggang dan hu huí é htàng má za sheq, haú pé gi,

† Hebre dang má, hosana gâ é gi, "ahkuí hkyi yù aq" gâ é nghut lhê. Nghut kôlhang, bun zo shí má gi, hkyá-on dang dông chung é nghut lhê. †† 12:13 Hkyá-on 118:25-26 ‡ Hebre myíng dông Zi-un byizo gâ é gi, Yerusalem má é byu pé lé gâ é nghut lhê. †† 12:15 Zhk 9:9

Yhang eq séng luí kâ tô é hkyô lé le, haû eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

¹⁷ Haû Yesuq gi, lup hkaú mâ é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haú hkyô lé, saksé hkám byí nyi akô.

¹⁸ Haû mù, byù myo myo gi, Yesuq tûn shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akô. ¹⁹ Hau é yanmai, haû Hparishe pé gi, "Wú keq, nga-nhúng, hkâsu yhang a ge kut lo nhung! Haû mingkan gón gi, Yhâng htàng châng bùm bekô." ga, rayuq eq rayuq taí lhum bum akô nghut ri.

Yesuq, Yhang Shí Râ Hkyô Lé Te Taí É Hkyô

²⁰ Haû hkûn, noqkuq râ matú Poí má doq ló é bang má, Grik pé ra-am le bo tô akô. ²¹ Yhangmoq gi, Galile mau, Bet-saida wà mó mâ é Hpilip chyáng lé jé kômù, "Áhkaú ê, ngamoq gi, Yesuq lé myàng nau ri." ga, dung tôngbán akô. ²² Haû mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

²³ Haû mù, Yesuq gi, "Haû Byu Yhangzo gi, hpungwup shinggang dan hû é hui râ matú, ahkyíng jé bê nghut ri. ²⁴ Ngò, nungmoq lé teng za taí kôlé, sungso racham gi, myigùng má gyô luí, shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashi myo myo lhoq htoq râ nghut lhê. ²⁵ Haû yhumsing é asak lé chyitdap é sù gi, asak sùm byuq râ nghut lhê. Mingkan shí má, haû yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. ²⁶ Ngo lé dojaú é sù ó yuq nghut kôle, Ngá htàng cháng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá Wa gi, haû Ngo lé dojaú é sù lé, shigyaú râ nghut lhê.

²⁷ Ahkuí, Ngò, myit wuínke nyi ri; Ngò hkâsu nghu taí râ lhi? 'Áwa ê, ahkyíng shí mai Ngo lé lhoq lhut yù laq.' nghu taí râ lhu? Nghut kôle, Ngò gi, ahkyíng shi é matú za sheq jé lé é ru nghut lhê. ²⁸ Áwa ê, Náng é mying lé hpungwup shinggang dan hu nhâng aq hkoi!" ga taí ri.

Haú hkûn, "Ngò gi, Ngá é mying lé hpungwup shinggang dan hu nhâng bê nghut luí, dum dan hu nhâng shirâ nghut lhê." gâ é htê, mauhkûng mai htoq lo ri. ²⁹ Haû má nyi tô é byù moq mó gi, haû lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

³⁰ Haú hkûn, Yesuq gi, "Danghtê shí gi, Ngá é matú a nghut, nungmoq é matú ru nghut lhê. ³¹ Ahkuí gi, mingkan shí lé jéyáng râ ahkyíng nghut bê; mingkan shi é zau gi, ahkuí hkat htoq pyâm é hui râ nghut lhê. ³² Nghut kôlhang, Ngò gi, myigùng mai tu shap kat é huí é hkûn, byù lhunglhang bang lé, Ngá chyáng shê yù râ nghut lhê." ga taí ri. ³³ Yhang haû su ga taí é gi, Yhang hkâsu kut shí râ nghut é hkyô lé shit é nghut ri.

³⁴ Haú hkûn, haû byù moq mó gi, "Haû tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhíng, 'Haú

Byu Yhangzo gi, tu shap é hui ra râ nghut lhê.' nghû, Nàng hkâsu kut wó taí lhê lhú? Haû Byu Yhangzo gi, ó yuq nghut lhê lhú?" ga, myí akô.

³⁵ Haû mù, Yesuq gi, yhangmoq lé, "Nungmoq chyáng, haû maubó joq nyi râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haû maubó joq nyi ashî hkûn sô nyi keq; hkâsu mù gà le, haû mauchut má sô nyi é sù gi, yhang hká shut e ló nyi é lé, a sé nghut ri. ³⁶ Nungmoq gi, maubó é yhangzô pé wó dut kó sháng gaq, haû maubó joq nyi ashî hkûn, haû lé lumjíng keq." ga taí ri. Yesuq gi, dang haû ban taí jáng, yhangmoq chyáng mai htoq ló luí, haq byuq bê nghut ri.

Yudaq Byu Pé, A Lumjíng Ru Dut Nyí Kô É Hkyô

³⁷ Yesuq gi, yhangmoq é hí má, limik kumlhá haú pé banshoq kut shit kôlhang, yhangmoq gi, Yhang lé a lumjíng shi kó nghut ri. ³⁸ Haû gi,

"Yhumsíng ê, nga-nhûng é danglù lé, ó yuq wá lumjíng byí wú é lhú? Haû Yhumsíng é loq † gi, ó yuq lé htoq shit wú é lhú?" ††

ga, myiqhtoi Esai-aq taí tô é dang lo dik é nghut ri.

³⁹ Yhangmoq a wó lumjíng kô é hkyô gi, Esai-aq taí é dang má,

⁴⁰ "Yhang gi, yhangmoq é myoqjí lé lhoq chit byi luí, yhangmoq é i-myt lé lhoq htan to byi bê nghut ri;

haû mù, yhangmoq gi, myoqjí eq a wó myâng, i-myt eq a wó sê gyo, Ngò, yhangmoq lé yâ ge byi râ matú, a wó lhing taú lò kó dut râ nghut lhê." ‡

ga le bo tô é yanmai nghut lhê. ⁴¹ Esai-aq gi, Yesuq é hpungwup shingkan lé myang é yanmai, Yhang eq sêng é hkyô lé, haû su ga taí é nghut ri.

⁴² Nghut kôlhang, haû uphâng bang myo myo lhang gi, haû u má, Yesuq lé lumjíng bum akô. Nghut kôle, yhangmoq gi, Hparishe pé eq tarajong mai lhoq htoq pyâm é hui râ lé, gyuq kô é yanmai, yhangmoq lumjíng bê hkyô lé a yín yu bùm kó nghut ri. ⁴³ Hkâsu mù gà le, yhangmoq gi, Garai Gasâng chyáng mâ é aróng lé, ô nau é htoq má, byu pê chyáng mâ é aróng lé, je ô nau kô é yanmai nghut ri.

⁴⁴ Haû mù, Yesuq, htê mó eq taí é gi, "Ngo lé lumjíng é sù gi, Ngo lé baú lumjíng é a nghut; haû Ngo lé nhang kat é Sù lé le, lumjíng é nghut lhê. ⁴⁵ Ngo lé myang é sù gi, haû Ngo lé nhang kat é Sù lé le myang é nghut lhê. ⁴⁶ Ngò gi, Ngo lé lumjíng é sù ó yuq le, mauchut hkaû má a nyi sháng gaq nghû, maubó đông mingkan má lé jé é nghut lhê.

⁴⁷ Ngò gi, Ngá é dang lé wó gyo luí, a châng é sù ó yuq lé le, jéyáng râ a nghut; hkâsu mù gà le, Ngò gi, mingkan lé jéyáng râ matú jé lé é a nghut; haû mingkan lé hkyi yù râ matú sheq, jé lé é ru nghut lhê.

⁴⁸ Ngo lé he-ngik luí Ngá é dang lé a hap yu é sù lé, jéyáng râ Sù rayuq nyi lhê; Ngò taí é danghkan haû gi, haû jìhtûm buinyi má, haú yuq lé mara byi râ nghut lhê. ⁴⁹ Hkâsu mù gà le, Ngò gi, Ngá é myit đông taí é a nghut; nghut kôlhang, Ngò haí taí râ eq hkâsu nghû

† Yhumsíng é loq gà é gi, Yhumsíng é hpungwup a-tsam lé gà é nghut lhê. †† 12:38 Esai 53:1 ‡ 12:40 Esai 6:10

taí râ lé gi, haû Ngo lé nhang kat é sù Íwa mai, Ngo lé hkunmó hkyô to bê nghut lhê. ⁵⁰ Haû Yhâng é hkunmó gi, ahtum abyuq é asak nghut é lé, Ngò sê lhê. Haû mù luí, Ngò, haí taí kôlé, haû Íwa mai Ngo lé taí kyô é lé za, taí é nghut lhê." gà ri.

Chángzô Pé É Hkyi Chi Byí É Hkyô

13 Haû Lhoqlhai Poí jé râ hí má za, Yesuq gi, Yhang, mingkan shí mai Yhâng Wâ chyáng htot ló râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jìhtûm jé shoq Yhâng é chyitdap myit lé shit râ nghut lhê.

² Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byí to gû nghut ri. ³ Yesuq gi, haû lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló râ sù nghut é lé le, sê ri. ⁴ Haû mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhûm eq hpyihit hit tô ri. ⁵ Hau htâng, Yhang gi, jirung má uchyam hut kat mù, Yhâng é chángzô pê é hkyi chi byi luí, haû Yhâng é hpyidum má hit tô é hpajet eq sut huí byí ri.

⁶ Yhang gi, Simun Petruq chyáng jé jáng, Simun Petruq gi, "Yhumsíng ê, Nàng gi, ngá hkyi lé chi byi râ nghut lhê lhú?" ga myí ri.

⁷ Haú hkûn, Yesuq gi, "Ngò, haí kut nyi é hkyô lé, ahkuí, nàng sê gyo râ a nghut; nghut kôlhang, htâng má sê gyo râ nghut lhê." ga tû taí ri.

⁸ Petruq gi, "Ngá hkyi lé, Nàng, hkâ-nhám le wó chi byi râ a nghut." ga taí jáng, Yesuq gi, "Nang lé, Ngò a chi byí é nghut jáng, nàng gi, Ngò eq séng râ a nghut." ga tû taí ri.

⁹ Haú hkûn, Simun Petruq gi, "Yhumsíng ê, haû su nghut jáng gi, ngá é hkyi lé baú za a nghut, ngá é loq eq ulhum lé le chi byi laq!" ga tû taí ri.

¹⁰ Yesuq gi, "Gùng chi bê sù gi, hkyi za chi jáng, ragùngdû é sanséng bê nghut ri. Nungmoq gi, sanséng bekô; nghut kôlhang, yuq hkanmó gi, sanséng é a nghut." ga tû taí ri. ¹¹ Hkâsu mù gà le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

¹² Yesuq gi, yhangmoq é hkyi lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byí é hkyô lé, sê gyo akô lhú? ¹³ Nungmoq, Ngo lé, 'Sará' ga le, 'Yhumsíng' ga le, wut kô é gi, a shut; hkâsu mù gà le, Ngò gi, haú yuq yhang nghut lhê. ¹⁴ Ngò, nungmoq é Sará eq Yhumsíng nghut sù lhang, nungmoq é hkyi lé chi byí é nghut le gi, nungmoq le, rayuq eq rayuq é hkyi lé chi byí lhum râ dut lhê. ¹⁵ Nungmoq gi, Ngò, nungmoq lé kut byí é su kut kó sháng gaq nghû, Ngò, nungmoq lé alik kut shit tô é nghut lhê. ¹⁶ Ngò, nungmoq lé teng za taí kôlé, dui-nhâng zoshâng gi, yhumsíng htoq je kô é a nghut;

lagyo gi, nhang kat é sũ htoq je kô é a nghut. ¹⁷ Ahkuî, nungmoq gi, haú pé lé sé bekô nghut luî, châng kut kô é nghut jáng, hkungsô wó kó rà nghut lhê.

Yesuq Lé Ap Pyám Râ Lé, Te Taî É Hkyô

¹⁸ Ngò gi, nungmoq banshoq bang lé lhoq ang luî taî é a nghut; Ngò hkyin yu é bang lé gi, Ngò sê lhê. Nghut kôlhâng, 'Haú ngá é muk lé bo zô é sũ gi, ngo lé, yhâng é hkyihtáng la-nhik eq nâng htíng rà nghut lhê.' † gâ é Chyúmdang lé, lhoq dik rà matú ru nghut lhê.

¹⁹ Haú a dut htoq shimá, Ngò, nungmoq lé taî kyô nyi é gi, haú dut é hkûn, Ngò gi, haú Yuq †† nghut é lé, nungmoq wó lumjínng kó rà matú nghut lhê. ²⁰ Ngò, nungmoq lé teng za taî kôlé, Ngò nhang kat é sũ lé, lhom hap yu é sũ ó yuq nghut kôle, Ngo lé hap yu é nghut bê; Ngo lé hap yu é sũ ó yuq nghut kôle, haú Ngo lé nhang kat é Sũ lé hap yu é nghut bê." gâ ri.

²¹ Yesuq gi, haú su ga taî é htâng má, myit wuîhke nyi mù, saksé hkâm é gi, "Ngò, nungmoq lé teng za taî kôlé, nungmoq mâ é rayuq sũ gi, Ngo lé ap pyám rà nghut lhê." gâ ri.

²² Haú mù, Yhâng é chángzô pé gi, ó yuq lé taî záng nyi é hkyô lé, rago a sé kô é yanmai, rayuq eq rayuq wú tsuq lhûm bum akô nghut ri. ²³ Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri. ²⁴ Haú mù, Simun Petruq gi, chángzo haú yuq lé, loq lik kat mù, "Yhâng, ó yuq lé lhoq ang luî, taî nyi é hkyô lé, myi wú aq." ga taî ri.

²⁵ Haú mù, chángzo haú gi, Yesuq é tanghkoí má saî leq nge zung mù, "Yhumsîng ê, haú gi, ó yuq nghut lhê lhú?" ga, Yhâng lé myi ri.

²⁶ Yesuq gi, "Ngò, muk jap zo shî lé jum yù mù, byî é sũ gi, haú yuq nghut lhê." ga tũ taî luî, muk jap zo haú lé jum yù mù, Simun é yhangzo Yudaq Iskarut lé byî ri.

²⁷ Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, "Nàng kut rà é hkyô lé, hân kut aq hkoi." ga yhang lé taî kat ri. ²⁸ Nghut kôlhâng, yhang lé, Yesuq haú su ga haî mù taî é hkyô lé, zohpoq haú má nyi tô é bang gi, rayuq lháng a sê gyo kó nghut ri.

²⁹ Haú Yudaq gi, ngùn zum sũ nghut é yanmai, ra-am gi, haú Poî má rà é hkyô lé, ê wuî rà matú, Yesuq taî ri ga luî le, myùng bang lé rajung jung byí nhang ri ga luî le, myit yu bum akô nghut ri. ³⁰ Yudaq gi, muk haú lé lhom yù eq, htoq ló byuq bê nghut ri. Haú u gi, mauchut bê nghut ri.

Petruq He-ngik Pyám Râ Lé, Yesuq Te Taî É Hkyô

Mht 26:31-35; Mrk 14:27-31; Luk 22:31-34

³¹ Haú yuq htoq ló byuq jáng, Yesuq taî é gi, "Ahkuî, haú Byu Yhangzo gi, hpungwup shingkang dan hũ é nghut luî, Garai Gasang gi, haú Byu Yhangzô é yanmai, hpungwup shingkang dan hu bê nghut ri. ³² Garai Gasang gi, haú Byu Yhangzô é yanmai, hpungwup shingkang dan hũ é nghut jáng, Yhang le, Yhang má

† 13:18 Hkya-on 41:9†† Haú Yuq gâ é gi, Hkrisduq lé gâ é nghut lhê.

haú Zo lé hpungwup shingkang dan hu nhâng rà nghut lhê; radá dâm dan hu nhâng rà nghut lhê.

³³ Ngá zo pé ê, Ngò, nungmoq eq rahá nyi rà gi, razup za ru nghut alô. Nungmoq gi, Ngo lé hô kó rà nghut lhê; nghut kôlhâng, 'Ngò ló é jang má, nungmoq wó jé kó rà a nghut.' nghû, haú Yudaq byu pé lé, Ngò taî é eq rajung za, ahkuî, nungmoq lé le, Ngò taî lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum rà dut lhê. ³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhâng bang sé kó rà nghut lhê." gâ ri.

³⁶ Haú hkûn, Simun Petruq gi, "Yhumsîng ê, Nàng, hká shut ló rà lhú?" ga, Yhang lé myi jáng, Yhang gi, "Ngò ló é jang má, nungmoq, ahkuî a wó châng kó rà nghut lhê. Nghut kôlhâng, htâng má gi, nungmoq cháng ra kó rà nghut lhê." ga tũ taî ri.

³⁷ Petruq gi, "Yhumsîng ê, haî mù luî, ahkuî ngò Náng htâng a wó châng é lhú? Ngò gi, Náng é matú, shî hkâm rà rì rì nghut lhê." ga taî ri.

³⁸ Haú mù, Yesuq taî é gi, "Nàng gi, gè gè yhang, Ngá é matú shî hkâm rà lhú? Ngò, nàng lé teng za taî lé, woq a tũn shimá, nàng, Ngo lé sum dâm he-ngik pyám rà nghut lhê.

Yesuq, Yhâng É Chángzô Pé Lé Nhik Tîng É Hkyô

14 Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. ² Ngá Wâ é yhûm má, nyi jowò myo myo joq lhê; a joq é ru nghut le gi, noq mai, Ngò, nungmoq lé taî kyo rà nghut lhê. Ngò, haú má ló é gi, nungmoq é nyi jowò ló hên lánng rà matú ru nghut lhê. ³ Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi rà matú, Ngò dum taû lé mù, nungmoq lé, lé shuî yù rà nghut lhê. ⁴ Ngò ló é jang má jé é hkyô lé, nungmoq sê lhê." gâ ri.

Yesuq Za Hkyô

⁵ Haú hkûn, Htomaq gi, Yhang lé, "Yhumsîng ê, Nàng hká shut ló é lé lháng, ngamoq a sê le nhîng, hkyô haú lé, ngamoq hkâsu kut wó sé rà lhú?" ga myi ri.

⁶ Yesuq gi, "Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut. ⁷ Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó rà nghut lhê. Ahkuî mai, nungmoq gi, Yhang lé sé kô é htoq agó, myàng le myang wú bekô nghut lhê." ga tũ taî ri.

⁸ Haú hkûn, Hpilip gi, "Yhumsîng ê, ngamoq lé, haú Íwa tũn shit laq, haú hkûn, ngamoq nhik shî rà nghut lhê." ga taî ri.

⁹ Yesuq tũ taî é gi, "Hpilip ê, Ngò, nungmoq eq shî myáng lháng nyi lò bê le nhîng, nàng, Ngo lé a sé lhú?

Ngo lé myang é sũ gi, haũ Íwa lé myàng bê nghut ri; haũ nghut le nhĩng, 'Ngamoq lé, haũ Íwa tũn shit laq.' nghũ, nàng hkãsu wó taĩ lhê lhú? ¹⁰ Ngò gi, haũ Íwa má nghut nyĩ luĩ, haũ Íwa gi, Ngò má nghut nyi é hkyô lé, nàng a lumjĩng lhú? Ngò, nungmoq lé taĩ é dang haũ pé gi, Ngá é myit mai taĩ é a nghut; haũ Ngò má lũng nyi é Íwa sheq, Yhâng é mũ zuĩ nyi é ru nghut lhê. ¹¹ Ngò gi, haũ Íwa má nghut nyĩ luĩ, haũ Íwa gi, Ngò má nghut nyi lhê nghũ é lé lumjĩng keq; haũ a nghut jáng, kut shit é limik kumlhá pé dõng za lháng, lumjĩng keq. ¹² Ngò, nungmoq lé teng za taĩ kôlé, Ngo lé lumjĩng é sũ gi, Ngò kut é muzó lé kut rã nghut lhê. Ngò gi, haũ Íwã chyáng ló rã nghut é yanmai, haũ yuq gi, hau htoq je kô é muzó pé lé lháng kut rã nghut lhê. ¹³ Haũ Yhangzô é yanmai, Íwã é hpungwup shingkang wó hũ ló shoq, Ngá é myĩng lé lang luĩ, nungmoq haĩ jung dung kôlháng, Ngò gyo byi rã nghut lhê. ¹⁴ Nungmoq gi, Ngá é myĩng lé lang luĩ, haĩ dung kôlháng, Ngò gyo byi rã nghut lhê.

Chyoiyúng Woi-nyĩ Byi Rã Danggidiq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rã nghut lhê. ¹⁶ Haũ Íwa gi, nungmoq eq ahtum abyuq nyi nyi rã nghut é, hpaqchyĩ byi Sũ gotũ rayuq, nungmoq lé byi rã matú, Ngò gi, haũ Íwa lé dung rã nghut lhê. ¹⁷ Haũ yuq gi, tengmán é Woi-nyĩ nghut lhê. Haũ mingkan gi, Woi-nyĩ haũ lé a myàng a sê é yanmai, Yhang lé a wó hap yu é nghut lhê. Nghut kôlháng, Yhang gi, nungmoq eq rahá nyi nyi é nghut luĩ, nungmoq má nyi to rã Sũ nghut é yanmai, nungmoq gi, Yhang lé sê akô. ¹⁸ Ngò gi, nungmoq lé, chuizô pé dõng pyãm to rã a nghut; nungmoq chyáng Ngò dum jé lé rã nghut lhê. ¹⁹ Adê myáng má, haũ mingkan gi, Ngo lé a myàng lo rã nghut lhê; nghut kôlháng, nungmoq gi, Ngo lé myàng kó rã nghut lhê. Hkãsu mù gã le, Ngò gi, asak dui nyi é nghut mù, nungmoq le duĩ kó rã nghut lhê. ²⁰ Ngò gi, Ngá Wã chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haũ buinyi má, nungmoq sé kó rã nghut lhê. ²¹ Ngá é hkunmó pé lé wó mù, chãng kut é sũ ó yuq nghut kôle, Ngo lé chyitdap é sũ nghut ri. Ngo lé chyitdap é sũ lé gi, Ngá Wa chyitdap rã nghut lhê; Ngò le, haũ yuq lé chyitdap luĩ, Ngá gũng lé yhang, yhang lé shit rã nghut lhê." gã ri.

²² Hau htãng, (Yudaq Iskarut a nghut sũ) Yudaq gi, "Yhumsĩng ê, Nàng gi, haũ mingkan lé Náng gũng a shit e za, ngamoq lé shit rã nghut é gi, haĩ mù nghut lhê lhú?" ga myĩ ri.

²³ Haũ hkũn, Yesuq tũ taĩ gi, "Rayuq yuq, Ngo lé chyitdap é nghut le gi, Ngá dang lé gyo rã nghut lhê. Ngá Wa le, haũ yuq lé chyitdap rã nghut luĩ, Ngá hpe gi, haũ yuq chyáng lé mù, yhang eq rahá nyi rã nghut lhê. ²⁴ Ngo lé a chyitdap é sũ gi, Ngá dang lé gyo rã a nghut. Nàng wó gyô é dang shĩ pé gi, Ngá myit mai taĩ é a nghut; dang haũ pé gi, Ngo lé nhang kat é Sũ, haũ Íwã é ru nghut lhê.

²⁵ Ngò gi, shĩ pé banshoq lé, nungmoq eq rahá nyi tô ashĩ u lé taĩ bê nghut lhê. ²⁶ Nghut kôlháng, Ngá é myĩng dõng, haũ Íwa nhang kat rã nghut é, hpaqchyĩ byi Sũ nghũ é, haũ Chyoiyúng Woi-nyĩ gi, nungmoq lé, jung hkangmó mhoq byi rã eq, Ngò, nungmoq lé taĩ kyo bê hkyô lhunglháng, nungmoq lé lhoq pun rã nghut lhê. ²⁷ Ngò gi, nungmoq chyáng, nguĩngón hkyô tô to byi bê; Ngá é nguĩngón hkyô, Ngò, nungmoq lé byĩ é nghut lhê. Ngò gi, mingkan byĩ é dõng, nungmoq lé byĩ é a nghut. Nungmoq é i-myit nhiklum lé, myit wui myit hke é eq gyuq kyũm é hkãdut nhãng kó.

²⁸ 'Ngò gi, ló byuq luĩ, nungmoq chyáng dum taũ lé rã nghut lhê.' nghũ, Ngò taĩ é lé, nungmoq wó gyô yũ bê nghut lhê. Nungmoq, Ngo lé chyitdap kô é nghut le gi, haũ Íwã chyáng Ngò ló rã nghut é hkyô lé, nungmoq gabú kó rã nghut lhê; hkãsu mù gã le, haũ Íwa gi, Ngá htoq je ko Sũ nghut lhê. ²⁹ Haũ dut é hkũn, nungmoq lumjĩng kó sháng gaq nghũ, ahkuĩ, haũ a dut shimã, Ngò, nungmoq lé taĩ kyô é nghut lhê. ³⁰ Ahkuĩ mai, Ngò gi, nungmoq lé, dang myo myo wó nyô rã a nghut lo; hkãsu mù gã le, mingkan shi é zau gi, jé lé lo nyi bê nghut ri. Haũ yuq gi, Ngo lé up rã ahkãng haĩ a wó é sũ nghut ri. ³¹ Nghut kôlháng, haũ Íwa lé Ngò chyitdap é hkyô, mingkan sé sháng gaq nghũ, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

Tsibiyiq Nuĩ Eq Akoq Pê É Hkyô

15 Ngò gi, haũ tsibiyiq nuĩ akyĩng nghut lhê; Ngá Wa gi, tsibiyiq hkyãm yhumsĩng nghut lhê. ² Yhang gi, ashi a zuĩ é akoq hkangmó lé, Ngá chyáng mai kyik pyãm luĩ, ashi zuĩ é akoq hkangmó lé kúm gi, ashi je myo zui sháng gaq ga, shang pyãm byĩ ri. ³ Nungmoq gi, Ngò, nungmoq lé taĩ é mungdang hau é yanmai, sanséng gũ nghut bekô nghut ri. ⁴ Ngò má nyi nyi keq; Ngò le, nungmoq má nyi nyi rã nghut lhê. Akoq hkangmó gi, tsibiyiq nuĩ má nui nyi é za a nghut jáng, yhang baũ ashi wó zuĩ é a nghut. Haũ eq rajung za, nungmoq le, Ngò má nyi nyi e za a nghut jang, ashi wó zui kó rã a nghut.

⁵ Ngò gi, tsibiyiq nuĩ nghut lhê; nungmoq gi, akoq pé nghut akô. Byũ rayuq yuq, Ngò má nyi nyi é nghut luĩ, Ngò gi, yhang má nyi nyi é nghut jáng, haũ yuq gi, ashi myo myo zui rã nghut lhê; hkãsu mù gã le, Ngò mai gang jáng, nungmoq gi, haĩ le a wó kut kô é nghut lhê. ⁶ Ngò má a nyi nyi é sũ gi, haũ dú pyãm é hui luĩ, kyuq shi byuq é akoq eq wui ri; haũ sũ é akoq pé gi, byu pé èq guq yũ mù, myihkyóm má dú kat pyãm é hui luĩ, nyé gyó byuq rã nghut lhê. ⁷ Nungmoq gi, Ngò má nyi nyi luĩ, Ngá é dang pé gi, nungmoq má bo nyi é nghut le gi, nungmoq ô nau é haĩ nghut kôlháng, dung keq; haũ hkũn, nungmoq lé byi rã nghut lhê. ⁸ Nungmoq gi, haũ ashi ga-myhó zuĩ é dõng, Ngá Wã é hpungwup shingkang lé lhoq htoq shit é nghut luĩ, Ngá é chãngzô pé nghut é hkyô lé tũn shit nyĩ bekô nghut ri.

⁹ Haũ Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuĩ, Ngá é chyitdap myit má

gîng nyi keq. ¹⁰ Ngò gi, Ngá Wâ é hkunmó lé châng é nghut luî, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê. ¹¹ Nungmoq má Ngá é gabú hkyô joq nyi râ eq, nungmoq é gabú hkyô wó byíng Jup râ matú, Ngò, nungmoq lé, dang shí pé taí é nghut lhê. ¹² Ngò, nungmoq lé chyitdap é su, nungmoq yhangchang chyitdap lhum keq; haû gi, Ngá é hkunmó nghut lhê. ¹³ Haû yhumsing é luzúm wui é matú, yhumsing é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut bekô. ¹⁵ Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wui nghû wut é nghut lhê; hkâsu mù gâ le, dui-nhâng zoshâng gi, yhâng yhumsing hpô é muzó lé a châng sé nghut ri. ¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashí zui râ matú hkyin masat tô é ru nghut lhê. Hau hkûn sheq, Ngá é myíng lé lang mù, haû Íwâ chyáng nungmoq hai jung dung kôle, Yhang byi râ nghut lhê. ¹⁷ Nungmoq yhangchang chyitdap lhum keq; haû gi, Ngá é hkunmó nghut lhê.

Haû Mingkan Gi, Chángzô Pé Lé A Jú É Hkyô

¹⁸ Haû mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. ¹⁹ Nungmoq gi, haû mingkan eq sêng é bang nghut é nghut jáng, haû mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luî, nungmoq gi, haû mingkan eq a séng lo kô é yanmai, mingkan gi, nungmoq lé a jú é nghut ri. ²⁰ 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bûn nyi keq. Ngo lé lhang, yhangmoq zing-rí yû bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq châng kô é nghut le gi, nungmoq mhoqshit é lé le, châng kó râ nghut lhê. ²¹ Nghut kôlhang, yhangmoq gi, Ngá é myíng é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang kat é Sû lé, yhangmoq a sé kôluî nghut ri. ²² Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuî gi, yhangmoq mara wó taí hkyut râ a nghut lo. ²³ Ngo lé a jú é sù gi, Ngá Wa lé le a jú é sù nghut ri. ²⁴ Haû ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuî kúm gi, laklaí kumlhá haû pé lé yhangmoq myang nyi kôlhang, Ngò eq Ngá Wa lé a jú kô é nghut ri. ²⁵ Haû gi, 'Yhangmoq gi, jumgúyô má Ngo lé a jú kut akô nghut ri.' † ga, yhangmoq é tarâ má kâ tô é dang lé lhoq dik é nghut ri.

²⁶ Haû Íwâ chyáng mâ é, Ngò nhang kat râ nghut é, Íwa mai htoq lé lo é tengmán é Woi-nyí nghut é, haû hpaqchyí byi Sû jé lé é hkûn, Ngá é hkyô lé saksé hkám byi râ nghut lhê. ²⁷ Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó râ nghut lhê.

16 Nungmoq gi, myit lingbat jowò a joq kó sháng gaq nghû, haû pé banshoq lé, Ngò, nungmoq lé taí kyo bê nghut lhê. ² Yhangmoq gi, nungmoq lé, tara-jong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haû dông mai Garai Gasang lé dojaú nyi lhê ga myit yu é ahkyíng, gè gè yhang, jé râ nghut lhê. ³ Yhangmoq gi, haû Íwa lé le, Ngo lé le, a sé kô é yanmai, haû su kut kó râ nghut lhê. ⁴ Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bûn nyi kó sháng gaq nghû, Ngò haû hkyô taí kyô é nghut lhê. Ngò gi, nungmoq eq rahá nghut nyi é yanmai, haû hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

⁵ Nghut kôlhang, ahkuî, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lhú?' ga, Ngo lé a myi kó nghut ri. ⁶ Ngò, nungmoq lé, haû hkyô pé taí kyô é yanmai, nungmoq é i-myt unghkaû má iyon hkyô byíng to bekô nghut ri. ⁷ Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haû hpaqchyí byi Sû gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lhê. ⁸ Yhang jé lé é hkûn, Yhang gi, haû mara wó é eq séng luî le, dingmán hkyô eq séng luî le, tarâ jéyáng hkyô eq séng luî le, haû mingkan lé tân shit râ nghut lhê. ⁹ Haû yubak mara wó é eq séng luî ga jang, byu pé gi, Ngo lé a lumjíng kô é yanmai nghut ri. ¹⁰ Haû dingmán hkyô eq séng luî ga jang, Ngò gi, haû Íwâ chyáng ló râ nghut luî, nungmoq, Ngo lé a myàng lo kó râ nghut é yanmai nghut ri. ¹¹ Haû tarâ jéyáng hkyô eq séng luî ga jang, mingkan shi é zau gi, mara byí é huí é nghut é yanmai nghut ri.

¹² Ngò gi, nungmoq lé taí râ hkyô myo myo wó ashí; nghut kôlhang, ahkuî, nungmoq wó hkâm kó râ a nghut. ¹³ Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé râ nghut lhê. Yhang gi, Yhâng myit dông taí râ a nghut; Yhang, wó gyô yu é hkyô lé za taí luî, dut lò râ hkyô pé lé le, nungmoq chyáng taí pyô râ nghut lhê. ¹⁴ Yhang gi, Ngò wó é lé, yû mù, nungmoq lé taí kyô é eq sé nhang é dông, Ngá é hpungwup shingkang lé hû ló nhâng râ nghut lhê. ¹⁵ Haû Íwa wó é lhunglhang gi, Ngá é chyat nghut lhê. Hau é yanmai, haû Woi-nyí gi, Ngò wó é lé yû mù, nungmoq lé sé nhâng râ nghut lhê nghû, Ngò taí é nghut lhê.

¹⁶ Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê." gâ ri.

† 15:25 Hkya-on 35:19; 69:4

Changzô Pê É Iyon Hkyô Gi, Gabú Hkyô Taú Dut Râ

¹⁷ Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê." gâ é eq 'Ngò gi, Íwâ chyáng ló râ nghut é yanmai nghut lhê.' ga, Yhang taí é gi, hái jung gá nau é nghut lhê lhú?" ga, rayuq eq rayuq myí lhùm bum akô. ¹⁸ Hau htoq agó, yhangmoq gi, "Adê myáng má,' gâ é gi, Yhang hái jung gá nau lhê lhú? Nga-nhúng gi, Yhang hái taí nau é lé a sê gyo." ga, taí lhùm bum akô nghut ri.

¹⁹ Yesuq gi, yhangmoq myi naú kô é hkyô lé sê ri; haú mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.' nghu, Ngò taí é lé, hái jung gá nau lhê laq nghu, rayuq eq rayuq myi lhum nyi akô lhú? ²⁰ Ngò, nungmoq lé teng za taí kôlé, haú mingkan gi, gabú nyi é u lé, nungmoq gi, ngaú é eq iyon yón é hui kó râ nghut lhê. Nungmoq gi, iyon yón é hui kó râ nghut lhê; nghut kôlhang, nungmoq é iyon hkyô gi, gabú hkyô taú dut râ nghut lhê. ²¹ Myiwe gi, zoshâng hkû râ nghut jáng, zohkû-nò nò râ ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haú no hpu é hkyô lé a bun byuq lo nghut ri. ²² Haú eq rajung za, ahkuí gi, nungmoq iyon yôn é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó râ nghut lhê; nungmoq é gabú hkyô haú lé, nungmoq chyáng mai ó yuq eq le wó yu pyám byi râ a nghut. ²³ Haú buinyi má, nungmoq gi, Ngo lé, hái le a dung lo kó râ nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng hái dung kôle, Yhang byi râ nghut lhê. ²⁴ Ahkuí jé shoq, nungmoq gi, Ngá myíng lé lang luí, hái le a dúng wú shi kó nghut ri. Dung keq, haú hkûn, nungmoq myang hap yù kó râ nghut luí, nungmoq é gabú hkyô gi, byíng jup lò râ nghut lhê.

²⁵ Ngò gi, nungmoq lé, dangtú đông haú pé taí kyo bê nghut lhê; nghut kôlhang, Ngò gi, dangtú a chùng lô e za, haú Íwa eq sêng é hkyô, nungmoq lé san za taí kyô é ahkyíng jé râ nghut lhê. ²⁶ Haú buinyi má, nungmoq gi, Ngá é myíng lé lang luí dung kó râ nghut lhê. Ngò gi, nungmoq é matú, haú Íwâ chyáng dung byi râ nghu taí nyi é a nghut. ²⁷ Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haú Íwa yhang, nungmoq lé chyitdap é nghut lhê. ²⁸ Ngò gi, haú Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Íwâ chyáng dum taú ló râ nghut lhê." gâ ri.

²⁹ Haú hkûn, Yesuq é chángzô pé gi, "Ahkuí, Nàng gi, dangtú a chùng é đông, san za taí kyô nyi é nghut bê! ³⁰ Nàng gi, lhungháng lé sê é sû nghut é lé le, Nàng lé, ó yuq eq le dangmyi myi nó a râ é hkyô lé le, ahkuí,

ngamoq wó sé bê. Hau é yanmai, Nàng gi, Garai Gasâng chyáng mai lé é sû nghut é lé, ngamoq lumjíng lhê." ga taí bum akô.

³¹ Haú hkûn, Yesuq tũ taí é gi, "Nungmoq, ahkuí lumjíng bekô lhú? ³² Nghut kôlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhùm shut ló byuq râ ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nguínón hkyô wó kó sháng gaq nghu, Ngò gi, haú hkyô pé lé taí kyô é nghut lhê. Nungmoq gi, mingkan shí má, wuñke hkyô hui kó râ nghut lhê; nghut kôlhang, myit wum lhoq kóng keq. Ngò gi, mingkan lé ung pyám bê nghut lhê." gâ ri.

Yesuq Kyûdûng É Hkyô

17 Yesuq gi, haú su ga taí é htâng má, mauhkûng shut tu wú luí, kyûdûng é gi, "Áwa ê, ahkyíng jé bê nghut ri; haú Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup shingkang hũ ló nhâng laq ô! ² Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunghâng bang lé up râ ahkáng, Yhang lé byí tô é yanmai nghut ri. ³ Nàng za tengmán é Garai Gasang nghut é eq Nàng nhang kat é sũ Yesuq Hkris-duq lé, sê é gi, ahtum abyuq é asak nghut lhê. ⁴ Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê. ⁵ Áwa ê, haú mingkan lhang a joq shí mai, Ngò, Nàng eq rahá chôm wó é hpungwup shingkang eq, ahkuí, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyûdung byí é hkyô

⁶ Mingkan mai, Nàng, Ngo lé hkyin htoq yũ byí é bang lé, Ngò gi, Náng é myíng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekô nghut ri. ⁷ Nàng, Ngo lé byí é lhungháng gi, Náng chyáng mã é nghut é lé, ahkuí, yhangmoq sé bekô nghut ri. ⁸ Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, haú pé lé hap yù bekô nghut ri; Ngò gi, Náng chyáng mai lé é sũ nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq lumjíng bekô nghut ri. ⁹ Ngò gi, yhangmoq é matú kyûdung byí lhê. Ngò gi, haú mingkan byu pé é matú dung byi nyi é a nghut; Nàng, Ngo lé ap byi tô é bâng é matú sheq dung byí nyi é ru nghut lhê; hkâsu mù gâ le, yhangmoq gi, Náng é byu pé nghut akô. ¹⁰ Ngò wó é lhungháng gi, Náng é chyat nghut mù, Nàng wó é lhungháng le, Ngá é chyat nghut lhê. Haú mù, Ngò gi, yhangmoq má hpungwup shingkang hũ é hui bê nghut lhê. ¹¹ Ngò gi, Nàng chyáng lò râ nghut lhê mù, mingkan htoq má nyi

nyi rã a nghut lo; nghut kôlhang, yhangmoq gi, mingkan htoq má nyi nyi shirã nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nang, Ngo lé byi é, haû Nang mying é a-tsam eq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut luí, Nang, Ngo lé byi é mying hau eq, yhangmoq lé rago zúng bê nghut lhê. Haû Chyúmdang lhoq dik sháng gaq ga, haû bang mã é htên byoq hui rã sũ mai lai luí, ó yuq le a byuq byuq é nghut lhê.

¹³ Ngò gi, ahkuí, Nang chyáng lò rã nghut bê; nghut kôlhang, Ngá é gabú hkyô gi, yhangmoq chyáng bying jup sháng gaq nghũ, Ngò gi, haû pé lé mingkan mã taí é nghut lhê. ¹⁴ Ngò gi, yhangmoq lé, Nang é mungdang byi bê nghut lhê; haû mingkan gi, yhangmoq lé a jú nghut ri; hkãsu mù gã le, Ngò gi, mingkan mã é a nghut é su, yhangmoq le, mingkan mã é a nghut kô é yanmai nghut ri. ¹⁵ Ngò kyûdúng é gi, Nang, yhangmoq lé mingkan mã shuí htoq yû rã matú dúng é a nghut, haû agè ashop su chyáng mai, yhangmoq lé upzúng yû rã matú sheq dúng é ru nghut lhê. ¹⁶ Ngò gi, mingkan mã é a nghut é su, yhangmoq le, mingkan mã é a nghut kó. ¹⁷ Yhangmoq lé, haû tengmán hkyo eq lhoq sân-yúng yû laq; Nang é mungdang gi, tengmán hkyô nghut ri. ¹⁸ Nang, Ngo lé, mingkan mã nhang hâng kat é su, Ngò le, yhangmoq lé, mingkan mã nhang hâng kat é nghut lhê. ¹⁹ Yhangmoq lé, tengmán hkyô má wó lhoq sân-yúng yû kó sháng gaq nghũ, Ngò gi, yhangmoq é matú, yhumsing gùng lé lhoq sân-yúng yu é nghut lhê.

Lumjúng Bang Lhunglhang É Matú, Yesuq Kyûdung Byí É Hkyô

²⁰ Ngò gi, yhangmoq é matú baú za kyûdung byí é a nghut; Yhangmoq é danglu é yanmai, Ngo lé lumjúng kó rã bang é matú le, Ngò kyûdung byí é nghut lhê. ²¹ Haû mù, yhangmoq banshoq bang gi, rading ralhũm za dut nyi kó sháng gaq. Haû mingkan gi, Nang, Ngo lé nhang kat é hkyô lé wó lumjúng sháng gaq; Áwa, Nang gi, Ngò má nyi nyi mù, Ngò gi, Nang má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za nghut é su, yhangmoq le, rading ralhũm za dut nyi kó sháng gaq nghũ, Ngò gi, Nang, Ngo lé byí é hpungwup shingkang lé, yhangmoq lé byi bê nghut lhê. ²³ Nang, Ngo lé nhang kat bê hkyô eq Nang, Ngo lé chyitdap é su, yhangmoq lé chyitdap é hkyô lé, haû mingkan wó sé rã matú, yhangmoq gi, gumjup shoq rading ralhũm za wó dut kó sháng gaq nghũ, Ngò gi, yhangmoq má nyi nyi luí, Nang gi, Ngò má nyi nyi é nghut lhê.

²⁴ Áwa ê, haû mingkan lháng a joq shi mai, Nang, Ngo lé chyitdap luí byi tô é hpungwup shingkang haû lé, Nang, Ngo lé byi tô é bang, wó myàng kó rã matú le, Ngò nyi é jang mã, Ngò eq rahá wó nyí kó rã matú le, Ngò ô nau ri.

²⁵ Dingmán é Áwa ê, haû mingkan gi, Nang lé a sé kôlhang, Ngò gi, Nang lé sê lhê; Nang, Ngo lé nhang

kat é hkyô lé gi, yhangmoq sé akô nghut ri. ²⁶ Nang, Ngo lé chyitdap é chyitdap myit gi, yhangmoq má wó joq nyi rã matú le, Ngò gi, yhangmoq má wó nyi nyi rã matú le, yhangmoq lé, Ngò, Nang é hkyô sé nhang bê nghut luí, xoq mù sé nhang nyi shirã nghut lhê." gã ri.

Yesuq Chyup Yû Huí É Hkyô

Mht 26:47-56; Mrk 14:43-50; Luk 22:47-53

18 Yesuq gi, haû su ga kyûdúng é htâng mã, Yhâng é chángzô pé eq rahá, Kedron wuihkung mai lai byit dap ló luí, haû hpoq má joq é hkyâm ralhũm mã wang e akô nghut ri.

² Hkyâm haû gi, Yesuq eq Yhâng é chángzô pé lhaq hui hui kut é jowò nghut é yanmai, haû Yesuq lé ap pyám rã sũ Yudaq le sê ri. ³ Haû mù, Yudaq gi, haû hkyangjong agyi pé eq Hparishe pê chyáng mai nhang kat é noqkuq yhũm zúng bang ra-am eq gyezo rajũm lé, haû jowò shut shuí wang lé lo ri. Haû bang gi, myihu, myibung eq shãm lhãm pé chung lé lo akô.

⁴ Yesuq gi, Yhang má dut lò rã hkyô lhunglhang lé sé gũ nghut mù, htoq ê luí, yhangmoq lé, "Nungmoq, ó yuq lé ho akô lhú?" ga myí ri.

⁵ Haû hkũn, yhangmoq gi, "Nazaret wà byù Yesuq lé ho lhê." ga tũ taí kôjáng, Yesuq gi, "Ngò gi, haû yuq nghut lhê." ga taí ri. (Yesuq lé ap pyám sũ Yudaq le, yhangmoq eq rahá yap tô ri.) ⁶ "Ngò gi, haû yuq nghut lhê." ga Yesuq taí kat é hkũn jáng, yhangmoq gi, nungzut zut mù, myigùng mã lêng leq ló bum akô nghut ri.

⁷ Yhang gi, "Nungmoq, ó yuq lé ho akô lhú?" ga, yhangmoq lé dum myí kat jáng, yhangmoq gi, "Nazaret wà byù Yesuq lé ho lhê." ga taí akô.

⁸ Haû hkũn, Yesuq gi, "Ngò gi, haû yuq nghut lhê nghũ, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tũ taí ri. ⁹ Haû gi, "Nang, Ngo lé byí tô é bang rayuq le lháng, Ngò, a lhoq hpyuq pyám." ga, Yhang taí tô é dang dik rã matú nghut ri.

¹⁰ Haû hkũn, Simun Petruq gi, shãm wun tô é nghut luí, shãm shê mù, haû hkyangjong mó é dui-nhâng zôshang é loqyo nohkyap lé zãn hpyit kat byí ri. (Dui-nhâng zoshang haû yuq é mying gi, Malhku gã ri.)

¹¹ Haû mù, Yesuq gi, Petruq lé, "Nang é shãm lé, shambyâng mã xàng pyám aq! Haû Íwa, Ngo lé byí é góm † lé, Ngò a shuq é wó nyí rã lhú?" ga taí kat ri.

Yesuq Lé, Anna Chyáng Shuí E É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haû jũm eq yhangmoq é gyezau hpó, Yudaq byu pê é mingsuwún wuí gi, Yesuq lé chyup yû mù, tuí akô nghut ri. ¹³ Yhangmoq gi, haû zãn mã é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut ri. ¹⁴ Kayahpaq gi, byu pê é matú rayuq shí hkám byí le je gè rã nghut lhê ga, haû Yudaq byu pé lé hpaqchyí byí é sũ yuq nghut ri.

† Góm lé shuq gã é gi, jamjau hui rã eq shí hkám rã lé, taí nau é nghut lhê.

Yesuq Lé, Petruq Sâng-hi Dam He-ngik Pyâm É Hkyô
Mht 26:69-70; Mrk 14:66-68; Luk 22:55-57

¹⁵ Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haú yuq gi, hkyangjong mó lé rago sê lhê nghut mù luî, hkyangjong mó é yhumwàng hkaû shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má láng yap tô ri. Haú hkyangjong mó lé rago sê é sù, gotû chángzo haú yuq gi, taû htoq ló mù, hkum zúng é myiwe myhí lé taí luî, Petruq lé shuí hâng yu ri.

¹⁷ Haú hkûn, haú hkum zúng é myiwe myhí gi, Petruq lé, "Nàng gi, haú yuq é chángzô pé mâ é rayuq a nghut lhú?" ga myi jáng, yhang gi, "Ngò a nghut." ga tû taí ri.

¹⁸ Haú u lé, gyoq é yanmai, dui-nhâng zoshâng wui eq noqkuq yhûm zúng bang gi, yhangmoq gyoq gâng râ matú myigyê eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myî Choq Wú É Hkyô
Mht 26:59-66; Mrk 14:55-64; Luk 22:66-71

¹⁹ Haú u lé, haú hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luî myî ri.

²⁰ Haú hkûn, Yesuq gi, "Haú mingkan htoq má, Ngò, de de taí bê nghut lhê. Ngò gi, haú Yudaq byu pé ban-shoq bang chôm zîng é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luî taí é hkyô haí le a joq. ²¹ Nàng, haí mù Ngo lé myi lhê lhú? Haú, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akô nghut ri." ga tû taí ri.

²² Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luî, "Hkyangjong mó lé wá, Nàng, haú su nghû dang tû lhê lhú?" ga taí ri.

²³ Haú hkûn, Yesuq gi, "Ngò taí shut é nghut le gi, shut é hkyô lé saksé tûn shit aq. Nghut kôlhâng, Ngò gi, têng é dông ru taí le nhîng, nàng, haí mù Ngo lé pyuq lhê lhú?" ga tû taí ri. ²⁴ Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô
Mht 26:71-75; Mrk 14:69-72; Luk 22:58-62

²⁵ Haú Simun Petruq gyoq gang yap tô é hkûn, "Nàng gi, Yhâng é chángzô pé mâ é rayuq a nghut lhú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Haú Petruq eq nohkyap zân hpyit pyám byî é huí su é buinùm nghut é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lhê lhú?" ga taí ri. ²⁷ Haú hkûn, Petruq gi, xoq he pyám ri; haú u yhang, woq tûn bê nghut ri.

Pilat É Myoq Hí Má, Yesuq Jé Nyi É Hkun Lhê Hkyô
Mht 27:1-2, 11-14; Mrk 15:1-5; Luk 23:1-5

²⁸ Hau htâng, yhangmoq gi, Yesuq lé, Kayahpaq chyáng mai, haú mauzau hpô é yhûmwàng shut shuí e ló akô. Haú u gi, napsûn noq ashî nghut ri. Yhangmoq gi, agot a-û a dut e za, htungli dông Lhoqlhai Poí lé wó zo râ matú, yhûmhkaû má a wàng kó nghut ri. ²⁹ Haú mù luî, mauzau Pilat gi, yhangmoq chyáng htoq ê mù, "Shí yuq lé, nungmoq hai mara hûn nau akô lhú?" ga myî ri.

³⁰ Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi râ a nghut." ga tû taí akô.

³¹ Pilat gi, "Yhang lé, nungmoq yhang shuí ló mù, nungmoq é tarâ dông ló jéyáng keq." ga taí jáng, haú Yudaq byu pé gi, "Nghut kôlhâng, ngamoq gi, ó yuq lé sat râ ahkáng le a wó é nghut lhê." ga tû taí akô nghut ri. ³² Haú su dut é hkyô gi, Yesuq, Yhang hká dông shî râ ga taí é dang lé lhoq dik râ matú nghut lhê.

³³ Haú mù, Pilat gi, yhûmhkaû má taû wang ló mù, Yesuq lé wut yù luî, "Nàng gi, Yudaq byu pé é hkohkâm nghut lhê lhú?" ga myî ri.

³⁴ Haú hkûn, Yesuq gi, "Haú gi, náng é myit dông taí é nghut lhê lhú? A nghut jáng, góbang mai, nang lé, Ngá é hkyô taí kyo luî nghut lhê lhú?" ga taû myî ri.

³⁵ Pilat gi, "Ngò gi, Yudaq byù nghut lhê lhú? Haú Náng é byù myû eq Náng é hkyangjong agyi pé sheq, Nang lé, ngá loq má ap byî é ru nghut lhê. Nàng gi, haí kut é nghut lhê lhú?" ga dum myî ri.

³⁶ Haú hkûn, Yesuq gi, "Ngá é mingdán gi, mingkan shî eq a séng. Mingkan shî eq séng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wui, Ngo lé chôm hung yù kó râ nghut lhê. Nghut kôlhâng, Ngá é mingdán gi, mingkan shî eq a séng é ru nghut lhê." ga taí ri.

³⁷ Haú mù, Pilat gi, "Haú jáng, Nàng gi, hkohkâm nghut bê lhú?" ga myi jáng, Yesuq gi, "Ngo lé, hkohkâm nghut lhê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haú tengmán hkyô lé saksé hkám râ matú, Ngò, mingkan htoq má jé lé é nghut lhê. Haú tengmán hkyô eq séng é sù ó yuq le, Ngá é dang lé gyô ri." ga tû taí ri.

³⁸ Haú hkûn, Pilat gi, "Tengmán hkyô gá é gi, haí jung lhú?" ga myî ri. Yhang gi, haú su ga myi luî, haú Yudaq byu pé chyáng dum htoq ê mù, "Shí yuq chyáng mara hûn râ hkyô, ngò a myàng nghut ri. ³⁹ Nghut kôlhâng, haú Lhoqlhai Poí u lé, nungmoq é matú, ngò, htóng byù rayuq nhang htoq kat byi byi kut é htung, nungmoq wó akô. Haú mù, 'Yudaq byu pé é hkohkâm' lé, nhang htoq kat byi râ lé, nungmoq ô nau akô lhú?" ga myî ri.

⁴⁰ Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

Yesuq Lé, Tapzîng Má Jén Sat Râ Matú Doqđân É Hkyô
Mht 27:15-31; Mrk 15:6-20; Luk 23:13-25

19 Haû mù luí, Yesuq lé lîng she yù mù, nhuq bat râ matú, Pilat hkunmó hkyô ri. ² Haû gyezô pé gi, zujanmaú saí yù kôluí, Yesuq é ulhum má tsung byi kômù, Yhang lé, buhîng nè hut byi akô nghut ri. ³ Hau htâng, yhangmoq gi, Yhâng chyáng dum huí ê ê kut luí, "Yudaq byu pé é hkohkâm ê! Chyung hîng xê hîng nyi sháng gaq ô!" ga taí kômù, Yhâng é myoqđong má pyuq byi akô nghut ri.

⁴ Pilat gi, haû Yudaq byu pé chyáng radàm dum htoq ê mù, "Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuí htoq lé byi lhê." ga taí ri.

⁵ Yesuq gi, haû zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taí ri.

⁶ Haû hkyangjong agyi pé eq yhangmoq é noqkuq yhûm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hûn râ hkyô a myàng." ga tû taí ri.

⁷ Haû hkûn, haû Yudaq byu pé gi, "Ngamoq chyáng tarâ rahkat joq lhê; tarâ haû dông ga jang, Yhang gi, shí gîng bê nghut ri; hkâsu mù gâ le, Yhang gi, Garai Gasâng é Yhangzo haû nghut lhê gâ ri." ga xoq taí akô.

⁸ Pilat gi, dang haû lé wó gyo jáng, je gyô gyuq luí, ⁹ yhûmhkaû shut dum wang lô mù, Yesuq lé, "Nàng, hkâmâ é sù nghut lhê lhú?" ga myí ri. Nghut kôlhang, Yesuq gi, dang rahkun lháng a tû taí byi nghut ri.

¹⁰ Haû hkûn, Pilat gi, "Nàng, ngo lé a tû taí kut lhê lhú? Ngò gi, Nàng lé, wó lhoq lhut kat é eq tapzîng má wó jén sat pyám é ahkáng wó sù nghut é lé, Nàng a sé lhú?" ga myí ri.

¹¹ Yesuq gi, "Nàng lé, haû ahtoq mai ahkáng byi e za a nghut le gi, nàng, Ngo lé haí kut râ a-tsam le wó râ a nghut. Haû mù luí, Ngo lé, náng é loq má ap byi é sù gi, mara je bo é nghut lhê." ga tû taí ri.

¹² Haû hkûn mai, Pilat gi, Yesuq lé lhoq lhut kat byi nau nyi bê nghut ri. Nghut kôlhang, haû Yudaq byu pé gi, "Nàng, haû yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhumsing gùng lé, hkohkâm gâ é sù gi, hkoséng Kehtaq eq shai lhûm é sù nghut lhê." ga, ru jâng garû nyi bum akô nghut ri.

¹³ Haû lé wó gyo jáng, Pilat gi, Yesuq lé shuí htoq ê mù, Hebre myíng dông Gabahta gâ é Luqgok hkâng myhang to jang nghu é jowò mâ é tarâ jéyáng tanghkuq má zung tô ri. ¹⁴ Haû u gi, Lhoqlhai Poí é matú, Hên Lajâng é Buinyi nyi-káng raxe í hkyíng nghut ri.

Pilat gi, haû Yudaq byu pé lé, "Nungmoq é hkohkâm lé wú keq." ga taí ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haû hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lhú?" ga myi jáng, haû hkyangjong agyi pé gi, "Haû hkoséng Kehtaq mai lai luí, gotû hkohkâm ngamoq a wó." ga, tû taí akô nghut ri.

¹⁶ Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byi kat bê nghut ri. Haû mù luí, yhangmoq gi, Yesuq lé shuí lô bekô nghut ri.

Tapzîng Má Jén Pyâm É Hkyô
Mht 27:32-44; Mrk 15:21-32; Luk 23:26-43

¹⁷ Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri. ¹⁸ Yhangmoq gi, haû má, Yesuq lé tapzîng htoq má jén tap pyám akô; Yhang eq rahá, gotû í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

¹⁹ Pilat le, masat laiká kâ yù luí, haû tapzîng htoq má tap tô ri. Haû má gi, "YUDAQ BYU PÊ É HKOHKÂM, NAZARET WÁ BYÚ YESUQ" gâ tô ri. ²⁰ Yesuq lé jén tô é jowò gi, myuq eq chyâng lhûm é htoq agó, haû masat laiká gi, Hebre dông le, Latin dông le, Grik dông le, kâ tô é yanmai, haû Yudaq byu pé myo myo gi, masat laiká haû lé nghap bum akô nghut ri. ²¹ Haû Yudaq byu pé é hkyangjong agyi pé gi, Pilat lé, "Yudaq byu pé é hkohkâm' nghû hkáká, 'Ngò gi, Yudaq byu pé é hkohkâm nghut lhê ga, Yhang taí ri.' nghû luí sheq ká aq." ga taí akô.

²² Haû hkûn, Pilat gi, "Ngò kâ é dông, ngò kâ to bê nghut lhê." ga tû taí ri.

²³ Haû gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haû ahte bu lé le, gàm râ dâ akô; nghut kôlhang, haû gi, hkyupshi a bo e za, awang mai ahpyo hpyot kut woq tô é nghut ri.

²⁴ Haû mù, yhangmoq gi, "Bu shí lé gi, a lîng cheq e za, ó yuq myang yù ang râ laq, hkyín shosé she wú sháng." ga, rayuq eq rayuq taí lhum akô.

Haû gi, "Yhangmoq, Ngá é mebu lé chôm gam yù kó râ; Ngá é ahtê bû é matú, hkyín shosé shê kó râ nghut lhê." † gâ é Chyúmdang lé lhoq dik râ matú dut é nghut lhê. Haû mù, gyezô pé gi, haû su kut bekô nghut ri.

²⁵ Haû Yesuq é tapzîng nàm má gi, Yhângnu, Yhângnu é yhanggu byizo eq, Klopa é yhangmyi Mariq eq Magadalaq wà mâ é Mariq pé, yap tô bum akô.

²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ânu é †† nung zo lé wú aq." ga taí mù, ²⁷ chángzo haû lé le, "Náng nu lé wú aq." ga taí ri. Haû hkûn mai, chángzo haû yuq gi, Yesuq é yhângnu lé, yhâng é yhûm shut shuí lô bê nghut ri.

† 19:24 Hkya-on 22:18 †† Ânu é, gâ é lé, Grik dông gi, "myiwe myhí ê" ga bo tô é nghut lhê.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-49

²⁸ Hau htâng, Yesuq gi, ahkuî, muzó bàn bê nghut é lé sé luî, haû Chyúmdang lhoq dik râ matú, "Ngò, wui shit ri." ga taí ri. ²⁹ Haú má, tsibiyiq wing chyîn rayambú joq tô ri; haû mù, yhangmoq gi, wuimaù lé tsibiyiq wing chyîn haú má jum yù luî, jàm-yang ahyo má tuî tap mù, Yhâng é nhutwuî jé shoq yhun byi akô nghut ri. ³⁰ Yesuq gi, tsibiyiq wing chyîn haú lé shuq yù mù, "Mù bàn bê." ga taí ri. Yhang, haû su ga taí eq yhang, ulhum nhuq ló mù, kâng byit bê nghut ri.

³¹ Htang nyí gi, ahkyak é Bánno buinyi nghut luî, haû nyí gi, Hên Lajang Buinyi nghut ri. Haû mù, Yudaq byu pé gi, Bánno buinyi má, màng pé lé tapzîng htoq má a joq to nhâng naù kô é yanmai, hkyî pé lé bat hkyuî pyám mù, màng pé lé yù hkyô pyám nhâng râ matú, Pilat chyáng dúng tôngbán akô. ³² Haû mù luî, gyezô pé gi, lé mù, Yesuq eq jén hui su nhik mà é, rayuq é hkyî lé hí bat hkyuî pyám mù, rayuq é hkyî lé dum bat hkyuî pyám akô nghut ri. ³³ Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kômù, Yhâng é hkyî lé a bat hkyuî byi kó nghut ri. ³⁴ Nghut kôlhang, gyezo rayuq gi, Yesuq é namcham má lham èq htaù kat byi jáng, radá dâm sui eq wui yui htoq lo ri. ³⁵ Haû lé myàng é sù gi, saksé hkám byi ri; yhâng saksé hkám é hkyô gi, tengmán ri. Haû yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byi é nghut ri. ³⁶ Haû hkyô pé dut é gi, "Yhâng é showui rahkat lháng a lhoq hkyuî râ nghut lhê." † gâ é Chyúmdang haû lhoq dik râ matú nghut lhê. ³⁷ Chyúmdang gotù ralhum má le, "Yhangmoq èq htau htông é sù lé, yhangmoq tu wú kó râ nghut lhê." †† gâ é bo tô ashí nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyi é Aramahti myuq byu Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byi kat jáng, yhang gi, gungsôm haû lé, lé yu ló bê nghut ri. ³⁹ Yhang gi, hí hkûn, myín lé, Yesuq lé ê huî é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê jói kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pé é màng yhum htông eq rajung za, namngón jung eq rahá, pán yúng eq htup yup to byi akô. ⁴¹ Haû Yesuq lé tapzîng má jén sat pyâm é jowò nàm má, hkyâm ralhum joq ri; ó yuq lé le a lheq wú shí é, lup sik ralhum hkyâm hkaù má joq tô ri. ⁴² Haû nyí gi, Yudaq byu pé é Hên Lajang Buinyi nghut é yanmai le, lup haû le chyâng é yanmai le, yhangnhik gi, Yesuq lé, haú má ê lheq tô akô nghut ri.

Lup Akôm

Mht 28:1-10; Mrk 16:1-8; Luk 24:1-12

20 Bánno buinyi htâng, napsûn noq le mau a bó shimá, Magadalaq wà mà é Mariq gi, haû lup má ê jé le, lup hkum mà é luqlong huî hpyuq to lánng é lé myang ri. ² Haû mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haû Yhumsîng lé, lup mai yu htoq ló byuq bekô; hkâmá ê kat to kô é lé, ngamoq a sé." ga taí ri.

³ Haû mù, Petruq eq chángzo haû gi, lup shut e ló akô. ⁴ Yhangnhik í yuq é din akô; nghut kôlhang, chángzo haû gi, Petruq htoq má wó dîn luî, lup má hí din jé e ri. ⁵ Haû mù, yhang gi, ahkaù shut ngóm wú kat é hkûn, haû pán yúng htui leq tô é lé myang ri; nghut kôlhang, yhang gi, a wang ê nghut ri. ⁶ Hau htâng, Simun Petruq gi, châng jé luî, lup hkaù shut wang e ri; haû hkûn, yhang gi, haú má pán yúng htui joq tô é lé le, ⁷ haû Yesuq é ulhum má htup é panchoq lé le, myang ri. Panchoq haû gi, pán yúng htui eq rahá a nghut e za htuî jup leq tô ri. ⁸ Haû lup má hí jé é chángzo le, ahkaù má wang ê luî, myàng jáng, lumjîng bê nghut ri. ⁹ (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.) ¹⁰ Hau htâng, haû chángzô nhik gi, yhum taù ló bekô nghut ri.

Magadalaq Wà Mà É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhang, Mariq gi, lup shinggan má ngau yap tô ri. Yhang gi, ngaù uchyang lup hkaù má ngóm wú kat ri. ¹² Haû hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haî mù ngau nyi lhê lhú?" ga myi kôjáng, yhang gi, "Ngá é Yhum-sîng lé yù ló hpyuq kôluî, Yhang lé hkâmá ló lheq to kô é lé, ngò a sê é yanmai nghut lhê." ga tũ taí ri. ¹⁴ Haû su ga luî, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

¹⁵ Yesuq gi, "Myiwe myhí ê, nàng, haî mù ngau nyi lhê lhú? Nàng gi, ó yuq lé ho wún lhê lhú?" ga myi jáng, yhang gi, hkyâm saí zo sù su ngam pyám mù, "Sarà ê, nàng, Yhang lé waq htot pyâm é nghut le gi, hkâmá ê lheq tô é, ngo lé taí kyo laq, ngò, Yhang lé yu ló râ." ga taí ri.

¹⁶ Haû hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhîng mù, Hebre myíng dông, "Raboni!" ga wut kat ri. (Haû gi, "Sarà ê" gâ é lichyúm nghut ri.)

¹⁷ Yesuq gi, "Ngo lé hkâzáng shi; hkâsu mù gâ le, Ngò gi, haû Îwâ chyáng a taù doq ló shí é nghut lhê. Nàng gi, Ngá é gumang wui chyáng ló mù, yhangmoq lé, "Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng

† 19:36 Htoq Ló 12:46; Gyung So 9:12; Hkyá-on 34:20 ††
19:37 Zhk 12:10

doq ló zó nghut lhê.' gâ ri nghû, ló taí kyo aq." ga, yhang lé taí kat ri.

¹⁸ Magadalaq wà mã é Mariq gi, chángzô pè chyáng ló mù, "Yhumsing lé, ngò myàng bê!" ga taí luí, yhang lé shit kat é pé lé, taí kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haú nyí, Bánno buinyi htang myìn lé, haú chángzô pé gi, Yudaq byu pé lé gyuq kô é yanmai, hkum tsing myhí pyám mù, zing tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyí sháng gaq!" ga taí ri. ²⁰ Yhang gi, haú su ga taí é htâng má, yhangmoq lé, Yhâng é loq pé eq namcham lé tûn shit ri. Chángzô pé gi, haú Yhumsing lé myàng kôjáng, gyai gabú bùm bekô nghut ri.

²¹ Yesuq gi, "Nungmoq nguingón yuqyo nyí sháng gaq! Haú Iwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum taí ri.

²² Haú su ga taí mù, Yhang gi, yhangmoq é ahtoq má soq mut luí, "Haú Chyoiyung Woi-nyí lé hap yù keq.

²³ Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyám byí é hui râ nghut lhê; nungmoq a hkyut byí é nghut jáng, mara haú pé gi, hkyut pyám é hui râ a nghut." ga taí ri.

Htomaq Lé, Yesuq Htoq Shit É Hkyô

²⁴ Haú chángzo raxe í yuq má bo é, Zozúm le gâ é Htomaq gi, Yesuq lé jé é hkûn, haú chángzô pé eq rahá a nyi to nghut ri. ²⁵ Haú mù luí, gotú chángzô pé gi, yhang lé, "Haú Yhumsing lé, ngamoq myàng bê." ga taí kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mã é shamtoq zuhkô lé myàng mù, ngá é loqnyhuí èq jói wú é eq, Yhâng é namcham má, ngá é loq èq myang lap wú é za a nghut jáng, haú lé ngò lumjínng râ a nghut." ga taí ri.

²⁶ Rabat myáng jáng, chángzô pé gi, haú yhúmhaú má dum nyi tô akô; Htomaq le, yhangmoq eq rahá nghut nyi ri. Haú hkum pé myhí to kôlhang, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyí sháng gaq!" ga taí ri. ²⁷ Hau htâng, Yhang gi, Htomaq lé, "Náng é loqnyhui, shí má lé jói mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjínng nyi aq." ga taí ri.

²⁸ Haú hkûn, Htomaq gi, "Ngá é Yhumsing, ngá é Garai Gasang ê!" ga Yhang lé taí ri.

²⁹ Yesuq gi, yhang lé, "Nàng gi, Ngo lé myang é yanmai, lumjínng é a nghut lhú? A myàng kôlhang, lumjínng é bang gi, hkungsô wó nyi ri." ga taí ri.

³⁰ Laiká buk shí má a kê tô é limik kumlhá pé gotú myo myo lé le, Yesuq gi, Yhâng é chángzô pè hí má kut shit bê nghut ri. ³¹ Nghut kôlhang, Yesuq gi, Garai Gasang é Yhangzo Hkrisduq nghut é lé, nungmoq wó lumjínng râ matú eq, lumjínng é yanmai, nungmoq

Yhâng é mying má asak wó kó râ matú, shí hkyô pé lé kê tô é nghut lhê.

Ngozo Wó Chyup Yu É Limik Kumlhá

²¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mã é đông nghut ri. ² Simun Petruq, Zozúm le gâ é Htomaq, Galile mau Hkanaq wà mó mã é Nahtanelaq, Zebedi é yhangzo nhik eq gotú chángzo í yuq pé gi, rahá nyi to bum akô. ³ Haú hkûn, Simun Petruq gi, yhangmoq lé, "Ngò gi, ngozo kóng é râ." ga taí jáng, yhangmoq gi, "Ngamoq le châng lé râ." ga taí akô. Haú mù luí, yhangmoq gi, htoq è mù, haú lhaí má wàng bekô nghut ri; nghut kôlhang, haú myín, radu lhang a wó kóng kó nghut ri.

⁴ Htang napkyô maubó lo é hkûn, Yesuq gi, wuiyàm má yap tô ri; nghut kôlhang, haú chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wui ê, nungmoq, ngozo wó akô lhú?" ga, wut myi kat jáng, yhangmoq gi, "A wó." ga tû taí akô.

⁶ Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kóng yù kó râ nghut lhê." ga taí ri. Haú mù, yhangmoq gi, gùn dú hkyô kat é hkûn, ngozo lùm myô é yanmai, haú gùn lé lhang a wó lhang yù lo kó nghut ri.

⁷ Haú mù luí, haú Yesuq chyitdap é chángzo gi, Petruq lé, "Yhumsing ru nghut ri." ga taí ri. Simun Petruq gi, "Yhumsing ru nghut ri." gâ é lé wó gyo eq yhang, yhang gi, mebu hkyut pyám tô é yanmai, buhíng mó lé, yhâng é gùng má baíyup yù mù, wui hkaú má byam wang ló bê nghut ri. ⁸ Haú chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhaí mai she jé lo akô nghut ri. ⁹ Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhín tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Haú, ahkuí za nungmoq wó kóng yu é ngozo, ra-am yù lé keq." ga taí ri.

¹¹ Haú mù, Simun Petruq gi, lhaí má doq ji luí, kô é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo haú myhó myo kôlhang, gùn gi, a jeq nghut ri. ¹² Yesuq gi, yhangmoq lé, "Napzang lé zo keq." ga taí ri. Chángzô pé gi, Yhang, haú Yhumsing nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri.

¹³ Yesuq gi, lé mù, muk lé ê yù luí, yhangmoq lé byí ri; ngozo lé le, haú su kut ri. ¹⁴ Yesuq gi, shí é mai lhoq dui toq yù huí é htâng, Yhâng é chángzô pé lé htoq shit é má, shí gi, sum dâm nghû râ dâm nghut ri.

Yesuq Eq Petruq

¹⁵ Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lhú?" ga myi jáng, yhang gi, "Nghut lhê; Yhumsing ê, ngò,

Nàng lé chytđap é hkyô lé, Nàng sê lhê." ga tũ tũ ri. Háu hkũn, Yesuq gi, "Ngá é sau zô pé lé, baú aq." ga, yhang lé tũ ri.

¹⁶ Háu htâng, Yesuq gi, "Yohan é yhangzo Simun ê, nàng gi, Ngo lé teng za chytđap lhê lhú?" ga dum myi jáng, yhang gi, "Nghut lhê; Yhumsing ê, ngò, Nàng lé chytđap é hkyô lé, Nàng sê lhê." ga tũ tũ ri. Háu hkũn, Yesuq gi, "Ngá é sau pé lé, rém aq." ga tũ ri.

¹⁷ Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chytđap lhê lhú?" ga myi ri.

Háu hkũn, Petruq gi, "Nàng gi, ngo lé chytđap lhê lhú?" ga, yhang lé Yesuq eq súm dam dàm tũ é yan-mai, yhâng myit nò luí, "Yhumsing ê, Nàng gi, lhungl-háng lé sê lhê; ngò, Nàng lé chytđap é hkyô lé, Nàng sê lhê." ga tũ ri.

Háu hkũn, Yesuq gi, "Ngá é sau pé lé, baú aq. ¹⁸ Ngò, nàng lé teng za tũ lé, nàng, zorâm nghut é hkũn gi, yhumsing gùng yhumsing hpyihit baíyup † yù mù, ê nau é jowò hkangmó má wó ê é nghut lhê; nghut kôlhang, nàng mang jáng gi, loq í loq lham luí, nang lé góyup eq hpyihit baíyup byi mù, nàng a ê nau é jowò shut shuí ê rã nghut lhê." ga tũ ri. ¹⁹ (Yesuq háu su ga tũ é gi, háu Petruq, hkâsu kut shi é đông mai, Garai Gasâng é hpungwup shingkan lé dan hu nhâng rã

† Hpyihit baíyup gâ é lichyúm gi, mebu wut luí ri ri kut tô é lé gâ lhê.

nghut é lé, tũ nau é nghut ri.) Háu htâng, Yesuq gi, yhang lé, "Ngá htâng cháng aq." ga tũ ri.

²⁰ Háu hkũn, Petruq gi, lhing wú kat le, háu Yesuq chytđap é chángzo, yhangmoq htâng châng wún é lé myàng ri. Chángzo háu gi, hí hkũn, myinzang zô é u lé, Yesuq chyáng leq ngè mù, "Yhumsing ê, Nàng lé ap pyám rã sũ gi, ó yuq lhú?" ga, myi wú é sũ nghut ri.

²¹ Petruq gi, háu yuq lé myàng jáng, Yesuq lé, "Yhumsing ê, shí yuq gi, hkâsu dut rã lhú?" ga myi ri.

²² Yesuq gi, "Ngò jé lé é hkũn jé shoq, Ngò, yhang lé dui nyi nhâng nau é nghut le gi, nàng eq hái sêng lhê lhú? Nàng gi, Ngá htâng cháng aq." ga tũ tũ ri. ²³ Dang háu é yanmai, chángzo háu yuq a shí rã nghut lhê gâ é danglám gi, háu gumang wui chyáng byo myín to bê nghut ri. Nghut kôlhang, Yesuq gi, háu yuq a shí rã hkyô lé tũ é a nghut, "Ngò jé lé é hkũn jé shoq, Ngò, yhang lé dui nyi nhâng nau é nghut le gi, nàng eq hái sêng lhê lhú?" ga, tũ é ru nghut lhê.

²⁴ Shí pé lé saksé hkám mù, shí pé lé kê tô é sũ gi, chángzo háu yuq nghut lhê. Yhâng é saksé gi, têng é lé, ngamoq sê lhê.

²⁵ Yesuq gi, gotũ muzó myo myo le kut ashí nghut ri. Muzó háu pé lhum jup lé, kê htoq yu é ru nghut le gi, kê tô é laiká buk háu pé gi, mingkan gón má lhang ngo rã a nghut nghũ, ngò wó myit ri.

Lagyo

(Acts)

Yesuq, Mauhkûng Má Shuî Yù Huî É Hkyô

1 Htohpiluoq ê, Yesuq yhang hkyin yu tô é lagyo pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuî yu é buinyi jé shoq, ² Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê. ³ Yesuq gi, shî hkâm é htâng má, Yhang dui toq bê hkyô lé, lumgíng é saksé myo myô èq yhangmoq lé tân shit mù, buinyi myi xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri. ⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byí tô é chyunghuq lé láng nyí keq. ⁵ Hkâsu mù gâ le, Yohan gi, wui èq wui-myhup hkâm byí é nghut lhê; nghut kôlhang, nungmoq kúm gi, buinyi hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê." gâ ri.

⁶ Lagyo pé gi, Yhang eq rahá chôm zup míng tô é hkûn, Yhang lé, "Yhumsíng ê, nàng, haû Israelaq byu pé lé mingdán dum xuq byi râ gi, ahkuí yhang nghut bê lhú?" ga myí akô.

⁷ Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra. ⁸ Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yú mù luí, Yerusalem wà mó eq Yuda mau banshoq, Samariq mau eq maumyí htáng shoq, ngá é saksé pé dut kó râ nghut lhê." ga luí, yhangmoq lé taí ri.

⁹ Dang haû ban taí é htâng má, yhangmoq wú nyi le, Yhang gi, mauhkûng shut shuî yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashî le, hpyu é mebu wut é byù í yuq gi, radá dâm yhangmoq nàm má htoq yap lò mù, ¹¹ "Galile byu pé ê, haî mù luí mauhkûng shut wú tsuq nyi akô lhú? Nungmoq é hí mai mauhkûng shut shuî yu huî é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taí akô.

Yudaq É Jowò Má, Mahtiaq Lé Hkyin Kat É Hkyô

¹² Hau htâng má, yhangmoq gi, Tsanlun Bùm mai, Yerusalem wà mó shut taû ló bekô. [†] Haû gyoro gi,

Bánno buinyi má ge sô é í za wê ri. ¹³ Yhangmoq jé ló kôjáng, yhangmoq nyi nyi kô é yhûm ahtoq pyâm mâ é wap shut doq ló akô; haû bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. ¹⁴ Yhangmoq lhunglhâng bang gi, myiwe wui le, Yesuq é yhângnu Mariq le, yhanggu pé le kut mù, i-myt rahkat za kyû chôm dung dung kut nyi akô.

¹⁵ Buinyi haû yoq má, Petruq gi, lumjíng é gumang gu-nhá ^{††} wui rasho í xê yuq kô zup zíng tô é gung gúng má, toq yap mù, ¹⁶ "Gumang gu-nhá wui ê, Yesuq lé chyup é bang lé hkyô shuî hí é sù Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri.

¹⁷ Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhang shí hkyô dut bê nghut ri." ga taí ri.

¹⁸ (Yudaq gi, yhang kut é agè ashop é muzó mai wó é ahpau èq myigùng ratóng wui yu é htâng, haû má yhang, a-nghop dông byit gyó mù wam buq goq luí, û banshoq buq myín byuq bê nghut ri. ¹⁹ Haû hkyô lé Yerusalem wà mó má nyi é lhunglhâng bang wó gyo kôjáng, myigùng haû lé yhangmoq é myíng dông, 'Akeladama' ga myhíng akô; haû gi, 'Sui myigùng', gâ é nghut ri.)

²⁰ Petruq xoq taí é gi, "Hkâsu mù gâ le, Hkya-on Kungtôn Laiká má,

'Yhâng é jowò chamchyuiyui dut byuq sháng gaq; haû má ó le a nyi kó sháng gaq.' [‡] ga luí le, dum

'Yhang wó é ayá lé byù góyuq wó yu pyám byi sháng gaq.' ^{‡†}

ga luí le, bo tô ri. ²¹ Haû mù luí, Yohan baptisma byí hi é hkûn mai, Yesuq lé nga-nhúng chyáng mai shuî yu é buinyi jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyi banshoq pé má, nga-nhúng eq yhang zum nyi sù rayuq lé, hkyin kat râ dut ri. Haû yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

²³ Haû hkûn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô.

²⁴ Haû mù, yhangmoq kyûdung kô é gi, "Byù banshoq é i-myt lé sê é Yhumsíng ê, Yudaq Iskarut gi, yhang ló gíng é jowò shut ló râ ga, tô pyâm tô é yhâng é lagyo

[†] Tsanlun bùm eq Yerusalem gyoro gi, déng rawuí hkup kô we ri. ^{††} Gumang gu-nhá gâ é lé, Grik má gi, gumang za gâ to lhê.

[‡] 1:20 Hkya-on 69:25 ^{‡†} 1:20 Hkya-on 109:8

ayá é matú shí nhik mâ é nàng hkyin tô é sù lé tûn shit laq ò." ga akô. ²⁶ Hau htâng, yhangmoq, byù hkyîn shosé she le, Mahtiaq chyáng ang bê. Haù mai, Mahtiaq lé gi, haù lagyo raxe rayuq má jat kat bê nghut ri.

Chyoiyúng Woi-nyí Jé Gyó Lo É Hkyô

2 Penteko-ti † buinyi jé jáng, lumjíng bang banshoq gi, jowò ralhúm má za, chòm zup míng nyi tô akô. ² Haù hkûn, laidun mó lo é su gâ é htê gi, byodàn ratung, mauhkûng mai mying htoq lô mù luí, yhangmoq zing tô é yhùm byíng shoq dut to bê nghut ri. ³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴ Yhangmoq lhunghâng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang dông nyo lo bum akô.

⁵ Haù u lé, mauhkûng ô má joq é mingdán hkanngmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akô. ⁶ Haù mying é htê lé wó gyo kôjáng, byù rajùm rayò zíng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí, ⁷ maú bùm uchyang taí kô é gi, "Wú keq, ahkuí dang taí nyi é byù shí bang lhungháng gi, Galile byu pé chyat a nghut kó lhú? ⁸ Haù nghut é wa, hkâsu mù nga-nhúng ó le ô é yhumsing mau mâ é myíng dông sê gyô yu lhê lhú? ⁹ Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, ¹⁰ Hprugi eq Pamhpuli, Egotuq ming má nyi é bang eq Kuruni myuq nâm má nyi é Libya ming má é bang, Romaq myuq mai lé bíng nyi é Yudaq byu pé eq Yudaq noqkuq htúng má lhing wang lò bang, ¹¹ Kreti zinlóng eq Arabiq mau mâ é bang, nga-nhúng gi, yhangmoq hko kyô é Garai Gasâng é mauhpo muzó hkyô lé, yhumsing mau mâ é myíng dông yhang wó sê gyô yu ri-nhung." gâ ri. ¹² Yhangmoq banshoq bang gi, maú úng-âng byuq kômù, "Shí gi, haí wá nghut lhê lhú?" ga le, rayuq eq rayuq myí lhùm bum akô.

¹³ Nghut kôlháng, byù ra-am gi, "Shí bang gi, î shuq wut é bang nghut akô." ga luí, taí jihpoi bum akô nghut ri.

Petruq Hko Kyô É Mungdang

¹⁴ Haù hkûn, Petruq gi, lagyo góbang raxe rayuq eq toq yap mù, htê mó èq byù haù bang lé taí é gi, "Yudaq byu pé eq Yerusalem wà mó má nyi nyi é lhunghâng bang ê, rago gyô wú keq! Ngò, nungmoq lé, shí hkyô taí kyo kôlé. ¹⁵ Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí. ¹⁶ Shí hkyô kúm gi, myiqhtoi Yoelaq taí tô é eq rajung za dut é nghut ri. ¹⁷ Yhang taí tô é gi,

'Garai Gasang ísu gâ ri: Ló htâng é buinyi pé má, Ngò Ngá é Woi-nyí lé byù lhunghâng bâng é ahtoq má hut gyun râ nghut lhê.

† Penteko-ti gâ é gi, Lhoqlhai Poí lai é htâng ngo xê nyí jé é buinyi má, kut é poí lé gâ lhê.

Haù mù, nungmoq é yuqzo byizô pé gi, myiqhtoi htoi kó râ; nungmoq é zorâm wuì gi, myoqwup shing-rán myàng kó râ; nungmoq é hpaù mâng pé gi, yhupmoq myàng kó râ nghut lhê.

¹⁸ Buinyi haù pé má, Ngá é dui-nhâng zoshâng hpô pé eq dui-nhâng zoshâng myhî pé é ahtoq má lháng, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó râ nghut lhê.

¹⁹ Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pé èq kut mù tûn shit râ.

²⁰ Haù Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut râ nghut lhê.

²¹ Haù hkûn, Yhumsing é myíng lé llang é bang yuq hkanngmó gi, hkyi yu é hui kó râ nghut lhê.' †† gâ ri.

²² Israellaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tûn shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri. ²³ Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyâm é hui mù, nungmoq gi, agè ashop byu pé é loq èq, Yhang lé tapzíng htoq má jén sat pyám nhâng bekô nghut ri. ²⁴ Nghut kôlháng, haù shí-nò hkyô gi, Yhang lé wó hkùm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi luí lhoq dui toq yù bê nghut ri. ²⁵ Dawiq gi, shí yuq eq séng luí taí é má,

'Haù Yhumsing gi, ngá é myoq hí má hkâ-nhám le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

²⁶ Haù mù, ngá i-myt gi, nguingón nyí luí, ngá nhut shô gabú hkyá-ôn nyi ri;

ngá é gungdu le myit myoqbyù jowò má nyi nyi râ nghut lhê.

²⁷ Hkâsu mù gâ le, nàng, ngá é woi-nyí lé mosumhkung má tô pyâm to râ a nghut.

Nàng, náng é Chyoiyúng Sù lé bup byuq é hui nhâng râ a nghut.

²⁸ Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pyíng byi râ nghut lhê.' † gâ ri.

²⁹ Gumang wuì ê, nga-nhùng é îchyí îkê Dawiq kâng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhùng chyáng joq tô é lé le, ngò, nungmoq lé a gyuq a kyum wám taí lhê. ³⁰ Dawiq gi, myiqhtoi rayuq nghut é yanmai, yhâng é awut ashín mâ é rayuq lé, yhâng é hkohkâm tanghkuq má zùng nhâng râ ga Garai Gasang byi tô é danggidíq lé sê to mù, ³¹ 'Hkrisduq †† gi, mosumhkung má pyâm to a hui râ eq, Yhâng é gungsho a bup byuq é za, dum dui toq

†† 2:21 Yol 2:28-32 † 2:28 Hkyá-on 16:8-11 †† Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

lô râ nghut lhê.', gâ é hkyô lé te sê to luí taí tô ri.
³² Garai Gasang gi, haû Yesuq lé lhoq dui toq yù bê.
 Ngamoq banshoq bang gi, haû hkyô é saksê pé nghut
 nyi ri. ³³ Haû mù, Garai Gasang gi, Yesuq lé Yhâng é lo-
 qyo hkyam má lhoq toq to bê. Yesuq gi, Garai Gasang
 byi tô é danggidiq Chyoiyúng Woi-nyí lé hkam yù mù,
 hut hkyô kat bê nghut é yanmai, ahkuí nungmoq shî
 su wó myâng, wó gyo bekô nghut ri. ³⁴ Hkâsu mù gâ
 le, Dawiq gi, mauhkúng htoq tsáng myhâng má a doq
 lô wú kôlhâng, yhang gi,
 'Haû Yhumsîng Garai gi, ngá é Yhumsîng lé,
 "Ngò, náng é gye pé lé, náng é hkyí nang tanghkuq
 kut pyám byí é hkyíng jé shoq,
 Ngá é loqyo hkyam shut zung nyi shi aq." gâ ri.' †
 ga luí, taí ri.

³⁶ Hau é yanmai, Garai Gasang gi, nungmoq èq
 tapzîng má jén sat pyám é haû Yesuq lé, Yhumsîng eq
 Hkrisduq dut nhang é hkyô, Israelaq byu pé lhungl-
 hâng bang hkyak sê nyi kó sháng gaq ô." gâ ri.

Sâng-hi Lumjîng É Bang

³⁷ Yhangmoq gi, haû lé wó gyô bùm kôjáng, yhang-
 moq é i-myt má záng kô é nghut mù luí, "Gumang wui
 ê, ngamoq hkâsu kut lo râ lhú?" ga luí, Petruq eq lagyo
 góbang lé myí akô.

³⁸ Petruq gi, "Nungmoq yuq hkangmó myit lhîng mù,
 Yesuq Hkrisduq é myîng mai wui-myhup hkâm yù keq;
 Haû jáng, nungmoq é yubak hkyut pyám byí é hui kó
 râ nghut lhê. Haû hkûn, Chyoiyúng Woi-nyí gâ é
 chyunghuq lé, nungmoq wó yù kó râ nghut lhê. ³⁹ Hkâ-
 su mù gâ le, danggidiq haû gi, nga-nhûng é Yhumsîng
 Garai Gasang ji yù râ bang banshoq nghut é, nung-
 moq eq nungmoq é yhangzo yhangshû pé eq le, mau
 we má nyi é lhunglhâng bang eq le, sêng lhê." ga luí,
 yhangmoq lé taí kyô ri.

⁴⁰ Yhang gi, dang gotû myo myô èq le saksé hkám
 mù, "Shî agè ashop é amyû mai wó lut htoq lo keq ô!"
 ga luí, yhangmoq lé lhoq pun lhoq kyîng ri. ⁴¹ Dang
 haû lé guq yu é bang gi, wui-myhup hkâm yu bùm
 kôluí, haû nyí má byù sum hkyîng kô jat wàng lo bum
 bekô nghut ri.

Lumjîng Bang Zùm Yap É Hkyô

⁴² Haû bang gi, lagyo pé mhoqshit é hkyô, zùm yap é
 hkyô, muk hpê gam é hkyô †† eq akyû dúng é hkyô má,
 i-myt rahkat za chôm châng nyi akô. ⁴³ Lagyo pé kut
 shit é mauhpo muzó eq limik kumlhá pé myo myô é
 yanmai, lhunglhâng bang gi, gyuq maú nyi bum akô
 nghut ri. ⁴⁴ Lumjîng é lhunglhâng bang gi, rawò má za
 zup zîng to mù, azîng zè banshoq lé chôm chung nyi
 akô. ⁴⁵ Yhangmoq gi, yhumsîng é sutzè pé lé, ûng
 pyám mù, yuq hkangmó lé, yhang râ tô é eq rajung za
 gàm byí akô. ⁴⁶ Yhangmoq gi, nyí wui myit rahkat zâ èq
 noqkuq yhûm wàng má nyi nyi akô. Yhumsîng é yhûm
 pé má le muk hpê gam é hkûn, ⁴⁷ Garai Gasang lé

† 2:34-35 Hkya-on 110:1 †† Muk hpê gam hkyô gâ é lé
 lichyúm í dông wó yu lhê - radông gi, rahá chôm zo chôm shuq é lé
 gâ lhê; radông gi, Poído chôm zô é lé gâ lhê.

hkya-on kungtôn uchyang, gabú é eq myit huí é èq
 chôm zo chôm shuq nyi bum akô; byù banshoq bâng é
 hí má le myoqdong wó bum akô. Haû Yhumsîng gi, nyí
 wui yhangmoq chyáng hkyi yù hui bang jat lò nhang
 ri.

Hkyí Hten Sû Rayuq Lé, Petruq Lhoq Gê Byí É Hkyô

³ Ahkuí, Petruq eq Yohan gi, myinhâng zó sum
 hkyíng lhê é kyûdung nám má, noqkuq yhûm
 shut doq e lô akô. ² Haû hkûn, înú unghkaû mai hkyí
 hten lugù dut é byù rayuq lé, noqkuq yhûm má wang
 lé lô bâng chyáng mai dung zo sháng gaq ga, Yúnglhó
 hkum ga myhîng é hkúmdong má nyí hkang nyí mó
 waq lé lô mù, lé nyhi to to kut akô. ³ Yhang gi, Petruq
 eq Yohan, noqkuq yhûm haû má wang e lô é lé,
 myàng luí, lhom dúng nyi ri. ⁴ Petruq eq Yohan kúm gi,
 yhang lé chôm wú tsuq to mù, "Nga-nhik lé tu wú aq."
 gâ akô. ⁵ Haû mù, yhang, yhangnhik chyáng mai ra-
 jung jung wó yù râ lé myit myoqbyù luí, yhangnhik lé
 rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôl-
 hang, ngò wó é nang lé byi lé: Nazaret wà byù Yesuq
 Hkrisduq é myîng mai toq sô lô aq." ga taí uchyang,
⁷ yhâng é loqyo loq má zui mù lîng toq kat ri; haû
 hkûn jáng, yhâng é hkyí kochang-chap pé wúm bo lò
 bê nghut ri. ⁸ Haû mù, yhang gi, radá dâm toq yap mù
 sô kat luí, so uchyang, byàm uchyang Garai Gasang lé
 hkya-on mù, yhangnhik eq rahá noqkuq yhûm má
 wang lô ri. ⁹ Yhang sô e lô nyi é eq Garai Gasang lé
 hkya-on kungton nyi é lé, lhunglhâng bang chôm
 myang akô. ¹⁰ Haû yuq gi, noqkuq yhum é Yúnglhó
 hkum gâ é hkúmdong má zung to mù, dung zo sù
 nghut é lé yhangmoq matsîng kô é nghut mù luí,
 yhâng chyáng dut lò bê hkyô é yanmai, maú hong
 byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haû dung zo sù byîn
 châng tô é hkûn, shiwa byu pé gi, wú maú uchyang,
 Sholumon jiroq shut, yhangmoq chyáng din yán wang
 lé lo bum akô. ¹² Petruq haû lé myàng jáng, shiwa byu
 pé lé taí é gi, "Israelaq byu pé ê, shí yuq é hkyô lé haí
 mù luí maú nyi akô lhú? Nga-nhik é dingmán hkyô eq
 wum-o a-tsâm èq, shí yuq lé wó so nhang é su ngâm
 luí, ngá-nhik lé wú tsuq bum akô lhú? Haû dông a
 nghut. ¹³ Abraham, Isak eq Yakup pé é Garai Gasang,
 nga-nhûng é îchyí îwa pé é Garai Gasang gi, Yhâng é
 dui-nhâng zoshâng Yesuq lé hpungwup shîngkang
 lhoq htoq byí é nghut ri; nungmoq kúm gi, Yhang lé
 sat hui shoq ga ap pyám kômù luí, Pilat zau hpó mai
 Yhang lé nhang pyám râ ga myit to bê lé, nungmoq gi,
 Yhâng é hí má yhang, Yhang lé he-ngik pyám akô
 nghut ri. ¹⁴ Haû chyoyúng dingmán é Sù lé nungmoq
 he-ngik pyám kômù, byù sat sù lé sheq dúng htoq yù
 kôluí, ¹⁵ Asak Yhumsîng lé gi, sat pyám bekô. Garai
 Gasang kúm gi, haû yuq lé shi é mai lhoq dui toq yù bê
 nghut ri; ngá-nhik gi, haû hkyô é saksé nghut nyi lhê.

¹⁶ Yesuq é myiing lé lumjिंग é yanmai, haû lumjिंग myit mai za, shî nungmoq myang é sê é sũ lé wum-o lhoq pying byi bê nghut ri; nghut bê, Yesuq lé lumjिंग é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuî, gumang wuî ê, nungmoq é uphkâng bang kut é su, nungmoq le haû hkyô lé a sé mù kut pyâm é hkyô lé ngò sê nyi lhê. ¹⁸ Nghut kôlhang, haû hkyô gi, Garaî é Hkrisduq shî-nò jamjau hui râ nghut lhê ga luî, myiqhtoi banshoq bang lé hí hí mai taí nhang tô é Garaî Gasang yhang, lhoq dik é nghut ri. ¹⁹ Hau é yanmai, haû Yhumsing chyáng mâ é nguingón é ahkyíng yàm yoq jé lô râ matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byî é hui râ matú le, nungmoq gi, myit lhing mù Garaî Gasang chyáng lhing lò keq. ²¹ Garaî Gasang gi, a-nham pyat mai, Yhâng é chyoyúng myiqhtoî pê é nhut mai, taí nhang to bê eq rajung za, nyi mi-nyî, joq mijoq lé asik dum saí é pyat jé shoq, Yesuq lé mauhkûng htoq má nyi nhang to râ nghut lhê. ²² Hkâsu mù gâ le, Mosheq taí tô é le, 'Haû Yhumsing Garaî Gasang gi, nungmoq é yhanggu yhangmâng pê chyáng mai, nungmoq é matú ngò sũ é myiqhtoi rayuq pô htoq lô nhang râ nghut lhê; haû yuq taí mitaí nungmoq gyo ra râ nghut lhê. ²³ Myiqhtoi hau é dang lé a gyo sũ ó yuq nghut kôlhang, yhumsing é byù myú mai chyung hpyit pyâm é hui râ nghut lhê.' † gâ ri.

²⁴ Gè gè yhang, Samuelaq mai, yhâng é htâng má châng pô htoq lo é myiqhtoî pé banshoq bang hko kyô lo é má le, buinyi shí pé eq séng mù taí to bekô nghut ri. ²⁵ Nungmoq gi, haû myiqhtoî pê é dang silí wunlí eq, Garaî Gasang mai, Abraham lé, 'Náng é awut ashîn é yanmai, mingkan htoq mâ é byù myú chângjup hkungsô wó kó râ nghut lhê!' †† gâ é eq rajung za, nungmoq é îchyí îwâ pé eq tô tô é danggidiq lé wó hkam yù râ bang nghut akô. ²⁶ Garaî Gasang gi, nungmoq yuq hkangmó lé yhumsing agè ashop é hkyô mai wó lhing taû lò nhang é dông, shimân byi râ matú, Yhâng é dui-nhang zoshâng lé pô htoq lô nhang luî, nungmoq chyáng hí nhang kat byi bê nghut ri." gâ ri.

Petruq Eq Yohan Njik Chyup Huí É Hkyô

4 Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkûn, htoq lé lô kômù, ² yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô. ³ Haû mù, yhangmoq gi, yhangnhik lé chyup yû luî, myihtâng mauchut lô bê nghut é yanmai, htang napkyó jé shoq htóng má lhûng tô akô. ⁴ Nghut kôlhang, mungdang lé wó gyô yu é bang myo myo gi, lumjिंग kômù luî, yuqgè ngo hkyíng kô jé shoq myô jat lò bekô nghut ri.

Yudaq Byin Tú Wapdoq Má, Yhangnhik Lé Myî Jep Wú É Hkyô

⁵ Htang nyî, yhangmoq é zau wuî, suwún wuî eq tarâ sará pé gi, Yerusalem wà mó má chôm huî zup akô.

⁶ Hkyangjong mó Anna, Kayahpaq, Yohan, Alesander pé eq hkyangjong mó é amyû pé banshoq le, haû má bo tô akô. ⁷ Haû mù, yhangmoq gi, Petruq eq Yohan lé gung gûng má nyhi to luî, "Nungnhik gi, haî a-tsam, ó yuq é myiing mai mù shî lé kut akô lhú?" ga myî akô.

⁸ Haû hkûn, Petruq gi, Chyoyúng Woi-nyî byíng tô é nghut mù luî, yhangmoq lé taí é gi, "Mingbyû wuî é za-ugun suwún wuî ê, ⁹ hkyî hten sũ shí yuq lé lhoq gê byî é jeju yanmai, yhang hkâsu kut lhoq ge yù huî é hkyô lé, hkû-nyî nungmoq ngá-nhik lé myî gôn wú naû kô é nghut le gi, ¹⁰ nungmoq lhunglhâng bang eq Israelaq byu pé banshoq lé sé nhâng kôlé, nungmoq èq tapzîng má jén sat pyám mù, Garaî Gasang èq shi é mai lhoq dui toq yu é, Nazaret wà byù Yesuq Hkrisduq é myiing mai, shí yuq gi, nungmoq é hí má îsu wáng wáng zán zán yap tô é nghut ri.

¹¹ 'Yhûm saí bang nungmoq hkyin htoq pyâm é luq-gok gi, htungchyûn mâ é ahkyak dik é luqgok dut bê.' † gâ é gi, Yesuq lé taí é dông nghut ri. ¹² Hkyi yù hkyô gi, Yhang mai lai luî gotû a nyi lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myiing mai lai luî, xângzo byu pé lé byî tô é myiing gotû a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan njik a gyuq a kyum taí é lé myàng kôjáng, yhangnhik, jong a doq wú é, mayû byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sũ njik nghut é lé, yhangmoq bûn kat akô nghut ri. ¹⁴ Hau htoq agó, lhoq gê byî é hui sũ le, yhangnhik eq rahá yap tô é lé, yhangmoq myàng kô é nghut mù luî, taí râ hkyô haî le a joq lo kó nghut ri.

¹⁵ Haû mù, yhangnhik lé, haû Yudaq byin tú wapdoq †† mai lhoq htoq to mù, yhangmoq rayuq eq rayuq hpyê lhum kô é gi, ¹⁶ "Shî njik lé hkâsu kut lé gè râ lhú? Yhangnhik kut shit e laklaí kumlhá gi, Yerusalem wà mó má nyi é lhunglhâng bâng é hí má de za dut bê nghut é yanmai, nga-nhúng haû lé a wó hê lo nghut ri.

¹⁷ Nghut kôlhang, mingbyû wuî má shí hkyô je riyhang a byo myín ló sháng gaq, ahkuî mai myiing haû lé lang mù ó lé le a taí kyo lo râ matú, yhangnhik lé kyuq hkúm pyám sháng." gâ bum akô.

¹⁸ Haû mù, yhangnhik lé dum wut hâng yù luî, Yesuq é myiing lé lang mù, haî le hkâtaí, hkâ-mhoqshit kó ga chôm hkûm akô. ¹⁹ Petruq eq Yohan kúm gi, "Garaî Gasang é mungdang lé gyo râ htoq má, nungmoq é dang gyo le gi, Garaî Gasang é hí má gè râ, a gè râ lé, nungmoq yhang doqdân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a taí é, a wó nyî nghut lhê." ga luî, yhangmoq lé dum tû taí akô.

²¹ Haû hkûn, yhangmoq gi, dut laí lò bê hkyo é yanmai, shiwa byu pé Garaî Gasang lé hkyo-on kungton

† 3:23 Tarâ Pun 18:15, 18-19 †† 3:25 Apûn 22:18; 26:4

‡ 4:11 Hkyo-on 118:22 †† Yudaq byin tú wapdoq lé Grik dông gi, San-hedrin gâ lhê.

nyi bùm kôluî, yhangnhik lé dàm byi râ hkyô a myàng kó ê nghut mù luî, yhangnhik lé dum tân kyuq luî nhang pyám bekô nghut ri. ²² Hkâsu mù gâ le, haû lak-laí kumlhá đông lhoq gê byi huî é sũ gi, asak myi xê zàn chyân bê sũ nghut é yanmai nghut ri.

Lumjǐng Bāng É Kyûdung Dang

²³ Yhangnhik gi, nhang kat pyâm é hui kôjǎng, yhangnhik é luzúm wui chyáng taû lô kômù, hkyangjong agyi pé eq suwún wui èq yhangnhik lé hkyîm é dang banshoq lé, lô taî kyo akô nghut ri. ²⁴ Haû hkyô lé wó gyo kôjǎng, yhangmoq gi, myit rahkat zâ èq yhumsing é htê lhoq ko mù, Garai Gasang lé kyûdung kô é gi, "Mauhkûng eq myigùng, wuîshuq lung-aû eq, haû pé má, nyi mi-nyi lé hpan tô é, ahko ahkáng lhungháng wó é Yhumsing ê, ²⁵ Náng, náng é dui-nhâng zoshâng, ngamoq é îchyî iké Dawiq é nhut mai, Chyoiyúng Woi-nyí èq taî tô é gi, 'Haî mù luî, tûngbaû amyû pé gi, nhikjum yô akô? haî mù luî, byu pé gi, akôm dâ pyám akô lhú?' ²⁶ Haû Yhumsing eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wuî eq rahá zup zǐng bum akô.[†] gâ ri. ²⁷ Gè gè yhang, Herut eq Pontu Pilat nhik gi, tûngbaû pé eq Israelaq byu pé le mù, wà mó shî má chôm zǐng to kôluî, náng xû but byi é sũ, ^{††} náng é Chyoiyúng dui-nhâng zoshâng Yesuq lé gumlau toq râ dâ nyi akô. ²⁸ Náng é wum-o a-tsam eq nàng ô nau é đông dut râ matú, hí hkûn mai nàng myit hpyit do-qdân tô é hkyô lé, yhangmoq gi, kut pyám bekô nghut ri. ²⁹ Yhumsing ê, ahkuî yhangmoq taî kyuq nyi é dang lé myàng byi laq ô! Náng é dui-nhâng zoshâng wuî, a gyuq a kyum é myit èq náng é dang lé taî râ matú wum-o byi laq! ³⁰ Náng é wum-o bo é loq lhâm kat luî, nolì nojàng lé lhoq gê byi mù, náng é Chyoiyúng dui-nhâng zoshâng Yesuq é myìng mai, limik kumlhá eq mauhpo muzó pé lé kut shit laq ô!" gâ akô. ³¹ Haû su, kyû ban dung kôjǎng, yhangmoq zǐng tô é jowò gi, dui nún lô mù, yhangmoq lhunghâng bang gi, Chyoiyúng Woi-nyí byíng lô luî, Garai Gasang é mungdang lé a gyuq a kyum é za taî bùm bekô nghut ri.

Azǐng Zê Lé Chôm Gam Chûng Kô É Hkyô

³² Haû lumjǐng é lhunghâng bang gi, i-myt rahkat za nghut nyi akô; ó yuq le, yhumsing wó é zè lé ngá é a gâ é za, banshoq eq chôm gam chung nyi akô. ³³ Lagyo pé le, haû Yhumsing Yesuq dum dui toq é hkyô lé a-tsam mó èq saksé hkâm nyi kô é nghut mù luî, yhangmoq banshoq bāng é ahtoq má jeju myo myo joq nyi ri. ³⁴ Yhangmoq chyáng a wó a lom é byu rayuq le a nyi kó. Hkâsu mù gâ le, maumyí ratóng wó é, a nghut jǎng, yhûm wó é bang ó yuq nghut kôlhāng, haû pé lé adām dām ùng pyám luî wó yu é ngùn le gi, ³⁵ lagyo pé é hkyî wang má lé to byî akô. Haû mù

† 4:26 Hkya-on 2:1-2 †† Xû but é hkyô gi, Yudaq byu pé htûng đông xû but byi jǎng, rajung jung kut râ matú hkyin masat yu é hkyô nghut lhê. Xû but byi é sũ gi, Grik đông Mesaia gâ é nghut lhê.

luî, a wó a lòm sũ ó yuq lé le ra tô é eq rajung za gàm byî akô nghut ri.

³⁶ Haû hkûn, Barnaba ga luî lagyo pé èq myhíng byi é, Kupru ming mâ é Lewiq byû Yosep le, yhang wó é maumyí ratóng lé ung luî, wó yu é ngùn lé lagyo pé é hkyî wang má, lé to byî ri. ³⁷ Barnaba gâ é dang lichyúm gi, myit wum byî su é yhangzo gâ é lichyúm nghut lhê.

Anani Eq Sahpira Nhk É Hkyô

5 Nghut kôlhāng, Anani ga sũ gi, yhangmyi Sahpira eq rahá, yháng nhâm wó é maumyí ratóng lé ùng pyám luî, ² yhangmyi le bo sê é đông, ngùn haû ra-am lé gi, haq myhit yu to mù, ra-am lé za lagyo pé é hkyî wang má lé to byî akô.

³ Haû mù luî, Petruq gi, "Anani ê, Chyoiyúng Woi-nyí lé mhaû pyám râ matú eq, maumyí hpau mâ é ra-am lé haq yu to râ matú, haî mù luî, náng é myit má Tsadán le byíng nhang tô lhê lhú? ⁴ Maumyí haû joq tô le, náng é zè nghut lhê a nghut lhú? Wó ung é ngùn le náng é zè nghut ashî, a nghut lhú? Haî mù luî, nàng haû đông dâ lhê lhú? Byû lé mhaû é a nghut, Garai Gasang lé mhaû pyám bê nghut ri." ga taî ri.

⁵ Anani gi, dang haû lé wó gyo jǎng, lêng mù, shi byuq bê nghut ri. Haû hkyô lé wó gyô é bang banshoq le, gyai yhang gyuq bùm bekô nghut ri. ⁶ Haû hkûn, zorâm wuî gi, toq mù, yhâng é mǎng lé htup luî, ê waq myhup pyâm akô. ⁷ Hau htâng, sum hkyíng kô myáng jǎng, yhangmyi le, wang lé lo ri. Haû su dut é hkyô lé gi, yhang a sé nghut ri.

⁸ Haû hkûn, Petruq gi, "Ngo lé taî kyô wú aq. Nungnhik ùng é maumyí hpau gi, shí gû za nghut lhê lhú?" ga myi jǎng, yhang gi, "Nghut lhê, haû gû za nghut bê." ga tû taî ri.

⁹ Petruq gi, "Nungnhik gi, haû Yhumsing é Woi-nyí lé îsu kut chyam wú râ matú, hkâsu mù chôm myit huî akô lhú? Wú aq, náng é yhumsing hpó lé ê myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lhê." ga taî ri.

¹⁰ Radá dām, yhang le lagyo hpó é hkyî wang má lêng shi byuq bê. Zorâm wuî le wang lo wú le, myiwe haû shi to lǎng é lé myàng kôluî, waq ê mù, yhanglang é nām má, ê myhup pyám bekô. ¹¹ Hau é yanmai, haû hkun lhê é hpúng byû banshoq bang eq, haû su dut ê hkyô lé wó gyo má wó gyô é bang gi, gyai yhang gyuq bùm bekô nghut ri.

Byû Myo Myo Lé, Lagyo Pé Lhoq Gê Byî É Hkyô

¹² Ahkuî, lagyo pé gi, mingbyû wui é hí má limik kumlhá eq mauhpo muzó myo myo lé, kut shit nyi akô. Haû lumjǐng bang gi, i-myt rahkat zâ èq, Sholumon jirop má chôm hui hui kut bum akô. ¹³ Shiwa byu pé gi, yhangmoq lé hkunggâ nyi bùm kôlhāng, yhangmoq lé a wám ê zum bùm kó. ¹⁴ Nghut kôlhāng, haû Yhumsing lé lumjǐng é myiwe yuqgè wuî gi, myo sheq myô jat lò kômù, yhangmoq chyáng je myô jat lò bê nghut ri. ¹⁵ Haû mù luî, byu pé gi, Petruq laî lo é hkûn, yhâng

é wupzo za lhang rayuq yuq é ahtoq má zang sháng gaq ga, nõhpyo huí é bang lé, wà mà é hkyô yàm má waq htoq ê mù, yhuphpú pé eq taphkang pé má lhez tō akō. ¹⁶ Hau htoq agó, Yerusalem awui ayàm mà é wà pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akō; haú bang lhungháng gi, lhoq gē lhoq yō byí é huí bum akō nghut ri.

Lagyô Pé Zing-ri Huí É Hkyô

¹⁷ Hkyangjong mó eq yhang é luzúm wuî, Saduke hpúng mà é byu pé kúm gi, gyai yhang wú manon bùm kōluí, toq mù, ¹⁸ lagyô pé lé chyup yú luí, wà mà é htóng má lhung tō akō. ¹⁹ Nghut kōlhang, haú myín lé, Yhumsing é maumang lagyo rayuq gi, htóng hkum pé lé hpông pyám mù, yhangmoq lé shuí htoq yú uchyang, ²⁰ "Nungmoq htoq ló mù, noqkuq yhùm má ê yap to luí, dui é asak hkyô sik eq sêng é danglù ban-shoq, shiwa byu pé lé taí kyo keq." ga taí ri.

²¹ Napsùn myoqmyàng zó lé, yhangmoq gi, noqkuq yhùm má wàng mù yhangmoq wó gyô yu é eq rajung za, shiwa byu pé lé, mhoqshit hi ló akō.

Haú u lé, hkyangjong mó eq yhang é luzúm wuî gi, Israellaq byu pé é suwún wuî lhunghâng bang lé ji yú mù, Yudaq byìn tú wapdoq chòm zung yú luí, lagyô pé lé é shuí yú rà matú htóng shut byù nhang kat akō.

²² Haú bang kúm gi, htong má jé é hkùn, lagyô pé lé a myàng kōjáng, dum taú lò mù lo taí kyo kō é gi,

²³ "Htóng hkum le ging ging myhî to lánq ri, htóng zúng bang le hkum yâm má yap tō akō. Nghut kōlhang, hpông wú le, ahkaú má ó le a nyi to lo nghut ri." gâ ri. ²⁴ Noqkuq yhùm zúng é zau hpó eq hkyangjong agyí wuî gi, dang haú lé wó gyo kōjáng, "Shí hkyô haí dut lò rà lhú?" ga, gyai gyuq maú bum akō.

²⁵ Haú hkùn, byù rayuq wang lé lò mù, "Wú keq, nungmoq eq htóng má lhung tō é bang gi, noqkuq yhùm má yap to mù byu pé lé mhoqshit nyi bum akō." ga luí, yhangmoq lé taí kyô ri. ²⁶ Haú mù luí, zau hpó haú gi, yhang é a-ô mà é bang eq ê mù, lagyô pé lé é shuí yu akō. Nghut kōlhang, shiwa byu pé luqgok eq dú lò kó rà lé gyuq kō é yanmai, htân htân a wám kut kó nghut ri.

²⁷ Lagyô pé lé shuí jé lò kōjáng, Yudaq byìn tú wapdoq hí má yhangmoq lé nyhi tō akō. Haú hkùn, hkyangjong mó gi, ²⁸ "Yesuq é mying lé lang luí a mhoqshit rà matú, nungmoq lé, htan é hkunmó hkyô to bê nghut lhê. Nghut kōle, nungmoq mhoqshit é hkyô gi, Yerusalem wà mó jâm shoq, nungmoq kut bekô nghut luí, Yesuq é sui lé, ngamoq é ahtoq má ke byi rà dâ nyi akō." ga luí, yhangmoq lé taí akō.

²⁹ Haú hkùn, Petruq eq gotú lagyô pé tú taí kō é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo rà dut lhê. ³⁰ Nga-nhung é íchyí íwâ pé é Garai Gasang gi, nungmoq eq tapzing má lhang sat pyâm é Yesuq lé, shi e mai lhoq dui toq kat bê nghut ri. ³¹ Israellaq amyû lé, myit lhing hkyô eq mara hkyut byi hkyô hpóng byi rà matú, up é ahkáng wó Sû eq hkyí yú Sû kut nhang rà ga, Garai Gasang gi,

Yhang lé, Yhang é loqyo loq † má waq toq to bê nghut ri. ³² Ngamoq le shí hkyô é saksé pé nghut nyi lhê; mungdang lé gyô yú luí châng é bang lé Garai Gasang byí tō é Chyoiyúng Woi-nyí le, shí pé é saksé nghut lhê." ga akō.

Gamalelaq Hpaqchyí Byí É Hkyô

³³ Yhangmoq gi, dang haú lé wó gyo kōjáng, lùm gyo nhik-yo naú kômù, lagyô pé lé sat pyám rà lhang myit akō. ³⁴ Nghut kōlhang, mingbyù banshoq bâng é hí má aróng wó é tarâ sará Gamalelaq gâ é Hparishe rayuq, haú Yudaq byìn tú wapdoq má toq yap mù, lagyô pé lé razup zo lhoq htoq to nhang luí, ³⁵ yhang taí é gi, "Israellaq byu pé ê, shí bang lé hkâsu kut rà hkyô, rago za hí myit wú keq. ³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhanggùng yhang byù mó rayuq yuq nghut lhê ga taí jáng, byù myi shô kô yhang chyáng châng wú bekô. Yhang sat pyâm é hui luí, yhang htâng châng é lhunghâng bang le byo myín byuq kômù, haí le a wó kut dut byuq akō nghut ri.

³⁷ Hau htâng, mying jihpán guq yu é buinyi má, Yudaq gâ é Galile byù rayuq pô htoq mù, mingbyù wuî lé yhang hkyam shut mhoq hpyoq yu ri. Yhang le sat pyâm é hui mù, yhang htâng châng é lhunghâng bang le, byo myín byuq bekô nghut ri. ³⁸ Ahkuí le, shí bang lé haí le hkâgon ko, yhangmoq kâm é dông nghut nyi kó sháng gaq; yhangmoq kut nyi é hkyô eq dâ nyi é hkyô pé gi, byù myit dông kut é nghut jáng, htên byoq byuq rà za nghut lhê. ³⁹ Nghut kōlhang, Garai Gasâng chyáng mà é nghut le gi, nungmoq wó lhoq hkyíng pyám kó rà a nghut. Garai Gasâng é gyè sheq dut lò kó rà nghut lhê." gâ ri.

⁴⁰ Dang haú lé yhangmoq gyô htuk bum akō. Haú mù, lagyô pé lé wut yú mù luí, nhuq bat yú kômù, Yesuq é mying lé lang luí mhoqshit é hkyô a ge kut rà nghut lhê ga taí kômù, nhang pyâm akō nghut ri.

⁴¹ Lagyô pé kúm gi, Yesuq é mying é yanmai ru hpuzô é hkyô gi, gingdán nyi ri, ga myit yú kômù, Yudaq byìn tú wapdoq haú mai gabú myit eq htoq ló bekô. ⁴² Hau htâng, yhangmoq gi, nyí wuî làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akō nghut ri.

Garúm Râ Byù Nyhit Yuq Lé Hkyin Yu É Hkyô

6 Ahkuí, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhî pé lé, nyí wuî lhê é gàm tso gàm huq é hkyô má rago a wó kut kō é yanmai, Hebre mying mu é Yudaq byu pé lé mara hùn dang taí bum akō. ² Haú hkùn, lagyo raxe í yuq gi, chángzô pé lhunghâng bang lé wut yú mù, "Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amú lé za lajang nyi é nghut le gi, a htuk rà nghut lhê. ³ Haú mù luí, gumang wuî ê, Chyoiyúng Woi-nyí byíng é eq

† Garai é loqyo loq gâ é gi, hpautap hkungga gíng é jowò lé taí nau é nghut lhê.

hpaqchyí byéng-yá bo é nhik bo byù nyhit yuq lé nungmoq chyáng má é hkyin to keq. Haú bang lé muzó shí lhum hun to râ nghut lhê. ⁴ Ngamoq kúm gi, kyûdung é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

⁵ Dang haú lé shiwa byù lhunglhâng bang gyô htuk kômù luí, lumjínng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htúng má lhing wang lò bê sù Antioku wà mó má é Nikolaq pé lé hkyin yù mù, ⁶ lagyô pé chyáng shuí lò akô; lagyô pé gi, kyûdung byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haú lumjínng hkyô má châng nyi bum akô.

Stehpan Chyup Yû Huí É Hkyô

⁸ Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tân shit ri. ⁹ Haú hkûn, luthkyô ga bâng é tarajong eq sêng é Kuruni, Alesander eq Kiliki, Asia mau má é bang ra-am gi, toq mù, Stehpan eq dang chyin chyin lhûm akô.

¹⁰ Nghut kôlhâng, Stehpan é dang gi, Chyoiyúng Woi-nyí lom é hpaqchyí dang nghut é yanmai, yhangmoq a úng kó nghut ri.

¹¹ Haú mù, yhangmoq gi, "Shí yuq, Mosheq eq Garai Gasang lé rhoí dang taí nyi é lé, ngamoq wó gyô ri." ga luí, mhaú taí nhâng râ byù haq lung tô akô.

¹² Haú mù, yhangmoq gi, mingbyù wui eq nhik bô suwún wui, tarâ sará pé lé, chun htau mù, Stehpan lé chyup yû nhâng luí, Yudaq byin tú wapdoq má shuí nyi hi tô akô. ¹³ Mhaú é saksé byu pé lé le lhoq hâng kat luí, haú bang gi, "Shí yuq, shí chyoiyúng jowò † eq jep é tarâ lé shut shai é dang ru taí nyi ri. ¹⁴ Nazaret wà byù Yesuq ga sù gi, jowò shí lé hpyoq pyám mù, nga-nhúng lé Mosheq èq byí tô é htungking lé htaí pyám râ nghut lhê ga luí, yhang taí é dang lé ngamoq wó gyô é nghut lhê." ga taí akô.

¹⁵ Haú Yudaq byin tú wapdoq má zung to bang ban-shoq, yhang lé chôm wú tsuq nyí kô é hkûn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

Stehpan Taí É Dang

7 Haú hkûn, hkyangjong mó gi, "Dang haú pé têng lhê lhú?" ga luí, yhang lé myí jáng,

² Stehpan tú taí é gi, "Gumang wui eq îwa wui é, gyô wú keq, nga-nhúng lhunglhâng bâng é îchyí Abraham gi, Haran wà má a ló nyí shi lé, Mesopotamiaq mau má nyi tô ashí hkûn, hpungwup shing kang bo é Garai Gasang gi, yhâng chyáng lé htoq shit mù, ³ 'Náng é ming eq náng é amyû mai htoq ló luí, ngò tân shit râ ming shut e ló aq.' †† ga luí, yhang lé taí ri.

† Shí chyoiyúng jowò gi, Yerusalem noqkuq yhûm lé gâ lhê.

†† 7:3 Apûn 12:1

⁴ Haú mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htót lô nhâng bê nghut ri.

⁵ Garai Gasang gi, shí ming má yhang lé silí wunlí nghû râ, hkyí rahkô nang î é myigùng lháng a byí é nghut kôlhâng, yhang, zodù lháng a wò shi mai, yhang lé le, yhâng é awut ashín pé lé le, maumyí shí byi râ ga danggidiq byí to bê nghut ri. ⁶ Hau htoq agó, shí hkyô lé Garai Gasang xoq taí é gi, 'Náng é awut ashín pé, tûngbaù ming má bíng nyí mù, haú ming bâng èq myi shô zàn jùn zô é eq zing-rí é lé hui kó râ. ⁷ Nghut kôlhâng, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haú hkûn, yhangmoq gi, haú ming mai htoq ló mù, jowò shí má ngo lé noqkuq kó râ nghut lhê.' * ga le, Garai Gasang taí ri. ⁸ Hau htâng, yhang lé ahpyo-kuq hpyit byi râ hkyô eq sêng é dang-shikaq le, byí ri. Haú mù, Abraham gi, Isak lé hku é htâng shit nyí buinyí má ahpyo-kuq hpyit byí ri; Isak gi, Yakup lé hkû mù, Yakup gi, îchyí îwa achyûng raxe í yuq lé hku kat bê nghut ri.

⁹ Haú îchyí îwâ pé gi, Yosep lé manôn kôluí, Egotuq ming shut jùn dông úng kat akô. Nghut kôlhâng, Garai Gasang gi, yhang eq rahá nghut nyi mù luí, ¹⁰ wuîhke jamjau banshoq mai yhang lé lhoq lhut yù mù, Egotuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haú gi, Egotuq ming eq, yhâng é hkohkâm-wâng ban-shoq lé up nhang ri.

¹¹ Haú u lé, Egotuq ming eq Hkanan ming banshoq má mutmó gyô lò mù, wuîhke jamjau mó hui bekô. Nga-nhúng é îchyí îwâ pé le zoshuq a myang hô zo lo dut byuq bekô nghut ri. ¹² Ahkuí, Yakup gi, Egotuq ming má guqzo joq é hkyô lé wó gyo jáng, nga-nhúng é îchyí îwâ pé lé sâng-hí dâm ê nhang ri. ¹³ Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê nghut ri. ¹⁴ Hau htâng, Yosep gi, yhâng wa Yakup eq yhumbyù ban-shoq nyhit xe ngo yuq lé, yhâng chyáng pying yù bê nghut ri. ¹⁵ Yakup le Egotuq ming má jé gyó ló luí, yhang eq nga-nhúng é îchyí îwâ pé gi, banshoq haú ming má shí ló byuq bekô nghut ri. ¹⁶ Yhangmoq é mâng lé gi, Shehkem wà má yu taú ló mù, Shehkem wà má é Hamora é yhangzo yhangshu pé chyáng mai, Abraham èq ngùn byi mù wui hpyit tô é lupdùng má ló myhup tô akô nghut ri.

¹⁷ Abraham lé Garai Gasang byí tô é danggidiq dik râ ahkýing jé lo nyi é u lé, ¹⁸ nga-nhúng é amyû gi, Egotuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri.

¹⁹ Hkohkâm hpó haú gi, nga-nhúng é amyû htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é dông mai nga-nhúng é îchyí îwâ pé lé zing-ri bê nghut lhê.

²⁰ Haú u má, Mosheq lé hkû to bê. Yhang gi, Garai Gasâng é hí má gyai yúnglhô é sù nghut ri; yhang gi,

‡ 7:7 Apûn 15:13-14

yhângwâ é yhûm má lhamó sum hkyap baú tô é hui mù, ²¹ htot tô tô é hui jáng, yhang lé Hpara-uy é byizô èq xe yù mù, zosing kut yù luí, hku kô ri. ²² Mosheq gi, Egutuq ming má é hpaqchyí byéng-yá banshoq lé mhoy yù luí, nhut shô a-tsam eq hkyí loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é gumang Israelaq byu pé chyáng ê kûm wú rã matú wó myit htoq kat ri. ²⁴ Ê jé jáng, zing-ri hui nyi é sù rayuq lé è myâng luí, haú yuq lé búng mù, zing-rí nyi é Egutuq byù lé, loqchoq hpuq é đông sat pyâm ri. ²⁵ Mosheq gi, yhâng é byu pé lé yhâng é loq đông Garai Gasang hkyi yù hkyô byi nyi é lé, yhâng é amyû pé sê gyo byi nhô ngàm kôlhang, yhangmoq a sê gyo byi kó nghut ri.

²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyîn naù luí, 'Ahkaù nhik ê, gumang yhangchang sheq ru nghut lhê nhing, haù mù rayuq eq rayuq byoq lhum nyi akô lhú?' ga taí ngón wú ri.

²⁷ Luzúm hpó lé zing-rí nyi sù yuq gi, 'Ngamoq é ahtoq má zau eq tarâ agyí kut rã matú, nàng lé ó yuq hkyin tô é lhú?' ²⁸ A-nyí nap Egutuq byù lé sat pyâm é su, ngo lé le sat pyâm nau ri lhú?' † ga luí, tũ taí uchyang yhang lé dún chyún pyâm ri. ²⁹ Mosheq gi, dang hau é yanmai, hpâng luí Midian ming má é nyi byuq ri. Haù má yuqzô í yuq ê wó ri.

³⁰ Haù ming má myi xê zàn lai jáng, Sinaq Bùm yàm, yoso hkaù má é myi gyúng tô é mhanpúng mai, mau-mang lagyo rayuq gi, Mosheq lé htoq shit ri. ³¹ Mosheq gi, haù lé myàng jáng, hau é yanmai maú luí, wú wú rã ga huí e ló le, Yhumsing é htê htoq lo é gi, ³² 'Ngò gi, náng îchyí îwâ pé é Garai Gasang, Abraham, Isak, Yakup é Garai Gasang nghut nyi lhê.' †† gâ ri. Mosheq kúm gi, gyuq nán luí, a wám tu wú nghut ri.

³³ Haù Yhumsing gi, 'Náng é hkyi-tsung hkyut pyâm aq, nàng yap tô é jowò gi, chyoiyúng é myigùng nghut lhê. ³⁴ Egutuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù rã matú ngò gyó lé é nghut lhê; ahkuí, lé aq, ngò, nang lé Egutuq ming shut nhang taù kat rã.' †‡ ga luí, yhang lé dum taí ri.

³⁵ Yhangmoq èq, 'Nang lé zau eq tarâ agyí kut rã matú, ó yuq hkyin tô é lhú?' ga luí he-ngik pyâm é Mosheq lé yhang, mhanpúng má htoq shit é mau-mang lagyo đông mai, Garai Gasang gi, yhangmoq é zau eq hkyi yù sù kut nhâng luí, taù nhang kat é nghut ri. ³⁶ Haù Mosheq yhang, Egutuq ming má le, Nhong Nè má le, yoso hkaù pé má le, myi xê zàn gyoro má mauhpo muzó pé eq limik kumlhá pé tũn shit uchyang, yhâng é byù myû pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pò htoq lô nhâng rã nghut lhê.' †† ga luí, taí tô é sù le Mosheq yhang nghut ri. ³⁸ Yoso hkaù má

nghut nyi ashî hkûn lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhông é îchyí îwâ pé eq le rahá nghut sù gi, yhang yhang nghut nyi ri; nga-nhông lé ap byi rã asak dui é mungdang lé lom yu é sù le, yhang nghut nyi ri.

³⁹ Nghut kôlhang, nga-nhông é îchyí îwâ pé kúm gi, yhâng é dang lé a kâm gyo kômù, yhang lé he pyâm luí, Egutuq ming shut taù nau é myit bo bum akô.

⁴⁰ Haù mù, Arun lé, 'Egutuq ming mai nga-nhông lé shuí htoq lo é Mosheq gi, haí dut byuq bê hkyô lé, ng-amoq a sé lo; haù mù, nga-nhông hí má so byi rã hpara lhô pé saí byi aq.' †† ga taí akô. ⁴¹ Haù buinyi pé má, yhangmoq gi, nojùng zo lhô saí mù, alhò haù lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô. ⁴² Haù mù luí, myiqhtoi pé é laiká má kã tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byí é nghut akô lhú?

⁴³ Nungmoq gi, nungmoq noq rã matú saí yu é alhò, Molak é zúm eq Rehpan hpara é kyí lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyâm rã nghut lhê.' ††† ga luí, bo tô é eq rajung za, Garai Gasang gi, yhangmoq chyáng mai myoqdong lhing pyâm mù, mauhkûng htoq mã é bui, kyí, lhamó pé lé noqkuq rã matú ap pyâm bê nghut ri.

⁴⁴ Mosheq lé, nàng myang é azòng eq rajung za saí aq ga, Garai Gasang taí é đông saí tô é saksé zúm lé, haù yoso má nga-nhông é îchyí îwâ pé wó yù bekô nghut ri. ⁴⁵ Haù mù, nga-nhông é îchyí îwâ pé gi, yhangmoq é myoq hí mai Garai Gasang èq hkat htoq pyâm byí é byù myû pé é mau má, Yoshuq eq rahá wang nyi ló kô é hkûn, saksé zúm haù lé yu wang ló akô. Haù gi, Dawiq é pyat jé shoq joq to bê nghut ri. ⁴⁶ Dawiq kúm gi, Garai Gasang hí má myoqdong wó sù nghut mù luí, Yakup é Garai Gasang matú nyi jowò saí rã ahkáng dung kôlhang, ⁴⁷ Sholumon èq sheq saí bê nghut ri.

⁴⁸ Nghut kôlhang, Myhang htáng htum Sù gi, byu é loq èq za saí é yhûm má nyi é a nghut, haù hkyô eq séng luí myiqhtoi wá taí tô é gi,

⁴⁹ 'Mauhkûng gi, ngá é zùng tanghkuq, myigùng gi, ngá é hkyi nang jang nghut nyi lhê;

ngá é matú hkasû é yhûm saí byi shi kó rã lhú? Ngò nô yù rã jang gi, hkâmá nghut kó rã lhú?

⁵⁰ Haù banshoq lé ngá é loq èq baú saí tô é a nghut kó lhú? ga luí, haù Yhumsing taí ri.' ††† gâ ri.

⁵¹ I-myt htân mù, i-myt eq nohkyap má ahyo-kuq a hpyit é bang § ê, nungmoq gi, nungmoq é îchyí îwâ pé su, Chyoiyúng Woi-nyí lé hkâ-nhám le lhom he-ngik pyâm nyi akô; ⁵² Nungmoq é îchyí îwâ pé èq a zing-rí wú é myiqhtoi, ó yuq wá nyi lhê lhú? Haù Dingmán Sù

† 7:28 Htoq Ló 2:14 †† 7:32 Htoq Ló 3:6 ‡ 7:34 Htoq Ló 3:5, 7-8, 10 †† 7:37 Tarâ Pun 18:15

†† 7:40 Htoq Ló 32:1 ††† 7:43 Amo 5:25-27 ††† 7:50 Esai 66:1-2 § I-myt eq nohkyap má ahyo-kuq a hpyit é bang gâ é gi, Garaí dang lé a lùm a châng é bang lé gâ lhê.

pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuî, nungmoq le, haû Dingmán Sû lé ap pyâm é bang eq sat pyâm é bang nghut nyi akô. ⁵³ Maumang lagyo èq shit kyo byî é tarâ lé nungmoq wó yû kôlhang, haû lé a cháng kó nghut ri." gâ ri.

Stehpan Lé Luqqok Èq Dú Sat É Hkyô

⁵⁴ Haû hkyô lé yhangmoq wó gyo kôjáng, yhangmoq é nhikhum má lûm htaû záng kô é yanmai, Stehpan lé, zuì wang ngat kyáng shoq wú nhik-yô nyi akô. ⁵⁵ Stehpan kúm gi, Chyoiyúng Woi-nyí byíng mù, mauhkûng shut tu wú kat le, Garai Gasâng é hpungwup shing kang lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haû mù, yhang gi, "Wú keq, mauhkûng hpông tô é lé le, Garai Gasâng é loqyo hkyam shut haû Byu Yhangzo yap tô é lé le, ngò myàng ri." ga taí kat ri.

⁵⁷ Haû hkûn, yhangmoq gi, htê mó o mó garu uchyang, yhumsing é nohkyap xaû pyám mù, radá dâm yhang lé chôm htim kômù, ⁵⁸ yhang lé wà mai she htoq ló kôluî, luqqok èq chôm dú ló bekô nghut ri; sak-sé kut é bang gi, Sholuq gâ é zoram é hkyî wang má yhangmoq é buhîng pé lé hkyut bum tô akô.

⁵⁹ Luqqok èq dú nyi bùm kô é u lé, Stehpan gi, "Yhumsîng Yesuq ê, ngá é woi-nyí lé hap yù laq." ga kyûdung ri. ⁶⁰ Hau htâng, yhang gi, hkyihput htuq mù, "Yhumsîng ê, yhangmoq kut é mara haû lé hkyut pyám byi laq." ga luî, htê mó èq wut dúng ri; haû ban taí jáng, yhang kâng byit byuq bê nghut ri.

Hpúng Byû Lé Sholuq Zing-rî É Hkyô

8 Sholuq gi, haû má nyi to mù, Stehpan lé sat pyâm é muzó má myit bo huî ri.

Haû nyí mai, Yerusalem wà mó mâ é noqkuq hpúng gi, zing-ri mó huî lo é nghut mù luî, lagyo pé mai lai luî, lumjîng bang lhunglháng gi, Yuda mau eq Samariq mau jowò hkan gmó má byo myín ló bekô. ² Nghut kôlhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huî nyi akô nghut ri. ³ Sholuq kúm gi, rayhum htâng rayhûm wàng mù, myiwe yuqgè lé she hkyut htoq yû luî, htóng má lhúng tô é dông mai, noqkuq hpúng haû lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkan gmó má mungdang lé hkô kyô ló akô. ⁵ Haû hkûn, Hpilip gi, Samariq mau mâ é myuq ra-myûq shut e ló mù, Hkrisduq é hkyô lé hkô kyô ri. ⁶ Byû ajùm ayò gi, Hpilip taí kyô é hkyô lé wó gyô é eq, yhang tûn shit é limik kumlhá lé myàng kôjáng, i-myit rahkat za eq yhâng é dang chôm gyô nyi bum akô. ⁷ Nat wang júng é byû myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyî htên é bang myo myo le, ge ló byuq bum akô.

⁸ Haû mù luî, haû myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byû rayuq gi, hí lé haû myuq má myoqheq hpaqchyí kut shit mù, Samariq byu pé lé lhoq maú luî, yhâng gùng lé yhang, laklaí sù nghut lhê gâ ri. ¹⁰ Byû tiq ko banshoq le, "Byû shí yuq gi, 'haû a-tsam mó' gâ é, Garaî chyáng mai hpungwup a-tsam wó yû sù nghut ri." ga luî, yhâng é dang lé gyô bum akô.

¹¹ Haû yuq gi, myáng myáng yhâng é myoqheq hpaqchyí èq yhangmoq lé lhoq maú lo é yanmai, yhâng dang lé chôm lum bum akô. ¹² Nghut kôlhang, Hpilip hko kyô é Garaî Gasâng é mingdán hkyô eq, Yesuq Hkrisduq é myìng eq sêng é gabú danglù hkyô lé, lumjîng kôjáng, myiwe yuqgè wui-myhup hkâm yu bum akô. ¹³ Simun yhang yhang le lumjîng mù luî, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

¹⁴ Garaî Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyo pé wó gyô bùm kôjáng, yhangmoq gi, Petruq eq Yohan nhik lé haû má nhang kat akô. ¹⁵ Yhangnhik gi, lé jé jáng, byû haû bang Chyoiyúng Woi-nyí wó yû râ matú kyûdung byî akô. ¹⁶ Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsîng Yesuq é myìng mai wui-myhup hkâm yu é za ru nghut bùm ashî. ¹⁷ Haû mù luî, lagyo nhik yhangmoq é ahtoq má loq ke byi jáng, yhangmoq gi, haû Chyoiyúng Woi-nyí lé wó hkâm yù bekô nghut ri.

¹⁸ Lagyo nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù, ¹⁹ "Hká yuq é ahtoq má nghut kôlhang, ngò loq ke byi jáng, haû yuq gi, Chyoiyúng Woi-nyí wó yû râ matú, haû su é a-tsam ngo lé le byi kó laq." ga dung ri.

²⁰ Petruq kúm gi, "Garaî Gasâng é chyunghuq lé ngun èq wó wui yù râ nghut lhê ga luî, myit é yanmai, náng é ngùn gi, nàng eq rahá htên byoq byuq sháng gaq. ²¹ Nàng gi, Garaî Gasâng é hí má myit a dîng sù nghut é yanmai, shí hkyô má nàng wó bo lhóm râ a nghut. ²² Haû mù luî, shî agè ashop é hkyô mai myit lhîng mù, Yhumsîng Garaî chyáng dúng tóngbán aq. Haû hkûn, náng é unghkaû má myit pyâm é hkyô lé, mara hkyut pyám byi abe. ²³ Nàng gi, ladu lai shoq nhikhko zo mù, yubak marâ èq tuí zing to huî é lé, ngò myàng ri." ga yhang lé taí ri.

²⁴ Haû hkûn, Simun gi, "Nungnhik taí é hkyô haî le ngá chyáng a jé sháng gaq, ngá é matú haû Yhumsing chyáng kyûdung byi kó laq." ga tû taí ri.

²⁵ Yhangnhik kúm gi, haû Yhumsing é mungdang lé saksé hkâm mù ban hko kyo jáng, Samariq byu pé é wà myo myo má, haû gabú danglù lé hko kyo uchyang, Yerusalem wà mó shut dum taû lò bekô nghut ri.

Hpilip Eq U-nuk Nhik É Hkyô

²⁶ Ahkuî, Yhumsíng é maumang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyî shut nyâng za e ló aq. Hkyô haû gi, yoso hkyô nghut lhê." ga taî ri. ²⁷ Haû hkûn, yhang toq mù e ló ri. Haû u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhang é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà mó má ê mù, ²⁸ dum taû lo é hkûn, yhang é myanglhêng má zùng luî, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, "Myanglhêng shut chyâng e ló aq." ga taî ri.

³⁰ Haû mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lhú?" ga luî, yhang lé myí ri.

³¹ Haû yuq gi, "Mhoqshit sù yuq a nyi le, ngò hkâsu kut sê gyo râ lhú?" ga tû taî mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi, "Sat râ sau lé su, Yhang lé she e ló bê nghut ri; sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shôm pyâm to huî é hkûn, Yhang lé a tara é dông doqdân pyám bekô; Yhâng é asak lé myigùng htoq mai yù pyám bekô nghut mù luî, Yhâng é awut ashín lé ó yuq wó gôn kyo râ lhú?" †

gâ ri.

³⁴ Haû hkûn, haû u-nuk wa gi, Hpilip lé, "Haû nghut le gi, ngo lé taî kyo laq! Myiqhtoi shí yuq gi, ó lé lhoq ang luî, taî é nghut lhê lhú? Yhânggùng lé taî é nghut lhê lhú? Haû a nghut jáng, góyuq é hkyô lé taî é nghut lhê lhú?" ga myí ri. ³⁵ Haû hkûn, Hpilip gi, Chyúmdang haû lé yù mù, Yesuq eq sêng é gabú danglù lé taî kyô ri.

³⁶ Haû su e ló kô le, wui joq é má jé jáng, haû u-nuk hpó gi, "Wú aq, shí má wui joq tô ri, wui-myhup hkâm yù râ matú ngo lé hkúm râ jang haî joq ashî lhú?" ga taî ri. ³⁷ Hpilip gi, "Náng i-myit banshoq èq, nàng lumjíng bê nghut le gi, hkâm yu le ge lhê." ga taî ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjíng bê." ga tû taî ri. †³⁸ Haû hkûn, yhang é myanglhêng hkying nhâng mù, yhangnhik wui má gyó wâng luî, Hpilip gi, u-nuk hpó lé wui-myhup hkâm byî ri. ³⁹ Wui hkaû mai htoq ló kô é hkûn, haû Yhumsíng é Woi-nyí gi, Hpilip lé myhik za shuî ló byuq mù, u-nuk hpó le Hpilip lé dum a myàng lo; nghut kôlhang, yhang gi, e ló é hkyô shut gabú myit èq xoq sô e ló bê nghut ri. ⁴⁰ Hpilip kúm gi, Azutu wà má lo htoq jé kat mù luî, Kesare wà mó jé shoq haû mau mâ é myuq pé wà pé hkangmó má gabú danglù hkô kyô wún ri.

Sholuq Lhik Wang Lo É Hkyô

⁹ Haû u lé, Sholuq kúm gi, Yhumsíng é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luî, hkyangjong mó chyáng ê mù, ² Yhumsíng é Hkyô lé lumjíng é miywe yuqgè myàng mi-myàng lé chyup yù luî, Yerusalem wà mó shut wó she ló râ matú, Damaskuq myuq mâ é tarajong pé má byi râ laiká pé lé dúng chùng ri. ³ Yhang e ló le, Damaskuq myuq eq chyáng ló nyi é hkûn, yhang é lhíngkyuq má mauhkùng mai dàn loq tung duqbó htoq ló ri. ⁴ Yhang myigùng má lêng ngop tô é u lé, "Sholuq, Sholuq, nàng ngo lé haî mù zing-rí nyi lhê lhú?" ga luî, yhang lé taî é htê wó gyô ri.

⁵ Haû hkûn, yhang gi, "Yhumsíng ê, nàng gi, ó yuq nghut lhê lhú?" ga myi jáng, haû Yhumsíng gi, "Nàng zing-rí nyi é Yesuq nghut lhê, ⁶ toq aq, myuq shut wang ló aq. Nàng zui saí râ hkyô lé lhom taî kyo râ nghut lhê." ga tû taî ri.

⁷ Yhang eq rahá e ló é luzúm wui gi, htê haû wó gyo kôlhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wú le, haî lé le a myàng dut byuq mù luî, yhangmoq gi, yhang lé loq mai shê mù Damaskuq myuq shut shuî wang ló akô. ⁹ Sholuq gi, sum nyí tup myoqjit byuq mù luî, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsíng gi, yhang lé, "Anani ê." ga shing-rán dông wut ri.

Yhang gi, "Yhumsíng ê, shí má nyi lhê." ga tû taî ri.

¹¹ Haû Yhumsíng dum taî é gi, "Toq aq, Hkyô-Nyàng gâ é wà hkyô shut ê mù, Yudaq é yhûm má, Tarshu byù Sholuq lé ê hô aq, yhang gi, kyûdùng nyi ri.

¹² Yhang gi, Anani ga sù wang lé lô mù, yhang é myoq dum myàng sháng gaq ga, yhang é ahtoq má loq ke byí é lé, shing-rán dông myàng bê nghut ri." gâ ri.

¹³ Anani kúm gi, "Yhumsíng ê, shí yuq gi, Yerusalem wà mó má, náng é sân-yúng bang lé a ge é dông hkâm-myhó kut laî lo é hkyanglù lé ngò myo myo wó gyô wú bê; ¹⁴ Shí pé má le, náng é mying lé lêng é bang banshoq lé chyup râ ga, hkyangjong agyi pê chyáng mâ é ahko ahkáng wó yu to sù nghut ri." ga tû taî ri.

¹⁵ Nghut kôlhang, Yhumsíng gi, "Ru ê aq, shí yuq gi, tûngbaù pé eq yhangmoq é hkohkam pê é hí má le, Israelaq byu pê é hí má le, ngá é mying lé wùn waq râ matú, ngò chùng râ nghu luî hkyin to sù nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tûn shit râ nghut lhê." ga taî ri.

¹⁷ Hau htâng, Anani gi, jé ê mù, yhûm haû má wàng luî, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsíng Yesuq èq ngo lé nhang kat é nghut lhê." ga taî ri. ¹⁸ Haû hkûn jáng, Sholuq é myoq mai akyap sù é wui gyó byuq mù, yhang myoq dum wó myàng bê. Haû hkûn, yhang gi, toq mù wui-myhup hkâm yù luî, ¹⁹ zoshuq lé zo mù, wum-o dum lhoq pyíng yù bê nghut ri.

† 8:33 Esai 53:7-8 †† Bun zo 37 shí lé Chyúmlaiká ra-am má gi, bo lhê; ra-am má gi, a bò.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mâ é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasâng é Yhangzo nghut é hkyô, haú hkûn jáng tarajong pé má hko kyô nyi bê nghut ri. ²¹ Sholuq é dang lé wó gyô é lhunglhâng bang gi, maú byuq bùm kômù, "Shí yuq gi, Yerusalem và mó má mying haú lêng é bang lé lhoq hten lhoq hpyoq sù nghut lhê, a nghut kó lhú? Ahkuî, shî má le, haú su é bang lé chyup yù mù, hkyangjong agyi pê chyáng ló ap râ da luî jé lé é sù a nghut kó lhú?" ga myi bum akô. ²² Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luî, Yesuq gi, Hkrisduq yhang nghut nyi é hkyô lé saksé tûn shit ri.

²³ Buinyí tsómra myáng é htâng má, Yudaq byu pé gi, yhang lé sat pyám râ matú haq dâ akô. ²⁴ Nghut kôlhang, yhangmoq dâ é hkyô lé Sholuq sê pyâm ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. ²⁵ Sholuq é chángzô pé kúm gi, myín má yhang lé shuí yù mù, manghkoq má lúng nhâng luî, và kyám xewâm mai lhoq nyhum hkyô kat akô nghut ri.

Sholuq, Yerusalem Và Mó Má Taû Jé Lo É Hkyô

²⁶ Hau htâng, yhang gi, Yerusalem và mó má jé lo é hkûn, chángzô pé eq zùm yap râ matú shikut wú kôlhang, yhang gi, chángzo dut bê hkyô lé a jing kô é yanmai, lhunglhâng bang gi, yhang lé gyuq bum akô. ²⁷ Barnaba kúm gi, Sholuq lé lagyo pê chyáng shuí lò mù, Sholuq, hkyô má Yesuq eq hkâsu kut huî é hkyô lé le, Yesuq eq yhang lé taí é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkâsu kut hko kyô é hkyô lé le, yhangmoq lé taí kyô ri. ²⁸ Haú mù, Sholuq gi, yhangmoq eq rahá Yerusalem và mó má htoq htoq wàng wàng kut nyí uchyang, Yhumsing é mying mai a gyuq a kyum é za hko kyô nyi ri. ²⁹ Grik dang nyo é Yudaq byu pé eq le, taí he lhùm nyi akô; nghut kôlhang, yhangmoq gi, yhang lé sat pyám râ dâ akô. ³⁰ Haú hkyô lé, gumang wuî sé kôjáng, yhang lé Kesare và mó má jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkanmó mâ é noqkuq hpúng gi, haú yoq pé má, lhoq ging lhoq tít é hkyô wó yù mù, nguingón nyi akô; haú Yhumsing lé gyuq hkunggâ é hkyô má le, Chyoiyung Woi-nyí eq lhoq pun lhoq kyíng é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

³² Haú hkûn, Petruq gi, haú mau pé má hkat kúm wún uchyang, Ludaq và mó má nyi é sân-yúng bâng chyáng é jé ri. ³³ Haú và má, gùngjum shî luî shit zân tup yhupjang mai a wó toq é Ainea gâ é byù rayuq lé é myang ri. ³⁴ Haú mù, Petruq gi, "Ainea ê, Yesuq Hkrisduq, nang lé lhoq gê byi bê nghut ri, toq mù, náng é yhuphpú hen yù aq." ga luî, yhang lé taí ri. Haú hkûn

jáng, Ainea wó toq yap bê nghut ri. ³⁵ Ludaq eq Sharon pá má nyi é lhunglhâng bang gi, haú yuq lé myàng mù luî, Yhumsing Yesuq chyáng lhing wang lo bum akô.

Dorka Ga Sù Dum Dui Lo É Hkyô

³⁶ Ahkuî, Yopa myuq má Tabihta gâ é chángzo myiwe rayuq nyi ri; mying haú lé Grik dang đông gi, Dorka † gâ é nghut lhê. Myiwe haú gi, ge é muzó kut nyi é sù eq, asho awuî bang lé alu byí nyi é sù nghut ri. ³⁷ Haú u lé, yhang gi, nòhpyo hui mù shí ló bê nghut ri. Yhâng mâng lé gi, chi mù luî ahtoq gok má jang tô akô. ³⁸ Ludaq và mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haú hkûn, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuí hâng yu akô. Chuimó myhí pé lhunglhâng bang gi, yhâng nàm má yap mù ngaù uchyang, yhangmoq eq rahá nyi tô ashí hkûn Dorka hkyup é buhíng eq gotû mebu pé lé tûn shit nyi akô.

⁴⁰ Petruq kúm gi, lhunglhâng bang lé htoq ló nhâng mù, hkyihput htuq luî, kyûdung mù, mâng shut lhing wú luî, "Tabihta ê, toq aq!" ga taí ri, haú hkûn myiwe haú myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lhâm kat mù yhang lé lêng toq yù luî, lumjing bang eq chuimó myhí pé lé wut yù mù, dui gû ap byí ri. ⁴² Haú hkyô lé, Yopa myuq mâ é bang banshoq wó gyô ló kômù luî, byù myo myo gi, haú Yhumsing Yesuq lé lumjing bum akô nghut ri. ⁴³ Haú mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

Koneli É Shing-rán

10 Ahkuî, Kesare và mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê. ² Yhang gi, tarâ hkungga myit bò luî, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhâm le kyûdung nyi ri. ³ Ra-nyí lé, myinhtâng sum hkyíng kô má, Garai Gasâng é maumang lagyo rayuq gi, yhâng chyáng jé mù, "Koneli ê." ga luî, yhang lé wut é lé, shing-rán mai de de myang ri.

⁴ Haú mù, haú yuq lé wú tsuq to mù, "Yhumsing ê, hai hkyô nghut lhê lhú?" ga gyuq myit eq myí ri.

Maumang kúm gi, "Náng é kyûdung dang eq alu byí é hkyô gi, Garai Gasâng é hí má, hkungga masat đông hkyâng bê nghut ri. ⁵ Ahkuî, Yopa myuq shut byù nhang kat mù, Petruq gâ é sù Simun lé ê shuí lò nhâng aq. ⁶ Yhang gi, wuimau yàm mâ é, shokuq hkyup zô é Simun yhùm má bing nyi ri." ga taí ri.

⁷ Koneli gi, yhang eq dang taí é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhâm le châng nyi bang mâ é, tarâ hkunggâ é gyezo rayuq lé jì yù mù, ⁸ dut laí lo é hkyô banshoq,

† Dorka gâ é lichyúm gi, "chochí" gâ é nghut lhê.

yhangmoq lé taí kyo luí, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung râ ga, yhumhkúng shut doq ló ri. ¹⁰ Haú hkûn, yhang gi, zômut luí rajung jung zô nau nyi ri; nghut kôlhang, zoshuq ru gai nyi ashî le, yhang moq byuq ló mù myoqwup shing-rán myang é gi, ¹¹ mauhkúng bóng lô mù, hpajóng mó sù é lé, myi chyûn má zui luí myigùng shut lhoq hkyô kat é azíng lé myang ri. ¹² Haú hkaú má, myigùng htoq mâ é hkyî myi hkyî dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri.

¹³ "Petruq ê, toq mù, sat zo aq." gâ é danghtê le mying htoq lo ri.

¹⁴ Petruq kúm gi, "Yhumsîng ê, haú gi, a wó dut, achag achyut é eq a sansêng é zè lé, ngò hkâ-nhám le a zô wú." ga tû taí ri. †

¹⁵ Haú hkûn, "Garai Gasang lhoq san lhoq séng bê zè lé, a sanséng hkâ-nghû." ga luí, yhang lé dum taí kat ri.

¹⁶ Haú su ga sum dâm taí é htâng má, zè haú lé radá dâm mauhkúng shut wup yu ló bê nghut ri.

¹⁷ Ahkuí, Petruq gi, yhang myang é shing-rán lé haí wá nghut lhê lhú ga luí, myit maú nyi é hkûn, haú Koneli nhang kat é bang gi, Simun é yhûm lé myang hô kômù, hkumtot má yap to luí, ¹⁸ Petruq gâ é sù Simun, yhûm haú má nyi a nyi é lé, wut myí wú akô.

¹⁹ Petruq gi, shing-rán haú lé ru myit wú nyi ashî le, Woi-nyí gi, "Wú aq, byù sum yuq nang lé ho nyi akô, toq mù gyó ló aq; ²⁰ yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo ló aq." ga taí ri.

²¹ Haú mù, Petruq gi, haú bâng chyáng gyó ló luí, "Nungmoq hô nyi é sù gi, ngò nghut lhê, haí ra luí lé kô é lhú?" ga myí ri.

²² Yhangmoq taí é gi, "Dingmán é, Garai Gasang lé gyuq hkunggâ é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nang taí é dang gyo yù râ matú, yhang lé chyoiyúng maumang lagyô èq taí shit kyô é hkyô lé wó yû luí, ngamoq lé nhang kat é nghut lhê." ga akô. ²³ Haú mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq mâ é gumang wuî ra-am le châng akô nghut ri.

Koneli Lé Petruq Huí É Hkyô

²⁴ Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wuî eq buinùm ji-myi wuî lé ji tsíng to mù, yhangmoq lé láng nyi ri. ²⁵ Petruq wang ló jáng, Koneli gi, te yù mù, yhâng é hkyí wang má paí gop noqkuq ri. ²⁶ Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

²⁷ Haú mù, Petruq gi, yhang eq dang nyô uchyang wang ló wú le, byù myo myo zup zîng tô bum é lé myang ri. ²⁸ Haú hkûn, yhang gi, yhangmoq lé, "Yudaq byù rayuq gi, noqkuq htung dông tûngbaú rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhang, ó yuq lé le achag achyut dut ri, a sanséng dut ri nghû a ge taí é hkyô lé gi, Garai Gasang, ngo lé tûn shit bê. ²⁹ Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haú mù luí, haí ra kô é yanmai, ngo lé ji akô nghû ngò myí nau ri." ga taí ri.

³⁰ Haú hkûn, Koneli gi, "Laí lò bê myi nyí nyí, myin-htâng sum hkyíng má, ngá é yhûm má, ngò kyûdung nyi le, danso loq, duqbó é mebu wut é byù rayuq ngá é hí má yap htoq shit mù, ³¹ 'Koneli ê, Garai Gasang gi, nang é kyûdung danghtê lé le gyo byi bê; nang alu byí é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yâm mâ é shokuq hkyup zô é Simun yhûm má bíng nyi ri.' ga taí ri. ³³ Haú mù luí, haú hkûn jáng ngò nang chyáng byù nhang kat bê nghut lhê. Ahkuí, nang jé é gi, gyai gê bê nghut ri. Yhumsîng yhang nang lé taí nhang é gû banshoq gyô yù râ matú, ahkuí ngamoq lhunglhâng bang Garai Gasang é hí má nghut nyi lhê." ga taí ri.

Petruq Hko Kyô É Mungdang

³⁴ Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê. ³⁵ Byù myû chângjup má, Yhang lé gyuq hkunggâ é eq tengmán é muzó jízó saí é sù gi, Yhang é hí má myoqdong wó nyi ri. ³⁶ Nyi mi-nyí, joq mijóq é Yhumsîng, Yesuq Hkrisduq é yanmai, nguínón hkyô eq sêng é gabú danglù lé hko kyo sháng gaq ga, Israe-laq byu pê chyáng Garai Gasang hun kat é mungdang eq rajung za, ³⁷ baptisma hkyô lé, Yohan hko é htâng, Galile mau mai Yuda mau banshoq má taí pyo ló é hkyô lé, nungmoq sé gû nghut nyi lhê. ³⁸ Haú gi, Garai Gasang èq Chyoiyúng Woi-nyí eq wum-o a-tsam byí to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat èq zing-ri huí é bang banshoq lé lhoq gê byí wún ri.

³⁹ Haú mù, Yudaq byu pê é ming má le, Yerusalem wà mó má le, yhang zui saí bê muzó banshoq é saksé pé gi, ngamoq nghut nyi lhê. Haú yuq lé yhang, yhangmoq sik zîng má jén sat pyám bekô nghut ri. ⁴⁰ Garai Gasang kúm gi, sum nyí nghû râ buinyi má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gû nghut é bang ngamoq é hí má za htoq shit bê nghut ri. ⁴¹ Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê. ⁴² Yhang gi, asak dui é bang eq shî bê bâng é tarâ agyi kut râ matú, Garai Gasang èq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri. ⁴³ Yhang lé lumjîng é

† 10:14 Nhong 11 lé wú aq.

bang yuq hkangmó gi, Yhâng é mying é yanmai, yubak hkyut pyám byî é hui kó râ nghut lhê.' ga luî, taî é myiqhtoi banshoq gi, Yhâng é hkyô lé saksé hkam byî é bang nghut nyi akô." ga taî ri.

Chyoiyúng Woi-nyí Lé, Túngbaù Pé Wó Hap Yu É Hkyô

⁴⁴ Petruq gi, haù hkyô lé ru taî nyi ashî le, dang haù wó gyô é banshoq bâng ahtoq má Chyoiyúng Woi-nyí gyó jé lo ri. ⁴⁵ Túngbaù pé é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahyo-kuq hpyit bê é lumjínq bang Yudaq byu pé gi, maú bum akô. ⁴⁶ Hkâsu mù gâ le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bum kô é yanmai nghut ri.

⁴⁷ Haù mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó yuq wó hkâm to râ l hú?" ga taî ri. ⁴⁸ Hau htâng, yhang gi, yhangmoq lé Yesuq Hkrisduq é mying lang luî wui-myhup hkâm yù râ matú pyíng tô ri. Haù hkûn, yhangmoq gi, Petruq lé buinyi ra-í nyí, nyi gyó shi aq ga chôm hkâm akô.

Petruq, Yhang Kut É Muzó Lé Shit Kyô É Hkyô

11 Túngbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô. ² Haù mù, Petruq, Yerusalem wà mó má doq ló é hkûn, ahyo-kuq hpyit hkyô lé myit zuq é lumjínq bang gi, ³ "Nàng gi, ahyo-kuq a hpyit é bâng é yhûm má wàng mù, yhangmoq eq razo rashuq kut ri." ga luî, yhang lé mara lhom taî hun bum akô.

⁴ Haù hkûn, Petruq gi, haù dut lò bê hkyô lé awang mai ahyo hpyot, yhangmoq lé taî sân kyô hi kat é má, ⁵ "Ngò gi, Yopa myuq má kyúdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luî, ngá shut lhoq hkyô kat é zè gyó jé lo é lé, myang ri. ⁶ Haù lé rago za saí wú le, myigùng htoq má hkyî myi hkyî dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luî, myit wú nyi é hkûn, ⁷ 'Petruq ê, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsing ê, haù gi, a wó dut, achayut é eq a sansêng é zè, ngá é nhut má hkâ-nhám le a wang wú.' nghû taî kat é nghut lhê.

⁹ Haù hkûn, 'Garai Gasang lhoq san lhoq yúng bê zè lé, a sansêng hkâ-nghû.' ga luî, mauhkûng mai dum taî kat ri. ¹⁰ Haù su ga sum dâm taî é htâng má, haù pé banshoq lé mauhkûng shut dum wup yu ló bê nghut ri.

¹¹ Haù hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô. ¹² Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taî ri; shí gumang hkyuq yuq le ngò eq rahá ê mù, Koneli é yhûm má ngamoq wang é. ¹³ Haù hkûn, haù yuq gi, yhang é yhûm má maumang lagyo lé htoq shit é hkûn,

yhang hkâsu myang é hkyô lé le; maumang lagyo éq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq; ¹⁴ nàng eq náng yhum-byù lhunglhâng bang hkyi yù hui râ danglù, yhang, náng chyáng wun lé lô byi râ nghut lhê.' ga taî é hkyô lé le, ngamoq lé taî kyô ri.

¹⁵ Ngò dang taî hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haù hkûn sheq, ngò gi, 'Yohan gi, wui éq wui-myhup hkâm byî ri; nungmoq kúm gi, Chyoiyúng Woi-nyí éq wui-myhup hkâm byî é hui kó râ nghut lhê.' ga luî, Yhumsing taî é dang lé bûn kat ri. ¹⁷ Haù mù luî, Yhumsing Yesuq Hkrisduq lé lumjínq é hkûn, ngamoq lé Garai Gasâng jeju chyunghuq byî é su, Yhang, yhangmoq lé le byî é nghut le gi, ngò gi, hkâsú é byù nghut luî, Garai Gasang lé wó lhom hkâm pyám râ l hú?" ga taî ri.

¹⁸ Yhangmoq gi, haù hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, túngbaù pé lé le, asak duì râ matú myit lhing hkyô byi bunnhung!" ga luî, Garai Gasang lé chôm hkya-ôn akô nghut ri.

Antioku Wà Mâ É Noqkuq Hpúng

¹⁹ Ahkuî, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu pé lé baú za, mungdang haù hko kyô akô nghut ri. ²⁰ Nghut kôlhang, yhangmoq mâ é Kupru byù eq Kuruni byù ra-am gi, Antioku wà mó má châng jé ló kômù, Yhumsing Yesuq é gabú danglù lé, Grik pé lé le taî kyô bum akô. ²¹ Haù Yhumsing é loq gi, yhangmoq eq rahá nghut nyi mù luî, byù myo myo gi, lumjínq mù, Yhumsing chyáng lhing wang lo bum bekô nghut ri.

²² Haù bâng é hkyô lé, Yerusalem noqkuq hpúng é no má hkyang jé ló é nghut mù luî, yhangmoq gi, Barnaba lé Antioku wà mó jé shoq nhang kat akô.

²³ Yhang jé é hkûn, Garai Gasâng jeju bo nyi é lé myàng jáng, yhang gi, gabú luî, yhangmoq é myit nhikhum banshoq éq haù Yhumsing má lhumzuî nyi râ matú, lhunglhâng bang lé myit wum byî ri. ²⁴ Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjínq myit le byíng tô é sù nghut nyi ri. Haù mù, byù myo myo gi, haù Yhumsing chyáng jat wang lo bum bekô nghut ri.

²⁵ Hau htâng, Barnaba gi, Sholuq lé ê hô râ ga Tarshu myuq shut ê mù, yhang lé myàng jáng, Antioku wà mó má shuî lo ri. ²⁶ Haù mù, yhangnhik gi, razàn gón noqkuq hpúng haù eq rahá zum nyi kô é nghut mù luî, byù myo myo lé wó mhoqshit akô. Chángzô pé gi, Hkristan gâ é mying lé, Antioku wà mó má sâng-hi wó yù bekô nghut ri.

²⁷ Haù u lé, myiqhtoî pé ra-am gi, Yerusalem wà mó mai, Antioku wà mó má lé jé bum akô. ²⁸ Haù bang mâ é Agabu gâ é sù gi, toq yap mù, Romaq mingkan títng má mutmó gyó lô râ nghut é hkyô lé, Woi-nyí éq tûn shit é đông taî kyô ri; (Haù gi, hkohkâm Klodi é pyat má dut bê nghut lhê.) ²⁹ Haù mù luî, chángzô pé gi, Yu-

da mau mâ é gumang wui lé, ó le ó wó dut é myhó garum kat râ ga, myit hpyit yu bum akô. ³⁰ Haû eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pé chyáng hun kat bekô nghut ri.

Petruq, Htóng Mai Wó Lut Htoq Lo É Hkyô

12 Haú u lé, Herut hkohkâm gi, hpúng byû ra-am lé chyup yû mù, zing-ri râ ga ngantsâ nyi ri. ² Haû mù, Yohan é yhangmang Yakuq lé sham èq sat pyám nhang ri. ³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haû dut é gi, mún a kat é muk zo poí u lé nghut ri. ⁴ Herut gi, Lhoqlhai Poí lai jáng sheq, mingbyû wui hí má jéyáng râ ga myit tô é yanmai, yhang lé chyup yu é htâng má, htóng má lhûng to mù, yhang lé zúng râ matú, gyè myi yuq yuq kut myi hpúng lé ap tô ri. ⁵ Haû mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chôm dung byí nyi akô nghut ri. ⁶ Petruq gi, Herut èq yhang lé jéyáng râ matú she htoq yû râ hí myin lé, shamtoq-tui í hkat èq tuí é hui luí, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô. ⁷ Haú hkûn, Yhumsing é maumang lagyo rayuq lé htoq shit mù, gok haû má duqbó lo ri. Maumang lagyo haû gi, Petruq é namcham má ê hpuk kat mù, "Myap toq wú aq." ga nhaû ri; haú hkûn, Petruq é loq mâ é toqjâng tui pé le gyut gyó ló bê nghut ri. ⁸ Maumang dum taí é gi, "Hpyihit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri. ⁹ Haú hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haû gi, gè gè nghut é lé, yhang a sé mù, shing-rán myang é nghut ri ga myit yu ri. ¹⁰ Ahkuí, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haû le yhang baú bóng lô mù, yhangnhik htoq luí, wà hkyô rahkat má sô ló le, maumang lagyo gi, haú hkûn jáng, yhâng chyáng mai gâng ló byuq bê nghut ri. ¹¹ Ahkuí, Petruq gi, dum bûn gyîng lò jáng, "Yhum-sîng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyû tô é hkyô banshoq mai, ngo lé hkyi yû bê nghut é lé, ahkuí ngò gè gè sé bê." ga taí ri. ¹² Haú hkyô lé myit sê kat jáng, yhang gi, byû myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé ló ri. ¹³ Haû mù, yhang gi, yhûm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri. ¹⁴ Yhang gi, Petruq é htê nghut é lé sê gyô kat jáng, lûm gabú luí hkum a hpóng byi shî é za, yhúmhkaú shut din wang ló mù, "Petruq gi, hkum mhó lut má lo yap tô ri." ga ló taí kyô ri. ¹⁵ Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi

ri. Dum, yhangmoq gi, "Yhâng é maumang lagyo nghut âng ri." ga taí akô.

¹⁶ Nghut kôlhang, Petruq gi, hkum ru bat nyi mù, yhangmoq hpông kat é hkûn, yhang lé myàng kôjáng, chôm maú byuq bum akô. ¹⁷ Yhang gi, yhangmoq lé zim za nyi keq ga loq lik shit mù, yhang lé Yhumsing èq htóng mai hkâsu kut shuî htoq yu é hkyô lé taí kyo luí, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq ló luí, jowò gó shut e ló bê nghut ri.

¹⁸ Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum akô. ¹⁹ Herut kúm gi, Petruq lé ho wú le a myàng jáng, zúng é bang lé myí gôn wú mù, yhangmoq lé sat pyám râ matú hkunmó hkyô ri.

Herut Hkohkâm Shi Byuq É Hkyô

Hau htâng, yhang gi, Yuda mau mai Kesare wà mó má gyó ló mù ló nyi nyi ri. ²⁰ Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haû mù luí, yhangmoq gi, myit rahkat zâ èq yhâng chyáng ê mù, Blastu gâ é, hkohkâm wa lum tô é suwún hpó lé ê lûm hkaú mù, simsaq hkyô ê dûng akô. Hkâsu mù gâ le, yhangmoq é zoshuq wó râ matú gi, Herut é ming lé lûm hkaú nyi kô é yanmai nghut ri.

²¹ Haú hkûn, ding lhûm tô é buinyi má, Herut gi, hkohkâm hking wut chûng mù, hkohkâm tanghkuq má zûng luí, yhangmoq lé hkohkâm mungdang byí ri. ²² Haû jáng, mingbyû wui gi, "Htê shî gi, waxâng byu é htê a nghut, garai wá é htê sheq nghut ri." ga garû bum akô. ²³ Radá dâm, Herut gi, Garai Gasâng é hpungwup shingkang lé a tê byí é yanmai, Yhumsing é maumang lagyo gi, yhang lé dâm byi luí, yhang gi, luq èq hkê é hui mù, shi byuq bê nghut ri.

²⁴ Haû Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

²⁵ Barnaba eq Sholuq nhik gi, Yerusalem wà mó má yhangnhik saí tûm nyi é muzó ban saí jáng, Markuq gâ é Yohan lé shuî chûng mù, Antioku wà mó shut taú ló bekô nghut ri.

Barnaba Eq Sholuq, Hkyin Nhang Kat Huí É Hkyô

13 Ahkuí, Antioku wà mó mâ é noqkuq hpúng má, myiqhtoí pé eq sará pé le lom nyi akô. Haú bang gi, Barnaba, Niger † gâ é Simeon, Kuruni byû Luki, (Herut zau hpó eq zum kô lò sù) Manaen eq Sholuq pé nghut akô. ² Yhangmoq gi, zoshuq gám luí Yhumsîng lé noqkuq dojaú nyi é hkûn, Chyoiyúng Woi-nyí gi, "Ngá é mù wùn waq râ matú ji tô é Barnaba eq Sholuq nhik lé, hkyin to keq." ga taí ri. ³ Haû mù luí, yhangmoq gi, zoshuq gám luí kyûdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

† Grik dong Niger gâ é gi, byû noq gâ é nghut lhê.

Kupru Zinlóng Má Dut É Hkyô

⁴ Haû mù, yhangnhik gi, Chyoiyúng Woi-nyí èq nhang kat é eq rajung za, Seluki wà shut gyo' ló mù, haû mâ é lhaî ji luí, Kupru zinlóng má jé ló luí, ⁵ Salami wà mó má nyi nyi é hkûn, Yudaq byu pè é tarajong pé má, Garai Gasang é mungdang hko kyô akô. Markuq gâ é Yohan le yhangnhik lé htuqluq htuq'bang kut nyi ri.

⁶ Yhangmoq gi, haû zinlóng mai laî byit e ló mù Pahpu wà mó jé ló kô é hkûn, myiqhtoi pyoq nghut sù Bara-Yesuq gâ é Yudaq byu myoqheq sará rayuq eq htûng hui akô. ⁷ Haú yuq gi, Sergi Poluq gâ é, myit hpaqchyí kûng é ginwáng zau hpó é byu' rayuq nghut lhê. Minggyi hpó haû gi, Garai Gasang é mungdang gyô yù naù mù, Barnaba eq Sholuq nhik lé ji yu ri.

⁸ Haú hkûn, myoqheq sará gâ é lichyúm dông myhîng é Eluma le gâ é Bara-Yesuq kúm gi, ginwáng zau hpó lé haû lumjîng hkyô má a jau ló nhâng nau é nghut mù luí, yhangnhik lé lhom he tang pyâm ri. ⁹ Haú hkûn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luí, ¹⁰ "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkanmó é gyè hpó ê, Yhumsing é tengmán hkyô lé a lhoq hpyoq é a wó nyí lhú? ¹¹ Ahkuí, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga taî ri.

Haú hkûn jáng, yhâng é myoq gi, myhî-myhà ga luí mauchut tuq dut lò byuq ri; haû mù, yhang lé shê râ byù ho sop lhîng wún ri. ¹² Haú hkyô lé ginwáng zau hpó myàng jáng, Yhumsîng eq sêng é mhooqshit é hkyô lé wú maú luí lumjîng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm wuî gi, Pahpu wà mó mai lhaî ji mù, Pamhpuli mau mâ é Perga wà má jé ló akô. Markuq gâ é Yohan kúm gi, yhangmoq eq gang luí, Yerusalem wà mó shut taû lú byuq bê nghut ri. ¹⁴ Dum, yhangmoq gi, Perga mai toq e ló le, Pesidi ginwáng mâ é Antioku wà mó má jé ló akô. Bánno buinyi má, yhangmoq gi, tarajong má wang zung tô akô. ¹⁵ Haú hkûn, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, "Gumang wuî ê, mingbyù wuî lé myit wum byi dang joq kô é nghut le gi, ahkuí taí lo keq." ga luí, yhangmoq chyáng taí nhang kat ri.

¹⁶ Haú hkûn, Poluq gi, toq yap mù, zîm byuq kó sháng gaq ga loq tú luí, "Israelaq byu pé eq Garai Gasang lé gyuq hkunggâ é byu pé ê, chôm gyô yù keq. ¹⁷ Israelaq byu pé é Garai Gasang gi, ngamoq é íchyí ìkê pé lé hkyin yù bê nghut mù luí, Egotuq ming má byùbîng dut nyi to ashî hkûn, yhangmoq lé kô myhâng nhâng mù, hpungwup a-tsam bo é loq èq haú mau mai shuí htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyám byi mù, ¹⁹ Hkanan ming mâ é byuhú nyhit hú lé lhoq htên pyám luí, haú

bâng é mingdán mâ é silí wunlí yhangmoq lé gàm byí ri. Haú gi, myi shô ngo xê zàn kô myáng ri.

²⁰ Hau htâng má, Garai Gasang gi, myiqhtoi Samuelaq é pyat jé shoq tarâ agyi pé lé to byí ri. ²¹ Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyú mâ é, Kisha é yhangzo Sholuq lé byi luí, yhang gi, myi xê zàn up bê nghut ri. ²² Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

²³ Garai Gasang gi, Yhâng é danggididq joq é eq rajung za, Israelaq byu pé é matú, haú yuq é awut ashín mai, hkyi yù Sù Yesuq lé, pò htoq nhâng bê nghut ri. ²⁴ Yesuq a jé lé shimá, Yohan gi, Israelaq byu pé banshoq lé myit lhîng hkyô eq sêng é baptisma hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lhú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyí-tsung tui hpyí râ lháng ngò a gíng.' ga taî ri.

²⁶ Abraham é yhangzo yhangshú pé eq Garai Gasang lé gyuq hkunggâ é tûngbaù, gumang wuî ê, shí hkyi yù hkyô mungdang lé, nga-nhûng chyáng byi kat bê nghut ri. ²⁷ Yerusalem wà mó mâ é bang eq, yhangmoq é zau suwún wuî gi, Yhang hkyi yù sù nghut é lé le, Bánno buinyi hkanmó nghap é myiqhtoi pé é dang lé le, a sê gyo kô é yanmai, Yesuq lé sat râ doqđân é hkûn, myiqhtoi pé é dang lé lhoq dik pyám bekô nghut ri. ²⁸ Yhâng chyáng shí gíng é mara a myàng kôlháng, Yhang lé sat pyám nhâng râ matú, Pilat chyáng dîng akô. ²⁹ Yhangmoq gi, yhang eq séng luí, kâ to má kâ to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri. ³⁰ Garai Gasang kúm gi, Yhang lé shi é mai lhoq dui toq yù bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuí, nga-nhúng Israelaq byu pé é hí má, Yhâng é saksé dut bekô nghut ri.

³² Haú mù, í dam lhê é Hkya-on Kungtôn Laiká má, 'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê.' † ga luí, kâ tô é eq rajung za, ³³ Garai Gasang gi, íchyí îwâ pé lé byi tô é danggididq lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê. ³⁴ Hau htoq agó, Yhang htên byoq é hkâ-nhám a hui shoq, shi é mai lhoq dui toq yù râ hkyô eq séng luí, Garai Gasang taí é gi, 'Dawiq lé byí tô é danggididq eq rajung za, chyoiyúng é eq lumgíng é jeju lé, ngò nungmoq lé byi râ nghut lhê.' †† ga ri. ³⁵ Hkya-on Kungtôn Laiká gó wô má le,

† 13:32 Hkya-on 2:7 †† 13:34 Esai 55:3

'Náng é Chyoiyúng Sû lé, Nàng htên byoq nhâng nau rã a nghut.' †
ga taí tô ri.

³⁶ Ahkuî, Dawiq gi, yhâng é pyat banshoq má Garai Gasang ô nau é đông ban wùn waq jáng, shi byuq luî, îchyí îwã pé eq rahá myhup pyám hui mù, htên byoq byuq é hui bê nghut ri. ³⁷ Garai Gasang lhoq dui toq yu é sù kúm gi, htên byoq huî é a nghut.

³⁸ Haû nghut é yanmai, gumang wui ê, haú yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sê nyi keq. ³⁹ Hau htoq agó, Mosheq é tarâ eq mara hkyut san byí é a hui kôlhang, haú yuq lé lumjîng é bang gi, hkyô lhumjup má mara hkyut san byí é hui rã nghut lhê. ⁴⁰ Hau é yanmai, 'Wú keq, jihpoi é bang ê, maú mù luî htum byuq keq; nungmoq é buinyi pé má ngò rajung jung kut htoq rã nghut lhê;

⁴¹ haú hkyô lé, rayuq yuq, nungmoq lé hkaî kyo kôlhang, jîng kó rã a nghut.' ††

ga luî, myiqhtoí pé taí é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuî, Poluq eq Barnaba nhik tarajong mai htoq lô le, htâng lhê é Bánno buinyi má le, haú pé lé dum hkaî kyo rã matú yhangmoq chôm dúng akô. ⁴³ Chôm byo htoq lô kô é hkûn, Yudaq byu pé eq Yudaq noqkuq htûng má lhing wang lo é tarâ hkunggã é byù myo myo gi, yhangnhik é htâng má châng bùm kô é nghut mù luî, Garai Gasâng jeju má gîng nyi rã matú, yhangnhik gi, yhangmoq lé lhoq pun lhoq kyîng akô nghut ri.

Tûngbaù Pê Chyáng Lhing Lo É Hkyô

⁴⁴ Hau htang lhê é Bánno buinyi má, Garai Gasâng é mungdang gyô yù rã matú, rawa bang aluq shoí banshoq, lé zup zîng to bum akô. ⁴⁵ Yudaq byu pé kúm gi, byù moq mó haû lé myàng jáng, manon myit baú byíng bùm kômù luî, Poluq taí é dang lé taí htîng é eq nhîng pyám akô.

⁴⁶ Poluq eq Barnaba le gyuq myit a bo é đông taí é gi, "Garai Gasâng é mungdang lé, nungmoq lé hí taí kyo rã dut é yanmai, ngá-nhik taí bê nghut lhê. Nghut kôlhang, nungmoq gi, haû lé lhom he-ngik pyám kômù, ahtum abyuq é asak eq gingdán é đông yhumsing gùng lé a myit yù kô é yanmai, wú keq, ahkuî, ngá-nhik gi, tûngbaù pê shut lhing lô berã nghut lhê.

⁴⁷ Hkâsu mù gã le, haû Yhumsîng gi,

'Hkyi yù hkyô lé maumyî htum shoq wó chûng jé rã matú, Ngò, nàng lé tûngbaù pê é maubó dut nhâng bê.' ‡

ga luî, ngamoq lé hkunmó hkyó kat bê." gã ri.

⁴⁸ Tûngbaù pé gi, dang haû lé wó gyo kôjáng, gabú é eq Yhumsîng é mungdang lé hkya-on kungtôn nyi bum akô. Ahtum abyuq é asak lé wó rã matú hkyin to huî é lhunglhâng bang le, lumjîng bum akô nghut ri.

⁴⁹ Yhumsîng é mungdang gi, haú ming gón jam lò bê nghut ri. ⁵⁰ Yudaq byu pé kúm gi, Poluq eq Barnaba nhik lé zîng-ri rã matú, aróng wó é myiwe wui mã é

tarâ hkungga bang eq, haú wã mã é suwún wui lé, nhik lhoq yo kôluî, yhangnhik lé maukyo mai chôm hkat htoq pyám akô. ⁵¹ Yhangnhik gi, yhangmoq lé a nau é hkyô tûn shit é đông, yhumsîng é hkyî mã é hpuilhaû lé yhangmoq chyáng ko hkyô pyám to kômù, Ikoni wã mó shut lô byuq bekô nghut ri. ⁵² Chángzô pé kúm gi, gabú é htoq agó, Chyoiyúng Woi-nyí byíng nyi bum akô nghut ri.

Poluq Eq Barnaba Nhik, Ikoni Wã Mó Mã Lô Jé É Hkûn Lhê Hkyô

14 Ahkuî, Ikoni wã mó mã nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tûngbaù pé ajùm ayò lumjîng bùm kó shoq, wum kat hko kyô akô. ² Nghut kôlhang, a lumjîng é Yudaq byu pé gi, lumjîng é gumang wui lé a ngui rã đông tûngbaù pé lé mhoq hpyoq yù mù, shuí gumlaù akô. ³ Haû mù luî, yhangnhik gi, tsómra myang shoq haú mã nyi mù, haû Yhumsîng é matú gyuq myit a bo é za hko kyô akô; Yhang Yhumsîng le yhangnhik é loq mai limik kumlhá eq mauhpo muzó dut nhang é đông, Yhâng é jeju mungdang lé saksé hkám byí nyi ri. ⁴ Haú wã mã é bang kúm gi, myit byo lô bùm kô é nghut mù luî, Yudaq byu pé chyáng ra-am, lagyô pê chyáng ra-am, lom byuq lô akô.

⁵ Ahkuî, tûngbaù pé le, Yudaq byù eq yhangmoq é uphkâng bang le, yhangnhik lé rhoi mù luqgok eq dú sat rã ga htîm lo bum akô. ⁶ Nghut kôlhang, yhangnhik gi, haú hkyô lé bûn sê kat kôjáng, Lukaoni ginwáng mã é Lustra eq Derbe wã mó eq, hau é awui ayàm wã tiq wã zo pé shut hpang e lô akô. ⁷ Haú pé mã le, gabú danglù xoq hko kyô wún akô nghut ri.

Lustra Wã Mó Mã Lô Jé É Hkûn Lhê Hkyô

⁸ Ahkuî, Lustra wã mó mã, înu unghkaû mai hkyî htên mù luî, hkâ-nhám le hkyô a wó sô wú é sù rayuq zung tô ri. ⁹ Yhang le Poluq taí é dang lé gyô nyi ri. Poluq gi, haú yuq lé wú tsuq kat é hkûn, wó lhoq gê byi hui rã nghut lhê gã é lumjîng myit yhâng chyáng bo tô é lé, myàng byí ri. ¹⁰ Haû mù, Poluq gi, "Toq yap aq!" ga luî, htê mó eq yhang lé taí kat jáng, yhang gi, byam toq kat mù, wó so bê nghut ri.

¹¹ Haû mù, Poluq kut é muzó lé shiwa byu pé myàng kôjáng, yhangmoq gi, Lukaoni dang đông, "Nat hparà pé gi, byù gùng đông kut luî ngamoq chyáng gyó lô bekô nghut ri." ga luî, wut garu bum akô. ¹² Hau htâng, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhîng byí akô.

¹³ Haû wã yàm mã é Zeu hparà noqkuq yhûm hkyangjong hpó gi, wã hkum mã nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi rã hen akô.

¹⁴ Nghut kôlhang, lagyo nhik Barnaba eq Poluq gi, haû lé wó gyo kôjáng, yhumsîng é mebu lãng cheq pyám kôluî, shiwa hpong gung gûng shut din wang é kômù, garú taí kô é gi, ¹⁵ "Hkaû pé ê, haí mù haû su kut lo akô lhú? Nga-nhik le nungmoq eq rajung za,

xângzo byù za nghut lhê, akyû a bo é hkyô shí pé lé tô pyâm to mù, mauhkûng eq myigùng, wuïshuq lung-aù eq haú pé má nyi mi-nyi, joq mijoq lé hpan to sù, rû dui nyi é Garai Gasâng chyáng lhing wang lò kó sháng gaq nghû luí sheq, nungmoq lé gabú danglù hko kyô é nghut lhê. ¹⁶ Garai Gasang gi, byù myû chângjup lé hí hpyang lhê é pyat bán má ó le ó kâm é đông kut nhâng bê nghut ri. ¹⁷ Nghut kôlhang, Yhang gi, mauhkûng mai mau wô nhâng luí, kyôshi zuí nhang é ahkýng yam-yoq byi mù, nungmoq lé zoshuq agùn agó byí é eq, nungmoq lé i-myt ngón nhang nyi é đông, Yhang ge é hkyô lé tûn shit mù, Yhang nyi é hkyô lé saksé hkâm nyi ri." ga akô. ¹⁸ Haù su ga taí kô le lháng, yhangnhik lé shiwa byu pé mai hkungga nhông byi rã hkyô lé, yhangnhik gi, gyai wuihke luí sheq wô hkûm pyâm akô nghut ri.

¹⁹ Hau htâng, Antioku và mó eq Ikoni và mó pé má é Yudaq byu pé ra-am lé jé kômù, shiwa byu pé lé shuít u luí, Poluq lé luqgok èq chôm dú kômù, yhang lé shi byuq bê su ngàm kô é yanmai, và shinggan shut shê hkyut htoq pyâm akô. ²⁰ Nghut kôlhang, Poluq gi, yhang é lhinghkyuq má chángzô pé yap tô kô é hkûn, toq mù và shut tau wang ló ri. Hau htang nyí, yhang gi, Barnaba eq rahá Derbe và mó shut e ló bekô nghut ri.

Antioku Và Mó Má Taù Jé Ló É Hkyô

²¹ Haù wã má yhangnhik èq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku và mó hkyô dum taù ló kômù, ²² chángzô pé lé myit lhoq ging byi uchyang, haù lumjínng hkyô má ru gíng nyi rã matú myit wum byí akô. "Nga-nhúng gi, Garai Gasâng é mingdán má wàng rã matú, wuïhke jamjau myo myo hui ra rã nghut lhê." ga le, mhoqshit akô. ²³ Yhangnhik gi, noqkuq hpúng hkanmó má, hpúng suwún kut rã bang lé hkyin yù mù, zoshuq gám luí kyûdung mù, yhangmoq lumjínng nyi é Yhumsíng Garaí chyáng ap byi tô akô. ²⁴ Hau htâng, yhangnhik gi, Pesidi ginwáng mai laí byit ló mù, Pamhpuli ginwáng má jé ló akô nghut ri. ²⁵ Haù ginwáng mã é Perga và mó má mung-dang hko kyo luí, Atali và mó shut laí gyó ló akô nghut ri.

²⁶ Haù mai, lhaí ji mù, ahkuí yhangnhik wùn waq laí ló bê muzó é matú, Garai Gasâng jeju má ap luí yhangnhik lé nhang kat é Antioku và mó má dum jé lò bekô nghut ri. ²⁷ Jé lo é hkûn, yhangnhik gi, hpúng byû wuí lé wut tsíng yù mù, yhangnhik đông mai Garaí Gasang kut é hkyô banshoq lé le, tûngbaù pé lé haù lumjínng hkyô hkum hpóng byí é hkyô lé le, shit kyô akô. ²⁸ Haù mù, yhangnhik gi, haù wã má chángzô pé eq tsómra myang shoq nyi nyi akô nghut ri.

Ahpyo-kuq Hpyit Hkyô Eq Sêng É Manghkáng

15 Ahkuí, Yuda mau mã é byù ra-am gi, Antioku và mó má lé jé mù, gumang wuí lé, "Nungmoq gi, Mosheq é htungtarã eq rajung za, ahpyo-kuq a hpyit é

nghut jáng, hkyi yu é hui rã a nghut." ga luí, mhoqshit bum akô. ² Hau é yanmai, myit a huí lhùm é hkyô htoq lô mù, Poluq eq Barnaba nhik gi, haù bang eq gyai yhang myíng myô lhùm akô; haù mù luí, gumang wuí gi, Yerusalem và mó má nyi é lagyo pé eq suwún wui chyáng, haù hkyô lé ló hpyê lhum rã matú, Poluq, Barnaba nhik eq rahá, yhangmoq chyáng mã é ra-am lé, nhang kat rã ga hkyin tô akô. ³ Haù mù, hpúng byû wuí yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô laí ló uchyang, tûngbaù pé lhing wang lò bê hkyô lé taí kyô akô. Haù mã é gumang wuí lé gyai yhang gabú nhang akô nghut ri. ⁴ Yhangmoq, Yerusalem và mó má jé kô é hkûn, hpúng byû wuí, lagyo pé eq suwún wuí gi, yhangmoq lé lhom hkûlum yù kô é nghut mù luí, yhangmoq gi, yhangmoq đông mai Garaí Gasang kut é hkyô lhunglhang lé, haù bang lé shit kyô akô.

⁵ Haù hkûn, Hparishe hpúng mã é lumjínng bang ra-am gi, toq mù luí, "Tûngbaù pé lé, ahpyo-kuq hpyit nhâng rã eq, Mosheq é tarã đông cháng nhâng rã gi, ra yhang rã lhê." ga taí bum akô nghut ri.

Yerusalem Và Mó Má Kut É Byin Tú Wap Hpong

⁶ Ahkuí, lagyo pé eq hpúng suwún wuí gi, shí hkyô lé chôm myit wú rã ga, zup tô bum akô. ⁷ Shí hkyô lé gyai yhang dang rhâng lhùm bùm kô é htâng mã, Petruq gi, toq mù luí, "Gumang wuí ê, Garaí Gasang gi, ngá nhut mai taí é, haù gabú danglù lé, tûngbaù pé gyô yù mù lumjínng kó sháng gaq ga, hí hkûn nungmoq chyáng mai ngo lé hkyin yù bê hkyô lé, nungmoq sé lugù nghut bê. ⁸ Haù mù, myit nhiklhum lé sé byi sù Garaí Gasang gi, nga-nhúng lé byí é eq rajung za, yhangmoq lé le Chyoiyúng Woi-nyí byí é đông, yhangmoq lé hap yù bê hkyô lé saksé tûn shit bê nghut ri. ⁹ Garaí Gasang gi, yhangmoq lumjínng luí, yhangmoq é myit nhiklhum lé lhoq san lhoq yúng byi bê nghut é yanmai, nga-nhúng eq yhangmoq é gyoro mã gamhkuí é hkyô a joq nhâng lo nghut ri. ¹⁰ Haù nghut le gi, íchyí íwã pê èq le, nga-nhúng èq le a ung é wòlai lé, haù chángzô pê é lingzing má ke byí é đông mai, haí mù, ahkuí Garaí Gasang lé chyam wú nyi akô lhú?

¹¹ Nghut kôlhang, ngamoq gi, yhangmoq eq rajung za, Yhumsíng Yesuq é jeju mai za hkyi yu é huí é hkyô lé lumjínng é bang nghut lhê." ga luí, yhangmoq lé taí ri. ¹² Haù hkûn, zup míng tô é bang lhunglhang gi, zim za kut luí, Barnaba eq Poluq nhik mai, tûngbaù pê chyáng, Garaí Gasâng èq yhangnhik é loq đông limik kumlhá pé eq mauhpo muzó pé kut shit é hkyô, taí kyô nyi é lé chôm gyô nyi akô. ¹³ Yhangnhik dang ban taí kôjáng, Yakuq gi, "Gumang wuí ê, ngá dang lé gyô wú keq. ¹⁴ Garaí Gasang gi, tûngbaù pê chyáng mai Yhâng myíng é matú byù ra-myû hkyin yù rã ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri. ¹⁵ Shí hkyô gi,

'Hau é htâng mã gi, ngò dum taù lò mù luí, lèng gyop byuq bê Dawiq é yhùm † lé dum saí rã nghut lhê.

† Dawiq é yhùm gâ é gi, Dawiq eq yhâng é awut ashin pé up é hkyô lé gâ é nghut lhê.

Haû byoq htên tô é pé lé saî saî mù, haû lé dum lhoq toq râ nghut lhê.

¹⁷ Haû hkûn sheq, ngá myîng mai ji yu é tûngbaù pé eq, myit gyo tô é byù lhunglhang bang gi, Yhumsîng Garai lé hô kó râ nghut lhê ga,

¹⁸ a-nham mau htoq xâng hkun mai, shí hkyô pé lé sé nhang é Yhumsîng Garai taî ri.[†]

¹⁹ Haû mù luî, ngò taî nau é gi, tûngbaù pê chyáng mai Garai Gasâng shut lhing lo é bang lé, gotû haî le a lhoq wuî é za,²⁰ hparà lhô pé lé kyáng byî é a sansêng é zoshuq pé lé le, ashop é đông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lhê.²¹ Hkâsu mù gà le, gó hkûn mai yhang, Mosheq é tarâ lé và hkangmó má hko kyô lô kômù, Bánno buinyi hkangmó tarajong pé má nghap kyo kyo kut bùm kô é nghut lhê." ga taî ri.

Lumjîng É Tûngbaù Pê Chyáng Hun Kat É Laiká

²² Haû hkûn, lagyô pé, suwún wuî eq, hpúng byû wui lhunglhang bang gi, Poluq, Barnaba nhik eq rahá Antioku và mó shut nhang kat râ byù lé, yhangmoq chyáng mai hkyin yù râ matú chôm myit hpyit akô. Haû eq rajung za, yhangmoq gi, gumang wui chyáng mâ é nhik bô suwún nhik Barsabaq gà é Yudaq eq Sila lé hkyin yu akô nghut ri.²³ Yhangnhik é loq má, hun kat kô é laiká gi,

"Antioku và mó, Suriq mau eq Kiliki mau pé má nyi é, tûngbaù gumang wui ê, nungmoq é gumang wui nghut é, ngamoq lagyô pé eq suwún wuî gi, nguínón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dâng èq lhoq byok pyám luî, nungmoq é myit lé lhoq nhúng byî nyi é hkyô lé, ngamoq wó gyo bê.²⁵ Haû mù, ngamoq lhunglhang bang gi, byù ra-am lé hkyin yù mù,²⁶ nga-nhúng é Yhumsîng Yesuq Hkrisduq é matú, yhumsing asak lé lháng a hâ é nga-nhúng chyitdap é Barnaba, Poluq nhik eq rahá, nungmoq chyáng nhang kat râ matú chôm myit hui bê.²⁷ Haû mù luî, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taî kyo kó râ nghut lhê.²⁸ Nungmoq é matú gi, hparà lhó pé lé tîng byî é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám râ hkyô mai lai luî, gotû wòwùn hùn râ hkyô a joq nghû luî, Chyoiyúng Woi-nyí le, ngamoq le, myit huít to bê.²⁹ Nungmoq haú pé lé koi pyám nyi kôjáng gi, gè râ nghut lhê.

Nguínón wángzán nyí kó sháng gaq ô!" ga kô tô ri.

³⁰ Yhangmoq lé nhang kat kôjáng, yhangmoq gi, Antioku và mó má gyó jé lô kômù, hpúng byû wui lé ji tsîng to kôluí, haû hùn kat é laiká lé ap byî akô nghut ri.³¹ Hpúng byû wui gi, laiká haû lé ban nghap kôjáng, wum-o byî é danglù hau é yanmai, gabú nyi bum akô.³² Yudaq eq Sila gi, myiqhtoî nhik le nghut kômù luí,

† 15:18 Amo 9:11-12

gumang wui lé mungdang myo myô èq lhoq pun lhoq kyîng kômù, wum-o lhoq gîng to byî akô.³³ Rayoq zo haû má nyi nyi kô é htâng má, gumang wui gi, yhangmoq lé nhang kat é bâng chyáng, ngui ngui ngón ngón dum tau lô nhâng bekô nghut ri.³⁴ (Sila kúm gi, yhang ô nau é đông nyi gyó tô ri.)^{†35} Poluq eq Barnaba kúm gi, Antioku và mó má nyi gyó to kômù, Yhumsîng Yesuq é mungdang lé, góbang myo myo eq, mhooq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyi tsómra myáng jáng, Poluq gi, Barnaba lé, "Yhumsîng é mungdang hko kyô lai lo wú bê, và hkyap hkangmó mâ é gumang wui chyáng taû lò luí, yhangmoq hkâsu dut nyi é hkyô lé, lô dum kúm wú lo goq." ga taî ri.³⁷ Barnaba gi, Markuq gà é Yohan lé le shuí chûng nau ri.³⁸ Nghut kôlhang, Poluq gi, haû yuq lé a kâm shuí chûng nau nghut ri; hkâsu mù gà le, yhang gi, Pamhpuli mau má yhangnhik lé tô pyám to mù, yhangnhik eq rahá muzó a kâm xoq zui nau é sù nghut é yanmai nghut ri.³⁹ Hau é yanmai, yhangnhik gi, gyai yhang taî shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chûng luí, lhaî ji mù Kupru zinlóng shut e lô byuq bê nghut ri.⁴⁰ Poluq kúm gi, Sila lé hkyin yù mù, gumang wui èq yhang lé Yhumsîng Garaî é jeju má ap kat kô é htâng má, yhangnhik gi, htoq e lô byuq bekô.⁴¹ Haû mù, Poluq gi, Suriq mau eq Kiliki mau mai sô lai lô uchyang, haû mâ é noqkuq hpûng pé lé wum-o lhoq gîng byî wún bê nghut ri.

Poluq Eq Sila Nhik Chyáng Timohti Châng É Hkyô

16 Poluq gi, Derbe và mó má jé é htâng, Lustra và mó má dum jé ri. Haû và má, Timohti gà é chángzo rayuq nyi ri. Yhâng nu gi, Yesuq lé lumjîng é Yudaq myiwe myhí nghut ri; yhâng wa kúm gi, Grik amyû nghut ri.² Timohti gi, Lustra và mó eq Ikoni và mó má nyi é gumang wui èq hkya-ôn é hui sù nghut ri.³ Poluq gi, hkyowuî má yhang lé shuí chûng nau mù luí, ahpyo-kuq hpyit byî ri. Hkâsu mù gà le, yhâng wa gi, Grik nghut é hkyô lé haû mâ é Yudaq byu pé lhunglhang bang sé kômù, haû bang lé myit tê byî é yanmai nghut ri.⁴ Haû mù, yhangmoq gi, rawa htâng rawa mai lai lô uchyang, Yerusalem và mó mâ é lagyô pé eq hpúng suwún wuî, chôm myit hpyit tô é hkyô lé, cháng kó sháng gaq ga, yhangmoq lé taî kyô akô.⁵ Haû mù luí, hpúng byû wui gi, lumjîng hkyô má wum-o bo lò kômù, ra-nyí èq ra-nyí byù du myô jat lo nyi ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuî, yhangmoq gi, Asia mau má mungdang é hko kyo râ hkyô lé Chyoiyúng Woi-nyí èq yhangmoq lé hkûm pyám é yanmai, Hprugi mau eq Galatiq mau đông sô lai lô mù,⁷ Musi mau kyo má jé lô kôjáng, Bih-

†† Bun zo shí lhum gi, Grik Chyúmlaiká myo myo má a bô nghut lhê.

tuni mau shut wang ló rã dâ akô; nghut kôlhang, Yesuq é Woi-nyí gi, yhangmoq lé ahkáng a byi nghut ri.⁸ Haû mù, yhangmoq gi, Musi mau mai sô laí ló luí, Troa myuq má gyó jé ló akô.⁹ Haû má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yù laq." ga luí, yhang lé dung wut nyi é shing-rán myang ri.¹⁰ Shing-rán haû lé Poluq myang é eq, Makedoni byu pé lé gabú danglù hko kyo rã matú, ngamoq lé Garai Gasang wut yù bê nghut ri nghû myit yù luí, haú hkûn yhang, ngamoq gi, Makedoni mau shut dap ê rã matú rì rì kut ló bê nghut lhê.

Ludia Gã É Myiwe Myhí Hpúng Byù Dut Lo É Hkyô

¹¹ Haû mù luí, ngamoq gi, Troa myuq mai Samohtake zinlóng ang ang shut lhai ji ê mù luí, htang nyí gi, Neapoli wà má jé bê nghut lhê.¹² Haû mai lai jáng, Makedoni mau má, Romaq byu pé xuq tô é, haú gin-wáng mã é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

¹³ Bánno buinyì jé jáng, ngamoq gi, kyûdung jowò joq nhô ngam mù, wà hkum shinggan mã é, wuilàng yàm shut htoq ê luí, haú má zing to lánng é myiwe wui lé, zung gyó mù nyo hi é nghut lhê.¹⁴ Haû dang gyo nyi é bang mã, Garai Gasang lé noqkuq é, Htuatira myuq byù, pán nê ung zo sù Ludia gã é myiwe myhí rayuq bo ri; Yhumsing Garai gi, Poluq taí kyô é hkyô lé rago gyô yù sháng gaq ga, yhang lé myit hkum hpóng byí ri.¹⁵ Yhang gi, yhang eq yhang yhumbyù wui wui-myhup ban hkâm yù kôjáng, "Nungmoq gi, ngo lé haú Yhumsing Yesuq má lumjáng bê sù nghut é dông, myit yù byi kô é nghut jáng, ngá yhum mã lé bing keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haú kyûdung é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haú yuq gi, gumhpân hpan é dông yhang yhumsing wui lé ngunzè gyai yhang hô byí é sù nghut lhê.¹⁷ Myiwe haû gi, Poluq eq ngamoq htâng mã châng to mù, "Shí bang gi, nungmoq lé hkyi yù hkyô taí kyô wún é, Myhang Htâng é Garai Gasang é dui-nhâng zoshâng wui nghut bum akô ô!" ga wut garú ri.¹⁸ Buinyì myo myo haú su chyat châng garú wún é yanmai, Poluq gi, gyai yhang myit hpêbu byuq mù, lhing wú kat luí, nat haû lé, "Yesuq Hkrisduq é mying lang luí ngò nang lé hkunmó hkyô kat lhê, yhang chyáng mai htoq ló byuq aq." ga luí, nat haû lé, nhik-yô kat ri. Haú hkûn jáng, nat haû gi, yhang chyáng mai htoq ló byuq bê nghut ri.

¹⁹ Ahkuí, myiwe hau é yhumsing wui gi, ngunzè myàng zo rã myoqbyù jowò a joq lo é hkyô lé sé kôjáng, Poluq eq Sila Nhik lé chyup yù mù, gai mã é suwún wui chyáng she hkyut e akô.²⁰ Dum, yhangmoq gi, yhangnhik lé tarâ agyi pé chyáng shui ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byí nyi é

dông,²¹ nga-nhông é myuq lé gunjâng nyi akô nghut ri." ga taí akô.

²² Haû mù luí, shiwa byu pé gi, yhangnhik lé chôm htím akô. Tarâ agyi pé gi, yhangnhik é mebu lé lánng hkyut pyám luí, wumchûm hkat eq bat rã matú, hkunmó hkyô kat akô.²³ Yhangmoq gi, yhangnhik lé gyai yhang nhuq bat yu é htâng, htong mã lhông kat mù, rago za wú zúng rã matú htóng suwún lé hkunmó hkyô tô akô.²⁴ Htóng suwún hpó gi, haû sù é hkunmó lé wó jáng, yhangnhik lé hkyí kyum hut luí, htóng mã é, je ahtê gok mã lhông tô ri.

Htóng Suwún Hpó Hkyi Yù Huí É Hkyô

²⁵ Nghut kôlhang, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkûn, htóng byù góbang gi, yhangnhik é htê lé chôm gyô nyi bum akô.²⁶ Haú hkûn, byodàn ratung layàng mó nún lô mù htóng yhum gón le nún lô luí, hkum pé banshoq le radá dâm bóng hã lo bum ri; dum nghut jáng, yuq hkangmó mã é toqjâng tui pé le gyut gyó byuq bê nghut ri.²⁷ Htóng suwún hpó gi, yhup bûn lò mù, htóng hkum pé bóng hã tô bum é lé myang kat jáng, htóng byu pé ban hpang byuq bùm bekô rã nghut lhê ga myit yù luí, shâm shê mù, yhang-gùng yhang sat shi rã dâ ri.²⁸ Nghut kôlhang, Poluq gi, "Ê, nánng gûng yhang nàng haú su hkâkut, ngamoq banshoq shi mã nyi tô lhê." ga luí, htê mó eq wut garu taí kat ri.

²⁹ Haú hkûn, yhang gi, duq é myibung lé dúng yù mù, ahkaû shut din wang ló luí, Poluq eq Sila nhik é hí má gyuq nán é eq ngóm gop tô ri.³⁰ Hau htâng, yhang gi, yhangnhik lé shui htoq yù luí, "Sarâ nhik ê, ngò hkyi yu é hui rã matú, haí kut ra rã lú?" ga myi kat ri.

³¹ Haú hkûn, yhangnhik gi, "Yhumsing Yesuq lé lumjáng jáng, nàng eq nánng yhumbyù lhunglhang bang hkyi yu é hui rã nghut lhê." ga taí akô.³² Hau htâng, yhangnhik gi, haú htóng suwún hpó eq yhang yhumbyù lhunglhang lé, Yhumsing é mungdang hko kyô akô.³³ Haú myín haú u lé yhang, htóng suwún hpó gi, yhangnhik lé shui ê mù, yhangnhik é dàm pé lé tsing chí pyám byi luí, haú htâng, yhang eq yhang yhumbyù banshoq bang wui-myhup hkâm yù bekô nghut ri.³⁴ Hau htâng, yhang gi, yhangnhik lé, yhang é yhumhkaû mã shui wang ló mù, zoshuq hkang byí ri. Yhang eq yhang yhumbyù banshoq bang gi, Garai Gasang lé wó lumjáng bekô nghut é yanmai, gyai gabú nyi bum akô nghut ri.

Haq Nhang Pyám Rã Lé A Dông É Hkyô

³⁵ Ahkuí, maubó jáng, tarâ agyi wui gi, "Haú nhik lé nhang pyám aq." ga, htóng suwún hpó chyáng pyata pé lé taí nhang kat akô.³⁶ Haú hkûn, htóng suwún hpó gi, "Nungnhik lé nhang pyám aq ga, tarâ agyi wui mai byù nhang kat ri; haú mù, ahkuí, nungnhik gi, ngón za htoq ló lo keq." ga luí, Poluq lé taí ri.

³⁷ Poluq kúm gi, "Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu

pê hí má ngá-nhik lé nhuq bat mù, htóng má hkyô kat kôluî nhîng, ahkuî tsik za haq nhang pyám râ dâ akô nhung lhi? A wó dut, yhangmoq yhang sheq lé shuî htoq yû kó sháng gaq." ga luî, yhangmoq lé tû taî kat ri.

³⁸ Pyata pé gi, tarâ agyî wuî lé dang haú pé ló taî kyo kôjáng, tarâ agyî wuî gi, Poluq eq Sila nhik Romaq mingdán byû nghut é hkyô lé wó gyo kôjáng, gyô gyuq kôluî, ³⁹ yhangmoq yhang, yhangnhik chyáng lé mù, tóngbán luî, shuî htoq yû mù, wà haú mai htoq ló byuq râ matú chôm dúng akô. ⁴⁰ Haú mù, Poluq eq Sila nhik gi, htóng mai htoq ló é htâng, Ludia é yhûm má wang ló akô; haú má, gumang wuî eq le hui kômù, yhangmoq lé wum-o byi luî, htoq ló bekô nghut ri.

Htesaloni Wà Mó Má Mungdang Hko Kyô É Hkyô

17 Hau htâng, yhangmoq gi, Amhipoli wà mó eq Apolon wà mó mai sô laî ló mù, Htesaloni wà mó má jé akô. Haú wà má gi, Yudaq byu pé é tarajong ralhûm joq ri. ² Poluq gi, yhang lhaq kut nyi é eq rajung za, tarajong má wàng luî, Bánno buinyî sum nyí yhang, Chyúmdang má bo é eq séng mù, yhangmoq eq chôm mîng lhum uchyang, ³ Hkrisduq wuîhke jamjau hui mù, shî bê mai dum dui toq lô râ hkyô lé taî hkoq san kyo luî, "Nungmoq lé, ngò hko kyô nyi é haú Yesuq gi, Hkrisduq nghut lhê." ga taî ri. ⁴ Yudaq byu pé mâ é ram gi, gyô jîng kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wuî tsómra myo shoq le, gyô jîng kômù, lé xoq yu akô.

⁵ Nghut kôlhang, a gyô jîng é Yudaq byu pé gi, manôn kôluî, gài mâ é byûgang jûm ra-am lé lung yù mù, byû moq mó tsîng yù luî, rawa é shuî gabyong kômù, shiwa byu pé é hí má Poluq eq Sila nhik lé wó shuî htoq shit shoq ga, Yason é yhûm má htîm e ló akô. ⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wuî ra-am lé, yhangmoq é wà suwún wuî chyáng lîng she ê kômù, "Mingkan gón lé atau ahû kut é byû shí nhik, ahkuî shî má jé jáng, Yason gi, yhang é yhûm má lhom hkûlum yu ri. ⁷ Yhangmoq lhunghâng bang gi, Yesuq gâ é hkohkâm góyuq nyi lhê ga kôluî, hkoséng Kehtaq é tarâ lé lhoq shai é dông kut é bang nghut akô." ga taî garû bum akô. ⁸ Shiwa byu pé eq wà suwún wuî gi, dang haú lé wó gyo kôjáng, myit wuî myit hke dut nyi bum akô. ⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myîn jáng yhang, gumang wuî gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri. ¹¹ Haú Beria wà mó byu pé gi, Htesaloni wà mó byu pé htoq má je riyhang nhik bo bum akô; haú mù, danglù haú lé gyai ô nau é myit èq hap yù mù, danglù shî teng a têng é hkyô lé wó sé shoq

ga, nyí wuî Chyúmdang lé chôm nghap wú nyi akô nghut ri. ¹² Haú mù luî, Yudaq byu pé myo myo gi, lumjîng bum akô, haú eq rajung za, aróng wó é Grik myiwe wuî eq yuqgè wuî myo myo le, lumjîng bûm bekô nghut ri.

¹³ Poluq gi, Beria wà mó má le, Garai Gasang é mungdang hko kyô nyi é hkyô lé, Htesaloni wà mó mâ é Yudaq byu pé sé kôjáng, yhangmoq gi, haú má lé kômù, wà byû wuî lé mhoq hpyoq luî, gabyông lò nhang akô. ¹⁴ Haú hkûn, gumang wuî gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyô tô akô nghut ri. ¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló râ matú pying kat é dang lé wun chûng mù, dum taû lò bekô nghut ri.

Poluq, Ahten Myuq Má Nyi É U Lhê Hkyô

¹⁶ Ahkuî, Poluq gi, Ahten myuq má haú nhik lé lîng nyi tô é u lé, haú wà má rawa é hparà lhô baú dut tô é lé myàng mù luî, yhang i-myt gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuî taî sân kyô lhûm nyi akô nghut ri. ¹⁸ Haú mù luî, Epikuri hpaqchyî eq Sto-i hpaqchyî † lé sê é, myit wú hpaqchyî bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byû pyok shí yuq gi, haî wá taî nyi lhê lhú?" ga; ra-am gi, "Góming hparà pé é hkyô lé taî kyo sù nghut sam ri." ga, taî bum akô nghut ri. ¹⁹ Hau htâng, yhangmoq gi, Aripagu gâ é byîn tú wap shut Poluq lé shuî doq ló mù, "Nang mhoqshit é hkyô asik, ngamoq lé sé nhang le a gè lhú? ²⁰ Nang èq taî é maú nhô za gâ é hkyô lé ngamoq wó gyô ri; haú é dang kyîng lé ngamoq sé nau ri." ga taî bum akô. ²¹ (Ahten byu pé eq haú má nyi é góming byu pé lhunghâng bang gi, dang sik lù sik haú lé taî kún gyô kún mù, yhangmoq é ahkyîng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé ê, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gâ le, ngò sô lhîng wún mù nungmoq jaú é ze pé lé rago wú wú lé, 'A sê é Garaî matú.', ga luî, kê tô é hkungga gyap ralhûm lé myang záng ri; haú nungmoq a sê é za jaú nyi é Garaî hkyô lé, ngò, nungmoq lé hkaî kyo kôlé.

²⁴ Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsîng le nghut lhê mù luî, byu loq èq saî é noqkuq yhûm má nyi râ a nghut. ²⁵ Yhang gi, byû lhunghâng bang lé asak, soq, ra mira gumjup shoq byí to sù nghut nyi é

† Epikuri hpaqchyî gi, htang pyat a joq, ahkuî ngón yû râ za ahkyak gâ é nghut lhê. Sto-i hpaqchyî gi, haî wá dut kôlhang i-myt zim za kut mù, htang pyat matú chiq a ra gâ é nghut lhê.

yanmai, rajung jung rã é sũ lé su, byu loq èq dojaú rã sũ a nghut. ²⁶ Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkýng yam-yoq eq nyi rã jowò masat to byi bê nghut ri. ²⁷ Yhang gi, nga-nhúng yuq hkangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. ²⁸ Hkâsu mù gà le, nungmoq é jihkyang kat bang, 'Nga-nhúng le yhang é awut ashín pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.

²⁹ Haũ mù, nga-nhúng gi, Garai Gasâng é yhangzô pé nghut nyi é yanmai, Garaí gùng gi, byu é hpaqchyí loq èq kyûng kã tô é hîng, ngùn, luqgok pé eq pûng lhê nghũ luí hkã-myt yù kó. ³⁰ Laí lò bê haũ myoq a bóng shi é pyat lé, Garai Gasang gi, haí le a ga lhaí pyâm to kôlhang, ahkuí gi, jowò hkangmó mã é byù lhunglhâng bang lé, myit lhîng keq ga hkunmó hkyô to bê nghut ri. ³¹ Hkâsu mù gà le, Yhang hkyin to sũ mai mingkan gón lé tara é dông jéyáng rã buinyi ra-nyí masat to bê nghut ri. Shí hkyô lé, byù lhunglhâng bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yù bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô. ³³ Hau htâng, Poluq gi, haũ zuphpong mai htoq ló byuq bê nghut ri. ³⁴ Nghut kôlhang, byù ra-am gi, Poluq é htâng cháng kômù, lumjíng bang dut bekô nghut ri. Haú bang mã, Aripagu zuphpong mã bo é Dionisi ga sũ le bo ri. Hau htoq agó, Damari gà é myi-we rayuq eq gotû byu pé le, bo bum akô nghut ri.

Poluq, Korinhtuq Myuq Má Nyi É U Lhê Hkyô

18 Hau htâng mã, Poluq gi, Ahten myuq mai htoq luí, Korinhtuq myuq má jé lo ri. ² Haũ mã, yhang gi, Romaq myuq mai Yudaq byù lhunglhâng bang htoq ló byuq rã dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gà é Yudaq byù rayuq lé hui luí, yhangnhik chyáng ê ri. ³ Yhangmoq gi, jonghpang saí zo bang chyat nghut kô é yanmai, muzó pûng kôluí, Poluq gi, yhangnhik eq rahá nyi nyi mù, muzó chôm saí akô. ⁴ Bánno buinyi hkangmó, Poluq gi, tarajong mã Yudaq byù eq, Grik pé lé, taí sân kyo luí, lhoq pun lhoq kýng yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô mã za wum kat luí, haũ Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhang, Yudaq byu pé gi, lhom he-ngik pyám kômù, yhang lé rhoí dang taí pyâm akô; haũ mù, Poluq gi, yhang mebu ko shit é dông yhangmoq lé a nau é hkyô tũn shit uchyang, "Nungmoq é sui mara gi, nungmoq é ulhum mã jé sháng gaq, ngò eq haí a séng lo; ahkuí

mai, ngò gi, tũngbaù pê chyáng e ló berã nghut lhê." ga luí, yhangmoq lé taí ri.

⁷ Hau htâng, yhang gi, tarajong mai htoq luí, jong haũ eq yhep nghut é, Garai Gasang lé noqkuq é Titu Yustu ga su é yhũm mã wang ló ri. ⁸ Krispu gà é tarajong mã up sũ gi, yhang yhumbyù lhunglhâng bang eq rahá, Yhumsing lé lumjíng akô. Korinhtuq myuq byu pé myo myo le, Poluq é dang lé gyô yù mù, lumjíng luí, wui-myhup hkâm yu bum akô nghut ri.

⁹ Ra-myin lé, shing-rán ralhũm mã Yhumsing mai Poluq lé taí é gi, "Hkãgyuq, taí aq, zim za hkã-nyí. ¹⁰ Ngò nàng eq rahá nghut nyi lhê, nàng lé ó yuq èq le haí wó kut rã a nghut, hkãsu mù gà le, myuq shí mã, ngá é byù myo myo nyi bum lhê." gà ri. ¹¹ Haũ mù luí, Poluq gi, Garai Gasâng é mungdang mhogshit uchyang, razàn eq lhamó hkyuq hkyap yhang, haú myuq mã nyi nyi ri.

¹² Galio ga sũ, Ahkaia mau mã é ginwáng zau kut nyi é u lé, Yudaq byu pé gi, myit rahkat zã èq Poluq lé chôm chyup yù kôluí, tarã hpyit wap mã she háng kômù, ¹³ "Byù shí yuq gi, jep é tarã eq shai lhũm é dông, Garai Gasang lé noqkuq rã matú, byu pé lé mhoq hpyoq wún ri." ga mara hũn akô.

¹⁴ Haũ hkũn, Poluq tũ taí rã dã lò jáng, Galio gi, Yudaq byu pé lé, "Yudaq byu pé è, muzó shí gi, tarã lu laí é muzó, haũ a nghut jáng, agè ashop é muzó mai, dut lo é nghut le gi, nungmoq lé ngò gyo byi rã hkyô joq lhê. ¹⁵ Nghut kôlhang, muzó shí gi, nungmoq é tarã eq séng luí, dang eq séng luí, mying eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haũ sũ é muzó mã, ngò gi, tarã agyí kut byi rã a nghut." ga taí mù, ¹⁶ tarã hpyit wap mai yhangmoq lé hkat htoq pyám nhang ri. ¹⁷ Haú hkũn, yhangmoq lhunglhâng bang gi, tarajong mã up sũ Sositeni lé chyup yù mù, tarã hpyit wap hí mã chôm bat akô. Galio kúm gi, haũ hkyô lé hai gùn a kut byi nghut ri.

Poluq, Antioku Wà Mó Má Dum Taũ Jé É hkyô

¹⁸ Poluq gi, Korinhtuq myuq mã buinyi tsómra myáng shoq lumjíng bang eq nyi nyi ri. Hau htâng, yhang gi, haú bang lé shi-kyâm to luí, Priskila eq Akula nhik lé byinzũm kut mù, lhaí ji luí Suriq mau shut e ló akô. Hau hí mã, yhang gi, danggidíq tô tô é yanmai, Kenhkrea wà mã xãm nyhãm pyâm ri. ¹⁹ Yhangmoq Ehpesu myuq mã jé kô é hkũn, Poluq gi, Priskila eq Akula nhik lé nyhi pyâm to luí, yhang baú tarajong mã wàng mù, Yudaq byu pé lé taí sân kyo byí ri. ²⁰ Haũ mã é bang gi, yhangmoq eq rahá rayoq zo nyi shi rã dông yhang lé dung kô é nghut kôlhang, yhang gi, a nhô lo nghut ri. ²¹ Haũ mù, yhang gi, Ehpesu myuq mai lhaí ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé rã nghut lhê." ga, yhangmoq lé danggidíq byí tô ri. ²² Ahkuí, Poluq gi, Kesare wà mó mã ló jé dap jáng, Yerusalem

† Xãm nyhãm pyâm é gi, Yudaq htũng dông rajung jung kut rã matú danggidíq to luí, haũ lé ban kut jáng, yhumsing xãm lé nyhãm pyâm é nghut lhê.

wà mó shut doq ló mù, noqkuq hpúng lé ló huít tô é htàng, Antioku và mó má dum gyó ló ri.

²³ Yhang gi, haû và má rayoq zo nyi é htàng, htoq ló mù, Galatiq mau eq Hprugi mau mai sô lai ló uchyang, rawa htàng rawà mà é chángzô pé lé wum-o lhoq ging byî ri.

Apolo Zui Saî É Muzó

²⁴ Ahkuî, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyî bò sù nghut é htoq agó, Chyúmdang le gyai kúng é sù nghut ri. ²⁵ Yhang gi, Yohan é baptisma hkyô lé za sé sù nghut kôlhang, Yhumsing é hkyô lé mhoq yû bê nghut luî, Yesuq é hkyô pé lé mhoq yu to bê eq rajung za wum zuq tung ga luî, hkyak hkyak mhoqshit byî ri. ²⁶ Ahkuî, yhang gi, gyuq kyûm myit a bo é za tarajong má taî hi ló ri. Haú hkûn, Priskila eq Akula nhik gi, haû lé wó gyo kôjáng, yhang lé ji yù mù, Garai Gasâng é mungdang hkyô lé azó tung taî sân kyo byî akô nghut ri.

²⁷ Apolo gi, Ahkaia mau shut dap e ló nau é hkûn, gumang wuî gi, yhang lé wum saî byi mù, yhang lé lhom hkûlum yù râ matú, chángzô pê chyáng laiká ká byî kat akô; yhang gi, jé jáng, Garai Gasâng jeju mai lumjúng bê bang lé, gyai yhang wó garúm sù dut bê nghut ri.

²⁸ Hkâsu mù gâ le, yhang mai, Yesuq gi, Hkrisduq yhang nghut nyi ri ga luî Chyúmdang má tân shit uchyang, byu pê hí má Yudaq byu pé lé, wum kat wó taî ung pyâm é yanmai nghut ri.

Poluq, Ehpesu Myuq Má Nyi U Lhê Hkyô

19 Ahkuî, Apolo gi, Korinhtuq myuq má nyi tô é hkûn, Poluq gi, mau káng mai sô lai ló mù, Ehpesu myuq má jé ri. Haú má, yhang gi, chángzô pé ram eq hui luî, ² yhangmoq lé, "Nungmoq gi, lumjúng é hkûn, Chyoiyúng Woi-nyí lé, wó yû bekô lhú?" ga myî ri.

Haú hkûn, yhangmoq gi, "Chyoiyúng Woi-nyí nyi lhê gâ é lhang, ngamoq a wó gyô wú." ga tû taî akô.

³ Haû mù, Poluq gi, "Haû nghut jáng, nungmoq gi, haí jung baptisma hkam yù kô é lhú?" ga luî, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tû taî akô.

⁴ Haú hkûn, Poluq gi, "Yohan é baptisma nghu é gi, myit lhîng mù wui-myhup hkâm yu é hkyô lé gâ lhê. Yohan gi, yhang é htàng má jé lé râ sù, haû Yesuq lé sheq lumjúng râ lhê ga shiwa byu pé lé taî ri." ga taî ri.

⁵ Yhangmoq gi, dang haû lé wó gyo kôjáng, Yesuq é myîng lang luî baptisma byî é lé, hkam yu bum akô.

⁶ Poluq gi, yhangmoq é htoq má loq ke byi jáng, haû Chyoiyúng Woi-nyí gi, yhangmoq htoq má jé lé mù, yhangmoq gi, laklaí dang nyo lo é htoq agó myiqhtoi le htoî lo bum akô. ⁷ Haú bang lhunglhang gi, yuqgê raxe í yuq kó nghut ri.

⁸ Hau htàng, Poluq gi, tarajong má wàng luî, gyuq kyûm myit a bo é za lhamó sum hkyap Garai Gasâng é mingdán hkyô lé taî sân kyo mù, lhoq pun lhoq kyîng

yu ri. ⁹ Nghut kôlhang, ra-am gi, myit htan lo bùm kôluî a kâm lumjúng kô é htoq agó, haû Yhumsing é Hkyô lé byu pê hí má lhoq hpoî pyám byi kôjáng, Poluq gi, yhangmoq chyáng mai htoq luî, chángzô pé lé shuít chûng mù, Turanu gá su é hpaqchyî mhoq jong má, nyí wuít taî sân kyô lhûm nyi akô. ¹⁰ Haû su kut í zân yhang mhoqshit nyi é yanmai, Asia mau gón mà é Yudaq byu pé eq Grik pé lhunglhang bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq đông laklaí kumlhá kut ri. ¹² Haû mù, Poluq chyáng mà é hpajet eq hpyihit rajung jung lé, nò bang chyáng yu ló mù, ló záng byi jáng lhang, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

¹³ Haû u lé, nat hkat htoq wun é Yudaq byu pé ram gi, agè ashop é nat pé lé, "Poluq hko taî é Yesuq é myîng mai, ngò, nungmoq lé hkat htoq lhê." ga, agè ashop é nat wang júng to bang é ahtoq má, Yhumsing Yesuq é myîng lé lang luî, hkat chyam wú akô. ¹⁴ Skewa gâ é, Yudaq hkyangjong agyî rayuq é yuqzo nyhit yuq le haû su kut wun akô. ¹⁵ Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tû taî mù, ¹⁶ agè ashop é nat haû wang júng é byù gi, yhangmoq htoq má byam doq jî to luî, nhuq bat yù mù yhangmoq lé ung pyâm ri. Yhangmoq gi, yhûm haû mai gùngchîn sui nê yang yang hpang htoq ló bekô nghut ri.

¹⁷ Haû hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhang bang gi, chôm gyô gyuq bum akô. Yhumsing Yesuq é myîng gi, hkya-on lhoq toq é hui bê nghut ri. ¹⁸ Lumjúng bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akô. ¹⁹ Myoqheq hpaqchyî kut zô é bang le, yhangmoq é laiká lé yu lé kôluî, shiwa byu pê hí má nyhê hkyô pyâm akô. Mausau haú pê é ahpaú lé sôn wú le, ngùn chap ngo mun záng ri. ²⁰ Haû đông mai, haû Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htàng má, Poluq gi, Makedoni mau eq Ahkaia mau đông sô lai ló mù, Yerusalem và mó má ló jé râ ga myit hpyit yû luî, "Haû má ló jé tô é htàng má, ngò, Romaq myuq má le, jé wú râ dut ashî." ga taî ri. ²² Haû mù, yhang lé htuqbang garúm é Timothi eq Erastu nhik lé hí Makedoni mau shut nhang kat luî, yhang gi, Asia mau má rayoq rabun zo nyi gyó tô ri.

²³ Haû yoq lé, haû Yhumsing é Hkyô yanmai gyai yhang gabyông lo bum akô. ²⁴ Demetri gâ é ngùn bat zo sù rayuq gi, Artemi hpara é ngùn yhûm zòng zo sai luî, mù sai luzúm wuít lé wó sùt nhang nyi ri. ²⁵ Yhang

gi, yhang é ngùn bat zo luzúm wuî eq haú jung amû kut é góbang lé le ji tsîng to mù, taí é gi, "Luzúm wuî ê, muzó shí lhùm é yanmai, nga-nhúng nyi ngón yuqyo nyi é hkyô lé, nungmoq sê lhê. ²⁶ Nghut kôle, ahkuî gi, Ehpesu myuq má za le a nghut lo, Asia mau lhang aluq jam shoq, byu loq eq saí é zè lé, garaí pé a nghut ga, shí Poluq ga sù mai byù myo myo lé mhoq hpyoq yù mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô. ²⁷ Haú mù luí, nga-nhùng é muzó shí gi, hpoi byuq râ lé chiq râ é za a nghut, hparà myhí mó Artemi é noqkuq yhùm gi, haí a dut byuq luí, Asia mau gón eq mingkan gón mai noq é hparà myhí é shingkan hpoi byuq râ lé le myit chiq râ dut bê." gâ ri.

²⁸ Yhangmoq gi, dang haú lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ô!" ga chôm garû bum akô.

²⁹ Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poí wàng mó shut radá dâm chýin chyap wang ló bum akô. ³⁰ Poluq gi, moq hpúng hau hí má htoq shit naú kôlhang, chángzô pé gi, yhang lé a wàng nhâng kó nghut ri. ³¹ Poluq é luzúm wuî nghut é, haú mau má é suwún wuî ra-am lhang, yhang lé poí wàng hkaú má a ê râ matú, hkùm pyám nhang akô nghut ri.

³² Zîng tô é bang gi, hai hù hâng le a sé lo dut byuq kômù luí, ra-am rajung ga garû bum akô. Myo mi-myo gi, haí mù luí yhangmoq haú má nyi tô é lé lhang a sê bùm kó nghut ri. ³³ Yudaq byu pé gi, Alesander lé hí má chôm chýn htoq kat kôluí, shiwa hpong mai ra-am gi, yhang hká dông taí râ hkyô lé mhoq byi kat akô. Alesander le shiwa hpong lé taí san kyo naú luí, zim byuq râ matú loq tu ri. ³⁴ Nghut kôlhang, Alesander, Yudaq byù nghut é lé sé kôjáng, yhangmoq lhungl-hâng bang gi, rahtê za kut kôluí, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garû bum akô.

³⁵ Haú, myuq chyare hpó gi, shiwa moq mó lé lhoq zim luí taí é gi, "Ehpesu myuq byu pé ê, Ehpesu myuq shí gi, Artemi myhí mó é noqkuq yhùm eq mauhkung mai byit gyó lo é yhang é alhô lé, wú zúng nyi é wà nghut é hkyô lé, mingkan má a sê é ó yuq wa nyi lhê lhú? ³⁶ Haú mù luí, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko. ³⁷ Shí nhik gi, noqkuq yhùm lé hpyoq zo su nhik le a nghut, nga-nhùng é hparà myhí lé lhoq hpoi su nhik le a nghut kô é le nhîng, nungmoq shuí lé bekô nghut ri. ³⁸ Demetri eq yhang é ngùn bat zo luzúm wuî gi, rayuq yuq é ahtoq má mara hùn râ hkyô joq kô é nghut jáng, tarâ rûng pé hpông tô lhê. Tarâ agyí pé nyi lhê. Haú má yhangmoq ê kó sháng gaq.

³⁹ Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyám râ nghut lhê. ⁴⁰ Hkû-nyí gabyông é mù shí má, mù htoq wang a bo é yanmai, nga-nhúng lé mara hùn râ chiq râ ri. Shí su kut chôm míng é hkyô lé, hai é yanmai nghut lhê nghû, nga-nhúng a wó taí kyo nghut ri."

gâ ri. ⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

Makedoni Mau Éq Grik Mau Đông Lai Ló É U Lhê Hkyô

20 Haú gabyông é hkyô zîm byuq é htâng má, Poluq gi, chángzô pé lé ji yù luí, yhangmoq lé wum byi dang taí to mù, shi-kyâm to luí, Makedoni mau shut htoq e ló bê nghut ri. ² Yhang gi, haú mau mai sô lai ló uchyang, byu pé lé wum byí é dang myo myo taí luí, Grik mau má ló jé bê. ³ Yhang haú má lhamó sum hkyap nyi yù mù, lhai ji luí Suriq mau shut ê râ hen nyi é hkûn, Yudaq byu pé gi, yhang lé gyám nyí kô é yanmai, yhang gi, Makedoni mau dông tau lò râ lé myit hpyit bê nghut ri. ⁴ Yhang eq rabyìn za châng é bang gi, Beria wà mó mâ é Purû yhangzo Sopata, Ht-esaloni wà mó mâ é Aristakuq eq Sekundu nhik, Derbe wà mó mâ é Ge-u, Timohti, Asia mau mâ é Tuhkiku eq Trohpinu nhik pé nghut akô. ⁵ Yhangmoq gi, hí so lánng luí, ngá-nhik lé Troa myuq má ló lánng nyi akô. ⁶ Nghut kôlhang, ngá-nhik gi, Azuma Poí † lai é htâng má, Hpilipi wà mó mai lhai ji ló le, ngo nyí nghû jáng, Troa myuq má yhangmoq lé hui luí, haú má nyhit nyí chôm nyi é nghut lhê.

Troa Wà Má, Utuhku Ga Sù Lhoq Tui Toq Huí É Hkyô

⁷ Rabat é sâng-hi nyí lé, ngamoq gi, muk hpê gàm râ matú lé chôm zup zîng tô é hkûn, Poluq gi, htang nyí ló byuq râ ga hen tô é yanmai, chángzô pé lé gung-gàm jé shoq hko kyô nyi ri. ⁸ Ngamoq zup zîng nyi é haú ahtoq pyâm wap má, myibung myo myo le duq tô ri. ⁹ Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luí, yhùm sum tsáng mai byit gyó mù, yhang lé bún toq wú le shi byuq bê nghut ri. ¹⁰ Haú hkûn, Poluq gi, gyó ló mù, po ngop to luí, "Hkâdân ko, yhang soq bo ashí." ga taí ri. ¹¹ Haú mù, yhang gi, dum tau doq ló luí, muk lé hpé mù, zo luí, maubó shoq yhangmoq eq dang nyo kún mù htoq ló bê nghut ri. ¹² Zorâm zo haú lé duí gù shuí ló kômù, nhik tîng é gyai yhang hui bekô nghut ri.

Troa Wà Eq Melitu Wà Gyoro Mã É Hkyowui

¹³ Poluq gi, myi hkyô ló râ matú hen tô é yanmai, yhang lajang byí é eq rajung za, yhang lé Asu wà má lhai lhom shuí ji râ matú, ngamoq gi, lhai ji mù hí ló lánng bê nghut lhê. ¹⁴ Haú mù, yhang gi, Asu wà má ngamoq eq hui luí, ngamoq gi, yhang lé lhai má shuí jî chûng mù, Mitulene myuq shut e ló bê. ¹⁵ Htang nyi, ngamoq gi, haú mai lhai ji mù, Kiu zinlóng yâm mai lai ló luí, hau htang nyí gi, Samu zinlóng má lai dap ló luí, htang nyí gi, Melitu wà mó má jé ló bê nghut lhê. ¹⁶ Poluq gi, wó dut é nghut jáng, Penteko-ti buinyi lé Yerusalem wà mó má wó jé shoq gâ é yanmai, Asia mau má buinyi a kâm lhoq htum naú mù luí, Ehpesu myuq lé lhai pyâm to râ matú, myit hpyit to bê nghut ri.

† Múnchi a bo é Muk zo Poí lé, Azuma Poí le gâ lhê.

Ehpesu Hpúng Suwún Wuí Lé, Poluq Shi-kyâm Tô É Dang

¹⁷ Poluq gi, Melitu wà mó mai Ehpesu shut byù nhang kat luí, hpúng suwún wuí lé é jî nhang ri. ¹⁸ Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyi mai, nungmoq eq hkâsu kut nyi nyi é ahkyíng banshoq lé le; ¹⁹ Yudaq byu pé jeq hô luí, ngò wuîhke jamjau hui zo kôlhang, haú Yhumsing é muzó lé, ngò myit gyai lhoq nyhûm é eq ngaubyi ngaù nhap é èq wùn waq é hkyô lé le; ²⁰ nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pé hí eq rayhûm htâng rayhûm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhîng mù Garai Gasâng chyáng lhing lò ra eq, nga-nhûng é Yhumsîng Yesuq lé lumjîng ra hkyô lé, saksé hkâm kyo lugù nghut bê lé le, nungmoq sê nyi akô.

²² Ahkuí, ngò gi, Woi-nyí má tuí tô é hui bê yanmai, Yerusalem wà mó má e lô lhê; haú má, ngò haí ló dut râ lé kúm gi, a sé nghut ri. ²³ Ngò gi, htóng eq wuîhke jamjau hkyô ngo lé lánng tô ri ga, wà hkanngó má Chyoyíyung Woi-nyí èq lhoq pûn é hkyô lé za sê nyi lhê. ²⁴ Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsîng Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

²⁵ Garai Gasâng é mingdán hkyô lé hko kyô wún é hkûn, ngò eq huí é nungmoq lhunglhâng bang gi, htâng nùng má ngo lé a myàng lo kó râ nghut é lé, ahkuí ngò sê to bê. ²⁶ Haú mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkâm tô lhê. ²⁷ Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê.

²⁸ Nungmoq gi, yhumsing gùng lé le, nungmoq lé Chyoyíyung Woi-nyí èq up zúng nhang é sau hpúng † lhunglháng lé le, zúng nyí keq. Garai Gasang Yhâng suí èq wui tô é noqkuq hpúng lé le, rém zúng nyí keq.

²⁹ Ngò ló byuq é htâng má, sau hpúng lé a shogyô é, ashop é wamhkuí gi, nungmoq chyáng jé râ nghut é hkyô lé, ngò sê lhê. ³⁰ Hau htoq agó, chángzô pé lé wó mhoq hpyoq yû shoq ga, shut é òng taí é byu pé lháng nungmoq chyáng mai htoq lô râ nghut lhê.

³¹ Haú mù luí, nungmoq yuq hkanngó lé, ngò sum zân tup ngaubyi ngaù-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyi keq.

³² Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq tîng mù, lhoq chyoyíyung é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hîng, ngùn, mebu pé lé le a myoqnoq wú. ³⁴ Ngá é loq shí í loq gi, ngò eq ngá htâng châng é bang ra chá é lé kut byi bê hkyô lé, nungmoq yhang sé gú

nghut lhê. ³⁵ Ngò kut é muzó banshoq gi, nungmoq é alik dut bê nghut luí, shí su kut shikut é òng mai, nga-nhúng gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsîng Yesuq taí é dang lé bûn nyi sháng." gâ ri.

³⁶ Poluq gi, haú su ga ban taí jáng, hkyihput htuq mù, yhangmoq lhunglhâng bang eq rahá za kyûdûng ri. ³⁷ Yhangmoq lhunglhâng bang gi, yhang lé po to luí, bopuq puq mù, chôm ngaù akô. ³⁸ Htâng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhaí má jé shoq lé châng dé kat akô nghut ri.

Yerusalem Wà Mó Shut Doq Ló Nyi É U Lhê Hkyô

21 Ngamoq gi, yhangmoq lé kang pyâm to luí, lhaí jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê. ² Haú wâ má Hpinisi mau shut dap ló é lhaí lé, ngamoq myàng luí, haú mai chôm jî chûng bê. ³ Haú hkûn, ngamoq gi, Kupru zinlóng lé myàng jáng, hau é loqyo hkyam òng lai ló luí, Suriq mau shut e lô le, hpugá zê lé hkyô râ matú, Turuq myuq má nô é nghut lhê. ⁴ Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzo haú bang gi, Chyoyíyung Woi-nyí èq lhoq pûn é òng Poluq lé Yerusalem wà mó shut a ló râ matú, chôm hkûm akô. ⁵ Nghut kôlhang, nyhit nyí haú lai jáng, ngamoq gi, ngamoq é hkyowui shut dum xoq sô htoq ló bê. Chángzô pé lhunglhâng bang gi, yhangmoq é myi zo wui eq rahá, ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyâm má hkyihput htuq mù, kyû chôm dung bê nghut lhê. ⁶ Hau htâng, rayuq eq rayuq ban shi-kyâm lhum jáng, ngamoq gi, lhaí má wàng bê; yhangmoq gi, yhûm shut dum tau ló byuq bekô nghut ri.

⁷ Ngamoq gi, Turuq myuq mai lhaí jî chûng mù, Toleme wà má jé ló bê. Ngamoq gi, haú wâ mâ é gumang wui lé shichyên yù mù, yhangmoq eq rahá ranyí chôm nyi kûn é nghut lhê. ⁸ Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang nyhit yuq †† má bò sù, gabú danglù hko taí é Hpilip gá su é yhûm má, ngamoq wang bíng bê nghut lhê. ⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. ¹¹ Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyí pé má tui mù luí, taí é gi, "Shí hpyihit yhumsîng lé, Yerusalem wà mó mâ é Yudaq byu pé mai shí su kut lhom tui luí, tûng-baù pé é loq má ap pyám kó râ nghut lhê;" ga luí, Chyoyíyung Woi-nyí taí ri." gâ ri.

¹² Dang haú lé wó gyo jáng, haú mâ é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkúm bê nghut lhê. ¹³ Nghut kôlhang, Poluq gi, "Nungmoq gi, haí mù luí ngaubyi

† Sau hpúng gâ é gi, lumjîng é bang lé gâ lhê.

†† Lagyo 6:1-6

ngau-nhap kut é eq, ngo lé myit wum gyui râ đông kut nyi akô lhú? Ngò gi, Yhumsing Yesuq é yanmai, Yerusalem và mó má, tuí é hui râ za a nghut, shî hkâm râ matú le rì rì nghut lhê." ga tũ taí pyâm ri. ¹⁴ Yhang lé wó taí hkúm râ su a dut lo jáng, ngamoq gi, "Garai Gasang ô nau é đông nghut sháng gaq." nghu luí, zim za chòm nyi bùm bê.

¹⁵ Hau htâng má, ngamoq gi, zè món chùng mù Yerusalem và mó shut doq ló bê nghut lhê. ¹⁶ Kesare và mó má é chángzô pé ra-am le, ngamoq eq rabyin za nghut kôluí, yhangmoq gi, ngamoq lé Kupru byù Manason ga sũ, hí hí lhê é chángzo rayuq é yhùm má shuí ló mù, yhâng chyáng bíng nhang akô.

Yerusalem Và Mó Má, Yakuq Lé Ê Huí É Hkyô

¹⁷ Yerusalem và mó má ngamoq jé é hkûn, gumang wuì gi, ngamoq lé gabú tung lhom hkûlum yu akô.

¹⁸ Htang nyí, Poluq eq ngamoq gi, Yakuq lé ê huí le, hpúng suwún wuì le zing nyi to lánng akô. ¹⁹ Poluq gi, yhangmoq eq ban shichyen jáng, yhang wùn waq laí lo é hpúng mù đông mai, Garai Gasang eq tũngbaù pè chyáng kut byi bê hkyô pé lé, jihkúm nuqquq shit kyô ri.

²⁰ Yhangmoq gi, haù lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjínng é bang hkâ-myhó hkyíng mun nghut bê lé, nàng sê lhê. Haù bang lhunglháng gi, jep é tarâ má myit zuq to bê bang chyat nghut bum akô. ²¹ Nghut kôlháng, yhangmoq lhunglháng bang gi, tũngbaù pè chyáng nyó lúng tô é Yudaq byù banshoq bang lé, nàng, yhumsing yhangzo yhangshũ pè é matú ahpoy-kuq hpyit a ra nghu é eq nga-nhùng é htùng tarâ lé châng nyi a ra nghu luí, Mosheq é tarâ lé tô pyám râ đông mhoqshit ri gâ é dang lé, wó gyô yu bùm bekô nghut ri. ²² Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu kut lo râ lhú? ²³ Haù mù, ngamoq taí é đông kut aq, ngamoq chyáng danggidiq mó byi bê byù myi yuq nyi lhê.

²⁴ Nàng gi, haù bang lé ji yù mù, yhangmoq eq rahá lhoq san lhoq yúng yũ aq, yhangmoq lé u wó wuq yũ râ matú, ahpau le htoq byi aq. Haù hkûn sheq, byù lhunglháng bang gi, yhangmoq wó gyô tô é hkyô a têng byuq é eq, nàng yhang lháng, jep é tarâ lé, châng kut nyí sũ nghut é hkyô lé, sé kó râ nghut lhê.

²⁵ Lumjínng é tũngbaù pè é matú kúm gi, hparà lhô pé lé tĩng byí é zoshuq, sui, lingzing mai myhik sat é dusak sho eq ashop é đông gungsho zùm yap é hkyô pé lé, yhangmoq koi pyám râ matú, ngamoq chòm doqdan luí, kâ hũn kat bê nghut lhê." ga akô.

²⁶ Haù mù luí, Poluq gi, hau htang nyí haù bang lé ji yũ luí, yhangmoq eq rahá, lhoq san lhoq yúng yũ mù, noqkuq yhùm má wàng luí, yhangmoq yuq hkangmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

Poluq Chyup Yũ Huí É Hkyô

²⁷ Buinyi nyhit nyí haù ngap râ yàm má, Asia mau má é Yudaq byu pé ra-am gi, noqkuq yhùm má Poluq lé myàng kômù, shiwa byu pé lé shuí gabyong luí, yhang lé chyup yũ mù, garũ taí kô é dang gi, ²⁸ "Israelaq byu pé ê, garúm yũ keq, shí yuq gi, nga-nhùng byuhú lé le, jep é tarâ lé le, jowò shí lé le, shut shai é đông jowò hkangmó má é byù banshoq lé mhoqshit sũ nghut ri. Hau htoq agó, noqkuq yhùm má Grik pé lé shuí háng é eq, chyoyúng jowò shí lé achayut kut é sũ nghut ri." gâ akô. ²⁹ (Hkâsu mù gâ le, yhangmoq gi, Ehpesu myuq byù Trohpimu ga sũ eq Poluq và hkaù má rahá nghut kô é lé, myàng kômù, haù yuq lé noqkuq yhùm shut shuí háng nhô ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lhinghkyuq mai din lé lô kôluí, Poluq lé chyup zing to uchyang, noqkuq yhùm shinggan shut she hkyut htoq ló akô. Haù hkûn jáng, hkum pé lé myhí pyâm akô nghut ri. ³¹ Poluq lé yhangmoq sat râ dâ nyi kô é hkûn, Yerusalem và gón gabyông nyi akô gâ é hkyô lé, Romaq dap up zaù é no má, lò jé ri. ³² Haù mù, yhang gi, radá dâm shô up gyezau ra-am eq gyezô pé lé shuí chùng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyíng byuq akô nghut ri.

³³ Haù hkûn, dap up zau hpó gi, Poluq chyáng ê jé mù, yhang lé chyup yũ luí, toqjâng tui í hkat eq tũ to nhang ri; hau htâng, yhang ó yuq nghut é hkyô lé le, haí kut shut é hkyô lé le myí wú ri. ³⁴ Shiwa byu pé kúm gi, rayuq rajung ga garũ bum akô. Haù mù, gyezau hpó gi, lùm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri. ³⁵ Poluq gi, zumhtâng wang má jé lo é hkûn, byù moq mó lùm htim chyín chyap lô kô é yanmai, gyezô pé gi, yhang lé waq doq ló akô. ³⁶ Shiwa byu pé gi, "Yhang lé sat pyám keq." ga châng garũ nyi akô nghut ri.

Poluq, Yhumsing Gùng Mara A Bo É Lé Taí Sân Kyô É Hkyô

³⁷ Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ lhú?" ga myi jáng, dap up zau hpó gi, "Nàng, Grik myíng dat mu lhê lhú?" ³⁸ Nàng gi, hí hkûn gumlau kut mù, byù sat wún bang myi hkyíng lé, yoso shut shuí htoq ló é sũ, Egotuq byũ a nghut lhú?" ga tau myí ri.

³⁹ Haù hkûn, Poluq gi, "Ngò gi, Kiliki mau Tarshu myuq má é Yudaq byù nghut lhê; ngò nyi é và gi, và chyap và zo za a nghut, jeju mai, byù shí bang lé ngò dang taí râ ahkáng byi laq." ga dũng ri.

⁴⁰ Gyedap up zau hpó ahkáng byi jáng, Poluq gi, zumhtâng má yap to mù, shiwa byu pè shut loq he ri. Haù hkûn, yhangmoq lhunglháng bang zim byuq kômù, Poluq, yhangmoq lé Hebre myíng đông taí é gi,

22 "Gumang wuì eq ìwa pé ê, ahkuì, ngò mara a bò nghu taí é dang lé gyô wú shi keq." gâ ri.

² Yhangmoq gi, yhang Hebre myíng dông taí é dang lé wó gyô bùm kôjáng, gyai yhang zím byuq bekô. Haú mù, Poluq xoq taí é gi, ³ "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhang, wà mó shî má nyi kô lò sù nghut lhê. Ngò gi, nga-nhông ìchýí ìwa pé é jep é tarâ lé, Gamalelaq é loq má jihkúm nuqguq mhoq yù luí, hkû-nyí lhê é nungmoq lhunglhâng bang su, Garai Gasang lé gyai myit zing zuq é sù nghut lhê. ⁴ Ngò gi, shí Hkyô cháng bang lé shi é jé shoq, zing-rí wú é sù eq, myiwe yuqgè ó yuq lé nghut kôlhang, chyup yù mù htóng má lhông pyâm wú bê sù nghut lhê. ⁵ Hkyangjong mó eq byìn tú wap suwún wuì lhunglhâng bang gi, ngá é saksé pé nghut akô. Ngò gi, Damaskuq myuq má nyi é yhangmoq é Yudaq gumang wuì lé byi râ laiká yhangmoq chyáng mai wó yu chông luí, haú mã é bang lé le Yerusalem wà mó má dam byi râ matú, chyup tuí ló râ nghù, Damaskuq myuq shut e é nghut lhê.

⁶ Nyigông tú zó lé, ngò Damaskuq myuq shut sô chyâng ló nyi é hkûn, maubó gi, ngá é lhinghkyuq má mauhkông mai byodàn tung duqbó to bê nghut ri. ⁷ Haú mù, ngò myigông má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rí nyi lhê lhú?' gâ ri.

⁸ Ngò le, 'Yhumsîng ê, nàng ó nghut lhê lhú?' nghu myí kat jáng, 'Ngò gi, nàng zing-rí wún é sù, Nazaret wà byù Yesuq nghut lhê.' ga luí, Yhang tú taí kat ri.

⁹ Ngò eq rahá e ló é bang kúm gi, maubó lé myàng kôlhang, ngo lé taí é danghtê lé a sê gyo kó nghut ri.

¹⁰ Dum, ngò gi, 'Yhumsîng ê, ngò haí kut ra râ lhú?' nghu myi jáng, haú Yhumsîng gi, 'Toq mù, Damaskuq myuq má wang ló aq, nàng kut râ matú wò byí tô é hkyô pé lhunglhâng, nang lé haú má lhom taí kyo berá nghut lhê.' ga ngo lé dum taí ri. ¹¹ Haú maubó é shingông é yanmai, ngò myoqjit byuq mù, ngá é byinzùm wuì gi, Damaskuq myuq shut ngo lé loq mai she wang ló akô.

¹² Haú hkûn, Anani gâ é yuqgè rayuq ngá chyáng lé huí ri. Yhang gi, jep é tarâ lé gyuq hkunggâ é eq, haú má nyi é Yudaq byù lhunglhâng bâng é hí má myoqdong gyai wó é sù nghut ri. ¹³ Yhang gi, ngá nâm má yap to luí, 'Gumang Sholuq ê, nàng myoq myàng aq hkoì!' ga taí ri. Haú hkûn jáng yhang, yhang lé ngò wó myang kat bê nghut lhê.

¹⁴ Yhang dum xoq taí é gi, 'Nga-nhông ìchýí ìwa pé é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myàng luí, Yhông é nhut mã é mungdang lé wó gyo sháng gaq ga luí le, hkyin to bê nghut ri. ¹⁵ Haú mù, nàng gi, nàng myang é eq wó gyô yu é hkyô pé lé, byù lhunglhâng bâng é hí má, Yhông é matú saksé hkám byi râ su dut râ nghut lhê. ¹⁶ Ahkuì, nàng haí lé lánng nyi ashî lhú? Toq aq, Yhông é myíng lé lang luí wui-myhup hkâm yu é eq, nàng é yubak mara pé lé chî sân pyám aq.' gâ ri.

¹⁷ Hau htông, ngò gi, Yerusalem wà mó má dum taú jé ló mù, noqkuq yhùm má kyû ê dúng nyi le, moq

byuq ló mù, ¹⁸ 'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsîng ngo lé taí nyi é lé, myoqwup shing-rán dông myang ri.

¹⁹ Haú mù, ngò gi, 'Yhumsîng ê, tarajong ralhùm htông ralhùm má nang lé lumjîng bang lé, htông má chyup lhông pyâm é eq, hkat bat lhing wún é hkyô lé, yhangmoq sê bum akô. ²⁰ Náng é saksé Stehpan sat hui luí suí shun u lé, ngò nâm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byí é nghut lhê.' nghu tú taí bê.

²¹ Haú hkûn, Yhumsîng gi, 'Ê aq, ngò, nang lé, wê gâng é tûngbaù pé chyáng nhang kat râ.' ga, ngo lé taí ri." gâ ri.

Poluq, Romaq Mingdán Byù Nghut É Hkyô

²² Shiwa byu pé gi, dang haú hkun jé za gyô yù kômù, "Shî sù é byù gi, myigông htoq má nyi a gíng, sat pyám keq." ga, htê mó eq garû bum akô.

²³ Yhangmoq gi, haú su garu uchyang, yhumsîng buhîng lé hkyut dú pyâm lhê, hpuilhup lé mauhkông shut kyaq tâng lhê, kut nyí kôjáng, ²⁴ dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haí mù shî su ga garû bùm kô é hkyô lé wó sé shoq ga, nhuq bat nhâng luí, myí choq nhang ri. ²⁵ Nhuq bat râ matú shokuq tuí eq tui kôjáng, Poluq gi, nâm má yap tô é shô up gyezau lé, "Romaq mingdán byù ru nghut sù lé nhîng, lháng a jéyáng shimá, nungmoq nhuq bat le gi, tarâ wang akô lhú?" ga taí ri.

²⁶ Rashô up gyezau gi, dang haú lé wó gyo jáng, dap up zau chyáng ló mù, "Nàng haí kut râ dã nyi lhê lhú? Shí yuq gi, Romaq mingdán byù sheq ru nghut ri." ga luí, yhang lé ló taí kyô ri.

²⁷ Haú mù, dap up zau gi, Poluq chyáng ê mù, "Nàng gi, Romaq mingdán byù nghut lhê lhú? Taí kyô wú laq." ga myí ri.

Poluq gi, "Ngò, Romaq mingdán byù nghut lhê." ga tú taí ri.

²⁸ Haú hkûn, dap up zau hpó gi, "Ngò lháng ahpau myo myo byí pyám luí sheq, Romaq mingdán byù ru wó dut é nghut lhê." ga tú taí jáng, Poluq gi, "Ngò kúm gi, Romaq mingdán byù dut gû hku lé lo é sù nghut lhê." ga taí ri.

²⁹ Yhang lé myí choq wú râ gâ é bang gi, haú hkûn jáng, yhông chyáng mai huí zut ló bùm bekô. Gyedap up zau hpó le, Poluq gi, Romaq mingdán byù nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byìn Tú Wapdoq Suwún Wuì Gam Hkoq Byuq É Hkyô

³⁰ Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuì lhungl-

háng lé ji tsîng to luî, yhangmoq é gung gûng má Poluq lé shuí wàng mù, shap to bê nghut ri.

23 Haú hkûn, Poluq gi, Yudaq byin tú wapdoq suwún wuí lé wú tsuq to mù, "Ngá gumang wui ê, ngò gi, hkû-nyí jé shoq Garai Gasâng é hí má san-sêng é i-myt èq asak dui nyi bê nghut lhê." ga taí ri. ² Haú mù luî, hkyangjong mó Anani gi, Poluq nâm má yap to bang lé, yhang nhut má bat byi keq gâ ri. ³ Haú hkûn, Poluq gi, yhang lé, "But hpyu tô é xewâm † nàng ê, nàng lé sheq Garai Gasâng èq bat râ nghut lhê. Nàng gi, tarâ eq rajung za ngo lé jéyáng râ matú shí má zung to luî nhîng, haí mù tarâ eq shut shai é dông ngo lé bat nhang lhê lhú?" ga taí ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lhú?" ga luî, chòm taí akô.

⁵ Poluq gi, "Gumang wui ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyû lé up é sù lé wó rhoi râ a nghut.' †† ga le kê tô é nghut lhê." ga tû taí ri.

⁶ Hau htâng, haú zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byin tú wapdoq suwún wuí lé, "Gumang wui ê, ngò gi, Hparishe awut ashín mâ é, Hparishe rayuq nghut lhê. Shí bê bang dum dui toq lô râ hkyô lé myit myoqbyû é yanmai, ngò jéyáng é huí nyi ri." ga luî, garû taí kat ri. ⁷ Yhang haú su ga taí kat jáng, Hparishe pé eq Saduke pé gi, dang jet jet lhâm lò kômù, Yudaq byin tú wapdoq hpong gi, gam hkoq ló byuq bekô nghut ri. ⁸ (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taí bum akô. Hparishe pé kúm gi, haú pé joq lhê ga, lumjîng bang nghut akô.)

⁹ Haú mù luî, gyai yhang taí garû bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu ngû kó râ lhú?" ga luî, zuq zuq taí htîng lhâm akô nghut ri.

¹⁰ Haú su kut gyai yhang taí htîng lhâm lò kôjáng, dap up zau hpó gi, Poluq lé lêng myha pyám kó râ lé chiq é yanmai, yhangmoq chyáng gyó ê mù, Poluq lé haú bâng é gung gûng mai ê lú shuí lò luî, gyewap má shuí wang ló râ matú, gyezô pé lé nhang kat ri.

¹¹ Haú myîn, Yhumsîng gi, Poluq é nàm má yap to luî, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taí ri.

Poluq Lé Sat Râ Haq Dâ É Hkyô

¹² Htâng napkyó, Yudaq byu pé gi, Poluq lé sat râ hpaqchyí chòm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri.

¹³ Hpaqchyí shí lé chòm dâ é bang gi, myi xê yuq chyân nghut bum akô. ¹⁴ Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat

gi, ngamoq haí le a zo ngû, chòm dakam yu to bê nghut lhê. ¹⁵ Hau é yanmai, ahkûn nungmoq gi, Yudaq byin tú wapdoq suwún wuí eq rahá kut luî, Poluq é hkyô lé rago za myí gon wú râ nghu mhaú é dông, yhang lé nungmoq chyáng wut yù râ matú, dap up zaú chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga taí akô.

¹⁶ Nghut kôlhang, haú lhom haq sat kó râ gâ é hkyô lé, Poluq é yhang nhammó é yhangzo yuqgè zo wó gyô yù luî, yhang gi, gyewap má wang ê mù, Poluq lé ê taí kyô ri.

¹⁷ Haú hkûn, Poluq gi, shô up gyezau rayuq lé ji yù mù, "Zorâm shí lé dap up zaú chyáng shuí ê aq, yhang, yhang lé shit kyo râ hkyô rajung joq lhê ga." ga taí ri.

¹⁸ Haú mù luî, shô up gyezau hpó gi, zorâm haú lé dap up zaú chyáng shuí ê mù, "Zorâm shí nang lé shit kyo râ hkyô rajung joq lhê gâ ri ga, yhang lé náng chyáng shuí lé râ matú, htóng byû Poluq gi, ngo lé ji yù mù taí ri." ga, yhang lé taí ri.

¹⁹ Haú jáng, dap up zau hpó gi, jauwò má zorâm haú lé yhang loq mai she ê mù, "Nàng ngo lé haí jung shit kyô nau ri lhú?" ga, yhang lé baú tsik za myí ri.

²⁰ Haú hkûn, zorâm haú gi, "Yudaq byu pé gi, Poluq lé rago za saí myí wú râ su kut mhaú mù, napmá, Yudaq byin tú wapdoq má shuí yù râ matú, náng chyáng dung kó râ ga, myit chòm huí to bekô nghut ri. ²¹ Haú mù luî, yhangmoq ô nau é dông hkâgyo byi, hkâsu mù gâ le, Poluq lé a wó sat sat gi, haí le a zo a shuq râ nghut lhê ga, byû myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yù râ matú haq lhom to lánng kó râ nghut lhê. Ahkûn lháng, yhangmoq gi, mù haú kut râ matú rì rì nghut bûm bekô; náng é ahkáng lé za lánng nyi bum akô nghut ri." ga shit kyô ri.

²² Haú hkûn, dap up zau hpó gi, zorâm haú lé, "Nàng, ngo lé shí hkyô shit kyo bê hkyô lé, ó yuq lé le hkâtaí kyo." ga, sidiq byi mù, taú nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yù mù, "Hkû-myîn sum hkyíng † má Kesare wà mó shut ê râ matú, gyezô pé í shô, myang ji bang nyhit xê, lhâm chûng bang í shô kut mù, rì rì hen to keq. ²⁴ Hau htoq agó, Poluq lé mingzau Hpilik chyáng ngón za wó dé kat râ matú, yhang ji râ myang pé le lajang byi keq." ga, yhangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik ê, ngò Klodi Lusi gi, nguínngón danglù shit kyô kat lhê.

²⁷ Shí yuq lé gi, Yudaq byu pé èq chyup yù mù sat pyám râ dâ nyi bekô za nghut lhê. Nghut kôlhang, ngò gi, gyezô pé eq rahá ê wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê. ²⁸ Haú su mù, haí mù yhang lé mara hûn kô é hkyô lé sé nau é yanmai, yhangmoq é Yudaq byin tú wapdoq má yhang lé shuí

† But hpyu tô é xewâm gâ é gi, gegùn labyoq kut bang lé gâ lhê. †† 23:5 Htoq Ló 22:28

‡ Myîn sum hkyíng gi, nga-nhûng é myîn gau hkyíng nghut lhê.

je byi wú bê nghut lhê. ²⁹ Haú hkûn, yhangmoq é tarâ hkyô eq séng luí za mara hun bùm kô é lé ngò myang ri. Nghut kôlhang, shî gíng é eq htóng lhúng gíng é mara haí le a bò nghut ri. ³⁰ Shí yuq lé sat pyám rà hpaqchyí da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hùn nau é bang lé gi, nang hí má yhang hun lhum keq nghû pying kat bê nghut lhê." gâ ri.

³¹ Haú mù luí, gyezô pé gi, haú pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. ³² Htang nyí, myang ji bang lé ê châng dé nhâng kômù, yhangmoq gi, gye-wap shut dum taù lò bekô nghut ri. ³³ Myang jî é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byí akô nghut ri.

³⁴ Haú hkûn, mauzau hpó gi, laiká haú lé ban nghap jáng, Poluq hká mau mâ é byù nghut é hkyô lé myí wú luí, Kiliki mau mâ é byù nghut é lé sé jáng, ³⁵ "Nang lé mara hùn bang jé jáng sheq, náng mù lé ngò gôn wú rà." ga taí ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

Poluq, Mara Hùn Huí É Hkyô

24 Hau htâng, ngo nyí lai jáng, hkyangjong mó Anani gi, suwún wuít ra-am eq tarâ sé sù Tertulu lé shuí gyó lò mù, mauzau hpó hí má Poluq lé mara lé taí hun bum akô. ² Haú hkûn, Poluq lé hí má ji hâng tô é nghut mù, Tertulu, yhang lé mara hùn dang taí hi é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sê up sê hkang é jeju lé, byù myú shî wó hkâm zô nyi é yanmai, ³ ngamoq gi, haú lé hkyô hkat hkangmó eq jowò hkangmó má jeju bûn é myit eq hkam yu nyi bê nghut lhê. ⁴ Nghut kôlhang, ngò nang lé lhoq hkyik é đông a dut sháng gaq, taí rà dang ratot zo lé, myit hîng hîng to mù gyo byi laq nghû dúng tôngbán lhê ô!

⁵ Shí yuq gi, byù lé gunjang sù, mingkan gón mâ é Yudaq byu pé lhunglhang lé shuí gabyong sù eq, haú Nazaret hpúng mâ é hkyô-u shê sù nghut é lé, ngamoq myang ri. ⁶ Hau htoq agó, yhang gi, noqkuq yhùm lé achayut kut rà dâ nyi luí, yhang lé ngamoq chyup yù mù, (ngamoq é tarâ đông jéyáng rà hen nyi é hkûn, ⁷ dap up zau Lusi gi, lé lô mù, ngamoq é loq mai yhang lé lé lú shuí yù luí, yhang lé mara hùn bang lé, náng chyáng jé keq ga hkunmó hkyô tô é nghut lhê.) ⁸ Haú mù, nang, yhang lé myí wú jáng, ngamoq yhang lé hun é mara banshoq têng é hkyô lé, nang wó sé rà nghut lhê." gâ ri.

⁹ Yudaq byu pé le, haú pé gi, têng lhê ga bo chôm taí akô nghut ri.

Poluq, Mara A Bò É Lé Taí Hung É Hkyô

¹⁰ Mingzau hpó gi, Poluq lé dang taí rà đông loq lik kat jáng, Poluq taí é gi, "Zau ê, shí mau bâng é ahtoq má, nang zanwut myo myo jéyáng byí nyi é hkyô lé,

ngò sê é yanmai, ngò gabú myit eq yhumsing matú, mara a bo é hkyô taí bá. ¹¹ Ngò, Yerusalem wà mó má noqkuq rà matú doq e é buinyi raxe í nyí lhang a chyân shi é gi, nang luí za wó sé rà nghut lhê. ¹² Noqkuq yhùm má ngò ó yuq eq taí htîng lhùm é lé lhang, tara-jong, a nghut jáng, wà hkaú hká jowò má le byu pé lé shuí gabyông é lé lhang, ngo lé mara hun é bang gi, a myàng kó. ¹³ Ahkuí, ngo lé yhangmoq hun é mara pé lé, náng hí má yhangmoq saksé lhang a wó tûn shit kô nghut ri. ¹⁴ Nghut kôlhang, náng hí má ngò yín yù rà hkyô rahkat gi, yhangmoq eq shut shaí hkyô ga my-hîng tô é Hkyô lé cháng luí, ngamoq é îchyí îwâ pê é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjîng lhê. ¹⁵ Ngò gi, dingmán é bang eq a dingmán bâng é dum dui toq lô rà hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. ¹⁶ Haú mù luí, Garai Gasang eq byu é hí má, ngò gi, rà é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra laí é htâng má, ngò gi, ngá é byù myú mâ é myùng bang lé chyunghuq byi rà eq alu kat rà matú, Yerusalem wà mó shut lò jé bê nghut lhê.

¹⁸ Haú su kut nyi é hkûn, ngò eq rahá hai byù moq mó le a nyi, haí jung gabyông é hkyô le a htoq, ngò noqkuq yhùm má lhoq san lhoq yúng yù bê hkyô lé za, yhangmoq myang akô. ¹⁹ Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hùn rà hkyô joq kô é nghut le gi, shî náng é hí má yhangmoq lé jé kó ra nghut lhê. ²⁰ Haú a nghut jáng, shî má nyi tô é bang gi, ngò Yudaq byin tú wapdoq hí má yap to mù, 'Shi byuq bâng é dum dui toq rà hkyô é yanmai, hkû-nyi nungmoq ngo lé jéyáng nyi akô.' nghû luí, garú é dang hkûn mai lai luí, ngò má gotú mara myàng shi kô é nghut le gi, yhangmoq yhang taí kyo kó sháng gaq." gâ ri.

²² Hpilik gi, Hkyô haú lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi rà nghut lhê." ga luí, yhangmoq lé ahkýing htot kat byí ri. ²³ Poluq lé le, zúng za zúng to mù, yhang é buinùm ji-myi wuít mai yhang ra châ é hkyô lajang byi naú kô é bang nyi le gi, ahkáng byi keq ga luí, shô up gyezau lé hkunmó hkyô kat ri.

²⁴ Buinyi rayoq zo laí é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjîng hkyô taí kyô é le gyô yu ri. ²⁵ Poluq gi, dingmán hkyô, yhumsing gùng lé hkang é hkyô eq, jé lô rà tarâ dara hkyô lé mhoqshit jáng, Hpilik gi, gyô gyuq mù, "Nàng ahkuí wó lò bê, ngò jìn jáng sheq nang lé dum ji yù rà nghut lhê." ga taí ri. ²⁶ Hpilik kúm gi, Poluq eq ngùn haq byi rà lé myit myoqbyù mù, yhang lé anum num ji yù luí, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é

yanmai, Poluq lé htóng má jâng lhùng pyâm to bê nghut ri.

Poluq, Kehtaq Chyáng Jé Râ Matú Dúng È Hkyô

25 Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri.

² Haú hkûn, hkyangjong agyi pé eq Yudaq byu hkyô-u shê bang gi, yhang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyám râ dâ to kômù luí, jeju ralhú kut byí é dông Poluq lé Yerusalem wà mó shut dé kat byi râ matú, Hpestu lé lhom dúng akô. ⁴ Nghut kôlhang, Hpestu gi, "Poluq lé Kesare wà mó má sheq ru lhùng tô lhê, hkâ-myháng a myáng má, ngò yhang le haú má dum taú ló râ nghut lhê. ⁵ Haú mù, nungmoq mâ é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hùn kó sháng gaq." ga tũ taí ri.

⁶ Hau htâng, yhang gi, shit nyi, raxê nyí kô yhangmoq chyáng nyi yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhang hí má shuí wang lò râ matú hkunmó hkyô kat ri. ⁷ Poluq jé jáng, Yerusalem wà mó mai gyó lo é Yudaq byu pé gi, yhang é lhinghkyuq má yap to kôluí, saksé a wó tũn shit é mara mó myo myo lé, yhang é ahtoq má chôm taí hun akô nghut ri.

⁸ Haú hkûn, Poluq gi, "Yudaq byu pé é jep é tarâ eq shai é dông le, noqkuq yhùm lé shut é dông le, Kehtaq † lé shut é dông le, ngò a kut wú." ga luí, mara a bo é hkyô taí ri.

⁹ Nghut kôlhang, Hpestu gi, Yudaq byu pé é hí má myoqdong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi râ matú, nàng dóng lhê lhu?" ga myí ri.

¹⁰ Poluq kúm gi, "Ngò gi, doqdan hui râ nghut jáng, shí doqdan é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lhang a shut wú sũ nghut lhê.

¹¹ Laq má mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyám; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi râ ahkáng wó râ a nghut, ngò gi, Kehtaq chyáng wang taí râ nghut lhê." ga tũ taí ri.

¹² Haú hkûn, Hpestu gi, yhang é byin tú wap bang eq ban hpyê lhum jáng, "Nàng Kehtaq chyáng wang taí râ ga bê nghut lhê, Kehtaq chyáng wang ló aq hkoí!" ga taí kat ri.

Poluq Lé, Hkôhkâm Agripa Hí Má Shuí Hâng Yu É Hkyô

¹³ Hau htâng, buinyi hkâ-myháng a myáng má, Hkôhkâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri. ¹⁴ Haú mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haú Poluq é hkyô lé hkôhkâm wa eq taí kyô lhùm é gi, "Hpilik,

lhùng to lánng é htóng byu rayuq nyi ri. ¹⁵ Ngò Yerusalem wà mó má nyi tô é hkûn, hkyangjong agyi pé eq Yudaq byu pé é suwún wuí gi, haú yuq é hkyô lé taí kyo kôluí, haú yuq lé mara byi râ matú ngo lé chôm dúng akô.

¹⁶ Haú hkûn, ngò gi, mara hun é hui sũ, mara hun é bang eq chyung chyôq yoq kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám râ le, Romaq htông a joq nghu luí yhangmoq lé taí kyo bê nghut lhê. ¹⁷ Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zùng luí, haú yuq lé shuí wang lò râ matú hkunmó hkyô kat é. ¹⁸ Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhú le a hun htoq lô kô nghut ri. ¹⁹ Yhangmoq é noqkuq htông hkyô eq, haú dui nyi ri ga Poluq eq taí é, shi byuq bê Yesuq é hkyô lé za dang jet jet lhùm bum akô. ²⁰ Haú mù, ngò gi, haú hkyô lé hkâ dông gon yù râ le a sé lô é yanmai, haú hkyô lé Yerusalem wà mó má doqdan é ló hkam yù râ matú, yhang dóng a dóng é hkyô lé myí wú le, ²¹ Poluq yhang sheq, Hkoséng mó chyáng jé râ ga taí é yanmai, Kehtaq chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lhê." ga ri.

²² Haú hkûn, Agripa gi, "Ngò le haú yuq é dang gyó wú nau ri." ga, Hpestu lé taí jáng, yhang gi, "Nap má, nàng wó myang gyo râ nghut lhê." ga tũ taí ri.

²³ Htâng nyí, Agripa eq Bernike nhiktâng gi, shingkang bò bò za lé lô mù, dap up zau wuí eq wà má é agyi suwún wuí eq rahá, rûng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akô. ²⁴ Haú hkûn, Hpestu taí é gi, "Hkôhkâm Agripa eq ahkuí shí má zup zing tô é lhunglhang bang ê, Yerusalem wà mó eq shí wà má é Yudaq byu pé banshoq bang, ngá chyáng lé taí kôluí, shí yuq lé asak a wó dui nhang to lo ga garû bùm é gi, ahkuí nungmoq myang é shí yuq yhang nghut bê.

²⁵ Nghut kôlhang, shí yuq zui saí é má shí gíng é mara haí lé lhang ngò a myàng nghut ri. Yhang gi, Hkoséng chyáng wâng râ ga taí é yanmai, yhang lé Romaq myuq shut dé kat râ matú ngò myit hpyit to bê. ²⁶ Dé kat bá nghu jáng le, ngá é yhumsing Hkoséng chyáng yhang é hkyô jihkúm nuqguq kâ hun kat râ haí le a bò nghut ri. Haú mù luí, yhang lé ban myí gôn wú jáng sheq, ká râ hkyô rajung jung hkâlháng ngò myàng abe nghu, nungmoq banshoq bâng é hí má le, je riyhang nàng Hkôhkâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htóng byu rayuq yuq lé dé kat é hkûn, yhang lé hun é mara a wó tũn shit lé gi, a htuk nghu luí, ngò myit lhê." gâ ri.

Poluq É Hí Hpyang Lhê É Nyi Yap Hkyô

26 Haú hkûn, Agripa gi, Poluq lé, "Nàng, náng matú dang tai râ ahkáng wó bê." ga taí ri.

Haú mù luí, Poluq loq tũ kat mù mara a bo é hkyô taí é gi, ² "Hkôhkâm Agripa ê, nàng gi, Yudaq byu pé é htunghking banshoq eq taí htíng lhùm é hkyô hkat

† Kehtaq gâ é gi, "hkoséng" gâ é nghut lhê.

hkanmó lé, gyai sê to sũ nghut é yanmai, Yudaq byu pé ngo lé hun é mara hkat hkanmó lé, ngò hkũ-nyí náng é hí má mara a bò é hkyô myang taí é gi, ngá matú gabú hpo yhang nghut ri nghũ myit yu nyi lhê; haũ mù luí, ngá dang lé myit hing é èq gyô yù byi laq nghũ, dũng tũngbán kat lhê.

⁴ Ngò gi, zoshâng hkũn mai, ngá amyũ má le, Yerusalem wà mó má le, hkãsu kut nyi kô lo é hkyô lé, Yudaq byu pé lhunglhâng bang gi, sé gũ nghut akô.

⁵ Yhangmoq gi, ngo lé hí hkũn mai sé kô é yanmai, ngò, ngamoq é noqkuq htũng mã é tarâ htan dik é hpúng mã bo é Hparishe rayuq nghut é hkyô lé, saksé hkám naũ kô é nghut jáng, yhangmoq wó hkâm lhê.

⁶ Nghut kôlhâng, doqdân é hui zo rã matú, ahkuĩ ngò shĩ má yap tô é gi, Garai Gasang èq ngamoq é ìchyí ìwa pé lé byĩ tô é danggidiq lé myit myoqbyũ nyi é yanmai nghut lhê. ⁷ Ngamoq é byũ myũ raxe í hú gi, danggidiq jeju haũ lé wó hkam yù shoq ga, Garai Gasang lé nyí myín noqkuq dojaũ shikut nyi bum akô; Hkòhkâm wa ê, myit myoqbyũ hkyô hau é yanmai, ngo lé Yudaq byu pé mara hun bum akô nghut ri. ⁸ Garai Gasang gi, shĩ bê bang lé dum lhoq tui lhê gâ é hkyô lé, a wó lùm nghũ, haĩ mù myit yu akô lhú?

⁹ Ngò le, Nazaret wà byũ Yesuq é mying eq shai lhũm é dõng myo myo wó kut rã nghut lhê nghũ, gè gè yhang myit yu wú bê nghut lhê. ¹⁰ Gè gè haũ dõng le Yerusalem wà mó má kut wú bê nghut lhê; hkyangjong agyi pé chyáng mã é ahkáng wó yũ luí, ngò gi, sãn-yũng bang myo myo lé htóng mã kat pyâm é eq, yhangmoq sat hui kôjáng le, ngò myit bo huĩ wú bê nghut lhê. ¹¹ Ngò gi, tarajong banshoq mã a lhing lhing yhangmoq lé dam byi luí, Yesuq lé rhoĩ dang taí kó shoq shikut wú bê nghut lhê; nhik mó góng yo luí, gó mau mã é wà pé lháng jé shoq, yhangmoq lé châng zing-rĩ wú bê nghut lhê.

Poluq Hpúng Byũ Dut Lo É Hkyô

¹² Haũ hkũn, radàm lé, ngò gi, hkyangjong agyi pé chyáng mai ahko ahkáng eq hkunmó lé yu chũng mù, Damaskuq myuq shut e ló nyi le, ¹³ Hkòhkâm wa ê, nyigũng tu ló zó lé, buĩ htoq mã je duq é maubó gi, haũ hkyô mã, ngò eq ngá é luzúm wui é lhinghkyuq mã, mauhkũng mai duq bó htoq lo é lé myang ri.

¹⁴ Haũ hkũn, ngamoq banshoq bang myigũng mã lêng gop tô bum le, Hebre myíng dõng, 'Sholuq, Sholuq, nàng, ngo lé haĩ mù zing-rĩ nyi lhê lhú? Zuchũn lé pik le gi, náng é matú gyai yhang wuĩ lhê.' ga luí, ngo lé taí é danghtê lé ngò wó gyô kat ri.

¹⁵ Haũ mù, ngò gi, 'Yhumsíng ê, nàng gi, ó yuq nghut lhê lhú?' nghũ luí, myi jáng, haũ Yhumsíng tũ taí é gi, 'Nàng zing-rĩ nyi é Yesuq nghut lhê. ¹⁶ Ahkuĩ toq yap aq, hkãsu mù gâ le, ahkuĩ, nàng, ngo lé myàng bê hkyô eq, ngò, nang lé tũn shit shirã nghut é hkyô pé é matú, ngá é mù wũn rã byũ eq saksé dut nhâng rã dõng nang lé hkyin to rã nghũ, ngò náng chyáng lé htoq shit é nghut lhê. ¹⁷ Náng é amyũ pé é loq mai le, tũngbaũ pé é loq mai le, ngò, nang lé hkyi yù nyi rã nghut lhê. ¹⁸ Yhangmoq, yubak hkyut pyám byí é jeju

wó yũ rã eq, ngo lé lumjíng é yanmai, lhoq sãn-yũng huĩ é bang eq rahá silí wunlí wó hkam yù kó sháng gaq nghũ, yhangmoq é myoq lhoq hpóng byi mù, mauchut hkaũ mai maubó shut, Tsadán é a-tsam hkaũ mai Garai Gasang shut yhangmoq lhing ló rã matú, ngò, nàng lé yhangmoq chyáng nhang kat rã nghut lhê.' gâ ri.

Poluq Kut É Muzó Hkyô

¹⁹ Haũ mù luí, hkòhkâm Agripa ê, ngò gi, mauhkũng mã é myoqwup shing-rán haũ lé a gyô é a wó é nyí nghut lhê. ²⁰ Ngò gi, yhangmoq myit lhing luí, Garai Gasang shut lhing taũ lò mù, myit lhing bê hkyô lé, hkyí zó loq zó dõng mai tũn shit kó sháng gaq nghũ, sãng-hi mã Damaskuq myuq mã nyi é bãng chyáng mai hi luí, Yerusalem wà mó mã é bãng chyáng mã le, Yuda mau gón mã é bãng chyáng mã le, tũngbaũ pé chyáng mã le, hkô kyo bê nghut lhê. ²¹ Hau é yanmai, Yudaq byu pé gi, ngo lé noqkuq yhũm mã chyup yũ luí, sat pyám rã da kô é nghut lhê. ²² Nghut kôlhâng, ngò gi, hkũ-nyí jé shoq Garai Gasang èq garúm é lé wó yũ luí, ahkuĩ shĩ má yap to mù, tiq ko banshoq bang lé saksé wó hkâm kyô é nghut lhê. ²³ Ngò taí é má, Hkris-duq gi, hpuzo luí, shĩ bê bang mai sãng-hi dui toq lò mù, Yhâng é amyũ eq tũngbaũ amyũ pé lé maubó é hkyô lé wó taí kyo rã nghut lhê ga luí, dut lò rã hkyô lé, myiqhtoĩ pé eq Mosheq taí tô é hkyô mai lai luí, ngò gotũ haĩ le a taí é nghut lhê." gâ ri.

²⁴ Yhang haũ su ga mara a bo é hkyô taí é lé, Hpestu gi, "Poluq ê, nàng na bê! Lùm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nã é a nghut, ngò taí é dang gi, tengmán é dang eq dang gyíng nghut lhê. ²⁶ Shĩ hkyô lé hkòhkâm wa yhang le sê to gũ nghut lhê mù, yhâng é hí má ngò a gyuq a kyum taí é nghut lhê. Hkãsu mù gâ le, shĩ hkyô gi, nungwò mã kut é a nghut é yanmai, hkòhkâm wa yhang a bo sê é gi, haĩ le a joq ra nghut lhê nghũ, ngò myit lum nyi lhê. ²⁷ Hkòhkâm Agripa ê, nàng gi, myiqhtoĩ pé é dang lé lumjíng lhê lhú? Nàng lumjíng é hkyô lé ngò sê lhê." ga tũ taí ri.

²⁸ Haũ hkũn, Agripa gi, Poluq lé, "Razup za mã, nàng, ngo lé Hkristan rayuq wó dut nhâng nhô ngam ri lhú?" ga taí ri.

²⁹ Dum Poluq gi, "Razup za mã nghut nghut, myáng myáng mã nghut nghut, shĩ shamtoq-tui pé mai lai luí, nàng za a nghut, hkũ-nyí ngò taí é dang lé gyô nyi é lhunglhâng bang, ngò su dut rã matú, ngò gi, Garai Gasang lé kyũdũng nyi lhê." ga tũ taí ri.

³⁰ Haũ hkũn, hkòhkâm wa gi, ginwáng zau hpó eq Bernike le mù, haũ mã zũng tô é bang eq rahá toq yap ri. ³¹ Yhangmoq htoq ló kô é hkũn, "Shĩ yuq gi, sat gíng é mara eq htóng lhúng gíng é mara haĩ le a kut shut nghut ri." ga, rayuq eq rayuq taí lhũm bum akô nghut ri.

³² Agripa gi, Hpestu lé, "Shí yuq gi, yhang mai Kehtaq chyáng jé rã ga a taí tô é nghut le gi, yhang lé wó nhang pyám berã nghut lhê." ga taí ri.

Poluq, Romaq Myuq Shut Wui-sanghpo Mai E Ló É Hkyô

27 Ahkuí, ngamoq lé Itali ming shut wui-sanghpo mai gũ dap ló nhang rã matú myit hpyit to kôluí, yhangmoq gi, Poluq eq htongbyú góbang ra-am lé, Augustuq Hkosêng é gyewap mó mâ é, Yuliu gã é shô up gyezau é loq má ap byí kat akô. ² Haú hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wui-sanghpo má ngamoq wang ji bê nghut lhê. Htesaloni wà mó mâ é Aristakuq gã é Makedoni byú rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhang chyáng rã é hkyô lé yhang é buinùm wui mai lhom lajang byi kó sháng gaq ga, yhangmoq eq ê hui rã matú ahkáng byí kat ri. ⁴ Haú mai dum toq ló é hkûn, laí tau mut é yanmai, Kupru zinlóng lé lai hkaú uchyang jî laí ló mù, ⁵ Kiliiki eq Pamhpuli mau mâ é wuimau đông laí byit ló le, Laiki mau mâ é Mura myuq má jé bê nghut lhê. ⁶ Haú má, shô up gyezau hpó gi, Itali ming shut dap e ló é, Alesandru myuq mâ é wui-sanghpo lé myang hkyup luí, ngamoq lé haú má ji nhang bê nghut ri. ⁷ Haú mai buinyi myo myo yhó yhó lé za jî e ló luí, awui ahke yhang Kidu wà mó eq ang má wó jé ló jáng, laí tau mut é yanmai, hí shut a wó laí ló lo mù, ngamoq gi, laí lé cháng luí, Kreti zinlóng lé lai hkaú mù, Salamone kongzô é tũ tap âng é mai laí ló é nghut lhê. ⁸ Haú mâ é wuyàm mai awui ahke ji ló lé, Lasea wà eq a wê lhùm é Yuqyo é Guhkan gã é jowò má jé ri.

⁹ Ahkuí, buinyi tsómra lhoq lhaí pyám luí, haú Zoshuq gám poí lai bê nghut é yanmai, wui-sanghpo mai sô wún le gi, gyuq chiq rã nám jé bê nghut ri. Haú mù, yhangmoq lé Poluq taí pun taí kyíng é gi,

¹⁰ "Áhkaú pé ê, shí dàm lhê é wui hkyô gi, wuĩhke mó hui luí, wui-sanghpo eq zè pé sũm pyám rã htoq agó, nga-nhúng é asak lhang sum rã dut é hkyô lé, ngò byu myang ri." gã ri. ¹¹ Nghut kôlhang, shô up gyezau hpó gi, Poluq é dang lé gyo rã malaí, wui-sanghpo hkàng sũ eq wui-sanghpo yhumsing é dang lé, je lum ri.

¹² Guhkan haú gi, gyoqmyò † wó lhoq lhai rã su a dut é yanmai, myo hpyang gi, Hponik guhkan má wó jé lé jé mù, haú má gyoqmyò ló nyi lhai rã matú chòm myit huí akô. Guhkan haú gi, Kreti zinlóng má maupyí buiwàng hkyam eq mautsung buiwàng hkyam shut hu tô é jowò nghut ri.

Wuimau Má, Laidun Mó Htùng Huí É Hkyô

¹³ Maupyí shut mâ é laí yhó le hik lô jáng, yhangmoq myit tô é má hkyak nghut bê su ngam pyám kôluí, shamtoq goknghe lé lhoq toq yú kômù, Kreti zinlóng

† Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.

yâm đông jî e ló bê nghut lhê. ¹⁴ Nghut kôlhang, hkâ-myháng a myáng má, Buihtoq mautsung laí gã é laidun mó gi, haú zinlóng mai mut lò luí, ¹⁵ wui-sanghpo lé lo mut htùng é yanmai, hí shut a wó ló lo jáng, ngamoq gi, laí mut ló é shut châng yông ló bê nghut lhê. ¹⁶ Ngamoq gi, Koda gã é zinlóng zo lé lai hkaú uchyang yông ló nyi é hkûn, haú sakhkyílhái lé gyai shikut é èq wó lhang yú luí, ¹⁷ wui-sanghpo ahtoq má lhang toq to bê. Wui-sanghpo lé gi, a byoq lo shoq tuí èq tuí kíng to bê nghut lhê. Dum, yhangmoq gi, Surti gã é semuí bùm má ló kê gyâm to rã lé chiq kô é yanmai, wui-sanghpo mâ é panlong pé lé lhoq nyhum hkyô yú mù, châng yông ló bekô nghut ri. ¹⁸ Laidun mó lùm htan é yanmai, htang nyí yhangmoq gi, hpugá zè pé lé hkyom dú hkyó pyám bekô nghut ri. ¹⁹ Sum nyí nghu é nyí má, yhangmoq gi, wui-sanghpo zè pé lé yhumsing é loq èq yhang hkyô pyám bekô. ²⁰ Buinyi myáng myáng, buí lé le, kyí pé lé le a myàng é eq, laidun mó za ru mut nyi é yanmai, wó lut rã nghũ myit myoqbyu tô é hkyô lé, ngamoq tô pyám bê nghut lhê.

²¹ Yhangmoq zoshuq a zô é, buinyi tsómra myáng lô bê nghut mù luí, Poluq gi, yhangmoq é gung gung má yap to mù, "Áhkaú pé ê, nungmoq ngá é dang gyo luí, Kreti zinlóng mai a htoq ló é nghut le gi, shí su htên byoq é marop hui zo rã a nghut. ²² Ahkuí nghut kôlhang, ngò taí é dang lé gyô yú mù myit wum yú keq; nungmoq mâ é hká yuq lé asak sum rã a nghut, wui-sanghpo za sheq htên byoq byuq rã nghut lhê. ²³ Hkâ-su mù gã le, ngo lé sing é, ngò dojaú nyi é Garai Gasang é maumang lagyo rayuq, amàn ngá é nàm má lé yap to mù, ngo lé taí é gi, ²⁴ 'Poluq ê, hkâgyuq, Kehtaq é hí má nàng wó yap rã nghut lhê. Wui-sanghpo shí má nàng eq rahá ji tô é lhunglhang bâng é asak lé, Garai Gasang gi, náng é yanmai, laí laí byi rã nghut lhê.' gã ri. ²⁵ Hau é yanmai, áhkaú pé ê, myit wum yú keq, ngo lé taí kyô é eq rajung za dut lò rã nghut lhê nghũ luí, Garai Gasang lé ngò lumjíng nyi lhê. ²⁶ Nghut kôlhang, nga-nhúng gi, zinlóng ralhũm lhũm má ló htùng chyap to rã nghut lhê." ga luí, yhangmoq lé i-myit taí tĩng ri.

²⁷ Buinyi raxe myi nyí myín má, gunggàm yoq lé, ngamoq gi, Adria wuimau má yông lhing wún é hkûn, sanghpo hkàng bang gi, dùng yàm eq chyàng lo nyi é su gã é lé sê gyo kat akô. ²⁸ Haú su mù, wui nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri. ²⁹ Haú mù luí, luqmó má ló záng htung rã lé chiq kômù, yhangmoq gi, wui-sanghpo htàng shut mâ é shamtoq goknghe myí lhũm lé lhoq hkyô kat luí, mau hân bó sháng gaq ga kyũdũng nyi bum akô nghut ri. ³⁰ Wui-sanghpo hkàng bang gi, wui-sanghpo lé tô pyâm to luí hpàng rã dâ é myit eq, wui sanghpo-shut mâ é shamtoq goknghe pé lé lhoq hkyó rã su kut mhaú luí, sakhkyílhái lé wui má lhoq hkyô nyi bum akô. ³¹ Haú mù, Poluq gi, shô up gyezau eq gyezô pé lé, "Shí bang wui-sanghpo má a nyi le gi, nungmoq wó lut rã a nghut." ga taí ri. ³² Haú hkûn, gyezô pé gi,

sakhkyîlhaî lé tuî tô é tui lé zân hpyit kat kôluî, sakhkyîlhaî gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo râ matú myit wum byî é gi, "Nungmoq gi, myit chiq luî, zoshuq haî le a zô é, hkû-nyí raxe myi nyí myáng lô bê. ³⁴ Haû mù luî, zoshuq rajung jung zo keq! Haû gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lháng byuq râ a nghut." gâ ri. ³⁵ Haû su ga ban taî é eq, yhang gi, muk lé yù luî, yhangmoq banshoq bâng é hí má Garai Gasâng jeju lé hkyá-on mù, muk lé hpé luî, zô hí bê nghut ri. ³⁶ Haû hkûn sheq, banshoq bang gi, myit wum wó yù kômù, zoshuq zô bùm bekô nghut ri. ³⁷ Wuî-sanghpo haû mâ é byù lhungháng gi, í sho nyhit xe hkyuq yuq nghut lhê. ³⁸ Yuq hkgangmó bàn zô gyí é htâng má, wuî-sanghpo sóm râ matú, sungso pé lé wuî má dú kat pyâm akô nghut ri.

Wuî-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haû lé a sé kôlhang, semuî-jàng chyûn ralhúm lé byu myàng kôluî, wó dut é nghut jáng, haû má sanghpo lé kôn gyam râ matú chôm doqdân yu akô nghut ri. ⁴⁰ Haû mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luî, wuî-sanghpo ulhum mâ é panlong lé lhoq toq yù mù, lai hkyô cháng luî wuiyâm shut mut lô bê nghut ri. ⁴¹ Nghut kôlhang, semuî lo bum tô é jowò ralhúm má, wuî-sanghpo lô htûng chyap byuq luî, sanghpo u gi, a wó duî lo mù, sanghpo htâng lé gi, wuîlheng èq lò bat hkyop myha pyám bê nghut ri. ⁴² Haû hkûn, gyezô pé gi, htongbyù pé wuili lí hpang byuq kó râ lé gyuq kô é yanmai, yhangmoq lé sat pyám râ chôm dâ akô. ⁴³ Nghut kôlhang, shô up gyezau hpó gi, Poluq lé hkyi yù nau luî, yhangmoq dâ é hkyô lé hkûm pyám mù, wuili dat li bang gi, wuî má byam gyó luî wuiyâm shut hí li dap lô kó sháng ga luî le, ⁴⁴ góbang gi, siklong eq wuî-sanghpo mâ é gotû zè pé má zui mù, gu dap lô sháng ga le, hkunmó hkyô kat ri. Haû đông mai lhunghâng bang gi, wuiyâm shut ra-go wó jé dap lô bekô nghut ri.

Malata Zinlóng Má Jé Nyi Tô É U Lhê Hkyô

28 Ngamoq wó lut dap lô jáng sheq, zinlóng haû gi, Malata gâ é lé sê ri. ² Zinlóng byu pé gi, ngamoq lé shogyo myit gyai lhom tân shit akô. Mau ru jâng wo nyi luî gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô. ³ Haû hkûn, Poluq gi, htang rawaq guq tsíng yù mù, myihkyóm má kat kat é hkûn, myi soq htan lò jáng, duq htân lhangmuî radu gi, htoq lô mù, yhâng é loq má htê zing tô ri. ⁴ Zinlóng byu pé gi, Poluq é loq má lhangmuî haû htê lhâng tô é lé myàng kôjáng, "Shí yuq gi, gè gè yhang byù sat é sù teng râ dut ri; wuî mai wó lut lô kôlhang, yhang asak dui nyi râ matú, Tengmân tarâ gi, a dóng lo nhung!" ga luî, rayuq eq rayuq taî lhum bum akô nghut ri. ⁵ Poluq kúm gi, lhangmuî

haû lé myihkyóm má ko hkyô kat luî, haî le a dut é za nyi tô ri. ⁶ Yhangmoq gi, yhânggùng wâm lò berâ, haû a nghut jáng, byodàn ratung shi hkyaq lêng lò berâ, ga myit lánng nyi bum akô. Nghut kôlhang, myáng myáng lánng wú nyi bum le, yhang má haî le a dut lo é lé myàng kôjáng, yhangmoq é i-myt dum htaî pyám kôluî, shí yuq gi, hparà rayuq sheq nghut ri ga dum taî bum akô nghut ri.

⁷ Hau é nàm má, zinlóng agyì hpó Popli sing é maumyí pé joq tô ri. Haû yuq gi, ngamoq lé lhom te yù mù, yhâng yhùm má sum nyi yhang lalúm la-nye lhom hkûlum yu ri. ⁸ Haû u lé, Popli é yhângwa gi, aî nyé no nyi é eq wuiwam shun leq tô ri. Poluq gi, haû yuq chyáng wàng mù, kyûdung byi luî, yhâng é ahtoq má loq ke byi mù, yhang lé lhoq gè byi ri. ⁹ Haû su dut é yanmai, zinlóng mâ é nò byù góbang banshoq le, lé luî lhoq gè byi é hui bekô nghut ri. ¹⁰ Yhangmoq gi, ngamoq lé a hkyô hkyô đông hkgangga kôluî, ngamoq wuî-sanghpo ji mù, dum toq lô râ hkûn, ngamoq râ é gú lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq mâ é, "Hparà zozûm nhiktâng" gâ é alhô dap é wuî-sanghpo má, ngamoq wang jî htoq lô bê nghut lhê. Wuî-sanghpo haû gi, gyoqmyò lé zinlóng haû má joq lai é nghut ri. ¹² Surakusa wà mó má jé jáng, haû má ngamoq sum nyi nô yu é nghut lhê. ¹³ Haû mai jî xoq lhing lô le, ngamoq gi, Regi wà mó má jé ri. Htang nyi gi, maupyí lai hik lô mù luî, í nyi nyi má nghut jáng, Potioli wà mó má jé lô bê nghut lhê. ¹⁴ Haû mâ é gumang wuî ra-am eq hui luî, ngamoq lé nyhit nyi no râ matú lùng kômù, ngamoq gi, nô yù bê; hau htâng, Romaq myuq má jé lô bê nghut lhê. ¹⁵ Haû mâ é gumang wuî gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bính Yhùm Sùm Lhum gâ é wà jé shoq lé akô. Poluq gi, haû bang lé lhom myàng jáng, Garai Gasang lé hkyá-on kungtôn mù, myit wum wó yù bê nghut ri. ¹⁶ Ngamoq, Romaq myuq má jé wang lô é hkûn, Poluq gi, yhang lé zúng râ gyezo rayuq eq gotû san nyi râ matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyi sum nyi lai é htâng má, Poluq gi, haû mâ é Yudaq suwún wuî lé ji yu ri. Yhangmoq jé lé bùm kôjáng, yhang gi, "Gumang wuî ê, ngò gi, nga-nhùng é amyû lé le, îchýí îwa pê é htunghking lé le, shut shai é đông haî le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pê é loq má ap byi kat é hui bê nghut lhê. ¹⁸ Romaq zau wuî kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri. ¹⁹ Nghut kôlhang, haû lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haû nghut kôle, ngá amyû lé mara hùn râ jowò joq é yanmai gi, a nghut. ²⁰ Haû mù luî, Israelaq amyû é myit

myoqbyù hkyô † é yanmai, shî shamtoq-tuî èq tuî é ngò huì zô é hkyô eq séng luî, nungmoq eq nyo kún râ matú, ngò, nungmoq lé ji kat é nghut lhê." ga luî, yhangmoq lé taí ri.

²¹ Haú hkûn, yhangmoq gi, "Náng é hkyô eq séng luî Yuda mau mâ é laiká ngamoq a wó yû nghut ri. Haú mai lé é gumang wui ó yuq le, nàng eq séng é a ge é luhkyang lé shit kyô é a bò kó nghut ri. ²² Nghut kôlhang, shî nàng lom é hpúng gi, jowò hkangmó má taí he pyâm é huì é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tû taí akô.

²³ Yhangmoq gi, yhang eq huì kún râ buinyì ding to kôluî, yhang bíng é yhûm má byù myo lé zîng bum akô. Haú hkûn, yhang gi, napkyó mai myín htàng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoí pè é dang má cháng mù, yhangmoq lé shikut luî, Yesuq é hkyô taí pun taí kyíng ri. ²⁴ Yhang taí é hkyô lé, ra-am gi, lumjíng bum akô; ra-am kúm gi, a lumjíng kó nghut ri.

²⁵ Yhangmoq rayuq eq rayuq haú su myit a huì lhûm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoí Esai-aq é nhut mai nungmoq é îchyí îwâ pé lé taí é dang gi, gyai yhang têng ri. Dang haú gi,

²⁶ 'Byù haú hú chyáng ê mù,

† *Israelaq amyú é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.*

"Nungmoq gyô tsuq to kôlhang, sê gyo kó râ a nghut; wú tsuq to kôlhang, wú sé kó râ a nghut.", nghû è taí aq.

²⁷ Hkâsu mù gâ le, amyú shi é i-myit gi, htan byuq luî, yhangmoq é nohkyap gi, htú byuq bê nghut ri; yhangmoq é myoq gi, chûm byuq bê nghut ri; haú a nghut le gi, yhangmoq é myoq èq myàng mù, yhangmoq é nohkyap èq wó gyo luî, yhangmoq é i-myit má sê hkyâng kômù, ngá chyáng lhing lò kôluî, ngò yhangmoq lé lhoq gê byi berâ nghut lhê.' ††

²⁸ Haú mù luî, shî Garai Gasâng é hkyi yù hkyô lé, tûngbaù pè chyáng byî kat bê nghut luî, yhangmoq lhóm gyô yù berâ hkyô lé, nungmoq yhang sê nyi keq ô!" ga luî, danghkun haú taí kat é htàng má, yhangmoq gi, htoq ló byuq bùm bekô nghut ri. ²⁹ (Poluq haú su ga taí é htàng má, Yudaq byu pé gi, yhangmoq yhangchang dang jet jet lhóm uchyang ló byuq bekô nghut ri.)

³⁰ Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhóm hkûlum yu ri. ³¹ Haú mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsíng Yesuq Hkrisduq eq séng é hkyô lé mhoqshit byî ri; yhang lé, ó le a hkûm zing to kó nghut ri.

†† *28:27 Esai 6:9,10*

Romaq

(Romans)

1 Hkrisduq Yesuq é dui-nhâng zoshâng eq lagyo dut râ matú, Garai Gasâng èq ji yu é hui luí, chyoiyúng Chyúmdang pé má, ² Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sũ, ngò Poluq gi, Romaq myuq má nyi é, Garai Gasâng èq chytidap é hui luí, sân-yúng bang dut râ matú jĩ yu é bang banshoq lé, dang kyô kat lhê. ³ Yhâng é Yuqzo haû gi, byù hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm èq sé nhâng bê nghut ri. Yhang gi, nga-nhúng é Yhumsíng Yesuq Hkrisduq nghut ri. ⁵ Yhang dông mai le, Yhâng myíng é matú le, ngamoq gi, byù myú chângjup mai byù ji yù mù, lumjínng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê. ⁶ Nungmoq le, Yesuq Hkrisduq eq séng râ matú ji yù huí é bang má lòm bekô nghut ri.

⁷ Nga-nhúng é Íwa Garai Gasang eq Yhumsíng Yesuq Hkrisduq chyáng má é jeju eq nguínngón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjínng hkyô lé, mingkan gón má taí pyo ló bê nghut é yanmai, sân-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lhê. ⁹ Ngá é kyúdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklhum banshoq èq dojaú é Garai Gasang gi, ngá é saksé nghut lhê;

¹⁰ Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyúdung lhê.

¹¹ Ngò gi, nungmoq lé, woi-nyí hkyô eq séng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyai yhang myàng nau nyi ri. ¹² Haû su nghu é gi, nga-nhúng rayuq eq rayuq é lumjínng hkyô dông mai, nungmoq eq ngò, myit wum byí é hui râ matú nghut lhê. ¹³ Gumang wui é, ngò gi, haû tûngbaù pê chyáng mai ashi wó yu é eq rajung za, nungmoq chyáng mai le ashi wó yù râ matú, nungmoq chyáng lé jé râ nghû adàm dàm dà wú é nghut kôlháng, ahkuí jé shoq hkûm tang pyám huí é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sũ nghut lhê. ¹⁵ Haû nghut é yanmai, ngò gi, Romaq myuq má é bang nungmoq lé le, haû gabú danglù gyai yhang hko kyo nau nyi é nghut lhê.

¹⁶ Haû gabú danglù hkyô má, ngò gi, a hoq é nghut lhê; hkâsu mù gâ le, haû gi, sân-hi má Yudaq byu pé, hau htâng tûngbaù pé má, lumjínng é sũ yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsâm nghut lhê. ¹⁷ Hkâsu mù gâ le, lumjínng myit mai wó yù luí, lumjínng myit má gíng nyi é, Garai Gasâng chyáng má é dingmán hkyô lé gi, gabú danglù haú má hpông shit bê nghut ri. Haû gi, "Haû dingmán sũ gi, lumjínng myit mai asak dui râ nghut lhê." † ga kê tô é eq rajung za nghut ri.

Xângzo Byu Pê Htoq Má Garai Nhikmo-yô É Hkyô

¹⁸ Haû tengmán hkyô lé, yhumsing é agè ashop hkyo èq zik hkûm pyâm é byu pê é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri. ¹⁹ Haí mù gâ le, Garai Gasang gi, Yhang eq séng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkâsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsâm eq Garaí é myit sâmlai lé gi, san za wó myâng, wó sê gyô é nghut lhê. Haû mù luí, byu pé gi, mara mai wó he lut râ hkyô a joq lo nghut ri.

²¹ Haí mù gâ le, yhangmoq gi, Garai Gasang lé sê to kôlháng, Yhang lé Garaí dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyíng é yhangmoq é myit nhiklhum gi, chut byuq bê nghut ri. ²² Yhangmoq gi, hpaqchyí bò bang nghut lhê ga kôlháng, a-ngok é bang dut byuq bekô nghut ri. ²³ Haû mù, htên byoq a sê é Garai Gasâng é hpungwup shingkang lé, htên byoq sê é byù zông, nghoq lhô, dusak lhô eq yê jung dusak lhô pê èq, htaí lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê nghut ri. ²⁵ Yhangmoq gi, haû Garaí Gasâng é tengmán hkyô lé, mhaú é hkyo èq htaí lhik

† 1:17 Hbk 2:4

pyám kômù, hpân Sû lé noqkuq dojaú râ malaí, mhaú hkyô nghut é hpan tô é zè pé lé noqkuq mù, dojaú akô nghut ri. Hpân Sû haú gi, ahtum abyuq hkya-on hui sù nghut ri. Amen.

²⁶ Haú nghut é yanmai, Garai Gasang gi, yhangmoq lé, ahoq ahí é yut yut ô naú hkyô má ap pyám bê nghut ri. Yhangmoq é myiwe wui lháng gi, htông akying lé tô pyám kômù, haú eq shai é dông htaí lhik pyâm nyi akô nghut ri. ²⁷ Haú eq rajung za, yuqgè wui le, myiwe wui eq zum é htông akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluí, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekô nghut ri.

²⁸ Hau htoq agó, haú Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyâm é nghut lhê. ²⁹ Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhùm é hkyô pé bying jup tô é bang dut bekô nghut ri; manon é, byù sat é, mabyoq jishùm htoq é, mhaú zô é eq myit goí bo é pé le bying bum ri. ³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbùn é bang, gyáng é bang, agè ashop kut râ hkyô lhoq htoq é bang, mó wui é jino a gyô é bang nghut akô. ³¹ Yhangmoq gi, a gying a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô. ³² Haú pé lé kut é bang gi, shí gíng lhê gâ é, Garai Gasang é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

Garai Gasang Tarâ Jéyáng É Hkyô

2 Haú mù luí, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkún, náng gûng nàng mara byí nyi bê nghut ri. ² Haú dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê. ³ Haú mù, byù za nghut to luí, góbang lé gi, jéyáng mù, yhumsing gi, haú dông roq châng kut nyi é sù nàng ê, nàng gi, Garai Gasang é tarâ jéyáng hkyô mai wó hpan lut râ su ngam nyi lhê lhú? ⁴ Haú a nghut jáng, nàng gi, Garai Gasang é ge é hkyo èq nang lé myit wó shuí lhing nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lhê lhú?

⁵ Nghut kôlhang, náng é myit htên hkyô eq myit a lhing é nhiklhùm é yanmai, haú Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gùng yhang hkong tô nyi bê nghut ri.

⁶ Garai Gasang gi, yuq hkangmó lé, ó le ó kut é má cháng luí, hkâm zo nhâng râ nghut lhê. ⁷ Jân shirang

mù, ge é hkyô kut nyi é dông, hpungwup shingkang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lhê.

⁸ Nghut kôlhang, haú yhumsing wuizat hkyô za hô luí, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lhê. ⁹ Wuínke hkyô eq iyon yon hkyô gi, agè ashop kut é xângzo byù yuq hkangmó chyáng jé râ nghut lhê; sâng-hi má Yudaq byu pé chyáng jé mù, tûngbaù pé chyáng le jé râ nghut lhê. ¹⁰ Nghut kôlhang, hpungwup shingkang, aróng eq nguingón hkyô gi, haú ge é hkyô kut é bang yuq hkangmó chyáng jé râ nghut lhê: sâng-hi má Yudaq byu pé chyáng jé mù, tûngbaù pé chyáng le jé râ nghut lhê.

¹¹ Hkâsu mù gâ le, Garai Gasang gi, myoqdong a hkyin é Sù nghut lhê.

¹² Haú jep é tarâ lé a sê é mara kut shut é bang lhunglháng gi, jep é tarâ dông a nghut é za htên byoq kó râ nghut lhê. Haú jep é tarâ hkaú má mara kut shut é bang lhunglháng gi, jep é tarâ dông jéyáng é hui zo kó râ nghut lhê. ¹³ Hkâsu mù gâ le, haú jep é tarâ lé wó gyô é bang lé, Garai Gasang é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lhê. ¹⁴ Haú jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkún, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. ¹⁵ Yhangmoq gi, haú jep é tarâ hkyô pé lé, yhangmoq é i-myt unghkaú má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haú lé saksé hkâm byí nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri. ¹⁶ Haú hkyô gi, ngò taí pyo é gabú danglù eq rajung za, byu pé é zaú nghop tô é hkyô pé lé, Hkrisduq Yesuq dông mai Garai Gasang èq tarâ jéyáng é buinyi má dut râ nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gûng nàng Yudaq byù rayuq nghut lhê ga mù, haú jep é tarâ lé lumhkau nyi é eq Garai Gasang lé xoq é hkyô má nghutbùn nyi é sù; ¹⁸ Yhâng ô nau é hkyô lé sê é eq haú jep é tarâ mhoqshit é hkyô wó yù bê nghut é yanmai, je ahkyak é hkyô lé sê gâm hkoq é sù; ¹⁹ haú jep é tarâ má, hpaqchyí eq tengmán hkyo é alik wó sù nghut é yanmai, haú myoqjit bâng é matú hkyô-u shê sù eq mauchut hkaú mâ é bâng é matú maubó nghut sù; ²⁰ byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nàng, góbang lé mhoq byi sù nhing, yhumsing gùng yhumsing a mhoq yù lhú? A wó hkau ga hko taí luí nhing, nàng gi, hkaú lhê a nghut lhú? ²² Su-myi sulàng lú hkyô a wó kut ga byu pé lé taí luí nhing, nàng gi, su-myi sulàng lú hkyô kut lhê a nghut lhú? Hparà lhô lé a jú dik sù nàng gi, noqkuq yhùm lé hpyoq zo hpyoq

† Haú jep é tarâ lé a sê bang gâ é gi, tûngbaù pé lé gâ é nghut luí, haú jep é tarâ hkaú má é bang gâ é gi, Yudaq byu pé lé gâ é nghut lhê.

shuq nyi lhê a nghut lhú? ²³ Jep é tarâ eq séng luí nghutbun sù nàng gi, haû jep é tarâ lé lu laî é dông, Garai Gasang lé a hkungga kut lhê a nghut lhú? ²⁴ Haû gi, "Garai Gasâng é mying gi, nungmoq é yanmai, tûngbaù pè chyáng lhoq hpoî pyâm é huî ri." † ga kê tô é eq rajung za nghut ri.

²⁵ Haû jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laî é nghut jáng, a hpyit é eq rajung za dut bê nghut ri. ²⁶ Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge sôn byi lhê a nghut kó lhú?

²⁷ Kê tô é tarâ lé wó mù, ahpyo-kuq hpyit hkam to gù nghut é, tarâ lu laî é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hùn râ nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut.

²⁹ Ahte myit hkaû má Yudaq byù nghut sù za, Yudaq byù kyîng nghut lhê. Kê tô é tarâ dông a nghut é za, Woi-nyí èq myit má ahpyo-kuq hpyit é gi, ahpyo-kuq hpyit kyîng nghut bê. Haû yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

Garai É Lhumzui Hkyô

3 Haû dông ga jang, Yudaq byù rayuq dut nyi é gi, hai akyû hkâm zo râ lhú? Ahpyo-kuq hpyit hkyô gi, hai akyû bò râ lhú? ² Hkyô hkangmó má gyai akyû bò lhê! Je hí má gi, haû Garai Gasâng é mungdang lé yhang, yhangmoq lé ap byi bê nghut ri.

³ Yhangmoq mâ é ra-am lumjîng myit a bo é nghut le gi, hkâsu kó lhú? Yhangmoq lumjîng myit a bo é yanmai, Garai Gasâng é lhumzui hkyô lé akyû a bò nhâng wó dut râ lhú? ⁴ Hkâ dông le a wó dut!

"Haû mù, nàng dang taî é hkûn, dingmán é hkyô wó lhoq htoq râ eq,

nàng jéyáng huî é hkûn, ûng râ nghut lhê." †† ga kê tô é eq rajung za, byù yuq hkangmó gi, byù-mhaû dut kôlhang, Garai Gasang gi, tengmán nyí sháng gaq.

⁵ Nghut kôlhang, nga-nhûng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haû nghut jáng, nga-nhúng hkâsu nghû taî râ lhú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lhú? (Ngò gi, byù hkyam dông taî htîng é nghut lhê.) ⁶ Ratsuí lháng a nghut! Haû su ru nghut le gi, haû mingkan lé, Garai Gasang hkâsu wó jéyáng râ lhú? ⁷ Rayuq yuq, "Ngò mhaû é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkang lé je wó lhoq hu nhang é nghut le nhîng, haî mù luí, ngò, yubak byù rayuq dông mara byí é hui zô nyi ra shirâ lhú?" ga taî dang-rháng râ nghut lhê. ⁸ "Ge é hkyô htoq sháng gaq, nga-nhúng, agè ashop hkyô kut sháng." nghû haî mù a taî kê é lhú? Dang haû lé ngamoq taî é nghut lhê ga

† 2:24 Esai 52:5 †† 3:4 Hkya-on 51:4

luí, ngamoq lé lumù gansang é dông byù ra-am taî akô. Haû bang gi, mara dam byí é hui zo gíng bang nghut akô.

Dingmán Byù A Nyi

⁹ Haû jáng, hkâsu nghû lo râ lhú? Nga-nhúng gi, je gè bang nghut lhê lhú? Ratsuí lháng a nghut. Yudaq byù nghut nghut, tûngbaù pé nghut nghut, yubak mara hkaû mâ é bang chyat nghut lhê nghû, ngamoq taî san kyô wú bê nghut lhê. ¹⁰ Chyúmdang má kê tô é le,

"Dingmán é byù a nyi, rayuq lháng a nyi nghut ri;

¹¹ Sê gyô é byù rayuq le a nyi, Garai Gasang lé ho é byù le a nyi nghut ri;

¹² Lhunglháng bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyi, rayuq lháng a nyi nghut ri." †† gâ ri.

¹³ "Yhangmoq é hkyung gi, hpông tô é lup pé nghut akô; yhangmoq é shô gi, mhaû akô." ††

"Yhangmoq é nhutwuí pé má gi, shîduq bò lhangmui é duq dap bum ri." †† gâ tô ri.

¹⁴ "Yhangmoq é nhut pé gi, nhing myíng nhing htê eq myit nò danghko baú byíng zan tô ri." ††† gâ tô ri.

¹⁵ "Yhangmoq é hkyî pé gi, byù sat sui lhoq htoq râ matú, lawán nau akô;

¹⁶ Yhangmoq sô nyi é hkyô pé gi, htên byoq é eq wuîhkê é ahkô tông tô é nghut mù,

¹⁷ nguingón é hkyô lé gi, yhangmoq a sé kó nghut ri." ††† gâ tô ri.

¹⁸ "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri." ⁵ gâ tô ri.

¹⁹ Byù yuq hkangmó é nhut gi, tû taî jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haû jep é tarâ má taî é lhunglháng gi, jep é tarâ ô má nyi é bang lé taî é nghut é hkyô lé, nga-nhúng sê lhê. ²⁰ Haû mù luí, jep é tarâ lé châng é dông mai, ó yuq le, Yhâng é hí má dingmán sù gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lhê.

Lumjîng Jáng, Dingmán Sù Wó Dut É Hkyô

²¹ Ahkuí kúm gi, jep é tarâ dông a nghut é za, haû jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri. ²² Garai Gasâng chyáng mâ é dingmán hkyô haû gi, Yesuq Hkrisduq lé lumjîng é dông mai nghut mù, lumjîng bang banshoq htoq má jé é nghut lhê. Gamhkuí é hkyô a joq. ²³ Hkâsu mù gâ le, lhunglhâng bang gi, yubak mara kut shut bê bang chyat nghut

† 3:12 Hkya-on 14:1-3 †† 3:13 Hkya-on 5:9 †† 3:13 Hkya-on 14:3 ††† 3:14 Hkya-on 10:7 ††† 3:17 Esai 59:7-8 § 3:18 Hkya-on 36:1

mù, Garai Gasâng é hpungwup shingkan lé a hkyit hkap byuq lo kó nghut ri. ²⁴ Ahkuî kúm gi, Hkrisduq Yesuq mai lo é hkyi yù hkyô dông, Garai Gasâng é jejú èq, mara hkyut san byî é laí laí wó hui bê nghut ri.

²⁵ Garai Gasang gi, Yesuq é sui lé lumjínng bâng matú, shíhtái gunglik hkungga ralhúum dông, Yesuq lé byî pyám bê nghut ri. Haû gi, laí lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tûn shit é nghut ri.

²⁶ Garai Gasang haû su kut é gi, Yhânggùng yhang dingmán Sû nghut é eq, Yesuq lé lumjínng é sù lé mara hkyut san byî é Sû nghut râ matú, ahkuî lhê ipyat má, Yhâng é tengmán hkyô lé shit byî é nghut lhê.

²⁷ Haû su nghut jáng, nghutbun jowò joq ri lhú? A joq. Hai tarâ mai a joq dut byuq é lhú? Haû jep é tarâ châng é yanmai nghut lhê lhú? A nghut, lumjínng hkyo é yanmai sheq a joq dut byuq é nghut lhê. ²⁸ Hkâsu mù gà le, byù gi, haû jep é tarâ châng é dông a nghut é za, lumjínng luí, mara hkyut san byi huí é hkyô lé, ngamoq lum nyi lhê. ²⁹ Garai Gasang gi, Yudaq byu pè é Garai Gasang za nghut lhê lhú? Tungbaù pè é Garai Gasang le a nghut lhú? Nghut lhê, tungbaù pè é Garai Gasang le nghut lhê. ³⁰ Hkâsu mù gà le, Garai Gasang gi, rayuq za nghut é yanmai, rajung za lumjínng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. ³¹ Haû nghut jáng, nga-nhúng gi, lumjínng myit hau èq, jep é tarâ lé lhoq hpoí pyám râ lhú? Ratsuí lháng a nghut! Nga-nhúng gi, jep é tarâ haû lé lhoq ging tîng é bang ru nghut lhê.

Abraham, Mara Hkyut San Huí É Hkyô

4 Haû su nghut jáng, nga-nhúng é îchýi îwa Abraham gi, haû hkyô mai haí wó sê yu ri nghû, taí râ lhú? ² Abraham gi, zui saí é dông mai, mara hkyut san byi huí é ru nghut le gi, yhang nghutbun jang joq râ nghut lhê; nghut kôlháng, Garai Gasâng é hí má gi, yhang haû dông a nghut. ³ Chýumdang má hkâsu gà tô ri lhú gà le, "Abraham gi, Garai Gasang lé lumjínng bê nghut mù, yhang lé, dingmán sù ga són byi bê nghut ri." † gà ri.

⁴ Zui saí é sù gi, yhâng é zuihpau lé, chyunghuq dông wó yu é a nghut é za, wó yù gíng luí, wó yu é ru nghut lhê. ⁵ Nghut kôlháng, zui saí é hkyô dông a nghut é za, haû agè ashop hkyô lé mara hkyut san byî é Garai Gasang lé lumhkau é sù gi, yhâng é lumjínng myit é yanmai, dingmán sù ga són byi huí é nghut lhê. ⁶ Haû eq rajung za, yhang zui saí é hkyô dông a nghut é za, Garai Gasâng èq dingmán sù ga són byi huí é, Garai Gasâng chyáng mâ é shimân jeju wó é sù eq séng luí, Dawiq taí é gi,

⁷ "Tarâ lu laí é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.

⁸ Bo tô é mara lé, Yhumsing èq mara a són byî é hui sù gi, hkungsô wó nyi ri." ††

⁹ Haû sù é jeju gi, ahpyo-kuq hpyit hkâm bâng é matú za nghut lhê lhú? Ahpyo-kuq a hpyit bâng é matú le nghut lhê lhú? Hkâsu mù gà le, Abraham é lumjínng myit lé, dingmán sù ga són byi bê nghut lhê nghû, ngamoq taí nyi bê nghut lhê. ¹⁰ Haû su són byî é gi, hkâ-nhám nghut lhê lhú? Ahpyo-kuq hpyit hkâm é htâng má lhú? A nghut jáng, hí má lhú? Haû gi, ahpyo-kuq hpyit hkâm é htâng má a nghut é za, hí má ru nghut lhê. ¹¹ Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjínng luí wó é dingmán hkyô gà é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôlháng, lumjínng é lhunglhâng bang lé dingmán bang ga són byî é wó hui râ matú, haû bâng é îwa dut bê nghut ri. ¹² Haû ahpyo-kuq hpyit hkâm é za a nghut, nga-nhúng é îwa Abraham, ahpyo-kuq hpyit a hkam yù shi má wó é lumjínng hkyo é hkyî-kám lé cháng luí ahpyo-kuq hpyit bâng é îwa le, yhang nghut ri.

¹³ Mingkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidig gi, jep é tara é yanmai a nghut é za, lumjínng hkyô mai lo é dingmán hkyô dông ru nghut lhê. ¹⁴ Hkâsu mù gà le, jep é tarâ dông nyi yap é bang gi, amyû hkûng xoq pé nghut é nghut jáng, lumjínng hkyô gi, akyû a bo é eq, danggidig gi, hpau a dap é dut byuq lhê. ¹⁵ Haû jep é tarâ gi, nhikmo-yo hkyô lhoq htoq é nghut lhê; nghut kôlháng, jep é tarâ a joq jáng gi, tarâ lu lai hkyô le joq râ a nghut.

¹⁶ Haû mù luí, danggidig gi, Abraham é awut ashín lhunglháng bâng chyáng, jeju mai za lo é eq gingtîng nyi é dut sháng gaq ga, lumjínng hkyô mai lo é nghut lhê. Haû gi, jep é tarâ má lòm bâng é matú baú za a nghut, Abraham é lumjínng hkyô má lòm bâng é matú le nghut lhê. Abraham gi, nga-nhúng lhunglhâng bâng é îwa nghut ri. ¹⁷ "Ngò gi, nang lé, byù myû myo myô é îwa dut nhâng bê." ‡ ga kê tô é eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yhang lumjínng é sù Garai Gasâng hí má, Abraham gi, nga-nhúng é îwa nghut lhê.

¹⁸ "Náng é awut ashín pé le, haû eq rajung za myô lò râ nghut lhê." †† ga yhang lé taí kyô to bê eq rajung za, yhang gi, myit myoqbyù jowò haí a joq kôlháng, lumjínng luí myoqbyu nyi é nghut mù, byù myû myo myô é îwa dut bê nghut ri. ¹⁹ Yhang gi, rashô zàn kê jé byuq bê nghut mù, yhânggùng gi, shi é gyá dut é hui zô é eq Sarah é zoyhûm shibó le shum byuq kôlháng, yhang gi, lumjínng myit a yom byuq nghut ri. ²⁰ Hau htoq agó, Garai Gasâng é danggidig eq séng luí, a lumjínng a dut é eq hê myit mhô myit a dut é za, yhâng é lumjínng myit lé saí lhoq ging tîng mù, Garai Gasang lé hkya-on kungtôn luí, ²¹ Garai Gasang gi, Yhang byî tô é danggidig eq rajung za wó kut râ a-tsam bò sù nghut é lé, yhang myit zing nyi ri. ²² Hau é yanmai, "Yhang lé, dingmán sù ga són byi bê nghut ri." †† gà tô é nghut lhê. ²³ "Yhang lé, són byi bê." ga, kê tô é dang gi, yhang é matú za a nghut, ²⁴ nga-nhúng é Yhumsing

† 4:3 Apûn 15:6,22 †† 4:8 Hkya-on 32:1-2

‡ 4:17 Apûn 17:5 †† 4:18 Apûn 15:5 †† 4:22 Apûn 15:6

Yesuq lé, shi é mai lhoq dui toq yû sù Garai Gasang lé lumjínq luí, Yhang èq dingmán bang ga són byi râ nghut é, nga-nhúng é matú le nghut lhê. ²⁵ Yhumsíng Yesuq gi, nga-nhúng é yubak marâ é matú, shî hkám byi râ dông ap pyâm é hui luí, nga-nhúng, mara hkyut san byí é hui râ matú, lhoq dui toq é hui bê nghut ri.

Nguingón Hkyô Eq Gabú Hkyô

5 Haû mù luí, nga-nhúng gi, lumjínq é dông mai mara hkyut san byí é hui bê nghut é yanmai, nga-nhúng é Yhumsíng Yesuq Hkrisduq dông, Garai Gasang eq buinùm wó xoq yû bê nghut lhê. ² Yesuq é yanmai, nga-nhúng gi, ahkuí wó yu to bê jeju shî má, lumjínq luí wó wâng bê nghut mù, Garai Gasâng é hpungwup shingkanq lé myoqbyù luí gabú gumrong nyi lhê. ³ Haû za a nghut, nga-nhúng gi, wuífhe jamjau hkyô pé má le gabú gumrong nyi lhê. Hkâsu mù gâ le, wuífhe jamjau hkyô gi, hkam jan hkyô lhoq htoq ri; ⁴ hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê. ⁵ Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byí tô é Choyiyúng Woi-nyí dông, nga-nhúng é i-myt unghkaû má hut kat byi bê nghut ri.

⁶ Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkám byi bê nghut ri. ⁷ Gè gè ga jáng, dingmán su é matú shî hkám byi râ byù gi, shau râ nghut lhê; nghut kôlháng, byù gè rayuq é matú kúm gi, wám shî hkâm é byù nyi sê lhê. ⁸ Nghut kôlháng, nga-nhúng gi, yubak dap bang nghut nyi ashî hkún, nga-nhúng é matú Hkrisduq shî hkám byí é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuí, Yhâng é sui mai mara hkyut san byí é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lhê. ¹⁰ Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byí é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lhê. ¹¹ Haû su za a nghut, nga-nhúng gi, nga-nhúng é Yhumsíng Yesuq Hkrisduq dông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, mingkan má jé wâng bê nghut luí, shî-nò hkyô gi, yubak marâ é yanmai châng jé bê nghut ri; haú dông mai, byù lhunglhâng bang gi, yubak dap bang chyat nghut byuq mù, shî-nò hkyô gi, byù lhunglháng bang chyáng jé bê nghut ri. ¹³ Hkâsu mù gâ le, haû jep é tarâ lé a byi

shimá, yubak mara gi, mingkan má joq to bê nghut lhê. Nghut kôlháng, jep é tarâ a joq shî é hkún gi, yubak mara lé mara su a ngàm shî é nghut lhê. ¹⁴ Haû su ga kôlháng, Adam su hkunmó lé lu laí é dông mara a kut shut bâng é ahtoq má lháng, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

¹⁵ Nghut kôlháng, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byí é hkyô lhoq htoq é nghut lhê; nghut kôlháng, jeju chyunghuq gi, tarâ lu lai bang myo myô má cháng mù, mara hkyut san byi hkyô lhoq htoq é nghut lhê. ¹⁷ Hau htoq agó, byù rayuq tarâ lu lai luí, haû rayuq é yanmai, shî-nò hkyô up nyi bê nghut lhê, ahkuí kúm, haû Garai Gasâng é agùn agó shimân jeju eq dingmán hkyô é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak dui hkyô má uphkanq nyi kó râ nghut lhê.

¹⁸ Haû mù luí, tarâ lu laí é hkyô ralhúm é yanmai, byù lhunglhâng bang gi, mara dam byí é hui zo kô é su, dingmán hkyô é muzó ralhúm é yanmai, byù lhunglhâng bang gi, asak dui hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó râ nghut lhê.

²⁰ Haû jep é tarâ jat é gi, tarâ lu lai hkyô je myo râ matú nghut lhê. Nghut kôlháng, yubak mara myô jat é hkún, jeju gi, je riyhang myô jat lo é nghut lhê. ²¹ Haû mù, yubak mara gi, shî-nò hkyô dông uphkanq bê su, jeju gi, nga-nhúng é Yhumsíng Yesuq Hkrisduq é yanmai, ahtum abyuq é asak wó byí é dingmán hkyô dông up râ nghut lhê.

Hkrisduq Eq Rading Ralhum

6 Haû nghut jáng, nga-nhúng gi, hkâsu nghû taí râ lhú? Jeju myô jat lò sháng gaq nghû, nga-nhúng, yubak mara kut xoq nyi râ lhú? ² Haû su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haú má wó dui nyi lo râ lhú?

³ Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shî hkám hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lhú? ⁴ Haû mù luí, Hkrisduq gi, Íwâ é hpungwup shingkanq èq, shî bê mai lhoq dui toq huí é su, nga-nhúng le, asak asik dông wó dui nyi sháng gaq nghû, nga-nhúng gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lhê.

⁵ Nga-nhúng gi, Yhang shî hkám é hkyô má, Yhang eq rading ralhum za dut bê nghut jáng, Yhâng é dum

dui toq hkyô má le, Yhang eq rading ralhum za hkyak dut râ nghut lhê. ⁶ Hkâsu mù gà le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lhê.

⁸ Haû mù, nga-nhúng gi, Yhang eq rahá shî hkám bê nghut jáng, Yhang eq rahá dui nyi râ nghut lhê nghû, lumjínghê. ⁹ Hkâsu mù gà le, Hkrisduq gi, shî bê mai lhoq dui toq é hui bê nghut mù, Yhang gi, dum wó shi lo râ a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó síng to râ a nghut lo.

¹⁰ Yhang shî hkám é shî-nò hkyô gi, banshoq băng é matú, yubak mara eq séng luí radàm za shî hkám byi bê nghut ri; nghut kôlháng, Yhang dui nyi é asak gi, Garai Gasâng hí má dui nyi é nghut lhê.

¹¹ Haû eq rajung za, nungmoq gi, yubak mara eq shi gang luí, Hkrisduq Yesuq dōng Garai Gasâng é matú asak dui nyi lhê nghû, sôn yù keq. ¹² Haû mù luí, nungmoq é htên byoq sê é gungdu má, yubak mara lé hkâ-uphkàng nhâng, uphkàng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agè ashop hkyô é chùng zè pé dōng yubak mara má hkâ-ap byi pyám kó, shî bê mai lhoq dui toq yù huí é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyô é chùng zè pé dōng, Garai Gasâng chyáng ap byi keq. ¹⁴ Hkâsu mù gà le, nungmoq gi, jep é tarâ hkaû má a nghut lô é za, jeju hkaû má nghut nyi bekô yanmai, yubak mara gi, nungmoq lé síng sù wó dut râ a nghut lo.

Dingmán Hkyô É Jùn Pé

¹⁵ Haû jáng gi, hkâsu kó lhú? Nga-nhúng gi, jep é tarâ hkaû má a nghut lo é za, jeju hkaû má nghut nyi bekô yanmai, mara wó kut shut kó râ lhú? Haû su a wó kut!

¹⁶ Nungmoq gi, rayuq yuq é jino gyo râ matú, yhumsing gùng lé jùn pé dōng ap pyâm é hkûn, shî-nò hui râ nghut é yubak marâ é jùn dōng nghut kôlháng, dingmán hkyô wó râ nghut é jino gyo hkyô nghut kôlháng, nungmoq châng nyi é nghut le gi, nungmoq, haû é jùn dut bê lé, a sé kó lhú? ¹⁷ Nungmoq gi, yubak marâ é jùn dut wú bê bang nghut kôlháng, nungmoq hkam yu to bê mhoqshit hkyô lé, nungmoq é myit nhiklhú banshoq èq cháng bekô nghut é yanmai, Garai Gasang lé jeju hkya-on sháng. ¹⁸ Nungmoq gi, yubak mara mai lhoq lhut é hui bang nghut kômù, dingmán hkyô é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dōng ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dōng lháng ap byi wú bekô nghut é su, ahkuí gi, chyoiyúng hkyô wó yù râ matú, haû pé lé, dingmán hkyô má jùn dōng ap byi keq. ²⁰ Nungmoq gi, yubak marâ é jùn dut nyi kô é

hkûn, dingmán hkyô èq uphkang é mai lut nyi kô é nghut lhê. ²¹ Ahkuí, nungmoq hoqjung nghû wú htoq é pé gi, haû u lé, hai akyú wó yù kô é lhú? Hau pé gi, shi byuq é má htúm é chyat nghut ri. ²² Nghut kôlháng, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyú gi, chyoiyúng hkyô wó yu é nghut mù, ahtum abyuq é asak wó râ nghut lhê. ²³ Hkâsu mù gà le, yubak marâ é ahpau gi, shi é hkyô nghut ri; nghut kôlháng, Garai Gasâng é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

Tarâ Mai Lut É Hkyô

7 Gumang wui ê, ngò gi, tarâ lé sê é bang nungmoq lé tái nyi lhê: haû tarâ gi, byù rayuq lé, yhang, asak dui nyi é u lé za wó uphkang é lé, nungmoq a sé kó lhú? ² Dangké, ikun wàng bê myiwe myhí rayuq gi, yhâng é yhumsing hpó asak dui nyi é ahkyíng má, tarâ èq up zing tô é hui ri; nghut kôlháng, yhâng é yhumsing hpó shi byuq é nghut jáng gi, haû ikun wàng tarâ mai, yhang wó lut bê nghut ri. ³ Haû nghut é yanmai, yhâng é yhumsing hpó asak dui nyi ashî u lé, yuqgè góyuq eq hâng lhúm é nghut jáng gi, yhang lé, sulàng lú sù ga kó râ nghut lhê. Nghut kôlháng, yhâng é yhumsing hpó shi byuq é nghut jáng gi, yhang, tarâ haû mai lut bê nghut luí, yuqgè góyuq eq hâng lhúm kôlháng, sulàng lú sù a nghut lo.

⁴ Haû mù luí, ngá é gumang wui ê, nungmoq le, haû shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashi wó zui byi sháng gaq ga, Hkrisduq é gungdu dōng mai, jep é tarâ eq shi gang bê nghut lhê. ⁵ Hkâsu mù gà le, nga-nhúng, yubak gungsho má nghut nyi é hkûn, nga-nhúng gi, shî-nò hkyô é ashi zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê. ⁶ Nghut kôlháng, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dōng a nghut é za, Woi-nyí é hkyô sik dōng nga-nhúng dojaú nyi é nghut lhê.

Jep É Tarâ Eq Yubak Mara

⁷ Haû jáng, nga-nhúng hkâsu tái râ lhú? Jep é tarâ gi, yubak mara nghut lhê lhú? Ratsuí lháng a nghut! Gè gè ga jáng, haû jep é tarâ dōng mai za a nghut le, yubak mara lé, ngò wó sê é a nghut. Hkâsu mù gà le, "myoqnoq myit hkâbô" † ga jep é tarâ má a tái tô é nghut jáng, myoqnoq é hkyô lé, ngò sé râ a nghut. ⁸ Nghut kôlháng, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byi ri; hkâsu mù gà le, jep é tarâ hkaû má a nghut jáng, yubak mara gi, shi é za a nghut lhê. ⁹ Ngò gi, tarâ hkaû má a nghut é za asak dui wú bê nghut lhê; nghut kôlháng, haû hkunmó htoq lô jáng, yubak mara gi, dui

† 7:7 Htoq Ló 20:17

lò mù, ngò gi, shî bê nghut lhê. ¹⁰ Haû mù luî, asak duì nhâng rã matú nghut é hkunmó haû gi, shî-nò hkyô dut byuq é lé, ngò wó sê é nghut lhê. ¹¹ Hkâsu mù gâ le, yubak mara gi, hkunmó é ahkáng lé chûng mù, ngo lé mhaû yù luî, hau èq ngo lé shî nhang ri. ¹² Hau pé lé wú jáng, jep é tarâ gi, chyoyúng ri; haû hkunmó gi, chyoyúng, dingmán é eq ge é nghut ri.

¹³ Haû nghut jáng, ge é hkyô haû gi, ngá é matú shî-nò hkyô dut byuq bê lhú? Haú đông a nghut! Nghut kôlhang, yubak mara lé gi, yubak mara đông hkyak wó lhoq htoq shit rã matú, haû ge é hkyô đông mai, yubak mara gi, ngò má shî-nò hkyô lhoq htoq bê nghut luî, yubak mara gi, gè gè yhang agè ashop dut é lé, hkunmó đông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luî, yubak mara má jùn đông ung zô é hui bê nghut lhê. ¹⁵ Ngò haí kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. ¹⁷ Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

²¹ Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gâ le, ngò gi, Garai Gasâng é tarâ lé, ngá é i-myt unghkaû má myit nguì gabú nyi lhê. ²³ Nghut kôlhang, ngá é gungdu showui showang pé má bo é gotû tarâ gi, ngá é i-myt tarâ eq majan zân lhûm é nghut luî, ngá é gungdu showui showang hkaû má mù zui nyi é yubak é tarâ má, ngo lé shúmbyû dut nhang é lé, ngò myang ri. ²⁴ Ngò gi, shogyo rayhup dut sù nghut ri-nhung! Shî nhang é gungdu shî mai, ó yuq wá, ngo lé wó hkyi yù rã lhú? ²⁵ Nga-nhúng é Yhum-sîng Yesuq Hkrisduq đông mai wó lut bê nghut mù, Garai Gasang lé jeju hkyâ-ôn nyi lhê!

Haû mù luî, ngò yhang, myit é đông gi, Garai Gasâng é tarâ lé châng lhê, nghut kôlhang, yubak gungsho đông gi, yubak é tarâ lé châng lhê.

Haû Woi-nyí Mai Asak Dui É Hkyô

8 Haû mù luî, ahkuí, Hkrisduq Yesuq má nghut nyí bâng é matú gi, mara byí é hkyô a joq lô é nghut lhê. ² Hkâsu mù gâ le, asak duì hkyô eq sêng é Woi-nyí é tarâ gi, Hkrisduq Yesuq đông, yubak mara eq shî-nò hkyô é tarâ mai, ngo lé lhoq lhut yù bê nghut lhê.

³ Haû jep é tarâ gi, yubak gungshô é yanmai, wum ny-hóm luí a wó kut é hkyô lé, Garai Gasang gi, yubak

marã hkungga dut nhâng rã matú, yubak byu é gungsho đông, Yhang Zo sîng lé nhang kat é đông kut pyám bê nghut ri. ⁴ Haû mù, Garai Gasang gi, yubak gungsho đông asak a dui é za Woi-nyí đông asak duì bang nghut é nga-nhúng má, haû jep é tarâ má bo é hkyô pé lé, wó lhoq dik rã matú, gungsho ral-hum má, mara lé doqdân pyám bê nghut ri.

⁵ Haû yubak gungsho đông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí đông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶ Haû yubak byu é myit gi, shi é hkyô nghut ri; haû Woi-nyí èq hkang to huí su é myit kúm gi, asak eq nguingón hkyô nghut ri. ⁷ Haû yubak myit gi, Garaí é tarâ ô má a nyi é htoq agó, haú lé a wó cháng kut é yanmai, Garaí é gyè nghut ri. ⁸ Haû yubak gungshô èq hkang tô é hui bang gi, Garaí Gasang lé a wó gabú nhâng kó nghut ri.

⁹ Nghut kôle, Garaí Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô èq hkang to huí é bang a nghut lô é za, Woi-nyí èq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰ Nghut kôlhang, nàng má Hkrisduq nyi nyi é nghut jáng, nàng é gungdu gi, yubak marâ é yanmai shî kôlhang, nàng é woi-nyí gi, dingmán hkyo é yanmai dui nyi ri. ¹¹ Hau htoq agó, Yesuq lé shi é mai lhoq dui toq yù Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yù Sù gi, nungmoq má nyi nyi é, Yhâng é Woi-nyí đông mai, nungmoq é, shî sê é gungdu pé lé le, asak duì nhâng rã nghut lhê.

¹² Haû mù luî, Gumang wui ê, nga-nhúng gi, yubak gungsho đông asak duì rã matú, wó wó é bang a nghut. ¹³ Hkâsu mù gâ le, haû yubak gungsho đông asak duì kô é nghut jáng, nungmoq gi, shî rã nghut lhê; nghut kôlhang, haû gungshô é shut shaí hkyô lé, Woi-nyí èq sat pyám kô é nghut jáng, nungmoq gi, asak duì rã nghut lhê. ¹⁴ Garaí Gasâng é Woi-nyí èq shuí u é hui bang gi, Garaí Gasâng é yhangzô pé nghut lhê. ¹⁵ Hkâsu mù gâ le, nungmoq gi, gyuq rã matú, nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba, † Áwa ê" nghũ wut é nghut lhê. ¹⁶ Nga-nhúng gi, Garaí Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm nyi ri. ¹⁷ Ahkuí, nga-nhúng gi, zo wui nghut bê yanmai, Hkrisduq eq rahá, Garaí Gasâng é amyû hkûngxoq pé wó dut é nghut lhê. Nga-nhúng gi, Hkrisduq é wuihke jamjau pé lé, gè gè yhang bo hui zô é nghut jáng, Yhâng é hpungwup shingkan lé le, bo myang hkam yù rã nghut lhê.

Htângnùng Lhê É Hpungwup Shingkan

¹⁸ Nga-nhúng é ahkuí lhê é wuihke jamjau hkyô pé gi, nga-nhúng lé shit rã nghut é hpungwup shingkan

† *Aba gâ é gi, Aramaik dang đông "áwa" gâ é lichyúm nghut lhê.*

eq whuí rã a gingdán nghû, ngò wó myit ri. ¹⁹ Haû hpan to huí é lhunglhang gi, Garai Gasang é yhangzô pé lé lhoq htoq shit byi rã lé, gyai yhang myit láng nyi akô nghut ri. ²⁰ Hkâsu mù gâ le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsing hkyin yu é đông a nghut é za, haû su dut nhâng Sû ô nau é đông kut é nghut ri. ²¹ Haû hpan to huí é lhunglhang gi, htên byoq byuq rã matú shúm dut é mai lhoq lhut é hui luí, Garai Gasang é yhangzô pé é hpungwup bo é luthkyô má wó wãng rã matú, myoqbyu tô é nghut lhê.

²² Haû hpan to huí é lhunglhang gi, ahkuí hkying jé shoq, zohkû-nò no é su nò-kying kyíng nyi kô é lé, nga-nhúng sê lhê. ²³ Haû pé za a nghut, Woi-nyí é sâng-hi ashi † lé wó yû bê bang nga-nhúng le, zo pé đông yín yu é jeju lé láng uchyang, i-myt unghkaû má nò-kying kyíng é nghut lhê. Zo pé đông yín yu é jeju haû gi, nga-nhúng é gungdu hkyi xe yû hkyô nghut lhê. ²⁴ Hkâsu mù gâ le, nga-nhúng gi, myit myoqbyû hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyû shirã lhú? ²⁵ Nghut kôlhang, nga-nhúng gi, a wó shí é lé myit myoqbyu é nghut jáng, myit hính hính kut láng é nghut lhê.

²⁶ Haû eq rajung za, Woi-nyí gi, nga-nhúng wum nyhôm é hkyô má garúm byi ri. Nga-nhúng gi, haí dung rã é lé a sé kôlhang, haû Woi-nyí yhang gi, dang mai a wó taí htoq é nò-kying htê đông, nga-nhúng é matú bo dúng xoq byi ri. ²⁷ Nga-nhúng é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é đông, sân-yúng bãng é matú bo dúng xoq byi ri.

Banshoq Lé Je Wó Ung Pyám Rã Hkyô

²⁸ Garai Gasang gi, Yhang myit sôn tô é eq rajung za, ji yû luí, Yhang lé chyitdap bãng é matú, lhunglhang lé ge é đông chyat kut é hkyô lé, nga-nhúng sê lhê.

²⁹ Hkâsu mù gâ le, Yhang Zo gi, gumang wui myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó pũng nhâng rã matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yû bê bang lé gi, mara hkyut san byi ri; mara hkyut san byi é hui bang lé gi, hpungwup shingkaq bò nhang ri.

³¹ Haû jáng gi, shí hkyô eq séng luí, nga-nhúng haí taí shirã lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyè wám kut rã lhú? ³² Yhumsing é Yhangzô lé lhang a ha bũn é za, nga-nhúng banshoq bãng é matú ap byi pyâm é Sû gi, Yhang lé le, lhunglhang lé le, rahá laí laí byi rã a nghut lhú? ³³ Garai Gasang éq hkyin yu to bê bang lé, ó yuq wá mara wó hũn rã lhú? Garai Gasang gi, mara hkyut san byi Sû nghut ri. ³⁴ Hkrisduq Yesuq gi, shí hkám luí, shí hkám é htoq agó, shi é mai lhoq dui toq yu é hui mù, Garai Gasang é loqyo hkyam má nghut nyi luí,

† Woi-nyí é sâng-hi ashi gâ é gi, Woi-nyí gi, Garai Gasang byi é chyunghuq pé mâ é sâng-hi lhum nghut lhê.

nga-nhúng é matú bo dúng xoq byi nyi bê nghut é yanmai, ó yuq wá mara wó byi rã lhú? ³⁵ Hkrisduq é chyitdap myit mai, nga-nhúng lé, hai eq wá wó lhoq kang rã lhú? Gunjang huí é hkyo èq luq? Wuíhke huí é hkyo èq luq? Zing-ri huí é hkyo èq luq? Mutmó huí é hkyo èq luq? Gùng chĩn dut huí é hkyo èq luq? Gyuq jung èq luq? Sham èq luq? ³⁶ Haû gi,

"Náng é yanmai, ngamoq, nyi wuí sat pyâm é huí nyi ri;

sat rã matú nyi tô é sau pé lé su, ngamoq lé myit pyâm akô." ††

ga kã tô é eq rajung za nghut ri. ³⁷ A wó lhoq kang; nga-nhúng lé chyitdap Su é yanmai, nga-nhúng gi, haú pé banshoq lé je wó ung pyâm é nghut lhê. ³⁸ Hkâsu mù gâ le, shí kôlhang, byũn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, haí jung a-tsam pé nghut kôlhang, ³⁹ htoq tsáng mã é nghut kôlhang, a-ô tsáng mã é nghut kôlhang, hpan tô é gotú haí nghut kôlhang, nga-nhúng é Yhumsing Hkrisduq Yesuq má bo é Garai Gasang é chyitdap myit mai, nga-nhúng lé wó lhoq kang pyám rã a nghut nghû, ngò gi, hkyak wó sê yu ri.

Garai Gasang Hkyin Yu É Israelaq Byu Pé

9 Ahkuí, ngò gi, Hkrisduq má tengmán é dang taí rã; ngò a mhaû é lé, haû Chyoiyúng Woi-nyí gi, ngá é unghkaû myit má hkyak saksé hkâm nyi ri. ² Ngò gi, ngá é myit nhikhum má, gyai yhang yón kuq nyi é eq ayang hpuzô nyi lhê. ³ Hkâsu mù gâ le, ngò gi, ngá é byuhú, ngá é gumang wui é matú, nhĩng é hui luí Hkrisduq eq gang le lhang gè rã su gâ ri. ⁴ Haú bang gi, Israelaq byu pé nghut lhê. Zo yín yû huí é hkyô le, hpungwup shingkaq le, dangshikaq pé le, tarã lé myang hap yu é hkyô le, noqkuq yhũm má noqkuq é hkyô le, danggidiq pé lé le, yhangmoq wó yu akô nghut ri. ⁵ Haû mying hũ é íchýí iwã pé gi, yhangmoq é íchýí iwã pé nghut luí, byu é hkyam đông gon jáng, Hkrisduq gi, yhangmoq amyû mã é nghut ri. Yhang gi, lhunglhang lé up é, ahtum abyuq hkya-on huí é Garai Gasang nghut ri! Amen.

⁶ Haû gi, Garai Gasang é danggidiq akôm dut byuq bê nghũ nau é a nghut. Hkâsu mù gâ le, Israelaq byu pé banshoq bang gi, Israelaq byũ akying chyat a nghut kó nghut ri. ⁷ Abraham é awut ashín banshoq bang gi, yhãng é zo wuí akying chyat nghũ a wó taí é nghut lhê. Hau é malaí, "Isak đông mai lo é lé, náng é awut ashín nghũ són byi rã nghut lhê." * gâ tô ri.

⁸ Radông taí sháng ga jáng, gungsho mai hku é zo wuí gi, Garai Gasang é zo wuí akying a nghut kó, danggidiq eq sêng é zo wuí za sheq, Abraham é awut ashín pé đông són byi é nghut lhê. ⁹ Hkâsu mù gâ le, "Masat tô é ahkying má, ngò dum taũ lé mù, Sarah gi, yuqzo hkũ rã nghut lhê." †† ga taí tô é danggidiq é yanmai nghut lhê.

†† 8:36 Hkya-on 44:22 † 9:7 Apũn 21:12 †† 9:9 Apũn 18:10,14

¹⁰ Haû za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê.
¹¹ Nghut kôlhâng, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyi sháng gaq ga, haû zozùm nhik a hku lé shî é htoq agó, ge é eq a ge é muzó haî lháng a kut shimá, "Haû ko sù yuq gi, tiq sù yuq lé dojaú râ nghut lhê." † ga, Rebeka lé taî kyô tô é nghut lhê. ¹³ Haû gi, "Yakup lé, ngò chyttdap lhê, nghut kôlhâng, Eso lé gi, a ngui é nghut lhê." †† ga kâ tô é eq rajung za nghut ri.

¹⁴ Haû nghut é yanmai, nga-nhúng hkâsu nghû taî râ? Garai Gasang gi, a tarâ é sù nghut lhê lhú? Ratsuí lháng a nghut! ¹⁵ Hkâsu mù gâ le,

"Ngò, shogyo nhikmyin naù sù lé, shogyo nhikmyin râ nghut lhê;

Ngò, jeju byi naù sù lé, jeju byi râ nghut lhê." ‡ ga, Mosheq lé Yhang taî ri. ¹⁶ Haû mù luí, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyín é yanmai za nghut lhê. ¹⁷ Hkâsu mù gâ le, Chyúmdang má, "Náng chyáng Ngá é a-tsam wó tún shit râ eq mingkan gón má Ngá é myíng lhoq pyo é hui râ matú sheq, Ngò, nang lé lhoq toq kat é nghut lhê." † ga, Hpara-uq lé taî ri. ¹⁸ Haû mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

¹⁹ Nungmoq mâ é rayuq yuq, "Haû jáng, Garai Gasang gi, ngamoq lé haî mù mara hun nyi ashî lhú? Yhang ô nau é hkyô lé, ó yuq wá wó hkûm pyâm lhê lhú?" ga, ngo lé taí kó râ nghut lhê. ²⁰ Nghut kôlhâng, Garai Gasang lé dang tu sù byù nàng gi, ó yuq wá nghut lhê lhú? Saî to hui bê é zè pé gi, "Nàng, haî mù ngo lé shî su kut saî tô lhê lhú?" nghû saî é Sù lé wó taí râ lhú? ²¹ Tso-au saî sù gi, tsohtung ralhum mai za, hkik é tso-au pé eq a hkik é tso-au pé saî râ ahkáng wó lhê a nghut kô lhú?

²² Garai Gasang gi, Yhâng é nhikmo-yo hkyô tún shit luí, Yhang é a-tsam lé sé nhâng naù kôlhâng, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ jang haî joq ashî lhú? ²³ Hpungwup shingkâng é matú noq mai hen to bang nghut é, Yhang shogyo nhikmyin huí é bang lé, Yhâng é agùn agó é hpungwup shingkang lé sé nhâng naù mù, Yhang haû su kut é nghut jáng, taí râ haî joq ashî lhú? ²⁴ Haú bang gi, Yudaq byu pé mai za a nghut, tûngbaù pé mai le ji yù huí é bang nga-nhúng nghut lhê. ²⁵ Haû eq rajung za, Hosea laiká má Yhang taî tô é gi,

"Ngá é byù myû a nghut é bang lé, 'Ngá é byù myû' nghû;

Ngò a chyt é byizo lé 'Ngò chyt sù' nghû wut râ nghut lhê." ††

gâ ri. ²⁶ Haû mù,

"Nungmoq gi, ngá é byù myû pé a nghut.' nghû yhangmoq lé taí é jowò má yhang, yhangmoq gi, 'Rû dui nyi é Garai Gasâng yhangzô pé' ga wut é hui kó râ nghut lhê." ††† gâ ri.

²⁷ Esai-aq le, Israelaq byu pé eq séng luí garu taí é gi, "Israelaq yhangzo yhangshû pé gi, wuishuq lung-aù yàm mâ é semuí su myo kôlhâng, myit gyó tô é bang za sheq hkyi yu é hui kó râ nghut lhê.

²⁸ Hkâsu mù gâ le, haû Yhumsíng gi, myidàm htoq má Yhâng é tarâ jéyáng hkyô lé hân hân lhoq dik lhoq htûm pyám râ nghut lhê." ††† gâ ri.

²⁹ Haû eq rajung za, hí lé Esai-aq taí tô é gi, "A-tsam dik shoq bò sù haû Yhumsíng za, nga-nhúng lé, awut ashín a myhit to byí é nghut jáng, nga-nhúng gi, Sodom wà su dut byuq luí, Gomoraq myuq eq pung byuq râ nghut lhê." § gâ ri.

Israelaq Byu Pé A Lumjíng Kô É Hkyô

³⁰ Haû mù, nga-nhúng hkâsu nghû taí râ lhú? Dingmán hkyô lé a châng hkat é tûngbaù pé gi, haú lé wó yù bekô; haû gi, lumjíng hkyo é yanmai wó yu é dingmán hkyô nghut ri. ³¹ Nghut kôlhâng, tarâ eq séng é dingmán hkyô lé châng hkat é Israelaq byu pé gi, haú lé a wó yù kó nghut ri. ³² Haî mù a wó yù kô é lhú?

Yhangmoq gi, lumjíng myit èq châng hkat kô é a nghut é za, muzó pê èq châng hkat kô é yanmai, a wó yù kô é nghut ri. Yhangmoq gi, "htung htê râ luqgok" má htûng leng bekô nghut ri. ³³ Haû,

"Wú keq, htûng leng râ luqgok eq myit leqbat nhâng râ luqmó cham lé, Ngò, Zi-un bùm má lheq to luí,

Yhang lé lumhkaù sù gi, hkâ-nhám le hoq hpu é hui râ a nghut." §†

ga kâ tô é eq rajung za nghut ri.

10 Gumang wuî ê, ngò gi, haû Israelaq byu pé hkyi yu é hui kó sháng gaq nghû, gyai yhang myit shirông luí, Garai Gasâng chyáng yhangmoq é matú kyûdung byí nyi lhê. ² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhâng, yhangmoq myit zuq é hkyô gi, hpaqchyî bo é dông a nghut kó. ³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsíng dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaù má a nyi kó nghut ri. ⁴ Hkrisduq gi, lumjíng bang yuq hkangmó, dingmán é má wó jé kó sháng gaq ga, jep é tarâ ló htûm jang dut bê nghut ri.

⁵ Mosheq gi, "Haú pé dông châng é sù gi, haú pé mai asak dui râ nghut lhê." §†† ga, jep é tarâ eq séng é dingmán hkyô lé kâ sân kyô tô é nghut lhê. ⁶ Nghut kôlhâng, lumjíng hkyô eq séng é dingmán hkyô gi, "Náng é myit nhiklhum má, 'Mauhkûng má, ó yuq doq ló râ

† 9:11-12 Apùn 25:32 †† 9:13 Mal 1:2-3 ‡ 9:15 Htoq Ló 33:19 †† 9:17 Htoq Ló 9:16 †† 9:25 Hos 2:23

††† 9:26 Hos 1:10 ††† 9:28 Esai 10:22-23 § 9:29 Esai 1:9 §† 9:33 Esai 8:14; 28:16 §†† 10:5 Nhong 18:5

lhú?' † (Haû gi, Hkrisduq lé shuî gyó lò râ gá nau é nghut lhê), 7 haû a nghut jáng, 'Nik é jang má, ó yuq gyó wâng râ lhú?' †† (Haû gi, Hkrisduq lé, shi é mai dui toq nhâng râ gá nau é nghut lhê.), nghû hkâtaí kó." gâ tô ri. 8 Haû jáng, hkâsu gâ tô ri lhú? "Haû mungdang gi, nàng eq chyâng nyi ri; náng é nhut má le, náng é myit nhiklhum má lé nghut nyi ri." ‡ gâ tô ri. Haû gi, ngamoq hko taí é lumjínng hkyô eq sêng é mungdang nghut lhê. 9 Haû mù, "Yesuq gi, Yhumsíng nghut ri." nghû náng é nhut èq yín yú mù, Garai Gasang gi, Yhang lé, shi é mai dui toq nhâng bê nghut lhê nghû, náng é myit nhiklhum má lumjínng é nghut jáng, nàng gi, hkyi yu é hui râ nghut lhê. 10 Hkâsu mù gâ le, byù gi, myit nhiklhum má lumjínng jáng, mara hkyut san byí é hui mù, nhut mai yín yú jáng, hkyi yù huí é nghut lhê. 11 Haû Chyúmdang taí é gi, "Yhang lé lumhkau é sù ó yuq le, hkâ-nhám lháng hoq hpû é hui râ a nghut." †† gâ ri. 12 Hkâsu mù gâ le, Yudaq byù eq tûngbaù pé é gyoro má gam hkoq é hkyô haí le a joq é za, haû Yhumsíng gi, banshoq bâng é Yhumsíng nghut lhê mù, Yhang lé wut dung bang lhunglháng lé, agùn agó shimân byí ri. 13 Hkâsu mù gâ le, "Haû Yhumsíng é myíng lé lãng é bang yuq hkangmó gi, hkyi yu é hui râ nghut lhê." †† gâ tô ri.

14 Haû nghut lé gi, yhangmoq a lumjínng é sù lé nhíng, hkâsu wó wut dung kó râ lhú? Yhangmoq a wó gyô wú é sù lé nhíng, hkâsu wó lumjínng kó râ lhú? Hko kyô é sù a nyi le nhíng, hkâsu wó gyo kó râ lhú?

15 Nhang kat é a hui le gi, yhangmoq hkâsu kut wó hko kyo kó râ lhú? Haû eq rajung za, "Gabú danglù pé hko kyo bâng é hkyí-kám pé gi, hkâ-í yhang yúng ri myih-nhung!" ††† ga kâ tô ri.

16 Nghut kôlháng, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsíng ê, ngamoq é danglù lé ó yuq wá lumjínng é lhú?" ††† ga taí ri. 17 Haû nghut mù luí, lumjínng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê.

18 Nghut kôlháng, ngò myi kó lé: yhangmoq gi, a wó gyô wú kô é nghut lhê lhú? Yhangmoq gi, wó gyo gù za nghut lhê, haû eq rajung za,

"Yhangmoq é htê gi, myidàm htoq banshoq má jàm bê nghut ri;

yhangmoq é mungdang pé gi, mingkan htungchyûn hkangmó má jé bê nghut ri." §

gâ tô ri. 19 Ngò dum myi kó lé: Israelaq byu pé gi, a sê gyo kô é nghut lhê lhú? Mosheq sâng-hi má taí é gi,

"Byù rahú lháng a nghut bang èq, Ngò, nungmoq lé manôn nhâng râ;

sê gyo nyan a bo é amyú èq, Ngò, nungmoq lé wú nhik-yo nhâng râ nghut lhê." §†

gâ ri. 20 Hau htoq agó, Esai-aq a gyuq a wàm taí é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myí é bang lé, Ngò htoq shit bê nghut lhê." §††

gâ ri. 21 Nghut kôlháng, Israelaq byu pé eq séng luí, Yhang taí é gi,

"Ngò gi, jìno a gyô é eq ngegáng-htu é byù myú lé, nyí wuí Ngá loq lham mù ji nyi lhê." §†

gâ ri.

Israelaq Byu Pé Lé A He-ngik Pyám

11 Haû mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lhú? Ratsuí lháng a nghut! Ngò yhang le, Israelaq byu myú nghut luí, Abraham é awut ashín eq Ben-yamyin hú mà é sù nghut lhê. 2 Garai Gasang gi, Yhang te sê to gù nghut é, Yhâng é byu pé lé a he-ngik pyám é nghut lhê. Eliyaq eq séng é hkyô Chyúmdang má bo tô é lé, nungmoq a sé kó lhú? Garai Gasâng é hí má, yhang, Israelaq byu pé lé mara hùn é gi, 3 "Yhumsíng ê, yhangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akô nghut ri." §†† gâ ri. 4 Garai Gasang gi, yhang lé, hkâsu ga tû taí é nghut lhê lhú? Haû gi, "Balaq hpara é hí má hkyihput a htuq shí é byù nyhit hkyíng lé, Ngá é matú myhit to lhê." §† gâ é nghut lhê. 5 Haû eq rajung za, ahkuí gi, jeju yanmai hkyin yù huí é bang za myit gyó tô é nghut lhê. 6 Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

7 Haû nghut jáng, hkâsu lhú? Israelaq byu pé gyai ho shikut kôlháng, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byí é hui akô nghut ri; 8 haû gi,

"Garai Gasang gi, hkû-nyí jé shoq, yhangmoq lé nhik-shi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri." §†

ga kâ tô é eq rajung za nghut ri. 9 Dawiq taí é le,

"Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

10 Yhangmoq myoq a wó myâng shoq, myoqjí lhoq chut pyám byí é hui sháng gaq;

yhangmoq é nunghkúng gi, ayang wòlai wun goí nhang é hui sháng gaq." §††

gâ ri.

Tûngbaù Pé Lé Hkyi Yu É Hkyô

11 Ngò dum myi kó lé: Israelaq byu pé gi, a wó dum gè râ í leqbat byuq bekô lhú? Ratsuí lháng a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pé chyáng jé byuq é nghut lhê. 12 Nghut kôlháng, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyám é hkyô gi, tûngbaù pé é matú wó sùt hkyô dut é nghut jáng, yhangmoq é

† 10:6 Tarâ Pun 30:12 †† 10:7 Tarâ Pun 30:13 ‡ 10:8 Tarâ Pun 30:14 ††† 10:11 Esai 28:16 ††† 10:13 Yol 2:32 †††† 10:15 Esai 52:7 ††††† 10:16 Esai 53:1 § 10:18 Hkya-on 19:4 §† 10:19 Tarâ Pun 32:21

§†† 10:20 Esai 65:1 §† 10:21 Esai 65:2 §†† 11:3 1 Hko 19:10,14 §† 11:4 1 Hko 19:18 §† 11:8 Tarâ Pun 29:4 §†† 11:10 Hkya-on 69:22-23

byíng jup hkyô gi, je riyhang kô é wó sùt hkyô dut rá nghut ri-nhung!

¹³ Nungmoq tungbaù pé lé ngò táí nyi lhê: ngò gi, tungbaù pé é lagyo nghut nyi é u má, ngá é hpungmû lé hpautap nyi lhê. ¹⁴ Haù gi, ngá é amyû pé lé manôn myit wó bô nhâng mù, yhangmoq ra-am lé wó hkyi yù rá lé myit myoqbyu é hkyô nghut lhê. ¹⁵ Hkâsu mù gà le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é đông dut bê a nghut lhi? ¹⁶ Hau htoq agó, sâng-hĩ ashi đông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haù tsanlun akoq pé † ra-am gi, lhoq hkyui pyâm é hui luí, yosô tsanlun a-nyuq †† nghut sù nàng gi, haù pé má xoq é hui mù, haù tsanlun amyit é xù lé bo shuq lom é nghut jáng, ¹⁸ akoq haù pé lé hkâwú tiq pyám kó. Nungmoq haù su kut é nghut jáng, nungmoq gi, haù amyit lé htuoq é a nghut é za, amyit haù sheq nungmoq lé htuoq é hkyô lé, nungmoq myit sé keq. ¹⁹ Nungmoq kúm gi, "Ngò, haù má xoq é hui rá matú sheq, akoq haù pé gi, lhoq hkyui pyâm é huí é ru nghut lhê." ga táí rá nghut lhê. ²⁰ Haù su gi, nghut lhê. Nghut kôlhang, yhangmoq gi, a lumjínng é yanmai, lhoq hkyui pyâm é hui kômù, nungmoq kúm gi, lumjínng é yanmai, wó ging títng nyi é nghut lhê. Hká gumrong nyi, gyuq kyum nyi keq. ²¹ Hkâsu mù gà le, Garai Gasang gi, akoq akying pé lé a ha bûn é nghut le gi, nungmoq lé le ha bun rá a nghut.

²² Haù mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi rá nghut lhê. Haù a nghut jáng, nungmoq le, zân hpyit pyâm é hui rá nghut lhê. ²³ Yhangmoq gi, a lumjínng hkyô lé tô pyám kô é nghut jáng, dum xoq yu é hui kó rá nghut lhê; hkâsu mù gà le, Garai Gasang gi, yhangmoq lé dum wó xoq yu é Sù nghut lhê. ²⁴ Haù mù gà le, yosô tsanlun gàm akoq nghut gù nungmoq lé hpyit yù mù, htûng a nghut é đông, hô é tsanlun agàm má xoq é nghut le gi, haù akoq akying pé nghut é yhangmoq gi, ó le ó é tsanlun-ngut akying má xoq yu é lé je riyhang hui rá nghut lhê ô!

Israellaq Byu Pé Hkyi Yu É Hui Râ Hkyô

²⁵ Haù mù, gumang wuê ê, nungmoq a nghutbun kó sháng gaq nghû, zau tô é hkyô shî lé, nungmoq a sé dut rá lé, ngò a ô nau é nghut lhê: haù gi, tungbaù pé wang lo é laké byíng é hkûn jé shoq, Israellaq byu pé ra-am gi, myit lhoq htan é huí é hkyô nghut lhê. ²⁶ Hau htâng sheq, Israellaq amyû banshoq bang hkyi yu é hui rá nghut lhê. Haù gi,

"Hkyi yù Sù gi, Zi-un bùm mai htoq lô rá nghut lhê;

† Tsanlun akoq pé gi, Israellaq byu pé lé táí nau é nghut lhê.
†† Yosô tsanlun a-nyuq gi, tungbaù pé lé táí nau é nghut lhê.

Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi rá nghut lhê.

²⁷ Ngò, yhangmoq é yubak mara lé huí sêng pyám byi jáng,

haù gi, yhangmoq lé Ngò byí tô é Ngá é dangshikaq nghut lhê." ‡

ga kê tô é eq rajung za nghut ri.

²⁸ Haù gabú danglù eq séng luí ga jang, yhangmoq gi, nungmoq é matú gyè nghut akô; nghut kôlhang, hkyin htoq yù hkyô eq séng luí ga jang, yhangmoq gi, myíng hû é íchyí íwa pé é yanmai, chyitdap é huí akô nghut ri; ²⁹ hkâsu mù gà le, Garai Gasâng é chyunghuq pé eq Yhang ji yu é hkyô lé gi, wó htaí lhik pyâm é a nghut. ³⁰ Nungmoq gi, Garai Gasâng é jìno a gyô é bang radàm dut wú kô é nghut kôlhang, yhangmoq jìno a gyô é yanmai, ahkuí kúm, shogyo nhikmyin hkyô wó hkam yù bekô nghut é su, ³¹ ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyô é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri. ³² Hkâsu mù gà le, Garai Gasang gi, byù lhunglhang bang lé, shogyo nhikmyin hkyô wó tûn shit shoq ga, lhunglhang bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuê jung nghut ri-nhung!

³⁴ "Haù Yhumsing é myit lé, ó yuq wá ung sê lhê lhú? Yhâng é hpaqchyí byi sù gi, ó yuq wá dut wú é lhú?" ††

gâ ri.
³⁵ "Garai Gasâng eq jeju dum tau byi rá dut shoq, ó yuq wá, Garai Gasang lé byí wú é lhú?" ††

gâ ri.
³⁶ Hkâsu mù gà le, joq mijoq gi, Yhâng chyáng mai nghut mù, Yhang đông mai nghut luí,

Yhâng é matú chyat nghut ri. Haù hpungwup shingkang gi,

Yhâng chyáng ahtum abyuq ru joq nyí sháng gaq ô! Amen.

Dui É Hkungga Pé Dut Râ Hkyô

12 Haù mù luí, gumang wuê ê, nungmoq é gungdu pé lé, Garai Gasang myit ngui ô nau é eq chyoiyúng é, dui é hkungga đông nhông byi keq nghû, Garai Gasâng é shogyo nhikmyin hkyô mai, ngò, nungmoq lé wum byí kat lhê. Haù gi, woi-nyí hkyô đông nungmoq noqkuq dojaú é hkyô nghut lhê. ² Mingkan shí lhûm é sâmlai đông a cháng lo é za, myit sik wó yù

‡ 11:27 Esai 59:20-21; 27:9 †† 11:34 Esai 40:13 †† 11:35 Yob 41:11

râ đông nungmoq é a-kyang lé htaí pyám byi nhâng keq. Haú hkûn sheq, Garai Gasâng é ge é, myit nguí é eq gumjup é ô naú hkyô lé, nungmoq wó chyâm, wó sê gàm hkoq yú kó râ nghut lhê.

³ Hkâsu mù gâ le, ngo lé byí tô é jeju yanmai, nungmoq yuq hkangmó lé ngò taí kôlé: nungmoq gi, yhum-sing gùng lé lai shoq a nghutbûn é za, ó le ó lé, Garai Gasâng èq lumjínq myit tsing gàm byí to bê eq rajung za, myit yù gíng é í za myit yù keq. ⁴ Nga-nhúng yuq hkangmó é gungdu ralhum má gi, gungdu showui showang pé myo myo bo é nghut luí, gungdu showui showang haú pé banshoq gi, jai chûng jang a pung é nghut lhê. ⁵ Haú eq rajung za, myo myo nghut é nga-nhúng le, Hkrisduq má gungdu ralhum za dut luí, yuq hkangmó gi, rayuq eq rayuq gungsho sêng lhûm é bang chyat nghut lhê. ⁶ Nga-nhúng lé byí tô é jeju yanmai, nga-nhúng wó é chyunghuq gi, gotû tú nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjínq hkyô eq rajung za htoi sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸ myit wum byí é nghut jáng, myit wum byi sháng gaq; ra châ é bang lé garúm byí é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyi keq.

¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyí mù, haú Yhumsing lé dojaú nyí keq. ¹² Myit myoqbyù hkyô má gabú keq; wuîhke hkyô má hkam jan keq; kyûdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bínq hkulum é lé rago kut keq.

¹⁴ Nungmoq lé zing-rî é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byìn hpyé gohut huí nyi keq. A nghutbûn é za, nyi yap hkyô nyhûm bang eq zùm yap keq. Hpaqchyí bo é sù su hkâ-myit ngàm kó.

¹⁷ Ó yuq lé le, agè ashop é yanmai, agè ashop é đông lató hkâhpuq kó. Yuq hkangmó é myoq hí má ge é lé kut râ rago myit keq. ¹⁸ Wó dut é nghut jáng, nungmoq wó dut é í, yuq hkangmó eq nguínqon shoq nyi keq. ¹⁹ Ngá é buinùm wuî ê, lató a hpuq é za, Garai Gasâng é nhikmo-yo hkyô lé sheq lánq nyí keq. Hkâsu mù gâ le, "Ngò sheq lató hpuq râ sù nghut lhê; ngò lató hpuq râ." † ga, haú Yhumsing taí ri ga kê tô ri. ²⁰ Haú mù, "Nungmoq lé gyè kut sù zòmut é nghut le gi, byi tso keq; yhang wuîshit é nghut le gi, rajung jung byi huq keq.

† 12:19 Tarâ Pun 32:35

Haú đông kut jáng, nàng, yhâng é ulhum htoq má gyúng é myigye bum to byí é nghut lhê." †† ga le kê tô ri. ²¹ Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

Ahkáng Ayá Wó Bàng Ô Má Nyi Râ É Hkyô

13 Yuq hkangmó gi, up é ahkáng ayá wó bàng é a-ô má nyi ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byí tô é chyat nghut lhê. ² Hau é yanmai, up é ahkáng ayá lé gumlau toq é sù gi, Garai Gasâng byí tô é up é ahkáng ayá lé gumlau toq é sù nghut ri; haú su kut é bang gi, tarâ jéyáng é hui zo râ hkyô lé ho yù nyi é bang nghut akô. ³ Hkâsu mù gâ le, uphkanq é bang gi, ge é hkyô kut bàng é matú gyuq nán hpo a dut é za, shut shaí hkyô kut bàng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut líh? Haú jáng, ge é hkyô kut aq, haú hkûn, yhang, nang lé hkya-on râ nghut lhê. ⁴ Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhang, nàng, shut shaí hkyô kut é nghut le gi, gyuq nán nyi aq; haí mù gâ le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi râ matú nhikmo-yo Su é gunglik nghut lhê. ⁵ Haú mù luí, dam byi râ lé chiq é yanmai za a nghut, yhumsing nhik bò râ é yanmai le, haú up é ahkáng ayá wó bàng é a-ô má nyi râ dut lhê.

⁶ Nungmoq hkansê kat râ é gi, hau é yanmai le nghut lhê; hkâsu mù gâ le, haú up é ahkáng ayá wó bang gi, Garai Gasâng é dui-nhâng zoshâng wuî nghut lhê mù, uphkanq é mù lé, ahkyíng byíng shoq wùn waq nyi akô nghut ri. ⁷ Yuq hkangmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhûm é chyín mai lai luí, hai chyín le hkâdap lhum kó; hkâsu mù gâ le, góyuq lé chyitdap é sù gi, haú jep é tarâ lé lhoq dik bê sù nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq," † gâ tô é hkunmó pé eq gotû hkunmó haí nghut nghut, "Náng gùng lé nàng chyitdap é su, náng é chyangnâm mâ é bang lé le chyitdap aq." †† gâ é tarâ má lo jup to bê nghut lhê. ¹⁰ Chyitdap myit gi, chyangnâm mâ é byù lé a ge é haí le a kut é nghut lhê. Haú mù luí, chyitdap myit gi, haú jep é tarâ lé lhoq dik é hkyô nghut ri.

¹¹ Haú mù, ahkuí lhê é ahkyíng yàm-yoq lé sê gyo luí, haú hkyô lé kut keq. Nungmoq yhup mui é mai bûn

†† 12:20 Sânghkyang 25:21-22 † 13:9 Htoq Lô 20:13-15 †† 13:9 Nhung 19:18

gying râ ahkýing jé bê; haî mù gâ le, nga-nhúng é hkyi yù hkyô gi, lumj́ing hi é hkun lhê htoq má ahkuî je chyáng bê nghut ri. ¹² Haû myín ahkýing gi, lai byuq lô râ za nghut bê; nyí ahkýing gi, jé lô berâ nghut lhê. Haû mù luí, mauchut é muzó lé tô pyám mù, maubó é gyehking lé wut to sháng. ¹³ Ye lhaî é eq shuq wut é, ashop é đông gungsho zùm yap é eq shut é đông nyi zô lhúm nau é myit bo é, mabyoq jishúm htoq é eq manon é pé a kut é za, nyí-káng lhê su, ge é a-kyang đông nyi yap sháng. ¹⁴ Hau htoq agó, Yhumsing Yesuq Hkrisduq lé, mebu su wut to keq; yubak gungsho ô nau é đông lhoq dik râ matú hkâ-myit kó.

Gumang Wui Lé A Jéyáng Râ Hkyô

14 Lumj́ing myit má wum nyhóm sù lé, myíng myo nhô zâ é hkyô pé lé a jéyáng byí é za hap yù keq. ² Byù rayuq é lumj́ing myit gi, jung hkangmó zô ri; nghut kôlhang, lumj́ing myit nyhóm sù gotú rayuq gi, mhan-haq hpoqnoq za zô ri. ³ Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri. ⁴ Nàng gi, ó yuq wá nghut mù, góyuq é dui-nhâng zoshâng lé jéyáng lhê lhú? Yhang, yap ging kôlhang, leqbat kôlhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haû Yhumsing gi, yhang lé wó yap ging nhâng Sù nghut lhê. ⁵ Rayuq myit é gi, buinyi ra-nyí gi, gó nyí htoq je ge lhê gâ ri; dum rayuq myit é gi, nyí wuî rajung za nghut lhê gâ ri. Yuq hkangmó gi, yhumsing myit yu é lé a úng-âng nyi sháng gaq. ⁶ Buinyi ra-nyí lé, ahkyak lhê ga myit yù sù gi, haû Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsing lé bun luí zô nyi ri; a zo sù le, haû Yhumsing lé bun luí Garai Gasang lé jeju hkya-ôn nyi ri. ⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. ⁸ Nga-nhúng asak dui nyi le gi, haû Yhumsing é matú dui é ru nghut lhê; nga-nhúng shi byuq le gi, haû Yhumsing é matú shi é ru nghut lhê. Haû mù, asak dui nyi kôlhang, shi byuq kôlhang, nga-nhúng gi, haû Yhumsing eq sêng é bang nghut lhê.

⁹ Haû su mù, Hkrisduq gi, shi byuq bang eq asak dui bâng é Yhumsing dut sháng gaq ga, shî hkám mù dum dui toq é nghut lhê. ¹⁰ Haû mù, nàng gi, haî mù náng é gumang hpó lé jéyáng nyi lhê lhú? Haî mù náng é gumang hpó lé wú tiq nyi lhê lhú? Nga-nhúng lhunglhâng bang gi, Garai Gasang é tarâ jéyáng tanghkuq hí má yap râ bang chyat nghut lhê. ¹¹ Hkâsu mù gâ le,

"Haû Yhumsing gi, 'Ngò rû dui nyi é eq rajung za, Ngá é hí má hkyihput hkangmó htuq râ nghut lhê;

Garai Gasang lé, shô hkangmó èq yín yù kó râ nghut lhê.' ga taî ri." †

ga kâ tô ri. ¹² Haû mù luí, nga-nhúng yuq hkangmó gi, yhumsing kut laî lo é hkyô lé, Garai Gasang chyáng shit ra râ nghut lhê.

¹³ Haû nghut mù, nga-nhúng gi, rayuq eq rayuq tarâ jéyáng lhúm é hkyô lé tô pyám sháng. Ó yuq nghut kôlhang, yhumsing é gumang é hkyowuî má, myit leqbat jowò eq htung htê jowò a to byi râ matú, myit sidiq keq. ¹⁴ Haû Yhumsing Yesuq má nghut nyi é sù ngò gi, haî jung zoshuq nghut kôlhang, yhang baú yhang a sansêng a dut é hkyô lé, hkyak wó sé luí, jing nyi lhê. Nghut kôlhang, ó yuq le, rajung jung lé a sansêng ga myit yu é nghut jáng, yhang é matú, zè haû gi, a sansêng é nghut lhê. ¹⁵ Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shî hkám byi bê sù nghut é, náng é gumang hpó lé, nàng zoshuq é đông mai hkâlhoq hten pyám. ¹⁶ Nàng, ge ri nghù myit yu é hkyô lé, agè ashop é đông hkâtaî pyám nhâng. ¹⁷ Hkâsu mù gâ le, Garai Gasang é mingdán gi, zo zo shuq shuq hkyô a nghut é za, dingmán hkyô, ngu-ingón hkyô eq Chyoiyúng Woi-nyí má gabú é hkyô ru nghut lhê. ¹⁸ Haî mù gâ le, shí hkyô đông mai Hkrisduq lé dojaú é sù gi, Garai Gasang ô nau é sù eq byu pé èq hkya-ôn é hui sù nghut ri.

¹⁹ Haû mù luí, nguingón hkyô má nyi râ eq, rayuq eq rayuq wum byí lhum râ hkyô lé, shikut nyi keq.

²⁰ Zoshuq é yanmai, Garai Gasang é muzó lé hkâlhoq hten pyám. Zoshuq lhunglháng gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹ Tsiyiq wing shuq é eq sho zô é hkyô má nghut kôlhang, gotú haî jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²² Haû mù, haú pé eq séng luí, nàng lumj́ing é haî nghut kôle, nàng eq Garai Gasang gyoro má za joq nyi sháng gaq. Yhumsing ge lhê gâ é èq, yhumsing gùng yhumsing mara byi jang a joq é sù gi, hkungsô wó nyi ri. ²³ Nghut kôlhang, úng-âng é myit èq zô é nghut le gi, mara byí é hui ri, haî mù gâ le, yhang zô é gi, lumj́ing myit mai a nghut; lumj́ing myit mai a kut é haî nghut kôlhang, mara nghut ri.

Góyuq Lé Myit Ngón Nhâng Râ Hkyô

15 Lumj́ing hkyô má wum-o bo é nga-nhúng gi, yhumsing myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byí nyi râ dut lhê. ² Nga-nhúng yuq hkangmó gi, yhumsing é chyangnâm mâ é su é ge é hkyô dut râ matú, yhang wó kô myhang lò shoq, yhang lé lhoq ngón byí nyi sháng. ³ Hkâsu mù gâ le, Hkrisduq lháng gi, Yhâng-gùng yhang lhoq ngón é a nghut; haû gi, "Nang lé rhoi bâng é dang gi, Ngá chyáng gyó ke bê nghut ri." †† ga, kâ tô é eq rajung za nghut ri. ⁴ Hkâsu mù gâ le, laî lò bê hkùn kâ tô é lhunglháng gi, nga-nhúng lé mhoq byi râ matú chyat kâ tô é nghut lhê; haû gi, Chyúmdang mâ é hkam jan hkyô eq myit wum byi hkyô đông mai, nga-nhúng myit myoqbyù hkyô wó râ matú nghut lhê.

† 14:11 Esai 45:23

†† 15:3 Hkya-on 69:9

⁵ Haû hkam jan hkyô eq myit wum byi hkyô lé byî é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhum za dut é woi-nyí byi sháng gaq; ⁶ haû jáng sheq, nungmoq gi, i-myt rahkat eq nhut htê ralhum èq za, nga-nhông é Yhumsîng Yesuq Hkrisduq é Yhângwa nghut Sû, Garai Gasang lé, wó hkyá-on kungtôn kó râ nghut lhê.

⁷ Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shingkang lé lhoq htoq shit râ matú, nungmoq le, rayuq eq rayuq hap yu lhum keq. ⁸ Hkâsu mù gâ le, ngò, nungmoq lé táí kôlé, haû myîng hû é îchyí îwâ pé lé byî tô é dang-gidiq pé lé lhoq ging râ matú, Hkrisduq gi, Garai Gasâng é tengmán hkyo é malaî, Yudaq byu pé é dui-nhâng zoshâng dut bê nghut ri. ⁹ Haû mù, Garai Gasâng é shogyo nhikmyin hkyo é yanmai, haû tung-baù pé, Garai Gasang lé wó hkyá-on kungtôn kó râ nghut lhê. Haû hkyô gi,

"Haû mù luí, tungbaù pé chyáng má, Nang lé, ngò hkyá-on râ nghut lhê;

Náng é myîng lé, ngò hkyá-on mahkôn râ nghut lhê." †

ga kâ tô é eq rajung za nghut ri. ¹⁰ Dum,

"Tungbaù pé ê, Yhâng é byu pé eq rahá gabú nyi keq." ††

gâ tô ri. ¹¹ Dum,

"Nungmoq tungbaù pé lhunglhâng bang ê, haû Yhumsîng lé hkyá-on keq, byù myû lhunglhâng bang ê, Yhang lé hkyá-on mahkôn hkôn keq." ‡

gâ tô ashî nghut ri. ¹² Hau htoq agó, Esai-aq taí é gi,

"Yese é Amyit gi, yuq htoq lô luí, Yhang gi, byù myû chângjup é ahtoq má up râ sù nghut lhê;

tungbaù pé gi, Yhang má myit myoqbyù kó râ nghut lhê." ‡†

gâ ri.

¹³ Haû myit myoqbyù hkyô byî é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nguínón hkyô lhoq pyíng byi sháng gaq; haû jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyi kó râ nghut lhê.

A Gyuq A Wam É Za, Poluq Laiká Kâ É Hkyô

¹⁴ Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhûm é má kûng é bang nghut é lé, ngá gûng ngò yhang hkyak lumjîng lhê. ¹⁵ Ngò gi, nungmoq lé dum lhoq pûn é dông, ahkyak é pé ra-am lé a gyuq a wàm kâ kat bê nghut lhê. ¹⁶ Hkâsu mù gâ le, tungbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng èq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tungbaù pé chyáng, Hkrisduq Yesuq é hpungmû wùn sù

dut râ matú, Garai Gasang, ngo lé jeju byî é yanmai nghut lhê.

¹⁷ Haû mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbûn nyi lhê.

¹⁸ Ngò gi, ngò taí é eq zui saí é muzó dông le, haû Woi-nyí é a-tsâm chûng mù, kumlhá pé eq laklaí kumlhá pé dông le, tungbaù pé lé, Garai Gasâng é jino gyo shoq shuí û é má, ngo lé Hkrisduq nhang é muzó hkyô lé taí é mai lai luí, gotû haí lé le wám taí é a nghut. ¹⁹ Haû mù luí, ngò gi, Yerusalem wà mó mai Ilurihkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê. ²⁰ Ngò hkâ-nhám le myit tuí nyi é hkyô gi, góyuq hi tô é apûn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê. ²¹ Haû gi, "Yhâng é hkyô lé, taí kyô é a hui shî é bang, myàng kó râ nghut luí,

a wó gyô wú é bang, sê gyo kó râ nghut lhê." ‡

ga kâ tô é eq rajung za nghut ri. ²² Haû mù luí, ngò, nungmoq chyáng lé jé râ lé, anum num hkyikyo luql-hum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn É Hkyô

²³ Nghut kôlhâng, ahkuí gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za,

²⁴ ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haû mai htuqbang kat râ lé, ngò myoqbyu tô lhê. ²⁵ Ahkuí, ngò kúm gi, Yerusalem wà mó mâ é sân-yúng bang lé dojaú râ matú, haû wâ shut e ló é hkyolat má nghut nyi lhê. ²⁶ Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myûng bâng é matú, garúm chyunghuq hkyui tsing nau bùm bekô nghut ri. ²⁷ Yhangmoq gi, haû su kut nau bùm bekô nghut ri, gè gè ga jáng, haû gi, yhangmoq chyín dap tô é dông ru nghut lhê. Hkâsu mù gâ le, haû Yudaq byu pé é woi-nyí eq sêng é shimân jeju lé, tungbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chûng râ chyín dap tô é dông nghut lhê. ²⁸ Haû mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê. ²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰ Gumang wui ê, ngá é matú Garai Gasâng chyáng kyûdung byî é dông, ngò wum kat yhang shikut é hkyô má nungmoq bo wàng lòm râ matú, nga-nhông é Yhumsîng Yesuq Hkrisduq eq Woi-nyí é chyitdap myit é yanmai, ngò, nungmoq lé wum taí tsuq kat lhê. ³¹ Yuda mau mâ é a lumjîng bâng chyáng mai, ngò hkyi yu é wó hui luí, Yerusalem wà mó má ngò wùn waq é

† 15:9 Hkyá-on 18:49 †† 15:10 Hkyá-on 32:43 ‡ 15:11 Hkyá-on 117:1 ‡† 15:12 Esai 11:10

‡† 15:21 Esai 52:15

muzó lé, haú mâ é sâ-n-yúng bang hap yù gíng é wó dut râ matú kyû bo dung byi keq. ³² Haú jáng sheq, ngò gi, Garai Gasang ô nau é dông mai, gabú myit èq nungmoq chyáng wó jé lé mù, nungmoq eq rahá wum-o wó yû râ nghut lhê. ³³ Haú nguingón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

Shi-kyám Dang

16 Ngò gi, Kenhkrea noqkuq hpúng mâ é hpungtê, nga-nhông é gu-nhá Hpobe lé, nungmoq chyáng shichyen byi kat lhê. ² Nungmoq gi, sâ-n-yúng bang kut gíng é eq rajung za, haú Yhumsíng má yhang lé hap yù luí, yhang râ tô é hkyô haí nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

³ Hkrisduq Yesuq má ngò eq mô wùn luzúm nhik nghut é, Priskila eq Akula lé bo shi-kyám byi keq.

⁴ Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pê é noqkuq hpúng pé banshoq le, yhangnhik lé jeju bûn lhê.

⁵ Yhangnhik é yhûm má chôm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjínq wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sù nhik nghut akô.

⁸ Haú Yhumsíng má, ngò chyitdap é sù, Ampliatu lé bo shi-kyám byi keq.

⁹ Hkrisduq má, ngamoq é mô zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wui lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haú Yhumsíng má nghut nyi bê bang, Narkiso é yhumbyù wui lé bo shi-kyám byi keq.

¹² Haú Yhumsíng má mô zui shikut é myiwê nhik, Truhpena eq Truhposa lé bo shi-kyám byi keq.

Haú Yhumsíng má mô zui gyai yhang shikut é myiwe góyuy, ngá é chyitdap luzúm Persi lé bo shi-kyám byi keq.

¹³ Haú Yhumsíng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhangnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

¹⁵ Hpilologu, Yulia, Nerea eq yhang é nhammó eq, Olumpa, yhangmoq eq rahá nyi é sâ-n-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng popuq é èq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

¹⁷ Gumang wui ê, nungmoq é lumjínq hkyô má, nungmoq mhoq hkam yù bê nghut é mhoqshit hkyô eq shai lhûm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum taí tsuq kat lhê. Yhangmoq lé koi pyám keq. ¹⁸ Hkâsu mù gâ le, haú sù é bang gi, nga-nhông é Yhumsíng Hkrisduq lé dojaú é bang a nghut é za, yhumsíng é wamdaú matú dojaú é bang nghut akô. Yhangmoq gi, myit nú-nhâm é bang lé, dang ngón dang nguí dông mhaú zô akô nghut ri. ¹⁹ Nungmoq, jino gyo kô é hkyô lé, yuq hkangmó wó gyo bê nghut ri; haú mù, ngò gi, nungmoq é matú gyai yhang gabú nyi lhê; nghut kôhang, ge é hkyô eq séng luí gi, nungmoq hpaqchyí bò mù, agè ashop hkyô eq séng luí gi, nungmoq a bo lòm râ lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhông é Yhumsíng Yesuq é jeju gi, nungmoq eq rahá nghut nyi sháng gaq ô.

²¹ Ngá é mô zui luzúm Timohti gi, nungmoq lé shi-kyám dang sang kat ri; haú eq rajung za, ngá é buinùm wui Luki, Yason eq Sosipata pé le, shi-kyám dang sang kat akô nghut ri.

²² Laiká shí lé bo ká sù ngò Tertiu gi, haú Yhumsíng má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haú wa mâ é ngùnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akô. ²⁴ Nga-nhông é Yhumsíng Yesuq Hkrisduq é jeju gi, nungmoq lhunglhâng bang eq rahá nghut nyi sháng gaq. Amen. †

²⁵ Byù myú chângjup bang lumjínq luí, Yhang é jino gyo sháng gaq ga, a-nham pyat mai haq tô é hui kôhang, ²⁶ ahkuí, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wui é hkyo é shing-rán má cháng luí, ngá é gabú danglù eq Yesuq Hkrisduq é hkyô taí pyo é dông, nungmoq lé wó lhoq ging títq byi é, ²⁷ rayuq za é hpaqchyí bo sù Garai Gasâng chyáng, Yesuq Hkrisduq dông mai, hpungwup shingkang gi, ahtum abyuq ru joq nyi sháng gaq ô! Amen.

† Chyúmding ra-am má chyúmbun 24 shí a bo é nghut lhê.

1 Korinhtuq

(1 Corinthians)

1 Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi, ² jowò hkgang-mó má nga-nhông é Yhumsing Yesuq Hkrisduq é mying lé lêng é bang eq rahá, chyoyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasang é noquq hpúng lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhông é Îwa Garai Gasang eq Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

⁵ Hkâsu mù gà le, nungmoq gi, Hkrisduq đông mai, nungmoq dang taí é hkyô banshoq eq nungmoq é sumsé hpaqchyí banshoq má je lhoq gumjup é hui bekô nghut ri. ⁶ Haû gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. ⁷ Haû mù, nga-nhông é Yhumsing Yesuq Hkrisduq dum htoq shit râ lé, nungmoq gyai myoqbyu lánng nyi é u má, nungmoq gi, woi-nyí hkyô eq séng é chyunghuq haí lé le langhpyut kó râ a nghut. ⁸ Nga-nhông é Yhumsing Yesuq Hkrisduq é buinyí má, nungmoq lé mara hùn râ hkyô a bò shoq, Hkrisduq gi, nungmoq lé, htáng shoq gingtíng nhang nyi râ nghut lhê. ⁹ Nga-nhông é Yhumsing nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noquq Hpúng Má Gam Hkoq Lhâm É Hkyô

¹⁰ Gumang wuì ê, nungmoq hkaû má gam hkoq lhâm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunghâng bang rayuq eq rayuq byin hpyé gohut huí nyi keq nghû, ngò, nungmoq lé, nga-nhông é Yhumsing Yesuq Hkrisduq é mying mai dúng tóngbán kat lhê. ¹¹ Ngá é gumang wuì ê, Hkloe é yhâm byù wuì gi, nungmoq hkaû má mabyoq htoq hkyô joq é lé, ngo lé hkyáng lo shit akô. ¹² Ngò haû su nghû taí é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò

gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

¹³ Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é mying mai wui-myhup hkâm yù kô é lhú? ¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byí wú é yanmai, ¹⁵ nungmoq ó yuq le, ngá é mying mai wui-myhup hkâm yù bê nghû a wó taí é nghut mù, ngò, Garai lé jeju hkya-ôn lhê. ¹⁶ (Stehpana é yhumbyù wuì lé le, ngò wui-myhup hkâm byí é nghut lhê, haû mai lai luí gotú ó lé hkâm byí záng ashî laq, ngò a myit bun lo nghut ri.) ¹⁷ Hkâsu mù gà le, Hkrisduq, ngo lé nhang kat é gi, wui-myhup hkâm byí râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyí byéng-yá dang đông hko kyô é a nghut mù, Hkrisduq é tapzîng é a-tsam gi, akôm a dut byuq é nghut lhê.

Garaí É A-tsam Eq Hpaqchyí Byéng-yá Gi, Hkrisduq

¹⁸ Hkâsu mù gà le, tapzîng má Yesuq shí hkâm é hkyô eq séng é danglù gi, htên byoq hui râ bâng é matú, danggang dut byuq ri; nghut kôlhang, hkyi yu é huí nyi bang nga-nhông é matú gi, Garai Gasang é a-tsam nghut ri. ¹⁹ Hkâsu mù gà le, Chyúmdang má kâ tô é gi,

"Hpaqchyí bò bâng é hpaqchyí byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê." † ga ri.

²⁰ Hpaqchyí byéng-yá bò bang gi, hkâmá lhú? Hpaqchyí laiká kung bang gi, hkâmá lhú? Ipyat shi é dang taí kung bang gi, hkâmá lhú? Garai Gasang gi, mingkân é hpaqchyí byéng-yá lé lhoq ngok pyám bê a nghut lhú? ²¹ Hkâsu mù gà le, Garai Gasang é hpaqchyí byéng-yá mai ga jang, mingkan zo wuì gi, yhumsing é hpaqchyí byéng-yá đông mai Garai Gasang lé a wó sé kô é yanmai, danggang gà pyám byi kô é mungdang lé hko kyô é đông lumjîng bang lé hkyi yù râ matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé dúng akô; Grik byu pé gi, hpaqchyí byéng-yá lé ho akô nghut ri. ²³ Nghut kôlhang, ngamoq gi, tapzîng má jén sat huí é Hkrisduq é hkyô lé hko kyô lhê. Haû gi, Yudaq byu pé é matú myit

† 1:19 Esai 29:14

leqbat jowò eq tûngbaù pê é matú danggang dut byuq ri. ²⁴ Nghut kôlhang, Garai Gasâng èq ji yù huí é Yudaq byu pé eq Grik byu pê é matú, Hkrisduq gi, Garai Gasâng é a-tsam eq Garai Gasâng é hpaqchyí byéng-yá nghut ri. ²⁵ Hkâsu mù gà le, Garai Gasâng é ngok hkyô gà é lháng gi, byu é hpaqchyí byéng-yá htoq má je gyaú ri; Garai Gasâng é wum nyhóm hkyô gà é lháng gi, byu é wum-o htoq má je gyaú ri.

²⁶ Gumang wui ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng dông hpaqchyí byéng-yá bo é bang, ahkáng ayá wó é bang, zaugun suwún amyû mâ é bang a myô é nghut lhê. ²⁷ Nghut kôlhang, Garai Gasang gi, hpaqchyí byéng-yá bò bang lé hoq lhoq hpu râ matú, mingkan mâ é ngok bang gà é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mâ é wum nyhóm bang gà é lé hkyin yu é nghut lhê. ²⁸ Yhang gi, mingkân èq ahkyak tô é lé lhoq htên pyám râ matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin yu é nghut lhê. ²⁹ Haù gi, ó yuq le, Yhâng é hí má a ge nghutbun râ matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nyí bekô nghut ri; Hkrisduq gi, nga-nhúng é matú, Garai Gasâng chyáng mâ é hpaqchyí byéng-yá dut bê nghut ri. Haù gi, nga-nhúng é dngmán hkyô, chyoiyúng hkyô eq hkyi yù hkyô nghut ri. ³¹ Haù mù luí, "Gumrong é sù gi, haù Yhumsing má gumrông sháng gaq." † ga kê tô é eq rajung za nghut ri.

Woi-nyí Mai Lo É Garai Gasâng É Hpaqchyí Byéng-yá

2 Gumang wui ê, ngò gi, Garai Gasang eq sêng é saksé hkyô lé nungmoq chyáng taí pyô râ matú jé lé é hkûn, dang taí kûng é eq hpaqchyí byéng-yá mó bo é dông lé é a nghut. ² Hkâsu mù gà le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkgangmó lé tô-myhî pyám râ nghû myit hpyit yù bê nghut lhê. ³ Ngò gi, nungmoq chyáng jé lé é hkûn, wum nyhóm é eq gyai yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyí bo é eq mhuí yu é dang pé dông a nghut é za, Woi-nyí é a-tsâm èq nungmoq lé shit é dông ru nghut mù, ⁵ nungmoq é lumjîng myit gi, byù é hpaqchyí byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit dngmân bê bang lé hpaqchyí byéng-yá dông nyo lhê; shí pyat lhê é hpaqchyí byéng-yá eq htên byoq nyi huí é shí pyat mâ é zaú wui é hpaqchyí byéng-yá dông kúm a nghut. ⁷ Ngamoq taí é gi, haq tô é eq, ahkyíng nghu é lháng a joq shi mai nga-nhúng é hpungwup shingkâng é matú Garai Gasang tô to byí é hpaqchyí byéng-yá nghut é, Garai Gasâng é zaú tô é hpaqchyí byéng-yá lé taí é ru nghut lhê. ⁸ Shí pyat lhê é zau wui gi, hpaqchyí byéng-yá haù lé rayuq lháng a sê gyo kó nghut ri; yhangmoq

sê gyo kô é ru nghut le gi, hpungwup shingkang bo é Yhumsing lé tapzîng má jén sat pyám kó râ a nghut.

⁹ Nghut kôlhang, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri." ††

ga kê tô é eq rajung za nghut ri. ¹⁰ Nghut kôlhang, Garai Gasang gi, haù hkyô lé, Yhâng é Woi-nyí dông nga-nhúng lé hpông shit bê nghut ri.

Woi-nyí haù gi, jung hkgangmó lé ho gôn wú é nghut luí, Garai Gasâng é zaú tô é hkyô lé lháng ho gôn wú é sù nghut ri. ¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lhú? Haù eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹² Nga-nhúng gi, mingkân é woi-nyí lé hap yu tô é a nghut é za, Garai Gasâng èq nga-nhúng lé byí to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq hap yu tô é ru nghut lhê. ¹³ Haù mù luí, ngamoq gi, waxâng zô wui é hpaqchyí byéng-yá èq mhoq byí é dang dông taí é a nghut, Garaí é Woi-nyí èq mhoq byí é dang dông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taí sân kyô é nghut lhê. ¹⁴ Haù Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haí mù gà le, haù pé gi, yhâng é matú ngok é hkyô nghut luí, woi-nyí hkyô dông mai haù hkyô lé a wú é yanmai, yhang gi, haù pé lé a wó sê gyo nghut ri. ¹⁵ Woi-nyí eq sêng é byù gi, lhunglháng lé wó jéyáng lhê, nghut kôlhang, yhang lé kúm gi, ó yuq èq le wó jéyáng é a nghut.

¹⁶ Chyúmdang má,

"Hkâsu mù gà le, ó yuq wá, haù Yhumsing é myit lé sé mù, Yhang lé wó mhoqshit wú é lhú?" ‡ ga kê tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

Noqkuq Hpúng Má Gam Hkoq Lhûm É Hkyô

3 Gumang wui ê, hí hkûn, ngò gi, nungmoq lé, Woi-nyí eq sêng é bang lé dông wó taí é a nghut; mingkan eq sêng é bang dông nghut kômù, Hkrisduq má zonú su dut bang lé dông sheq taí wú é nghut lhê. ² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê. †† Ahkuí lháng, nungmoq gi, zoshuq apat lé a wó zo shi kó nghut ri. ³ Nungmoq gi, mingkan eq sêng é bang ru nghut nyi ashî kó nghut ri. Hkâsu mù gà le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wui su nyi yap bum lhê a nghut kó luq? ⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taí nyi bùm kô é nghut jáng, nungmoq gi, mingkan zo wui nghut nyi bum lhê a nghut kó luq?

†† 2:9 Esai 64:4 ‡ 2:16 Esai 40:13 †† Nungmoq lé naú byi huq é, gà é gi, lui é hkyô pé lé hí mhoq byí é lé gà lhê.

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaî é dui-nhâng zoshâng za nghut luî, ó le ó lé, haû Yhumsing êq hun tô é muzó eq rajung za wùn waq é nghut luî, nungmoq gi, ngá-nhik đông mai wó lumjínng kô é ru nghut lhê. ⁶ Ngò gi, gabú danglù amyui lé hô kat, Apolo gi, wuî hpyun byi, nghut kôlhang, yuq kô lò nhang é gi, Garai Gasang za ru nghut lhê. ⁷ Haû mù, amyui hô kat sù eq wuî hpyun byi sù gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê. ⁸ Amyui hô kat sù eq wuî hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yû kó râ nghut lhê. ⁹ Hkâsu mù gà le, ngamoq gi, Garai Gasâng é mù zui luzúm wuî nghut lhê; nungmoq gi, Garai Gasâng é yò, Garai Gasâng é yhùm nghut nyi akô.

¹⁰ Garai Gasang, ngo lé byi to bê jeju eq rajung za, yhùm saî kung sù rayuq đông, ngò gi, yhùm apûn awang hi to bê nghut lhê; gotû byu gi, hau é ahtoq má saî toq jat nyi é nghut lhê. Nghut kôlhang, yuq hkangmó gi, yhumsing saî é má rago sidiq râ lhê. ¹¹ Hkâsu mù gà le, hi to gù nghut é, Yesuq Hkrisduq nghu é yhùm apûn awang mai lai luî, ó yuq le, gotû yhùm apûn awang lé wó saî é a nghut. ¹² Yhùm apûn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chûng mù saî jat kô é nghut jáng, ¹³ yuq hkangmó é muzó hkâsu nghut é hkyô lé lhoq htoq shit é hui râ nghut lhê. Haû mù luî gà le, haû Yesuq é Buinyi gi, haû lé byu-myàng nhâng mù, haû buinyi lé gi, myí eq lhoq htoq shit râ nghut lhê. Haû myi gi, yuq hkangmó saî é muzó hkâsù é nghut é lé chyâm râ nghut lhê. ¹⁴ Rayuq yuq saî é yhùm gi, ru gîng nyi é nghut jáng, haû yuq gi, yhang é shigyaú chyunghuq wó yû râ nghut lhê. ¹⁵ Nghut kôlhang, yhùm haû nyé gyó byuq é nghut jáng, yhang gi, yhùm sôm byuq é hui zo râ nghut lhê; yhang gi, asak lut kôlhang, myishâm mai wó lut é byu su dut râ nghut lhê.

¹⁶ Nungmoq gi, Garai Gasâng é noqkuq yhùm nghut luî, Garai Gasâng é Woi-nyí gi, nungmoq má lúng nyí bê hkyô lé a sé kó lhú? ¹⁷ Rayuq yuq, Garai Gasâng é noqkuq yhùm lé lhoq htên é nghut jáng, Garai Gasang gi, haû yuq lé lhoq htên pyám râ nghut lhê. Hkâsu mù gà le, Garai Gasâng é noqkuq yhùm gi, chyoiyúng lhê; nungmoq gi, noqkuq yhùm haû nghut akô.

¹⁸ Nungmoq gi, yhumsing gùng yhumsing hkâlhoq nghoq kó. Nungmoq mâ é rayuq yuq, shí ipyat mâ é byu nyi a-tsáng đông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut râ lhê. ¹⁹ Hkâsu mù gà le, mingkan shí mâ é hpaqchyí byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri." † ga kô tô é eq rajung za nghut ri. ²⁰ Hau htoq agó, "Haû Yhumsing gi, hpaqchyí byéng-yá bò bang myit é hkyô pé akôm nghut é lé sê lhê." †† ga le kô tô ri. ²¹ Haû mù luî, ó yuq le, byu eq sêng é hkyô má gyáng é dang a taí kó sháng

gaq! Lhunglhang gi, nungmoq é chyat nghut lhê.

²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htângnùng mã é hkyô le, banshoq gi, nungmoq é chyat nghut ri.

²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

Hkrisduq É Lagyô Pé

4 Haû mù luî, byu pé gi, ngamoq lé, Hkrisduq é dui-nhâng zoshâng wuî đông eq Garai Gasâng é zaú tô é hkyô pé lé taí pyô râ matú ap byi tô é hui bang đông sôn yù râ lhê. ² Haû đông nghut jáng, ap byi tô é hui bang gi, yhumsing lhumzui hkyô lé saksé shit râ dut lhê. ³ Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê. ⁴ Haû mù gà le, ngá gûng ngò mara a bò bûn é nghut kôlhang, haû gi, ngo lé wó lhoq sân-yúng byi é a nghut. Ngo lé jéyáng é sù gi, haû Yhumsing nghut lhê. ⁵ Haû mù, masat tô é ahkying a jé shimá haî lé le a jéyáng é za, haû Yhumsing jé lé shoq, lánng nyí keq. Yhang gi, mauchut hkaû má haq tô é pé lé byu-myàng nhâng mù, byu pé é myit nhikhum má lúng é hkyô lé lhoq htoq shit râ nghut lhê. Haû hkûn, yuq hkangmó gi, ó le ó wó gíng é hkyôn hkyô lé, Garai Gasâng chyáng mai wó yù râ nghut lhê.

⁶ Gumang wuî ê, ngò gi, "Kô tô é gû mai hkâlai." gà é sanghkyâng é lichyúm lé, ngamoq chyáng mai nungmoq wó mhoq yû sháng gaq nghu, nungmoq é akyu é matú, ngò eq Apolo má haû pé lé yù mù dangtú kut é nghut lhê. Haû hkûn, nungmoq gi, nghutbûn é đông, rayuq lé gi, wú ko, góyuq lé gi, wú shóm, a kut kó râ nghut lhê. ⁷ Ó yuq wá, nang lé, góyuq eq shaî shoq kut lhê lhú? Nàng hap yu é a nghut le gi, wó râ lhú? Nàng, hap yu é nghut le gi, a hap yu é đông haî mù nghutbûn nyi lhê lhú?

⁸ Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô! ⁹ Nghut kôlhang, sat râ matú doqdan huí é shúm byu pé lé su, Garai Gasang gi, lagyô pé nghut é ngamoq lé de de kut htoq shit bê nghu, ngò wó myit ri. Ngamoq gi, nyi mi-nyí, joq mi-joq, maumang lagyô pé eq waxâng zô wui é hí má, wú kûn jung đông dut nhang é huí nyi gù bê nghut lhê.

¹⁰ Ngamoq gi, Hkrisduq é yanmai ngok é bang đông sôn yu é hui kôlhang, nungmoq kúm gi, Hkrisduq má hpaqchyí gyaí bo é bang đông dut bekô hung! Ngamoq gi, wum nyhôm é bang đông sôn yu é hui kôlhang, nungmoq kúm gi, wúm bo é bang đông dut bekô hung! Nungmoq gi, hkunggâ é huí akô; ngamoq kúm gi, hkunggâ é a hui hung! ¹¹ Shí hkying shí u jé shoq, ngamoq gi, zòmut wuishit huí é, mebu ajeq amyhâ dut huí é, nhuq bat huí é, yhumsing é nyi jowô

† 3:19 Yob 5:13 †† 3:20 Hkya-on 94:11

a wó é bang nghut nyi lhê. ¹² Ngamoq gi, yhumsing loq eq yhang mù zui wum kat nyi lhê. Ngamoq gi, nhîng pyâm é hui jáng, shimân byi, zing-rî é hui jáng, jân pyâm kut lhê. ¹³ Ngamoq gi, lumù gansang é hui jáng, dang ngón dang nguî tû nyo lhê. Ngamoq gi, ahkuî jé shoq, myidàm htoq mà é hpoqkyuq hpoqpyâng eq mingkân é buzaq pé đông sôn yu é huî nyi lhê.

¹⁴ Ngò gi, nungmoq lé hoq lhoq hpu rã matú haú pé lé kê é a nghut, ngá é chyitdap zo wuî lé đông lhoq pûn kying rã matú ru nghut lhê. ¹⁵ Nungmoq gi, Hkrisduq má mhoqshit bang ra mun wó kê é nghut kôlhang, îwã pé myo shoq wó kê é a nghut; hkâsu mù gâ lé, ngò gi, haú gabú danglù đông mai, Hkrisduq Yesuq má nungmoq é îwã dut é nghut lhê. ¹⁶ Haú mù luî, ngò kut é su cháng keq nghû, ngò, nungmoq lé lung kat lhê. ¹⁷ Hau é yanmai, ngò gi, haú Yhumsing má lhumzui sù nghut é, ngò chyitdap é ngá zo đông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mà é ngá é asak duì hkyô lé, jowò hkgangmó mà é noqkuq hpúng hkgangmó lé ngò mhoq byî é eq rajung za, nungmoq lé lhoq pun byi rã nghut lhê.

¹⁸ Nungmoq mà é ra-am gi, nungmoq chyáng ngò a dum jé lé rã su ngam pyâm kômù, nghutbùn byuq bekô nghut ri. ¹⁹ Nghut kôlhang, haú Yhumsing gyô é nghut jáng, ngò gi, nungmoq chyáng hân za jé lé rã nghut lhê; haú hkûn, ngò gi, nghutbùn é byù haú bang haí taí é hkyô lé za a nghut, yhangmoq hai a-tsam wó é hkyô lé le gôn htoq rã nghut lhê. ²⁰ Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê. ²¹ Nungmoq hká đông ô nau akô lhú? Ngò gi, nungmoq chyáng, nuichûm hkat eq, a nghut jáng, chyitdap é eq nú-nhâm é myit mai lé lô ra rã lhú?

Ashop É Đông Gungsho Zùm Yap É Hkyô Kut É Sù Lé Lhoq Htoq Pyâm Rã Hkyô

5 Nungmoq chyáng, ashop é đông gungsho zùm yap é hkyô joq é lé, hkyak taí hù lò bekô; haú gi, a lumjîng bâng chyáng lháng a dut wú é hkyô nghut é, yuqgè rayuq gi, yhângwã é myiwe eq nyi zô lhûm nyi é hkyô nghut ri. ² Nghut kôle, nungmoq gi, nghutbùn nyi bum akô nhung! Haú đông a nghut é za, nungmoq gi, yón é myit tûn shit mù, haú su kut é byù lé, nungmoq é hpúng mai lhoq htoq pyâm le, a gè kó lhú? ³ Ngò gi, ngá gungdu, nungmoq eq rahá a nyi to kôlhang, ngá é i-myit gi, nungmoq eq rahá nghut nyi luî, gungdu jé nyi tô é đông mai, haú hkyô kut é sù lé jéyáng doqdan gù nghut lhê. ⁴ Nungmoq gi, nga-nhûng é Yhumsing Yesuq é mying mai zup zing mù, ngá é i-myit gi, nungmoq eq rahá nghut nyi luî, nga-nhûng é Yhumsing Yesuq é a-tsam le, nungmoq eq rahá nghut nyi é hkûn, ⁵ byù haú yuq lé, Tsadán é loq má ap byî pyâm keq. † Haú jáng, Yhumsing é buinyi

† Tsadán é loq má ap byî pyâm keq gâ é gi, hpúng byù wui eq a zùm yap nhâng lo rã lé taí é nghut lhê.

má, yhâng é woi-nyí gi, hkyi yu é hui rã matú, yhâng é yubak gungsho gi, lhoq htên pyâm é hui rã nghut lhê.

⁶ Nungmoq é nghutbun hkyô gi, ge é a nghut. Mún †† ra tsuí zo gi, muk long gón lé wó lhoq daú nhang é lé, nungmoq a sé kó lhú? ⁷ Nungmoq gi, múnchi a bo é bang nghut nyi kê é eq rajung za, múnchi a bo é muk htung asik su wó dut kê sháng gaq, múnchi axau lé lhuî pyâm keq. Hkâsu mù gâ le, nga-nhûng é Lhoqlhai Poí sauzo, Hkrisduq gi, hkungga nhong é hui bê nghut lhê. ⁸ Haú mù luî, nga-nhúng gi, agè agaú hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyo é muk nghut é, múnchi a bo é muk eq, Poí haú lé kut nyí sháng.

⁹ Ashop é đông gungsho zùm yap é bang eq hkâzûm kó nghû, ngò, nungmoq lé, ngá é laiká má kê kat byi bê nghut lhê. ¹⁰ Nghut kôlhang, mingkan shí eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzûm yap kó nghû é gi, a nghut. Haú su ru nghut le gi, mingkan htoq shí mai nungmoq htoq lô byuq ra kê rã nghut lhê. ¹¹ Nghut kôlhang, yhânggung yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, îshuq wut é, mhaú zô é sù ó yuq eq le a ge zùm yap kê rã nghut lhê. Haú sù é byù eq gi, rahá lháng hkâzo kó.

¹² Haú noqkuq hpúng shinggan mà é bang lé jéyáng rã gi, ngò eq haí sêng lhê lhú? Nghut kôlhang, hpúng ahkaú mà é bang lé nungmoq jéyáng rã dut lhê.

¹³ Hpúng shinggan mà é bang lé gi, Garai Gasang jéyáng rã nghut lhê. Nghut kôlhang, "Haú agè agaú é sù lé, nungmoq chyáng mai lhoq htoq pyâm keq." ‡ gâ tô ri.

Lumjîng Bâng Hkaú Má Jéyáng Lhûm É Hkyô

6 Nungmoq mà é rayuq yuq gi, gumang góyuq eq dang-rhâng lhûm tô é nghut jáng, haú hkyô lé jéyáng nhâng rã matú, haú sân-yúng bâng é hí má taí rã malaî, Garai a wó bâng é hí má wám taí rã lhú? ² Haú sân-yúng bang gi, mingkan lé jéyáng rã nghut é hkyô lé, nungmoq a sé kó lhú? Nungmoq gi, mingkan lé jéyáng rã bang nghut kôle nhîng, tiq é mù pé lé wó jéyáng é bang a nghut kó lhú? ³ Nga-nhúng gi, maumâng pé lé jéyáng rã nghut é hkyô lé, nungmoq a sé kó lhú? Haú mù, shí pyat mà é hkyô pé lé, gè gè yhang wó jéyáng kê rã nghut lhê ô! ⁴ Haú mù luî, nungmoq gi, dang-rhâng lhûm é mù pé joq é nghut jáng, noqkuq hpúng má ahkyak a nghut é bang lé tarâ agyî kut nhâng kê rã lhú? ⁵ Ngò, haú su nghû taí é gi, nungmoq lé hoq hpu nhâng rã matú nghut lhê. Lumjîng bâng chyáng dang-rhâng lhûm é hkyô lé wó jéyáng rã hpaqchyî luq shoq bo é byù, nungmoq chyáng rayuq lháng a nyi dut kê rã lhú? ⁶ Nghut kôl-

†† Mún gâ é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuî pyâm mù, múnchi a bo é muk sai kê é nghut lhê. ‡ 5:13 Tarâ Pun 17:7

hang, nungmoq gi, gumang yhangchang rayuq eq rayuq, a lumjǐng bǎng é hí má lháng rǐng shok lhum akô nhung!

⁷ Nungmoq hkaû má mû jéyáng lhûm é hkyô joq é nghut jáng, nungmoq gi, sum lugù nghut bê. Góyuq èq shut le lháng rû ge lhê a nghut kô lhú? Mhaú zô é huí le lháng rû gè lhê a nghut kô lhú? ⁸ Nghut kôle, nungmoq yhang gi, mhaú zo kô é eq shut kô é nghut luí, haû gi, nungmoq é gumang wuì lé kut é nghut lhê.

⁹ Agè agaú é bang gi, Garai Gasǎng é mingdǎn mâ é shimǎn jeju a myang hkam yù kó rǎ nghut é hkyô lé, nungmoq a sé kô lhú? Hkâ-nâ nyí kó. Ashop é dǒng gungsho zùm yap é bang le, hparà noq é bang le, sumyí sulǎng lú é bang le, shiwa hpó kut é bang le, yuqgè yhangchang nyí zô lhûm é mara kut shut é bang le, ¹⁰ hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasǎng é mingdǎn mâ é shimǎn jeju lé myang hkam yù kô rǎ a nghut. ¹¹ Nungmoq mâ é ra-am gi, haû su kut kô é bang nghut akô. Nghut kôlhang, nungmoq gi, nga-nhûng é Garai Gasǎng é Woi-nyí eq Yhumsǐng Yesuq Hkrisduq é mying mai, mara hkyut san byí é, lhoq sǎn-yúng é eq chí sǎn pyám byí é hui bekô nghut ri.

Ashop É Dǒng Gungsho Zùm Yap É Hkyô

¹² "Jung hkangmó kut rǎ ahkǎng ngò wó lhê." Nghut kôlhang, jung hkangmó gi, akyû byí é a nghut. "Jung hkangmó kut rǎ ahkǎng ngò wó lhê." Nghut kôlhang, haí jǐng èq le ngo lé wó sing pyám rǎ a nghut.

¹³ "Zoshuq gi, wamdaû é matú nghut mù, wamdau gi, zoshuq é matú nghut ri." ga nungmoq ra-am taí kó rǎ nghut lhê. Nghut kôlhang, Garai Gasang gi, haû í jǐng é lé lhoq htên pyám rǎ nghut lhê. Gungdu gi, ashop é dǒng gungsho zùm yap hkyô é matú a nghut é za, haû Yhumsing é matú nghut mù, haû Yhumsǐng gi, gungdû é matú nghut ri. ¹⁴ Garai Gasang gi, Yhǎng é a-tsǎm èq, haû Yhumsǐng lé, shi é mai lhoq dui toq yû bê nghut mù, nga-nhúng lé le lhoq dui toq yû rǎ nghut lhê. ¹⁵ Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lhú? Haû nghut le nhǐng, Hkrisduq é gungsho showui showang pé lé yù mù, shiwa myhí pé eq rading ralhum za kut pyám nhǎng kô rǎ lhú? Hkâ-nhám le a ge dut nhǎng! ¹⁶ Shiwa myhí eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lhú? Hkâsu mù gǎ le, "Yhangnhik gi, gungsho ralhum za dut kô rǎ nghut lhê." † ga taí tô ri. ¹⁷ Nghut kôlhang, haû Yhumsǐng eq rading ralhum za dut é sù gi, woi-nyí má Yhang eq ralhum za dut bekô nghut ri.

¹⁸ Ashop é dǒng gungsho zùm yap é hkyô lé koi pyám keq. Byù rayuq kut shut é gotû mara pé banshoq gi, yhǎng é gungdu shinggan má nghut lhê; nghut kôlhang, ashop é dǒng gungsho zùm yap é hkyô kut shut é sù gi, yhumsing gùng lé mara shut é sù nghut ri. ¹⁹ Nungmoq é gungdu gi, Garai Gasǎng

chyáng mai nungmoq wó yû bê nghut é, nungmoq má lúng nyí é Chyoiyúng Woi-nyí é noqkuq yhûm nghut é lé, nungmoq a sé kô lhú? Nungmoq gi, yhumsing gùng lé sing é bang a nghut. ²⁰ Hkâsu mù gǎ le, nungmoq gi, ahpau ralhum byi mù wui hpyit tô é hui bê bang nghut akô. Haû mù luí, nungmoq é gungdû èq, Garai Gasang lé, hkunggǎ é hkyô shit nyí keq.

Myí Yu É Eq Sêng É Hkyô

⁷ Ahkuí, nungmoq kǎ kat é hkyô pé eq séng luí ga jang, yuqgè rayuq gi, myí a yu le gè ri. ² Nghut kôlhang, ashop é dǒng gungsho zùm yap é hkyô gyai myô é yanmai, yuqgè hkangmó gi, yhumsing é myiwe wó rǎ lhê; myiwe hkangmó gi, yhumsing é yuqgè wó rǎ lhê. ³ Haû yhumsing hpó gi, wò joq é eq rajung za, yhǎng yhumsing myhí eq zùm sháng gaq; haû dǒng za, yhumsing myhí le, yhǎng yhumsing hpó eq zùm sháng gaq. ⁴ Haû yhumsing myhí é gungdu gi, yhǎng-gùng yhang za sêng é a nghut, yhǎng é yhumsing hpó eq le sêng lhê. Haû eq rajung za, yhumsing hpó é gungdu gi, yhǎnggùng yhang za sêng é a nghut, yhǎng é yhumsing myhí eq le sêng lhê. ⁵ Nungmoq myit huí lhum luí, kyûdûng é má rago ap nóng rǎ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkang é yanmai, Tsadán èq gunglaú é a hui kô sháng gaq, ahkyíng ayoq haû lai jáng, rahá dum zùm keq. ⁶ Ngò, haû su nghû taí é gi, hkunmó hkyô é dǒng a nghut, ahkǎng byí kat é dǒng ru nghut lhê. ⁷ Byù banshoq bang gi, ngò su nyí rǎ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasǎng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò taí kólé, ngò su, haû dǒng jǎng nyí pyám kô é nghut le, yhangmoq é matú ge é hkyô nghut ri. ⁹ Nghut kôlhang, yhumsing gùng lé a wó hkǎng kô é nghut le gi, yhangmoq, myí yû myí ló rǎ lhê; hkâsu mù gǎ le, myí su nyé luí ô nau nyí rǎ malaí, myí yu myí ló le je ge lhê.

¹⁰ Myí yû bê bang lé, ngò, hkunmó hkyó kólé, shí gi, ngò dǒng hkyô é a nghut, Yhumsing chyáng mâ é ru nghut lhê: Yhumsing myhí gi, yhǎng é yhumsing hpó chyáng mai a ge gang rǎ nghut lhê. ¹¹ Nghut kôlhang, yhang gǎng é nghut jáng, myí a dum ló é za nyí rǎ lhê, haû a nghut jáng, yhǎng é yhumsing hpó eq dum xoq yû rǎ lhê. Yhumsing hpó le, yhǎng é yhumsing myhí lé a ge kǎng pyám rǎ nghut lhê.

¹² Góbang lé ngò shí su nghû taí kólé, shí gi, Yhumsing chyáng mâ é a nghut, ngò dǒng mai taí é ru nghut lhê. Gumang rayuq yuq gi, lumjǐng sù a nghut é yhumsing myhí wó é nghut le, myiwe haû, yhang eq rahá nyí nau é nghut jáng, yhang lé a ge kǎng pyám rǎ nghut lhê. ¹³ Myiwe rayuq gi, lumjǐng sù a nghut é yhumsing hpó wó é nghut le, yuqgè haû, yhang eq rahá nyí nau é nghut jáng, yhang eq a ge gang rǎ nghut lhê. ¹⁴ Hkâsu mù gǎ le, haû a lumjǐng sù yhumsing hpó gi, yhǎng yhumsing myhí dǒng mai lhoq sǎn-

† 6:16 Apûn 2:24

yúng é hui bê nghut mù, a lumjíng sù yhumsíng myhí le, lumjíng sù nghut é yhâng é yhumsíng hpó dđng mai lhoq san lhoq yúng é hui bê nghut ri. Haù a nghut jáng, nungmoq é zo wuí gi, a sanséng dut kô râ nghut lhê; nghut kôlháng, yhangmoq gi, haù dđng mai, chy-oiyúng bekô nghut ri.

¹⁵ Nghut kôlháng, haù a lumjíng sù gâng ló naù jáng gi, gâng ló sháng gaq. Lumjíng é yuqgè nghut nghut, myiwe nghut nghut, haù sù é hkyô pé má gi, hkúm zing tô é hkyô a joq é nghut lhê. Garai Gasang gi, nganhúng lé, nguínón shoq nyi sháng gaq ga ji yù bê nghut lhê. ¹⁶ Yhumsíng myhí ê, náng é yhumsíng hpó lé wó hkyi yù râ nghù, hkâsu wó sé râ lhú? Yhumsíng hpó ê, náng é yhumsíng myhí lé wó hkyi yù râ nghù, hkâsu wó sé râ lhú?

¹⁷ Hká dđng nghut kôlháng, yuq hkgámó gi, Garai Gasang, yhang lé ji yu tô é hkún, haù Yhumsíng mai yhang lé nyi nhang tô é dđng asak dui nyi râ lhê. Haù gi, noqkuq hpúng pé banshoq má ngò tô to byí é tarâ nghut lhê. ¹⁸ Byù rayuq gi, ji yu é huí é hkún, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù dđng a dut byuq sháng gaq. Byù rayuq gi, ji yu é huí é hkún, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq. ¹⁹ Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasang é hkunmó pé lé châng nyi é za sheq ahkyak nghut lhê. ²⁰ Yuq hkgámó gi, yhang lé Garai Gasang eq ji yu é hkún lhê su xoq nyi nyi râ lhê. ²¹ Nàng gi, ji yu huí é hkún jùn dut nyi é lhú? Haù hkyô lé hkâm-myit chiq. Nghut kôlháng, nàng gi, luthkyô wó yu é nghut jáng, haù dđng nyi aq. ²² Hkâsu mù gâ le, haù Yhumsing eq ji yu é huí é hkún, jùn dut nyi é sù gi, haù Yhumsing eq lhoq lhut yu é byù nghut bê. Haù eq rajung za, ji yu é huí é hkún, luthkyô wó é sù gi, Hkris-duq é jùn nghut ri. ²³ Nungmoq gi, Garai Gasang eq ahpau byi mù wui hpyit yu é hui bê bang nghut akô. Haù mù, byu pé é jùn hkâdut kó. ²⁴ Gumang wuì ê, yuq hkgámó gi, yhumsing lé Garai Gasang eq ji yu é huí to bê dđng, Yhâng é hí má xoq nyi nyi râ lhê.

²⁵ Ahkuí, zomyi zorâm wui é hkyô tái kôlé. Haù Yhumsing chyáng mã é hkunmó gi, ngò a wó; nghut kôlháng, Yhumsing é shogyo nhikmyín é yanmai, lumgíng sù rayuq nghut nyi é dđng, ngò, nungmoq lé hkyô shit râ nghut lhê. ²⁶ Ahkuí hui zô é wuìhke hkyo é yanmai, nungmoq gi, yhumsíng nyi to é su xoq nyi nyi le je ge ri nghù, ngò wó myit ri. ²⁷ Nàng, myiháng bê a nghut lhi? Lhoq kang râ hkâda lo. Nàng, myi a háng shí a nghut lhi? Myi hkâhò lo. ²⁸ Nghut kôlháng, nàng, myiháng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlháng, myiháng é bang gi, shí pyat má wuìhke hkyô pé myo myo hui kó râ nghut mù, ngò, nungmoq lé haù mai hkyi yù nau ri.

²⁹ Gumang wuì ê, ngò tái nau é lichyúm gi, ahkýing tot byuq bê nghut mù, ahkuí mai, myi wó é bang gi, a wó é bang dđng nyi kó sháng gaq. ^{†30} Yón ngaù huí é

bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹ haù mingkan zè pé lé chung é bang gi, haù pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkuí lhê é azòng isâm gi, laí ló nyi é nghut lhê.

³² Ngò gi, nungmoq lé a myit myo nhâng naù. Myi a yù shí é sù gi, haù Yhumsíng lé hkâsu wó gabú nhâng râ matú, haù Yhumsing é muzó lé myit chiq nyi ri.

³³ Nghut kôlháng, myi yù bê sù gi, yhâng é yhumsíng myhí lé hkâsu wó gabú nhâng râ matú, mingkan shí é muzó eq séng luí myit chiq nyi ri. ³⁴ Haù mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haù Yhumsíng lé rago wó ap nóng râ matú, Yhumsing é muzó pé eq séng luí myit chiq nyi ri. Nghut kôlháng, myi ló bê myiwe gi, yhâng é yhumsíng hpó lé hkâsu wó gabú nhâng râ matú, mingkan shí é muzó eq séng luí myit chiq nyi ri. ³⁵ Ngò, haù su nghù taí é gi, nungmoq é matú ge é hkyô nghut lhê; nungmoq lé tara eq zú zing é a nghut é za, myit a byò lo shoq Yhumsíng lé wó ap nóng râ matú, jô é dđng asak wó duí kô sháng gaq nghu é hkyô ru nghut lhê.

³⁶ Nghut kôlháng, rayuq yuq gi, yhang dđng tô é zomyi gyíng lé a htuk é dđng kut nyi é su wó myit ngàm jáng, myiwe haù asak kô lo nyi mù, hâng yù râ dut bê nghù myit é nghut le gi, yhang ô nau é dđng kut sháng gaq. Yhang mara kut é a nghut. Yhangnhik gi, hâng lhum râ lhê. ³⁷ Nghut kôlháng, yhang gi, haù hkyô lé yhâng é myit mai wó lhoq zím pyâm é nghut mù, yut yut ô naù hkyo é ahkaù má a nghut é za, yhumsíng ô naù é hkyô lé wó hkúm zing pyâm é sù nghut luí, haù zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸ Haù mù luí, zomyi gyíng haù lé hâng yu é sù gi, jô é hkyô kut bê nghut ri; nghut kôlháng, zomyi gyíng haù lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsíng hpó rú dui nyi nyi, yhang eq xoq tô ashí nghut lhê. Nghut kôlháng, yhâng é yhumsíng hpó shi byuq é nghut jáng, yhang gi, myi ló râ ahkáng dum wó bê nghut lhê, nghut kôle, haù yuq gi, Yhumsíng eq séng é sù dut râ lhê. ⁴⁰ Ngò jéyáng é dđng ga jáng, myi a dum ló é wó nyi le gi, yhâng é matú je gabú hkyô dut râ nghut lhê. Ngò le, Garai Gasang é Woi-nyí wó sù nghù wó myit ri.

Hparà Lhò Lé Tíng Byí É Zoshuq

8 Ahkuí, hparà Lhò pé lé tíng byí é zoshuq hkyô: nga-nhúng banshoq bang gi, haù hkyô eq séng luí sê lhê. Sê é hkyô gi, nghutbun sê lhê; nghut kôlháng, chyitdap myit gi, lhoq kô myhang lhê. ² Byù rayuq yuq gi, rajung jung lé sé bûn é nghut le, yhang sé âng é lé l háng a sé shi nghut ri. ³ Nghut kôlháng, Garai Gasang lé chyitdap é sù gi, Garai Gasang eq sé é sù nghut ri.

† A wó é bang dđng nyi kó sháng gaq gâ é gi, Garai mù lé je myit zuq nyi sháng gá naù é nghut lhê.

⁴ Haû mù luî, hparà lhô pé lé tîng byî é zoshuq lé zô é eq séng luî gi: hparà lhô gi, mingkan má haî lháng a nghut é hkyô lé le, Garai Gasang gi, Yhang rayuq mai lai luî gotû a nyi é lé le, nga-nhúng sê lhê. ⁵ Hkâsu mù gà le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlháng ⁶ nga-nhúng é matú gi, Îwa nghut é Garai Gasang rayuq za nyi é nghut mù, lhunglháng gi, Yhang mai hpan é nghut luî, nga-nhúng gi, Yhàng é matú asak dui nyi é nghut lhê. Yesuq Hkrisduq nghu é Yhumsing rayuq za nyi é nghut mù, lhunglháng gi, Yhang đông mai hpan é nghut luî, nga-nhúng gi, Yhang đông mai asak dui nyi é nghut lhê.

⁷ Nghut kôlháng, yuq hkangmó gi, haú hkyô lé sê gam hkoq yu é a nghut. Ra-am gi, ahkuî jé shoq hparà lhô pé má mán byuq kô é yanmai, haú sù é zoshuq lé yhangmoq zô é hkûn, hparà lhô lé tîng byî é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri.

⁸ Nghut kôlháng, zoshuq gi, nga-nhúng lé, Garai Gasang shut shuí chyáng e é a nghut. Nga-nhúng a zô é nghut le gi, je sôm byuq ló é a nghut, zô é nghut le gi, je ge lo é a nghut.

⁹ Haú su ga kôlháng, nungmoq a htung a htê zô é hkyô gi, lumjîng myit wum nyhóm bang é matú myit leqbat jowò a dut shoq sidiq keq. ¹⁰ Hkâsu mù gà le, sumsé hpaqchyî wó é bang nungmoq gi, hparà lho é noqkuq yhôm má zô nyi kô é lé, haú myit sôn sê é hkyô má wum nyhôm é sù rayuq yuq myang é nghut jáng, hparà lhô pé lé tîng byî é zoshuq lé, yhang wám zo râ lé wum byî é a dut kó râ lhú? ¹¹ Haú mù, Hkrisduq shî hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyî èq lhoq htên pyâm é hui berâ nghut lhê. ¹² Nungmoq gi, haú hkyô đông mai, nungmoq é gumang wuî lé mara kut shut é eq, yhangmoq é myit sôn sê é hkyô wum nyhôm é lé nô nhang é hkûn, Hkrisduq lé mara kut shut é nghut bekô. ¹³ Haú mù luî, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo râ nghut lhê.

Lagyo Rayuq É Ahko Ahkáng

9 Ngò gi, lut sù a nghut lhú? Ngò gi, lagyo rayuq, a nghut lhú? Ngò gi, nga-nhúng é Yhumsing Yesuq lé myang wú bê sù, a nghut lhú? Nungmoq gi, haú Yhumsing má, ngò zui saî é muzó é ashi pé chyat, a nghut kô lhú? ² Ngò gi, góbâng chyáng lagyo a nghut kôlháng, nungmoq chyáng gè gè nghut lhê! Hkâsu mù gà le, nungmoq gi, haú Yhumsing má, ngò lagyo nghut é hkyô saksé dizik nghut bum akô.

³ Ngá ahtoq má jéyáng bang lé, ngá gûng ngò taî hung kat kôlé. ⁴ Ngamoq gi, zo râ shuq râ ahko ahkáng a wó é bang nghut lhê lhú? ⁵ Gotû lagyo pé eq Yesuq é yhanggu yuqzô pé eq Kehpa kut é su, lumjîng sù nghut é yhumsing myhí shuí chûng râ, ngamoq,

ahko ahkáng a wó é nghut lhê lhú? ⁶ Ngò eq Barnaba baú za, asak dui hkyô é matú mù zui ra râ lhú?

⁷ Ó yuq wá, yhumsing zoshuq wùn luî, gyè mù wùn waq râ lhú? Ó yuq wá, tsibiyiq hkyâm saî mù, haú mâ é tsibiyiq shi a zo kut râ lhú? Ó yuq wá, sau rém mù, sau naú a shuq kut râ lhú? ⁸ Ngò gi, shí hkyô pé lé xângzo hkyam đông za taî é nghut lhê lhú? Haú tarâ má le, ra-jung za taî tô lhê, a nghut lhú? ⁹ Hkâsu mù gà le, haú Mosheq é tarâ má, "Guq nâng nyi é no lé nhuttsung hkâ-tsûng to byi." [†] ga kê tô ri. Garai Gasang gi, no eq séng luî za chiq é nghut lhê lhú? ¹⁰ Gè gè yhang, yhang gi, nga-nhúng é matú taî é a nghut kô lhú? Nghut lhê, haú gi, nga-nhúng é matú kê to byî é nghut lhê. Haî mù gà le, yò hpuq sù, yò hpuq é eq, guq bat sù, guq bat é gi, kyô chôm shù yù râ lé myoqbyù luî, kut kô é nghut lhê. ¹¹ Ngamoq gi, nungmoq chyáng woi-nyí amyui sân kat bê nghut mù, nungmoq chyáng má é mingkan zè lé shù yu é nghut jáng, lùm myô é dut byuq bekô lhú? ¹² Góbâng gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó râ lhê a nghut kô lhú?

Nghut kôlháng, ngamoq gi, ahko ahkáng haú lé a yu é nghut lhê. Haú yù râ malaî, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê. ¹³ Haú noqkuq yhôm má mù zui é bang gi, yhangmoq é zoshuq lé haú noqkuq yhôm mai wó é hkyô eq, hkungga gyap má do-jaú é bang gi, hkungga gyap má nhông byî é ra-am lé myàng zô é hkyô lé, nungmoq a sé kô lhú? ¹⁴ Haú eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haú Yhumsing hkunmó hkyô to bê nghut ri.

¹⁵ Nghut kôlháng, ngò gi, ahko ahkáng haú pé haî lé le a yu é nghut lhê. Nungmoq, ngo lé haú su lhôm kut byi râ lé myoqbyù mù, ngò, shí hkyô lé kê é a nghut. Hkâsu mù gà le, ngò haú su gumrong é hkyô lé, rayuq yuq lhoq htên pyâm byi râ htoq má, ngò shi byuq le lháng je ge ri. ¹⁶ Nghut kôlháng, gabú danglù lé ngò hko kyô é hkûn, ngò gumrông jang a joq; hkâsu mù gà le, haú gi, ngò a kut a ge é ngá wô nghut lhê. Haú gabú danglù lé ngò a hko kyô é nghut le gi, ngò dîngnyé wó râ nghut lhê. ¹⁷ Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lùm luî ap tô é lé, agon za wùn waq nyi é dut râ nghut lhê. ¹⁸ Haú mù luî, ngá é shigyaú chyunghuq gi, haî nghut lhê lhú ga jang, haú gabú danglù lé hko kyô é hkûn, ngò gi, ahpau a yu é za wó ap nóng luî, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lhê.

¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lhê. ²⁰ Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkûn, Yudaq byù rayuq đông dut nyi lhê. Ngò gi, tarâ hkaû má nyi sù a nghut kôlháng, tarâ hkaû mâ é bang lé shuí lhing yù râ matú, tarâ

† 9:9 Tarâ Pun 25:4

hkaû má nyi bâng chyáng nghut nyi é hkûn, tarâ hkaû mâ é byù rayuq đông dut nyi lhê. ²¹ Ngò gi, tarâ a wó bang lé shuí lhing yù rã matú, tarâ a wó bâng chyáng nghut nyi é hkûn, tarâ a wó sũ rayuq đông dut nyi lhê. Nghut kôlhang, gè gè ga jáng, Garai Gasang é tarâ mai a lut htoq é za, Hkrisduq é tarâ hkaû má nyi sũ nghut lhê. ²² Ngò gi, wum nyhóm bang lé shuí lhing yù rã matú, wum nyhóm bâng chyáng nghut nyi é hkûn, wum nyhóm sũ rayuq đông dut nyi lhê. Ngò gi, wó dut é hkyô đông mai byù ra-am lé wó hkyi sháng gaq nghû, byù lhunglhang bâng chyáng, byù ajã jã đông nyi nyi lhê. ²³ Ngò gi, gabú danglù mai wó é shimân je-ju pé lé wó chòm hkam yù sháng gaq nghû, gabú danglù é yanmai haú pé banshoq lé kut é nghut lhê.

²⁴ Din shingjông poí má din rã bang banshoq òn kôlhang, rayuq za shigyaú chyunghuq wó é hkyô lé, nungmoq a sé kô lhú? Chyunghuq wó rã matú òn keq. ²⁵ Sup poí má shingjông lhôm é bang yuq hkangmó gi, yhumsging gùng yhumsging tarâ htan é đông lhoq mhân yù rã lhê. Yhangmoq gi, gíng nyi rã a nghut é janmaú wó rã matú, haú su kut é nghut akô; nghut kôlhang, nga-nhúng gi, ahtum abyuq gíngtíng nyi rã nghut é janmaú wó rã matú shikut é nghut lhê. ²⁶ Haú mù luí, ngò gi, jum òn òn é byù rayuq su òn é sũ a nghut. Ngò gi, lai lé bat é byù rayuq su, akôm má bat é sũ le a nghut. ²⁷ Ngò gi, góbbâng chyáng mungdang hko é htàng má, ngá gúng ngò, shigyaú chyunghuq eq a gíngdán sũ a dut sháng gaq nghû, ngá gúng lé gyai yhang lhoq mhân yù mù, ngá gung lé jùn kut yu nyi lhê.

Israelaq Pê É Labaú Mai Sidiq Byí É Hkyô

10 Gumang wuê ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkûn, nga-nhúng é íchyí iwa pé banshoq bang gi, mhutdùm ô má nyi mù, Nhông Nè mai wó lai byit kô é nghut lhê. ¹² Yhangmoq banshoq bang gi, mhutdùm eq Nhông Nè má, Mosheq é chángzô pé đông baptisma hkam yu é bang chyat nghut bekô. ³ Yhangmoq banshoq bang gi, rajung zã é woi-nyí zang zo kô é eq, ⁴ rajung zã é woi-nyí wuê shuq kô é nghut lhê; hkâsu mù gã le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê. ⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

⁶ Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi rã matú nga-nhúng é azông dut bê nghut ri. ⁷ "Byu pé gi, zùng mù, zo luí shuq luí, a lumjíng bang kut é đông, toq mù, ye bum akô." †† ga kã tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. ⁸ Yhangmoq mâ é ra-am gi, ashop é đông gungsho zùm yap é hkyô shut kômù, ra-

nyí má za í mûn sum hkyíng yuq shi byuq é su, ashop é đông gungsho zùm yap é hkyô le, nga-nhúng gi, a ge kut shut rã nghut lhê. ⁹ Yhangmoq mâ é ra-am gi, haú Yhumsging lé chyâm luí, lhangmuí pê eq hte sat é huí bùm kô é su, haú Yhumsging lé, nga-nhúng gi, a ge chyâm rã nghut lhê. ¹⁰ Yhangmoq mâ é ra-am gi, nhut-luq shô-myo kôluí, lhoq htên é maumâng eq sat pyâm é hui kô é su, nungmoq gi, nhutluq shô-myo hkâkut kó.

¹¹ Yhangmoq chyáng wú yù rã azông đông haú pé dut htoq luí, ló htáng rã ipyat pé má nyi âng to bang nga-nhúng é matú sidiq byi rã đông kã to bê nghut ri. ¹² Haú mù luí, nungmoq gi, yap gíng nyi bê su ngàm kô é nghut jáng, a leqbat rã matú sidiq nyi keq! ¹³ Byu chyáng htoq sê é gunglaú hkyô za nungmoq hui rã nghut lhê. Garai Gasang gi, lhumzui sũ nghut lhê mù, nungmoq a wó jân é gunglaú hkyô lé hui nhâng rã a nghut. Nghut kôlhang, nungmoq gunglaú huí é hkûn, Yhang gi, haú lé nungmoq wó jan rã matú, hkyô htong byi rã nghut lhê.

Hparà Lhò Noq Hkyô Lé Koi Pyám Rã Hkyô

¹⁴ Haú mù luí, ngò chyitdap é luzúm wuê ê, hparà lhò noq hkyô lé koi pyám keq. ¹⁵ Nhik gyíng bang lé ngò taí lhê; ngò haí taí nyi é hkyô lé nungmoq gùng myit sôn yù keq. ¹⁶ Nga-nhúng, jeju bûn nyi é jeju góm lé shuq é hkûn, Hkrisduq é sui má chòm zùm bê a nghut kó lhú? Nga-nhúng, myhik hpê é muk lé zô é hkûn, Hkrisduq é gungdu má chòm zùm bê a nghut kô lhú? ¹⁷ Haí mù gã le, muk htung ralhum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gã le, nga-nhúng banshoq bang gi, haú rahtung zã é muk lé chòm gàm zô é bang chyat nghut lhê.

¹⁸ Israelaq byu pê é hkyô lé myit wú keq. Haú hkungga lé zô é bang gi, hkungga gyap má chòm lom é bang nghut lhê, a nghut kó lhú? ¹⁹ Hparà lhò, a nghut jáng, hparà lhò lé tíng byí é hkungga gi, rajung jung nghut lhê nghû, ngò taí é lhú? ²⁰ Haú su taí é a nghut, a lumjíng bâng é hkungga gi, Garai Gasang lé nhông byí é a nghut, nat gâng pé lé tíng byí é ru nghut lhê. Ngò gi, nungmoq, nat gâng pé eq chòm zum nyi bang dut rã lé a ô nau é nghut lhê. ²¹ Nungmoq gi, haú Yhumsging é góm lé le, nat gâng pê é góm lé le, ge shuq rã a nghut; nungmoq gi, haú Yhumsging é zangbó má le, nat gâng pê é zangbó má le, rahá ge bo lòm rã a nghut. ²² Nga-nhúng gi, haú Yhumsging lé manôn nhâng nau é bang dut rã a nghut kô lhú? Nga-nhúng gi, Yhâng htoq je wúm bo é bang nghut lhê lhú?

Lumjíng Su É Luthkyô

²³ "Jung hkangmó kut rã ahkáng wó lhê." nghut kôlhang, jung hkangmó gi, akyú wó é a nghut. "Jung hkangmó kut rã ahkáng wó lhê." nghut kôlhang, jung hkangmó gi, byù lé wó kô làm nhang é a nghut. ²⁴ Ó

† Bun zo ralhum mai raxê lhum gi, Htoq Ló Laiká má bo é Mosheq htàng cháng bâng é hkyô lé kã tô é nghut lhê. †† 10:7 Htoq Ló 32:6

‡ Bun zo 23 mâ é dangngho gi, Korinhtuq byu pé lhaq taí é dang nghut lhê.

yuq le, yhumsing é gè hkyo matú ho é a nghut é za, góbàng é gè hkyo é matú hô râ dut lhê.

²⁵ Sho ùng gai má ùng é haí lé lé, ùng-àng é myit eq a myí gôn é za zo keq. ²⁶ Hkâsu mù gà le, "Myidàm htoq eq haú má joq é jung hkangmó gi, Yhumsing é chyat nghut lhê." † gà tô ri.

²⁷ A lumjínq bang ra-am, nungmoq lé zang zo jì mù, nungmoq ê nau é nghut jáng, ùng-àng é myit eq a myí gôn é za, nungmoq hí má to byí é gû lé zo keq.

²⁸ Nghut kôlhang, rayuq yuq, nungmoq lé, "Shí gi, hparà lhô lé títng byi bê nghut lhê." ga taí kyô é nghut jáng, nungmoq lé taí kyo su é yanmai le, myit ùng-àng é yanmai le, haú lé hkâzo kó. ²⁹ Ùng-àng é myit haú gi, nungmoq é a nghut, góyuq é ùng-àng é myit lé taí nau é ru nghut lhê. Ngá é luthkyô lé, haí mù góyuq é ùng-àng é myit eq jéyáng é huí nhang lhê lhú? ³⁰ Ngò jeju bûn é myit mai bo zo bo shuq yu é nghut jáng, Garai Gasang lé jeju hkyo-on bê nghut é zoshuq hau é yanmai, haí mù lumu pyâm é ngò huí râ lhú?

³¹ Haú mù luí, nungmoq zo kôlhang, shuq kôlhang, haí kut kôlhang, Garai Gasang é hpungwup shingkang é matú chyat kut keq. ³² Ngò gi, yuq hkangmó lé, hkyô hkangmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasang é noqkuq hpúng mã é byù lé nghut nghut, ó yuq lé le myit hkâleqbat nhâng kó. ³³ Hkâsu mù gà le, ngò gi, yhangmoq hkyi yu é wó hui kó sháng gaq nghú, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11 Ngò gi, Hkrisduq é alik châng é su, nungmoq gi, ngá é alik cháng keq.

Noqkuq É Má Htap Htuk Râ Hkyô

² Nungmoq gi, hkyô hkangmó má ngo lé bûn nyi kô é yanmai le, nungmoq lé ngò lhái byi bê mhoqshit hkyô pé lé myhik zing nyi kô é yanmai le, ngò, nungmoq lé hkyo-on lhê.

³ Ahkuí, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. ⁴ Yuqgè hkangmó gi, kyûdûng le nghut nghut, myiqhtoi htoí le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoí pyâm é nghut bê.

⁵ Myiwe hkangmó gi, kyûdûng le nghut nghut, myiqhtoi htoí le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoí pyâm é nghut bê. Haú gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra râ nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoí lhê nghut jáng, yhang gi, yhâng é ulhum lé nghop to ra râ nghut lhê. ⁷ Yuqgè gi, Garai Gasang é azông isâm eq hpungwup shingkang nghut é yanmai, yhâng é ulhum lé a nghop

râ é nghut lhê. Myiwe kúm gi, yuqgè é hpungwup shingkang nghut ri. ⁸ Hkâsu mù gà le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê. ^{††9} Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqgè é matú hpan tô é ru nghut lhê. ¹⁰ Haú nghut é yanmai le, maumang lagyo pé é yanmai le, myiwe gi, ahko ahkáng kumlhá đông yhâng é ulhum lé nghop râ dut lhê.

¹¹ Nghut kôlhang, haú Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gà le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkangmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyûdûng é gi, htuk kô râ lhú? Nungmoq, yhumsing gung é matú doqdân yù keq. ¹⁴ Yuqgè xâm hîng tô é nghut jáng, yhâng é matú aróng hpoí é hkyô dut é nghut kôle, ¹⁵ myiwe xâm hîng tô é nghut jáng, yhâng é matú hpungwup shingkang nghut é hkyô lé, htûnglí eq nungmoq lé mhoqshit lhê, a nghut kô lhú? Hkâsu mù gà le, xâm hîng tô é gi, nghop râ zè đông yhang lé byí tô é nghut lhê. ¹⁶ Rayuq yuq, haú hkyô lé taí dang-rháng nau é nghut jáng, ngamoq chyáng le, Garai Gasang é noqkuq hpúng pé chyáng le, gotû htûnglí a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkyo-on é a nghut. ¹⁸ Sâng-hi má, noqkuq hpúng ralhum đông nungmoq zup zîng é hkûn, nungmoq hkaú má gam hkoq hkyô joq é lé wó gyô é nghut luí, têng é le bò râ nghú, ngò lumjínq lhê. ¹⁹ Ô pé gi, Garai Gasang o é hkyam shut nghut é lé wó shit râ matú, nungmoq ahkaú má gam hkoq lhum hkyô joq râ dut lhê. ²⁰ Nungmoq rahá zup zing kô é hkûn, nungmoq gi, haú Yhumsing é myinzang zô é a nghut kó. ²¹ Hkâsu mù gà le, nungmoq zô é hkûn, góyuq lé le a lánq é za, ó le ó hí yù zô akô. Haú mù, rayuq gi, zo mut huí nyi, góyuq gi, shuq wut to dut akô nghut ri. ²² Nungmoq gi, zo jang shuq jang yhûm a wó bang nghut akô lhú? Garai Gasang é noqkuq hpúng lé wú tiq pyâm kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghú taí kó râ lhú? Haú pé é yanmai, ngò, nungmoq lé hkyo-on râ lhú? Ratsuí lháng a wó dut!

²³ Hkâsu mù gà le, haú Yhumsing chyáng mai ngò wó hap yu é gû lé, nungmoq lé lhái byi bê nghut lhê: Haú Yhumsing Yesuq gi, Yhang lé ap pyâm huí é myin má, muk lé yù mù, ²⁴ jeju hkyo-on é htàng má, haú lé myhik hpé mù, taí é gi, "Shí gi, nungmoq é matú Ngá é gungsho nghut lhê; Ngo lé bûn nyi râ matú, shí su kut nyí keq." gà ri. ²⁵ Haú eq rajung za, myinzang bàn zô é htàng má, Yhang gi, góm lé le yù mù, "Góm shí gi, Ngá é sui mã é dangshikaq asik nghut lhê; hkâ-nhâm le, nungmoq shí shuq é hkûn, Ngo lé bûn nyi râ matú shí

† 10:26 Hkyo-on 24:1

†† 11:8 Apûn 2:21-23

su kut keq." gâ taî ri. ²⁶ Hkâsu mù gâ le, nungmoq gi, muk shî lé zo luî, góm shî lé shuq é hkangmó, haû Yhumsing shî hkâm é hkyô lé, Yhang jé lé shoq, shit kyô nyi râ lhê.

²⁷ Haû mù luî, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. ²⁸ Haû mù, ó yuq le, muk zo góm shuq râ hí má, yhumsing gùng yhumsing jep wú ra râ nghut lhê. ²⁹ Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhanggùng yhang mara zô bô shuq bo yu é nghut lhê. ³⁰ Haû nghut é yanmai, nungmoq mâ é byù myo myo gi, wum nyhôm é, nõhpyo huî é nghut bum akô. Ra-am gi, shi ló byuq bekô nghut ri. ³¹ Nghut kôlhang, nga-nhúng gi, yhum-sing gùng yhumsing hí sôn sê yu é nghut jáng tarâ jéyáng é hui râ a nghut. ³² Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haû Yhumsing eq jéyáng é hkûn, nga-nhúng gi, mhó-qshit é huî nyi gù bê nghut lhê.

³³ Haû mù luî, ngá é gumang wuî ê, nungmoq gi, zo râ nghû rahá zup zing é hkûn, rayuq eq rayuq láng lhum keq. ³⁴ Nungmoq rahá zup zing é hkûn, jéyáng é a hui zo kó sháng gaq, rayuq yuq zòmut é nghut jáng, yhûm má zô chùng râ lhê.

Gotû myit tô é hkyô pé gi, ngò jé lé é hkûn sheq shit gotû râ nghut lhê.

Woi-nyí Hkyô Eq Sêng É Chyunghuq Pé

12 Gumang wuî ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê. ² Nungmoq gi, a lumjíng bang nghut nyi kô é hkûn lé, dang a nyo é hparà lhô noq râ matú hkyô shuí nghoq é hui kô é hkyô lé, nungmoq sê lhê. ³ Haû mù luî, "Yesuq gi, nhing pyâm é hui sháng gaq." ga, Garai Gasang é Woi-nyí mai taî é byù ó yuq le a nyi é eq, haû Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó taî é nghut lhê nghû, ngò, nungmoq lé taî kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê. ⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê. ⁶ Zui saî é hkyô ajung jung joq lhê, nghut kôlhang, Garai Gasang yhang za, byù lhunglhâng bang má, haû pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé byi bê nghut ri. ⁸ Rayuq lé gi, Woi-nyí haû mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau eq za, sumsé hpaqchyí byíng é danglù byí é nghut ri; ⁹ góyuq lé gi, Woi-nyí hau eq, lumjíng myit byí é nghut ri; dum góyuq lé gi, Woi-nyí hau eq, nõ lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoî é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taî é ahkáng; dum,

góyuq lé gi, dang haû pé é lichyúm taî sân kyô é ahkáng, byí é nghut ri. ¹¹ Chyunghuq haû pé banshoq gi, Woi-nyí hau eq za kut é loqmú chyat nghut mù, Yhang myit hpyit é dông yuq hkangmó lé haû pé tsing gám byí é nghut ri.

Gungbun Myo Kôlhang, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haû eq rajung za, Hkrisduq eq le haû dông nghut ri. ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luî, Woi-nyí rayuq lé za chôm shuq yù bê bang nghut lhê.

¹⁴ Haû gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. ¹⁵ Haû hkyô gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁶ Dum, haû nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁷ Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhú? ¹⁸ Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ lhú? ²⁰ Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹ Haû myoqjí gi, loq lé, "Ngò, nang lé a ra!" nghû a ge taí. Haû ulhum gi, hkyô lé, "Ngò, nang lé a ra!" nghû a ge taí. ²² Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. ²³ Hau htoq agó, hpau a lùm tap râ su myit ngam é gungsho showui showang pé lé, nga-nhúng je hpautap râ lhê. Haû a shit é jung gungsho pé lé, nga-nhúng hpautap é dông rago nghop râ lhê. ²⁴ Nga-nhúng é wó shit é gungsho pé kúm gi, haû hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Haû mù, gungdu má gamhkuî lhûm é hkyô a bo é za, gungsho showui showang pé ralhum eq ralhum, rajung za kut wó myit tê byí lhum kó râ nghut lhê. ²⁶ Haû gungsho showui showang ralhum jamjau huî é nghut jáng, lhum hkangmó bo jamjau râ nghut lhê. Ralhum hpautap huî é nghut jáng, lhum hkangmó bo gabú é nghut lhê.

²⁷ Ahkuî, nungmoq gi, Hkrisduq é gungdu nghut kôluî, nungmoq yuq hkangmó gi, haû é gungsho showui showang pé nghut akô. ²⁸ Garai Gasang gi, nõ-

qkuq hpúng má, sâng-hi lé, lágô pé, í lhum nghû râ má, myiqhtoí pé, sùm lhum nghû râ má, mhoqshit bang, hau htâng má, laklaí kumlhá pé kut râ bang, nõ wó lhoq gê râ chyunghuq wó é bang lé le, góbang lé wó garúm é bang, shuî-u râ chyunghuq wó é bang, laklaí dang ahú hú ge taí é bang lé, masat to bê nghut ri. ²⁹ Banshoq bang gi, lágô pé nghut lhê lhú? Banshoq bang gi, myiqhtoí pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklaí kumlhá kut akô lhú? ³⁰ Banshoq bang gi, nõ lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang haú pé é lichyúm ge taí sân kyô lhê lhú? ³¹ Nghut kôlháng, nungmoq gi, je gyaú é chyunghuq lé gyai yhang ô nau nyi keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhúm shit kôlé.

13 Ngò gi, byu pé é eq maumang lágô pé é myíng pé lé sê taí é nghut kôlháng, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lhê. ² Ngò gi, myiqhtoi htoí é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjíng myit bo é nghut kôlháng, chyitdap myit a bo é nghut jáng, ngò haí a nghut sù dut berâ nghut lhê. ³ Ngò gi, wó é sutzè banshoq myùng bang lé byí pyâm é eq, ngá é gungdu lé nyhê pyâm râ matú ap pyâm é nghut kôlháng, chyitdap myit a bo é nghut le gi, hai akyû a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê. ⁵ Chyitdap myit gi, hpau a dap é hkyô a kut, yhumsing é akyû baú za a hô, lui za nhikjum a yo, shut é mara a matsíng é nghut lhê. ⁶ Chyitdap myit gi, agè ashóp é má a gabú é za, haú tengmán hkyô má gabú nyi ri. ⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htúm byuq é a nghut. Myiqhtoi htoí é hkyô pé gi, byuq byuq râ nghut lhê; laklaí dang ahú hú ge taí é hkyô gi, zím byuq râ nghut lhê; sumsé hpaqchyí hkyô gi, laí ló byuq râ nghut lhê. ⁹ Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoí é gi, ra-am rahtâng ru nghut lhê. ¹⁰ Nghut kôlháng, gumjup hkyô jé lé é hkûn, a gumjup hkyô gi, byuq byuq râ nghut lhê. ¹¹ Ngò, zoshâng nghut ashî hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyâm bê nghut lhê.

¹² Ahkuí, nga-nhúng gi, myoqjâm hkaú mã é rago a sân é wupzo lé za myàng é nghut lhê; nghut kôlháng, htâng má, myoqdong hkyúm wó myàng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlháng, Garai Gasang gi, ngo lé gumjup shoq

sê é su, ngò le, htâng má, gumjup shoq sé râ nghut lhê.

¹³ Ahkuí, lumjíng myit, myit myoqbyù hkyô, chyitdap myit shi sùm lhum myit tô ri. Nghut kôlháng, haú pé mã é kô dik é gi, chyitdap myit nghut ri.

Myiqhtoi Htoi É Chyunghuq Pé Eq Laklaí Dang Nyo É Chyunghuq Pé

14 Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoí é chyunghuq lé je riyhang myit o nyi keq. ² Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri. ³ Nghut kôlháng, myiqhtoi htoí é sù yuq hkangmó gi, byu pé lé wum byi dang eq nhik tíng dang taí ri. ⁴ Laklaí dang rahú nyo é sù gi, yhumsing gùng lé htuqbang byí ri, nghut kôlháng, myiqhtoi htoí é sù gi, noqkuq hpúng lé htuqbang byí ri. ⁵ Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlháng, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôlé, shing-rán nghut nghut, sumsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lhú? ⁷ Htê lhoq htoq é asak a bo jung zè pé má lháng gi, sampyí nghut nghut, tíng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lhú? ⁸ Dum, tut htê le gam hkoq é dông a mut kyô é nghut jáng, majan htoq râ ri ó yuq wá hên râ lhú? ⁹ Nungmoq chyáng le haú dông nghut lhê. Nang, laklaí dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé râ lhú? Nungmoq gi, maulat má za taí hâng pyâm nyi kó râ nghut lhê. ¹⁰ Mingkan má dang ahú hú yhang joq é nghut lhê, nghut kôlé, dang lichyúm a htoq é dang gi, a joq é nghut lhê. ¹¹ Haú mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê. ¹² Nungmoq chyáng le haú dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haú nghut é yanmai, laklaí dang ahú hú taí é sù ó yuq le, yhang haú taí é lichyúm wó taí sân kyo sháng gaq, kyúdung râ dut lhê. ¹⁴ Hkâsu mù gâ le, laklaí dang ahú hú dông ngò kyúdung é nghut jáng, ngá é woi-nyí mai dúng é nghut lhê; nghut kôlháng, ngá é myitnyân é matú, hai akyû a wó nghut ri. ¹⁵ Haú mù, ngò hkâsu kut râ lhú? Ngò gi, ngá é woi-nyí mai le kyúdung râ,

ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê. ¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkûn, "Amen" ga hkâsu wó taí râ lhú? ¹⁷ Nungmoq gi, ge dik shoq jeju hkya-on kô é abe, nghut kôlhang, góbang gi, htoqbâng é a hui kó nghut ri.

¹⁸ Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bûn ri. ¹⁹ Nghut kôlhang, noqkuq hpúng má, laklaí dang rahú đông danghkun ramun ngò taí râ htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

²⁰ Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú đông kut mù, nungmoq myit é hkyô má gi, ko bang đông kut keq. ²¹ Haù jep é tarâ má kâ tô é gi,

"A wó gyô wú é dang đông mai le, góming byu pè é nhutwuì đông mai le, byù shí bang lé ngò taí râ nghut lhê;

nghut kôlhang, yhangmoq gi, ngá dang gyo kó râ a nghut.'

ga Yhumsíng taí ri." †
gâ ri.

²² Haù mù, laklaí dang ahú hú nyo é hkyô gi, lumjínng bâng matú kumlhá a nghut é za, a lumjínng bâng matú sheq ru nghut lhê. Myiqhtoi dang kúm gi, a lumjínng bâng matú a nghut é za, lumjínng bâng matú sheq ru nghut lhê. ²³ Haù nghut mù, noqkuq hpúng gón chôm zing mù, yuq hkangmó laklaí dang ahú hú nyò kô é nghut jáng, a sê gyô é bang nghut nghut, a lumjínng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lhú?

²⁴ Nghut kôlhang, yuq hkangmó, myiqhtoi dang taí nyi é u má, a lumjínng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pûn kyíng é hui râ eq, banshoq èq jéyáng é hui râ nghut é htoq agó,

²⁵ yhâng é i-myt má zaú tô é hkyô pé lé de de lhoq htoq shit é hui râ nghut lhê. Haù mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haù jáng, gumang wuì ê, nga-nhúng haí taí râ lhú? Nungmoq rahá lé chôm zing é hkûn, yuq hkangmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haù pé banshoq gi, noqkuq hpúng lé wum-o byi râ matú chyat kut é dut râ lhê. ²⁷ Rayuq yuq, laklaí dang ahú hú nyo é nghut jáng, í yuq eq myô htum sum yuq mai a laí é za, rayuq htâng rayuq nyò râ dut é htoq agó, rayuq yuq haù lé taí sân kyo ra râ dut

lhê. ²⁸ Taí sân kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

²⁹ Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haí taí é lé rago gyô chyam wú râ dut lhê. ³⁰ Nghut kôlhang, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê. ³¹ Hkâsu mù gâ le, yuq hkangmó gi, mhoqshit é eq myit wum byí é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoí é nghut lhê. ³² Haù myiqhtoi pé é woi-nyí pé gi, myiqhtoi pé uphkang é a-ô má nghut nyi ri. ³³ Hkâsu mù gâ le, Garai Gasang gi, atau ahú dut é Garai Gasang a nghut é za, nguingón hkyo é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za, ³⁴ myiwe wuì gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haù jep é tarâ má bo é eq rajung za a-ô má nyi kó sháng gaq. ³⁵ Yhangmoq gi, rajung jung sé naù kô é nghut jáng, yhùm má yhangmoq é yhumsíng hpô pé chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahí hkyô nghut ri.

³⁶ Haù Garai Gasang é mungdang gi, nungmoq chyáng mai htoq lo é nghut lhê lhú? Haù gi, nungmoq chyáng za lé jé bê nghut lhê lhú? ³⁷ Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haù Yhumsíng é hkunmó nghut é lé, yhang sê yù sháng gaq. ³⁸ Yhang gi, haù lé haí su a ngàm kut é nghut jáng, yhânggùng le, haí su a ngàm kut é hui zo râ nghut lhê.

³⁹ Haù mù luí, ngá é gumang wuì ê, myiqhtoi htoi râ lé ô nau nyi mù, laklaí dang ahú hú nyo é lé hkâhkùm pyám kó. ⁴⁰ Nghut kôlhang, jung hkangmó gi, htuk é đông eq shuq shuq tap tap zâ é hkyô đông kut é dut râ lhê.

Hkrisduq É Dui Toq Hkyô

15 Gumang wuì ê, ngò, nungmoq lé hko kyo bê nghut mù, nungmoq le hap yù luí, nungmoq yap gîng tô é jowò nghut é gabú danglù hkyô lé, ahkuí, ngò, nungmoq lé lhoq pûn kat nau ri. ² Ngò, nungmoq lé hko kyo bê é mungdang lé, nungmoq gîng gîng myhik zing nyi kô é nghut jáng, nungmoq gi, gabú danglù hau é yanmai hkyi yù huí é nghut akô. Haù a nghut jáng, nungmoq lumjínng é gi, akôm dut bê nghut lhê.

³ Ngò hap yu tô é pé lé, sâng-hi ahkyak é đông, ngò, nungmoq lé hai byi bê nghut lhê. Haù pé gi: Chyúmdang eq rajung za, Hkrisduq gi, nga-nhúng é yubak marâ é matú shí hkâm byi bê gâ é nghut ri; ⁴ Yhang gi, myhup yhùm é hui luí, Chyúmdang eq rajung za sum nyí nghu é nyí má lhoq dui toq é hui bê nghut mù, ⁵ Petruq lé htoq shit luí, haù lagyo raxe í yuq lé le htoq shit ri. ⁶ Hau htâng má, Yhang gi, ra-u má za, gumang

wui ngo shô yuq chyên lé htoq shit ri. Haú bang má é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri. ⁷ Hau htâng, Yhang gi, Yakuq lé htoq shit mù lagyô pé banshoq bang lé htoq shit ri. ⁸ Ló htâng má, Yhang gi, hkû buinyi a jé shî é má hku é đông nghut sù ngo lé le htoq shit bê nghut ri.

⁹ Hkâsu mù gà le, ngò gi, lagyô pé má é tiq dik sù nghut lhê. Haú Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû râ lhang a gingdán é sù nghut lhê. ¹⁰ Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq băng htoq má je riy-hang mũ wùn waq shikut lhê. Haú gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹ Haú mù luí, ngò nghut nghut, yhang-moq nghut nghut, ngamoq hko kyô é gi, haú hkyô chyat nghut lui, nungmoq lumjínj é le, haú hkyô nghut ri.

Shi Byuq Băng É Dui Toq Hkyô

¹² Nghut kôlhang, haú Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq má é ra-am gi, shi byuq băng é dui toq hkyô a joq nghû, hkâsu wó taí kó râ lhu? ¹³ Shi byuq băng é dui toq hkyô a joq é ru nghut le gi, Hkrisduq le lhoq dui toq é hui berâ a nghut. ¹⁴ Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjínj hkyô gi, akôm dut byuq râ nghut lhê. ¹⁵ Hau htoq agó, Garai Gasang gi, haú Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut. ¹⁶ Hkâsu mù gà le, haú shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut. ¹⁷ Hkrisduq gi, lhoq dui toq é a huí é nghut jáng, nungmoq é lumjínj hkyô gi, akôm dut luí, nungmoq gi, nungmoq é yubak mara hkaú má ru nyi nyi shi kó râ nghut lhê. ¹⁸ Haú nghut jáng, Hkrisduq má shi ló byuq bê bang le, htên byoq byuq râ za nghut lhê. ¹⁹ Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq băng htoq má shogyo ray-hup dut é je hui zo bang dut kó râ nghut lhê.

²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq băng é sâng-hi ashí dut bê nghut ri. ²¹ Hkâsu mù gà le, shî-nò hkyô gi, byù rayuq đông mai lò bê nghut é eq rajung za, shi byuq băng é dui toq hkyô le, byù rayuq đông mai lo é nghut lhê. ²² Hkâsu mù gà le, lhunglhang bang gi, Adam é yanmai shi byuq é su, lhunglhang bang gi, Hkrisduq eq rading ralhun za nghut é yanmai lhoq dui toq é hui râ nghut lhê. ²³ Nghut kôlhang, yuq hkangmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huí é sù

nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê. ²⁴ Hau htâng, jihtùm jé râ nghut lhê; haú hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Íwa nghut sù Garai Gasang lé mingdán ap byi râ nghut lhê. ²⁵ Hkâsu mù gà le, Yhang gi, Yhâng é gye pé banshoq lé, Yhâng é hkyí wang ô má tô pyâm é hkûn jé shoq up nyi ra râ nghut lhê.

²⁶ Haú lhoq htên pyâm é hui râ nghut é ló htâng é gye gi, shî-nò hkyô nghut ri. ²⁷ Hkâsu mù gà le, "Garai Gasang gi, jung hkangmó lé, Yhâng é hkyí wang ô má tô pyâm bê nghut ri." † gà Chyúmdang má kê tô ri. "Jung hkangmó lé" Yhâng é a-ô má tô pyâm bê ga taí é hkûn, jung hkangmó lé Hkrisduq é a-ô má tô pyâm bê sù Garai Gasang yhang kúm a lom é hkyô, san za nghut nyi ri. ²⁸ Yhang gi, haú hkyô ban kut é htâng má, haú Zo yhang le, jung hkangmó lé Yhâng é a-ô má to byi bê sù Garai Gasâng é a-ô má nyi sù dut nhang é hui râ nghut mù, Garai Gasang gi, lhunglhang htoq má gyaú sù nghut luí, lhunglhang lé sng sù nghut râ nghut lhê.

²⁹ Dui toq hkyô a joq é ru nghut le gi, shi byuq bê băng é matú wui-myhup hkám byí bùm kô é gi, hai akyú bò kó râ lhu? Haú shi byuq bang lhoq dui toq é a hui kô é ru nghut le gi, yhangmoq matú haí mù byu pé wui-myhup hkâm yù kó râ lhu? ³⁰ Ngamoq gi, ngamoq é matú, hkyíng hkangmó haí mù chiq râ jowò má nyi râ lhê lhu? ³¹ Gumang wui ê, ngò gi, nyí wuí aluq shoí shoí shi é hui zô é nghut lhê. Haú su nghû é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê.

³² Ngò gi, xângzo hkyam đông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyú bò râ lhu? Shi byuq bang lhoq dui toq é a huí é ru nghut le gi,

"Nga-nhúng gi, napmá shî râ nghut é yanmai, zo sháng, shuq sháng." ††

ngû râ za nghut lhê. ††† "A ge é zùm yap luzúm wui gi, ge é nyi yap sâmlai lé hten nhang é nghut lhê." gà é sanghkyang eq rajung za, hkyô shuí ngoq é hkâhui zo kó! ³⁴ Nungmoq gi, tau bûn gyíng lò mù, mara hkâkut shut lo kó; hkâsu mù gà le, Garai Gasang lé a sê é byù ra-am nyi akô. Ngò haú su nghû taí é gi, nungmoq hoq bun râ matú nghut lhê.

Dui Toq É Gungdu

³⁵ Nghut kôlhang, rayuq yuq gi, "Haú shi byuq bê bang, hkâsu kut lhoq dui toq é hui kó râ lhu? Yhangmoq gi, hkasû é gungdu nghut kó râ lhu?" ga myi râ nghut lhê. ³⁶ Haú-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô râ a nghut mhaí. ³⁷ Nàng, kyô hkyô é hkûn, yuq lò râ nghut é agâm lé hô hkat e a nghut é za, sungsô amyui nghut nghut, gotû amyui rajung jung nghut nghut lé za hô kat é ru nghut lhê. ³⁸ Nghut kôlhang, Garai Gasang gi, Yhang myit hpyit to bê eq rajung za haú lé gungdu ral-

† 15:27 Hkya-on 8:6 †† 15:32 Esai 22:13 ††† Dang ngho shí gi, a lumjínj bang taí é dang nghut lhê.

hum byi mù, kyôshi myui hkangmó lé, ó le ô é gungdu byi ri. ³⁹ Gungsho lhunglhang gi, rajung za a nghut. Byù pê é gungsho gi, rajung, dusak pê é gi, gó jung, nghoq pê é gi, gó jung, ngozo pê é gi, gó jung ru nghut lhê. ⁴⁰ Mauhkung gung pé le joq é nghut luí, myidam gung pé le joq ri; nghut kôlhang, mauhkung gung pê é shingkang gi, rajung, myidam gung pê é shingkang gi, gó jung ru nghut lhê. ⁴¹ Haû bui má bo é shingkang gi, rajung, lhamó mâ é gi, gó jung, kyí pé mâ é gi, gó jung ru nghut lhê; kyí racham eq rachâm é shingkang le gotú tû shai lhûm lhê.

⁴² Haû mù, shi byuq bê bang é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê. ⁴³ Hô hkyô kat é hkûn gi, aróng a bò, lhoq dui toq huí é hkûn gi, hpung-wup shingkang bo ri. Hô hkyô kat é hkûn gi, wum ny-hóm mù, lhoq dui toq huí é hkûn gi, a-tsam bo ri. ⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê. ⁴⁵ Haû nghut mù, "Haû sângh-hi yuq byù Adam gi, asak dui é xângzo dut bê nghut ri." † ga kê tô ri. Haû ló htâng é Adam kúm gi, asak byi é woi-nyí nghut ri. ††⁴⁶ Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haû sângh-hi yuq byù gi, myidam mâ é tseyûn lé saí é nghut mù, htang lhê yuq byù gi, mauhkung htoq mâ é nghut ri. ⁴⁸ Haû myidam byù nghut sù su, myidam eq sêng é bang le nghut nyi akô; haû mauhkung htoq mâ é byù nghut sù su, mauhkung eq sêng é bang le nghut nyi akô. ⁴⁹ Nga-nhúng gi, myidam byù é gunghkyâng isâm lé hkam yù bê nghut é su, mauhkung htoq mâ é byu é gunghkyâng isâm lé le myang hkam yù râ nghut lhê.

⁵⁰ Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut. ⁵¹ Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê. ⁵² Haû gi, ló htâng é tut htê mying é hkûn, ralhap za, myoqkuq ralap má dut râ nghut lhê. Hkâsu mù gâ le, tut htê mying râ nghut lhê, haú hkûn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê. ⁵³ Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê. ⁵⁴ Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng èq myui pyâm é hui bê nghut ri." ‡ ga kê tô é eq,

⁵⁵ "Shî-nò hkyô ê, náng é ûng budang gi, hkâmá lhú? Shî-nò hkyô ê, náng é nyin gi, hkâmá lhú?" †

gâ tô é sanghkyang gi, dik râ nghut lhê. ⁵⁶ Haû shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. ⁵⁷ Nghut kôlhang, Garai Gasang lé jeju hkyâ-ôn lhê! Yhang gi, nga-nhúng é Yhumsing Yesuq Hkrisduq đông mai, nga-nhúng lé ûng budang byi é nghut ri.

⁵⁸ Haû mù luí, ngá é chytđap gumang wui ê, yap gíngtíng nyi keq. Hai èq le, nungmoq lé hkâlhoq dui nún nhâng kó. Nungmoq gi, haû Yhumsing má nungmoq wùn waq é muzó akôm a nghut é lé sé kô é nghut lhê yanmai, haû Yhumsing é muzó lé ayang wùn waq shikut nyi keq.

Yerusalem Wà Mó Mâ É Lumjिंग Bâng É Matú Alu Hkyuí Râ Hkyô

16 Ahkuí, Garai Gasâng é byu pê é matú alu hkyuí râ hkyô eq séng luí gi, haû Galatiq mau mâ é no-kuq hpûng pé lé ngò kut nhang é su kut keq. ² Ngò jé lé é hkûn, alu hkyuí râ hkyô a kut ra râ đông, bat hkangmó mâ é sângh-hi nyí má, yuq hkangmó gi, yhumsing wó ho é má cháng mù, gam tô to lángh keq. ³ Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó má ê dé nhâng râ nghut lhê. ⁴ Ngò le ê ang râ dut é nghut jáng, yhangmoq gi, ngá é byinzùm kut râ nghut lhê.

Poluq Lum Kat É Hkyô Pé

⁵ Ngò gi, Makedoni mau laí byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laí byit râ za nghut lhê. ⁶ Ngò hkâmá ê kôlhang, ngá é hkyowui má nungmoq wó garúm kat kó râ matú, ngò gi, rayoq zo nghut nghut, gyoqmyò lhang lai shoq nghut nghut, nungmoq eq rahá nyi abe. ⁷ Ngò gi, laí ló uchyang za nungmoq lé lé kum râ nghut mù, ahkuí wó myâng râ lé a nau é nghut lhê; ngò gi, haû Yhumsing dóng é nghut jáng, nungmoq eq rahá rayoq nyi râ lé myit myoqbyu lhê. ⁸ Nghut kôlhang, ngò gi, Penteko-ti pói buinyi jé shoq Ehpesu myuq má nyi râ nghut lhê. ⁹ Haí mù gâ le, ngo lé htuq htíng é bang myo myo nyi é nghut kôlhang, akyû htoq é muzó é matú hkum mó ngo lé hpông to byi é yanmai nghut lhê.

¹⁰ Timohti jé lé jáng, yhang, nungmoq eq rahá nyi é u má, gyuq é hkyô haí le a joq râ matú wú byi keq; hkâsu mù gâ le, yhang gi, haû Yhumsing é muzó lé, ngò su wùn waq wún é sù nghut lhê. ¹¹ Haû mù, ó yuq le, yhang lé hkâwú shóm kó. Yhang gi, ngá chyáng wó dum taú jé sháng gaq, yhâng é hkyowui má nguingón é đông nhang kat keq. Haû gumang wui eq rahá lò kó râ lé, ngò myit lángh nyi lhê.

¹² Ahkuí, nga-nhúng é gumang Apolo é hkyô eq séng luí ga jang: yhang gi, haû gumang wui eq rahá nungmoq chyáng lé râ lé, ngò, gyai yhang wum taí tsuq lhê. Yhang kúm gi, ahkuí lé nau é myit a dê bò shi, nghut kôlhang, yuqyo é ahkying wó jáng, yhang lé lò râ nghut lhê.

† 15:45 Apûn 2:7 †† Ló htâng é Adam gi, Yesuq lé taí nau é nghut lhê. ‡ 15:54 Esai 25:8 †† 15:55 Hos 13:14

¹³ Machya nyî keq; lumjîng hkyô má ging ging tíng tíng yap nyî keq; gyuq kyum myit hkâbô kó; wum bo nyî keq. ¹⁴ Jung hkangmó lé, chyitdap myit eq zui saí keq.

¹⁵ Stehpana eq yhâng é yhumbyù wuì gi, Ahkaia ming má sâng-hi hpúng wâng bang nghut luí, yhangmoq gi, yhumsîng gùng lé, haû sâng-yúng bâng é dojaú hkyô má ap nóng bekô lé, nungmoq sê akô nghut ri. Gumang wuì ê, ngò, nungmoq lé wum taí tsuq kat kôlé, ¹⁶ haû sù é bâng é a-ô má le, haû muzó má bo wang lòm mù, mù zui shikut bang yuq hkangmó é a-ô má le, nyî keq. ¹⁷ Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haî mù gâ le, yhangmoq gi, nungmoq a kut byî é hkyô lé, lhoq pyíng byi bekô nghut ri. ¹⁸ Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haû sù é bang lé, hpautap nyî keq.

Ló Htâng É Shi-kyâm Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhûm má chôm huí é noqkuq hpúng lé, haû Yhumsîng má nungmoq lé gyai yhang shi-kyâm kat akô.

²⁰ Shí má nyi é gumang wuì banshoq bang gi, nungmoq lé shi-kyâm kat akô. Rayuq eq rayuq chyoiyúng é chytpuq èq shi-kyâm lhum keq.

²¹ Ngò, Poluq gi, shi-kyâm dang shî lé, ngá é loq èq yhang ká é nghut lhê.

²² Rayuq yuq, haû Yhumsîng lé a chyitdap é nghut jáng, haú yuq gi, nhîng pyâm é hui sháng gaq. Yhumsîng ê, jé lé aq hkoi!

²³ Haû Yhumsîng Yesuq é jeju gi, nungmoq eq rahá nghut nyî sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyî sháng gaq. Amen.

2 Korinhtuq

(2 Corinthians)

1 Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhông é gumang Timohti le kut, Korinhtuq myuq mâ é, Garai Gasâng é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê: ² Nga-nhông é Íwa nghut é Garai Gasang eq haû Yhumsíng Yesuq Hkrisduq chyáng mâ é jeju eq nguóngón hkyô gi, nungmoq chyáng ru joq nyí sháng gaq.

Nhik tíng hkyô banshoq é Garai Gasang

³ Nga-nhông é Yhumsíng Yesuq Hkrisduq é Yhângwa eq Garai Gasang, shogyo nhikmyin hkyo é Íwa eq nhik tíng hkyô banshoq é Garai Gasang gi, hkyo-on kung-ton é huí nyí sháng gaq. ⁴ Garai Gasâng chyáng mai ngamoq wó yù bê nghut é nhik tíng hkyo èq, hkasú é wuîhke hkyô hui bang lé le nga-nhông wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byí ri. ⁵ Hkâsu mù gà le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik tíng hkyô le byíng mui nyi é nghut lhê. ⁶ Ngamoq, myit myo uhkyí é huí é nghut jáng, nungmoq é nhik tíng hkyô eq hkyi yù hkyo é matú nghut nyi ri; ngamoq, nhik tíng é huí é nghut jáng, nungmoq é nhik tíng hkyo é matú nghut luí, haû gi, ngamoq jamjau é eq rajung za nghut é jamjau hkyô lé, myit hing é dông mai wó jân pyám rã a-tsam, nungmoq chyáng lhoq htoq byí é nghut lhê. ⁷ Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wui ê, Asia mau má, wuîhke jamjau é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lháng htum shoq hpuzô é nghut luí, ngamoq gi, asak duì lo rã lháng a myit myoqbyu lô é nghut lhê. ⁹ Gè gè yhang, ngamoq gi, sat hui berã nghû, ngamoq é i-myit má lumjíng pyâm é nghut lhê. Nghut kôlháng, haû gi, ngamoq gùng ngamoq a lumhkau é za, shí bê bang lé lhoq duì toq sù Garai Gasang lé lumhkaû rã matú dut é nghut lhê. ¹⁰ Garai Gasang gi, haû sù é shí rã hkyô mai hkyi yù bê nghut mù, ngamoq lé hkyi yù rã za nghut lhê. Yhang gi, ngamoq é matú nungmoq kyûdung byí nyi é u má, xoq luí ngamoq lé hkyi yù rã za nghut lhê nghû, ngamoq gi, Yhang lé myit myoqbyu to

bê nghut luí, ¹¹ myo myo kyûdung byí é lé gyo byí é má ngamoq shimân jeju wó mù, byù myo myo gi, ngamoq wó é shimân jeju é yanmai Garai Gasang lé jeju hkyo-on kó rã nghut lhê.

Poluq, Hen Tô É Muzó Htaí Pyâm É Lé Taí Hung É Hkyô

¹² Ngamoq nghutbùn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duì bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo èq, saksé hkám byí é hkyô nghut lhê. Ngamoq haû su kut é gi, mingkan hpaqchyí byéng-yá dông mai kut é a nghut é za, Garai Gasâng é jeju dông mai kut é ru nghut lhê. ¹³ Hkâsu mù gà le, ngamoq gi, nungmoq a dat nghap é eq a sê gyô é haí le a ká byí kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ra-am lé wó sê gyô yù bê eq rajung za, haû Yhumsíng Yesuq é buinyi má nungmoq é hkyô lé ngamoq nghutbun rã nghut é su, ngamoq é hkyô lé nungmoq wó nghutbun rã matú, nungmoq, banshoq lé sê gyo kó rã nghut lhê.

¹⁵ Haû hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi, nungmoq chyáng hí lé kum rã matú hen to bê nghut lhê. ¹⁶ Ngò gi, Makedoni mau shut e ló é hkyowuî má nungmoq lé hí lé kum mù, Makedoni mau mai nungmoq chyáng dum taû lò luí, Yuda mau shut e é hkyowuî má, nungmoq, ngo lé garúm kat kó rã lé myit lum to bê nghut lhê. ¹⁷ Ngò gi, haû hkyô hen é hkûn, agon za hen hkyut é nghut lhê lhú? Haû a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." nghu é wó taí rã matú, mingkan myit dông hen é nghut lhê lhú?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut. ¹⁹ Hkâsu mù gà le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasâng é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê. ²⁰ Hkâsu mù gà le, Garai Gasang gi, danggidiq hkâ-myhó to kôle, haû pé gi, Hkrisduq má "Nghut lhê" chyat nghut lhê. Haû mù, Garai Gasâng é hpungwup shingkâng é matú, Yhâng dông mai, nga-nhông gi, "Amen" nghû taí é nghut lhê. ²¹ Ngamoq eq nungmoq lé Hkrisduq

má yap gingtíng nhang é sũ gi, Garai Gasang nghut ri. Yhang gi, nga-nhúng lé masat é xũ but byi mù, ²²Yhang sing lhê gâ é dizik, nga-nhúng lé htũng tap byi luí, jé lô râ hkyô pé hkyak joq lhê nghu é masat zè dõng, Yhâng é Woi-nyí lé nga-nhúng é i-myt unghkaũ má kat byi bê nghut ri.

²³Ngò gi, nungmoq hkyamsa râ matú, Korinhtuq myuq má a dum taũ lé é hkyô têng é lé, ngá é saksé dut râ dõng Garai Gasang lé wut dũng lhê. ²⁴Haũ gi, nungmoq é lumjĩng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chõm zui saí é ru nghut lhê; haĩ mù gâ le, lumjĩng myit mai za nungmoq wó yap gĩng nyi bũm kô é ru nghut lhê.

2 Haũ mù luí, ngò gi, nungmoq lé myit nõ nhâng é dut râ dõng, lé dum kũm é a kut râ nghũ, myit hpyit to bê nghut lhê. ²Hkâsu mù gâ le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luí, ó yuq wá ngo lé wó gabú nhâng râ lhú? ³Ngò jé lé é hkũn, ngo lé gabú nhâng râ âng é bãng èq, ngo lé myit nõ nhang é a hui sháng gaq nghũ, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghũ, nungmoq banshoq bang lé ngò hkyak myit lum tô lhê. ⁴Hkâsu mù gâ le, ngò gi, nungmoq lé laiká kâ é hkũn, myit myo uhkýí mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haũ gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

Mara Hkyut Byí Lhum Râ Hkyô

⁵Yón kuq hkyô lhoq htoq é sũ gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haũ hkyô eq séng luí, ngò gyai wá yhang zuq zuq a taĩ nau é nghut lhê. ⁶Nungmoq myo hpyâng èq yhang lé mara dam byí é hkyô gi, yhâng é matú gé bê nghut ri. ⁷Nghut kõlhang, ahkuĩ, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik tíng byi keq. ⁸Haũ mù luí, nungmoq é chyitdap myit gi, yhang é ahtoq má dum lhoq gĩng shit nyí keq nghũ, nungmoq lé ngò wum taĩ tsuq kat lhê. ⁹Ngò, nungmoq lé haĩ mù laiká ká byí kat é hkyô gi, nungmoq chyam wú huĩ é hkyô lé wó jân é hkyô eq jung hkanmó má jino gyo hkyô bò a bo é lé, wó sé râ matú le nghut lhê. ¹⁰Nungmoq, rayuq yuq lé mara hkyut byí é nghut le gi, ngò le, haũ yuq lé mara hkyut byí lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ùng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê. ¹¹Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mã É Hpungmũ Wũn Bang

¹²Ngò gi, Hkrisduq é gabú danglũ hko kyo râ matú, Troa myuq má é jé é hkũn, haũ Yhumsĩng gi, ngo lé hkum hpóng byí é lé, ngò myang ri. ¹³Nghut kõlhang, ngò gi, ngá é gumang Tituq lé haũ má a myang ho é yanmai, myit myo mù, yhangmoq lé shi-kyãm to luí, Makedoni mau shut xoq e ló é nghut lhê.

¹⁴Nghut kõlhang, Hkrisduq má, ngamoq lé hkâ-nhám le ùng budang hkyô shut shuĩ-ũ yũ mù, Hkrisduq lé sê é sumsé hpaqchyí é nam ngón shõm lé, ngamoq dõng mai jowò hkanmó má taĩ pyo é sũ, Garai Gasang gi, jeju hkyo-õn é huĩ nyi sháng gaq. ¹⁵Hkâsu mù gâ le, ngamoq gi, hkyi yu é huĩ nyi bãng chyáng le, htên byoq ló é huĩ nyi bãng chyáng le, Garai Gasang é matú Hkrisduq é nam ngón shõm nghut nyi lhê. ¹⁶Ngamoq gi, htên byoq nyi bãng é matú shĩ-nò hkyo é shõm dut mù, hkyi yũ huĩ nyi bãng é matú nghut jáng, asak hkyo é nam ngón shõm dut é nghut lhê. Haũ mù, ó yuq wá muzó shĩ eq htuk râ lhú? ¹⁷Ngamoq gi, amy-at wó râ matú Garai Gasang é mungdang lé hkat ung zô é byũ myo myo su a nghut é za, Garai Gasang chyáng mai nhang é byu pé su, Garai Gasang é hí má, Hkrisduq é byu pé dõng lhumzui myit mai taĩ é nghut lhê.

3 Ngamoq gi, yhumsing gũng yhumsĩng dum owaq hi ló é nghut lhê lhú? Byũ ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? ²Nungmoq gũng yhang gi, ngamoq é myit nhiklum má kâ tô é, yuq hkanmó èq nghap luí sê yu é laiká gũng pé nghut akô. ³Nungmoq gi, nungmoq chyáng ngamoq hpungmũ wũn waq é yanmai, Hkrisduq chyáng mã é laiká nghut kô é hkyô lé shit nyi akô. Haũ gi, kâ jung chĩ èq kâ tô é dõng a nghut é za, rũ dui nyi é Garai Gasang é Woi-nyí èq kâ tô é nghut é htoq agó, luqlong pé má kâ tô é dõng a nghut é za, xângzo byu é myit nhiklum long pé má kâ tô é ru nghut lhê.

⁴Haũ su nghũ hkyak wó myit lum é hkyô gi, Garai Gasang é hí má, Hkrisduq dõng mai ngamoq wó yu é nghut lhê. ⁵Ngamoq gi, yhumsing gũng haĩ lé le wó kut lhê nghu é a nghut, ngamoq é a-tsam gi, Garai Gasang chyáng mai lo é nghut lhê. ⁶Yhang gi, ngamoq lé, dangshikaq asik lé wó wũn waq râ a-tsam byi bê nghut ri. Dangshikaq asik haũ gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shĩ dãm byi lhê, Woi-nyí kũm gi, asak byí é nghut lhê.

Dangshikaq Asik É Hpungwup Shingkang

⁷Ahkuĩ, haũ Mosheq é myoqdong mã é hpungwup shingkang é yanmai, haũ Israelaq byu pé gi, yhâng é myoqdong lé a wó wũ tsuq to kó nghut ri. Hpungwup shingkang haũ shũm lo byuq sê é nghut kõlhang, luqlong má dok kâ tô é, shĩ-nò hkyô lhoq htoq é tarâ muzó gi, hpungwup shingkang eq rahá jé lé é nghut

lhê. ⁸ Haû su nghut jáng, haû Woi-nyí é muzó gi, hpungwup shingkang je riyhang dut rá a nghut kó lhú? ⁹ Gè gè yhang, haû byù lé mara byí é tarâ muzó lháng, hpungwup shingkang bo é nghut le gi, dingmán nhang é hkyô sik gi, je riyhang hpungwup shingkang bo é nghut lhê ô! ¹⁰ Hkâsu mù gà le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri. ¹¹ Shum byuq ló é tarâ lháng gi, hpungwup shingkang eq rahá lé jé bê nghut le gi, ru gíng nyí é dangshikaq asik é hpungwup shingkang gi, je riyhang gyaú rá nghut lhê ô!

¹² Haû mù luí, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shúm byuq ló é hkûn, haû Israelaq byu pé haú lé a wú tsuq rá matú, yhang é myoqdong lé myoqgo eq nghop pyâm é sù nghut ri. ¹⁴ Nghut kôlháng, yhangmoq é myit gi, lhoq chut byí é hui bekô nghut ri; hkâsu mù gà le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nghut ri. Haû gi, huí sêng pyâm é a hui shí, haí mù gà le, Hkrisduq dông za haú lé wó yu pyâm é nghut lhê. ¹⁵ Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklum má myoqgò eq nghop tô é nghut ri. ¹⁶ Nghut kôlháng, ó yuq le, Yhumsíng chyáng hká u lhíng lò kôlháng, haú hkûn jáng, myoqgò gi, hí pyám byí é hui rá nghut lhê. ¹⁷ Yhumsíng gi, haû Woi-nyí nghut mù, Yhumsíng é Woi-nyí nyí é jowò má, luthkyô le joq lhê. ¹⁸ Haû Yhumsíng é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyí é hpungwup shingkang lhoq htoq byi hkyô nghut é, Yháng é isâm shut htaí lhik wang é huí nyí bê nghut lhê. Haú hkyô gi, haû Woi-nyí nghut sù Yhumsíng chyáng mai lo é nghut lhê.

Tseyam Pé Má Bo É Sutzè

4 Ngamoq gi, Garai Gasâng jeju mai muzó hkyô haú wó é nghut mù, myit wum a gyuí é nghut lhê. ² Ngamoq gi, zaú tô é eq hoq htoq é hkyô pé lé tô pyám luí, mhaú zô é hkyô le a kut, Garai Gasâng é mungdang lé le ahpúq alhik a kut é bang nghut lhê. Haû su kut rá malaí, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkangmó é myit sôn sê é hkyô má, yhumsíng gùng yhumsíng htuk shoq nyí lhê. ³ Ngamoq é gabú danglú gi, myoqgo eq nghop pyâm é huí é nghut jáng, haû gi, htên byoq nyí bang chyáng za nghop pyám huí é ru nghut lhê. ⁴ Haû Garai Gasâng é azòng isâm nghut sù, Hkrisduq é hpungwup shingkang bo é gabú danglú é maubó lé, a lumjíng bang a wó myâng kó sháng gaq ga, ipyat shi é garai † gi, yhangmoq é myit lé lhoq chit byi bê nghut ri. ⁵ Haû nghut é yanmai, ngamoq gi, yhumsíng gùng eq séng luí hko kyô é a

† Ipyat shi é garai gà é gi, Tsadán lé gà é nghut lhê.

nghut é za, Yesuq Hkrisduq gi, Yhumsíng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê!

⁶ Hkâsu mù gà le, "Mauchut hkaú mai maubó htoq lô sháng gaq." †† ga taí é Garai Gasâng gi, Yesuq Hkrisduq é myoqdong má é Garai Gasâng é hpungwup shingkang é maubó lé sê gyô é nyan lé, nga-nhúng lé byí é dông, Yháng é maubó lé, nga-nhúng é i-myt unghkaú má duqbó nhâng bê nghut ri.

⁷ Nghut kôlháng, ngamoq gi, sutzè haû bo é tseyam pé ‡ nghut nyí lhê. Haû gi, gyaú dik é a-tsam mó gi, ngamoq chyáng má é a nghut é za Garai Gasâng chyáng má é nghut é hkyô lé tûn shit rá matú nghut lhê. ⁸ Ngamoq gi, wuîhke hkyo eq lhíngkyuq mai gyai yhang nhê zik é hui kôlháng, a gyop byuq é nghut lhê; myit lhoq nhúng pyâm é hui kôlháng, myit a htûm byuq é nghut lhê; ⁹ zing-rí é hui kôlháng, kâng pyám huí é a nghut; bat lhêng pyâm é hui kôlháng, htên byoq huí é a nghut. ¹⁰ Haû Yesuq é asak duí hkyô le, ngamoq é gungdu má lhoq htoq shit é hui sháng gaq nghú, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wùn é nghut lhê. ¹¹ Hkâsu mù gà le, Yesuq é asak duí hkyô gi, nga-nhúng é shí sê é gungdu má lhoq htoq shit é hui sháng gaq nghú, asak duí nyí é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huí nyí ri. ¹² Haû mù luí, shi byuq hkyô gi, ngamoq má mù zuí nyí ri; asak duí hkyô kúm gi, nungmoq má mù zuí nyí é nghut ri.

¹³ "Ngò gi, lumjíng bê nghut lhê, haû mù, ngò taí é nghut lhê." †† ga kê tô é eq rajung za, ngamoq le, lumjíng hkyô hau eq yhang, lumjíng bê nghut mù taí é nghut lhê. ¹⁴ Haí mù gà le, haû Yhumsíng Yesuq lé shi é mai lhoq dui toq é Sù gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yháng é hí má shuí jé rá nghut é lé, ngamoq sê lhê. ¹⁵ Haû jeju wó é byu pé gi, je riyhang myô jat lò mù, Garai Gasâng é hpungwup shingkang é matú, jeju hkya-ôn é hkyô gi, byíng mui nyí sháng gaq ga, haú pé banshoq gi, nungmoq é akyu é matú nghut nyí ri.

¹⁶ Haû mù luí, ngamoq gi, myit wum a gyuí é nghut lhê. Ngamoq é shinggan gungdu gi, htên byoq ló nyí kôlháng, i-myt unghkaú gi, ra-nyí eq ra-nyí asik dut nhang é huí nyí ri. ¹⁷ Hkâsu mù gà le, ngamoq é tiq é eq razup zâ é wuîhke hkyô pé gi, ngamoq é matú haú pè htoq gyai hkik é ahtum abyuq é hpungwup shingkang lé, wó yú nhang ri. ¹⁸ Haû mù, nga-nhúng é myoq gi, byu-myang é lé wú tsuq nyí é a nghut é za, a byu-myang é lé sheq wú tsuq nyí é ru nghut lhê. Hkâsu mù gà le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

Mauhkúng Htoq Mã É Yhúm

5 Haû myidàm zúm nghut é nga-nhúng lúng nyí é gungdu gi, htên byoq sê é nghut kôlháng, byu loq eq saí é a nghut é za, mauhkúng htoq má joq é ahtum

†† 4:6 Apûn 1:3 ‡ Tseyam pé gà é gi, nga-nhúng é wum nyhôm é gungdu lé gà é nghut lhê. †† 4:13 Hkya-on 116:10

abyuq é yhûm † nghut é, Garai Gasâng chyáng mâ é yhûm lé, nga-nhúng wó é hkyô lé, nga-nhúng sê lhê. ² Nghut kôlhang, ahkuî, nga-nhúng gi, nga-nhúng é mauhkûng yhûm lé tû hut byî é lé gyai yhang hui naû mù, nò-kying su kyîng nyi lhê. ³ Haî mù gâ le, nga-nhúng gi, hut byî é hui jáng, gungdu a bò bang a dut lo râ nghut lhê. ⁴ Hkâsu mù gâ le, nga-nhúng gi, zúm shî má lúng nyi é u lé, wòlai wùn mù, nò-kying su kyîng nyi lhê; haû gi, shî byuq sê é lé, asak dui é èq wó htaî lhik pyám sháng gaq nghû, nga-nhúng gi, a hut byî é hui râ lé a ô nau é za, nga-nhúng é mauhkûng yhûm lé tû hut byî é hui râ lé ô nau é yanmai nghut lhê. ⁵ Ahkuî kúm, jeju haû hkam yù râ matú, nga-nhúng lé lajâng to byî é sù gi, Garai Gasang nghut mù, jé lô râ hkyô gi, hkyak joq lhê nghû é masat zè đông, nga-nhúng lé haû Woi-nyî byi bê nghut ri.

⁶ Haû mù luî, ngamoq gi, hkâ-nhám le hkyak lum tô lhê. Gungdu shî má yhûm đông ru lúng nyî nyî gi, haû Yhumsing eq wê gâng nyi ashî nghut é lé ngamoq sê nyi lhê. ⁷ Ngamoq gi, byu-myang é đông mai a nghut é za, lumjîng myit mai asak dui é ru nghut lhê. ⁸ Ngamoq gi, hkyak myit lum tô lhê nghû, ngò taî lhê, haû mù, gungdu shî mai wê gang luî, haû Yhumsing eq rahá nyi râ lé ngamoq je riyhang ô nau é nghut lhê. ⁹ Haû mù, ngamoq gi, gungdu shî má yhûm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng râ matú nghut lhê. ¹⁰ Hkâsu mù gâ le, yuq hkanmó gi, gungdu shî má yhûm đông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú, Hkrisduq é tarâ jéyáng tanghkuq hí má, nga-nhúng banshoq bang htoq shit ra râ nghut lhê.

Nguingón Hkyô Xoq É Muzó

¹¹ Haû mù, Yhumsing lé gyuq hkungga râ hkyô haî nghut é lé ngamoq sê é nghut luî, ngamoq gi, byu pé lé taî pún kyîng shikut lhê. Ngamoq haî nghut é gi, Garai Gasâng chyáng san za nghut nyî mù, nungmoq é myit sôn sê é hkyô má le san za nghut râ lé, ngò myit lum lhê. ¹² Haû myit nhiklum má bo é lé gumrông râ malaî, byu-myang é lé gumrong é bang lé, nungmoq wó tû taî kó sháng gaq nghû, ngamoq gi, nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byî é ru nghut lhê. ¹³ Ngamoq a gyîng é đông nghut le gi, Garai Gasâng é matú a gyîng é nghut lhê; ngamoq gyîng é đông nghut le gi, nungmoq é matú gyîng é nghut lhê. ¹⁴ Hkâsu mù gâ le, Hkrisduq é chyitdap myit èq ngamoq lé kut nhang nyi é nghut lhê. Haû gi, banshoq bang é matú rayuq shî hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lhê. ¹⁵ Yhang gi, asak dui nyi é bang, yhangmoq yhumsing gung é matú a duì lô é za, yhangmoq é matú shî

† Mauhkûng htoq má joq é ahtum abyuq é yhûm gâ é gi, nga-nhúng, mauhkûng mingdán má jé é hkûn wó râ gungdu asik lé gâ é nghut lhê.

hkám byi luî, lhoq dui toq é huí Su é matú duì kó sháng gaq ga, banshoq bang é matú shî hkám byi bê nghut ri.

¹⁶ Haû mù, ngamoq gi, ahkuî mai, ó yuq eq séng luî le, mingkan hkyam đông mai a wú lô é nghut lhê. Ngamoq gi, hí hkûn Hkrisduq lé haú đông wú é nghut kôlhang, haû su hkâ-nhám le a kut lô é nghut lhê. ¹⁷ Haû nghut mù luî, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haû axau gi, byuq byuq mù, lhunglhang asik dut bu-nhung! ¹⁸ Haû pé banshoq gi, Garai Gasâng chyáng mâ é chyat nghut lhê. Yhang gi, Hkrisduq đông mai nga-nhúng lé Yhànggùng eq nguingón hkyô xoq yù luî, nguingón hkyô xoq é muzó ngamoq lé byi bê nghut ri. ¹⁹ Haû gi, Garai Gasang gi, byu pé é mara lé a matsing byî é za, Hkrisduq đông mingkan lé Yhànggùng eq nguingón hkyô xoq yù bê nghut luî, Yhang gi, nguingón hkyô xoq yu é mungdang haû lé, ngamoq lé ap byî to bê nghû nau é nghut lhê. ²⁰ Haû mù luî, ngamoq gi, Hkrisduq é gunglik pé nghut lhê mù, Garai Gasang gi, ngamoq đông mai nungmoq lé lhoq pún kyîng nyi é nghut lhê. Garai Gasang eq nguingón hkyô xoq yù keq nghû, ngamoq gi, Hkrisduq é gunglik đông nungmoq lé dùng tôngbán nyi lhê. ²¹ Nga-nhúng gi, Hkrisduq đông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sù lé, nga-nhúng é matú yubak mara hkungga dut nhâng bê nghut ri.

6 Ngamoq gi, Garai Gasâng é mù zui byinzùm wui nghut nyi é eq rajung za, Garai Gasâng jeju lé akyú a bo é đông hkâhap yù kó nghû, nungmoq lé wum taî tsuq kat lhê. ² Hkâsu mù gâ le, "Ngò ô nau é ahkyíng má, nang lé ngò gyo byi bê nghut mù, hkyi yù hui râ buinyi má, nang lé ngò garúm bê nghut lhê." †† ga luî, Yhang taî ri. Ngò, nungmoq lé taî kyo kôlê, ahkuî gi, Garai Gasang ô nau é ahkyíng, ahkuî gi, hkyi yu é buinyi nghut ri.

Poluq É Wuîhke Hkyô Pé

³ Ngamoq é hpungmû gi, taî hpoî pyâm é a hui sháng gaq nghû, ngamoq gi, ó yuq é hkyô má le, leqbat jung a to byî é nghut lhê. ⁴ Haû kut râ malaî, ngamoq gi, Garai Gasâng é dui-nhâng zoshâng wui nghut é hkyô lé, hkyô hkanmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuîhke hkyô pé má le, myit myo uhkyi hkyô pé má le shit nyi lhê. ⁵ Nhuq bat huí é pé má le, htóng lhúng huí é eq toq gabyông é má htím é huí é má le, mù zui shikut é má le, a myang yhup é myín pé má le, zòmút huí é má le, shit nyi lhê. ⁶ Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyî eq chyitdap myit akying má le, ⁷ tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é laknak pé đông le, shit nyi lhê. ⁸ Hpungwup shing kang byî é hui kô é đông eq a hkunggâ é hui

†† 6:2 Esai 49:8

kô é đông nghut kôle, a ge é luhkyang eq ge é luhkyang taí kôle, shit nyi lhê. Ngamoq gi, tengmán kôlhang, mhaú zo bang đông sôn yu akô nghut ri. ⁹ Ngamoq lé sé kôlhang, a sê é đông kut akô nghut ri; shi ló nyi kôlhang, rû dui nyi é bang nghut lhê; nhuq bat é hui kôlhang, sat pyâm é a hui shî é bang nghut lhê. ¹⁰ Yón hkyô byíng nhâng kôlhang, hkâ-nhám le gabú nyi lhê; myùng kôlhang, byù myo myo lé wó sùt nhang nyi lhê; haí le a wó kôlhang, jung hkangmó lé sing é đông nghut lhê.

¹¹ Korinhtuq bang ê, ngamoq gi, nungmoq lé san za taí bê nghut luí, ngamoq é myit nhiklum lé, nungmoq é matú làm shoq hpông to byi bê nghut lhê. ¹² Ngamoq gi, ngamoq é chytđap myit lé, nungmoq chyáng mai lãng taú yu nyi é a nghut, nungmoq sheq, ngamoq chyáng mai lãng taú yu nyi kô é ru nghut lhê. ¹³ Nungmoq le, myit nhiklum lé làm shoq dum taú hpông keq nghû, ngò gi, ngá zô pé lé đông taí lhê.

A Lumjıng Bang Eq A Nhunghcut Râ Hkyô

¹⁴ A lumjıng bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haí sêng lhum lhê lhú? Maubó eq mauchut gi, hkâsu wó zùm yap kó râ lhú? ¹⁵ Hkrisduq eq Beliala † gi, hkâsu kut myit wó huí lhum kó râ lhú? Lumjıng sũ rayuq eq a lumjıng sũ gi, hkâsu wó pung lhum kó râ lhú?

¹⁶ Garai Gasâng é noqkuq yhũm eq hparâ lhô pé gi, hkâsu wó hũm râ lhú? Hkâsu mù gâ le, nga-nhúng gi, rû dui nyi é Garai Gasâng é noqkuq yhũm nghut lhê. Haũ gi, "Ngò gi, yhangmoq eq rahá nyi mù, yhangmoq chyáng sô nyi râ nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê." †† ga Garai Gasang taí tô é eq rajung za nghut ri.

¹⁷ "Haũ mù luí, yhangmoq chyáng mai htoq lô mù, gotũ san za nyi keq. A sansêng é zè lé hkâzang kó, haũ hkũn, Ngò, nungmoq lé lhom hap yù râ nghut lhê." † ga haũ Yhumsıng taí ri.

¹⁸ "Ngò gi, nungmoq é İwa dut mù, nungmoq gi, Ngá é byizo yuqzô pé dut kó râ nghut lhê." †† ga haũ wum-o a-tsam dik shoq bò Sũ Yhumsıng taí ri.

7 Chytđap é luzúm wuì ê, nga-nhúng gi, danggididq haũ pé lé wó tô é bang nghut é yanmai, gungdu eq woi-nyí lé agot a-ũ dut nhang é jung hkangmó mai, yhumsing gũng yhumsıng lhoq sãn-yũng yũ luí, Garai Gasang lé gyuq hkunggâ é myit èq chyoyıng hkyô má lhoq gumjup yu nyi sháng.

Poluq É Gabú Hkyô

² Nungmoq é i-myt unghkaũ má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaú zô wú é nghut lhê.

³ Ngò gi, nungmoq lé mara byi râ matú haũ su taí é a nghut. Ngamoq gi, asak ðui kôle, shî kôle, nungmoq eq rahá wó dut shoq, nungmoq gi, ngamoq é i-myt

unghkaũ má lúng nyi é nghut lhê nghũ, hí hkũn ngò taí wú bê nghut lhê. ⁴ Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byí é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

⁵ Hkâsu mù gâ le, ngamoq gi, Makedoni mau má jé é hkũn, ngamoq é gungdu gi, zim za a myang nyi é htoq agó, hkyô hkangmó má ngamoq wuĩhke jamjau hui zô é nghut lhê. Shinggan má gi, mabyoq htoq, ahkaũ má gi, gyuq kyum nyi é nghut lhê. ⁶ Nghut kôlhang, nhik ngê bang lé nhik tıng é Garai Gasang gi, Tituq lé jé lé nhang é đông mai, ngamoq lé nhik tıng byi bê nghut ri. ⁷ Yhang jé lé é đông mai za a nghut, yhang lé nungmoq nhik tıng byí é hkyô đông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bũn é hkyô, ngá é matú nungmoq gyai myit chiq byí é hkyô pé lé, ngamoq lé taí kyo bê nghut ri.

⁸ Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sãng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. ⁹ Nghut kôlhang, ngò gi, ahkuí gabú lhê; haũ gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lhıng nhang é yanmai ru nghut lhê. Nungmoq gi, Garai Gasang ô nau é đông yón huí é bang dut bekô nghut mù, nungmoq lé, ngamoq èq hai akyũ le a lhoq yôm byí é nghut lhê. ¹⁰ Hkâsu mù gâ le, Garai o é đông yón kuq huí é hkyô gi, nungngham wó hkyô a bo é za, hkyi yũ hkyô wó shoq, myit lhıng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. ¹¹ Garai o é đông, nungmoq chyáng akyũ lhoq htoq byí é yón kuq hkyô lé wú wú keq! Haũ gi, gyai yhang myit zuq é hkyô, yhumsing gũng mara a bo é lé tũn shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut râ rı rı nghut é hkyô pé nghut lhê. Nungmoq gi, haũ hkyô má mara a bo é lé hkat hkangmó má saksé tũn shit bekô nghut ri.

¹² Haũ mù luí, ngò, nungmoq lé kâ kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-ı ap nóng byí é hkyô lé, Garai Gasang hí má nungmoq gũng nungmoq wó myâng râ matú kâ kat é sheq ru nghut lhê. ¹³ Haũ pé banshoq đông mai, ngamoq gi, myit wum byí é huí ri.

Ngamoq myit wum byi huí é htoq agó, Tituq hkâ-ı yhang gabú é lé myàng mù, ngamoq gi, je riyhang myit gabú é nghut lhê. Haĩ mù yhang gabú é gâ lé, nungmoq banshoq bãng èq yhâng é myit lé lhoq nguıngón byi kô é yanmai nghut ri. ¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpũ é nghut lhê. Nungmoq lé ngamoq taí é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê.

† Beliala gâ é gi, Tsadán é myıng rajà nghut lhê. †† 6:16
Nhong 26:12; Yer 32:38; Ezk 37:27 † 6:17 Esai 52:11; Ezk 20:34,41
†† 6:18 2 Sam 7:14

¹⁵ Nungmoq banshoq bang jino gyo kômù, gyuq nán é myit mai yhang lé lhom hap yù kô é lé, yhang myitbùn é hkùn, yhang nungmoq lé chyitdap é myit gi, je riyhang kô dik nyi ri. ¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

Byí É Hkyô

8 Gumang wui ê, ahkuí, ngamoq gi, Makedoni mau mâ é noqkuq hpûng pé lé Garai Gasang byí é jeju eq sêng é hkyô, nungmoq lé sé nhâng nau ri. ² Yhangmoq gi, wuîhke jamjau hkyô myo myô èq chyam lik é huí é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri. ³ Hkâsu mù gà le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lhang byi kô é hkyô lé, ngò saksé hkâm lhê. Yhangmoq gi, yhangmoq é myit hkaú mai yhang haú su kut kô é nghut ri.

⁴ Yhangmoq gi, haú sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri. ⁵ Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é dông, yhangmoq gùng lé hí haú Yhumsing lé ap byí pyám kômù, hau htang sheq ngamoq lé ap kô é nghut ri. ⁶ Haú mù luí, Tituq yhang hí kut hi nyi bê nghut é yanmai, ngamoq gi, jeju haú lé nungmoq chyáng le shuí lhoq byíng jup byi râ matú, yhang lé wum byi bê nghut lhê. ⁷ Nungmoq gi, lumjíng myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekô eq rajung za, nungmoq gi, byí nau é jeju shí má le agùn agó dut râ lé, bûn nyi keq.

⁸ Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú naú luí sheq ru nghut lhê. ⁹ Hkâsu mù gà le, nungmoq gi, nga-nhông é Yhumsing Yesuq Hkrisduq é jeju lé sê akô nghut ri. Yhang gi, Yhông é myùng hkyô dông mai nungmoq wó bang dut kó sháng gaq ga, jung hkangmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyí byi kôlé: A-nhik, nungmoq gi, sâng-hi, byí hí kô é za a nghut, haú su kut nau é myit bo é bang le nghut akô. ¹¹ Nungmoq wó dut é eq rajung za, haú lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haú lhoq pán keq. ¹² Hkâsu mù gà le, byí nau é myit bo é nghut jáng, chyunghuq haú gi, yhang a wó é má cháng luí a nghut é za, yhang wó é má cháng luí, hap yú gíng é nghut lhê.

¹³ Nungmoq é matú gi, wòlai dut, góbang gi, hkyam-sâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê. ¹⁴ Nungmoq haí râ tô é lé, yhangmoq agùn agó wó é mâ é wó dum taú htuqbang byi kó sháng gaq, ahkui lhê é ahkýing má, yhangmoq haí râ tô é lé, nungmoq agùn agó wó é mâ

é htuqbang byi keq. Haú jáng sheq, wuí wuí za wó dut kó râ nghut lhê. ¹⁵ Haú gi, "Myo myo tsing yu é sù gi, lûm myo shoq wó é a nghut, shau za tsing yu é sù gi, lûm shau shoq wó é a nghut." † ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byí é eq rajung zâ é myit lé, Tituq é i-myt má kat byí é Garai Gasang lé, ngò jeju hkya-ôn lhê. ¹⁷ Hkâsu mù gà le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhânggùng yhang myit hpyit yú luí, nungmoq chyáng lé lô gù za nghut ri. ¹⁸ Ngamoq gi, haú gabú danglù lé dojaú é má noqkuq hpûng pé banshoq èq hkya-on huí é gumang hpó haú lé le, yhang eq rahá nhang kat lhê. ¹⁹ Hau htoq agó, ngamoq garúm râ myit bo nyi é hkyô lé tûn shit mù, haú Yhumsing lé hkungga râ matú ngamoq wú gôn nyi hkyô nghut é, alu lé ngamoq yu chung é hkùn, ngamoq é byinzùm kut râ matú, noqkuq hpûng pé èq hkyin yu é sù le yhang nghut lhê. ²⁰ Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq èq le mara hô râ hkyô a htoq shoq sidiq nyi lhê. ²¹ Hkâsu mù gà le, jô é hkyô kut râ matú ngamoq shikut nyi é gi, haú Yhumsing é myoq hí má za a nghut, byu pé é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotú gumang hpó lé le yhangnhik eq rahá nhang kat lhê. Yhang gi, ahkuí lhang, nungmoq lé gyai yhang myit lum tô é yanmai, shirông myit je riyhang bo nyi ri. ²³ Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhông é gumâng nhik é hkyô ga jáng, yhangnhik gi, noqkuq hpûng pé é gunglik eq Hkrisduq é aróng nghut akô. ²⁴ Haú mù luí, haú noqkuq hpûng pé wó myâng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haú bang lé tûn shit keq.

9 Ngò gi, haú sân-yúng bang lé htuqbang râ hkyô eq séng luí, nungmoq lé kâ kat râ a ra nghut ri. ² Hkâsu mù gà le, nungmoq gyai garúm nau é myit lé ngò sê lhê, haú mù, ngò gi, Makedoni mau bang lé, haú hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaú toq byi bê nghut ri.

³ Nghut kôlhang, shí hkyô má nungmoq eq séng luí ngamoq gumrong é gi, hká dông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wui lé nhang kat é nghut lhê. ⁴ Hkâsu mù gà le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a nghut, ngamoq le, nungmoq lé lûm yhang lum pyâm é

† 8:15 Htoq Ló 16:18

yanmai, hoq bo hpu râ nghut lhê. ⁵ Haû mù luî, nungmoq danggididq byî to bê nghut é, chyunghuq lé rago wó lajang pân to râ matú, gumang wuî lé wum taî tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haû hkûn sheq, a nau é đông byî é a nghut é za, byî nau é chyunghuq đông hen tô é dut râ nghut lhê.

Agùn Agó Byî É Hkyô

⁶ Shau za sân hkyô sù gi, shau za shû yù râ nghut mù, agùn agó sân hkyô sù gi, agùn agó shû yù râ nghut lhê gâ é dang lé, myitbûn nyi keq. ⁷ Yuq hkgangmó gi, a kâm byî é eq byî nhang é đông a nghut é za, yhumsing myit má byî nau é myhó lé myit hpyit yû mù byî é đông dut râ lhê. Hkâsu mù gâ le, Garai Gasang gi, gabú myit eq byi sù lé chyitdap ri. ⁸ Haû mù, ahkýing hkgangmó jung hkgangmó má, nungmoq râ é banshoq wó mù, ge é muzó hkgangmó lé nungmoq je myo wó kut kó sháng gaq ga, Garai Gasang gi, jeju lhunglhang lé, nungmoq lé wó byî é sù nghut lhê.

⁹ Haû gi,

"Yhang gi, a ha bûn é za myùng bang lé yhâng é chyunghuq tsing gâm byi bê nghut ri; Yhâng é dingmán hkyô gi, ahtum abyuq gîng nyi ri." † ga kê to eq rajung za nghut ri. ¹⁰ Kyô hkyô sù lé kyôshi, zoshuq matú muk byî é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyô é ashi lé myô lò nhâng râ nghut lhê. ¹¹ Nungmoq gi, ayoq abun hkgangmó má agùn agó byî é bang wó dut kó râ matú, hkyô hkgangmó má sùt wó é bang dut é hui kó râ nghut lhê. Nungmoq agùn agó byî é hkyô lé, ngamoq lhai byi mù, Garai Gasang lé jeju hkya-ôn é hkyô dut râ nghut lhê.

¹² Nungmoq dojaú é hkyô shî gi, Garai Gasang é byu pé râ é hkyô lé lajang byî é za a nghut, Garai Gasang lé jeju bûn é dang byíng mui nyi nhang é le nghut lhê.

¹³ Dojaú hkyô hau é yanmai, nungmoq lhumzui hkyô saksé tûn shit bekô nghut mù, byu pé gi, Hkrisduq é gabú danglù lé nungmoq yín yû luî jino gyo kê é yanmai le, yhangmoq eq yuq hkgangmó lé, nungmoq é a ha bûn é myit mai shuî gam chûng kê é yanmai le, Garai Gasang lé hkya-on kó râ nghut lhê. ¹⁴ Hau htoq agó, Garai Gasang gi, nungmoq lé jeju lai shoq byî tô é yanmai nungmoq é matú yhangmoq kyûdung byî é u má, yhangmoq é myit nhiklhum gi, nungmoq chyáng htoq jé râ nghut lhê. ¹⁵ A ung htoq taî é Garai Gasang é chyunghuq é yanmai, jeju hkya-on hkyô gi, Yhâng chyáng ru nghut nyi sháng gaq ô!

Poluq, Yhâng É Hpungmû Lé Taî Hung É Hkyô

10 Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wâm dut ri ga kê é sù, ngò Poluq gi, Hkrisduq é nûm é hkyô eq nú-nhâm é hkyô đông mai, nungmoq lé pying kat lhê. ² Shî mingkân é nyi yap a-tsang đông ngamoq asak dui ri ga myit ngam é byù ra-am lé, ngò

a gyuq a wam é myit lé shit râ dâ tô lhê. Ngò jé lé é hkûn, nungmoq lé haû sù é myit a shit ra sháng gaq, ngò nungmoq lé dúng tôngbán kat lhê. ³ Hkâsu mù gâ le, ngamoq gi, mingkan shî má asak dui nyi kôlhang mingkan byu pé kut é đông majan zân é a nghut. ⁴ Ngamoq majan zân é laknak gi, mingkan shi é laknak a nghut é za, shut shai é đông dang-rháng hkyô nghut é, gíngtíng é gyedap pé lé lhoq htên pyám râ matú Garaî é a-tsam byíng é laknak ru nghut lhê. ⁵ Ngamoq gi, dang-rháng rhâng lhûm é hkyô pé eq Garaî Gasang lé sê é hkyô lé shut shaî shoq yhumsing gùng yhumsing lhoq myhang mhaû é hkyô hkgangmó lé lhoq htên pyám mù, Hkrisduq é jino gyo râ matú, myit sôn é hkyô hkat hkgangmó lé shúm kut yu é nghut lhê.

⁶ Nungmoq é jino gyo hkyô gi, gumjup é hkûn, jino a gyô é hkyô hkgangmó lé ngamoq dam byi râ rì rì dut râ nghut lhê.

⁷ Nungmoq gi, ahtuq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq. ⁸ Hkâsu mù gâ le, nungmoq lé llang hkyô râ nó gi, nungmoq lé kê myhâng nhâng râ matú, ngamoq lé haû Yhumsing byî é ahko ahkáng lé gyai gumrong le lhang, ngò gi, hoq hpû é hui râ a nghut. ⁹ Ngò gi, ngá é laiká pê eq nungmoq lé kyuq é su a dut nhâng nau é nghut lhê. ¹⁰ Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhang, yhanggùng gi, byuwup a bo é nghut mù, yhang taî é dang pé gi, haî a nghut." ga taî akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saî râ nghut é hkyô lé, haû sù é bang sê gyo râ dut lhê.

¹² Ngamoq gi, haû yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whuî é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chîn lhûm wú é eq yhangmoq gùng yhangmoq whuî lhûm wú kê é hkûn, hpaqchyî a bo é bang dut bekô nghut ri.

¹³ Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byî é, nungmoq chyáng lhang hkyit jé shoq nghut é maukyo hkaû má za gumrông râ nghut lhê. ¹⁴ Ngamoq gi, nungmoq chyáng a jé lé wú é đông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lhang lé jé bê nghut lhê. ¹⁵ Dum, ngamoq gi, góbang kut é muzó lé le, âng é mai lai luî gumrong lhai é a nghut. Ngamoq myoqbyu é hkyô gi, nungmoq é lumjíng myit kê myhang jat nyi jáng sheq, nungmoq chyáng ngamoq zui saî é jowò gyai wó lhoq lâm râ nghut lhê. ¹⁶ Haû gi, nungmoq é mau lhang lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq eq zui saî to bê loqzó eq séng luî, gumrông nau é a nghut. ¹⁷ Nghut kôlhang, "Gumrong é sù gi, haû Yhumsing má gumrông sháng gaq." †† ga kê tô ri. ¹⁸ Hkâsu mù gâ le,

† 9:9 Hkya-on 112:9

yhumsing gùng yhumsing owaq é sù gi, hap yù huí é a nghut é za, haù Yhumsing eq owaq byí é sù sheq, hap yù huí é ru nghut lhê.

Lagyo Apyoq Pé Eq Poluq

11 Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haù su kut nyí gù nghut bekô.
² Haù mù gà le, ngò gi, Garai Gasang mai nungmoq lé magum é myit eq, nungmoq é matú magùm byí lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghù, Hkrisduq nghut é yhumsing hpô chyáng za nungmoq lé byi zo râ nghù, danggidiq byí to bê nghut lhê.
³ Nghut kôlhang, Ewaq gi, lhangmuì hpaqchyí dâ é eq mhaù zô é huí é su, nungmoq myit é hkyô pé gi, Hkrisduq chyáng nungmoq é lhumzuí é eq sansêng é i-myt ap nóng é hkyô mai shuí ngoq ló byuq é hui râ lé, ngò myit chiq ri.
⁴ Hkâsu mù gà le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haù lé lui lui za lhom hap yu é dut bekô nghut ri.
⁵ Nghut kôlhang, ngò gi, "Ahkyak-lagyô pé" ga bâng é htoq má ratsuí lháng gyamgyi gyó sù a nghut nghù myit ngam é nghut lhê.
⁶ Ngò gi, dang taí hpaqchyí kung sù rayuq a nghut kôlhang, sumsé hpaqchyí bò sù nghut lhê. Ngamoq gi, hkyô hkanmó má, nungmoq lé haù hkyô hkyâng shoq sé nhâng bê nghut lhê.
⁷ Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lhú?
⁸ Ngò, nungmoq lé dojaù râ matú, gotù noqkuq hpùng pé mai htuqbâng é lé hap yu é gi, haù bâng chyáng mai ngò zik lú yu é đông dut bê nghut lhê.
⁹ Ngò gi, nungmoq eq rahá nyi mù, rajung jung râ é hkûn, ó yuq lé le wòlai a dut nhang é nghut lhê; hkâsu mù gà le, Makedoni mau mai lé jé é gumang wui gi, ngò haù râ é lé htuqbang byi kô é yanmai nghut lhê. Hká đông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xoq luí le haù đông kut nyí râ nghut lhê.
¹⁰ Haù Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mà é bang ó yuq lháng, ngò haù su gumrong é hkyô lé wó hkûm zing râ a nghut.
¹¹ Haù mù lhú? Ngò, nungmoq lé a chyt-dap é yanmai nghut lhê lhú? Ngò, nungmoq lé chyt-dap é hkyô lé, Garai Gasang sê lhê.
¹² Ngò gi, yhangmoq zui saí é lé gumrong é hkyô pé má ngamoq eq rawú za són byi râ ahko ahkáng ô nau é bang lé ahkáng a byi râ matú, ngò kut nyi é su xoq luí kut shi râ nghut lhê.

¹³ Hkâsu mù gà le, haù sù é bang gi, lagyo apyoq pé, mhaù zô é mù zui bang, Hkrisduq é lagyo pé đông kut mhaù é bang nghut akô.
¹⁴ Haù gi, maù ra hkyô a joq,

hkâsu mù gà le, Tsadán lháng gi, maubó é maumang lagyo rayuq đông kut mhaù é sù nghut lhê.
¹⁵ Haù mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaù é nghut jáng, maù dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

Yhâng É Wuñke Jamjau Hkyô Eq Séng Luí, Poluq Gumrong É Hkyô

¹⁶ Ngò puq taí kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrong sháng gaq, byù gò lé nungmoq hap yu é su, ngo lé hap yù kó laq.
¹⁷ Ngò, haù su gumrong é hkyô gi, haù Yhumsing o é đông ngò taí nyi é a nghut, byù gò rayuq đông taí nyi é ru nghut lhê.
¹⁸ Byù myo myo gi, mingkân é hkyô đông gumrong nyi bum lhê nghut mù, ngò le gumrong râ nghut lhê.
¹⁹ Nungmoq gi, hpaqchyí lúm bo kô é nghut mù, byù go pé lé gabú myit eq jân nyi akô nhung!
²⁰ Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyù hô zô yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri.
²¹ Ngamoq gi, nungmoq lé haù hkyô kut râ má wum gyai nyhôm lhê nghù yín yù râ lé, ngò, hoq ri!

Rayuq yuq, haù lé wám gumrong é nghut jáng, ngò le, haù lé wám gumrong lhê nghù, byù gò rayuq đông ngò taí nyi é nghut lhê.
²² Yhangmoq gi, Hebre byu pé nghut akô lhú? Ngò le nghut lhê. Yhangmoq gi, Israe-laq byu pé nghut akô lhú? Ngò le nghut lhê. Yhangmoq gi, Abraham é awut ashin pé nghut akô lhú? Ngò le nghut lhê.
²³ Yhangmoq gi, Hkrisduq é dui-nhâng zoshâng wui nghut akô lhú? (Ngò gi, myit a gyíng é sù đông haù su taí é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shi râ í é adàm dàm huí wú bê nghut lhê.
²⁴ Ngò gi, Yudaq byu pé nuichum eq bat é myi xê dàm byíng râ radàm ra ra dut é, ngo lhing hui zô wú é nghut lhê.
²⁵ Ngò gi, dumbáng eq nhuq huí é sum dàm, shi sháng gaq ga luqgok eq dú huí é radàm, wui-sanghpo byoq huí é sum dàm, wuimau má myù byôm é ra-nyí ra-myìn hui zô wú bê nghut lhê.
²⁶ Ngò gi, xoq xoq hkyowui htoq e ló é hkûn, wui gù é gyuq chiq jung, damyaq huí é gyuq chiq jung, ngá é amyù wui chyáng mà é gyuq chiq jung, tûngbaù pé chyáng mà é gyuq chiq jung, myuq hkaù pé mà é gyuq chiq jung, yoso pé mà é gyuq chiq jung, wuimau mà é gyuq chiq jung eq gumang apyoq pé chyáng mà é gyuq chiq jung pé hui zô wú bê nghut lhê.
²⁷ Ngò gi, mù lé zui ngú zui hkyik mù, anum num a myang yhap shoq dut wú bê nghut lhê. Ngò gi, zòmút wui shit huí é eq zoshuq a wó é anum num huí laí lo wú bê nghut lhê. Ngò gi, gyoq hpù é eq gùngchîn dut é huí wú bê nghut lhê.
²⁸ Haù pé lhunglhâng htoq má, noqkuq hpùng pé banshoq é matú ngò myit chiq byí é hkyô gi, nyí wui ngò má wòlai dut nyi ri.
²⁹ Rayuq yuq wum ny-

hóm le, ngò le wum a nyhóm rã lhú? Rayuq yuq mara shuí kut shut é hui le, ngò myit a nyé rã lhú?

³⁰ Ngò gumrông rã dut é nghut le gi, ngò wum nyhóm é hkyô lé tũn shit é pé lé gumrông rã nghut lhê. ³¹ Ngò a mhaũ nyi é hkyô lé pyat dedu hkya-on huĩ é sũ, haũ Yhumsing Yesuq é Íwa eq Garai Gasang sê lhê. ³² Damaskuq myuq má, Hkohkãm Areta é a-ô mã é mauzau gi, ngo lé chyup rã matú, myuq lé zúng nhang é nghut lhê. ³³ Nghut kôlhang, ngò gi, manghkoq má lúng mù, myuq xêwãm mã é hkehót dong mai lhoq hkyô kat é hui luĩ, yhang é loq mai wó lut é nghut lhê.

Poluq É Myoqwup Shing-rán Pé

12 Ngò gi, rũ gumrông nyi rã za nghut lhê. Akyũ wó rã a nghut kôlhang, haũ Yhumsing chyáng mai lo é myoqwup shing-rán pé eq hpông shit é shing-rán pé lé gumrông rã nghut lhê. ² Ngò gi, lai lò bê raxe myi zãn hkũn, mauhkũng sum tsáng nghu é má shuí toq yu huĩ é, Hkrisduq mã é byũ rayuq † é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³ Yhang hparadisu má shuí toq yũ huĩ é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴ Yhang gi, byu pé taĩ kyô htoq rã ahkáng a wó é hkyô pé nghut é, a wó taĩ sãn kyô é hkyô pé lé wó gyô ri. ⁵ Ngò gi, haũ yuq sũ é byu é hkyô eq séng luĩ gumrông rã nghut lhê; nghut kôlhang, ngò gi, ngá é wum nyhóm hkyô eq séng luĩ, gumrông é mai lai luĩ, ngá gũng ngò gumrông rã a nghut. ⁶ Ngò gi, gumrông hkyô lé hkyin yũ rã dut é nghut jáng lháng, byũ gò dut rã a nghut, haũ mù gã le, ngò gi, tengmán hkyô taĩ nyi rã nghut lhê. Nghut kôlhang, ó yuq le, ngò kut é eq ngò taĩ é mai myit lum to kô é htoq má, ngo lé, je a myit lo ko sháng gaq nghũ, ngò a gumrông kut pyãm nyi lhê. ⁷ Haũ laklaĩ dik é dong ngo lé hpông shit é shing-rán mó pé é yanmai, ngò a nghutbũn byuq sháng gaq ga, ngo lé gunjang rã matú, Tsadán é lagyo nghut é zu lé, ngá é gungsho má kat byĩ to bê nghut ri. ⁸ Haũ lé ngá chyáng mai yu pyãm byi rã matú, ngò, Yhumsing lé sum dãm dũng tũngbán wũ bê nghut lhê. ⁹ Nghut kôlhang, Yhang gi, "Ngá é jeju gi, náng é matú luq dun é nghut lhê; hkãsu mù gã le, Ngá é a-tsam gi, wum nyhóm é hkyô má lhoq gumjup é hui ri." ga luĩ, ngo lé taĩ ri. Haũ mù luĩ, Hkrisduq é a-tsam gi, ngò má wó joq nyi sháng gaq nghũ, ngò gi, ngá é wum nyhóm é hkyô pé eq séng luĩ, gabú myit mai je riyhang gumrông rã nghut lhê. ¹⁰ Haũ nghut mù luĩ, ngò gi, Hkrisduq é yanmai, wum nyhóm é hkyô pé má le, rhoĩ huĩ é hkyô pé má le, wuĩhke jamjau huĩ é hkyô pé má le, zing-ri huĩ é hkyô pé má le, awui ahke dut é hkyô pé má le, gabú nhik dik nyi lhê. Hkãsu mù gã le, ngò wum nyhóm é hkũn sheq, ngò wúm bo é nghut lhê.

Poluq Chiq Byĩ É Hkyô

¹¹ Ngò gi, ngá gũng ngò byũ gò lhoq kut yũ bê nghut ri, nghut kôlhang, haũ gi, nungmoq kut nhang é nghut lhê. Ngò gi, nungmoq eq owaq é hui ang sũ nghut lhê; hkãsu mù gã le, ngò gi, haũ a nghut kôlhang, "Ahkyak lagyô pé" ga bãng é htoq má ratsuí lháng gyamgyi gyó sũ a nghut. ¹² Lagyo rayuq é masat kumlhá nghut é, kumlhá pé, mauhpo muzó pé eq laklaĩ kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³ Ngò gi, nungmoq é matú, hkã-nhãm le wòlai a dut é nhĩng, nungmoq gi, hkãsu mù, gotũ no-kuq hpũng pé htoq má gyamgyi gyó nyi akò lhú? Ngò, haũ hkyô má shut é nghut jáng, mara hkyut pyãm byi kó laq!

¹⁴ Ahkuĩ, ngò gi, nungmoq lé, sum lhĩng nghũ rã dãm, lé kum rã rĩ rĩ nghut bê mù, nungmoq é matú wòlai gi, a dut rã nghut lhê. Haũ mù gã le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká dong nghut kôle, zo wuĩ gi, mó wui é matú sutzè hkong to byi rã dut é a nghut, mó wuĩ sheq, zô wuĩ é matú hkong to byi rã dut é nghut lhê. ¹⁵ Haũ mù luĩ, ngò gi, gyai yhang gabú é myit mai, ngò wó é jung hkangmó lé nungmoq é matú chung jai rã nghut mù, ngá gũng lé lháng chũng jai rã nghut lhê. Ngò, nungmoq lé myô chyitdap é yanmai, nungmoq gi, ngo lé shaũ chyitdap kó rã lhú? ¹⁶ Ngò gi, nungmoq chyáng wòlai a dut é hkyô tẽng lhê. Nghut kôlhang, ngò gi, hpaqchyĩ haq da sũ dut mù, mhaũ lhik é dong nungmoq lé chyup yũ sũ dut byuq bê ga nungmoq ra-am myit akò myhi-nhung! ¹⁷ Ngò gi, nungmoq chyáng nhang kat byĩ é byũ dong, nungmoq chyáng amyat kut zô yũ bê nghut lhê lhú? ¹⁸ Ngò gi, Tituq lé nungmoq chyáng lé rã matú wum taĩ tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lhú? Nga-nhik gi, rajung zã é myit dong chy-at kut mù, rajung zã é hkyô lé chyat chãng é su nhik nghut lhê, a nghut kó lhú?

¹⁹ Ngamoq gi, nungmoq hí má ngamoq gũng ngamoq taĩ hung yu nyi ri nghũ, ahkuĩ jé shoq myit nyi akò lhú? Ngamoq gi, Hkrisduq mã é byu pé dong, Garai Gasang hí má taĩ nyi é nghut lhê. Chyitdap é gumang wuĩ ê, ngamoq kut é jung hkangmó gi, nungmoq é akyu matú chyat nghut lhê. ²⁰ Hkãsu mù gã le, ngo lé jé é hkũn, ngò, nungmoq lé dut nhãng nau é su, nungmoq a wó dut kó rã eq, nungmoq, ngo lé dut nhãng nau é su, ngò a wó dut rã lé, ngò myit gyuq ri. Ngò gi, mabyoq jishũm htoq é, manon é, nhik-ũn buq é, byũ hpũng gam é, gansang é, lumu é, gyai nghutbũn é eq atau ahũ dut é hkyô pé joq rã lé gyuq ri. ²¹ Ngò dum lé jé é hkũn, ngá é Garai Gasang gi, nungmoq é hí má ngo lé myit nyhũm nhãng mù, yhangmoq ô nau é myit chãng é má shut é dong nyi zô lhũm nau é i-myit, gungsho zũm yap é yubak mara eq a sãn-yũng é hkyô kut shut é mai myit a lhĩng bang myo myô é yanmai, yón kuq é hui zo rã lé, ngò myit chiq ri.

† Hkrisduq mã é byũ rayuq gã é gi, Poluq yhanggũng yhang lé taĩ nyi é nghut lhê.

Ló Htáng Má Sidiq Byí É Dang Pé

13 Ahkuí, ngò, nungmoq chyáng lé kum râ gi, sum lhing nghû râ dàm nghut lhê. Haû gi, "Mara hun é hkyô hkgámó lé, í yuq sum yuq saksé hkâm é èq lhoq teng ra râ nghut lhê." † ga kê tô é eq rajung za nghut lhê. ² Ngò gi, í lhing nghû râ dàm nungmoq eq rahá nyi é hkûn, nungmoq lé sidiq byi gû bê nghut lhê. Ahkuí le, nungmoq eq wê gâng tô é u lé, dum taí kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê. ³ Haû gi, ngò đông mai Hkrisduq dang taí nyi é hkyô saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuí-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri. ⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm èq dui nyi é gi, hkyak têng lhê. Haû eq rajung za, ngamoq gi, Yhang su wum nyhôm kôlhang, nungmoq lé dojaú râ matú, Garai Gasâng é a-tsâm èq, Yhang eq rahá dui nyi râ nghut lhê.

⁵ Nungmoq gi, lumjín hkyô má nghut nyi lhê luq, yhumsing gùng yhumsing myí wú keq. Yhumsing gùng yhumsing chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyí bê hkyô lé sé kó râ nghut lhê. ⁶ Ngamoq gi, chyam é má a sùm é hkyô lé, nungmoq wó sé kó râ nghut lhê nghû, ngò hkyak lum tô lhê.

⁷ Ahkuí, ngamoq gi, nungmoq shut é hkyô haí a kut kó

† 13:1 Tarâ Pun 19:15

râ matú, Garai Gasâng chyáng kyúdung byi lhê. Haû gi, ngamoq chyâm hui luí wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lhê. ⁸ Hkâsu mù gâ le, ngamoq gi, haû tengmán hkyô eq shaí é đông haí le a ge kut é za, tengmán hkyô é matú za kut râ dut é nghut lhê. ⁹ Ngamoq wum nyhôm kôlhang, nungmoq wúm bo é hkûn, ngamoq gabú é nghut lhê; ngamoq kyúdung é gi, nungmoq gumjup râ matú nghut lhê. ¹⁰ Ngò gi, wê gâng tô é hkûn, haú hkyô pé lé haí mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsing ngo lé byí é sheq ru nghut lhê.

Ló Htâng É Shi-kyám Dang

¹¹ Ló htáng má ngò taí nau é gi, gumang wui ê, ngu-ingón yuqyo nyi keq. Gumjup hkyô shut sô nyi keq, ngò dúng tôngbán é dang lé gyo keq, myit rahkat za dut nyi keq, ngu-ingón shoq asak dui nyi keq. Haú hkûn, chyitdap hkyô eq ngu-ingón hkyô é Garai Gasang gi, nungmoq eq rahá nyi nyi râ nghut lhê.

¹² Chyoiyúng é bopuq puq é èq, rayuq eq rayuq shi-kyâm lhum keq. ¹³ Sân-yúng bang banshoq gi, nungmoq lé shi-kyâm kat akô.

¹⁴ Haû Yhumsing Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bang chyáng ru joq nyí sháng gaq ô.

Galatiq

(Galatians)

1 Byu pê chyáng mai le a nghut, ó yuq èq nhang é le a nghut e za, haû Yesuq Hkrisduq lé shî bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi, ² ngò eq rahá nyi é gumang wui ban-shoq bang le mù, Galatiq mau mà é noqkuq hpúng pê chyáng dang kyô kat lhê.

³ Nga-nhông é Íwa Garai Gasang eq Yhumsing Yesuq Hkrisduq chyáng mà é, jeju eq nguingón hkyô gi, nungmoq chyáng ru joq nyí sháng gaq ô. ⁴ Haû Hkrisduq gi, nga-nhông é Íwa Garai Gasang ô nau é eq rajung za, agè ashop é ipyat shî mai, nga-nhông lé xe yù rà ga, nga-nhông é yubak marâ é matú yhanggung lé Yhang byí pyám bê nghut ri. ⁵ Haû hpungwup shing kang gi, Garai Gasang chyáng pyat dedu ahtum abyuq ru joq nyí sháng gaq ô. Amen.

Gotû Gabú Danglù A Joq É Hkyô

⁶ Ngò gi, haû Hkrisduq é jeju mai nungmoq lé ji yù Sù lé, nungmoq haû-í han kâng pyám to kôluí, shaí é gabú danglù shut lhing ló nyí kô é hkyô lé, gyai yhang maú nyi ri. ⁷ Danglù haû gi, gabú danglù ratsuí lhang a nghut. Byù ra-am mai nungmoq lé lhoq shuk byi luí, haû Hkrisduq é gabú danglù lé, shikut luí lhoq shai nhang pyám nyi kô é hkyô za nghut lhê. ⁸ Nghut kôlhang, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkung htoq mà é maumang lagyo rayuq nghut nghut, shaí é gabú danglù, nungmoq lé hko kyô é nghut jáng, haú yuq gi, ahtum abyuq dam byí é hui zo sháng gaq ô! ⁹ Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotû hko nyi e nghut jáng, haú yuq gi, ahtum abyuq dam byí é hui zo sháng gaq ô!

¹⁰ Haû su nghu taí é gi, ahkuí, ngò, byù é hí má myoqdong wó rà matú shikut nyi é nghut lhê lhú? Haû a nghut jáng, Garai Gasang é hí má myoqdong wó rà matú shikut nyi é nghut lhê lhú? Byù lé gabú nhâng rà matú, ngò shikut nyi é nghut lhê lhú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut rà a nghut.

Poluq Lé, Garai Gasang Ji Yu É Hkyô

¹¹ Gumang wui ê, ngò hko kyô é gabú danglù haû gi, byu èq kut htoq é hkyô a nghut é lé, ngò, nungmoq lé sé nhâng nau ri. ¹² Ngò gi, haû lé, byu chyáng mai wó yu é le a nghut, góyuq èq mhoq byí é le a nghut e za,

Yesuq Hkrisduq èq shing-rán byí é đồng wó hap yu é ru nghut lhê.

¹³ Ngò, Yudaq noqkuq htông má nghut nyi ashî hkûn, Garai Gasang é noqkuq hpúng lé ladu lai shoq hkâsu kut zing-ri luí, haû lé lhoq htên shikut wún é, ngá é hí hpyang lhê é asak dui hkyô lé, nungmoq wó gyô wú bekô rà nghut lhê. ¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htông lé je cháng sù nghut é htoq agó, ngá é íchyí íwa pé é htôngli lé ladu lai shoq myit zing zuq sù nghut lhê. ¹⁵ Nghut kôlhang, ngá nû é unghkaû mai yhang hkyin to luí, Yhang é jeju yanmai ngo lé ji yu é Garai Gasang gi, ¹⁶ haû Yhang Zô é hkyô gabú danglù lé, ngò mai tungbaù pê chyáng hko kyo sháng gaq ga, Yhang Zo lé ngá chyáng htoq shit nhâng rà matú myit hpyit yu é hkûn, ngò gi, ó yuq eq le a hpyê yù, ¹⁷ Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut é luí, Damaskuq myuq má dum taù ló bê nghut lhê.

¹⁸ Sum zân lai é htông má, ngò gi, Yerusalem wà mó má doq ló mù, Petruq † lé ló huí luí, yhang eq raxe ngo nyí, ló nyi nyi é nghut lhê. ¹⁹ Haû má, Yhumsing é yhanggu Yakuq mai lai luí, lagyo góbang lé ngò a myàng nghut ri. ²⁰ Nungmoq lé ngò ká byí kat é má, mhaú é hkyô a bò nghu luí, Garai Gasang hí má, hkyak, ngò taí lhê. ²¹ Hau htông má, ngò gi, Suriq mau eq Kiliki mau má ê jé é nghut lhê. ²² Haú hkûn, haû Hkrisduq má nghut é, Yuda mau mà é noqkuq hpúng byù wui gi, ngo lé myoqno a shú kó nghut ri. ²³ Yhangmoq gi, "Hí hkûn, nga-nhông lé zing-ri sù gi, yhang mai lhoq hten rà matú radàm shikut wú é lumjing hkyô haû lé, ahkuí hko nyi ri." gâ é hkyanglù lé wó gyô wú kôluí za, ²⁴ ngá é yanmai, Garai Gasang lé hkyá-ôn bum akô nghut ri.

Poluq Lé Lagyô Pé Lhom Hap Yu É Hkyô

2 Raxe myi zân lai é htông má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê. ² Garai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghu, tungbaù pê chyáng ngò hko kyô nyi é gabú danglù lé, haû suwún dut bang é hí má za shap kyô é nghut lhê. ³ Nghut kôlhang, ngò eq rahá nghut é Tituq gi, Grik byù nghut kôle, yhang lé ahpyo-kuq a hpyit nhâng kó nghut ri. ⁴ Haû hkaû wang lo é mhaú é gu-

† Petruq lé Kehpa le gâ lhê.

mang wuì gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng rã dâ kô é yanmai, haú hkyô gabyông htoq lo é nghut ri. ¹⁵ Nghut kôlhâng, haú gabú danglu é tengmán hkyô gi, nungmoq chyáng joq gîng nyi sháng gaq nghû, razup za lhâng, yhangmoq é dang lé ngamoq gyo byí é a nghut.

⁶ Ahkyak é byù su dut é bang gi, yhangmoq hái jung kut kôlhâng, ngò eq a séng nghut ri; Garai Gasang gi, du lé wú mù jéyáng é sũ a nghut; byù haú bang gi, ngá é mungdang má haí le a jat kat e za, ⁷ Petruq gi, Yudaq byu pé † lé, haú gabú danglù hko kyo rã mù má lum tô é hui bê eq rajung za, ngò gi, tûngbaù pé † lé, haú gabú danglù hko kyo rã mù má lum tô é hui bê hkyô lé za, yhangmoq myang akô nghut ri. ⁸ Hkâsu mù gà le, Yudaq byu pé é matú Petruq lé lagyo ayá dáng byí é sũ Garai Gasang gi, tûngbaù pé matú ngo lé le lagyo ayá dáng byi bê nghut lhê. ⁹ Haú hkungmó-zîng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gà é loqyo loq eq shi-kyâm yù kôluí, yhangmoq gi, Yudaq byu pé shut, ngá-nhik lé gi, tûngbaù pé shut é rã lhê ga, myit hui bekô nghut ri. ¹⁰ Yhangmoq gi, ngá-nhik mai myùng bang lé ru bún nyi rã matú za pying kat akô; haú gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku wà mó má Petruq jé lé é hkûn, yhang lé mara hûn rã hkyô joq é yanmai, ngò gi, byu hí má yhang, yhang lé lhom htuq htîng é nghut lhê. ¹² Hkâsu mù gà le, Yakuq chyáng mai lé é bang a jé shi é u lé, yhang gi, tûngbaù pé eq rahá chôm zo chôm shuq lhaq kut ri. Nghut kôlhâng, haú bang jé é hkûn, yhang gi, ahpyo-kuq hpyit rã lhê gà é hpúng má lom é bang lé gyuq é yanmai, tûngbaù pé chyáng mai htoq gang luí, yhang baú nyi tô ri. ¹³ Yhang, gegùn labyoq kut é hkyô má, gotû Yudaq byu pé le bo châng kut akô nghut mù luí, Barnaba lhâng yhangmoq kut é gegùn labyoq hkyô má bo châng ngoq ló bê nghut ri. ¹⁴ Haú gabú danglu é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq ban-shoq băng é hí má, Petruq lé, "Nàng gi, Yudaq byù nghut to mù luí, Yudaq byù rayuq đông a nyi e za, tûngbaù rayuq đông nyi luí nhîng, tûngbaù pé lé Yudaq byu pé é htûngli hkâsu kut wó cháng nhâng rã lhú?

¹⁵ Ngamoq gi, yubak dap bang gà é tûngbaù pé a nghut e za, hkû é buinyi mai yhang, Yudaq byù nghut gû bê nghut lhê. ¹⁶ Byù gi, jep é tarâ lé cháng luí mara hkyut san byi huí é a nghut e za, Yesuq Hkrisduq lé lumjîng é yanmai sheq mara hkyut san byi huí é hkyô lé, ngamoq sê lhê. Haú mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjîng é

† Yudaq byu pé ra-am gi, hpúng asik wang é bang lé Yudaq htûng tarâ cháng nhâng nau akô nghut ri. †† Grik má ahpyo-kuq hpyit hkam é bang ga bo tô ri. ††† Grik má ahpyo-kuq hpyit a hkam é bang ga bo tô ri.

yanmai, mara hkyut sân pyám byí é hui sháng gaq nghû, Yesuq Hkrisduq lé lumjîng bê nghut lhê; hkâsu mù gà le, ó yuq le, jep é tarâ lé châng é yanmai, mara hkyut san byí é hui rã a nghut.

¹⁷ Ngamoq gi, Hkrisduq má ngamoq é mara hkyut san byí é hui rã hkyô ho nyi é hkûn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lhú? Ratsuí le a nghut. ¹⁸ Ngò gi, ngò hpyoq pyám bê hkyô lé dum saí kut é nghut jáng, tarâ lu laí é byù ngò nghut é lé tûn shit ri. ¹⁹ Ngò gi, jep é tarâ eq sêng é má, jep é tarâ é yanmai shi jáng sheq, Garai Gasâng é matú wó dui nyi rã nghut lhê. ²⁰ Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhanggung lé Yhang byí pyâm é, haú Garai Gasâng é Yhangzo lé lumjîng é yanmai ru nghut lhê. ²¹ Ngò gi, Garai Gasâng é jeju lé tô pyâm é a nghut, hkâsu mù gà le, dingmán é hkyô lé, jep é tarâ đông wó yu é ru nghut le gi, Hkrisduq shi hkâm é gi, akôm dut byuq rã nghut lhê." nghû taí é nghut lhê.

Lumjîng Myit Lhú? Jep É Tarâ Lhú?

3 Galatiq mau mâ é byùbâm pé ê! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq eq wá nungmoq lé lêng ngoq yù bekô lhú? ² Nungmoq gi, haú Woi-nyí lé, jep é tarâ cháng luí wó yù kô é nghut lhê lhú? A nghut jáng, nungmoq wó gyô yu é gabú danglù lé lumjîng luí wó yù kô é nghut lhê lhú? Haú rahkat lé za, ngò sê yù nau ri. ³ Nungmoq gi, haú-í yhang bâm akô lhú? Haú Woi-nyí lé lumhkaù mù kut hí kôluí nhîng, ahkuí, gungsho wum-o lé lumhkaù mù, yhum-sîng myit tô é hkyô lé lhoq pán rã matú shikut nyi akô lhú? ⁴ Nungmoq, myo myo hpuzô pyâm é gi, akôm nghut akô lhú? Gè gè yhang, haú gi, akôm nghut byuq bekô lhú? ⁵ Garai Gasang, nungmoq lé Yhâng é Woi-nyí byí é htoq agó, nungmoq chyáng laklaí kumlhá kut é gi, jep é tarâ lé nungmoq châng é yanmai nghut akô lhú? A nghut jáng, nungmoq wó gyô é gabú danglù lé, nungmoq lumjîng é yanmai nghut akô lhú?

⁶ "Abraham gi, Garai Gasang lé lumjîng luí, yhang lé dingmán sũ ga sôn yu é hui bê nghut ri." †† ga, Abraham eq séng luí taí tô é lé myit wú keq. ⁷ Haú mù luí, lumjîng myit bo é bang gi, Abraham é yhangzô pé †† yhang dut bê nghut é hkyô lé sé keq. ⁸ Lumjîng myit é yanmai, tûngbaù pé lé Garai Gasang mara hkyut san byi rã nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, "Nang é yanmai, byuhú chângjup gi, shimân jeju wó yù kô rã nghut lhê." ††† gà ri. ⁹ Haú mù luí, lumjîng myit bo é bang gi, lumjîng myit bo é Abraham eq rahá, shimân jeju lé myang hkam yù kô rã nghut lhê.

†† 3:6 Apùn 15:6 ††† Abraham é yhangzô pé gà é gi, Garai Gasâng é yhangzô pé lé gà é nghut lhê. †††† 3:8 Apùn 12:3

¹⁰Jep é tarâ châng é hkyô má nègè hkau é lhunglhâng bang gi, nhîng pyâm é hui bang chyat nghut lhê. Hkâsu mù gà le, "Tarâ laiká má kâ tô é lhunglhâng lé a xoq kut é sù, ó yuq nghut kôle, nhîng pyâm é hui kó râ nghut lhê." [†] ga luí, kâ tô ri. ¹¹ Hau htoq agó, "Haû dingmán sù gi, lumjîng myit mai asak duì râ nghut lhê." ^{††} ga kâ tô é yanmai, ó yuq nghut kôle, Garai Gasâng é hí má jep é tarâ lé châng luí, mara hkyut san byí é a huí é hkyô gi, san za nghut bê nghut ri. ¹² Haû jep é tarâ gi, lumjîng myit eq haí a sêng é nghut luí, "Haû pé dông châng é sù gi, haû pé mai asak duì râ nghut lhê." [‡] ga kâ tô ri. ¹³ Haû Chyúmdang má, "Sik zîng má jén lhâng to huí é sù ó yuq nghut kôle, nhîng pyâm é hui sù nghut ri." ^{‡‡} ga kâ tô é eq rajung za, Hkrisduq gi, nga-nhûng é matú nhîng pyâm é hui sù dut bê nghut é yanmai, jep é tarâ má é nhîng é hkyô mai nga-nhûng lé hkyi yù bê nghut ri. ¹⁴ Haû Abraham lé byí tô é shimân jeju gi, Hkrisduq Yesuq é yanmai tûngbaù pè chyáng le jé sháng gaq ga, Yhang nga-nhûng lé hkyi yu é nghut ri; haû mù, nga-nhûng gi, danggididq byí tô é Woi-nyí haû lé, lumjîng myit mai wó yù râ nghut lhê.

Jep E Tarâ Eq Danggididq

¹⁵ Gumang wuì ê, nyí wui é asak duì hkyô má é lé dangtú yù mù, ngò nungmoq lé taí kôlé, byù mai chôm tô tô é dangshikaq lé, ó yuq eq le wó lhoq hpyoq pyám râ a nghut, ó yuq eq le haû má wó jat kat râ a nghut. ¹⁶ Abraham eq yhâng é awut ashín lé byi tô é danggididq le haû eq rajung za nghut ri. "Awut ashín pé lé" gà é dang gi, byù myo myo lé gà lhê; nghut kôlhang, haû Chyúmdang má, haû lé taí nau é a nghut e za, "náng é awut ashín lé" ^{‡‡} ga taí nau é ru nghut lhê, haû é lichyúm gi, byù rayuq lé za taí é nghut lhê, haû gi, Hkrisduq nghut ri; ¹⁷ haû mù luí, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haû lé le wó lhoq hpyoq pyám râ a nghut, danggididq lé le wó lhoq htên pyám râ a nghut. ¹⁸ Hkâsu mù gà le, haû silí wunlí gi, jep é tarâ eq séng lhûm é nghut jáng, danggididq eq gi, haí le a sêng lhum lo nghut ri; nghut kôlhang, Garai Gasang gi, Yhâng é jeju yanmai, Abraham lé danggididq dông silí wunlí haû byí to bê nghut ri.

¹⁹ Haû su nghut jáng, haû jep é tarâ gi, hai akyû bò râ lhú? Haû gi, danggididq dông lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep é tarâ haû gi, maumang lagyô pé mai gyoro sô xoq byi sù ^{‡‡‡} é loq dông byí tô é ru nghut lhê. ²⁰ Gyoro sô xoq byi sù gi, rahkyam shut má é bang eq baù sêng é a nghut, nghut kôlhang, Garai Gasang gi, rayuq za nghut lhê.

²¹ Haû mù luí, jep é tarâ gi, Garai Gasâng é danggididq pé eq htúq htîng lhûm lhê lhú? Ratsuí le a nghut. Hkâsu mù gà le, duì é asak wó byí é jep é tarâ lé byi to bê nghut le gi, gè gè yhang, dingmán hkyô gi, jep é tarâ

mai lò râ nghut lhê. ²² Nghut kôlhang, mingkan gón má é bang gi, yubak mará é htongbyu pé chyat nghut akô ga Chyúmdang má bo tô ri; haû mù luí, haû byí to bê danggididq lé gi, Yesuq Hkrisduq lé lumjîng é bang lé byi râ nghut lhê.

²³ Lumjîng hkyô haû a jé shimá, nga-nhûng gi, haû jep é tara eq htongbyú dông lhûng tô é hui luí, lumjîng hkyô haû htoq shit é hkûn jé shoq myhî lhûng tô é huí wú bê nghut lhê. ²⁴ Haû mù luí, nga-nhûng gi, lumjîng é yanmai mara hkyut san byí é hui sháng gaq ga, jep é tarâ gi, nga-nhûng lé Hkrisduq chyáng shuí é râ matú, nga-nhûng é hkyô-u shê sù dut bê nghut ri. ²⁵ Ahkuí kúm gi, haû lumjîng hkyô jé bê nghut é yanmai, nga-nhûng gi, haû jep é tarâ mai hkyô-u shê é loq hkaû má a nghut lo.

Garai Gasâng É Yhangzô Pé

²⁶ Nungmoq lhunglhâng bang gi, Hkrisduq Yesuq lé lumjîng é yanmai, Garai Gasâng é yhangzô pé nghut bê; ²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri. ²⁸ Nungmoq lhunglhâng bang gi, Hkrisduq Yesuq má rading ralhum za nghut é yanmai, Yudaq byù nghû é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashín pé le, haû danggididq eq rajung za silí wunlí hkam yù bang le, nghut akô nghut ri.

4 Ngò taí nau é lichyúm gi, haû amyû hkûng xoq dut râ sù gi, ikun sutzè banshoq lé sîng ang sù nghut kôlhang, yhang, zoshâng nghut ashî hkûn gi, jùn hpó eq haí a shaí nghut ri. ² Yhang gi, yhâng wa masat tô é ahkyíng jé shoq, yhang lé zúng é sù eq yhûm lé up su é a-ô má ru lúng nyi ashî nghut ri. ³ Haû eq rajung za, nga-nhûng le zoshâng ^{‡‡‡} nghut é hkûn gi, mingkan uphkâng tarâ ô má jùn dut nyi é bang nghut lhê. ⁴ Nghut kôlhang, ahkyíng lo ngap jáng, zo dut râ ahkáng lé byíng shoq, nga-nhûng wó yù sháng gaq ga, Garai Gasang gi, jep é tarâ hkaû má é byu pé lé hkyi yù râ matú, ⁵ jep é tarâ hkaû má, myiwe mai hku kat nhang é Yhang Zo lé, nhang kat byi bê nghut ri. ⁶ Hkâsu mù gà le, nungmoq le, zo wuì nghut bê yanmai, "Aba, Âwa ê." ga dat wut é, Yhang Zô é Woi-nyí lé, Garai Gasang gi, nga-nhûng é i-myt unghkaû má kat byi bê nghut ri. ⁷ Haû mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyû hkûng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyô

⁸ Hí hkûn, Garai Gasang lé nungmoq a sé shí é u lé, nungmoq gi, nat hpará lháng a nghut bâng é a-ô má jùn dut é bang nghut ri. ⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi,

† 3:10 Tarâ Pun 27:26 †† 3:11 Hbk 2:4 ‡ 3:12 Nhung 18:5
‡† 3:13 Tarâ Pun 21:23 ‡‡ 3:16 Apûn 12:7; 13:15; 24:7 ‡‡†
Gyoro so xoq byi sù gi, Mosheq nghut ri.

‡‡‡ Bun zo shí má, zoshâng gà é lichyúm gi, Yesuq lé a lumjîng shí é bang lé gà lhê.

nungmoq lé sé bê nghut le nhîng, nungmoq gi, hkâsu mù, haû wum nyhôm é eq akyû a byî é, mingkan uphkan é tarâ shut dum lhing taû ló nyi akô lhú? Nungmoq gi, haû pê èq jùn zô é dum hui zó nau akô lhú? ¹⁰ Nungmoq gi, buinyi wú, lhohkyap wú, ahkýing yam-yoq wú, zanwut wú é hkyô pé lé, ahkyak kut nyi ashî kó nhung! ¹¹ Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.

¹² Gumang wuê ê, ngò gi, nungmoq su dut bê nghut é yanmai, nungmoq le ngò su dut keq † nghû, nungmoq lé dúng tôngbán kat lhê. Nungmoq gi, ngo lé haî le a kut shut wú kô é nghut lhê. ¹³ Sâng-hî dâm ngò nungmoq lé gabú danglù hko kyo é hkyô gi, nungmoq sê é eq rajung za, ngò nõhpyo huî é yanmai nghut lhê. ¹⁴ Ngá é nõhpyo gi, nungmoq é matú wuîhke hkyô dut kôlháng, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é mau-mang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê. ¹⁵ Haû sù é nhîng, nungmoq é gabú hkyô banshoq gi, haî dut byuq bekô lhú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byî pyám kó râ í dut laî lò bê hkyô lé, ngò saksé wó hkâm lhê. ¹⁶ Ahkuî, ngò gi, nungmoq lé haû tengmán hkyô taî kyô é yanmai, nungmoq é gyè dut to bê nghut lhê lhú?

¹⁷ Haû byù góbang gi, nungmoq lé gyai shirong é hkyô tân shit ri; nghut kôlháng, ge é hkyô haî a bò; yhangmoq ô nau é hkyô gi, yhangmoq lé nungmoq taû shirông kó abe ga, nungmoq lé ngamoq chyáng mai lhoq kâng yù râ matú ru nghut lhê. ¹⁸ Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haû su shirong le ge lhê. ¹⁹ Ngò chyitdap é zo wuî ê, Hkrisduq é a-kyang nungmoq má gumjup lo é jé shoq, ngò gi, zo hkû nõ no é su radàm dum hkâm zô nyi luî, ²⁰ nungmoq é hkyô lé myit wuîhke tô é yanmai, ahkuî, nungmoq eq rahá myang nyi mù, ngò taî é danghtê wó htaî râ matú, gyai yhang myoqbyu nyi lhê ô.

Hagara eq Sarah Nhik É Hkyô

²¹ Haû jep é tarâ ô má nyi nau é bang ê, nungmoq gi, jep é tarâ má taî é hkyô lé a sê gyo kô é nghut lhê lhú? Ngo lé taî kyô wú kó laq. ²² Hkâsu mù gà le, Abraham gi, yuqzo í yuq wó ri; rayuq gi, jùn myhî é yhangzo, rayuq gi, jùn myhî a nghut su é yhangzo, ga kâ tô ri. ²³ Haû jùn myhî é yhangzo gi, gungsho dông hku lé é sù nghut kôlháng, jùn myhî a nghut su é yhangzo kúm gi, danggidiq eq rajung za hku lé é sù ru nghut lhê.

²⁴ Haû hkyô pé gi, dangtú ru nghut lhê, myiwe haû í yuq gi, dangshikaq í lhum eq wuî lhê; dangshikaq ralhú gi, Sinaq Bùm mã é †† nghut luî, jùn dut râ nghut é zo wuî lé hku kat é Hagara lé taî nau é nghut ri. ²⁵ Hagara haû gi, Arabiq mau mã é Sinaq Bùm lé taî nau é nghut luî, ahkuî lhê é Yerusalem eq wuî nyi ri. Hkâsu

† Ngò su dut keq gà é lichyúm gi, nungmoq le ngò su jep é tarâ mai lut htoq keq gá nau é nghut lhê. †† Sinaq Bùm mã é dangshikaq gi, jep é tarâ eq sêng é dangshikaq nghut lhê.

mù gà le, Yerusalem haû gi, yhang zô pé eq rahá, jep é tara é jùn dut nyi kô é yanmai nghut lhê. ²⁶ Nghut kôlháng, ahtoq mã é Yerusalem gi, jùn myhî a nghut sù nghut luî, nga-nhông é ìnu nghut ri. ²⁷ Hkâsu mù gà le, "Zoshâng a hku é baùdung myhî ê, gabú nyi aq. Zo hkû nõ a no wú shî é myiwe gi, gabú luî, gabú garú nyi aq;

hkâsu mù gà le, haû chamchyuiyui dut é myiwe myhî gi, làng wó é myiwê htoq má zo wuî je myô wó bê nghut ri."

ga kâ tô ri. ‡

²⁸ Gumang wuê ê, ahkuî, nungmoq gi, Isak su, danggidiq byî tô é zo wuî nghut bê nghut ri. ²⁹ Haû hkûn lé, haû gungsho dông hku lé lo é sù gi, Woi-nyí wum-o dông hku lé lo é sù lé zing-rî ri. Haû eq rajung za, ahkuî le dut nyi ri. ³⁰ Nghut kôlháng, Chyúmdang má hkâsu ga kâ tô ri lhú gà le, "Haû jùn myhî eq yhangzo yuqzo lé hkat htoq pyám aq; hkâsu mù gà le, haû jùn myhî é yhangzo yuqzo gi, jùn myhî a nghut su é yhangzo yuqzo eq rahá, silí wunlí lé wó chòm hkam yù râ a nghut." ‡†† gà ri. ³¹ Haû mù luî, gumang wuê ê, nga-nhung gi, jùn myhî é yhangzô pé a nghut e za, jùn myhî a nghut su é yhangzô pé ru nghut lhê.

Hkrisduq Mã É Luthkyô

5 Nga-nhung luthkyô wó râ matú, Hkrisduq gi, nga-nhung lé lhoq lhut kat bê nghut ri. Haû mù luî, haû má ru gîng nyi mù, yhumsing gùng lé jun é wòlai hkaû má hkâtaû bainaî nyi kó.

² Ngá dang lé matsîng yù keq! Ngò Poluq, nungmoq lé taî kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyû le bò kó râ a nghut. ³ Hau htoq agó, ahpyo-kuq hpyit hkam yu é sù ó yuq lé nghut kôlé, ahpyo-kuq hpyit é sù gi, jep é tarâ lhunglháng lé châng kut râ lhê nghû, ngò kyô kat lhê. ⁴ Jep é tarâ châng shikut é dông mara hkyut san byî é hui naû bang, nungmoq gi, Hkrisduq eq gâng lhúm to bekô nghut luî, haû Garaî jeju mai le byit gyó byuq bekô nghut ri. ⁵ Ngamoq kúm gi, myit myoqbyu tô é dingmán hkyô lé, haû Woi-nyí é yanmai lumjîng myit èq gyai yhang lánng nyi é bang nghut lhê. ⁶ Hkâsu mù gà le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyû a bò nghut ri; chyitdap myit mai htoq lo é lumjîng myit za sheq, akyû bo lhê.

⁷ Nungmoq gi, rago din wú bekô ‡†† nghut é wá, haû tengmán hkyô lé a cháng sháng gaq ga, nungmoq lé ó yuq èq hkûm zing pyám kô é lhú? ⁸ Haû su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut. ⁹ "Mún ratsuí zo gi, muk long gón lé wó lhoq daû lhê." ‡††† gà é dang joq lhê. ¹⁰ Nghut kôlháng, nungmoq gi, gotú hkyô dông a lhom yù kó râ nghut lhê nghû, Hkrisduq má hkyak ngò myit lum nyi

‡ 4:27 Esai 54:1 †† 4:30 Apùn 21:10 ‡† Rago din wú bekô gà é gi, woi-nyí hkyô mã kô myhang laî lò bê lé taî nau é nghut lhê.

‡†† Shut é dông mhoqshít é hkyô ratsuí gi, muk long gón lé mún èq wó lhoq daû é su, nungmoq banshoq lé wó lhoq ngoq yu pyâm lhê.

lhê. Nungmoq lé lhoq byok byî é sũ, ó yuq nghut kôle, yhumsing é mara eq rajung za dam byî é hui zo râ nghut lhê. ¹¹ Gumang wui ê, ahpyo-kuq hpyit é hkyô lé, ngò rû hko nyi ashî nghut le gi, haî mù luî, zing-rî é lé ngò hui zô nyi râ lhú? Haû su kut é nghut jáng, haû tapzîng eq séng luî, manghkáng joq râ a nghut lo.

¹² Nungmoq lé lhoq byok nyi é bang gi, hau htoq chyân luî, yhumsing gùng yhumsing banshoq hpyit pyâm kó sháng gaq nghû, ngò wó myit ri.

¹³ Gumang wui ê, nungmoq gi, luthkyô wó râ matú ji yù huî é bang nghut akô; nghut kôlhang, nungmoq é luthkyô ahkáng lé, yubak gungsho má hkâchâng nhâng kó, chyitdap myit mai kúm gi, rayuq eq rayuq dojaú lhûm nyi keq. ¹⁴ Hkâsu mù gà le, "Náng gùng lé nàng chyitdap é su, náng é chyangnâm mâ é bang lé le chyitdap aq." † gà é hkunmó má za, jep é tarâ banshoq lo bo to bê nghut lhê. ¹⁵ Nungmoq, rayuq eq rayuq ngat lhum myui lhûm nyi kô é nghut le gi, rayuq eq rayuq lhoq htên pyâm lhum kó râ nghut é lé, sidiq nyi keq.

Woi-nyí Êq Asak Duì Râ Hkyô

¹⁶ Nghut kôlhang, ngò taí kôlé, Woi-nyí shuî û é đông asak dui nyi keq; haú hkûn, nungmoq gi, yubak gungsho ô nau é hkyô cháng kó râ a nghut. ¹⁷ Hkâsu mù gà le, yubak gungsho ô nau hkyô gi, Woi-nyí eq shai lhûm nyi; Woi-nyí gi, yubak gungsho ô nau hkyô eq shai lhûm nyi, dut ri. Haû í lhum gi, gyè dut lhûm ri; haû mù, nungmoq gi, yhumsing ô nau é đông hkâkut kó. ¹⁸ Nghut kôlhang, nungmoq lé Woi-nyí êq hkyô hî é nghut jáng, nungmoq gi, jep é tarâ ô má a nghut lo nghut ri.

¹⁹ Yubak gungsho é muzó gi, de de yhang nghut lhê; haú pé gi, ashop é đông gungsho zùm yap é hkyô, a sân-yúng é hkyô, shut é đông nyi zô lhúm nau é myit, ²⁰ hparà noq hkyô, myoqheq mù kut é hkyô, a jú é hkyô, byoq lhûm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô, ²¹ ningsû é hkyô, î shuq wut é hkyô, zo yê shuq yê mù achâq achyut kut é hkyô pé eq haú pé su kut é gotû hkyô pé nghut ri; haû su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghû, ngò, hí hkûn nungmoq lé taí wú bê eq rajung za, ahkuí lé, nungmoq lé ngò sidiq byî nyi lhê.

²² Nghut kôlhang, Woi-nyí é ashî gi, chyitdap hkyô, gabú hkyô, nguingón hkyô, myit hîng hkyô, nhik-u nû é hkyô, ge é hkyô, lhumzui hkyô, ²³ nûm é hkyô, yhumsing gùng lé wó hkang é hkyô pé nghut ri. Haú hkyô pé lé hkûm zing pyâm râ tarâ haî le a joq nghut ri.

²⁴ Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzîng má jén sat pyâm bekô nghut ri. ²⁵ Nga-nhúng gi, Woi-nyí mai asak duì bê nghut mù, haû Woi-nyí htâng châng nyi sháng. ²⁶ Nga-nhúng gi, akôm gyáng dang taí luî, rayuq eq rayuq jeq

ho lhûm é eq manon lhûm é bang, a dut nyi sháng gaq.

Lhunglhang Bang Lé, Ge É Hkyô Kut Byi Râ Hkyô

⁶ Gumang wui ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit êq haú yuq lé lhoq pun lhoq kyíng yù keq. Nghut kôlhang, nàng gi, gunglau é a hui sháng gaq, sidiq nyi aq. ² Rayuq eq rayuq é wòlai lé tê byî lhûm nyi keq; haú đông mai, nungmoq gi, Hkrisduq é tarâ lé wó lhoq dik kó râ nghut lhê. ³ Rayuq yuq gi, yhumsing gùng haî le a nghut é wá, ahkyak su ngam é nghut jáng, haú yuq gi, yhumsing gùng lé mhaû pyâm é sũ nghut ri. ⁴ Yuq hkangmó gi, yhumsing nyi yap é hkyô lé taú myit wú keq; haú hkûn, yhumsing gùng lé góbang eq whuí nó a râ e za, yhumsing gùng má aróng wó yù râ nghut lhê. ⁵ Hkâsu mù gà le, yuq hkangmó gi, ó le ô wò lé wùn waq ra râ dut lhê.

⁶ Haû mungdang lé mhoq yu é sũ gi, mhoqshit byi sũ lé, ge é zè banshoq gàm byi sháng gaq.

⁷ Garai Gasang lé gi, wó rhoî râ a nghut, yhumsing gùng yhumsing mhauzô é hkâhui nhâng kó; byù gi, hô kat é eq rajung za, shû yù râ nghut lhê. ⁸ Haû yhumsing é yubak gungsho lé lhoq ngón râ matú hô kat é sũ gi, myit haû mai htên byoq é hkyô lé myang hkam yù râ nghut lhê; haû Woi-nyí lé lhoq ngón râ matú hô kat é sũ kúm gi, Woi-nyí haû mai ahtum abyuq é asak lé myang hkam yù râ nghut lhê. ⁹ Nga-nhúng gi, ge é hkyô kut é má ngú byuq é bang a dut sháng gaq, hkâsu mù gà le, haû lé nga-nhúng a tô pyâm é nghut jáng, ahkyíng yam-yoq jé é hkûn, nga-nhúng gi, akyú myang hkam yù râ nghut lhê. ¹⁰ Haû mù luî, nga-nhúng gi, kut râ ahkyíng wó tô é u lé, byù lunglhang bang lé ge é hkyô kut byi sháng, haû lumjíng hkyô eq séng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq êq hkâ-í kô é laiká cham kê kat byî é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haû su kut é hkyô gi, Hkrisduq é tapzîng é yanmai zing-ri huî é hkyô lé, koi pyâm râ matú za nghut ri. ¹³ Hkâsu mù gà le, haû ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luî wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri. ¹⁴ Ngò kúm gi, nga-nhúng é Yhumsing Yesuq Hkrisduq é tapzîng eq séng luî gumrong é mai lai luî, haî má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. ¹⁵ Ahpyo-kuq hpyit é hkyô nghut nghut, a hpyit é nghut nghut, hai akyú a bò; byù sik hpân huí é hkyô za sheq,

ahkyak é nghut lhê. ¹⁶Tarâ haû lé châng é lhunglhang bâng é ahtoq má le, haû Garai Gasâng é Israelaq byu pé † é ahtoq má le, ngingón hkyô eq shogyo nhikmyin hkyô gi, ru joq nyî sháng gaq ô.

† *Bun zo shí lhum mâ é Israelaq byu pé gâ é gi, hpúng byû wui banshoq lé táí nau é nghut lhê.*

¹⁷Ahkuî mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.

¹⁸Gumang wui ê, nga-nhông é Yhumsîng Yesuq Hkrisduq é jeju gi, nungmoq é woi-nyí eq ru joq nyî sháng gaq. Amen.

Ehpesu

(Ephesians)

1 Garai Gasang ô nau é eq rajung za, Hkrisduq Yesuq é lagyo nghut sũ, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haũ sân-yúng bãng chyáng nguingón dang shit kyô kat lhê.

² Nga-nhông é Îwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

Hkrisduq Mã É, Woi-nyí Hkyô Shimân Jeju Pé

³ Mauhkông htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhông lé shimân byi sũ, nga-nhông é Yhumsîng Yesuq Hkrisduq é Yhângwa, Garai Gasang gi, hkungso wó nyi sháng gaq. ⁴ Hkâsu mù gâ le, nga-nhông gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhông lé hkyin yu to bê nghut ri. ⁵ Hau htoq agó, Yhang, nga-nhông lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhông lé masat to bê nghut ri. ⁶ Haũ mù, Yhang chyitdap é Sũ † má, nga-nhông lé laí laí byi bê nghut é, hpungwup shingkang bo é jeju chyunghuq lé, chôm hkya-on sháng. ⁷ Garai Gasâng é agùn agó é jeju yanmai, nga-nhông mara hkyut byi é hui luí, Yhang Zô é sui dông mai, nga-nhông gi, Yhang má hkyi yù hkyô wó yu é nghut lhê. ⁸ Jeju haũ lé gi, hpaqchyí byéng-yá eq sê gyô é nyan banshoq le kut, Yhang, nga-nhông lé agùn agó byi bê nghut lhê. ⁹ Garai Gasang gi, Yhang myit ngui é eq rajung za, Hkrisduq dông mai kut râ matú hen to bê nghut é, Yhâng é zaũ tô é hkyô lé, nga-nhông lé shit bê nghut ri. ¹⁰ Sê gyo wuí é hkyô haũ gi, lhoq dik râ ahkýing jé jáng, mauhkông htoq eq myigùng htoq mã é lhunglháng lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhông gi, Yhâng é hpungwup shingkang lé hkya-on kungtôn sháng gaq ga, ¹² Garai Gasang gi, Yhang myit sôn tô é lhunglháng lé ban kut mù, Yhâng ô nau é dông, hí mai myit hpyit doqdân to bê eq rajung za, nga-nhông lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyô é gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjîng bekô nghut é yan-

† Yhang chyitdap é Sũ gâ é gi, Yesuq lé taí nau é nghut lhê.

mai, haũ gidiq byi tô é Chyoiyúng Woi-nyí dizik htông tap byi é hui bekô nghut ri. ¹⁴ Garai Gasâng é hpungwup shingkang lé hkya-on râ matú, Yhang eq sêng é byu pé hkyi xe yù huí é hkýing jé shoq, Chyoiyúng Woi-nyí haũ gi, nga-nhông é muizè lé hkyak wó yù râ nghu é masat nghut ri.

Poluq Kyûdung Byí É Hkyô

¹⁵ Haũ mù luí, Yhumsîng Yesuq lé nungmoq lumjîng é hkyô eq sân-yúng bang lhunglháng lé nungmoq chyitdap é hkyô lé, ngò wó gyô é yanmai, ¹⁶ ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-on nyi lhê.

¹⁷ Nga-nhông é Yhumsîng Yesuq Hkrisduq é Garai Gasang nghut é, hpungwup shingkang bò sũ haũ Îwa gi, Yhang lé nungmoq je sé râ matú, hpaqchyí byéng-yá wó byi é eq san za wó sé nhang é Woi-nyí, nungmoq lé byi sháng gaq nghû, ngò, Yhâng chyáng dúng nyi lhê. ¹⁸ Hau htoq agó, Yhang, nungmoq lé ji yu é myit myoqbyù hkyô, hkasû é nghut é lé le, Yhâng é hpungwup shingkang bo é muizè gi, sân-yúng bãng chyáng agùn agó joq nyi é hkyô lé le, Yhâng é kô dik é a-tsam mó gi, lumjîng bang nga-nhông é matú nghut é lé le, ¹⁹ nungmoq wó sé râ matú, nungmoq é myit myojí lhoq gyeng byi é hui sháng gaq nghû, ngò kyûdung byi nyi lhê. A-tsam mó haũ gi, Garai Gasang, Hkrisduq lé shi é mai lhoq dui toq yù mù, ²⁰ mauhkông htoq tsáng myhâng má, Yhâng é loqyô hkyam shut zùng nhang é hkûn, chung é wum-o a-tsam mó eq rajung za nghut ri. ²¹ Hkrisduq gi, uphkang é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhîng é myîng lhunglhâng é htoq má le, je gyaú é sũ nghut lhê.

²² Hau htoq agó, Garai Gasang gi, lhunglháng lé Yhâng é hkyiwa ô má tô to luí, haũ noqkuq hpông é matú, Yhang lé, jung hkangmó é ushuq dut râ dông masat to bê nghut ri. ²³ Noqkuq hpúng haũ gi, Hkrisduq é gungdu nghut luí, hkyô hkangmó má jung hkangmó lhoq byíng jup é Hkrisduq byíng nyi é nghut ri.

Hkrisduq Má Asak Dui É Hkyô

2 Laí ló bê hkûn, nungmoq gi, tarâ lu laí é eq mara kut shut é hkyô pê é yanmai, shi tô é bang dut kô é nghut lhê. ² Haũ hkûn, nungmoq gi, mingkan ngón hkyô pé má lhaq châng nyi kô é htoq agó, haũ tarâ a cháng bãng é myit má ahkuí mù zuí nyi é sobyô nghut é, maulat lé up sũ htông châng nyi kô é bang nghut

lhê. ³ Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za châng wú é bang nghut lhê. Haú mù, góbang eq rajung za, nga-nhúng gi, Garai Gasâng é nhikmo-yo hkyô eq gíngdán wú é bang chyat nghut lhê. ⁴ Nghut kôlhang, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlhang, Yhâng é chyitdap myit mó eq, nga-nhúng lé chyitdap luí, Hkrisduq eq rahá asak dui nhâng bê nghut ri. ⁵ Haú mù, nungmoq gi, Garaí jejú eq za hkyi yu é hui bekô nghut ri. ⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga, ⁷ nga-nhúng lé, Hkrisduq eq rahá lhoq dui toq yú mù, mauhkûng htoq tsáng my-hâng má, Yhang eq rahá zùng nhang to bê nghut ri. ⁸ Hkâsu mù gâ le, nungmoq gi, lumjîng é đông mai Garaí jejú eq za hkyi yu é hui bekô nghut ri. Haú gi, nungmoq chyáng mã é a nghut, Garai Gasâng jeju chyunghuq za ru nghut lhê. ⁹ Haú gi, yhumsing é muzó mai wó é a nghut é yanmai, ó yuq le nghutbun râ hkyô a joq. ¹⁰ Hkâsu mù gâ le, nga-nhúng gi, Garai Gasâng é loqmú pé nghut mù, nga-nhúng zui saí râ matú, hí hí mai, Garai Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haú mù luí, nungmoq gi, hí hkûn, hku lé lo é mai yhang tûngbaù pé nghut é hkyô lé le, byu loq eq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhûm tô é bang; Israe-laq mingbyû a nghut é bang; danggidiq eq sêng é dangshikaq pé má gó ming byû nghut é bang; mingkan htoq má, myoqbyû jowò a joq é eq Garai a wó é bang nghut é lé, myitbun keq. ¹³ Nungmoq gi, hí hkûn wê gâng nyi é bang nghut kôlhang, ahkuí kúm, Hkrisduq é sui đông mai Hkrisduq Yesuq má shuí chyâng htep é hui bekô nghut ri.

¹⁴ Hkâsu mù gâ le, Yhânggùng yhang gi, nga-nhúng é nguínón hkyô nghut ri. Yhang gi, gyoro má kyo tô é madin nghut é a nau a wom hkyô lé hpyoq hpyi pyám byi luí, haú í myû † dut nyi é lé, rahú za dut nhâng bê nghut ri. ¹⁵ Haú hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htûm pyám bê nghut ri. Haú mù, Yhang ô nau é hkyô gi, haú í myû dut tô é lé, Yhânggùng má yhang, byû sik ra-myû za hpan to râ matú nghut ri; haú đông, simsaq hkyô kut byi bê nghut ri. ¹⁶ Yhang gi, a nau a wôm lhûm é hkyô lé, haú tapzîng má lhoq htûm pyám byi mù, haú tapzîng đông mai, byû myu í myu é lé ragùng za kut luí, Garai Gasang eq xoq byi bê nghut ri. ¹⁷ Yhang gi, wê gâng nyi é bang †† nungmoq lé le, chyâng htep nyi

† I myû gâ é gi, Israe-laq byu pé eq tûngbaù pé lé gâ lhê.

é bang † lé le, simsaq hkyô é danglù lé hko kyo bê nghut ri. ¹⁸ Hkâsu mù gâ le, nga-nhúng í myû gi, Yhang đông mai, Woi-nyí ralhum zâ eq, haú Íwâ chyáng wàng râ hkyô dong bê nghut ri.

¹⁹ Hau é yanmai, nungmoq gi, tûngbaù pé eq byû bíng pé a nghut lô é za, Garaí é byu pé eq rahá, ming-byû wuì eq yhumbyû wuì chyat nghut bekô nghut luí, ²⁰ haú lagyô pé eq myiqhtôí pé, hí tô é apûn awang htoq má xuq tô é bang chyat nghut akô; Hkrisduq Yesuq yhang, haú mã é ahkyak é htungchyûn luggok dut bê nghut ri. ²¹ Yhang má, wahpang lhum gón xoq lhûm bùm é nghut mù, haú Yhumsing má chyoiyúng noqkuq yhûm ralhum dut lò bê nghut ri. ²² Woi-nyí đông mai, Garai Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

Poluq, Tûngbaù Pê É Tarâ Hkô Sará

3 Haú su nghut mù, Hkrisduq Yesuq é hkyô lé, nungmoq tûngbaù pê chyáng hko kyô é yanmai, htongbyû dut sù, ngò Poluq gi, nungmoq é matú kyû-dung byi lhê.

² Nungmoq lé dojaú râ é matú, ngo lé byi tô é Garai Gasâng jeju ayá shí lé, nungmoq gè gè wó gyô wú bekô râ nghut lhê. ³ Haú gi, hí hkûn, ngò, tot é đông kê tô wú bê eq rajung za, haú zaú tô é hkyô lé, shing-rán đông ngo lé sé nhang é nghut ri. ⁴ Haú hkyô lé, nungmoq nghap wú é hkûn, Hkrisduq eq sêng é zaú tô é hkyô, ngò rago sê é lé, nungmoq wó sé kó râ nghut lhê. ⁵ Haú lé, laí lò bê ipyat pé mã é byu pé lé a sé nhang é nghut kôlhang, ahkuí gi, Garai Gasâng é chyoiyúng é, lagyô pé eq myiqhtôí pé lé, haú Woi-nyí eq hpông shit bê nghut ri. ⁶ Zaú tô é hkyô haú gi, gabú danglù đông mai, Hkrisduq Yesuq má, Israe-laq byu pé eq rahá, tûngbaù pé le, hkûng xoq bang wó dut luí, gungdu ralhûm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byi tô é Garai Gasâng jeju chyunghuq é yanmai, ngò gi, gabú danglù shí taí râ dui-nhâng zoshâng dut é nghut lhê. ⁸ Ngò gi, haú Garai Gasâng é byu pé mã é tiq dik sù htoq má lháng je tiq sù nghut kôlhang, haú Hkrisduq é a ung htoq taí é wó sùt hkyô lé, tûngbaù pê chyáng hko kyo râ matú le, ⁹ haú lhunglháng lé hpan é Garai Gasang má, laí lò bê ipyat pé má zaú tô é, zaú tô é hkyô haú lé hkâsu kut tô é lé, yuq hkangmó lé taí sân kyo râ matú le, jeju shí, ngo lé byi bê nghut ri. ¹⁰ Haú gi, nga-nhúng é Yhumsing Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹ haú Garai Gasâng é hpaqchyí mó góng lé, noqkuq hpúng đông mauhkûng htoq tsáng my-hâng mã é uphkâng bang eq ahkáng ayá wó bang lé, ahkuí sé nhâng râ matú nghut lhê. ¹² Nga-nhúng gi, nga-nhúng é Yhumsing Hkrisduq Yesuq eq rading ralhum za nghut é yanmai le, Yhang lé lumjîng é yanmai

†† Wê gâng nyi é bang gâ é gi, tûngbaù pé lé gâ lhê. † Chyâng htep nyi é bang gâ é gi, Israe-laq byu pé lé gâ lhê.

le, Garai Gasang chyáng, wám é myit eq a gyuq a wám é myit eq wó htep é é nghut lhê. ¹³ Haû mù luî, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myit hkâgyui kó; haû gi, nungmoq é matú akyû bò râ hkyô nghut lhê.

Ehpesu Myuq Byu Pé Lé Kyûdung Byî É Hkyô

¹⁴ Haû pê é yanmai, ngò gi, haû Îwâ é hí má hkyihput htuq luî kyûdung é nghut lhê. ¹⁵ Mauhkông eq myigùng htoq mâ é Yhâng é ikun byû lhungháng gi, Yhâng chyáng mai mying wó yu é chyat nghut lhê. ¹⁶ Nungmoq é lumjîng myit mai, nungmoq é i-myit unghkaû má Hkrisduq wó nyi nyi sháng gaq nghû, ¹⁷ Yhang é hpungwup shinggang bo é agùn agó wó sùt é mai, nungmoq é i-myit unghkaû mâ é sù lé, Yhâng é Woi-nyí dông, hpungwup a-tsâm èq wum-o lhoq kîng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chin to luî, awang hi to mù, ¹⁸ sân-yúng bang eq rahá, hau é apyî, a-tsûng, myhâng, nik, hkâ-í nghut é lé, rago wó sé kôluî, ¹⁹ Garai Gasâng é gumjup é hkyô lhunghâng èq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

²⁰ Ahkuî, nga-nhúng é hkaû má mù zûi nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhungháng htoq je wó kut byî é Su chyáng, ²¹ haû noqkuq hpûng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shinggang rû bo nyi sháng gaq ô! Amen.

Hkrisduq É Gungdu Má Rading Ralhum Za

4 Haû mù luî, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haû Yhumsing é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê. ² Hkyô hkat hkangmó má i-myit lhoq nyhum é eq i-myit nú-nhâm nyi keq; myit hing é eq chyitdap myit mai rayuq eq rayuq hkam jân lhûm nyi keq. ³ Haû Woi-nyí èq byî é myit hui hkyô lé, nguingón hkyô dông mai châng nyi râ matú, wó dut é í shikut nyi keq. ⁴ Nungmoq gi, wut yù hui kô é hkûn, myit myoqbyû hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri. ⁵ Yhumsing rayuq za, lumjîng hkyô rahkat za, baptisma ralhum za nghut nyi ri. ⁶ Banshoq bâng é Îwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luî, lhungháng dông mai mù kut é eq lhunghâng é ahkaû má lúng nyi sù nghut ri.

⁷ Nghut kôlhang, nga-nhúng yuq hkangmó gi, jeju chyunghuq lé, Hkrisduq mai ké byî é dông wó yu é nghut lhê. ⁸ Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuí chûng mù, byu pé lé gi, chyunghuq tsing gam byî ri." †

ga, Chyúmdang má taí tô é nghut lhê. ⁹ Haû "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naû é a nghut lhi? ¹⁰ Haû gyó lé é Sù gi, jungkháng jungmó lé lhoq byíng jup râ matú, mauhkông banshoq é ahtoq má doq ló é Sù yhang nghut lhê. ¹¹ Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byî to bê nghut ri. ¹² Haû bang gi, Garai Gasâng é byu pé lé wùn waq âng é muzó pé é matú, hen lajâng é bang nghut ri. Haû hkûn sheq, Hkrisduq é gungdu gi, ¹³ haû lumjîng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô dîng bang dut luî, Hkrisduq é gumjup é isâm banshoq lé wó yu é hkûn jé shoq, wó kô jat nyi râ nghut lhê.

¹⁴ Haû mù, nga-nhúng gi, wuibaù pé èq hí shut htâng shut bat myhû é su dut é eq, byu pé é agè ashop é eq haq dâ é mhoq hpyoq hpaqchyí pé eq mhoqshit hkyô laidun hkangmó èq, hí shut hé shut mut tâng é su dut é lé hui zô é zoshâng wui su a nghut lô é za, ¹⁵ chyitdap myit mai tengmán é dang lé taí nyi jáng, Hkrisduq nghu é ulhum má hkyô hkangmó kô myhang lò râ nghut lhê. ¹⁶ Yhang dông mai, gungdu gón gi, ralhum eq ralhum htuqbâng é gungsho showui showang pé lé xoq byî to bê nghut mù, gungsho showui showang haú pé gi, yhumsing é muzó lé zui saí nyi é nghut jáng, gungdu haû gi, chyitdap myit má, yhanggùng yhang kô lò myhang lò râ nghut lhê.

Byû Sik Dông Asak Dui Râ Hkyô

¹⁷ Haû mù luî, haû Yhumsing é ahko ahkáng mai ngò nungmoq lé taí nau é hkyô gi, haû tûngbaù pé gi, akyû a bo é lé myit mù, asak duì kô é su, nungmoq gi, hkâkut kó. ¹⁸ Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byî é asak eq wê gâng byuq bekô nghut ri. ¹⁹ Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô naù gadaú é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé haú dông mhoq yù kô é a nghut. ²¹ Nungmoq gi, Yesuq chyáng mâ é tengmán hkyô dông, Yhâng é hkyô lé wó gyô wú é eq mhoq yu wú bekô nghut lhê. ²² Haû mù, nungmoq gi, hí hpyang lhê é nungmoq é nyi yap sâmlai nghut é, ô naù gadaú luî, yhumsing gùng yhumsing mhaù pyám é dông htên byoq ló nyi é nungmoq é byû xau lé tô pyám râ matú mhoq yù bê eq rajung za, ²³ nungmoq é i-myit lé asik htaí pyám nhâng keq; ²⁴ hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù shoq hpan to hui bê nghut é byû sik lé, yu wut to keq.

²⁵ Haû mù, nga-nhúng banshoq bang gi, gungdu ralhum é gungsho showui showang pé chyat nghut é

yanmai, nungmoq yuq hkangmó gi, mhaû é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê. ²⁶ "Nungmoq nhikjum yô é hkûn, mara hkâkut kó." † nungmoq gi, bui wàng shoq nhikjum hkâyô nyi kó. ²⁷ Nat Tsadán lé le, jowò hkâbyi kó. ²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zuí shikut ra râ nghut lhê.

²⁹ Nungmoq é nhut mai agè agaú é dang haí le hkâh-toq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za taí keq. ³⁰ Haû hkyi yù râ buinyi é matú, dizik dông nungmoq lé tap to byí é Garai Gasâng é Chyoiyúng Woi-nyí lé hkâlhoq yón kó. ³¹ Haû myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé banshoq lé, nungmoq tô pyám keq. ³² Nungmoq gi, rayuq eq rayuq, ge é hkyô eq shogyo nhikmyin é hkyô tûn shit lhum luí, Garai Gasang gi, Hkrisduq má, nungmoq lé mara hkyut byí é su, nungmoq yhangchang le mara hkyut byí lhûm nyi keq.

5 Haû mù, nungmoq gi, chytidap dik é zoshâng wui nghut é yanmai, Garai Gasang lé alik yu é bang kut keq. ² Hkrisduq gi, Yhânggùng lé namngón jung hkungga eq shigu hkungga dông, nga-nhûng é matú Garai Gasâng chyáng Yhânggùng yhang ap byí pyám shoq, nga-nhúng lé chytidap é su, nungmoq le chytidap myit èq asak dui nyi keq.

³ Hau htoq agó, ashop é dông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq taí lhang hkâtaí kó; hkâsu mù gà le, nungmoq gi, Garai Gasâng é chyoiyúng byu pé nghut lhê. ⁴ Haû eq rajung za, a taí gíng é, ahoq ahí dang, dangsôm eq hkunchoq dông gyâ é dang pé lé a taí é za, jeju hkya-on dang za taí nyi keq. ⁵ Hkâsu mù gà le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyi keq. ⁶ Ó yuq nghut kôle, dangsôm †† dông mai nungmoq lé a wó mhaú kó sháng gaq; hkâsu mù gà le, haú hkyô pé é yanmai, Garai Gasâng é nhikmo-yo hkyô gi, haû jino a gyo bâng é ahoq má jé râ nghut lhê. ⁷ Haû mù luí, haú bâng chyáng hkâbo wang lòm kó.

⁸ Hkâsu mù gà le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haû Yhumsing má maubó pé nghut bekô nghut ri.

⁹ Haû Yhumsing ô nau é hkyô haí nghut é lé ho htoq yû mù, maubó é yhangzô pé dông asak dui keq.

¹⁰ Hkâsu mù gà le, haû maubó é ashi gi, ge é hkyô banshoq, dingmán é hkyô eq tengmán hkyô chyat nghut ri. ¹¹ Haû ashi a zuí é mauchut tuq muzó má a bo wang lom é za, yhangmoq é mara lé tûn shit keq. ¹² Hkâsu mù gà le, haû jino a gyo bang haq zaú kut é hkyô lé gi, taí htoq le lhang hoq hpo nghut ri. ¹³ Nghut kôlhang,

junghkang jungmó lé, haû maubó èq tûn shit jáng gi, wó byu-myang é chyat dut râ nghut lhê. ¹⁴ Hkâsu mù gà le, junghkang jungmó lé byu-myàng nhang é gi, maubó nghut ri. Hau é yanmai,

"Yhup ngón nyi sù ê, toq aq, haû shi é mai dui toq aq hkoi; haû jáng, Hkrisduq gi, nang lé duqbó byi râ nghut lhê." ‡

ga luí taí tô é nghut lhê.

¹⁵ Haû mù luí, nungmoq hkâsu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq. ¹⁶ Buinyi ahkyíng shí pé gi, agè ashop é yanmai, wó é ahko ahkáng banshoq lé ge dik é dông chung jaí keq. ¹⁷ Hau é yanmai, byù ngok pé a dut é za, haû Yhumsing ô nau é hkyô gi, haí nghut é lé, sê gyô yu nyi keq. ¹⁸ Haû achaq achyut é yubak hkyô lhoq htoq é í lé hkâshuq wut kó; Woi-nyí lé kúm byíng nhang nyi keq. ¹⁹ Nungmoq gi, hkya-on kungtôn dang dông le, hkya-on mahkôn dang dông le, woi-nyí eq sêng é mahkôn dông le, rayuq eq rayuq dang nyo lhum luí, nungmoq é i-myt unghkaú mai, haû Yhumsing lé mahkôn hkôn mù, lhoq ngón nyi keq. ²⁰ Nga-nhûng é Yhumsing Yesuq Hkrisduq é myíng lé lang luí, jung hkangmó é matú, haû Íwa Garai Gasang lé, hkâ-nhám le jeju hkya-ôn nyi keq.

²¹ Hkrisduq lé hkungga hpautap é myit èq, rayuq eq rayuq hpautap lhûm nyi keq.

Myi Eq Làng

²² Ikun myhí pê ê, haû Yhumsing uphkang é dông châng é su, nungmoq é ikun hpô pé uphkang é dông châng nyi keq. ²³ Hkâsu mù gà le, Hkrisduq gi, haû noqkuq hpûng é ulhum nghut é su, haû ikun hpô gi, ikun myhí é ulhum nghut nyi ri; Hkrisduq gi, haû Yhâng gungdu nghut é noqkuq hpúng lé hkyi yù Sù nghut ri. ²⁴ Haû noqkuq hpúng gi, Hkrisduq uphkang é dông châng é su, ikun myhí pé le, hkyô hkat hkangmó má, yhangmoq é ikun hpô pé uphkang é dông châng nyi râ lhê.

²⁵ Ikun hpô pé ê, Hkrisduq gi, haû noqkuq hpúng lé chytidap luí, hau é matú Yhânggùng lé Yhang ap pyám é su, nungmoq é ikun myhí pé lé chytidap nyi keq.

²⁶ Yhang haû su kut é gi, haû noqkuq hpúng lé, mungdang dông wui má chí pyám luí, lhoq sân-yúng yû râ eq, ²⁷ haû noqkuq hpúng gi, agè agaú é eq a-ká akông é hkyô haí le a bo é za, mara hûn râ hkyô a bo é eq chyoiyúng é, hpungwup shingkang bo é noqkuq hpúng dông, Yhânggùng lé wó ap byi râ matú nghut lhê. ²⁸ Haû eq rajung za, ikun hpô pé gi, yhangmoq é ikun myhí pé lé, yhumsing gungdu lé su chytidap râ dut lhê. Yhumsing é ikun myhí lé chytidap é sù gi, yhumsing gùng lé le, chytidap é sù nghut bê. ²⁹ Ó yuq le, yhumsing gùng lé a chytidap a kut é za, Hkrisduq gi, haû noqkuq hpúng lé kut byí nyi é su, yhumsing gùng lé byi tso byi huq luí, rago wú zúng nyi é nghut lhê. ³⁰ Hkâsu mù gà le, nga-nhúng gi, Yhâng é gungdú é gungsho showui showang pé chyat nghut lhê. ³¹ Haû

† 4:26 Hkya-on 4:4 †† Dangsôm gà é gi, Garai Gasâng é nhikmo-yo hkyô a jé râ ga taí é dang nghut lhê.

‡ Dang ngho shí gi, hí lhê é noqkuq hpúng pé taí gyó lo é dang nghut lhê.

mù, "Hau é yanmai, yuqgè gi, înu îwa eq gang luî, yhangmyi eq zùm-yap mù, yhangnhik í yuq gi, gungsho ralhum za dut kó râ nghut lhê." † gâ tô ri. ³² Haù hkyô gi, gyai yhang zaù tô é hkyô nghut ri. Nghut kôhang, ngò gi, haù Hkrisduq é hkyô eq noqkuq hpûng é hkyô lé taí nyi é nghut lhê. ³³ Haù mù, nungmoq yuq hkanmó gi, yhumsing gùng lé chyitdap é su, yhumsing é ikun myhí lé le chyitdap râ dut lhê; haù ikun myhí le, yhang é ikun hpó lé hkungga râ dut lhê.

Zo Wuí Eq Mó Wui É Hkyô

6 Zoshâng wui ê, haù Yhumsing má, nungmoq é mó wui é jìno gyo keq; hkâsu mù gâ le, haù gi, kut gíng é hkyô nghut ri. ² "Náng é înu îwa lé hkungga aq. ³ Haù jáng, nàng, nyi ngón yuqyò mù, myidàm htoq má náng é asak chyungxe hing nyi râ nghut lhê." †† gâ é dang gi, danggidíq lom é sâng-hí lhum hkunmó nghut ri.

⁴ Îwa pé ê, nungmoq é zo wuí lé nhikjum a lhoq yô é za, haù Yhumsing é mhoq kyo hkyô eq mhoqshit lhoq pun hkyô dông yhangmoq lé baù kô nyi keq.

Jùn Pé Eq Junsing Pê É Hkyô

⁵ Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzuí é myit mai, nungmoq é myidàm htoq mâ é junsing pê é jìno gyo keq. ⁶ Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myit unghkaù mai châng kut nyi keq. ⁷ Byù lé za dojaú é dông a nghut é za, haù Yhumsing lé dojaú nyi é dông le, shirông myit èq dojaú nyí keq. ⁸ Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haù Yhumsing gi, yuq hkanmó lé shigyaú râ nghut é lé, nungmoq sê nyi lhê.

⁹ Junsing pé ê, nungmoq le, nungmoq é jùn pé lé haù eq rajung za kut byí nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpó gi, mauhkûng htoq má nyi é nghut luí, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

¹⁰ Ló htàng má, taí nau é hkyô gi, haù Yhumsing eq Yhâng é hpungwup a-tsam mó má wum-o bo nyi keq.

¹¹ Haù nat Tsadán wá dâ é hpaqchyí pé lé, nungmoq wó he-ngik pyám kó sháng gaq, haù Garai Gasâng é

gyè hking banshoq lé wut to keq. ¹² Hkâsu mù gâ le, nga-nhúng gi, gungsho eq sui lé htuq htíng é bang a nghut é za, haù uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkûng htoq tsáng myhâng mâ é agè ashop é byò eq sêng é wum-o pé lé, htuq htíng é bang ru nghut lhê. ¹³ Haù mù luí, Garai Gasâng é gyè hking banshoq lé wut to keq; haù hkûn sheq, nungmoq gi, agè ashop hkyô jé é buinyi má, yhumsing jowò má wó yap gíng to mù, hkyô hkat hkanmó lé ban kut jáng, wó yap gíng tîng nyi kó râ nghut lhê. ¹⁴ Haù mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luí, ¹⁵ nungmoq é hkyí má gi, haù simsaq hkyô byí é gabú danglù hkô râ rì rì kut to mù, gíng gíng yap nyi keq. ¹⁶ Hau htoq agó, haù agè ashop su é myiduq é myoshi lhungháng lé wó sat ung pyám râ matú, lumjíng hkyô nghu é golong lé chung to keq. ¹⁷ Hkyi yù hkyô shamtoq muq lé tsúng to luí, Garai Gasâng é mungdang nghut é, haù Woi-nyí é shâm lé wun chûng keq. ¹⁸ Ahkyíng hkanmó má, kyûdung dang eq dúng tóngbán é dang ajung júng èq, haù Woi-nyí má kyûdung nyi luí, machya nyi uchyang, sânyúng bang banshoq é matú, hkâ-nhám le, xoq xoq kyûdung byí nyi keq.

¹⁹ Haù gabú danglu é yanmai, shamtoq-tui hut huí é lagyo rayuq ngò nghut nyi kôhang, haù gabú danglù nghut é zaù tô é hkyô lé, a gyuq a wàm wó taí kyo luí, ²⁰ ngò taí râ dut é lé, a gyuq a wàm wó taí sâny kyo shoq, ngá nhut hpóng hkanmó, ngò taí râ mungdang pé lé byi sháng gaq, ngá é matú le, kyû bo dung byí nyi keq.

Shi-kyám Dang

²¹ Haù Yhumsing má, chyitdap é gumang eq lhumzuí é dui-nhâng zoshâng nghut sù, Tuhkiku gi, nungmoq lé jung hkanmó taí kyo râ nghut luí, ngò hkâsu nghut nyi é hkyô eq haí kut nyi é hkyô lé, nungmoq wó sé kó râ nghut lhê. ²² Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luí, yhang lé, ngò, nungmoq chyáng nhang kat é nghut lhê.

²³ Îwa Garai Gasang eq Yhumsing Yesuq Hkrisduq chyáng mâ é lumjíng hkyô má bo é chyitdap myit eq nguínón hkyô gi, haù gumang wui chyáng ru joq nyí sháng gaq ô! ²⁴ A dat htûm é chyitdap myit mai, nga-nhúng é Yhumsing Yesuq Hkrisduq lé chyitdap é lhunghâng bang chyáng, Garaí jeju gi, ru joq nyí sháng gaq ô!

† 5:31 Apûn 2:24 †† 6:3 Htoq Ló 20:12

Hpilipi

(Philippians)

1 Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sânyúng bang lhunglhang eq, hpúng-up, hpungte pé lé, dang kyô kat lhê.

² Nga-nhùng é Îwa Garai Gasang eq Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyi sháng gaq ô.

Jeju Hkya-ôn É Hkyô

³ Ngò gi, nungmoq lé myit bân kat hkanmó, ngá é Garai Gasang lé jeju hkya-ôn nyi lhê. ⁴ Ngò gi, kyûdung hkanmó, hkâ-nhám le nungmoq banshoq bâng é matú gabú myit eq dung byi nyi lhê. ⁵ Hkâsu mù gà le, nungmoq gi, sâng-hî nyi mai ahkuí jé shoq, gabú danglù má ngò eq chôm zùm yap nyi é yanmai nghut lhê.

⁶ Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán râ nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myt má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gà le, ngò kyum hut huí tô é u lé le, haû gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê. ⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za, ¹⁰ Garai Gasang é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashí wó byíng nyi sháng gaq nghû le; ¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹² Gumang wui ê, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ríng jat lò râ matú dut lò bê nghut ri. ¹³ Hau é yanmai, haû hkoikhâm-wâng zúng é lhunglhang bang eq gotû banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴ Hau htoq agó, ngò htóng lúng é yanmai, haû Yhumsing Yesuq má gumang wui nghut é myo mi-myo gi, myit wum wó yû kômù, Garai

Gasang é mungdang lé, je riyhang a gyuq a kyum wám hko kyo bekô nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri. ¹⁶ Ge é myit mai hko é bang gi, gabú danglù lé húng râ matú ngo lé hkyin é hkyô lé, yhangmoq sé kômù, chyitdap myit eq hko kyô é bang nghut akô. ¹⁷ Haû góbang chyaú gi, sanséng é i-myt eq a nghut é za, ngò kyum wut é hkyô má wuîhke jamjau jat byi râ matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko taí nyi bum akô nghut ri. ¹⁸ Nghut kôlhang, haû gi, haí râ ri lhú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkanmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê. ¹⁹ Hkâsu mù gà le, nungmoq kyûdung byí é eq Yesuq Hkrisduq é Woi-nyí garúm é yanmai, ngò má dut lai lò bê hkyô gi, ngò wó luthkyô dut râ nghut é lé ngò sê lhê. ²⁰ Ngò myit lánng tô é eq myit myoqbyù tô é má, ngò gi, hoq nó haí a râ é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luí, Hkrisduq gi, ngá gûng má hkya-on waq toq é hui râ nghut lhê. ²¹ Hkâsu mù gà le, ngò, asak dui nyi le gi, Hkrisduq é matú, shí jáng gi, ngá e amyat nghut ri. ²² Nghut kôlhang, ngò gi, gungsho má rû dui nyi mù, ngò kut é muzó má ashí zuí lo é nghut le gi, hká lhum lé sheq hkyin yu le gè râ lhú? ²³ Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gà le, haû gi, je ge é hkyô nghut ri. ²⁴ Nghut kôlhang, ngò gungsho má dui nyi le gi, nungmoq é matú akyû je bò râ nghut lhê. ²⁵ Haû mù, ngò gi, shí hkyô lé hkyak myit lum to luí, lumjíng hkyô má nungmoq kô jat lo é eq gabú nyi râ matú, nyi gyó luí, nungmoq lhunglhang bang eq nyi nyi râ hkyô lé, ngò sê lhê. ²⁶ Haû mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷ Haí wà dut kôlhang, nungmoq gi, Hkrisduq é gabú danglù eq gíngdán é dông nyiyap keq. Haû jáng, ngò, nungmoq chyáng jé mù huí lhùm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhum má za yap gíng to mù, haû gabú danglù lé lumjíng hkyô má, i-myt rahkat zâ éq shikut nyi

kô é hkyô lé le; ²⁸ nungmoq gi, hká hkyô má nghut kôlhang, gyè pè èq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê. ²⁹ Hkâsu mù gâ le, Hkrisduq má wó lumjîng râ é jeju za a nghut, Yhang é matú wúhke jamjau hui râ jeju le, nungmoq hkam yù bekô nghut ri. ³⁰ Haû gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

Yesuq, Myit Lhoq Nyhum É Hkyô

2 Hkrisduq eq rading ralhum za nghut nyi é yanmai, myit wum byí é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyín é hkyô rajung jung lé, nungmoq wó yu é nghut le gi, ² nungmoq gi, haû i-myit hui é hkyô rahkat za, chyitdap myit rajung za, myit nhiklum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq. ³ Yhumsîng é wuizat é dông le, akôm gyáng pyâm é dông le, haû le a kut é za, myit lhoq nyhum nyi mù, góbang gi, nungmoq htoq má je gyaú lhê nghû myit yu nyi keq. ⁴ Nungmoq yuq hkangmó gi, yhumsîng eq sêng é lé za a nghut, góbang eq sêng é lé le, myit byi râ lhê.

⁵ Hkrisduq Yesuq má bo é myit yhang, nungmoq chyáng bò râ dut lhê.

⁶ Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

⁷ Yhânggùng lé lhoq gôm pyám luí, dui-nhâng zôshang é gunghyâng lé yu chùng mù, xângzo byù gùng roq lé dut bê nghut ri.

⁸ Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí,

haû tapzîng htoq má lháng tap sat pyâm é hui shoq jîno gyô ri.

⁹ Haû mù luí, Garai Gasang gi, Yesuq é myîng lé mauhkûng htoq mâ é hkyihput,

myidàm htoq mâ é hkyihput eq moming mâ é hkyihput hkangmó htuq paí luí,

¹⁰ haû Íwa Garai Gasâng é hpungwup shingkâng é matú, Yesuq Hkrisduq gi, Yhumsîng nghut lhê nghû, nhut shô hkangmó yín yù sháng gaq ga,

¹¹ myhang htâng é jowò má Yhang lé lhoq toq tô é eq, myîng lhunglhâng é htoq má gyaú é myîng haû, Yhang lé byí to bê nghut ri.

Kyí Pé Su Duqbó Nyí Râ Hkyô

¹² Haû mù luí, ngò chyitdap é luzúm wúí ê, nungmoq gi, hkâ-nhám le jîno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyí keq.

¹³ Hkâsu mù gâ le, Garai Gasang gi, Yhang ô nau é hkyô lé, kut naû râ myit èq wó kut râ hkyô lé nungmoq má lhoq htoq byí nyi é sù nghut lhê.

¹⁴ Haû kut kôlhang, taí put lhûm é dông, haû a nghut jáng, dang jet jet lhûm é dông hkâkut kó. ¹⁵ Haû jáng sheq, myit goí é, agè ashop é pyat hkaû má, nungmoq gi, mara a bo é, sânyúng é, shut hkyô a bo é, Garai Gasâng é yhangzô pé dut kó râ nghut lhê. ¹⁶ Hau htoq agó, nungmoq gi, asak mungdang lé chung htoq uchyang, mauhkûng mâ é kyí pé su, yhangmoq chyáng wó duqbó nyí kó râ nghut lhê. Haû hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyi má gumrông jowò wó berâ nghut lhê. ¹⁷ Nghut kôlhang, ngò gi, shuq jung hkungga † ralhum su, nungmoq é lumjîng myit mai nhongjaú byí é shigu hkungga ahtoq má hut gyûn pyâm é hui le lháng, gabú luí, nungmoq banshoq bang eq rahá chôm gabú nyi lhê. ¹⁸ Haû eq rajung za, nungmoq le gabú luí, ngò eq rahá chôm gabú nyi râ dut lhê.

Timohti Eq Epahprodi Nhik Lé Nhang Kat Râ Gâ É Hkyô

¹⁹ Ngò gi, nungmoq chyáng Timohti lé hân za wó nhang kat râ lé, haû Yhumsîng Yesuq má myit myoqbyu nyi lhê; haû hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê.

²⁰ Nungmoq é hkyô lé, yhang su hkyak za ge myit chiq byí é byù gotû rayuq le ngò a wó. ²¹ Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri. ²² Yhang kúm gi, zo rayuq mai îwa lé htuqbâng é su, haû gabú danglù hkyô má ngò eq rahá dojaú é yanmai, yhâng lumluq é hkyô tûn shit é lé, nungmoq sê nyi lhê. ²³ Haû mù luí, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê. ²⁴ Hau htoq agó, hkâmyháng a myáng má, ngò yhang le nungmoq chyáng wó jé nhâng râ nghut lhê nghû, haû Yhumsîng má hkyak lum nyi lhê.

²⁵ Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taû kat byi râ lhê nghû, ngò myit hpyit to bê nghut lhê. ²⁶ Hkâsu mù gâ le, yhang gi, nungmoq lhunglhâng bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri. ²⁷ Gè gè yhang, yhang gi, aluq shoí shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyín yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyín yu ri. ²⁸ Haû mù luí, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò

† *Shuq jung hkungga gâ é gi, tsibiyiq wing ragóm lé myi htoq má hut pyâm é dông Garai lé gyuq hkunggâ é hkyô lé tûn shit é nghut lhê. Bun zo shî má shî hkâm é hkyô lé taí nau é nghut lhê.*

hân hân nhang kat byí nau ri. ²⁹ Nungmoq gi, gyai yhang gabú é myit eq, haû Yhumsíng má yhang lé lhom hkúlum yù mù, yhang su dut é bang lé hkungga keq. ³⁰ Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhâng é asak lé lháng a ha loshoq kut mù, haû Hkrisduq é muzó é yanmai, aluq shoí shoí shi é hui zô ri.

Gungsho Má Lumhkaû Râ Hkyô A Joq

3 Hau htoq agó, ngá é gumang wui ê, haû Yhumsíng má gabú nyí keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haí a joq, nungmoq é matú akyû dut râ matú sheq ru nghut lhê.

² Haû, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyí keq. ^{†3} Hkâsu mù gâ le, Garai Gasâng é Woi-nyí eq noqkuq é bang, Hkrisduq Yesuq má gabú gumrong nyi é bang, gungsho má a lumhkaû é bang, nga-nhúng gi, ahpyo-kuq hpyit hkam yu é bang akying ^{††} nghut lhê. ⁴ Ngò kúm gi, gungsho má lumhkaû râ hkyô wó ang sù nghut lhê.

Góbang rayuq yuq, haû gungsho má lumhkaû râ hkyô wó âng lhê ga myit é nghut le gi, ngò gi, je riyhang wó sù nghut lhê. ⁵ Ngò gi, hkû lé é htâng shit nyí nghû râ nyí má ahpyo-kuq hpyit bê sù; Israellaq amyû mâ é, Ben-yamyin é awut ashín nghut sù, Hebre byù mâ é Hebre rayuq nghut lhê; jep é tarâ đông ga jang, ngò gi, Hparishe rayuq nghut lhê; ⁶ shirong é hkyô eq séng luí ga jang, ngò gi, haû noqkuq hpúng lé zing-rí wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lhunglháng gi, ahkuí, Hkrisduq é yanmai sùm byuq é chyat nghut bê nghû myit yù bê nghut lhê. ⁸ Hau htoq agó, ngò gi, ngá é Yhumsíng Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq đông myit yù bê. Hkâsu mù gâ le, lhunglháng lé ngò tô pyám é gi, Yhang é yanmai nghut lhê. ⁹ Ngò gi, Hkrisduq lé wó yù râ eq, Yhang eq rahá wó nghut nyí râ matú, haû jung hkangmó lé buzaq nghû myit yu pyám bê. Garai Gasâng chyáng mai lo é dingmán hkyô lé ngò jep é tarâ đông wó ho yu é a nghut, Hkrisduq lé lumjíng é yanmai za wó yu é ru nghut lhê; haû gi, lumjíng myit mai wó é nghut lhê. ¹⁰ Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri. ¹¹ Haû jáng gi, ngò le, shi byuq bê mai dum dui toq é hkyô lé wó myoqbyu râ nghut lhê.

Myit Myoqbyu Tô É Jowò Shut Din Nyi Râ Hkyô

¹² Ngò gi, haû pé banshoq lé wó gû bê le a nghû naù, ngò gumjup gû bê le a nghû naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghû, châng hkat nyi lhê. ¹³ Gumang wui ê, ngò yhang ngò gi, haû lé wó hap yù bê nghû a myit; nghut kôlhang, ngò kut é muzó ralhú gi, nunghtáng mâ é lé tô-myhí pyám mù, myoq hí mâ é lé wó yù shoq nghû shikut luí, ¹⁴ Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yù râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglháng gi, haû sù é myit bò râ lhê. Rajung jung má nungmoq myit é hkyô shai nyi kô é nghut le gi, haû lé le, Garai Gasang gi, nungmoq lé san za tân shit râ nghut lhê. ¹⁶ Hká đông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyí sháng.

¹⁷ Gumang wui ê, nungmoq gi, ngò kut é đông chôm kut nyí keq, ngamoq mai nungmoq lé kut shit é alik eq rajung za châng é bang lé wú yù keq. ¹⁸ Hkâsu mù gâ le, hí hkûn ngò, nungmoq lé anum num taí kyô wú luí, ahkuí lháng, ngaû byí eq dum taí kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri. ¹⁹ Yhangmoq é jiltùm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myt gi, mingkan zè htoq má za nghut ri. ²⁰ Nghut kôlhang, nga-nhúng é yhummau gi, mauhkûng mingdán má nghut lhê. Nga-nhúng gi, haû mâ é Yhumsíng Yesuq Hkrisduq gâ é hkyi yù Sù lé, myoqbyu lánng nyi é bang nghut lhê. ²¹ Yhang gi, jung hkangmó lé, Yhang uphkang é a-ô má wó kut tô é Yhâng é a-tsâm eq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

4 Haû mù luí, chyitdap é luzúm wui le nghut mù, ngò chyitdap bûn nghâm nyi é, ngá é gabú jowò eq janmaú nghut nyi é, ngá é gumang wui ê, haû gi, Yhumsíng má nungmoq hkâsu kut yap gîng nyi râ hkyô nghut lhê.

Lhoq Pun Lhoq Kyîng É Hkyô

² Ngò gi, Uodia eq Suntuki nhik lé, haû Yhumsíng má rayuq eq rayuq myit huí lhùm nyi râ matú, gyai yhang pyíng kat lhê. ³ Ngá é mù wùn luzúm kyîng ê, ngò gi, myiwe shí nhik lé garúm yù laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má myíng bo é, ngá é mù wùn luzúm wui góbang eq le, haû gabú danglù hkyô má ngò eq rahá gyai shikut wú bê sù nhik nghut lhê.

⁴ Haû Yhumsíng má hkâ-nhâm le gabú nyí keq! Ngò dum taí lhê, gabú nyí keq! ⁵ Nungmoq nú-nhâm é hkyô, byù banshoq bang lé sé nhâng keq. Haû Yhumsíng gi, chyáng bê nghut ri. ⁶ Haí eq séng luí le, myit hkâ-myô hkâchíq kó; hkyô hkangmó má jeju hkya-on

† Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê. †† Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.

uchyang, kyûdûng é eq dúng tôngbán é dông, nungmoq dúng é hkyô pé lé, Garai Gasâng chyáng shit kyô nyi keq. ⁷ Haú hkûn, sé gyô é nyan banshoq htoq má gyaú é, Garai Gasâng é nguingón hkyô gi, nungmoq é myit nhiklhum eq nungmoq myit é hkyô lé, Hkrisduq Yesuq má upzúng byi nyi râ nghut lhê.

⁸Jihtûm má, gumang wuì ê, tengmán é, hpautap gíng é, dingmán é, sansêng é, wó chytidap é, hkungga gíng é, haí má nghut kôlhang, aróng wó dik é hkyô rajung jung, a nghut jáng, hkyá-on gíng é hkyô rajung jung bo é nghut le gi, haú sù é hkyô pé lé myit nyi keq. ⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyi keq. Haú hkûn, nguingón hkyô byi é Garai Gasang gi, nungmoq eq rahá nyi nyi râ nghut lhê.

Jeju Bûn É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsîng má gyai yhang gabú nyi lhê; gè gè yhang, nungmoq myit chiq byi nyi kôlhang, haú lé tûn shit râ ahkáng a wó kó nghut ri. ¹¹ Ngò îsu nghû taí nyi é gi, ngò má râ é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yù bê nghut lhê. ¹² Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkanmó eq dut tô é ahkyo lhum jup má, wam gyi kôlhang, zòmut kôlhang, agùn agó wó tô nyi kôlhang, ra châ to kôlhang, myit dik nyi râ hpaqchyí lé ngò wó mhoq yù bê nghut lhê. ¹³ Ngò gi, ngo lé wum-o a-tsam byi sù Hkrisduq é yanmai, hkyô hkat hkanmó wó kut lhê.

¹⁴ Nghut kôlhang, ngò wuîhke jamjau huí nyi é hkûn, nungmoq garúm yù kô é gi, ge é hkyô kut bekô nghut

ri. ¹⁵ Hau htoq agó, Hpilipi byu pé nungmoq sê é eq rajung za, haú gabú danglù lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló râ hkûn, haú byi é hkyô eq lhom yu é hkyô má, nungmoq mai lai luí, noqkuq hpúng gotû ralhum lháng, ngo lé garúm kat é hkyô a bo é nghut lhê.

¹⁶ Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adàm dàm hûn byi bekô nghut ri. ¹⁷ Ngò gi, chyunghuq chyunghtâng lé ho nyi é a nghut, nungmoq mai ashi je myo zuí jat râ matú lé za sheq ho nyi é nghut lhê. ¹⁸ Ngò gi, haí le gúm shoq myang yu é htoq agó, chyân shoq lháng nghut bê. Ahkuí, haú nungmoq hun kat é chyunghuq lé, Epahprodi chyáng mai ngò lhom myang yù luí, ngò má agùn agó nghut nyi bê. Haú pé gi, namngón jung hkungga su, Garai Gasang lé gabú nhang é, hap yù gíng é hkungga ralhum nghut ri. ¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

²⁰ Hpungwup shingkang gi, nga-nhûng é Îwa Garai Gasâng chyáng pyat dedu ahtum abyuq ru joq nyi sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuì gi, nungmoq lé shi-kyâm kat akô nghut ri. ²² Sân-yúng bang banshoq gi, nungmoq lé shi-kyâm kat akô; Kethaq é yhûm mã é sân-yúng bang gi, je riyhang shi-kyâm kat akô nghut ri.

²³ Yhumsîng Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

Kolose

(Colossians)

1 Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhùng é gumang Timohti gi, ² Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyang dang kyô kat lhê. Nga-nhùng é Íwa Garai Gasâng chyang mâ é jeju eq nguingón hkyô gi, nungmoq chyang ru joq nyi sháng gaq.

Jeju Hkya-ôn É Eq Kyûdung É Dang

³ Ngamoq gi, nungmoq é matú kyûdung byí é hkûn, nga-nhùng é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê. ⁴ Haí mù gà le, Hkrisduq Yesuq má nungmoq lumjínq hkyô eq Yhâng é sân-yúng bang banshoq lé nungmoq chytidap é hkyô lé, ngamoq wó gyô é yanmai nghut lhê.

⁵ Lumjínq myit eq chytidap myit haû gi, nungmoq é matú mauhkûng htoq má hkong to byí é myit myoqbyù hkyô † mai lo é nghut lhê. Myit myoqbyù hkyô haû lé gi, nungmoq chyang jé to bê gabú danglù nghut é tengmán mungdang mai, nungmoq wó gyô to gû nghut lhê. ⁶ Nungmoq gi, gabú danglù haû lé wó gyo luí, Garai Gasâng jeju eq sêng é tengmán hkyô lé sê hkyang é buinyi mai, nungmoq chyang ashi zuí é eq kô myhang nyi bê nghut é eq rajung za, gabú danglù haû gi, mingkan gón má ge é ashi zuí nyi é eq kô myhang nyi bê nghut ri. ⁷ Nungmoq gi, haú hkyô lé, ngamoq é chytidap byinzùm Epahpra chyang mai mhoq yu é nghut lhê. Yhang gi, ngamoq é gunglik đông, Hkrisduq é lhumzuí é hpúng mù wùn sù nghut lhê.

⁸ Yhang gi, haû Woi-nyí eq nungmoq lé byí tô é chytidap hkyô lé, ngamoq lé taí kyo sù le nghut ri.

⁹ Haû nghut é yanmai, ngamoq gi, nungmoq eq sêng é hkyô lé wó gyô é nyí mai, nungmoq é matú ayang kyûdung byí nyi lhê. Garai Gasang ô nau é hkyô lé sé rã hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq đông mai nungmoq chyang lhoq pyíng byi sháng gaq nghû, Yhâng chyang kyûdung byí nyi lhê. ¹⁰ Haû su kut kyûdung byí é gi, haû Yhumsing ô nau é hkyô eq gingdán é đông nungmoq asak wó duí luí, hkyô hkangmó má Yhang lé wó gabú nhâng rã matú nghut lhê. Hau đông mai, nungmoq gi, ge é muzó hkangmó má ashi zuí nyi luí, Garai Gasang lé sê é hpaqchyí má kô myhang nyi kó rã nghut lhê.

¹¹ Hau htoq agó, nungmoq gi, Yhâng é hpungwup a-tsam đông mai a-tsam banshoq eq wum-o lhoq kínq

† *Bun zo shí má bo é myit myoqbyù hkyô gi, Yesuq lé taí é nghut lhê.*

byí é huí nyi kó rã nghut lhê. Haû mù, nungmoq gi, gyai hkam jân é hkyô eq myit hing é hkyô lé, gabú myit mai wó yù kó rã nghut lhê. ¹² Maubó é mingdán má, sân-yúng bang eq sêng é muizè lé wó bo hkam yù rã matú, nungmoq lé gingdán nhang é sù haû Íwa lé le, jeju wó hkya-on kó rã nghut lhê. ¹³ Hkâsu mù gà le, Íwa haû gi, nga-nhúng lé, mauchut eq up é hkaû mai hkyi htoq yù luí, Yhang chytidap é Yhang Zô é mingdán má shuí hâng é Sù nghut lhê. ¹⁴ Nga-nhúng gi, haû Yhang Zo đông mai, hkyi xe yu é huí mù, yubak mara hkyut pyám byí é huí bê nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq eq a byu-myàng é Garai Gasâng é gungghyâng isâm nghut luí, zomún đông hpan tô é lhunglhâng htoq má gyaú é sù nghut ri. ¹⁶ Hkâsu mù gà le, mauhkûng eq myigùng htoq má joq é azíng zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglháng gi, Yhâng eq hpan to huí é chyat nghut lhê. Lhunglháng gi, Yhâng é matú, Yhâng eq hpan to huí é chyat nghut ri. ¹⁷ Yhang gi, lhunglhâng é hí mâ é nghut mù, lhunglháng gi, Yhâng é yanmai joq gíng bum é chyat nghut lhê. ¹⁸ Yhang gi, noqkuq hpúng nghu é gungdú é ulhum nghut ri; Yhang gi, jung hkangmó má gyaú dik é ushuq dut sháng gaq ga, sâng-hi awang nghut sù eq shi é bang mâ é hí dui toq é zomún dut sù nghut ri.

¹⁹ Hkâsu mù gà le, Garai Gasang gi, Yhâng é byíng jup hkyô banshoq, Yhang Zo má joq nyi rã lé myit nguí ô nau é nghut mù, ²⁰ haû tapzínq má htoq byí é Yhang Zô é sui đông mai nguingón hkyô kut byí é eq, myigùng htoq mâ é azíng zê nghut nghut, mauhkûng mâ é azíng zê nghut nghut, lhunglháng lé, Yhang Zo đông mai, Yhang eq nguingón simsaq hkyô xoq yù bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlaí é yanmai, nungmoq i-myt má, Yhâng é gye dut wú bekô nghut lhê. ²² Nghut kôlhâng, ahkuí, Garai Gasang gi, nungmoq lé, rã é hkyô a bo é eq mara hùn rã hkyô a bo é za, chyoiyúng é đông Yhâng é hí má shit rã matú, Hkrisduq é gungsho gungdu shí hkâm é đông, nungmoq eq nguingón simsaq hkyô xoq yù bê nghut ri.

²³ Haû gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gingtíng nyi mù, nungmoq é lumjínq hkyô má xoq nyi nyi é nghut

jàng sheq dut rã nghut lhê. Gabú danglù shî gi, nungmoq wó gyô wú bê nghut é htoq agó, mauhkung ô má hpan tô é jung hkangmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, rã tô ashî nghut é, Yhang hpuzô é hkyô lé, ngá é gùng má ngò lhoq gumjup yu nyi lhê. ²⁵ Ngò gi, Garai Gasâng é mungdang lé, nungmoq chyáng gumjup shoq hko kyo rã matú, Garai Gasang, ngo lé hun tô é wò mai, noqkuq hpúng hau é mù wùn sũ dut é nghut lhê. ²⁶ Mungdang haú gi, gohkùn mai apyat pyat haq tô gyó lo é záu tô é hkyô nghut kôhang, ahkuí gi, haú sãn-yúng bang lé hpông shit bê nghut ri. ²⁷ Garai Gasang, haú su kut é gi, záu tô é hkyô hau é agùn agó hpungwup shinggang, tungbaù pê chyáng hkâsu nghut é hkyô, yhangmoq lé sé nhâng rã matú nghut lhê. Záu tô é hkyô haú gi, hpungwup shinggang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

²⁸ Hkrisduq má gumjup é dông, byù yuq hkangmó lé wó shuí jé sháng gaq nghù, ngamoq gi, Hkrisduq é hkyô lé taí pyô luí, yuq hkangmó lé, hpaqchyí byéng-yá banshoq èq taí pun taí kyíng é eq mhoqshit nyi é nghut lhê. ²⁹ Ngò, haú-í yhang wó wùn waq shikut é gi, ngò má wum-o a-tsam byíng byíng mù zúi nyi Su é wum-o banshoq èq wùn waq shikut nyi é ru nghut lhê.

2 Ngò gi, nungmoq é matú le, Ladoki wà mó bãng é matú le, ngò eq myoqdong hkyûm a huí wú shî é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. ² Haú su awui ahke shikut é hkyô gi, yhangmoq, myit má wum-o byí é hui rã eq chyitdap myit má rading ralhú za wó dut rã matú nghut lhê. Haú hkùn, yhangmoq gi, Garai Gasâng é záu tô é hkyô nghut é, Hkrisduq lé wó sé rã matú, sê gyô é nyan lhunglhâng é isut byíng shoq lé wó yú kó rã nghut lhê. ³ Haú Hkrisduq má kúm gi, hpaqchyí byéng-yá eq sumsé hpaqchyí gâ é sutzè lhunglháng lé tsíng tô ri. ⁴ Nungmoq lé ngò haú hkyô taí kyô é gi, ó yuq le, dang ngón dang ngui èq mhoq hpyoq é dông, nungmoq lé a wó mhaú zo rã matú nghut lhê. ⁵ Hkâsu mù gâ le, ngá gungdu nungmoq eq rahá a nyi kôhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjíng é má hkâ-í gíngtíng nyi kô é lé myàng mù, ngò gabú nyi lhê.

Hkrisduq Dông Mai Wó É Gumjup É Asak Dui Hkyô

⁶ Haú mù luí, nungmoq gi, Hkrisduq Yesuq lé Yhum-síng nghù hap yù bekô nghut é eq rajung za, Yhang má asak xoq dui nyi keq. ⁷ Yhang má apùn amyit chín gíng nyi mù, kô myhang lò luí, nungmoq mhoq yù bê

eq rajung za, lumjíng hkyô má wum-o lhoq kíng mù, jeju hkyá-ôn é hkyô byíng zan nyi keq.

⁸ Hkrisduq chyáng mâ é a nghut é za, mingkan shî mâ é uphkâng tarâ pé eq xângzo wui é htungli cháng luí, mhaú zô é myit sôn hpaqchyí eq akyû a bo é dang dông, ó yuq èq le, nungmoq lé a wó shuí ngoq yú kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù, ¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri. ¹¹ Yhang má, nungmoq gi, byu loq èq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri. ¹² Nungmoq gi, wui-myhup hkâm é hkùn Hkrisduq eq rahá myhup yhùm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjíng kô é yanmai, Yhang eq rahá lhoq dui toq yu é hui bekô nghut ri.

¹³ Nungmoq é yubak mara pê é yanmai le, nungmoq é yubak gungsho mara lé huí sêng pyâm é a hkam yu é yanmai le, nungmoq shi tô é hkùn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhùng é yubak mara lhunglháng lé hkyut pyâm byi luí, ¹⁴ nga-nhúng eq shai lhum mù, nga-nhúng lé htuq htíng é, tarâ pé bo é jéyáng rã jihpán lé huí sêng pyâm byi bê nghut ri. Yhang gi, haú lé tapzíng htoq má dok tap pyâm é dông yu pyâm byi bê nghut lhê. ¹⁵ Haú dông mai, a-tsam bò bang eq ahkáng ayá wó bãng a-tsam lé lang hkyut hkyô pyâm mù, Yhang gi, tapzing èq yhangmoq lé ung pyâm é dông, byù pê é hí má yhangmoq lé de de kut to bê nghut ri.

¹⁶ Haú mù luí, nàng haí zo haí shuq é yanmai le, noqkuq htung eq sêng é poí buinyi, Lhoxan Lhosik poí, Bánno buinyi eq séng luí le, nungmoq lé, ó yuq èq le a wó jéyáng kó sháng gaq. ¹⁷ Haú pé gi, dut lò rã hkyô pê é wupzo chyat nghut lhê; haú gùng gyíng gi, Hkrisduq yhang nghut nyi ri. ¹⁸ Myit lhoq nyhum mhaú é eq maumang lagyô pé lé noqkuq é lé myit ngui é sũ ó yuq èq le, nungmoq lé, chyunghuq eq a gíngdán rã dông hkâkut nhâng kó. Haú su é yuq gi, yhumsíng byu-myang é lé †† za taí shikut mù, yhumsíng é gungsho myit mai, akôm yhang nghut é lé gyáng dang taí é sũ nghut ri. ¹⁹ Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi mù rahá lãng tsing tô é haú ulhum nghut é Hkrisduq eq xoq é hkyô lé byoq ló nhâng bê nghut ri.

²⁰ Nungmoq gi, Hkrisduq eq rahá, mingkan shî mâ é tarâ pé eq shi gang bekô nghut le nhíng, haí mù, haú eq sêng lhum nyi ashî kó lhú? "Hkâzui, hkâchyâm,

† Yhang gi, haú lé tapzíng htoq má dok tap pyâm é dông yu pyâm byi bê nghut lhê gâ é gi, Hkrisduq tapzíng má shî hkâm byí é hkùn, nga-nhùng é yubak mara banshoq lé, Garai Gasâng èq hkyut pyâm byí é lé taí nau é nghut lhê. †† Byu-myang é lé gâ é gi, yhang myit htoq é shing-rán lé gâ lhê.

hkâzàng." gâ é tarâ ô má nyi nyi ashi kó lhu? ²² Haú pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê. ²³ Haú sù é tarâ pé gi, yhumsing yhang no-qkuq shikut é, myit lhoq nyhum mhaú é eq gungdu lé gunjâng é pé nghut luí, hpaqchyí byéng-yá bo é su dut kôlhang, gungshô é agè ashop yut yut ô naú hkyô lé wó hkûm zing pyám râ má, hai akyû a bò nghut ri.

Chyoiyúng É Đông Asak Duì Râ Hkyô

3 Haú mù luí, nungmoq gi, Hkrisduq eq rahá lhoq dui toq é hui bekô nghut jâng, Garai Gasang é loqyo hkyam † má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq. ² Nungmoq gi, myidàm htoq mâ é azíng zê lé myit tuí é a nghut é za, ahtoq mâ é azíng zê lé myit tuí nyi keq. ³ Hkâsu mù gâ le, nungmoq gi, shí bekô nghut luí, ahkuí, nungmoq é asak gi, Hkrisduq eq rahá, Garai Gasang má haq tô é hui bekô nghut ri. ⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shing kang hkaú má htoq shit kó râ nghut lhê.

⁵ Haú mù luí, nungmoq é mingkan hkyô eq sêng é, ashop é đông gungsho zùm yap é hkyô, agot a-û nyi zô lhûm é hkyô, ye lhaí nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haí lé le sat pyám keq. ⁶ Haú hkyô pé é yanmai, Garai Gasang é nhikmo-yo hkyô gi, jino a gyo bâng é ahtoq má †† jé râ za nghut lhê. ⁷ Laí lò bê hkûn, nungmoq le, haú hkyô pé đông sô wú kô é nghut lhê. ⁸ Nghut kôlhang, ahkuí, nungmoq gi, nhikjum yô é, nhikmo-yô é, agè ashop é đông nò shoq kut é, lumù gansang é eq, nungmoq é nhutwuí mai hkunchoq taí é hkyô shí pé banshoq lé, yhumsing gùng yhumsing tô pyám râ dut lhê. ⁹ Rayuq eq rayuq hkâ-mhaú lhum kó; hkâsu mù gâ le, nungmoq gi, nungmoq é byù xau eq byù xau é nyi yap hkyô lé hkyut pyám mù, ¹⁰ byù sik lé tú wut yú kô é nghut lhê; byù sik haú gi, sumsé hpaqchyí đông mai, yhang lé hpân Su é gungdu isâm má asik jat lò nhang é huí nyi ri. ¹¹ Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haú mù luí, Garai Gasang èq hkyin yù huí é bang, Yhâng èq gyai yhang chytidap é huí é chyoiyúng bang đông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhum-sing gùng yhumsing mebu su wut to keq. ¹³ Nungmoq yhangchang mara kut shut é hkyô joq é nghut jâng, hkam jan byí lhum luí, rayuq eq rayuq mara hkyut byí lhum keq. Haú Yhumsing gi, nungmoq é mara hkyut pyám byí é su, nungmoq le mara hkyut byi keq. ¹⁴ Haú ge é sâmlai banshoq wó é htoq agó, gumjup é rading

† Loqyo hkyam nghû é gi, ahko ahkáng wó é jowò lé gâ é nghut lhê. †† Jino a gyo bâng é ahtoq má, gâ é dang, chyúmding ra-am má a bò nghut lhê.

ralhum za dut é hkyô má, banshoq lé rahá wó tuí zing tô é chytidap myit lé puq wut to keq.

¹⁵ Nungmoq gi, nguingón hkyô wó râ matú ji yu é hui bekô nghut mù, gungdu ralhum mâ é bang chyat nghut bekô yanmai, Hkrisduq é nguingón hkyô lé, nungmoq é myit má up nhang nyi keq. Haú mù, jeju hkya-ôn nyi keq. ¹⁶ Nungmoq, rayuq eq rayuq, hpaqchyí byéng-yá banshoq èq mhoqshit é eq lhoq pun lhoq kyíng lhûm é hkûn le, Garai Gasang lé nungmoq jeju bûn é myit mai, jihkyang dang, hkya-on mahkôn, woi-nyí eq sêng é mahkôn pé hkôn é hkûn le, haú Hkrisduq é mungdang lé, nungmoq é myit nhiklhum má agùn agó bò nhang nyi keq. ¹⁷ Nungmoq haí wá kut kut, dang đông nghut nghut, zui saí é đông nghut nghut, banshoq lé Yhumsing Yesuq é mying mai kut é hkûn, haú Íwa nghut é Garai Gasang lé Yhang đông mai jeju hkya-on keq.

Hkristan Ikun Byu Pé Nyi Yap Râ Hkyô

¹⁸ Ikun myhí pé ê, ikun hpô pé uphkan é ahkaú má nyi keq. Haú gi, Yhumsing é hí má kut gíng é hkyô nghut lhê.

¹⁹ Ikun hpô pé ê, ikun myhí pé lé chytidap nyi keq. Yhangmoq lé dang htân hkâ-nyô kó.

²⁰ Zo wuí ê, jung hkan gmó má nungmoq é mó wui é jino gyo keq; hkâsu mù gâ le, haú gi, Yhumsing ô nau é hkyô nghut lhê.

²¹ Íwá pé ê, nungmoq é zo wuí lé myit hkâ-nô nhâng kó, nò nhâng jâng gi, yhangmoq, myit wum gyuí byuq kó râ nghut lhê.

²² Jùn pé ê, hkyô hkan gmó má nungmoq é myidàm htoq mâ é jùn sîng bang uphkan é ahkaú má nyi nyi keq; yhangmoq é myoq hí má za zui saí luí, myoqdong ho é đông a nghut é za, haú Yhumsing lé gyuq hkan-gâ é eq lhumzui é myit mai zui saí nyi keq. ²³ Nungmoq haí wá kut kôle, byu é matú kut é a nghut, haú Yhumsing é matú kut nyi é đông, nungmoq é myit nhiklhum banshoq eq zui saí nyi keq. ²⁴ Haí mù gâ le, nungmoq gi, haú Yhumsing chyáng mai, muizé lé chyunghuq đông wó yú kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsing Hkrisduq ru nghut lhê. ²⁵ Kut shut sù gi, yhang kut shut é marâ matú dam byí é hui zo râ nghut lhê, haí mù gâ le, Garai Gasang gi, myoqdong hkyin é hkyô a joq.

4 Jùn sîng bang ê, nungmoq é jùn pé lé, tengmán é eq gíng âng é đông lajang byí nyi keq; haí mù gâ le, nungmoq le, mauhkûng htoq má Yhumsing rayuq wó é lé sé kô é yanmai nghut lhê.

Xoq Lui Pying Kat É Hkyô

² Nungmoq gi, kyúđùng é má myit zing zuq nyi mù, machyâ luí, jeju hkya-ôn nyi keq. ³ Ngò, shamtoq-tui hut huí nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyú bo dung byi kó laq. ⁴ Haú Hkrisduq é zaú tô é hkyô lé, ngò taí âng é đông san za wó taí pyô sháng gaq,

kyû bo dung byi kó laq. ⁵ Nungmoq gi, a lumjǐng bang eq zùm yap é hkûn hpaqchyî bo nyi keq; wó yu é ahkýing hkangmó lé rago yhang chung jai keq.

⁶ Nungmoq gi, yuq hkangmó lé hkâsu tû taí râ hkyô wó sé kó shoq, dǎng nyo é má, xô èq nghám nhang é su, hkâ-nhám le jeju byíng é dang bo nyi shǎng gaq.

Ló Htǎng É Shi-kyám Dang

⁷ Tuhkiku gi, ngá hkyô eq sêng é danglù banshoq, nungmoq lé taí kyo râ nghut lhê. Yhang gi, ngá é chyitdap gumang, haú Yhumsǐng má, lhumzui é hpúng mù wùn sù eq byinzùm nghut lhê. ⁸ Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê. ⁹ Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyi é hkyô jung hkangmó lé taí kyo kó râ nghut lhê.

¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aú Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.) ¹¹ Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm

mû zui bang má, haú bang za Yudaq byu pé nghut kômù, yhangmoq gi, ngo lé nhik tǐng byî é bang nghut akô. ¹² Nungmoq chyáng mâ é byù nghut sù eq Hkrisduq Yesuq é mû wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglháng má hkyak lùm to mù, gumjup luí wó gingtǐng nyi shǎng gaq ga, Yhang gi, ayang nungmoq é matú kyúdung shikut byî nyi ri. ¹³ Nungmoq é matú le, Ladoki wà mó eq Herapoli wà mó bǎng é matú le, yhang gi, gyai yhang mû zui shikut byî é hkyô lé, yhang é matú ngò saksé hkâm lhê. ¹⁴ Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵ Ladoki wà mó mâ é gumang wui lé le, Numhpa eq yhâng yhûm mâ é noqkuq hpúng lé le, bo shi-kyám byi keq.

¹⁶ Laiká shî lé, nungmoq lé nghap kyô é htǎng má, Ladoki byu pê é noqkuq hpúng má le nghap nhâng mù, Ladoki wà bǎng chyáng hûn kat é laiká lé le, nungmoq nghap wú keq.

¹⁷ "Haú Yhumsing chyáng mai nǎng hap yù to bê é muzó lé rago za lhoq pán pyám aq." nghû, Arhkipò lé taí kyo keq.

¹⁸ Ngò, Poluq gi, ngá é loq èq yhang shi-kyám dang shî lé kâ kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyi shǎng gaq ô.

1 Htesaloni

(1 Thessalonians)

1 Ngò Poluq, Sila † eq Timohti pé gi, Îwa Garai Gasang eq Yhumsing Yesuq Hkrisduq má nghut nyí bê bang, haû Htesaloni wà mó byu pé é noqkuq hpúng lé dang kyô kat lhê. Garaî jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

² Ngamoq gi, hkâ-nhám le, nungmoq banshoq bâng é matú, Garai Gasang lé jeju hkya-on luí, ngamoq é kyûdung dang má nungmoq lé bo dúng lhôm nyi lhê.

³ Nungmoq é lumjín myit mai zui saí é nungmoq é muzó lé le; chyitdap myit é yanmai, nungmoq shikut é hkyô lé le; nga-nhûng é Yhumsing Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhûng é Îwa Garai Gasang é hí má, ngamoq ru bûn nyi lhê.

⁴ Garai Gasang chyitdap é gumang wui ê, Yhang nungmoq lé hkyin yù bê lé, ngamoq sê lhê. ⁵ Hkâsu mù gà le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkûn, nungmoq é matú hkâsu kut laí lo é hkyô lé, nungmoq sé gù nghut lhê.

⁶ Nungmoq gi, wuîhke jamjau myo myo hui zo kôlhang, Chyoiyúng Woi-nyí byí é gabú myit mai, danglù haû lé lhom yù kôluí, ngamoq lé le, haû Yhumsing lé le, alik kut yu é bang dut bekô nghut ri. ⁷ Haû mù, Makedoni mau eq Ahkaia mau mâ é lumjín bang banshoq é alik, nungmoq dut bekô nghut ri. ⁸ Nungmoq chyáng mai, Makedoni mau eq Ahkaia mau má, haû Yhumsing é mungdang hû htoq ló e za a nghut, Garai Gasang má nungmoq lumjín hkyô gi, jowò hkanmó jàm ló bê nghut luí, ngamoq gi, haí le taí nó a ra lo nghut ri. ⁹ Hkâsu mù gà le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garai Gasang shut hkâsu kut lhing lò mù, rú dui nyi é eq tengmán é Garai Gasang lé dojaú nyi é hkyô lé le; ¹⁰ mauhkûng mâ é haû Yhang Zo lé lánng nyi é hkyô lé le, yhangmoq taí kyô akô. Yhangzo haû gi, Yhang èq shi é mai lhoq dui toq yu é hui luí, jé lô râ nhikmó yo hkyô mai nga-nhúng lé hkyi yù sù, Yesuq nghut ri.

Poluq, Htesaloni Wà Mó Má Garaî Mù Wùn Waq É Hkyô

2 Gumang wui ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê. ² Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoi é huí wú bê nghut lhê; nghut kôlhang, nga-nhûng é Garai Gasang garúm é yanmai, gyaí lhom htuoq htíng é hui kôle, Garai Gasang é gabú danglù lé, a gyuq a kyum nungmoq lé wám taí kyô é nghut lhê. ³ Hkâsu mù gà le, ngamoq lhoq pun lhoq kyíng é hkyô gi, shut é, a nghut jáng, a sansêng é i-myt đông eq nungmoq lé mhaú zô é đông a nghut e za, ⁴ haû gabú danglù lé chûng gíng é bang ga, Garai Gasang chyáng mai ahkáng wó é đông za, ngamoq taí é nghut lhê. Ngamoq gi, byu pé lé gabú nhâng râ matú a nghut, ngamoq é myit lé chyam wú nyi é Garai Gasang lé, gabú nhâng râ matú shikut é ru nghut lhê. ⁵ Hkâsu mù gà le, nungmoq sê é eq rajung za, ngamoq gi, lhoq ngón mhaú é dang le hkâ-nhám a chûng wú, nghop tô é myoqnoq myit le hkâ-nhám a bò, Garai Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotú ó yuq mai le hkya-on râ lé ho nyi é a nghut, Hkrisduq é lagyô pé nghut é eq rajung za, nungmoq lé wòlai hûn naù jáng wó hun lhê; nghut kôlhang, ⁷ ìnu rayuq, yhang é zoshâng zô pé lé hku baú é su, nungmoq chyáng nú-nhâm é đông nyi laí lò bê nghut lhê. ⁸ Ngamoq gi, nungmoq lé gyaí yhang chyitdap luí, Garai Gasang é gabú danglù za a nghut, ngamoq é asak pé nungmoq lé byí pyâm le lhang nhik dik lhê; hkâsu mù gà le, nungmoq gi, ngamoq chyitdap dik é bang dut bekô nghut é yanmai nghut lhê. ⁹ Gumang wui ê, nungmoq gi, ngamoq gyaí yhang mù zui shikut é hkyô lé, gè gè bun kó râ nghut lhê; Garai Gasang é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghû, ngamoq gi, nyí lé, myín lé, mù zui é nghut lhê.

¹⁰ Ngamoq gi, lumjín bê bang nungmoq é hí má, hkâsu chyoiyúng é eq dingmán é, mara hûn râ a bo é bang dut laí lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gà le, ngamoq gi, ìwa rayuq mai yhumsing yhangzô pé lé kut byí é su, nungmoq yuq hkanmó lé, myit wum byí nyi é hkyô lé le, nhik taí títng nyi é hkyô lé le, ¹² Yhang é mingdán eq hpungwup shíngkang má, nungmoq lé wut yu é Garai Gasang eq gíngdán é đông, nungmoq asak wó dui nyi

† Sila lé gi, Salwanu le gà lhê.

sháng gaq nghû, nungmoq lé wum byî nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é đông a nghut e za, lumjínng é bang nungmoq má mù zúí nyi é, haû Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkya-ôn nyi lhê. ¹⁴ Gumang wuì ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpûng pé lé, alik kut yu é bang dut bekô nghut ri. Noqkuq hpûng haú pé gi, Yudaq byu pé zing-rí é lé hui zô é su, nungmoq le, yhumsing mau mâ é byu pé zing-rí é lé hui zô akô nghut ri. ¹⁵ Yudaq byu pé gi, haû Yhumsing Yesuq eq myiqhtoí pé lé sat pyám kôluí, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyê dut é bang nghut akô. ¹⁶ Túngbaù pé hkyi yù hui râ matú, ngamoq hko kyô é hkyô lé, yhangmoq hkûm akô; yhangmoq gi, hkâ-nhâm le, yhumsing é mara lé dik shoq haú đông lhoq jat myô yù akô nghut ri. Haû mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Huí Nau Nyi É Hkyô

¹⁷ Gumang wuì ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luí, wó myang hui shoq nghû, ngamoq gyai yhang shikut nyi lhê.

¹⁸ Nungmoq chyáng ngamoq jé lé nau mù luí, ngò Poluq yhang, adàm dàm shikut wú bê; nghut kôlhang, Tsadán gi, ngamoq lé hkûm tang pyâm ri. ¹⁹ Hkâsu mù gâ le, nga-nhûng é Yhumsing Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông râ janmaú gi, haí jung wá nghut lhê gâ le, nungmoq yhang nghut nyi lhê a nghut kó lhu? ²⁰ Gè gè yhang, nungmoq gi, ngamoq é gumrông jowò eq gabú hkyô nghut nyi ri.

3 Haû mù luí, ngamoq gi, haû lé a wó jân nyi lo jáng, Ahten myuq má ngamoq baù nyi gyô le je gè râ nghut lhê nghû, myit hpyit yù mù, ² wuìhke jamjau shí pê é yanmai, ó yuq le, myit a hten kó sháng gaq nghû, nungmoq é lumjínng hkyô má, nungmoq lé wum-o byi râ eq myit wum byi râ matú, ³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhúng gi, wuìhke jamjau pé hui zo râ matú, hkyin to huí é bang nghut é lé, nungmoq yhang rago sê nyi lhê. ⁴ Nga-nhúng gi, zing-ri hui zo râ nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taí kyô nyi gù nghut bê. Nungmoq rago sê é eq rajung za, haú đông dut bê nghut ri. ⁵ Hau é yanmai, ngò a wó jân nyi lo jáng, haû gunlaú sù mai nungmoq lé gunlaú yù luí, ngamoq wùn waq bê muzó gi, akôm dut byuq râ lé, myit chiq mù, nungmoq é lumjínng hkyô lé wó sé râ matú, yhang lé ngò nhang kat é nghut lhê. Gunlaú sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjínng hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhâm le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taí kyo bê nghut ri. ⁷ Haû mù luí, gumang wuì ê, ngamoq myit myo uhkyí é hkyô eq zing-ri huí é hkyô pé banshoq má, nungmoq é lumjínng hkyô é yanmai, nungmoq eq séng luí myit wum byi é hkyô lé ngamoq wó yù bê nghut lhê. ⁸ Ahkuí, ngamoq gi, haû Yhumsing má nungmoq yap gíng nyi kô é yanmai, gè gè nyi ngón bê nghut lhê. ⁹ Nga-nhûng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju úng hkya-on râ lhu? ¹⁰ Ngamoq gi, nungmoq lé dum myàng râ matú eq, nungmoq é lumjínng myit má langhpyut é hkyô lé wó lhoq hkúm byi râ matú, nyí, myín, gyai yhang lhuzui luí kyûdûng nyi lhê.

¹¹ Nungmoq chyáng ngamoq lé râ matú, nga-nhûng é Yhumsing Yesuq eq nga-nhûng é Íwa Garai Gasang yhang ngamoq lé hkyô hpóng byi sháng gaq. ¹² Nungmoq lé ngamoq chyitdap nyi é su, haû Yhumsing gi, nungmoq é chyitdap myit lé, rayuq eq rayuq é ahtoq má le, yuq hkanmó é ahtoq má le, lhoq kô jat, lhoq pyíng byi sháng gaq. ¹³ Nga-nhûng é Yhumsing Yesuq gi, Yhâng é chyoiyúng bang banshoq eq rahá lé é hkûn, nga-nhûng é Íwa Garai Gasâng é hí má, nungmoq gi, mara hùn jowò a joq é eq chyoiyúng é bang dut râ matú, nungmoq é myit nhiklhum má, haû Yhumsing mai wum-o lhoq kíng byi nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

Garai Gasang Ô Nau É Đông Asak Dui Râ Hkyô

4 Xoq luí taí nau é gi, gumang wuì ê, ngamoq gi, ahkuí nungmoq cháng nyi é eq rajung za, nungmoq hká đông nyi yap luí, Garai Gasang lé gabú nhang râ hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat râ matú, Yhumsing Yesuq má nungmoq lé dúng tôngbán luí, myit wum byi kat lhê. ² Hkâsu mù gâ le, nungmoq gi, haû Yhumsing Yesuq é ahko ahkáng đông, ngamoq mai, nungmoq lé mhoqshit to byí é hkyô pé lé, sê akô nghut ri.

³ Garai Gasang ô nau é hkyô gi, haû nungmoq sân-yúng é hui râ matú le, ashop é đông gungsho zùm yap é hkyô lé koi pyám râ matú le; ⁴ nungmoq yuq hkanmó gi, haû Garai Gasang lé a sê é, a lumjínng bang kut é su, gungsho yut yut ô nau é hkyô a châng e za, ⁵ haû chyoiyúng é eq hkungga gíng é sù wó dut shoq, yhumsing gùng lé wó hkan é hkyô mhoq yù râ matú le; ⁶ shí hkyô eq séng luí, ó yuq le, yhumsing é gumang lé, a ge shut, a ge lhúngzo râ matú le nghut lhê. Ng-

amoq, nungmoq lé taí kyo mù, lhoq pun lhoq kying gù nghut bê eq rajung za, haù Yhumsing gi, haù hkyô shut é banshoq lé, dam byi râ nghut lhê. ⁷ Hkâsu mù gà le, Garai Gasang gi, nga-nhúng lé a sân-yúng é bang dut râ matú wut yu é a nghut, chyoiyúng é đông asak dui nyi râ matú sheq wut yu é ru nghut lhê. ⁸ Haù mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haù nungmoq lé, Yhâng é Chyoiyúng Woi-nyí byí tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chytidap lhum râ matú, nungmoq yhang, Garai Gasang eq mhoqshit é hui bekô nghut é yanmai, gumang yhangchang chytidap lhùm é hkyô eq séng luí, ngamoq gi, nungmoq chyáng kê kat byi a ra lo nghut ri. ¹⁰ Haù eq rajung za, nungmoq gi, Makedoni mau gón mã é gumang wui banshoq lé chytidap nyi akô nghut ri. Nghut kôlhang, gumang wui ê, haù su je myo kut râ matú nungmoq lé ngamoq wum byí lhê.

¹¹ Nungmoq é nyí wui lhê é asak dui hkyô má, gotú byu pê êq hkunggâ é wó yú luí, ó yuq lé le, lumhkaù a ra wó dut sháng gaq, hí hkùn nungmoq lé ngamoq taí kyô tô é eq rajung za, num num byù zè râ hkyô lé le, yhumsing eq a séng é hkyô a kut wún râ lé le, yhumsing loq eq zui saí mù nyi râ lé le, nungmoq é myit myoqbyù jowò kut yú keq.

Haù Yhumsing Gyó Lé Râ Hkyô

¹³ Gumang wui ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haù yhup ngón byuq é bang eq séng luí, nungmoq a sé râ lé, ngamoq a ô nau é nghut lhê. Yhup ngón byuq é bang gà é gi, lumjínng luí shi ló byuq é bang lé gà é nghut lhê. ¹⁴ Hkâsu mù gà le, Yesuq shí luí, dum dui toq bê hkyô lé nga-nhúng lumjínng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghù, nga-nhúng lumjínng é nghut lhê. ¹⁵ Haù Yhumsing taí é dang eq rajung za, nungmoq lé ngamoq taí kyo kôlé, haù Yhumsing dum lé é hkùn, asak dui nyi é eq myit gyo tô é bang nga-nhúng gi, yhup ngón byuq bê bang htoq ratsuí le wó hí râ a nghut. ¹⁶ Hkâsu mù gà le, haù Yhumsing yhang gi, htê mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkúng mai gyó lé lô luí, haù Hkrisduq má shi ló bê bang hí dui toq râ nghut lhê. ¹⁷ Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haù Yhumsing eq hui râ nghut lhê. Haù hkùn, nga-nhúng gi, haù Yhumsing eq ahtum abyuq nyi nyi berâ nghut lhê. ¹⁸ Haù mù luí, nungmoq gi, dang shí pé mai rayuq eq rayuq myit wum byí lhùm nyi keq.

⁵ Nghut kôlhang, gumang wui ê, ahkyíng buinyi eq séng luí, nungmoq lé ngamoq kê hùn byi a ra lo nghut ri. ² Hkâsu mù gà le, haù Yhumsing é buinyi gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsing é buinyi

gi, Yesuq dum jé lé râ buinyi lé taí nau é nghut lhê.

³ Byu pé gi, 'Ngingón yuqyo ri.' ga taí nyi bùm kô é u lé, gùng laí é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká đông lé yhangmoq wó hpang lut kó râ a nghut.

⁴ Nghut kôlhang, gumang wui ê, nungmoq gi, mauchut hkaù má nyi é bang a nghut é yanmai, buinyi haù gi, hkau sù lé é su, nungmoq é matú byodàn tung dut râ a nghut. ⁵ Nungmoq lhunglhâng bang gi, maubó é yhangzô pé eq nyí é yhangzô pé nghut lhê. Nga-nhúng gi, myín eq mauchut hkaù eq séng é bang a nghut. ⁶ Haù mù luí, nga-nhúng gi, byù góbang su a yhup nyi e za, machyâ luí, gyíng gyíng kut nyí sháng. ⁷ Hkâsu mù gà le, yhup é bang gi, myín lé yhup akô; î shuq wut é bang le, myín lé shuq wut akô. ⁸ Nghut kôlhang, nga-nhúng gi, nyí eq séng lhê nghut é yanmai, gyíng gyíng kut nyí luí, lumjínng myit eq chytidap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng. ⁹ Hkâsu mù gà le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsing Yesuq Hkrisduq mai, hkyi yù hkyô lé nga-nhúng wó yú râ matú hkyin to bê nghut lhê. ¹⁰ Yesuq gi, nga-nhúng yhup bân nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng é matú shí hkâm byi bê nghut ri. ¹¹ Haù mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byí lhum mù, htuqluq htuqbáng kut lhùm nyi keq.

Ló Htâng Lhê É Mhoqshit Hkyô

¹² Gumang wui ê, nungmoq mã é muzó shikut luí, haù Yhumsing má nungmoq lé up nyi é eq lhoq pun lhoq kyíng nyi é bang lé, nungmoq hkungga râ matú le; ¹³ yhangmoq zui saí é muzó jizó é yanmai, yhangmoq lé chytidap myit đông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq ngingón lhùm nyi keq. ¹⁴ Gumang wui ê, nungmoq lé ngamoq wum byí kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myit hính byí nyi keq; ¹⁵ ó yuq lé nghut kôlhang, a ge é hkyo é yanmai, a ge é đông a taù kut râ lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byí lhum nyi keq.

¹⁶ Hkâ-nhám le, ru gabú nyi keq; ¹⁷ abyit alan kyúđung nyi keq; ¹⁸ hkyô hkat hkangmó má jeju hkyôn nyi keq, hkâsu mù gà le, haù pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haù Woi-nyí lé hkâlhoq jôm pyám kó; ²⁰ myiqhtoi htoí é lé, haí su a ngàm hkâkut kó. ²¹ Jung hkangmó lé, chyam wú luí, ge é hkyô lé zú zing nyi mù, ²² agè ashop é hkyô hkangmó lé, koi pyám keq.

²³ Nguingón hkyo é apûn awang nghut é Garai Gasang yhang, nungmoq lé, lhungháng lhoq sân-yúng pyám byi sháng gaq; nga-nhûng é Yhumsîng Yesuq Hkrisduq dum lé é hkûn, nungmoq é woi-nyí, myit nhiklum, gungdu gi, mara hûn râ hkyô a bò sháng gaq. ²⁴ Nungmoq lé ji yu é Sû gi, lhumzuí é Sû nghut lhê mù, Yhang, shí hkyô lé kut râ nghut lhê.

²⁵ Gumang wuì ê, ngamoq é matú kyû bo dung byi kó laq. ²⁶ Gumang wuì banshoq bang lé, chyoiyúng é chytpuq puq é dông bo shi-kyám byi kó laq. ²⁷ Gumang wuì banshoq bang lé, hun kat é laiká shî nghap kyo râ matú, haû Yhumsîng é myìng mai, ngò, nungmoq lé pying kat lhê.

²⁸ Nga-nhûng é Yhumsîng Yesuq Hkrisduq é jeju gi, nungmoq chyáng ru joq nyí sháng gaq ô!

2 Htesaloni

(2 Thessalonians)

1 Ngò Poluq eq Sila, Timohti pé gi, nga-nhông é Íwa Garai Gasang eq Yhumsing Yesuq Hkrisduq má nghut nyi bê bang, haû Htesaloni wà mó byu pè é noqkuq hpúng lé dang kyô kat lhê.

² Haû Íwa Garai Gasang eq Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyi sháng gaq ô!

Jeju Hkya-on É Eq Kyûdung É Hkyô

³ Gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri; haû gi, gíng lhê; hkâsu mù gà le, nungmoq é lumjín myit gi, je je kô jat lo nyi luí, nungmoq yuq hkangmó é chyt-dap myit le, rayuq eq rayuq é ahtoq má je myô jat lo nyi é yanmai nghut lhê. ⁴ Haû mù luí, ngamoq gi, nungmoq zing-ri huí é hkyô pé eq wuîhke jamjau huí é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjín hkyô lé, Garai Gasang é noqkuq hpúng pè é hí má gumrong nyi lhê.

⁵ Shí hkyô banshoq gi, haû Garai Gasang dingmán é dông jéyáng é hkyô lé saksé tân shit é nghut lhê; haû mù luí, nungmoq gi, Garai Gasang é mingdán é matú wuîhke jamjau hui zo bekô nghut é yanmai, mingdán haû eq gingdán é bang gà é hui kó râ nghut lhê;

⁶ Garai Gasang gi, tengmán Sû nghut lhê; haû mù, nungmoq lé jamjau byi é bang lé, Yhang mai jamjau byi râ eq, ⁷ jamjau huí nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haû Garai Gasang lé a sê é bang eq nga-nhông é Yhumsing Yesuq eq sêng é gabú danglù lé a gyo a châng é bang lé, jéyáng râ matú, ⁸ haû Yhumsing Yesuq, wum-o a-tsam bying é Yhâng é maumang lagyô pé eq rahá, myishâm eq mauhkung mai htoq shit é hkûn, dut râ nghut lhê. ⁹ Yesuq jé lé lô mù, Yhâng é chyoiyung bang má hpungwup shingkang wó yu é eq lumjín bang banshoq mai mauhong é huí é buinyi má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê. ¹⁰ Hau htoq agó, haû Yhumsing é hí mai le, Yhâng é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjín bekô nghut é yanmai, haû lumjín bang má nungmoq le lòm bekô nghut lhê.

¹¹ Haû mù luí, nga-nhông é Garai Gasang gi, nungmoq lé, Yhang ji yu é hkyô eq gingdán ri ga râ le, haû Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjín myit eq sêng é muzó lhumjup lé, lhoq dik byi sháng gaq nghut le,

nungmoq é matú, hkâ-nhám le, ngamoq kyûdung byi nyi lhê. ¹² Ngamoq haû su dung byi nyi é hkyô gi, nga-nhông é Garai Gasang eq Yhumsing Yesuq Hkrisduq é jeju yanmai, haû nga-nhông é Yhumsing Yesuq é mying gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

A Tara É Sû

2 Gumang wui ê, haû nga-nhông é Yhumsing Yesuq Hkrisduq dum lé râ hkyô, Yhang eq nga-nhung rahá zup nyi to râ hkyô eq séng luí, nungmoq lé ngamoq pying kat nau é gi, ² haû Yhumsing é buinyi gi, jé to gù nghut bê gà é myiqhtoi dang, luhkyang, laiká pé rajung jung, ngamoq chyáng mâ é nghut lhê ga nungmoq chyáng jé é nghut jáng, nungmoq é myit luí za hkâduí kó, hkâgyuq dàn kó. ³ Hkâsu mù gà le, haû htên byoq é yhangzo nghut é a tarâ Sû htoq shit luí, haû gumlau toq é hkyô hí a htoq htoq gi, buinyi haû jé râ a nghut, haû mù luí, nungmoq lé, ó yuq èq, hká dông mai mhaú kôlhâng hkâjín kó. ⁴ Haû yuq gi, Garai ga noqkuq huí é zè lhunglhang lé htoq htín luí, haû pé banshoq é htoq má yhanggung yhang lhoq gyaú yû râ nghut lhê; haû mù luí, Garai Gasang é noqkuq yhûm má zung to luí, yhanggung yhang Garai Gasang nghut lhê ga táí râ nghut lhê.

⁵ Ngò gi, nungmoq eq rahá nyi tô é hkûn, shí hkyô pé lé lhaq táí kyo kyo kut é hkyô lé, nungmoq a bun lo kó lhú? ⁶ Haû yuq gi, ahkying yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê. ⁷ Haû a tara é hkyô é haq dâ é a-tsam gi, mù zui nyi gù nghut bê; nghut kôlhâng, haû lé hkûm zing nyi sù gi, hui htot pyám huí é hkûn jé shoq, haû lé hkûm zing nyi shirâ nghut lhê. ⁸ Haû hui htot pyám huí é hkûn, a tarâ Sû htoq shit râ nghut lhê; haû Yhumsing Yesuq kúm gi, Yhâng nhut mâ é soq èq yhang lé sat pyám râ eq, Yhang gyó lo u lhê é hpungwup mó èq, yhang lé lhoq htên pyám râ nghut lhê.

⁹ Haû a tarâ Sû lé lo é gi, Tsadán a-tsam dông laklái kumlhá pé, kumlhá pé, mauhpo muzó pé ajung jung kut mhaú é eq, ¹⁰ htên byoq huí nyi é bang lé mhaú zo râ agè ashop é hkyô jung hkangmó lé tân shit râ nghut lhê. Yhangmoq htên byoq é gi, haû tengmán hkyô lé chyt-dap luí hkyi yù hui râ nghut é hkyô lé hengik pyám kô é yanmai nghut ri. ¹¹ Hau é yanmai, Garai Gasang gi, haû tengmán hkyô lé a lumjín e za agè ashop hkyô má ô nau é lhunglhang bang mara byi

é hui kó sháng gaq ga, ¹² mhaû é dang lé jing kó rã matú, a-tsam mó bo é lum shut rã hkyô lé, yhangmoq chyáng nhâng byi bê nghut ri.

Mhoqshit é hkyô má gîng nyi rã hkyô

¹³ Nghut kôlhang, haû Yhumsîng chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on rã dut ri. Hkâsu mù gâ le, haû Woi-nyí eq lhoq sân-yúng nyi é muzó dông le, tengmán hkyô lé lumjing é dông le, hkyi yù hui rã matú, Garai Gasang gi, nungmoq lé, sâng-hi mai hkyin yù bê nghut ri. ¹⁴ Yhang gi, nga-nhông é Yhumsîng Yesuq Hkrisduq é hpungwup shingkang má, nungmoq wó bo lòm shoq ga, ngamoq é gabú danglù dông nungmoq lé shí hkyô má ji yù bê nghut lhê. ¹⁵ Haû mù luí, gumang wui ê, nhutdang dông nghut nghut, laiká dông nghut nghut, nungmoq lé ngamoq lhai byí é mhoqshit hkyô lé zui gîng nyi luí, ging ging yap nyi keq.

¹⁶ Yhâng é jeju yanmai, nga-nhông lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhông lé chyitdap é, nga-nhông é Îwa Garai Gasang eq nga-nhông é Yhumsîng Yesuq Hkrisduq gi, ¹⁷ nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq kîng byi sháng gaq ô!

Kyû Dung Byi Rã Matú Lung Kat É Hkyô

3 Gumang wui ê, je htâng má pying kat nau é hkyô gi, nungmoq chyáng dut wú bê eq rajung za, haû Yhumsîng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq. ² Yuq hkangmó gi, lumjing myit bo é a nghut é yanmai, haû achayut agè ashop é byu pê chyáng mai ngamoq wó lut rã matú le, kyû bo dung byi kó laq. ³ Nghut kôlhang, haû Yhumsîng gi, lhumzui é sù nghut é yanmai, Yhang nungmoq lé wum-o lhoq kîng byi mù, haû agè ashop su chyáng mai nungmoq lé hung yù rã nghut lhê. ⁴ Nungmoq gi, ngamoq pying tô é dang pé lé kut nyí mù, xoq luí le kut nyí rã nghut lhê nghû, haû Yhumsîng má ngamoq hkyak myit lum tô lhê. ⁵ Haû Yhumsîng gi, nungmoq lé Garai Gasang é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mû Zui Shikut Rã É Hkyô

⁶ Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a

nyi yap é eq lagôn é gumang ó yuq eq le, we we nyi keq nghû, haû Yhumsîng Yesuq Hkrisduq é mying mai nungmoq lé hkunmó hkyô kat lhê. ⁷ Hkâsu mù gâ le, ngamoq kut é alik lé hká dông cháng rã dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó, ⁸ ó yuq é zoshuq lé le, ngùn a byí é a zo wú é nghut lhê. Nungmoq má ó yuq lé le wólai a byi sháng gaq nghû, ngamoq gi, muzó shikut hkyô eq wuîhke hkyô má, nyí lé, myín lé, zui saí é nghut lhê. ⁹ Ngamoq gi, nungmoq lé garúm nhâng rã ahkáng a wó é a nghut, yhumsîng gùng lé nungmoq cháng rã matú alik dut sháng gaq nghû sheq, haû su kut é ru nghut lhê. ¹⁰ Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

¹¹ Hkâsu mù gâ le, nungmoq chyáng mâ é byù ra-am lagon luí, haî mù le a zui e za, mù châng lhoq gyô byí wún akô gâ é hkyô lé, ngamoq wó gyô é yanmai nghut lhê. ¹² Ngamoq gi, haû su kut é bang lé, zim za nyi mù zui saí luí, yhumsîng é zoshuq ho nyi kó sháng gaq nghû, haû Yhumsîng Yesuq Hkrisduq é mying lé lang luí, hkunmó hkyô kat mù, wum byí kat lhê. ¹³ Gumang wui ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴ Byù rayuq yuq gi, laiká shí má ngamoq mhoqshit é hkyô lé, a châng é nghut jáng, haú yuq lé rago chôm matsîng yù mù, yhang hoq bun sháng gaq, yhang eq hkâzûm yap kó. ¹⁵ Nghut kôlhang, yhang lé gyè rayuq dông a sôn e za, gumang rayuq dông lhoq pun lhoq kyíng nyi keq.

Ló Htâng Lhê É Shi-kyám Dang

¹⁶ Haû nguingón hkyô é Yhumsîng yhang gi, ahkyíng hkangmó eq hkyô hkat hkangmó má, nungmoq lé nguingón hkyô byí nyi sháng gaq. Haû Yhumsîng gi, nungmoq banshoq bang eq ru nyi nyi sháng gaq.

¹⁷ Ngò, Poluq gi, ngá é loq mai yhang shi-kyám dang shí lé kê kat lhê; shí gi, ngò kê é laiká banshoq má kumlhá nghut lhê. Ngò kê é gi, shí dông chyat nghut lhê.

¹⁸ Nga-nhông é Yhumsîng Yesuq Hkrisduq é jeju gi, nungmoq banshoq bang chyáng ru joq nyí sháng gaq ô!

1 Timohti

(1 Timothy)

1 Nga-nhông é hkyi yù Sû Garai Gasang eq nga-nhông é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, ² haù lumjínng hkyô má ngá zo sng nghut sù, Timohti lé dang kyô kat lhê; haù Íwa Garai Gasang eq nga-nhông é Yhumsing Hkrisduq Yesuq chyáng mã é, jeju eq shogyo nhikmyin hkyô, nguingón hkyô gi, náng chyáng ru joq nyí sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le, ⁴ myit htoq mhô-myi dang eq a dat htûm é byù xik labaù má yhangmoq a ap nóng râ matú le, haù bang lé hkunmó wó hkyó râ nghut lhê. Haù hkyô pé gi, lumjínng myit mai kut htoq é Garai Gasang é muzó lé lhoq htoq râ malaí, mabyoq jishûm za sheq lhoq htoq nyi é nghut lhê. ⁵ Haù hkunmó hkyó luí myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bûn é myit eq lumjínng myit akying mai lo é nghut lhê. ⁶ Byù ra-am gi, haù hkyô pé mai htoq ló kôluí, dangsôm taí é hkyô shut lhing ló byuq bekô nghut ri. ⁷ Haù bang gi, jep é tarâ sará pé dut naù kôlháng, yhangmoq haí taí nyi é hkyô lé le, hkyak, haí lé mhoqshit é hkyô lé le, a sé kó nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhúng sê lhê. ⁹ Haù jep é tarâ gi, dingmán bâng é matú tô tô é a nghut e za, tarâ lu láí é bang eq gumlau toq bâng é matú, tarâ a hkunggâ é bang eq mara kut bâng é matú, a chyoyúng é bang eq lumjínng hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, byù sat bâng é matú, ¹⁰ ashóp é dng gungsho zùm yap é bang eq yuqgê yhangchang nyi zo lhum bâng é matú, jùn dng byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhûm é lhunglhâng bâng é matú sheq, jep é tarâ tô tô é nghut é lé, nga-nhúng sê lhê. ¹¹ Tengmán mhoqshit hkyô haù gi, hkungsô wó é Garai Gasang eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsing É Jeju Joq Nyi É Hkyô

¹² Ngò gi, ngo lé wum-o byí é, nga-nhông é Yhumsing Hkrisduq Yesuq lé jeju hkyá-ôn lhê; hkâsu mù gà le, Yhang gi, ngo lé lhumzui sù rayuq dng sôn yù luí, Yhâng é muzó jizó má hkyin kat yu é yanmai nghut lhê. ¹³ Hí hkûn, ngò gi, Garai Gasang lé taí hpoi sù, zing-ri sù eq byù rhoí sù nghut wú kôlháng, a sé shi mù lumjínng myit a bo e za kut é yanmai, shogyo nhikmyin yu é hkyô lé ngò wó yu é nghut lhê. ¹⁴ Nga-nhông é Yhumsing é jeju lé le, Hkrisduq Yesuq eq sêng é lumjínng myit eq chyitdap myit lé le, ngá chyáng agùn agó hut hkyô kat byi bê nghut ri.

¹⁵ Yubak dap bang lé hkyi yù râ matú, Hkrisduq Yesuq gi, mingkan má jé lé bê gà é dang gi, lumjínng é mungdang nghut luí, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê. ¹⁶ Nghut kôlháng, Hkrisduq Yesuq gi, Yhang lé lumjínng luí ahtum abyuq é asak lé wó yù râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglháng wó tûn shit sháng gaq ga, Garai Gasang gi, ngo lé shogyo nhikmyin yu ri. ¹⁷ Haù mù, haù aróng eq hpungwup shingkang gi, ahtum abyuq é, a dat htên byoq é, myoq èq a byu-myang é Hkohkâm nghut sù, rayuq zâ é Garai Gasang chyáng pyat dedu ahtum abyuq ru joq nyí sháng gaq ô! Amen.

¹⁸ Ngá zo Timohti ê, nàng eq séng luí myiqhtoi dang joq wú é eq rajung za, ngò gi, nang lé haù dng mhoqshit kat lhê; haù mù, nàng gi, haù pé lé chung nyi luí, ge é majan zan mù, ¹⁹ lumjínng myit eq mara a bò bûn é myit bo nyi sháng gaq. Byù ra-am gi, haù hkyô pé lé he-ngik pyám kô é nghut luí, yhangmoq é lumjínng myit gi, wui-sanghpo htên byoq ló é su htên byoq byuq bekô nghut ri. ²⁰ Haù bang má, Humenu eq Alesander le bò kômù, Garai Gasang lé taí hpoi é dang a taí râ matú mhoq yù kó sháng gaq ngû, ngò, yhangnhik lé Tsadán é loq má ap pyám bê nghut lhê.

Noqkuq Hkyô Eq Séng Luí Mhoqshit Byí É Hkyô

2 Haù mù luí, ngò, hí pying kat nau é gi, tarâ hkunggâ é eq hkungga gíng é hkyô banshoq má, nga-nhúng wó nguingón yuqyo nyi sháng gaq, hkohkâm pé eq ahkáng ayá wó bang banshoq é matú le, ² yuq hkangmó é matú le, dng tngbán byi, kyû-dung byi, dng xoq byi, jeju hkyá-on byi, kut aq ngû nau ri. ³ Haù gi, ge é hkyô nghut mù, nga-nhông é hkyi

yù Sû Garai Gasang ô nau é hkyô nghut ri. ⁴ Yhang gi, byù lhunghâng bang hkyi yu é hui mù, tengmán é mungdang lé sê gyo râ lé, ô nau nyi ri. ⁵ Hkâsu mù gâ le, Garai Gasang gi, rayuq za nghut luî, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri. ⁶ Yhang gi, byù lhunghâng bâng é matú shîhtaí gunglik hkungga dông Yhânggùng lé byî pyám bê nghut ri; haú gi, ahkýing yam-yoq jé é hkûn, saksé htoq shit bê nghut lhê. ⁷ Ngò gi, tûngbaù pé lé, tengmán é lumjîng hkyô mhoqshit râ matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haú su taí é gi, mhaú taí é a nghut, têng é hkyô lé za taí nyi é ru nghut lhê.

⁸ Yuqgè wui gi, nhikjum yô é hkyô eq dang htîng htîng lhûm é hkyô a bo e za, jowò hkangmó má chyoyúng é loq tù mù kyûdung râ lé, ngò ô nau ri.

⁹ Myiwe wui gi, xâm nik nik é, hîng zè, palhé, hpaû jung mebû èq a mhôn chung e za, siri bo é mebu wut chûng mù, tap tap za, shuq shuq za kut luî, ¹⁰ Garai Gasang lé noqkuq é myiwe wui eq gîng shoq, ge é muzó èq yhumsing gùng lé mhôn nyi râ lé le, ngò ô nau ri.

¹¹ Myiwe gi, uphkang tô é dông châng nyi mù, zim za mhoq yû kó sháng gaq. ¹² Myiwe gi, yuqgè lé mhoqshit râ hkyô lé le, yuqgè lé uphkang râ hkyô lé le, ngò ahkáng a byi; myiwe gi, zim za kut nyi ra râ nghut lhê. ¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê. ¹⁴ Hau htoq agó, Adam gi, mhaú é hui zo sù a nghut; haú myiwe sheq mhaú é hui zo luî, mara kut shut é ru nghut lhê. ¹⁵ Nghut kôlhâng, myiwe wui gi, lumjîng myit, chyitdap myit eq chyoyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é dông mai hkyi yu é hui kó râ nghut lhê. †

Hpúng-up Eq Hpungtê Kut Râ Bâng É Hkyô

3 Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumjîng é dang nghut nyi ri. ² Haú mù luî, hpúng-up rayuq gi, mara hûn râ hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkang é sù, hkungga gíng é sù, byù bíng lé dat hkulum é sù, dat mhoqshit é sù, ³ îhpê é jùn a dut é sù, byoq lhum byoq cheq a kut e za nûm é sù, mabyoq jishûm a lhoq htoq é sù, ngunzè lé a chyitdap é sù, nghut râ lhê. ⁴ Yhang gi, yhâng é ikun lé rago dat uphkang luî, yhang zô pé mai hkungga myit bo é èq yhâng dang lé gyo byî é sù le, nghut râ lhê. ⁵ Rayuq yuq, yhumsing é ikun lé lháng a dat uphkang é nghut le gi, Garai Gasâng é noqkuq hpúng lé gi, hkâsu kut wó wú gon râ lhú? ⁶ Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbûn lò luî, jéyáng é hkyô lé nat Tsadán hui zô é su hui zo abe. ⁷ Hpúng-up rayuq gi, tûngbaù pê hí má ge é myìng wó é sù le dut râ lhê; haú jáng,

yhang gi, taí hpoí pyâm é lé le a hui, nat Tsadán é tu-ihkyó má le a myí, dut râ nghut lhê.

⁸ Haú eq rajung za, hpungtê pé gi, hkungga gíng é bang, shô-kó a xân é bang, îhpê é jùn a dut é bang, a tengmán é amyat lé a ho é bang, nghut râ lhê.

⁹ Yhangmoq gi, lumjîng hkyô mâ é nik é mauhpo tengmán hkyô pé lé, sansêng é i-myt eq châng nyi ra râ nghut lhê. ¹⁰ Yhangmoq gi, chyam é lé hí huî wú kó sháng gaq, hau htâng, yhangmoq lé mara hûn râ hkyô haí a bò lo jáng, hpungtê mù lé wùn kó sháng gaq.

¹¹ Haú eq rajung za, yhangmoq é yhumsîng myhî pé le, myit no nhang é dang a taí e za, dat sidiq é eq hkyô hkangmó má lumjîng luî, hkungga gíng é myiwe wui, nghut ra râ dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê. ¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjîng hkyô má, gyuq kyum é hkyô a bo é myit mó lé le, hkyak wó yu akò nghut ri.

¹⁴ Ngò gi, hkâ-myhâng a myáng má náng chyáng lé jé râ matú, myit myoqbyu to kôlhâng, ahkýing du myáng pyâm le, ¹⁵ Garai Gasâng é ikun hkaú má, byu pé hká dông nyi yap râ é hkyô lé, nàng sé sháng gaq nghû, pying kat é dang shi pé lé ká byî kat lhê; ikun haú gi, rû dui nyi é Garai Gasâng é noqkuq hpúng nghut luî, tengmán hkyo é hkungmó-zîng eq apûn awang nghut ri. ¹⁶ Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haú gi, Yhang, byù gungsho má htoq shit mù, haú Woi-nyí mai Yhang lé saksé hkám byi luî, maumang lagyo pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mingkan byu pé lumjîng luî, hpungwup shingkang eq Yhang lé mauhkûng shut shuí toq yû bê nghut ri.

Timohti Lé Mhoqshit É Hkyô

4 Jihtûm buinyi pé má, byù ra-am gi, lumjîng hkyô mai htak htoq ló luî, mhaú zô é woi-nyí pê htâng cháng kó râ eq nat gang mai lo é mhoqshit hkyô pé lé gyo byi kó râ nghut lhê ga, haú Woi-nyí gi, san za taí ri. ² Haú sù é mhoqshit hkyô pé gi, gegùn labyoq kut é byù-mhaú pê chyáng mai lo é nghut lhê; haú bâng é myit nhiklhum gi, nyhê nhe tô é shamtoq èq nyhê man tô é su dut byuq bê nghut ri. ³ Haú bang gi, hâng lhûm é hkyô lé hkûm tang é hkyô lé le, haú lumjîng luî tengmán hkyô lé sê é bang mai jeju hkyo-on mù hap yù ge é, Garai Gasang hpan to byî é zoshuq lé koi pyám nhang é le, kut akò nghut ri. ⁴ Garai Gasang hpan tô é lhungháng gi, ge é chyat nghut ri; Garai Gasâng é mungdang eq kyûdung é dang dông haú pé lé lhoq sân-yúng nyi é nghut é yanmai, ⁵ jeju hkyo-on luî hap yu é nghut le gi, haí jung lé lháng he-ngik pyám râ hkyô a bò nghut ri.

⁶ Haú gumang wui lé, nàng haú hkyô pé lhoq pun lhoq kyíng é nghut le gi, nàng gi, haú nàng cháng bê ge é mhoqshit hkyô eq lumjîng hkyô mâ é tengmán

† 2:15 Apûn 3:16

hkyô má, kô myhâng sù nàng nghut rã htoq agó, Hkrisduq Yesuq é ge é hpungmû wùn sù le dut rã nghut lhê. ⁷ Garai a bo é myit htoq mhô-myi dang eq hpô-myhí mâng pê é mhô-myi dangsôm lé koi pyám luí, tarã hkunggã é hkyô má yhumsing gùng lé lhoq kùng yù aq. ⁸ Hkâsu mù gã le, gungsho lé lhoq kùng é hkyô gi, akyû shau za htoq é nghut lhê; nghut kôlhang, tarã hkunggã é hkyô kúm gi, jung hkangmó é matú akyû bo lhê nghut mù luí, shí ipyat má le, htang pyat má le, akyû bo nyi ri.

⁹ Haû gi, banshoq hap yù gíng é, lumgíng é mungdang nghut lhê. ¹⁰ Haû mù luí, xângzo byù banshoq bâng é hkyi yù Sù nghut é, je riyhang, lumjíng bâng é hkyi yù Sù nghut é, rû dui nyi é Garai Gasang má, nganhúng, myit myoqbyu to bê nghut é yanmai, nganhúng gi, gyai yhang shikut nyi lhê.

¹¹ Haú pé lé, hkunmó hkyô luí mhoqshit byí nyi aq. ¹² Náng é zorâm pyat lé, ó yuq èq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjíng hkyô má le, sansêng é hkyô má le, lumjíng bâng é matú alik kut shit nyi aq. ¹³ Náng chyáng ngò jé lé é buinyi jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nóng nyi aq. ¹⁴ Náng gi, hpúng suwún wuí náng é ahtoq má loq ke byí é hkûn, myiqhtoi dang dông nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

¹⁵ Haú hkyô pé lé, myit zìng zuq luí zui saí nyi aq; nàng kô myhang lo é hkyô lé, yuq hkangmó byu-myàng kó sháng gaq, náng gùng banshoq haú pé má ap nóng nyi aq. ¹⁶ Náng é asak dui hkyô má le, nàng mhoqshit é hkyô má le, rago sidiq nyi aq. Haú pé má ru gíng nyi aq, hkâsu mù gã le, nàng haú su kut é nghut jáng, náng é asak lé le, náng chyáng mai gyô yu é bang lé le, nàng wó hkyi yù rã nghut lhê.

Suwún Wuí, Chuimó Pé, Jùn Pé Eq Séng Luí Hpaqchyí Byí É Hkyô

5 Asak ko sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wuí lé gi, gumang wuí lé su, ² asak kô é myiwe wuí lé gi, înu pé lé su zùm yap luí, zomyi wuí lé gi, nhammó wuí lé su sansêng é i-myt banshoq èq zùm yap nyi aq.

³ Gè gè yhang garúm rã dut é chuimó myhí pé lé, hkunggã nyi keq. ⁴ Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, înu îwa eq îchyí îwhoí pé lé jeju taú é dông, yhangmoq é lumjíng hkyô lé, zui saí é má lhoq mhán nhâng rã lé hí mhoq yù ra rã nghut lhê; hkâsu mù gã le, haú gi, Garai Gasang ô nau é hkyô nghut ri. ⁵ Haú lùm rã ó yuq le a wó mù, gè gè yhang rã tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyúdung mù, Garai Gasang garúm rã hkyô lé dúng nyi ri. ⁶ Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri. ⁷ Yhangmoq lé, ó yuq èq le mara

a hùn kó sháng gaq, haú hkyô pé lé le mhoqshit byí nyi aq. ⁸ Rayuq yuq, yhâng é buinùm ji-myi wuí lé a baú é htoq agó, je luí yhumsing é ikun byù lé a baú é nghut le gi, haú lumjíng hkyô lé he-ngik pyám bê nghut luí, a lumjíng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jáng, chuimó jihpán má wó kat rã a nghut; hau htoq agó, yhang gi, yuqgè rayuq za wó wú é sù; ¹⁰ zoshâng wuí lé hku baú é sù, bíng lé rago dat hkulum é sù, sân-yúng bê bang é hkyí lé chi byí é sù, wuíhke huí tô é bang lé garúm luí, ge é muzó jungkháng jungmó má yhumsing gùng yhang ap nóng nyi ri ga, yhang kut é ge é muzó má myíng hù é sù le, nghut rã lhê.

¹¹ Asak tiq é chuimó myhí pé lé, jihpán haú má hkâkat. Hkâsu mù gã le, gungsho ô nau é hkyo eq Hkrisduq chyáng yhangmoq ap nóng tô é hkyô lé ung pyám é hkûn, yhangmoq gi, myi ló naú kó rã nghut lhê. ¹² Haú mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kô é yanmai, tarã darã é hui zo kó rã nghut lhê. ¹³ Hau htoq agó, yhangmoq gi, rayhùm htâng rayhùm châng wang wún kômù, lagôn mán byuq kó rã nghut lhê. Lagôn é bang za dut kó rã a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mù má châng wang nyo wún é bang le, dut kó rã nghut lhê. ¹⁴ Haú mù luí, gyè pé mai lumù gansâng dang a wó taí pyám kó sháng gaq, asak tiq é chuimó myhí pé gi, myi ló mù, zoshâng hkû luí, yhangmoq é ikun lé gôn lajang rã matú, ngò, yhangmoq lé hpaqchyí byí kat lhê. ¹⁵ Hkâsu mù gã le, ra-am gi, lhing taú ló kôluí, Tsadán é htâng châng nyi lugù nghut bekô nghut ri.

¹⁶ Lumjíng é myiwe rayuq yuq gi, yhâng é ikun má chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yù ra rã nghut lhê; haú hkûn sheq, noqkuq hpúng gi, gè gè yhang rã tô é chuimó myhí pé lé wó garúm rã nghut lhê.

¹⁷ Haú noqkuq hpúng lé rago za shuí ù é hpúng suwún wuí gi, akyû í tú hkam yù gíng lhê; haú mungdang hko é hkyô eq mhoqshit é hkyô má shikut é suwún wuí gi, je riyhang hkam yù gíng lhê. ¹⁸ Hkâsu mù gã le, "Guq nâng nyi é no lé, nhuttsung hkâ-tsúng to byi." † ga le, "Mû zui sù gi, yhâng é zuihpau wó yù gíng lhê." †† ga le, Chyúmdang má taí tô ri. ¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhom yù. ²⁰ Nghut kôlhang, lhoq pun lhoq kying é hkyô lé góbang wó yù kó sháng gaq, mara kut shut é bang lé, shiwa byu pé hí má tân mhoqshit aq.

²¹ Pying kat é dang shi pé lé, gamhkui myit a bo e za châng nyi rã eq, myoqdong hkyín luí haí le a kut rã matú, Garai Gasang eq Hkrisduq Yesuq é hí má le, hkyin yù huí é maumang lagyô pê é hí má le, ngò, nang lé pying kat lhê.

²² Ó yuq é ahtoq má le loq ke † byi râ lé hkâhân; góbâng é mara hkaû má le hkâbo lòm. Yhumsíng yhang yhumsíng sân-yúng shoq kut nyí aq.

²³ Náng é wamdau ra luí, anum num no lò lò dut é yanmai, nàng gi, wuì za shuq é hkyô lé nô pyám luí, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luí, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri. ²⁵ Haû eq ra-jung za, ge é muzó pé gi, de de nghut nyí luí, haû su de de a nghut é pé lé le, wó zaú to râ a nghut.

6 Jùn dut é wòlai hkaû má nyi é lhunglhâng bang gi, yhangmoq é yhumsíng wuì lé gyai yhang hkungga gíng lhê nghû, myit yù râ dut lhê; haú hkûn sheq, Garai Gasâng é mying eq nga-nhûng é mhoqshit hkyô gi, lumù gansang é a hui râ nghut lhê. ² Lumjíng é yhumsíng wuì é jùn gi, gumang wuì nghut é yanmai, yhangmoq lé a wú myuq é za, yhangmoq dojaú luí akyû myang hkâm zô é bang gi, lumjíng bang eq chyt-dap gíng é bang nghut é yanmai, yhangmoq lé je ge é đông dojaú râ lhê. Shí hkyô pé lé, nàng gi, yhangmoq lé mhoq byí nyi é eq lhoq pun lhoq kyíng byí nyi aq.

Ngùn Lé Chyitdap É Hkyô

³ Rayuq yuq gi, shut é lumjíng hkyô lé mhoqshit luí, nga-nhûng é Yhumsíng Yesuq Hkrisduq é tengmán mhoqshit hkyô eq tarâ hkunggâ é mhoqshit hkyô lé a myit huí é nghut jáng, ⁴ haú yuq gi, nghutbûn é sù eq haí lé le a sê gyô é sù nghut ri. Yhang gi, htuq htíng lhûm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haû mai, manon é hkyô, byoq lhum byoq cheq é hkyô, lumù gansang é hkyô, agè ashop é đông myit ngam pyâm é hkyô eq, ⁵ haû tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyám bê bâng é gyoro má, byin a huí é hkyô pé lé, lhoq htoq kat ri.

⁶ Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri. ⁷ Hkâsu mù gà le, nga-nhúng gi, mingkan htoq má haí jung le a yu wang lé, haû mai le haí wó yu htoq ló râ a nghut. ⁸ Haû mù luí, nga-nhúng gi, wutbu wutmè eq zoshuq wó é nghut jáng, hau eq nhik dik nyi sháng. ⁹ Wó naû sùt nau é byu pé gi, gungláu hkyô eq tuihkyó má le, haû byoq yeq hkyô eq htên byoq hkyô má, byu pé lé myup shí nhang é, ngha é hkyô myo myo eq myit nõ nhâng nau é hkyô má le, byit gyó wâng kó râ nghut

† Haú hkun lhê bang gi, hpúng suwún kut râ matú hkyin to bê bang lé, loq ke kyûdung byí é nghut lhê.

lhê. ¹⁰ Hkâsu mù gà le, ngùn lé chyitdap é hkyô gi, agè ashop hkyô ajung jûng é apûn awang nghut nyi ri. Byù ra-am gi, ngùn lé ô nau luí, haû lumjíng hkyô mai sô nghoq ló mù, yhumsíng gùng lé yhumsíng, haû yón kuq hkyo eq htaû rot pyám bekô nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù nàng gi, haú pé banshoq lé koi pyám luí, dingmán hkyô, tarâ hkungga hkyô, lumjíng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyí aq.

¹² Lumjíng hkyô eq sêng é ge é majan le zân nyi aq. Hap yù lumjíng bê ga, saksé myo myô pê é hí má, ge é đông nàng yín yu é hkûn, wut yu é hui luí wó é ahtum abyuq é asak lé, zú zing nyi aq. ¹³ Haû lhunglháng lé asak byí é Garai Gasâng é hí má le, Pontu Pilat chyáng saksé hkâm nyi é hkûn, ge é đông yín yu é Hkrisduq Yesuq é hí má le, ngò, nang lé pying kat lhê: ¹⁴ Yhâng é ahkyíng yam-yoq jé jáng, Garai Gasang htoq shit nhâng râ nghut é sù, nga-nhûng é Yhumsíng Yesuq Hkrisduq htoq shit é buinyi jé shoq, ¹⁵ nàng gi, agot a-u é hkyô eq mara hûn râ hkyô a bo e za, hkunmó shí lé châng nyi aq. Garai Gasang gi, hkungsô wó sù, Yhang za up sù, hkohkam pê é Hkohkâm, yhumsíng pê é Yhumsíng, ¹⁶ Yhang za ahtum abyuq dui nyi sù, a ge chyâng htep e é maubó má dui nyi sù, ó yuq eq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyáng ahtum abyuq ru joq nyí sháng gaq ô! Amen.

¹⁷ Shí ipyat má wó sùt é bang gi, a gumrông râ eq a gíng é sutzè má yhangmoq é myit myoqbyù hkyô a tô e za, nga-nhúng nguingón yuqyo nyi râ matú jungkháng jungmó lé agùn agó byí é sù, Garai Gasâng chyáng za, yhangmoq myit myoqbyu nyi râ matú, hkunmó hkyó aq. ¹⁸ Ge é hkyô kut luí, ge é muzó má wó sùt nyi mù, a chum e za, gam chûng nau é myit bò râ matú, yhangmoq lé hkunmó hkyó aq. ¹⁹ Haû đông mai, yhangmoq gi, jé lô râ ipyat é matú gíng é apûn awang đông, yhangmoq é matú sutzè wó tsíng to kó râ nghut lhê; haú hkûn sheq, yhangmoq gi, asak kyíng nghut é asak haû le wó zú zing to kó râ nghut lhê.

²⁰ Timohti ê, nang lé ap to bê hkyô lé, zúng nyi aq. Tarâ a hkunggâ é po-ming ming bâng eq hpaqchyí nghut lhê ga myhíng shut é htuq htíng lhum lhum kut é hkyô lé, koi pyám aq. ²¹ Byù ra-am gi, haû lé hpaqchyí nghut lhê ga yín yu kôluí, haû lumjíng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyí sháng gaq ô.

2 Timohti

(2 Timothy)

1 Hkrisduq Yesuq chyáng mã é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyttdap é ngá zo Timohti lé, dang kyô kat lhê.

² Haû Íwa Garai Gasang eq nga-nhông é Yhumsing Hkrisduq Yesuq chyáng mã é jeju eq shogyo nhikmyin hkyô, nguóngón hkyô gi, ru joq nyí sháng gaq ô!

Lumluc Râ Matú Myit Wum Byí É Hkyô

³ Ngò gi, ngá é kyûdung dang má, nyí, myín, abyit alan nang lé bûn nyi uchyang, sân-yúng é i-myt mai, ngá é îchýí îwâ pé dojaú é su, ngò dojaú nyi é Garai Gasang lé, jeju hkya-ôn nyi lhê. ⁴ Ngò gi, ngò má gabú hkyô byíng jup sháng gaq nghû, náng é ngaubyi lé myit bûn nyi mù, nang lé gyai yhang myàng nau nyi ri. ⁵ Ngò gi, nang é gyíng é lumjín myit lé lhoq pûn yù mù, náng whoí Lu-i eq náng nu U-ni nhik chyáng má hí bo é lumjín myit, ahkuí, náng chyáng le bo ri nghû, hkyak myit lum nyi lhê. ⁶ Hau é yanmai, ngò loq ke byí é dông, nang má bo tô é Garai Gasang é chyunghuq lé, gyúng nhang nyi râ matú, nang lé ngò lhoq pûn kat lhê. ⁷ Hkâsu mù gâ le, Garai Gasang gi, gyuq sê é myit nga-nhông lé a kat byí e za, a-tsam bo é myit, chyttdap sê é myit, yhumsing gùng lé dat hkang é myit sheq kat byí tô é ru nghut lhê.

⁸ Haû mù luí, nang gi, nga-nhông é Yhumsing eq séng luí saksé hkâm é hkyô má le, Yhâng é yanmai htóng byû dut to sù ngá é hkyô má le, hoq myit a bo é za, Garai Gasang é wum-o mai, haû gabú danglu é matú, ngò eq rahá wuîhke jamjau chòm hui goq.

⁹ Garai Gasang gi, nga-nhông zui saí é muzó dông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhông lé, hkyi yù luí chyoyúng é asak duì hkyô má ji yù bê nghut ri. Ahkýng nghu é lhang a joq shi mai yhang, jeju haû gi, Hkrisduq Yesuq má nga-nhông lé byi to gù nghut bê.

¹⁰ Nghut kôlhang, nga-nhông é hkyi yù Sù, Hkrisduq Yesuq pô htoq é dông, ahkuí, haû lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haû gabú danglù dông mai, asak lé le, a dat htên byoq é hkyô lé le, lhoq htoq shit bê nghut ri. ¹¹ Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù nghut lhê. ¹² Hau é yanmai, ngò gi, wuîhke jamjau shî lé huí nyi é nghut lhê. Nghut kôlhang, ngò gi, ó yuq lé lumjín bê nghut é hkyô lé, sê é htoq agó, Yhang lé ngò ap tô é pé lé, haû buinyi jé

shoq, Yhang wó zúng râ nghut lhê nghû hkyak myit lum tô é yanmai, ngò a hoq.

¹³ Nang gi, ngá chyáng mai wó gyô yu é tengmán dang pé lé, Hkrisduq Yesuq má, lumjín myit eq chyttdap myit mai alik kut yu nyi aq. ¹⁴ Nang lé ap byí to bê, haû ge é mungdang lé, nga-nhông chyáng bo tô é Chyoyúng Woi-nyí é wum-o mai zúng nyí aq.

¹⁵ Asia mau mã é bang yuq hkangmó gi, ngo lé pyâm to kô é hkyô lé, nang sê lhê; haû bang má, Hpugelu eq Heramoge nhik le bo akò nghut ri.

¹⁶ Haû Yhumsing gi, Onesihpurú é yhumbyù lé shogyo nhikmyín é hkyô tûn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuí é yanmai, a hoq e za, ¹⁷ yhang, Romaq myuq má jé nyi é hkûn, ngo lé myang hui shoq, ho shikut é sù nghut ri. ¹⁸ Haû Yhumsing gi, haû buinyi má, yhang lé haû Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nang rago yhang sê lhê.

2 Haû mù, ngá zo ê, nang gi, Hkrisduq Yesuq mã é jeju hkaú má, wúm bo nyi aq. ² Nang gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq. ³ Hkrisduq Yesuq é ge é gyezo rayuq su, wuîhke hkyô lé chòm jan nyi sháng. ⁴ Gyezo rayuq dông gyé mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê. ⁵ Haû eq rajung za, shingjóng é sù rayuq le, shingjóng lhum pôi wang é hkûn, tô tô é tarâ dông a châng e nghut le gi, ung é aróng chyunghuq lé wó yù râ a nghut. ⁶ Yo-mû zú shikut é sù gi, kyôshi lé sâng-hi myang hkam yù râ sù nghut lhê. ⁷ Haû Yhumsing gi, shí pé banshoq lé wó sê é nyan nang lé byi râ nghut é yanmai, ngò taí é hkyô pé lé myit wú aq;

⁸ Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê. ⁹ Gabú danglù hau é yanmai, mara bò sù rayuq lé su, ngò gi, kyum hut é hui luí, hpuzô nyi é nghut lhê. Nghut kôlhang, Garai Gasang é mungdang gi, kyum hut huí é a nghut.

¹⁰ Haû mù luí, ngò gi, Hkrisduq Yesuq chyáng mã é hkyi yù hkyô eq ahtum abyuq é hpungwup shingkan lé wó yù kó sháng gaq nghû, haû hkyin yù hui bâng é matú, jung hkangmó lé hkam jân nyi lhê.

¹¹ A-ô mã é dang gi, lumjín é dang nghut lhê:

Nga-nhúng gi, Yhang eq rahá shí bê nghut jáng, Yhang eq rahá duì rã nghut lhê.

¹² Nga-nhúng gi, hkam jân é nghut jáng, Yhang eq rahá up rã nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm rã nghut lhê.

¹³ Nga-nhúng gi, lhumzui myit a bò kôlhang, Yhang gi, lhumzui nyi rã nghut lhê. Hkâsu mù gâ le, Yhang gi, yhanggùng yhang wó he-ngik pyâm é a nghut.

Garai Gasâng Hí Má Myoqdong Wó É Mû Zui Sû

¹⁴ Nàng gi, yhangmoq lé, shí hkyô pé xoq luí lhoq pûn nyi aq. Dang pé eq séng luí, a byoq lhùm nyi kó sháng gaq, Garai Gasâng hí má yhangmoq lé sidiq byi aq. Haú gi, akyú a bo é htoq agó, wó gyô é bang lé htên byoq nhang é hkyô za nghut lhê. ¹⁵ Nàng gi, haú tengmán é mungdang lé jo shoq chung jai é eq, hoq nó a rã é mû zui sû rayuq dông Garai Gasâng hí má myoqdong wó shoq, wó dut é myhó shikut aq. ¹⁶ Tarâ a hkunggâ é po-ming ming bang lé koi pyâm aq. Hkâsu mù gâ le, haú su kut é bang gi, tarâ a hkunggâ é hkyô má je riyhang wang nân ló byuq é bang dut kó rã nghut lhê. ¹⁷ Yhangmoq é mhoqshit hkyô gi, mong ana su byo myín ló rã nghut lhê; haú bang má Humenu eq Hpilitu nhik le bò kôluí, ¹⁸ haú tengmán hkyô mai sô nghoq ló byuq akô. Yhangnhik gi, haú dum dui toq hkyô dut lai bê ga tái kômù, ra-âm é lumjínng hkyô lé lhoq htên pyám byi akô nghut ri. ¹⁹ Nghut kôlhang, "Haú Yhumsing gi, Yhang eq séng é bang lé sê lhê." † ga luí le, "Haú Yhumsing é mying lé yín yu é bang yuq hkanmó gi, agè ashop hkyô mai lhing tau ra kó rã nghut lhê." ga luí le, dizik haú htung tap tô é, Garai Gasâng é ging tîng é apûn awang gi, ging nyi ri.

²⁰ Yhùm mó ralhùm má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut. ²¹ Haú mù luí, haú pé mai yhumsing gùng lé lhoq sansêng pyâm é sù gi, chyoiyúng luí, haú Yhumsing chung jai gíng é sù, ge é muzó hkanmó kut rã hen tô é sù nghut é yanmai, aróng hkyo é matú chungzè dut rã nghut lhê.

²² Zoram é agè ashop é ô naù hkyô lé koi pyám mù, haú sân-yúng é myit mai, Yhumsing lé wut dúng é bang eq rahá, dingmán hkyô, lhumzui hkyô, chyitdap hkyô, nguínngón hkyô pé lé, châng hkat nyi aq. ²³ Go é eq ngok é dông dang jet jet lhùm é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haú hkyô lé koi pyám aq. ²⁴ Haú Yhumsing é dui-nhâng zoshâng gi, mabyoq a lhoq htoq é za, yuq hkanmó lé dat myit tê byi é, wó mhoqshit é, a dat nhik-yô é su dut ra rã nghut lhê. ²⁵ Yhang gi, yhang lé htuq htîng é bang lé, nú-nhâm é dông mhoqshit byi ra rã nghut lhê; haú hkûn, Garai Gasang gi, yhangmoq lé myit lhîng hkyô byi mù, tengmán hkyô lé sê gyo nhâng luí, ²⁶ yhangmoq gi, bûn gyíng lò mù, nat Tsadán ô nau é hkyô lé kut byi rã matú, chyup yû huí é, nat Tsadán é

tuihkyô mai wó hpanq lut ló kó abe nghû, myit lum kat lhê.

Jihtûm Buinyi Pé Má Dut Lò Rã Hkyô

3 Jihtûm buinyi pé má, wuîhkê é ahkyíng pé joq lò rã nghut é lé, nàng matsing to aq. ² Hkâsu mù gâ le, haú u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbûn é bang, góbang lé táí hpoí é bang, înu îwa nyo é lé a gyô é bang, jeju a dat bûn é bang, a chyoiyúng é bang, ³ chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkàng a sê é bang, byuwuî pé, ge é hkyô lé a ngui é bang, ⁴ haq gumlaú é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut rã malaî ngón kún hkyô lé za chyitdap é bang, dut bùm kó rã nghut lhê. ⁵ Yhangmoq gi, tarâ hkunggâ é bang su dut kôlhang, haú pê é a-tsam lé he-ngik pyâm akô nghut ri; haú sù é bang lé, nàng koi pyâm nyi aq.

⁶ Yhangmoq gi, hpaqchyí da mù yhùm pé má wàng kôluí, mara wòlai lé wun é, agè ashop é ô naù hkyô ajung jung má sô nghoq ló byuq é, ⁷ hkâ-nhám le mhoq yu nyi kôlhang, haú tengmán hkyô lé a sê gyô é, myit nyhôm é myiwe wuî lé wó llang nghoq yu é bang nghut akô. ⁸ Yanne eq Yambre nhik gi, Mosheq lé htuq htîng é su, haú bang le, haú tengmán hkyô lé htuq htîng akô nghut ri; yhangmoq gi, myit é hkyô htên byuq kôluí, haú lumjínng hkyô má lhum a zuí é bang nghut akô. ⁹ Nghut kôlhang, haú nhik é hkyô byông htoq lo é su, yuq hkanmó é hí má, yhangmoq ngok é hkyô byông htoq lô rã nghut mù, haú mai lai luí yhangmoq wó kut jat kó rã a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjínng hkyô, myit hîng hkyô, chyitdap hkyô, hkam jan hkyô, ¹¹ zing-ri huí é hkyô eq wuîhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò huí zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haú Yhumsing gi, haú pé banshoq mai ngo lé xe yù bê nghut ri. ¹² Gè gè yhang, agè ashop é byu pé eq mhaú kut é bang gi, mhaú zô nyi bum é eq mhaú zô é huí nyi bùm kôluí, a ge é hkyô shut je riyhang myô jat lò kô é hkûn, ¹³ Hkrisduq Yesuq má tarâ hkunggâ é asak dông nyiyap nau é bang yuq hkanmó gi, zing-rí é huí kó rã nghut lhê. ¹⁴ Nghut kôlhang, nàng gi, ô pê chyáng mai nàng mhoq yû bê hkyô lé le, Hkrisduq Yesuq lé lumjínng jáng hkyi yu é huí shoq, ¹⁵ nang lé hpaqchyí byéng-yá wó byi é chyoiyúng Chyúmdang pé lé, zoshâng hkûn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjínng to bê hkyô má, xoq kut nyi aq. ¹⁶ Chyúmdang hkanmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byi é

† 2:19 Gyung So 16:5

hkyô eq dingmán hkyô lé tân shit byî é hkyô pê é matú, akyû bo ri; ¹⁷ haû mù luî, haû Garai Gasâng é byù gi, ge é muzó jizó hkgangmó lé kut râ matú, wó gumjup râ nghut lhê.

4 Garai Gasâng é hí má le, dui nyi bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhâng mingdán é yanmai, ngò, nang lé pying kat é gi, ² haû mungdang lé hko kyo aq; ahkyíng yam-yoq ang kôlháng, a ang kôlháng, rì rì hen to aq; myit gyaí hing é eq rago za mhoqshit é dông, lhoq jo byi, tân mhoqshit é eq myit wum byi kut nyî aq. ³ Hkâsu mù gà le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô nau yut yut é hkyô cháng luî, yhangmoq é no yo bui nau é nohkyap gyô nau é hkyô taí nhâng râ matú, sará pé rajum rayò lé lhíngkhuyuq má lhoq tsiing to kó râ nghut lhê. ⁴ Yhangmoq gi, haû tengmán hkyô mai yhangmoq é nohkyap lé lhing pyám mù, myit htoq mhô-myi dang shut lhing ló kó râ nghut lhê. ⁵ Nghut kôlháng, nang gi, dut tô é hkyô banshoq má rago sidiq nyi aq; wuîhke jamjau hkyô lé hkam jân nyi aq; gabú danglù hko kyô é muzó kut nyî aq; nang é hpungmû banshoq lé wùn waq nyi aq.

⁶ Hkâsu mù gà le, ngò gi, shuq jung hkungga ralhúmg dông hut pyám é huí nyi gù nghut mù luî, mingkan mai ngò htoq ló râ ahkyíng jé bê nghut ri. ⁷ Ngò gi, haû ge é majan le zan bê; din shingjóng lhûm é hkyô le bàn bê; haû lumjínng hkyô le chang bê nghut lhê. ⁸ Ahkuî, haû tengmán é tarâ Agyi nghut sù, Yhumsíng gi, haú buinyi má ngo lé ap byi râ nghut é, haû dingmán hkyô é janmaú lé, ngá matú tô to byi bê nghut lhê. Haû gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

Timohti Lé Jì Kat É Hkyô

⁹ Nang gi, ngá chyáng wó dut é í hân hân lé lô aq. ¹⁰ Hkâsu mù gà le, Demaq gi, mingkan shí lé chytidap é yanmai, ngo lé pyám to luî, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lhê.

¹¹ Lukaq za ngò eq rahá nghut nyi lhê. Markuq lé, nang eq rahá shuí lé lò aq; yhang gi, ngá é hpungmû má wó htuqbang râ sù nghut lhê. ¹² Ngò gi, Tuhkiku lé Ehpesu myuq shut nhang kat bê nghut lhê. ¹³ Nang gi, lé lo é hkûn, Troa myuq má, Karpu chyáng ngò tô tô é buhíng haû lé le, ngá é chyúmding lé le, je luî eq haû shokuq chyúmding pé lé le, yù lé lô byi aq.

¹⁴ Haû ningdup hpó Alesander gi, ngo lé a ge é myo myo kut bê nghut ri; haû Yhumsíng gi, yhang kut é eq rajung za, yhang lé dam byi râ nghut lhê. ¹⁵ Yhang gi, ngamoq é danglù lé wum kat htuq htíng bê sù nghut é yanmai, nang le, yhang lé sidiq ra râ nghut lhê.

¹⁶ Sâng-hî dàm, ngá gúng lé ngò taí hung é hkûn, yuq hkgangmó gi, ngá é hkyam shut a bo lom e za, ngo lé pyám tô akô. Nghut kôlháng, haû gi, yhangmoq ah-toq má mara a dut sháng gaq. ¹⁷ Nghut kôlháng, ngò dông mai danglù haû lé rago wó hko pyo kat luî, tûng-baú pé banshoq bang wó gyo kó sháng gaq ga, haû Yhumsíng gi, ngá hkyam shut yap to mù, ngo lé wum-o byî é nghut lhê. Hau htoq agó, ngò gi, hkganghkyî é nhut mai le hkyi yù hui bê nghut lhê. ¹⁸ Haû Yhumsíng gi, ngo lé agè ashop é hkyô hkgangmó mai hkyi yù luî, Yhang é mauhkûng mingdán má ngón za shuí jé râ nghut lhê. Hpungwup shingkan gi, Yhâng chyáng ah-tum abyuq ru joq nyí sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesihpuru yhumbyù wuî lé le, bo shi-kyám byi laq. ²⁰ Erastu gi, Korinhtuq myuq má nyi gyó to bê; Trohpimu lé gi, nò luî, Melitu wà mó má ngò nyhi pyám to bê nghut lhê. ²¹ Nang gi, wó dut é í, gyoqmyò a wàng shi lé, shí má jé lé lò aq. Ubulu gi, nang lé shi-kyâm kat ri; haû eq rajung za, Puden, Linu, Klodia eq gumang wuî banshoq bang gi, nang lé shi-kyâm kat akô nghut ri.

²² Haû Yhumsíng gi, náng é woi-nyí eq rahá nghut nyí sháng gaq. Jeju gi, nungmoq chyáng ru joq nyi sháng gaq ô.

† Haú hkûn lé, Romaq byu pé, byù sat lé gi, hkganghkyi lé tsô pyám lhê.

Tituq

(Titus)

1 Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haû ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjínq hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. ² Haû ahtum abyuq é asak hkyô lé, mhaú a sê é Garai Gasang gi, ahkýng nghu é lháng a joq shi mai danggidiq byi to mù, Yhang masat tô é ahkýng yam-yoq má sheq mungdang hko kyô é đông lhoq htoq shit luí, ³ nga-nhông é hkyi yù Sù, Garai Gasang hkunmó hkyô tô é eq rajung za, haû mungdang hko é hkyô lé ngá é loq má ap byi bê nghut ri.

⁴ Nga-nhông chòm lumjínq é hkyô đông mai, ngá zo sng nghut é Tituq lé laiká kâ kat lhê. Íwa Garai Gasang eq nga-nhông é hkyi yù Sù Hkrisduq Yesuq chyáng má é jeju eq nguóngón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúng suwún ayá dáng to byi râ matú nghut lhê. ⁶ Haû hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jino a gyô é ga, mara hùn râ jowò a joq é lumjínq bang nghut é sù, nghut râ lhê. ⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myt a lùm tot; ìhpê é jùn a dut; mabyoq jishùm a kut; a sansêng é ngùn hng lé a myit ô nau é sù nghut râ lhê. ⁸ Yhang gi, byù bíng lé dat hkulúm sù; ge é hkyô lé chyitdap sù; nùm é sù, dingmán sù; chyoiyúng sù; yhumsing gùng lé wó hkang é sù; ⁹ mhoq yu to bê hkyô eq rajung za, lumjínq é mungdang lé ging ging zuí zing nyi é sù nghut râ lhê. Haû hkùn sheq, yhang gi, góbang lé tengmán é mhoqshit hkyô đông myit wum wó byí é eq, haû eq shai lhum é bang lé, shut é hkyô wó tũn shit râ nghut lhê.

¹⁰ Hkâsu mù gâ le, gumlau kut é bang, dangsôm taí é bang eq mhaú zô é bang myo myo nyi ri. Ahpyo-kuq hpyit é hpúng bang je riyhang myo akô. ¹¹ Haû bâng é nhut shô lé gi, xaú pyám byi râ lhê. Hkâsu mù gâ le, yhangmoq gi, a tengmán é đông sutzè lé wó yũ shoq ga luí, mhoqshit a gíng é hkyô pé lé mhoqshit mù, ray-

hum bang bang lé lhoq hpyoq lhoq htên nyi akô nghut ri. ¹² Kreti byù mâ é myiqhtoi rayuq lháng gi, "Kreti byu pé gi, ayang mhaú é bang, tân jung yosô dusak pé, lagôn é zo myoqnoq bang nghut akô." ga taí wú ri.

¹³ Saksé shí gi, têng ri. Haû mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, ¹⁴ haû lumjínq hkyô má ging tng nyi kó sháng gaq, yhangmoq lé htân htân tân mhoqshit byí nyi aq. ¹⁵ Sân-yúng bâng é matú gi, azíng zê lhungl-háng sân-yúng ri; a sân-yúng bang eq a lumjínq bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhikhum eq myit sôn sê é hkyô pé gi, gè gè yhang, a sân-yúng dut byuq bekô nghut ri. ¹⁶ Yhangmoq gi, Garai Gasang lé sê lhê ga kôhang, yhumsing zui saí é loq zó đông, Yhang lé he-ngik pyâm é bang nghut akô. Yhangmoq gi, achaq achyut é bang, jino a gyô é bang eq, ge é mù joq mijoq eq a htuk é bang nghut akô nghut ri.

Hká Đông Nyi Yap Râ Hkyô

2 Nàng kúm gi, tengmán é mhoqshit hkyô eq wuí é đông mhoqshit nyi râ dut lhê. ² Hpô-mâng pé lé gi, i-myt shirâm sé râ hkyô; hkungga gíng é byù dut râ hkyô; yhumsing gùng lé wó hkang râ hkyô eq, lumjínq myit ging râ, chyitdap myit ging râ, hkam jan hkyô gíng nyi râ hkyô pé lé, mhoqshit byí nyi aq.

³ Haû eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a taí râ hkyô; ìhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. ⁴ Haû hkùn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é, ⁵ yhumsing gùng lé wó hkang é, siri bo é, ikun lé dat wùn waq é, ge é myit wó tũn shit é, yhumsing é yhanglâng uphkang é đông dat châng é bang dut râ matú, ge mhoqshit é hpô-myhí mâng pé dut râ nghut lhê.

⁶ Haû eq rajung za, zorâm wui lé le, yhumsing gùng lé wó hkang nyi kó sháng gaq, lhoq pun lhoq kýng nyi aq. ⁷ Hkyô hkat hkangmó má, yhangmoq lé nàng yhang ge é muzó alik tũn shit nyi aq. ⁸ Nàng lé lhom htuq htíng é bang gi, nga-nhông é hkyô má mara a wó hùn kômù hoq hpù nyi kó sháng gaq, nàng mhoqshit é hkyô má, taí pyám râ hkyô a bò shoq, têng é, siri bo é, eq sansêng é dang taí nyi aq.

⁹ Nga-nhông é hkyi yù Sû Garai Gasang eq sêng é mhoqshit é hkyô pé hkat hkangmó yúng nyî sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyî mù, yhumsing wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹ Hkâsu mù gâ le, hkungsô wó é myit myoqbyù hkyô ga é, nga-nhông é kô myhang é Garai Gasang eq hkyi yù Sû, Yesuq Hkrisduq gi, hpungwup shingkang eq htoq shit râ hkyô lé láng nyi é hkûn, ¹² tarâ a hkunggâ é myit eq mingkan myit ô nau é hkyô koi pyám luî, shí ipyat má yhumsing gùng lé wó hkâng râ, dingmán râ eq, tarâ hkunggâ é hkyô wó cháng shoq, ¹³ nga-nhông lé mhoqshit byi râ matú, Garai Gasang jeju chyunghuq gi, htoq shit bê nghut mù luî, byù lhunglhâng bang lé hkyi yù hkyô hpóng byi bê nghut ri. ¹⁴ Haû Yesuq Hkrisduq gi, agè ashop é hkyô banshoq mai nga-nhông lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yù shoq ga, nga-nhông é matú Yhânggùng lé ap byî pyám bê nghut ri.

¹⁵ Nang lé ó yuq èq le, a wú shôm pyám kó sháng gaq; nang gi, ahko ahkáng banshoq eq, yhangmoq lé shí hkyô pé mhoqshit nyî aq; myit wum byî é eq, tân mhoqshit é hkyô lé le kut nyî aq.

Ge É Muzo Zui Saí Râ Hkyô

3 Nang gi, lumjínng bang lé, zau wuî eq ahko ahkáng wó bâng é a-ô má nyi mù, jino gyô nyi râ eq, hkâ-nhám le ge é muzó hkangmó zui saí râ lé hen nyi uchyang, ² ó yuq lé le lù a mù râ; nguínngón hkyô hô râ; myit tê byî é hkyô tân shit râ eq; byù banshoq lé nûm é i-myt tân shit nyî kó sháng gaq, lhoq pun lhoq kyîng nyi aq.

³ Hkâsu mù gâ le, nga-nhông le, hí hpyang gi, byù ngok pé, jino a gyô é bang, mhaú zo huî é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luî, agè ashop é eq manon lhûm é hkyô kut nyî mù, rayuq eq rayuq a jú lhûm é đông nyi lai lò bê nghut lhê. ⁴ Nghut kôlhâng, nga-nhông é hkyi yù Sû Garai Gasang jeju eq chyitdap myit htoq shit é hkûn, ⁵ nga-nhông yhang kut é dingmán é muzó èq a nghut é za, Yhâng é shogyo nhik-

myîn é jeju yanmai sheq, Garai Gasang gi, nga-nhông lé hkyi yù bê nghut ri. ⁶ Yhang gi, nga-nhông é hkyi yù Sû Yesuq Hkrisduq é yanmai, nga-nhông é ahtoq má agùn agó hut hkyô byî é Chyoiyúng Woi-nyî èq nga-nhông lé chí san chí sêng pyám byi mù, woi-nyî má dum hku é hui nhâng luî, myit sik htaí byî é hkyô đông nga-nhông lé hkyi yù bê nghut ri. ⁷ Haû mù luî, Yhâng é jeju mai mara hkyut san byî é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhông gi, silí wunlí wó hkam yu é bang dut lò râ nghut lhê. ⁸ Dang shí pé gi, lumjínng é dang nghut lhê mù luî, Garai Gasang lé lumjínng é bang gi, ge é muzó lé myit lòm luî rago zui saí nyi kó sháng gaq, haû hkyô pé lé nang wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

⁹ Nghut kôlhâng, ana apâ ga luî taí htíng lhûm é hkyô lé le; byùxik labaû gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyám nyi aq, hkâsu mù gâ le, haû pé gi, akyû a bo é hkyô eq chûng a ge é hkyô pé nghut ri.

¹⁰ Gam hkuî é myit bò sú lé gi, í dâm mhoqshit wú mù, a wó jáng, yhang lé baú tô pyám aq. ¹¹ Haû su kut sú gi, yhang kut é muzó má mara wó to bê nghut mù, yhumsing gùng lé yhumsing mara hun é sú nghut é lé, nang sê to lo aq.

Je Htâng Má Pying É Dang

¹² Ngò gi, Nikopoli wà má gyoqmyò lhoq lhai râ đông myit hpyit tô é yanmai, Artima lé, a nghut jáng Tuhkiku lé, náng chyáng nhang kat byi râ, jé eq yhang, nang gi, shikut luî, haû wà shut ngá chyáng lé lô aq. ¹³ Nang gi, tarâ sê é sú Zena eq Apolo nhik lé, yhangnhik é hkyowuî má râ é hkyô banshoq, shikut luî garúm kat aq.

¹⁴ Nga-nhông é byu pé gi, nyî wuî râ é hkyô lé wó htuq é eq ashi zui é bang dut kó sháng gaq, ge é muzó lé myit lòm mù zui saí nyi râ hkyô lé mhoq yù râ lhê.

¹⁵ Ngò eq rahá nyi é bang yuq hkangmó gi, nang lé shi-kyâm kat akô. Lumjínng hkyô má ngamoq lé chyitdap é bang lé, bo shi-kyâm byi aq.

Garai é jeju gi, nungmoq eq rahá joq nyi sháng gaq ô!

Hpilemon

(Philemon)

1 Hpilemon ê, Hkrisduq Yesuq é yanmai htóng lúng nyí sù, ngò Poluq eq nga-nhông é gumang Timohti nhik gi, ngá-nhik chytidap é mù wùn luzúm nghut é sù nang lé le, ² ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huí lhum lhum kut é noqkuq hpúng lé le, dang kyô kat lhê.

³ Nga-nhông é Îwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyí sháng gaq ô!

Jeju Hkya-ôn É Hkyô Eq Kyûdung Dang

⁴ Ngò gi, Yhumsîng Yesuq lé nàng lumjîng é hkyô lé le, sân-yúng bang banshoq lé nàng chytidap é hkyô lé le, wó gyô é yanmai, ngò kyûdung é hkûn, nang lé myit bûn nyí luí, hkâ-nhám le ngá é Garai Gasang lé jeju hkya-ôn nyí lhê. ⁶ Ngò gi, Hkrisduq é matú nga-nhông chyáng bo tô é ge é mù lhumjup lé sê gyô é hkyô lé, nàng wó yù sháng gaq nghû, náng é lumjîng hkyô lé, nàng saksé hkâm é má akyû htoq râ matú, kyûdung byí nyí lhê. ⁷ Náng é chytidap myit gi, ngo lé gyai gabú nhang é eq wum-o wó yû nhang ri; hkâsu mù gâ le, gumang hpó ê, náng é yanmai, sân-yúng bang é i-myyit má nguingón yuqyo é hkyô wó yû bekô nghut ri.

Onesimu É Matú Tôngbán Byí É Hkyô

⁸ Haû su mù, nàng kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haû wó kut nhang lhê nghut kôlhang, chytidap myit đông za nang lé pying kat lhê. ⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí, ¹⁰ ngò kyum hut huí nyí é u lé ngá zo dut lo é Onesimu é matú nang lé ngò dúng tôngbán kat lhê. ¹¹ Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bò bê nghut ri.

¹² Ngò nhik htông é Onesimu lé náng chyáng dum taû nhang kat lhê. ¹³ Haû gabú danglu é yanmai, ngò htóng lúng nyí é má náng é malaí ngo lé garúm râ

matú, yhang lé ngò shuí nyí to naû kôlhang, ¹⁴ ngò gi, nàng myit a huí le haí le a kâm kut. Hau é yanmai, ngò, nang lé kut nhang é đông a nghut e za, nàng ô nau é đông kut é san za nghut sháng gaq. ¹⁵ Hkâsu mù gâ le, náng chyáng mai yhang rayoq rabun zo gâng nyí é gi, yhang dum taû lò mù hkâ-nhám le nàng eq rahá dum wó nyí nyí râ matú nghut lhê abe. ¹⁶ Yhang gi, htông hpyang, jùn rayuq đông a nghut e za, jùn htoq má je ge é chytidap gumang hpó dut râ nghut bê; ngá matú, yhang gi, ngò chytidap dik é sù nghut lhê; náng matú kúm gi, byù rayuq đông le, Yhumsîng Yesuq má gumang hpó rayuq đông le, je riyhang chytidap râ sù dut bê nghut ri.

¹⁷ Haû mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. ¹⁸ Yhang, nang lé rajung jung shut pyâm é nghut le le, chýn dap tô é nghut le le, haû gi, ngá chyáng dap é chýn nghû sôn yù aq. ¹⁹ Ngò, Poluq gi, chýn haû xap râ nghû luí, ngá loq eq yhang kê kat kôlhang, nàng yhang lháng, ngo lé asak chýn xap râ sù nghut é lé bûn nham aq. ²⁰ Nghut bê, gumang hpó ê, nang é yanmai, haû Yhumsîng má ngò gabú é hkyô wó yu nyí sháng gaq, Hkrisduq má ngá é i-myyit lé lhoq nguí lhoq ngón byí é đông, shí, ngò pying kat é dang lé gyo byí laq. ²¹ Nàng gi, ngò taí kat é htoq má je lhom kut râ nghut é lé, hkyak za sé luí, ngò kê kat é nghut lhê.

²² Hau htoq agó, ngá é matú nyí râ gok lajang láng aq. Hkâsu mù gâ le, nungmoq kyûdung byí é yanmai, ngò gi, nungmoq chyáng dum wó jé râ lé myit myoqbyu nyí lhê.

²³ Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. ²⁴ Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

²⁵ Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyí sháng gaq ô!

Hebre

(Hebrews)

Garai Yhangzo Gi, Maumang Lagyô Pê Htoq Je Gyaú É Hkyô

1 Laí ló bê ipyat pé má, Garai Gasang gi, nga-nhúng é íchýí íwâ pé lé myiqhtoí pé dông alhîng lhîng eq adông dông mai dáng nyo wú bê nghut lhê.
² Nghut kôlhâng, ló htâng é buinyì shí pé má, Yhang gi, Yhâng Zo dông mai nga-nhúng lé dang nyô bê nghut ri; Yhang gi, lhunglháng lé sîng sũ dut râ matú haú Zo lé masat to mù, Zo dông mai, nyì mi-nyì, joq mijoq lé hpan to bê nghut ri. ³ Haú Zo gi, Garai Gasâng é hpungwup shingkang duqbó é hkyô eq Yhâng é gungghyâng isâm roq nghut nyi mù, lhunglháng lé Yhâng é a-tsam byíng é dâng eq zú zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkûng htoq má Hkikhkam dik Sũ Garai Gasâng é loqyo hkyam má zung to bê nghut ri. ⁴ Haú mù luí, Yhang gi, maumang lagyô pê é myîng htoq gyaú é myîng lé wó sing yù bê nghut é eq rajung za, yhangmoq htoq je riyhang gyaú sũ dut bê nghut ri.

⁵ Hkâsu mù gâ le, Garai Gasang gi,
 "Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê." †
 ga le, dum,
 "Ngò gi, Yhâng Wa dut râ nghut mù, Yhang gi, Ngá Zo dut râ nghut lhê." ††

ga le, maumang lagyo hká yuq lé hkâ-nhám wá taí wú é nghut lhê lhú? ⁶ Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé no-kuq kó sháng gaq." ‡
 ga taí ri. ⁷ Maumâng pé eq séng luí Garai Gasang taí é má,

"Yhang gi, Yhâng é maumang lagyô pé lé laí su dut nhâng mù, Yhâng é dui-nhâng zoshâng wuì lé, my-ishâm pé su dut nhang é nghut ri." ††

gâ ri. ⁸ Nghut kôlhâng, haú Zo eq séng luí, Yhang gi,
 "Garai Gasang ê, Náng é hkohkâm-tanghkuq gi, pyat dedu ahtum abyuq gîng nyi mù,

Náng é dingmán hkyô gi, Náng é mingdán lé uphâng é hkyô dut râ nghut lhê.

⁹ Nàng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

† 1:5 Hkya-on 2:7 †† 1:5 2 Sam 7:14 ‡ 1:6 Tarâ Pun 32:43
 †† 1:7 Hkya-on 104:4

Haú mù luí, Garai Gasang, náng é Garai Gasang gi, Nang lé, gabú nhang é xũ but byí é dông, Náng é luzúm wui htoq je lhoq gyaú to bê nghut ri." ††
 ga taí ri. ¹⁰ Hau htoq agó, Yhang gi,

"Yhumsîng ê, Nàng gi, a-nham sâng-hi má myidàm é apûn awang lé hi tô é nghut mù,
 mauhkûng pé gi, Náng é loqmú chyat nghut ri.

¹¹ Haú pé gi, htên byoq byuq râ nghut lhê; nghut kôlhâng, nàng gi, ru gîng nyi râ nghut lhê; haú pé ban-shoq gi, mebu su xau byuq râ nghut lhê.

¹² Nàng gi, haú pé lé, bumó lé su dîng yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhâng, Nàng gi, rajung za ru gîng nyi râ nghut mù, Náng é zanwut pé gi, hkâ-nhám le htûm râ a nghut." †††

ga le taí ri. ¹³ Garai Gasang gi,

"Ngò, náng é gye pé lé, náng é hkyî nang tanghkuq kut pyám byí é hkyíng jé shoq,

Ngá é loqyo hkyam shut zung nyi shi aq." †††
 ga maumang lagyo hká yuq lé hkâ-nhám wá taí wú é lhú? ¹⁴ Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat huí é mù wùn woi-nyí pé chyat za nghut akô, a nghut kó lhú?

Sadiq Byí É Hkyô

2 Haú mù luí, nga-nhúng gi, châng nghoq ló byuq é a hui zo sháng gaq, haú nga-nhúng wó gyô yu to bê hkyô lé je riyhang rago châng nyi râ dut lhê.

² Hkâsu mù gâ le, maumang lagyô pê eq taí bê mung-dang gi, gîng nyi mù, shut shaí lu laí é hkyô eq jîno a gyô é hkyô hkangmó kut é sũ gi, yhumsîng eq gîng é mara dam byí é hui zo kô é nghut le gi, ³ nga-nhúng gi, haú-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hpang lut râ lhú? Hkyi yù hkyô haú gi, haú Yhumsîng eq hí taí pyo htoq é nghut mù, Yhâng chyáng mai wó gyô yu é bang gi, haú hkyô têng é lé, ngamoq chyáng saksé shit bekô nghut ri. ⁴ Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gàm byí é dông mai, haú hkyô lé saksé shit bê nghut ri.

†† 1:9 Hkya-on 45:6-7 ††† 1:12 Hkya-on 102:25-27 †††
 1:13 Hkya-on 110:1

Hkyi Yù Hkyô Hpông Byi Sù

⁵ Garai Gasang gi, maumang lagyô pé lé, ngamoq taí nyi é jé lô râ mingkan lé, uphkâng nhâng râ a nghut.

⁶ Rayuq yuq mai, rawò má saksé hkâm tô é gi,

"Byù gi, haí wá nghut mù, Nàng, yhang lé bûn nyi lhê lhú?

Byu Yhangzo gi, haí wá nghut mù, Nàng, yhang lé wú gôn nyi lhê lhú?

⁷ Nàng gi, yhang lé, maumang lagyô pé htoq ratsui lhoq nyhum to bê nghut ri.

Nàng gi, yhang lé, hpungwup shingkang eq aróng bò nhâng mù,

⁸ jung hkanmó lé, yhâng é hkyiwa ô má tô to bê nghut ri." †

gâ ri. Jung hkanmó lé yhâng é a-ô má tô to bê gâ é gi,

Garai Gasang, haí lhang a myhit to loshoq yhang uphkâng é a-ô má tô to bê nghut é lé gâ lhê. Nghut

kôlhang, yhang é a-ô má tô tô é jung hkanmó lé, ahkuí, nga-nhúng a myàng shí é za nghut lhê.

⁹ Nghut kôlhang, nga-nhúng gi, maumang lagyô pé htoq ratsui zo lhoq nyhum huí é sù Yesuq lé myang é nghut lhê.

Yhang gi, Garai Gasâng jeju mai, yuq hkanmó é matú shí hkâm byí é hui zo sháng gaq ga, shí-nò jamjau hkyô lé hkâm zo bê nghut é yanmai, ahkuí, Yhang lé hpungwup shingkang eq aróng bò nhâng bê nghut ri.

¹⁰ Zo wuí myo myo lé hpungwup shingkang wó hkam yù nhâng sháng gaq ga, jung hkanmó lé Yhang é matú chyat eq Yhang đông mai chyat joq nyi nhang é Garai Gasang gi, wuĩhke jamjau hui nhang é đông, yhangmoq é hkyi yù Sù lé lhoq gumjup byi râ matú htuk âng nyi ri. ¹¹ Haù byu pé lé chyoyúng nhang é Sù eq lhoq chyoyúng huí é bang gi, ikun ralhum za mâ é bang chyat nghut lhê. Haù mù, Yesuq gi, yhangmoq lé, gumang wuì nghu râ lé a hoq é nghut lhê.

¹² "Ngò gi, Náng myíng lé, Ngá gumang wui chyáng taí pyô râ nghut lhê;

Ngò gi, shiwa hpông é myoq hí má, Nang lé hkyá-on mahkôn hkôn râ nghut lhê." ††

ga, Yhang taí ri. ¹³ Yhang gi,

"Ngò gi, Yhang lé lumhkau nyi râ nghut lhê." ‡

ga le dum taí ri. Hau htoq agó,

"Ngò gi, Garai Gasang ngo lé byí é zoshâng wuì eq shí má nyi nyi lhê." ††

ga, Yhang dum taí ri.

¹⁴ Haù zoshâng wuì gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shí-nò hkyô đông mai, shí-nò hkyô é a-tsam lé zú zing é sù nghut é nat Tsadán lé wó lhoq htên pyám râ eq, ¹⁵ yhangmoq é shí-nò hkyô lé gyuq é èq, yhangmoq é asak gón lé jùn đông zú zing to huí é bang lé, wó lhoq lhut râ nghut lhê. ¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê. ¹⁷ Haù nghut é yanmai, Yhang gi, Garai Gasang lé dojaú é má shogyo nhik-

myín é eq lhumzuí é hkyangjong mó wó dut râ eq, byu pé é yubak marâ é matú shíhtaí gunglik hkungga wó kut râ matú, hkyô hkanmó má Yhâng é gumang wuì eq dù shoq kut é hui râ dut é nghut lhê. ¹⁸ Yhang gi, gunglaú huí é hkùn, Yhânggùng yhang jamjau hui zo bê nghut é yanmai, gunglaú huí nyi é bang lé wó garúm yu é nghut lhê.

Yesuq Gi, Mosheq Htoq Gyaú É Hkyô

3 Haù mù luí, mauhkúng mai wut yù huí é, chyoyúng é gumang wuì è, lagyo eq hkyangjong mó nghu nga-nhúng yín yu é Yesuq é hkyô lé rago myit wú keq. ² Mosheq, Garai Gasâng é yhum gón má lhumzuí é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri. ³ Yhum kut sù gi, yhum htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri. ⁴ Hkâsu mù gâ le, yhum hkanmó gi, rayuq yuq èq saí é chyat nghut ri. Nghut kôlhang, Garai Gasang gi, jung hkanmó lé saí é sù nghut lhê. ⁵ Mosheq gi, Garai Gasâng é yhum gón má dui-nhâng zoshâng rayuq đông lhumzui mù, Garai Gasang taí râ nghut é lé saksé hkâm bê nghut ri. ⁶ Nghut kôlhang, Hkrisduq gi, lhumzuí é zo rayuq đông Garai Gasâng é yhum lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhâng é yhum nghut nyi bê.

A Lumjìng Bang Lé Sidiq Byí É Hkyô

⁷ Haù mù luí, haù Chyoyúng Woi-nyí taí é eq rajung za,

"Hkù-nyí, nungmoq gi, Yhâng é danghtê lé wó gyo kô é nghut jáng, ⁸ yoso má Yhang lé chyâm kô é u lé,

gumlau toq é hkùn nungmoq é ìchyí ìwâ pé kut kô é su, nungmoq é i-myt lé hkâlhoq htan to kó.

⁹ Nungmoq é ìchyí ìwâ pé gi, myi xê zàn yhang Ngò kut é muzó lé myàng kôle, yoso haú má Ngo lé chyam lik bekô nghut ri.

¹⁰ Haù nghut é yanmai, Ngò gi, ipyat haù lé nhikjum yo mù,

'Yhangmoq é myit nhiklum gi, hkâ-nhám le hkyô nghoq byuq akò;

yhangmoq gi, ngá é hkyô pé lé a sé kômù nghut ri.' nghu taí é nghut lhê.

¹¹ Haù mù, 'Ngá é bánno jowò má yhangmoq hkâ-nhám le wó wâng kó râ a nghut.' nghu, Ngò, nhikjum yô é eq dakâm dang taí bê nghut lhê." †††
gâ ri.

¹² Gumang wuì è, nungmoq mâ é ó yuq le, haù rú dui nyi é Garai Gasâng chyáng mai, lhing taù ló byuq sê é, yubak mara byíng é, a lumjìng é i-myt a bò sháng gaq, sidiq nyi keq. ¹³ Nungmoq gi, ó yuq le, yubak marâ é mhaú zô é hkyo èq i-myt lhoq htan pyâm é a hui kó sháng gaq, "hkù-nyí" nghu ru wó taí nyi nyi gi, nyí wuì,

†† Bun zo shí eq bun zo 5, 6 lhum mâ é Garai Gasâng é yhum gâ é gi, Garai Gasâng é byu pé lé gâ é nghut lhê. ††† 3:11 Hkyá-on 95:7-11

† 2:8 Hkyá-on 8:4-6 †† 2:12 Hkyá-on 22:22 ‡ 2:13 Esai 8:17 †† 2:13 Esai 8:18

rayuq eq rayuq myit wum byî lhûm nyî keq. ¹⁴ Nga-nhúng gi, sâng-hi mai wó to bê myit lùm hkyô lé, ló htáng shoq zuî gîng nyî é nghut jáng, Hkrisduq eq chôm zùm yap nyî é bang dut bê nghut ri. ¹⁵ Haû gi, "Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é îchyí îwâ pé kut kô é su, nungmoq é i-myt lé hkâlhoq htan to kó." †

ga taí é eq rajung za nghut ri.

¹⁶ Wó gyô yù mù, gumlau toq é bang gi, ô pé nghut akô lhú? Haû bang banshoq gi, Egutuq ming mai Mosheq eq shuí htoq lo é bang nghut bum lhê, a nghut kó lhú? ¹⁷ Myi xê zàn yhang Garai Gasang lé nhikjum yó nhang é bang gi, ô pé nghut akô lhú? Haû bang gi, mara kut shut mù, yoso má shi leq byuq é bang nghut bum lhê, a nghut kó lhú? ¹⁸ Jîno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasang eq dakam é bang gi, ô pé nghut akô lhú? ¹⁹ Haû mù, yhangmoq a lumjîng kô é yanmai, a wó wâng kô é lé, nga-nhúng myang é nghut lhê.

Garai Gasang É Byu Pê É Matú Bánno Buinyî Đông Nghut É Bánno Jowò

4 Haû nghut mù luí, Garai Gasang é bánno jowò má wàng râ danggidiq ru gîng nyî ashî nghut é yanmai, nungmoq mâ é ó yuq le, haû má a hkyit hkap é a dut râ matú, nga-nhúng sidiq nyî sháng. ² Hkâsu mù gà le, yhangmoq lé gabú danglù haû hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyû a bò, haí mù gà le, haû wó gyô é bang gi, lumjîng myit mai a lhom hap yù kô é yanmai nghut ri. ³ Nga-nhúng lumjîng bê bang za, bánno jowò haû má wó wang é nghut lhê. Haû hkyô gi,

"Haû mù, 'Ngá é bánno jowò má yhangmoq hkâ-nhám le wó wâng ko râ a nghut.' nghû, Ngò, nhikjum yô é eq dakâm dang taí bê nghut lhê." ††

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê. ⁴ Hkâsu mù gà le, "Garai Gasang gi, nyhit nyí nghû râ buinyî má Yhâng é muzó banshoq mai bánno bê nghut ri." ‡ gà é dang pé má, haû nyhit nyí nghû râ buinyî eq sêng é hkyô lé rawò má Yhang taí tô ri. ⁵ Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wâng kó râ a nghut." †† gà ri.

⁶ Bánno jowò haû má wàng râ bang ra-am nyî é danggidiq joq tô ashî nghut ri; hí hkûn, gabú danglù haû wó gyô wú bê bang kúm gi, yhangmoq jîno a gyo kô é yanmai, a wàng kô é nghut lhê. ⁷ Haû mù luí,

"Hkû-nyí, nungmoq, Yhâng é danghtê lé wó gyo kô é nghut jáng, nungmoq é i-myt lé hkâlhoq htân kó." ††
gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq đông mai taí é hkûn,

† 3:15 Hkya-on 95:7-8 †† 4:3 Hkya-on 95:11 ‡ 4:4 Apûn 2:2
†† 4:5 Hkya-on 95:11 †† 4:7 Hkya-on 95:7-8

"Hkû-nyí" gà é buinyî ra-nyí dum masat to bê nghut ri. ⁸ Hkâsu mù gà le, yhangmoq lé, Yoshuq eq bánno jowò byi bê ru nghut le gi, Garai Gasang gi, htâng má, gotû buinyî eq séng luí taí râ a nghut lo. ⁹ Haû mù luí, Garai Gasang é byu pê é matú gi, Bánno buinyî đông nghut é bánno jowò ru joq tô ashî nghut lhê. ¹⁰ Hkâsu mù gà le, Garai Gasang gi, Yhâng é muzó mai bánno é su, Garai Gasang é bánno jowò má wàng é sù gi, yhumsing é muzó mai bánno râ nghut lhê. ¹¹ Haû nghut mù, yhangmoq é jîno a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haû má wó wâng shoq, a-tsam bo é í shikut sháng.

¹² Hkâsu mù gà le, Garai Gasang é mungdang gi, rû dui nyi é eq a-tsam bo é nghut lhê. Haû gi, shamsó íshut dap é sham htoq má je htoq é nghut mù, myit nhikhlum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. ¹³ Hpan tô é lhunglhang gi, Garai Gasang é hí mai wó haq pyâm é haí le a joq é nghut lhê. Jung hkangmó gi, nga-nhúng, jihpán shit ra râ Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haû mù luí, nga-nhúng gi, Garai Gasang é Yhang-zo Yesuq nghut sù, mauhkûng pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjîng hkyô lé ging ging myhik zing nyî sháng. ¹⁵ Hkâsu mù gà le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkangmó má gunlau é huí wú kôlhang mara a bo é sù hkyangjong mó lé sheq wó é ru nghut lhê. ¹⁶ Haû mù luí, nga-nhúng gi, shogyo nhikmyin é hkyô wó yù râ eq, nga-nhúng ra châ é u má nga-nhúng le wó garúm râ jeju lé myang hô sháng gaq, hkyak lum é myit mai Garaí jeju tanghkuq shut chyâng htep ê sháng.

5 Hkyangjong mó yuq hkangmó gi, byu pê chyáng mai hkyin htoq yù huí é nghut mù, mara pê é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó pé má, yhangmoq é gunglik đông, hkyin masat to huí é bang nghut akô. ² Yhânggùng yhang gi, wum nyhôm hkyo é a-ô má nghut nyi é yanmai, yhang gi, bun a bóng é eq hkyô ngoq ló é bang lé nú-nhâm é đông wó shuí-û é nghut lhê. ³ Wum nyhôm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi râ dut é nghut lhê.

⁴ Ó yuq le, yhumsing gùng yhumsing aróng haû lé wó yu é a nghut; Arun lé su, Garai Gasang eq wut yu é hui jáng sheq wó é nghut lhê. ⁵ Haû eq rajung za, Hkrisduq le, hkyangjong mó dut lo é hpungwup shingkan lé, Yhânggùng yhang kut yu é a nghut. Garai Gasang sheq, Yhang lé,

"Nàng gi, Ngá Zo nghut ri; Ngò, hkû-nyí Náng Wa dut bê nghut lhê." †

ga taí é nghut lhê. ⁶ Hau htoq agó,

"Nàng gi, Melahkizedek wó é hkyangjong ayá hkyô đông mai ahtum abyuq hkyangjong rayuq nghut nyi ri." ††

ga, gó wô má le, Yhang taí to ashí nghut ri.

⁷ Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yù Su chyáng, ngaubyi ngau-nhap eq wut garú é èq, kyûdung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byí é hui bê nghut ri. ⁸ Yhang gi, Zo rayuq nghut to kôle, Yhang hui zô é wuîhke jam-jau hkyô mai jino gyo hkyô wó mhoq yù bê nghut ri.

⁹ Yhang gi, lhoq gumjup huí é hkûn, Yhang é jino gyo bang banshoq é matú, ahtum abyuq é hkyi yù hkyo é awang dut byuq bê nghut é eq, ¹⁰ Melahkizedek wó é hkyangjong ayá hkyô đông mai hkyangjong mó dut râ matú, Garai Gasâng èq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí taí râ gyai joq lhê; nghut kôlhang, nungmoq gi, ra luí za a sê gyô é bang nghut kô é yanmai, taí sân kyo wuî ri. ¹² Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq èq nungmoq lé dum taû mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashí kó myhi-nhung!

¹³ Naú wing shuq râ é sù ó yuq le, zonú nghut nyi ashí mù, dingmán é hkyô lé mhoqshit é má a mán shi nghut ri. ¹⁴ Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yù shoq, hkâ-nhám le yhumsing gùng yhumsing lhoq mhân yu nyi é, kô dîng bê bâng é matú ru nghut lhê.

6 Haû mù luí, nga-nhúng gi, Hkrisduq eq séng é mhoqshit hkyô awang lé tô to mù, myit kô dîng é hkyô shut xoq sô ê sháng. Nga-nhúng gi, shî-nò hkyô shut shuít jé é muzó mai myit lhîng hkyo é, Garai Gasang lé lumjîng hkyo é, ² baptisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshit hkyo é, apûn awang dum hî nó a ra lô é nghut lhê. ³ Garai Gasang gyô é nghut jáng, nga-nhúng gi, myit kô dîng hkyô shut xoq so râ nghut lhê.

⁴ Myoq lhoq bóng é radàm hui bê bang, mauhkûng chyunghuq lé myang hap yù bê bang, haû Chyoiyúng Woi-nyí lé chôm hkam yù bê bang, ⁵ Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang, ⁶ yhangmoq hpuq lhik ló byuq é nghut le gi, hká đông lé myit lhîng dum ge wó râ a nghut lo, haí mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyám kô é nghut lhê.

⁷ Yhâng ahtoq má wo gyûn é mau wuî lé shuq yù mù, yò mù saí bâng é matú akyû bo é hôwa nuqhpýí lhoq htoq byí é maumyí gi, Garai Gasâng é shimân jeju myang hap yu é nghut ri. ⁸ Nghut kôlhang, zu gâm eq myoq gâm yuq htoq nhang é maumyí gi, akyû a bò mù, nhîng pyâm é hui zo râ lé chiq râ ri. Haû gi, ló htáng má nyhê hkyô pyâm é hui râ nghut lhê.

⁹ Nghut kôlhang, chytidap é gumang wuî ê, ngamoq gi, haû su nghû taí é nghut kôlhang, nungmoq é hkyi yù hkyô eq séng é je ge é jung pé, nungmoq wó bekô râ nghû hkyak myit lum tô lhê. ¹⁰ Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é đông, Yhang lé nungmoq chytidap é myit shit kô é hkyô lé le, a tô-myhí râ nghut lhê. ¹¹ Ngamoq gi, nungmoq é i-myt myoqbyù hkyô wó byíng jup râ matú, nungmoq yuq hkangmó ipyat htum shoq xoq shikut nyi kó râ lé gyai ô nau ri. ¹² Ngamoq gi, nungmoq lagon bang dut byuq râ lé a ô nau é za, Garai danggididq byí to bê é lé, lumjîng myit eq myit hîng hkyô đông mai hkam yu é bang su châng kut kó râ lé ô nau é ru nghut lhê.

Garai Gasâng É Danggididq Gîng Nyi É Hkyô

¹³ Garai Gasang gi, Abraham lé danggididq tô é hkûn, Yhâng htoq gyaú é dakâm myîng lang râ rayuq lháng a nyi é nghut mù, Yhânggùng lé Yhang lang luí dakam é gi, ¹⁴ "Ngò gi, nang lé teng yhang shimân byi mù, nang lé awut ashín myo myo byi râ nghut lhê." † gâ ri. ¹⁵ Haû mù, Abraham gi, myit hîng hîng láng yu é htâng má, byí tô é danggididq lé wó yù bê nghut ri.

¹⁶ Byu pé gi, yhangmoq htoq gyaú su é myîng lé lang luí, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akô nghut ri. ¹⁷ Garai Gasang gi, Yhang myit hpy-it tô é hkâ-nhám le a htaí lhik é hkyô lé, danggididq byí tô é lé hkam yù râ bâng chyáng san za shit nau ri; haû mù luí, dakâm dang eq lhoq gîng to bê nghut ri.

¹⁸ Garai Gasang gi, mhaú a ge é yanmai, hkâ-nhám le a htaí lhik é hkyô í hkat nghut é danggididq eq dakâm dang joq é nghut mù, Yhang haû su kut é gi, nga-nhúng hí má tô to byí é myit myoqbyù hkyô lé myhik zîng râ matú gaû é jowò shut hpang wàng bê bang nga-nhúng lé wum mó byí é dut râ matú nghut lhê.

¹⁹ Nga-nhúng gi, myit nhiklhûm é shamtoq goknghe đông myit myoqbyù hkyô haû lé wó é nghut mù, haû gi, gîngtîng é eq gaû é hkyô nghut ri. Myit myoqbyù hkyô haû gi, mauhkûng noqkuq yhûm mâ é pán-gyang ahkaû mâ é sân-yúng gok má jé wang é nghut ri. ²⁰ Jowò haû gi, nga-nhúng é akyu é matú, nga-nhúng é hí má wàng byí é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô đông mai, ahtum abyuq é hkyangjong mó dut bê nghut ri.

† 5:5 Hkya-on 2:7 †† 5:6 Hkya-on 110:4

‡ 6:14 Apûn 22:17

Hkyangjong Melahkizedek É Hkyô

7 Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat ùng pyám luí dum taù lo é Abraham lé hui mù, shimân byi bê nghut ri. ² Haù mù, Abraham gi, wó lo é jung hkangmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é mying lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nguingón hkyo é hkohkâm" gâ é nghut lhê. ³ Yhâng é ìnu ìwa é hkyô eq byùxik labaù le, hi é buinyì eq asak htùm é hkyô le a kê to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghù é lé, myit wú keq. Haù ìchyí ìwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung! ⁵ Hkyangjong dut bang Lewiq é awut ashín pé gi, yhangmoq é gumang wuì, Abraham mai nyi gyó lo é bang nghut kôle, tarâ má bo é eq rajung za, haù bâng chyáng mai xê gambùm mâ é ragambùm lé hkyui yù rà dut é bang nghut akô. ⁶ Nghut kôlhang, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byi ri. ⁷ Shimân byi sù gi, shimân byi é lé hkam yù sù htoq je gyaú sù nghut é lé, ó yuq le ùng-áng rà hkyô a joq é nghut lhê.

⁸ Hkyangjông pé eq séng luí ga jang, shi byuq sê é byu èq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga taí pyô byi é hui su èq hkyui yu é nghut lhê. ⁹ Xê gambùm mâ é ragambùm hkyui yù sù, Lewiq lháng gi, Abraham dông mai xê gambùm mâ é ragambùm byi bê nghù wó taí ri. ¹⁰ Haí mù gâ le, Melahkizedek gi, Abraham lé hui é hkûn, Lewiq gi, yhâng é ìchyí ìké é gungdu hkaù má ru bo tô ashí nghut ri.

Melahkizedek Eq Dù É Yesuq

¹¹ Haù Lewiq hkyangjong amyû pé é ipyat má, byu pé gi, jep é tarâ lé wó yu bùm kô é nghut mù, hkyangjong ayá haù mai gumjup hkyô wó yù kô é nghut le gi, haí mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotû hkyangjong rayuq ra shirâ lhú? ¹² Hkâsu mù gâ le, hkyangjong amyû htaí é hkûn gi, tarâ le htaí yhang htaí rà dut é nghut lhê. ¹³ Haù su nghù taí é hkyô pé eq sêng é Sù gi, gotû byuhú mâ é sù nghut mù, byuhú haù mai gi, ó yuq le hkungga gyap má do-jaú wú é a nghut. ¹⁴ Hkâsu mù gâ le, nga-nhung é Yhumsing gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haù eq sêng é hkyô má, hkyangjong pé eq séng luí haí lé a taí é nghut lhê. ¹⁵ Melahkizedek eq dù é gotû hkyangjong rayuq pô htoq bê nghù, ngamoq taí bê hkyô gi, je riyhang san za dut bê nghut ri. ¹⁶ Yhang

gi, ìwa rayuq é awut ashín pé nghut rà lhê gâ é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. ¹⁷ Hkâsu mù gâ le,

"Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri." †

ga Yhang eq séng luí taí pyo tô é nghut lhê.

¹⁸ Haù hí lhê é cháng rà tarâ gi, wum nyhôm é eq akyû a bo é yanmai, tô pyám bê nghut lhê. ¹⁹ Hkâsu mù gâ le, haù jep é tarâ gi, gumjup hkyô haí a wó kut byi é nghut lhê. Haù mù, je ge é myit myoqbyù hkyô lajang byi é nghut luí, nga-nhung gi, myit myoqbyù hkyô haù mai Garai Gasâng chyáng wó chyâng htep ê é nghut lhê.

²⁰ Myit myoqbyù hkyô haù gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri. ²¹ Nghut kôlhang, Yesuq kúm gi,

"Nàng gi, ahtum abyuq hkyangjong rayuq nghut lhê.' ga haù Yhumsing dakâm bê nghut mù, Yhang myit é hkyô htaí rà a nghut." ††

ga, Yhang eq séng luí Garai Gasang taí é hkûn, dakâm dang haù mai hkyangjong rayuq dut bê nghut ri.

²² Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

²³ Hkyangjông pé myo myo nyi rà dut é gi, yhangmoq é muzó a wó xoq zui shoq shi byuq hkyô èq hkûm zing pyám kô é yanmai nghut ri. ²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zuí nyi rà nghut lhê. ²⁵ Haù mù luí, Yhang gi, Yhang dông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haí mù gâ le, Yhang gi, yhangmoq é matú dúng tôngbán byi nyi rà matú, rú dui nyi é sù nghut lhê.

²⁶ Yesuq gi, chyoiyúng é sù, mara hùn rà hkyô a bo é sù, sân-yúng é sù, yubak dap bang eq rahá a nghut shoq gotû san kut hui é sù, mauhkûng pé ahtoq má lhoq toq lhoq gyaú yu hui é sù nghut ri. Haù sù é hkyangjong mó gi, nga-nhung rà é lé lajang byi rà htuk ang ri. ²⁷ Nyí nyí bui bui, yhumsing é marâ é matú hí hkungga nhông byi mù, byu pé é mara matú le hkungga nhông byi é gotû hkyangjong mó pé su, Yhang gi, a kut rà é sù nghut lhê. Yhang gi, Yhâng-gùng lé Yhang nhông byi é hkûn, yhangmoq é yubak marâ é matú banshoq radàm za hkungga nhông byi pyám bê nghut ri. ²⁸ Hkâsu mù gâ le, haù jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haù jep é tarâ é htâng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

Dangshikaq Asik É Hkyangjong Mó Yesuq

8 Ngamoq taí nyi é dangkang gi, shí dông nghut lhê: Nga-nhung gi, haù sù é hkyangjong mó lé wó

† 7:17 Hkya-on 110:4 †† 7:21 Hkya-on 110:4

é bang nghut lhê. Yhang gi, mauhkûng htoq má, Hkikhkam dik Sû Garaí é hkohkâm-tanghkuq é loqyò hkyam shut zùng to mù, ² byu èq saí é a nghut é za, haù Yhumsing èq saí é saksé zúm akying hkaù mã é, sân-yúng dik gok má dojaú é sù nghut ri.

³ Hkyangjong mó hkangmó gi, chyunghuq pé eq hkungga pé lé nhông byi rã matú wò hun to huí é chy-at nghut lhê. Haù mù luí, hkyangjong mó shí yuq le, rajung jung nhông byi ra rã nghut lhê. ⁴ Yhang gi, mingkan htoq má nyi tô é ru nghut le gi, hkyangjong dut rã a nghut; hkâsu mù gà le, jep é tarã đông ga jang, chyunghuq nhông jaú é byu pé nyi to gù bê nghut lhê. ⁵ Yhangmoq, sân-yúng dik gok má dojaú é hkyô gi, mauhkûng htoq má joq é azòng eq wupzo đông nghut ri. Haù nghut é yanmai, Mosheq gi, saksé zúm saí rã nghut é hkûn, "Nang lé, bùm mã tân shit é azòng eq rajung za jung hkangmó wó saí shoq kut aq." † ga sidiq byi huí é nghut lhê. ⁶ Nghut kôhlang, Yesuq, ggoro sô xoq byí é dangshikaq gi, axaù lhùm htoq má je gyaú é eq rajung za Yhang hap yu tô é do-jaú hkyô gi, yhangmoq é dojaú hkyo htoq má je gyaú é nghut lhê. Haù mù, dangshikaq haù gi, je ge é dang-gidiq pé htoq má awang hi tô é nghut lhê.

⁷ Hkâsu mù gà le, sân-hi lhê é dangshikaq mã rã é hkyô haí a bo é ru nghut le gi, gotû ra rã a nghut lo. ⁸ Nghut kôhlang, Garai Gasang gi, byu pé chyáng mara bo é myàng mù, taí é gi,

"Haù Israelaq é yhumbyù wuì eq le, Yudaq é yhum-byù wuì eq le,

Ngò, dangshikaq asik to rã ahkýing jé lo nyi ri ga haù Yhumsing taí pyo ri.

⁹ Haù gi, Ngò, yhangmoq é îchyí îwã pé lé loq èq zui mù, Egutuq ming mai shuí htoq lo é hkûn, yhangmoq eq tô tô é dangshikaq su dut rã a nghut.

Haí mù gà le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai lhing ló byuq é nghut lhê ga haù Yhumsing taí pyo ri.

¹⁰ Shí gi, ahkýing haù laí é htàng mã, Israelaq é yhum-byù wuì eq Ngò to rã nghut é dangshikaq nghut lhê ga haù Yhumsing taí pyo ri.

Ngò gi, Ngá é tarã pé lé, yhangmoq é i-myt mã kat byi mù, yhangmoq é myit nhiklhùm mã kã to byi rã nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó rã nghut lhê.

¹¹ 'Haù Yhumsing lé sé keq.' ga, yhâng é gumang hpó lé nghut nghut,

yhâng é chyangnâm mã é sù lé nghut nghut, mho-qshit é byù nyi rã a nghut lo,

haí mù gà lé, yhangmoq lhunglhâng bang gi, tiq htáng sù mai kô htáng sù jé shoq Ngo lé sé kó rã nghut lhê.

¹² Hkâsu mù gà le, Ngò gi, yhangmoq é agè ashop hkyô lé mara hkyut pyám byi mù, yhangmoq é mara pé lé dum a bun byi lo rã nghut lhê." ††
gã ri.

¹³ Dangshikaq haù lé, Yhang "asik" gà é gi, sân-hi lhùm lé, axau kut pyâm é nghut ri; xau ló byuq é haí le, hkã-myhâng a myáng mã byuq ló byuq rã nghut lhê.

Myidàm Saksé Zúm Mã Noqkuq É Hkyô

9 Sân-hi lhê é dangshikaq gi, noqkuq rã htúngtarã pé eq noqkuq rã myidàm sân-yúng dik gok bo é nghut ri. ² Saí tô é saksé zúm é sân-hi gok mã gi, haù myibung tsúng jang, siboí eq haù nhông byí é muk joq mù, haù gok lé gi, Chyoiyúng Jowò ga myhíng ri. ³ Í dang nghú rã gok pán-gyang é ahkaù mã é gok lé gi, Chyoiyúng Htàng é Jowò gà é nghut lhê. ⁴ Gok haù mã gi, namngón jung nyhê é híng hkungga gyap eq híng shup dangshikaq sidek joq ri. Dangshikaq sidek haù mã gi, mannaq muk bo é híng yam, ahaq nyún tô é, Arun é dumbáng eq, dangshikaq luqlong pé bo tô ri. ⁵ Dangshikaq sidek é ahtoq mã gi, shíhtaí gunglik hkungga byi jang htoq mã wup tô é, Hpungwup shingkang bò Sù é hkerubim ‡ pé joq tô ri. Nghut kôhlang, ngamoq gi, ahkuí haù pé lé jihkúm nuqguq a wó taí san kyo é nghut lhê.

⁶ Haù đông jung hkangmó ban lajang tô é hkûn, hkyangjong pé gi, ayang sân-hi gok mã wàng mù, yhangmoq é dojaú muzó lé wùn waq bekô nghut ri.

⁷ Nghut kôhlang, ahkaù gok mã gi, hkyangjong mó za, yhânggùng é matú le, a sê é za byu pé kut shut é marã é matú le, nhông byi rã sui chùng mù, razàn mã radàm za wang é nghut lhê. ⁸ Haù Chyoiyúng Woi-nyí gi, haù pé đông mai, sân-hi é saksé zúm ru joq nyi nyi, haù Chyoiyúng Htàng é Jowò wàng hkyô a hpông shit shi é lé, tân shit nyi ri. ⁹ Haù gi, ipyat shi é matú tân shit é azòng nghut mù, nhông byí é chyunghuq pé eq shigu hkungga pé gi, dojaú sù é i-myt lé a wó lhoq sân-yúng byí é hkyô lé taí nau é nghut lhê. ¹⁰ Haù pé gi, zojung, shuqjung eq chí san chí séng hking ahú hú eq za sêng é nghut mù, htúngli asik, lé joq é ahkýing jé shoq za tô tô é gungsho eq sêng é tarã pé nghut ri.

Hkrisduq É Sui

¹¹ Hkrisduq gi, shí mã joq to gù nghut é gè hkyô pé é hkyangjong mó đông lé jé é hkûn, hpan tô é mã a lom nghú nau é, byu èq saí é a nghut é, je kô é eq je gumjup é saksé zúm mai wang lai bê nghut lhê.

¹² Yhang gi, Chyoiyúng Htàng é Jowò mã wang é hkûn, bainám eq nojúng zo pé é sui lé chùng mù wang é a nghut é za, Yhâng é suí èq yhang banshoq é matú radàm za ahtum abyuq é hkyi yù hkyô wó yù bê nghut ri. ¹³ Htúngli đông agot a-ù dut é bang lé lhoq sân-yúng rã matú, bainám eq nohtó zo pé é sui eq no-pyã é myi-mhop lé, yhangmoq é ahtoq mã hpyun gyun é hkûn, yhangmoq gi, ahtoq gungsho pyâm wó lhoq sansêng é hui kô é nghut lhê. ¹⁴ Haù nghut jáng, Garai Gasang é hí mã ra a bo é Yhânggùng lé, ahtum abyuq é Woi-nyí đông mai nhông byí é Hkrisduq é sui gi, rú dui nyi é Garai Gasang lé nga-nhúng wó dojaú sháng

‡ Hkerubim gà é gi, byù su su, dusak su su dut é, dùng dap é maumang lagyo rahú nghut lhê.

gaq ga, shi é hkyô shut shuê jé é nyi yap sâmlai mai nga-nhông é myit sôn sê é hkyô lé, je riyhang wó lhoq sanséng yu ri-nhung mhaí!

¹⁵ Haû nghut é yanmai, Hkrisduq gi, danggidiq byi tô é ahtum abyuq é muizé lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haû su wó kut é gi, sâng-hi lhê é dangshikaq ahkaû má mara kut shut é bang lé lhoq lhut yù rã matú, yubak chyín xap zê ralhúm dông, Yhang shí hkám byi yanmai nghut ri.

¹⁶ Madat dang eq séng luí ga jang, madat dang tái sù haû shí bê hkyô saksé shit rã lhê. ¹⁷ Haí mù gà le, madat dang gi, rayuq yuq shí jáng za sheq lichyúm htoq é nghut lhê. Madat dang tái sù rú dui nyi nyi, haû gi, hkâ-nhám le lichyúm htoq rã a nghut. ¹⁸ Haû nghut é yanmai, sâng-hi lhê é dangshikaq lhang gi, sui a bo lóm jáng lichyúm a htoq é nghut lhê. ¹⁹ Mosheq gi, haû jep é tarã má bo é hkunmó hkangmó lé, shiwa byù banshoq bang lé ban tái pyo é hkûn, zam zam ne é saumaú eq jàm kyâng lé yù mù, nojúng zô é sui eq bainám sui eq wui nyhò tô é lé, chyúmding má le, shiwa byù banshoq bang lé le, hpyun gyûn é nghut ri.

²⁰ Yhang gi, "Sui shí gi, nungmoq cháng rã matú, Garai Gasang, hkunmó hkyô tô bê nghut é, dangshikaq tô tô é sui nghut lhê." † ga tái ri. ²¹ Yhang gi, saksé zúm eq dojaú é má chung é zè pé má le, haû eq rajung za sui haû hpyûn gyûn ri. ²² Gè gè gi, haû jep é tarã má bo é dông ga jang, azíng zê aluq banshoq gi, suí èq lhoq sâ-yúng é hui rã dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haû mù, mauhkûng zè pé é azòng pé gi, hkungga haú pé èq lhoq sâ-yúng é hui rã é nghut lhê. Nghut kôlhang, mauhkûng zè pé yhang gi, haú pé htoq je ge é hkungga pé èq lhoq sâ-yúng é hui rã dut é nghut lhê. ²⁴ Hkâsu mù gà le, akyíng lhûm é azòng za nghut é, byu èq saí é chyoiyúng dik é jowò má Hkrisduq wang é a nghut é za, Yhang gi, mauhkûng má yhang wang é nghut mù, ahkuí gi, nga-nhông é matú Garai Gasâng é hí má bo yap byi nyi é nghut lhê. ²⁵ Yhang gi, haû hkyangjong mó mai yhumsíng é sui a nghut é sui lé chûng mù, Chyoiyúng Htâng é Jowò má zàn wui wàng luí kut é su, yhanggùng lé dum nhông byi byi kut rã matú mauhkûng má wang é le a nghut. ²⁶ Haú dông ru nghut le gi, Hkrisduq gi, mau htoq xâng hkûn mai shí hkâm é adàm myo myo nghut berã nghut lhê. Nghut kôlhang, ahkuí, Yhang gi, yubak mara huí sêng pyám byi rã matú, yhanggùng lé hkungga nhông byi rã ga ipyat pé ló htâng ló nyi é má, banshoq é matú radàm za htoq shit bê nghut ri. ²⁷ Byù gi, radá za shí rã nghut mù, hau htâng má tarã jéyáng é hui rã nghut é eq rajung za, ²⁸ Hkrisduq gi, byù myo myô é yubak mara lé yu pyám byi rã matú, radá za hkungga nhông é hui bê nghut ri. Haû mù, Yhang gi, yubak mara wun pyám byi rã a nghut lo é za, Yhang lé lóng nyi é bang lé hkyi yù hkyô yu lé byi rã matú, htâng má í dâm nghú rã dàm htoq shit rã nghut lhê.

Hkrisduq É Gùng Lé, Banshoq É Matú Radàm Za Nhông Byí É Hkyô

10 Haû jep é tarã gi, jé lô rã nghut é gè hkyô pé é akyíng a nghut é za, wupzo za nghut ri. Haû nghut é yanmai, jep é tarã gi, zàn wui ru nhông byi byi kut nyi é eq rajung zã é shigu hkungga pé dông mai, noqkuq rã matú chyâng lé é bang lé hkâ-nhám lé wó lhoq gumjup é a nghut. ² Tarã haû wó lhoq gumjup byí é ru nghut le gi, yhangmoq nhông byí é hkyô nô pyám kó rã a nghut lhí? Hkâsu mù gà le, haû noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak marã é matú, hkâ-nhám le mara a bò bun lo kó rã nghut lhê. ³ Nghut kôlhang, shigu hkungga haú pé gi, zàn wui yubak mara pé lé lhoq pun byí é zè nghut ri. ⁴ Haí mù gà le, nohtó pé eq bainám pé é sui gi, yubak mara lé huí sêng pyám é hkyô wó dut é a nghut.

⁵ Haû mù luí, Hkrisduq, mingkan má lé jé é hkûn, Yhang tái é gi, "Shigu hkungga eq hkungga lé Nàng a o é nghut mù, Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang ê, Ngò eq séng luí chyúmding má kê tô é eq rajung za,

Nàng ô nau é hkyô kut rã matú, Ngò, shí má nyi lhê.' nghú tái é." ††

⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê." ga tái ri. Haû jep é tarã dông haú pé lé kut rã dut kôlhang tái é nghut ri. ⁹ Hau htâng má, Yhang gi, "Nàng ô nau é hkyô kut rã matú, Ngò, shí má nyi lhê." ga tái ri. Haû gi, Yhang, htang lhum dangshikaq lé htaí masat to rã matú, sâng-hi lhum lé tô pyám é nghut ri. ¹⁰ Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byí é dông mai, nga-nhúng gi, lhoq chyoiyúng é hui bê nghut ri.

¹¹ Hkyangjong hkangmó gi, nyí nyí bui bui, yap mù, yhang é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huí séng pyám byí é, rajung zã é shigu hkungga lé, dum nhông byi byi kut é nghut lhê. ¹² Nghut kôlhang, hkyangjong mó nghut é Hkrisduq gi, yubak mara hkyut byi rã hkungga ralhúm lé za, ahkyíng banshoq é matú ban nhông byí é hkûn jáng, Garai Gasâng é loqyo hkyam shut zung to bê nghut ri. ¹³ Haú hkûn mai, Yhang gi, Yhâng é gye pé lé, Yhâng é hkyí nang jang kut byi rã lé lóng nyi é nghut ri. ¹⁴ Haí mù gà le, Yhang gi, lhoq chyoiyúng é huí nyi bang lé, hkungga ralhúm eq za, pyat dedû é matú lhoq gumjup byi bê nghut ri.

¹⁵ Haû Chyoiyúng Woi-nyí le, haú hkyô eq séng luí nga-nhúng lé saksé hkâm kyô ri. Sâng-hi má, Yhang tái é gi,

† 9:20 Htoq Ló 24:8

†† 10:7 Hkya-on 40:6-8

¹⁶ "Haû Yhumsîng taî ri, shî gi, ahkyíng haû laî htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaû má kat byi mù, yhangmoq é i-myt má kê to byi râ nghut lhê." †

gâ ri. ¹⁷ Hau htâng, Yhang taî jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut." ††

gâ ri. ¹⁸ Haû mù, mara haû pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haû mù luî, gumang wui ê, nga-nhúng gi, Yesuq é suí eq, haû Chyoiýung Htâng é Jowò má wàng râ matú hkyak wó lum to bê nghut lhê. ²⁰ Haû gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê. ²¹ Haû nghut é yanmai le, Garai Gasâng é yhâm lé up é gyaú é hkyangjong lé nga-nhúng wó é yanmai le, ²² nga-nhúng gi, gingtîng é lumjîng hkyô mai sansêng é i-myt eq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sansêng râ matú nga-nhúng é i-myt lé hpyun gyûn é hui nhâng luî, nga-nhúng é gungdu gi, sân-yúng wui eq chi byi é hui yù sháng. ²³ Nga-nhúng gi, nga-nhúng yín yu é myit myoqbyù hkyô lé zuí gingtîng nyi sháng; hkâsu mù gâ le, danggidiq byi to bê Sû gi, lhumzui Sû nghut lhê.

²⁴ Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaû toq byi lhum râ hkyô lé, dat myit nyi sháng. ²⁵ Chôm huí zup lhûm nyi é hkyô lé, ra-am lhaq tô pyâm nyi kê é su, nga-nhúng gi, a tô pyâm é za, haû Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byi lhûm nyi sháng.

²⁶ Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byi râ hkungga a joq lo. ²⁷ Tarâ jéyang hkyô eq Garai Gasâng é gyè pé lé nyhê hkyô pyám râ nghut é nhikmo-yô é myi lé za, gyuq chiq myit mai lánng nyi râ dut bê nghut lhê. ²⁸ Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê. ²⁹ Haû jáng, Garai Gasâng é Yhangzo lé hkyiwa ô má nâng pyeq bê sù, yhumsîng lé lhoq sân-yúng byi bê nghut é dangshikaq é sui lé a chyoiýung é zè dông kut pyám bê sù eq, jeju byi é Woi-nyí lé rhoi é sù gi, hkâ-í yhang gyaú é mara dam byi é hui gíng râ nghut lhê nghû, nungmoq wó myit akô lhú? ³⁰ Hkâsu mù gâ le, "Lató hpuq râ gi, Ngò ru nghut lhê; Ngò lató hpuq râ." † ga le, "Haû Yhumsîng gi, Yhâng é byu pé lé tarâ jéyang râ nghut lhê." †† ga le, taî é Sû lé, nga-nhúng sê lhê.

³¹ Haû rû dui nyi sù Garai Gasâng é loq hkaû má byit gyó wang é gi, gyuq chiq jung yhang nghut ri.

³² Nungmoq, haû maubó lé hap yu é †† htâng, wuihke jamjau huí é má gyai yhang shikut kôluí wó jân pyám

† 10:16 Yer 31:33 †† 10:17 Yer 31:34 † 10:30 Tarâ Pun 32:35 †† 10:30 Tarâ Pun 32:36

bê nghut é, hí lhê buinyi pé lé myit bun keq. ³³ Ra-u u má, nungmoq gi, byu pé hí má de de rhoi shit é eq zing-rî é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri.

³⁴ Nungmoq yhang, je ge é eq ru gîng nyi é zè pé wó é lé sé kê é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byi é bang lé, gabú myit eq jân pyám bekô nghut ri.

³⁵ Haû mù luî, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó râ nghut lhê. ³⁶ Nungmoq gi, Garai Gasâng é ô naû hkyô lé kut é hkûn, Yhâng danggidiq byi tô é lé wó hap yù râ matú, nungmoq hkam jan râ dut é nghut lhê.

³⁷ Hkâsu mù gâ le, razup zo nghut jáng,

"Haû lé lô râ Sû gi, jé lé râ nghut mù, ahkyíng lhoq myáng râ a nghut.

³⁸ Nghut kôlhang, Ngá é dingmán sù gi, lumjîng myit mai asak duí râ nghut lhê.

Yhang nungzut zut é nghut le gi, Ngò, Yhang lé myit nguí râ a nghut." †††

ga tô ri. ³⁹ Nghut kôlhang, nga-nhúng gi, nungzut zut mù htên byoq huí é bang a nghut é za, lumjîng mù hkyi yù huí é bang ru nghut lhê.

Lumjîng Myit Mai

11 Lumjîng myit nghu é gi, nga-nhúng myit myoqbyu tô é lé hkyak wó râ nghu é eq nga-nhúng a myàng shî é lé joq lhê nghû hkyak sê é hkyô nghut lhê. ² A-nham lhê bang gi, lumjîng myit haû mai Garaî eq owaq é hui kê é nghut lhê.

³ Lumjîng myit mai, nga-nhúng gi, nyi mi-nyí, joq mi-joq lhunglhang lé Garai Gasâng é hkunmó eq hpan tô é hkyô sê gyô é nghut lhê. Haû mù, myoq eq wó myang é pé gi, byu-myang é pé mai saî htoq tô é a nghut.

⁴ Lumjîng myit mai, Abelaq gi, Ka-in kut é htoq je ge é hkungga, Garai Gasang lé nhông byi é nghut ri. Lumjîng myit mai, yhang gi, yhâng é hkungga eq séng luí Garai Gasang hkya-ôn é hkûn, dingmán sù rayuq dông owaq é hui bê nghut ri. Haû mù, lumjîng myit mai, yhang gi, shi byuq bê nghut kôlhang, dang rû nyo nyi ashî nghut lhê.

⁵ Lumjîng myit mai, Enuq gi, shi é a hui zo shoq, asak shî mai mauhkûng shut shuî yu é hui bê. Yhang lé, Garai Gasang shuî lô byuq bê nghut é yanmai, yhang lé a wó myâng lo nghut ri. Hkâsu mù gâ le, yhang gi, shuî yu é a hui shî é hí má, Garai Gasang lé nguí nhâng sù rayuq dông owaq é hui sù nghut ri. ⁶ Lumjîng myit a bo é nghut le gi, Garai Gasang lé a wó nguí nhang é nghut lhê. Haî mù gâ le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng eq shigyaú é lé le, lumjîng râ dut é nghut lhê.

⁷ Lumjîng myit mai, Noaq gi, a myang wú shî é hkyô pé eq séng luí sidiq byi huí é hkûn, yhâng é yhumbyù

†† Haû maubó lé hap yu é gâ é gi, gabú danglú lé sânng-hi wó hap yu é lé gâ lhê. ††† 10:38 Hbk 2:3-4

wuì lé hkyî râ matú, gyuq hkunggâ é đông mai wuì-sanghpo saí bê nghut ri. Yhâng é lumjín myit mai, mingkan lé mara byí é nghut mù, lumjín myit mai lo é dingmán hkyo é jeju lé hkam yù sù dut bê nghut ri.

⁸ Lumjín myit mai, Abraham gi, yhâng é muizè đông, htâng má yhang hap yù râ nghut é, Garai Gasang byí é jowò shut e ló râ matú ji yu é huí é hkûn, jino gyo mù, yhang hká shut e ló é a sé kôlhang, ê bê nghut ri. ⁹ Lumjín myit mai, yhang gi, gó ming má nyi é byù bíng rayuq su, danggidiq byí tô é mau má nyi bê nghut ri. Yhang gi, zúm pé má lúng é nghut mù, ranjung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri. ¹⁰ Hkâsu mù gâ le, Abraham gi, Garai Gasâng èq azòng hên mù saí tô é, gîng é apûn awang pé eq mu é myuq lé myit myoqbyu nyi é nghut ri.

¹¹ Lumjín myit mai, Abraham gi, yhâng é asak ipyat laí ló byuq é eq, Sarah le baùdung nghut to kôlhang, haù danggidiq byi Sù, lhumzui sù nghut lhê ga myit sôn yu é yanmai, îwa rayuq wó dut é hui bê nghut ri.

¹² Haù mù luí, yhang gi, shí gùng đông nghut kôle, yhang rayuq mai lo é awut ashín pé gi, mauhkûng mã é kyí pé eq wuimau yàm mã é a ung nghap é semuî myhó myô lò bê nghut ri.

¹³ Byù haù bang banshoq gi, yhangmoq shi é hkûn je shoq lumjín myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kô nghut ri; nghut kôlhang, haù pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yù bekô nghut ri. ¹⁴ Haù su yín yu é byu pé gi, yhangmoq yhumsing é ming lé ho nyi é bang nghut é lé tân shit é nghut akô. ¹⁵ Yhangmoq htoq lo é ming lé, yhangmoq myit tui nyi kô é ru nghut le gi, dum tau ló râ ahkáng wó kô râ nghut lhê. ¹⁶ Ahkuí kúm, yhangmoq gi, je ge é ming nghut é, mauhkûng mingdán lé myit tuí nyi akô nghut ri. Haù mù luí, Garai Gasang gi, yhangmoq é Garai Gasang nghu é hui râ lé a hoq é nghut lhê. Hkâsu mù gâ le, Yhang gi, yhangmoq é matú myuq ralhum lajâng to byi bê yanmai nghut ri.

¹⁷ Lumjín myit mai, Abraham gi, Garai Gasâng èq yhang lé chyam é hkûn, Isak lé hkungga ralhum đông nhông byi bê nghut ri. Haù gi, danggidiq pé lé hap yu to bê sù gi, yhâng é yuqzo zote lé nhông byi râ dã é nghut lhê. ¹⁸ Garai Gasang gi, "Isak đông mai lo é lé, náng é awut ashín nghu sôn byi râ nghut lhê." † ga yhang lé danggidiq byí to bê nghut kôle, yhang haù su kut é nghut ri. ¹⁹ Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

²⁰ Lumjín myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

²¹ Lumjín myit mai, Yakup gi, yhang shi ló râ u má, Yosep é yhangzô nhik lé shimân byi mù, yhâng é dum-báng-u má ngè luí, noqquq bê nghut ri.

²² Lumjín myit mai, Yosep gi, yhâng asak htâm ló râ u lé, Israelaq byu pé Egotuq ming mai htoq lò râ eq séng luí taí mù, yhâng é showui pé eq séng luí hkâsu kut râ hkyô lé pying to bê nghut ri.

²³ Lumjín myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haí mù gâ le, yhangnhik gi, zoshâng haù yúng é myàng kômù, hkohkam é mungdang lé a gyuq kó nghut ri. ††

²⁴ Lumjín myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri.

²⁵ Yhang gi, yubak marâ é ngón hkyô má rayoq zo ngón kún râ malaí Garai Gasâng é byu pé eq rahá hpuzô é hui râ lé sheq hkyin yù bê nghut ri. ²⁶ Yhang gi, haù Hkrisduq é matú rhoí huí é lé, Egotuq ming mã é sutzè htoq má je riyhang hpaudap lhê ga myit sôn yu ri. Haí mù gâ le, yhang gi, yhâng é shigyaú chyunghuq lé myit myoqbyu nyi sù nghut ri. ²⁷ Lumjín myit mai, yhang gi, hkohkâm hpó nhikjum yô é lé a gyuq é za, Egotuq ming mai htoq ló byuq bê nghut ri.

Yhang gi, myoq èq a wó myang é sù Garai lé wó myang é sù đông, hkam jân é nghut ri. ²⁸ Lumjín myit mai, yhang gi, haù zomún lé sat é maumang lagyô èq Israelaq byu pé é zomún lé a wó záng sháng gaq ga, Lhoqlhai Poí eq sui hpyûn é hkyô le kut hî bê nghut ri.

²⁹ Lumjín myit mai, haù shiwa byu pé gi, Nhông Nè lé kyuq huí é myigùng htoq mai su laí byit bekô nghut ri; nghut kôlhang, Egotuq byu pé le, haù đông laí shikut wú kô é hkûn, yhangmoq gi, myup shi byuq bekô nghut ri.

³⁰ Lumjín myit mai, shiwa byu pé, Yeriho myuq xêwâm lé nyhit nyí sô lhing é htâng má, xêwâm haù leq gyop byuq bê nghut ri.

³¹ Lumjín myit mai, shiwa myhí Rahap gi, haù Israelaq jó wú bang lé nguóngón é eq lhom hkulum yu é yanmai, jino a gyo bang eq rahá sat pyâm é a huí é nghut lhê.

³² Haù htoq lai luí, ngò haí taí jat ra shirâ lhú? Gidon, Barak, Samson, Yephta, Dawiq, Samuelaq pé eq myiqhtoí pé é hkyô lé taí râ ahkýing ngò a wó. ³³ Haù bang gi, lumjín myit mai mingdán pé lé wó zân ung yù bekô, tengmán hkyô lé chung jai bekô, danggidiq byí to bê lé wó hap yù bekô, hkanghkyi pé é nhut lé wó myhí pyám bekô, ³⁴ myiduoq myishâm lé wó sat pyám bekô, shamsó mai le wó hpanq lut bekô nghut ri.

Yhangmoq é wum nyhóm hkyô gi, wum taù bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê. ³⁵ Myiwe wuì gi, yhangmoq eq séng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui râ lé he-ngik pyám kômù, zing-rí é gyai yhang hui zo bekô nghut ri. ³⁶ Ram gi, wuizui kut pyám byí é eq nhuq bat é hui bekô, góbang gi, shamtoq kyum hut huí é eq htóng lhung é hui bekô nghut ri. ³⁷ Yhangmoq gi, luqqok eq dú sat é,

† 11:18 Apûn 21:12

†† Haù-u lé, hkohkâm hpó gi, Israelaq pé é yuqzo zonú wuì lé sat pyám râ hkunmó hkyô tô é nghut lhê.

í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rí é eq rhoi pyâm é hui bekô nghut ri. ³⁸ Yhangmoq lhumzuí nyi kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkýung pé eq myídong pé má nyi lhing wún bekô nghut ri.

³⁹ Haú bang banshoq gi, yhangmoq é lumjínng myit é yanmai, owaq é hui bê nghut kôle, yhangmoq ó yuq le, danggididq byí tô é lé a myang hkam yù kó nghut ri.

⁴⁰ Haí mù gà le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajàng to byi bê nghut ri.

Garai Gasang, Zo Wuí Lé Mhoqshit É Hkyô

12 Haú mù luí, nga-nhúng gi, haú myhó é saksé pé mhutdúm su nga-nhúng é lhínghkyuq má joq to bê nghut é yanmai, nga-nhúng lé hkúm tang é hkyô pé jung hkangmó eq, lui za lhoq nhúng byí é yubak mara lé dú pyám mù, nga-nhúng dìn rã matú tô tô é hkyô lé, hkam jan luí din e ló sháng. ² Nga-nhúng gi, nga-nhúng é lumjínng hkyo é apún awang lé hí sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé haí su a ngam é za, tapzínng má shí hkâm é hkyô lé jân pyám luí, Garai Gasâng é hkohkâm-tanghkuq é loqyo hkyam shut zung to bê nghut ri. ³ Nungmoq gi, a núg byuq rã eq myit wum a gyuí byuq kó sháng gaq, yubak dap bâng chyáng mai haú su htuq htíng é hkyô lé jân pyâm é Yesuq chyáng mai myit wum yù keq.

⁴ Nungmoq gi, yubak mara lé htuq htíng shikut é hkyô má, nungmoq é sui shun pyám shoq yhang a kut shí kó nghut ri. ⁵ Hau htoq agó, nungmoq gi, zo wuí lé dōng Garai Gasang nungmoq lé wum byí é dang lé tô-myhí pyám bekô lhú? Wum byi dang haú gi,

"Ngá zo ê, haú Yhumsínng mhoqshit é hkyô lé agya al-há hkâkut pyám,

Yhang, nang lé tân é hkûn, myit wum hkâgyui,

⁶ haí mù gà le, haú Yhumsínng gi, Yhang chyitdap é bang lé mhoqshit mù, zo rayuq lé dōng,

Yhang hap yu é bang yuq hkangmó lé dam byí é nghut lhê." †

⁷ Mhoqshit huí é hkyô má, wuíhkê é lé hkam jan keq. Garai Gasang gi, nungmoq lé, zo wuí lé dōng kut é ru nghut lhê. Hkâsu mù gà le, yhumsínng é yhângwâ èq a mhoq é zo gi, ó wá nyi lhê lhú? ⁸ Nungmoq gi, yuq hkangmó huí laí é mhoqshit hkyô lé, a hui kô é nghut jáng, dezô pé dōng nghut byuq mù, zo sínng wuì a nghut lo kó. ⁹ Nga-nhúng banshoq bang gi, nga-nhúng lé mhoqshit é xângzo îwâ pé wó é bang chyat nghut mù, yhangmoq lé hkunggâ é nghut lhê. Haú nghut jáng, je riyhang, nga-nhúng é woi-nyí eq sêng é Îwâ é a-ô má nyí mù, asak dui rã dut ri myhi-nhung!

† 12:6 Sângghyung 3:11-12

¹⁰ Nga-nhúng é xângzo îwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyúng hkyô má nga-nhúng wó bo lòm shoq, nga-nhúng é gè hkyô é matú, nga-nhúng lé mhoqshit ri. ¹¹ Mhoqshit é hkyô hkangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haú lé hkam yù bê bâng é matú gi, htâng má, nguínngón hkyô eq dingmán hkyo é ashi lhoq htoq byí ri.

¹² Haú mù luí, myúng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq. ¹³ Hkyí hten bang a wó sô é a dut shoq, lhoq gè byí é wó hui kó sháng gaq, nungmoq so rã matú, hkyô lhoq nyhang nyi keq.

Garai Lé He-ngik Bang Dàm Byi Hui Rã Hkyô

¹⁴ Byù banshoq bang eq nguínngón shoq nyi rã eq chyoiyúng rã matú wó dut é í shikut keq. Hkâsu mù gà le, ó yuq le, chyoiyúng hkyô a bo é gi, haú Yhumsínng lé myàng rã a nghut. ¹⁵ Ó yuq le, Garai Gasâng jeju lé a tô pyám rã matú, sidiq keq. Haú, yuq htoq lô mù, wuíhke hkyô lhoq htoq é eq byù myo myo lé agot a-û dut nhang é nuì hko su, ó yuq lé le hkâdut nhâng kó. ¹⁶ Ó yuq le, ashop é dōng gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut rã matú sidiq keq.

¹⁷ Nungmoq sê é eq rajung za, Eso gi, htâng má, shimân jeju haú lé hkam yù nau é hkûn, he-ngik pyâm é hui bê. Yhang gi, shimân jeju haú lé ngaubyi ngau-nhap èq hô kôlhang, yhang kut é hkyô lé a wó htaí byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyí dut é eq laidun lo é má le, ¹⁹ tut htê myíng é eq, dang taí htê myíng é má le, a jé é kó nghut ri. Dang htê haú lé wó gyô é bang gi, yhangmoq lé, dang a taí jat lo rã matú dung tōngbán akô nghut ri. ²⁰ Haí mù gà le, yhangmoq gi, "Bùm haú má dusak pé záng jáng lháng, luqgok èq dú sat rã dut lhê." †† ga Garai Gasang hkyô tô é hkun-mó lé a wó hkâm kô é yanmai nghut ri. ²¹ Haú byu-myàng hkyô gi, lùm wú gyuq hpo dut é yanmai, Mosheq lháng gi, "Ngò, gyuq nán ri." ‡ ga taí é nghut ri.

²² Nghut kôlhang, nungmoq gi, Zi-un Bùm eq rû dui nyi é Garai Gasâng é myuq nghut é mauhkúng Yerusalem má, maumang lagyô pé ajùm ayò gabú ratung zup zínng é jang eq, ²³ mauhkúng htoq má myíng kâ to huí é, zomún pê é noqkuq hpúng joq jang má, jé lé bekô nghut ri. Haú mù, nungmoq gi, byù banshoq é tarâ agyí nghut sù Garai Gasâng chyáng le, lhoq gumjup huí é dingmán bâng é woi-nyí pê chyáng le, ²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyún gyún é sui má le, jé lé é nghut bekô. ††

†† 12:20 Htoq Lô 19:12-13 ‡ 12:21 Tarâ Pun 9:19 †† Abelaq lé gi, yhangmang Ka-in èq sat é nghut luí, yhâng é sui gi,

²⁵ Nungmoq gi, dang nyô Sû lé a gyo a kut râ matú, sidiq keq. Myidàm htoq má sidiq byí é sù lé he-ngik pyâm é bang, a lut kô é nghut lhê. Haû mù, mauhkúng mai nga-nhúng lé sidiq byí é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó lhí? ²⁶ Haû Garaí dang taí é u má, Yhâng é htê gi, mingkan lé lhoq nhún kat ri, ahkuí kúm gi, "Ngò, mingkan lé za a nghut, mauhkúng pé lé le radàm dum lhoq nhún râ nghut lhê." [†] ga Yhang danggidíq byí to bê nghut ri. ²⁷ "Radàm dum" gâ é dang gi, haû a wó lhoq nhún é pé wó myit to sháng gaq ga, hpan to huí é zè pé nghut é, wó lhoq nhún é pé lé huí sêng pyám râ lé gâ é nghut lhê.

²⁸ Haû mù luí, nga-nhúng gi, a wó lhoq nhún é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garaí Gasang hap yu gíng é dngng noqkuq sháng. ²⁹ Hkâsu mù gâ le, nga-nhúng é "Garaí Gasang gi, nyhê jôm é myi nghut ri". ^{††}

Ló Htáng Má Lhoq Pun Kyíng É Hkyô

13 Rayuq eq rayuq, gumang yhangchang dngng chyitdap lhúm nyi keq. ² Byù bíng pé lé hkulúm râ hkâtô-myhí kó, hkâsu mù gâ le, ra-am gi, haû su kut nyí kô é yanmai, a sê é za maumang lagyô pé lé hku-lum záng bekô nghut ri. ³ Nungmoq gi, htóng lúng bang eq rahá htóng lúng luzúm wuí dngng, htóng lúng bang lé le, nungmoq yhang jamjau hui zô nyi é dngng, hpuzô é bang lé le, myit bun keq.

⁴ Myiháng hkyô gi, lhunglhang bâng èq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garaí Gasang gi, su-myi sulàng lú é bang eq ashop é dngng gungsho zúm yap é bang banshoq lé jéyáng râ nghut lhê. ⁵ Nungmoq é asak dui hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haí mù gâ le, Garaí Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ." [‡]

ga taí é nghut lhê. ⁶ Haû mù, nga-nhúng gi, hkyak lum é myit mai,

"Haû Yhumsíng gi, ngo lé garúm sù nghut lhê yan-mai, ngò, gyuq râ a nghut. Ó yuq wá, ngo lé haí wó kut râ lhú?" ^{††}

ngô taí é nghut lhê.

⁷ Nungmoq lé Garaí Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é sâmlai lé myit wú mù, yhangmoq é lumjíng myit lé alik kut yù keq. ⁸ Yesuq Hkrisduq gi, a-nyí nap, hkû-nyí, htàngngùnng pyat dedu rajung za nghut nyi ri.

⁹ Maú nhô zâ é mhoqshit hkyô ajung jung maí èq shuí ngoq huí é bang hkâdut kó. Zo bang lé hai akyú a byí é, htúngli zoshuq èq a nghut é za, Garaí jejú èq nga-nhúng é myit nhiklum lé wum-o lhoq kíng yu é gi, gè hkyô nghut lhê. ¹⁰ Nga-nhúng gi, saksé zúm má

latô-hpuq râ matú nghut ri; nghut kôlhang, Hkrisduq é sui kúm gi, hkyi yù hkyô lajang byí ri. † 12:26 Hagi 2:6 †† 12:29 Tarâ Pun 4:24 ‡ 13:5 Tarâ Pun 31:6 †† 13:6 Hkya-on 118:6-7

dojaú é hkyangjong pé zo râ ahkáng a wó é hkungga gyap ralhum wó é nghut lhê.

¹¹ Haû hkyangjong mó gi, dusak pê é sui lé, yubak mara hkungga dngng Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri. ¹² Haû eq rajung za, Yesuq le, Yhâng é sui dngng mai byu pé lé wó lhoq chyoiyúng râ matú, myuq hkum shinggan má jamjau hpu-zo mù shí hkám bê nghut ri. ¹³ Haû mù luí, nga-nhúng gi, byù nyi jowò shinggan má Yhâng chyáng è mù, Yhang hui zô é rhoí hkyô lé è bo hui zo sháng. ¹⁴ Hkâsu mù gâ le, nga-nhúng gi, mingkan shí má ru gíng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haû mù luí, nga-nhúng gi, Garaí Gasâng é myíng lé yín yu é nhutwui é ashi nghut é, hkyá-on hkungga lé, Yesuq dngng mai, Garaí Gasâng chyáng xoq xoq nhngng byí nyi sháng. ¹⁶ Ge é hkyô kut râ eq góbang lé shuí gam chùng râ hkyô lé, hkâtô-myhí kó; hkâsu mù gâ le, Garaí Gasang gi, haû sù é hkungga pé lé ô ngui nyi ri.

¹⁷ Nungmoq é hkyô-u shê bâng é jino gyo mù, yhangmoq é ahko ahkáng ô má nyi keq. Yhangmoq gi, jihpán shit râ dut é bang dngng mai nungmoq lé up-zúng nyi é nghut lhê. Yhangmoq é muzó pé gi, nungmoq é matú akyú a bo é wólai a dut é za, gabú hkyô ralhum wó dut sháng gaq, yhangmoq é jino gyô nyi keq.

¹⁸ Ngamoq é matú kyúdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dngng asak dui râ lé ô nau lhê nghú, hkyak wó myit ri. ¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyúdung byi keq nghú wum taí tsuq kat lhê.

²⁰ Sau hpúng pê é sau zúng Sû mó nghut é, nga-nhúng é Yhumsíng Yesuq lé, haû ahtum abyuq é dang-shikaq é sui dngng, shí bê mai dum lhoq dui toq é sù, nguínngón hkyô é Garaí Gasang gi, ²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dngng mai Yhang lé gabú nhang é hkyô lé, nga-nhúng chyáng kut nyi sháng gaq. Hpungwup shingkan gi, Yesuq Hkrisduq chyáng pyat dedu ahtum abyuq ru joq nyi sháng gaq. Amen.

²² Gumang wui ê, ngò lhoq pùn kyíng é dang lé nungmoq wó hkam jan kó sháng gaq nghú, wum taí tsuq kat lhê; hkâsu mù gâ le, ngò gi, nungmoq lé, laiká ratot za kê kat é nghut lhê.

²³ Ngò gi, nga-nhúng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shí má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shuí-u bang banshoq eq Garaí Gasâng é byu pé banshoq lé bo shi-kyám byi keq. Itali ming mâ é gumang wui gi, nungmoq lé shi-kyâm kat akô nghut ri.

²⁵ Jeju gi, nungmoq banshoq bâng chyáng ru joq nyi sháng gaq ô.

Yakuq

(James)

1 Garai Gasang eq Yhumsing Yesuq Hkrisduq é jùn, ngò Yakuq gi, byo myín tô é Israelaq raxe í myû lé, nguínón dang shit kyô kat lhê.

Lumjín Myit Lé Chyam É Hkyô Eq Hpaqchyí Byéng-yá

2 Ngá gumang wuê ê, nungmoq é lumjín myit lé chyam wú é hui jáng, shikut shirang sê é myit jat nyi é lé, nungmoq sê nyi lhê nghut mù, ³ wuîhke jamjau ajung jung lé htung huí é hkûn, gaù jowò mó nghut nyi lhê nghu luí myit yù keq. ⁴ Hau htoq agó, nungmoq banshoq gúm gumjup jup dut mù luí, haí le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyí byéng-yá langhpyut tô é nghut le gi, haù banshoq bang lé, mara a hun é za, agùn agó byí nyi é Garai Gasang chyáng dúng nyi sháng gaq, haù jáng, Garai gi, yhang lé byi râ nghut lhê. ⁶ Nghut kôlhang, lum shut é myit a bo é za, lumjín é myit èq dúng nyi sháng gaq, hkâsu mù gà le, lum shut é sù gi, laidûn èq hik luí toq lo é nhông mã é wuîlhêng eq wuí nyi ri. ⁷ Haù yuq gi, Yhumsing Garaí chyáng mã é haí le wó yù râ su a ngam nyi sháng gaq. ⁸ Yhang gi, myit-kó xan sù nghut luí, yhang é hkyô hkat hkangmó má, mù htàng a nyang é sù nghut nyi ri.

Myung Sù Eq Wó Sù

9 Myung é gumang hpó gi, waq toq huí é má, wó sù gi, lhoq nyhûm huí é má, gabú gumrong nyi sháng gaq. ¹⁰ Hkâsu mù gà le, wó sù gi, wàhu banbó su wôi byuq ló râ nghut lhê. ¹¹ Bui gi, nyé é lai èq toq lô jáng, haù wàhu nyhuí byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haù eq rajung za, yhang kut nyi é muzó má wôi byuq ló râ nghut lhê.

Gunglaú É Hkyô

12 Wuîhke jamjau huí le, wó shikut shirang nyi sù gi, hkungsô wó nyí ri; hkâsu mù gà le, chyam wú é ban hui jáng, yhang gi, Garai Gasang lé chyitdap é bang lé, byí tô é danggidiq asak janmaú lé, wó yù râ nghut lhê.

13 Gunglaú huí é sù ó yuq nghut kôlhang, gunglaú huí é hkûn lé, "Garai Gasang, ngo lé gunglaú nyi ri." nghu luí, a taí sháng gaq, hkâsu mù gà le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut. ¹⁴ Nghut kôlhang, ó yuq nghut le le, yhumsing é gungsho ô nau é

dông, shuî llang nghoq ló é nghut le gi, agúng alaú hui bê. ¹⁵ Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.

¹⁶ Ngò chyitdap é gumang wuê ê, i-myt hkyô nghoq hkâ-nghoq nyí kó. ¹⁷ Gè réng é eq byíng jup é chyunghuq lhunglhang gi, ahtoq shut mã é nghut mù luí, maubó gung pé † é Yhângwa Garaí chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut. ¹⁸ Yhang hpan tô é amyú pé mã, nga-nhúng gi, sâng-hi myhîng é ashí pé dut lo sháng gaq ga, Yhang gi, Yhang ô nau é hkyô cháng luí, haù tengmán é mungdang mai, nga-nhúng lé hkú to bê nghut ri.

Gyo Yu É Eq Cháng Kut É Hkyô

19 Ngò chyitdap é gumang wuê ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang taí râ lé a hân sháng gaq; nhik-yo râ lé le hkâhân kó. ²⁰ Hkâsu mù gà le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut. ²¹ Haù mù luí, achayut é banshoq eq ladu laí agè ashop é pé lé lhoq san lhoq sêng pyám luí, nungmoq é i-myt lé wó hkyi yù râ matú, i-myt unghkaù má Garai Gasang hô tô é mungdang lé, nú-nhâm é myit èq hkam yu nyi keq.

22 Nungmoq gi, yhumsing gùng lé a mhaù pyám sháng gaq, haù mungdang lé wó gyô yu é bang za a nghut, haù dông châng kut é bang le nghut nyí sháng gaq. ²³ Mungdang haù lé wó gyô yù mù, a châng kut é sù ó yuq le, yhumsing é gungdu lé myoqjâm má wó sù eq wuí ri. ²⁴ Yhang gi, yhang é gungdu lé wó yù mù, myoqdong lhik é eq, yhumsing gungdu hkâsu dut é lé tô-myhî pyâm ri. ²⁵ Nga-nhúng lé wó lhoq lhut yu é gumjup é tarâ mã, rago za wó tsuq nyí sù kúm gi, wó gyô yù mù tô-myhî pyâm é sù a nghut, muzó èq tân shit é sù nghut é yanmai, haù yuq gi, yhang cháng kut é muzó má shimân jeju wó râ nghut lhê.

26 Byù rayuq yuq, "Ngò gi, noqkuq htung lé lhoq dik sù nghut lhê." ga luí, myit to kôlhang, yhumsing nhut shô lé a wó hkàng mù, yhumsing myit lé mhaù pyâm é nghut le gi, haù yuq é noqkuq htung gi, akôm za nghut nyi ri. ²⁷ Íwa Garaí Gasang é hí má sansêng é eq, râ é hkyô a bo é noqkuq htung gi, wuîhke jamjau huí é chuimó chuizô pé lé, châng wú garúm é hkyô eq,

† Maubó gung pé gà é gi, bui, kyí, lhamó lé gà lhê.

mingkan htoq mâ é achag achyut é hkyô lé koi pyâm é hkyô nghut ri.

Myoqdong A Wó Hkyin Lhum

2 Ngá é gumang wui ê, hpungwup shingkang bo é nga-nhúng é Yhumsing Yesuq Hkrisduq lé lumjínng hkyô má, byu é myoqdong lé hkâhkyin lhum kó. ² Dangké, hng loqchyop chyop luí, réng é mebu wut é sù rayuq eq ajeq amyha é mebu wut é asho awuí é sù rayuq gi, nungmoq é tarajong má wang lò kô é nghut le, ³ haú réng é mebu wut é sù lé, nungmoq lhom wú mù je hkunggá é eq, "Shí aróng wó é jowò má zúng aq." dum, haú asho awuí é sù lé nghut jáng gi, "Mhó má yap to aq." haú su a nghut jáng, "Ngá é hkyí htàng má zúng aq." ga taí kô é nghut le gi, ⁴ nungmoq rayuq eq rayuq gamhkuí lhum luí, a ge é i-myyit eq doqdân é bang dut lò bekô a nghut kó lhú?

⁵ Ngò chyitdap é gumang wui ê, gyô yù keq, lumjínng hkyô má wó sùt nyi luí, gidiq tô tô é mingdân é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuí é bang lé hkyin yù bê a nghut kó lhú? ⁶ Nungmoq kúm gi, asho awuí é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq eq yhang, tarâ tingnyâng shut she hkyut lò bekô, a nghut kó lhú? ⁷ Nungmoq eq sêng é kô dik é myiing lé lháng, yhangmoq yhang rhoi dang taí bum akô, a nghut kó lhú?

⁸ Haú mù luí, Chyúmdang má, "Náng gung lé nàng chyitdap é su, náng é chyangnâm mâ é bang lé le chyitdap aq." † ga luí, taí tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê. ⁹ Nghut kôlhang, byu é myoqdong lé nungmoq hkyin nyi kô é nghut le gi, nungmoq mara kut nyi gú nghut bê yanmai, haú tarâ lé shut é bang lé su tarâ jéyáng é huí nyi bekô râ nghut lhê. ¹⁰ Byù ó yuq nghut le le tarâ banshoq lé cháng kôlhang, haú mâ é ralhum lhum lé shut pyám jáng gi, tarâ banshoq lé shut pyám sù dut byuq râ nghut lhê. ¹¹ Hkâsu mù gâ le, "Su-myi sulàng hkâlú." †† ga luí, hkang tô é sù gi, "Byù lé hkâsat." ‡ ga luí le, taí tô ashí. Nàng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

¹² Haú su mù luí, nungmoq lé lhoq lhut kat é tarâ dông jéyáng doqdân é huí râ bang su, ru taí nyi keq; ru châng kut nyi keq. ¹³ Hkâsu mù gâ le, shogyo myit a bò sù gi, a shogyô é dông jéyáng doqdân é huí râ nghut lhê. Shogyo nhikmyin é hkyô kúm gi, jéyáng doqdân é hkyô lé wó ông lut râ nghut lhê.

Lumjínng Myit Eq Zui Saí É Hkyô

¹⁴ Ngá gumang wui ê, byù rayuq yuq, "Ngò gi, lumjínng myit bo lhê." ga taí nyi kôlhang, muzó a bo lom é nghut le gi, haí akyû bò râ lhú? Lumjínng myit haú gi, yhang lé wó hkyi yù râ lhú? ¹⁵ Gumang, gu-nhá

rayuq yuq a chîn dut nyi é eq, nyi wui é zoshuq langhpyut tô é nghut le, ¹⁶ nungmoq chyáng mâ é rayuq yuq gi, yhangmoq é gungsho má râ é hkyô haí le a byí é za, yhangmoq lé, "Nungmoq wut é gùng lúm sháng gaq, zô é úng gyi sháng gaq, ngui ngui ngón ngón ló keq." ga taí é nghut le gi, hai akyû bò kó râ lhú? ¹⁷ Haú eq rajung za, lumjínng myit má muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, "Nàng gi, lumjínng myit bo ri, ngò gi, muzo bo lhê. Muzó a bo é náng é lumjínng myit ngo lé tân shit wú aq, haú hkûn, ngá muzó eq ngá lumjínng myit lé, nang lé ngò tân shit râ nghut lhê." ga luí, rayuq yuq taí râ nghut lhê. ¹⁹ Garai Gasang rayuq za nghut é lé nàng lumjínng ri-nhung! Nghut bê, haú gi, jô é hkyô nghut nyi ri, nat gâng pé le haú su yhang lumjínng mù gyuq nán nyi akô nghut ri.

²⁰ Kyoq a bo é byù bam ê, lumjínng myit má muzó a bo le akôm za nghut é hkyô lé, nàng sé nau lhê a nghut lhú? ²¹ Nga-nhúng é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sù gâ é lé wó yú bê a nghut lhú? ²² Haú mù luí, yhang é lumjínng myit gi, yhang é muzó eq rahá za e ló é yanmai, lumjínng myit gi, jup byíng lo é lé, nàng wó myàng bê nghut ri.

²³ Haú su mù, "Abraham gi, Garai Gasang lé lumjínng é nghut mù luí, yhang lé dingmán sù ga són byi bê." †† ga luí, kâ tô é Chyúmdang gi, dik to bê. Dum, yhang lé Garai Gasang é buinùm hpó ga luí le myhíng byi bê.

²⁴ Haú mù luí, byù gi, lumjínng é myit eq baú za a nghut, zui saí é muzó eq mara hkyut san byi huí é lé, nungmoq bûn sê nyi akô.

²⁵ Haú eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat dông nhang kat pyâm é hkûn le, yhang zui saí é muzó mai dingmán é sù gâ é wó yú bê a nghut lhú? ²⁶ Haú su mù, gungdu má woi-nyí a bo le gi, shi é eq rajung za, haú lumjínng myit má muzó jizó a bo le gi, shí gú nghut bê nghut ri.

Mhé Wuí É Shô

3 Ngá é gumang wui ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é dông jéyáng doqdân é huí zo râ nghut lhê. ² Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng eq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é dông wó cháng nhang lhê. ⁴ Haú mai gotû, wui-sanghpo pé lé wú wú keq, haú-í kô é sanghpo lé htan é laidûn eq mut é huí kôlhang, sanghpo hkâng sù gi, gyai tiq é sanghpo shap eq za, yhang ô nau é dông, haú pé lé wó hkang yu ri. ⁵ Haú eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé

† 2:8 Nhung 19:18 †† 2:11 Htoq Ló 20:14 ‡ 2:11 Htoq Ló 20:13

†† 2:23 Apûn 15:6

wó nyé gyó nhang ri-nhung. ⁶ Shô haû gi, myi eq wui nyi ri. Nga-nhông é gungsho má, shô haû gi, agè ashop é mingkan dut lò mù, nga-nhông é gungsho asak lé achag achyut dut nhâng luí, gungsho asak lé nyhê tuq kat ri. Haû gi, ngaraí myí èq nyhê tuq kat é nghut bê.

⁷ Dusak ajung jung, nghoq ahú hú, myi má yê é jung eq wui hkaû má nyi jung banshoq gi, wó mhê yu é jung chyat nghut mù, byu pé gi, haú pé lé mhê yu nyi akô. ⁸ Nghut kôlhang, shô lé kúm gi, byú ó le a wó mhê yu kó nghut ri. Haû gi, apyí abat, agè ashop, uphkàng a wó é eq, shi é jung duq èq byíng tô é jung nghut nyi ri.

⁹ Nga-nhông gi, shô hau èq nga-nhông é Yhumsing eq Íwa Garai lé hkya-on nyi lhê; hau èq za, Garai Gasâng é gunglô dông hpan tô é waxâng zo wui lé le nhîng pyám nyi ri. ¹⁰ Nhut ralhum za mai, hkya-ôn é dang eq nhîng é dang htoq lo ri. Ngá é gumang wui ê, haû su kut é gi, a gè. ¹¹ Wuibúm radong za mai, chuí nghâm é wui eq hkô é wui wó htoq râ lhú? ¹² Ngá gumang wui ê, maihpáng gâm mai tsanlun shi, tsibiyiq nuí mai maihpáng shi, wó zui râ lhú? Haû eq rajung za, xô ngam é wui gi, chuí nghâm é wui lé wó lhoq htoq byi râ a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sù eq sê é dat é sù, ó nghut lhê lhú? Haú yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyô èq, yhumsing zui saí é ge é muzó dông tân shit nyí sháng gaq. ¹⁴ Nghut kôlhang, nungmoq é myit má ladu laí é manon é i-myt eq, lú lhum bat zik é i-myt bo é nghut le gi, hkâ-nghutbun kó, haû tengmán hkyô lé le hkâ-mhaú pyám kó. ¹⁵ Haû sù é hpaqchyí byéng-yá kúm gi, mauhkúng htoq mai gyó lo é hpaqchyí byéng-yá a nghut, haû gi, myigùng htoq mâ é, gungsho ô nau é eq, nat é hpaqchyí byéng-yá chyat nghut nyi ri. ¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkúm nyi ri.

¹⁷ Mauhkúng htoq mâ é hpaqchyí byéng-yá kúm gi, sâng-hi awang má sansêng nyi ri; hau htâng má gi, nguínón hkyô lé ô nau é, myit nûm é, jino gyô é, shogyo nhikmyin sê é eq ge é ashi zuí nyi mù luí, gamhkui a bò, ahpuq alik a dut é eq, kut mhaú a sê é hpaqchyí byéng-yá nghut nyi ri. ¹⁸ Hau htoq agó, nguínón é hkyô dat sô xoq é bang gi, nguínón é shijí lé sân kat é bang nghut mù, ge é ashi wó yú kó râ nghut lhê.

Yhumsing Gùng Lé, Garai Gasâng Chyáng Ap To Râ Hkyô

⁴ Nungmoq má gyè dut lhâm é eq mabyoq jishûm gi, hkâmai htoq lo é lhú? Nungmoq ahkaû má gungsho ô nau é hkyô pé ngón hkyô hô mù, majan zân lhâm é yanmai, dut htoq lo é a nghut kó lhú?

² Nungmoq yut yut myit ô nau nyi kôlhang, haí le a wó

yú kó. Nungmoq sat nyi é eq manon nyi kôlhang, a wó yú kó. Nungmoq byoq lhâm nyi é eq majan htoq lhâm nyi kôlhang, haí le a wó yú kó; hkâsu mù gâ le, nungmoq, Garai Gasâng lé a dung kô é yanmai nghut ri.

³ Nungmoq dung kôlhang, a myang yú kó nghut ri; hkâsu mù gâ le, nungmoq é ngón kún hkyô má jai chûng langsâ pyám râ matú, shut é dông dông nyi kô é yanmai nghut ri.

⁴ Su-myi sulàng lú é bang su gidíq a gîng é bang ê, mingkan ô nau é hkyô lé buinûm du é myit gi, Garai lé a ngui é myit nghut é hkyô lé, nungmoq a sé kó lhú? Haû mù luí, mingkan ô nau é hkyô eq buinûm dù nau sù ó nghut kôlhang, Garai Gasâng é gyè nghut nyi ri.

⁵ Dum ralhum, nga-nhông má Garai Gasâng kat lhûng tô é woi-nyí gi, manon é myit lúng nyi ri ga luí, Chyúmdang má taí é gi, akôm nghut ri nghú, nungmoq myit ngam nyi akô lhú? ⁶ Nghut kôlhang, Yhang gi, je kô é jeju ru byí nyi lhê. Haû eq rajung za, Chyúmdang má, "Garai Gasâng gi, nghutbûn é bang lé hkúm zing pyám kôlhang, myit lhoq nyhum é bang lé jeju byí ri." † ga taí tô ri.

⁷ Haû mù, Garai uphkang é a-ô má ru nyi nyi keq; Nat Tsadán lé hkúm tang pyám keq; haú hkún, yhang nungmoq chyáng mai hpan byuq râ nghut lhê.

⁸ Garai Gasâng chyáng huí ê keq, haú hkún, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhum lé lhoq chyoí lhoq yúng to keq. Yudaq htung dông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyám é lé gâ lhê.

⁹ Nungmoq gi, myit yón é, iyon yôn é eq ngaubyi ngau-nhap é kut nyí keq. Nungmoq é wuihâ é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq. ¹⁰ Haû Yhumsing Garaí é hí má i-myt lhoq nyhum nyi keq, haú hkún, Yhang gi, nungmoq lé lhoq toq râ nghut lhê.

¹¹ Gumang wui ê, nungmoq yhangchang a ge é dông hkâtaí hpoí lhum kó. Yhumsing é yhanggu yhang-mang lé a ge é dông taí hpoí nyi é sù, haû a nghut jáng, jéyáng é sù gi, haû tarâ lé a ge é dông taí hpoí nyi mù luí, jéyáng é sù nghut nyi ri. Haû tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹² Garai Gasâng za tarâ byí tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lhú?

Gyáng Dang A Taí Râ Hkyô

¹³ "Ngamoq, hkû-nyí napmá ra-nyí nyí, wà rawà wà shut é mù, haú má razàn kô è nyí luí, hpugá wuiloq gá mù amyat wó myang yú râ." ga taí nyi é bang ê, gyô wú keq. ¹⁴ Napmá haí dut lô râ lé lháng, nungmoq gi, a sé ko. Nungmoq é asak gi, haí nghut nyi lhê lhú? Haû gi, razup rahtâng za htoq shit luí dum byuq byuq ló mù é, nghansoq eq rajung za nghut nyi ri. ¹⁵ Haû mù

† 4:6 Sângkyang 3:34

luî, nungmoq haû su ga taî nyi râ malaî gi, "Yhumsîng Garai đông é nghut le gi, ngamoq le ru wó dui nyi mù, shî le, mhô le, wó kut râ nghut lhê." nghû luî, wó taî râ nghut lhê. ¹⁶ Ahkuî kúm gi, nungmoq é gyáng é dang đông gumrong nyi akô; haû su gumrong é hkyô ban-shoq gi, agè ashop é jung chyat nghut nyi ri. ¹⁷ Haû mù luî, ge é mù sê kut to luî, a kut é sù gi, mara kut sù dut bê nghut ri.

Sùt Wó Bang Lé Sidiq Byî É Dang

5 Sùt wó é bang ê, gyo keq, nungmoq chyáng jé lé lô râ é wuîhke jamjau hkyo é yanmai, ngau garû nyi keq. ² Nungmoq é sutzè gi, htên bup byuq bê nghut ri; nungmoq é wutbu wutmè le manot èq zô pyám bê nghut ri. ³ Nungmoq é hîng eq ngùn má lháng, jogyik zuî byuq mù luî, haû jogyik gi, nungmoq é mara hkyam shut saksé dut byî é eq, nungmoq é gungsho lé myi su zô pyám râ nghut lhê. Nungmoq gi, jhtâm buinyi shí pé má, sutzè lé za hkong to bekô nhung! ⁴ Wú keq, nungmoq é yohtung dùng yò yam nhâng mù luî, ahpau a byî é za, nungmoq mhaú zô tô é ahpau pé garû nyi é htê pé eq, mù zui bang garû é htê pé lé gi, haû a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyi é eq, i-myt ô nau é đông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶ Haû dingmán é sù † lé, nungmoq mara hùn mù, sat pyám bekô. Yhang kúm gi, nungmoq lé a lhóm hkùm zing nghut ri.

Myit Hîng Hîng Hkam Jan Ra Râ Hkyô

⁷ Haû mù luî, gumang wuî ê, haû Yhumsîng dum jé lé é buinyi jé shoq myit hîng é èq lánng nyî keq ô! Hkyâm saí sù lé wú wú keq, yhang gi, myihpún mai ahpau dán é ashi lé wó yú shoq ga mau mún eq wò htáng htâng é mau wo gyûn é jé shoq myit hîng hîng lánng nyi ri.

⁸ Haû eq rajung za, nungmoq le, Yhumsîng Yesuq dum jé lé râ gi, chyâng lo nyi bê nghut é yanmai, myit hîng é èq, i-myt lé lhoq ging lhoq tîng to keq. ⁹ Gumang wuî ê, nungmoq jéyáng a hui sháng gaq, nungmoq yhangchang hkâ-nyung nyâng lhùm nyi ko. Wú keq, Tarâ agyi gi, hkúmdong má jé nyi to bê nghut ri.

¹⁰ Gumang wuî ê, haû Yhumsîng Garaî é mying eq hko kyô é myiqhtoî pé wuîhke jamjau huî é hkùn, jân

† Dingmán é sù gâ é danghkun lé, Chyúmlaika ra-am má gi, dingmán é bang gâ ri.

pyâm é myit lé, nungmoq gi, ge é alik agàn kut yú keq. ¹¹ Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsîng Garai gi, yhang lé htâng má myo myo dum shimân byî é hkyô lé, nungmoq wó gyô wú bê nghut lhê. Haî mù gâ le, haû Yhumsîng Garai gi, gyaî shogyo nhikmyîn é sù nghut nyi ri.

¹² Ngá é gumang wuî ê, banshoq má ahkyak dik é gi, haî le le hkâdakâm kó. Mauhkûng lé a nghut jáng, myigùng lé lang luî le hkâdakâm kó. Dakam é dang gotú lé le hkâtaî nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, taî keq.

Lumjîng Myit Eq Kyûdung Râ Hkyô

¹³ Nungmoq má rayuq yuq wuîhke jamjau huî é nghut le gi, kyûdung nyi sháng gaq; rayuq yuq myit ngón nyi é nghut le gi, hkyo-on mahkôn hkón nyi sháng gaq. ¹⁴ Nungmoq má rayuq yuq nõhpyo huî é nghut le gi, noqkuq hpúng mâ é nhik bô suwún wuî lé ji yù mù, haú bang gi, Yhumsîng Yesuq é mying mai yhang lé xû but byi luî, kyûdung byi kó sháng gaq. ¹⁵ Haû su mù, lumjîng myit èq kyûdung é dang gi, haû nõ sù lé lhoq gê luî, Yhumsîng Garai gi, haú yuq lé lhoq toq yú râ nghut lhê. Yhang gi, yubak mara kut shut é nghut kôlhang, hkyut pyám byî é hui râ nghut lhê. ¹⁶ Haû mù luî, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhóm mù, kyûdung byî lhùm nyi keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

¹⁷ Eliyaq gi, nga-nhúng su i-myt unghkaû bo é xâng-zo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê. ¹⁸ Kyû dum dùng kat jáng, mauhkûng gi, mau wo hkyô kat byi mù, myigùng gi, yhâng é kyô shi mui shi lé lhoq htoq byî wú bê nghut lhê.

¹⁹ Ngá é gumang wuî ê, nungmoq chyáng mâ é rayuq yuq, haû tengmán hkyô mai nghoq ló byuq é hkùn, rayuq yuq gi, yhang lé tengmán hkyô shut dum wó shuî taû lo é nghut le kúm gi, ²⁰ haû shuî taû yù sù gi, yubak mara kut é sù lé, shut shai é hkyô mai tengmán hkyô shut shuî taû yù mù, myit woi-nyî lé shi é mai hkyi yù bê nghut é yanmai, yubak mara myo myo lé shuî nghop pyám byî é sù dut berâ lé, bûn nyi keq ô!

1 Petruq

(1 Peter)

1 Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí èq hpyùn gyùn é hui † râ matú le, haù Woi-nyí é lhoq sân-yúng nyi é muzó dng mai, Íwa Garai Gasâng é hî te sê tô é hpaqchyí má cháng luí, hkyin yù huí é bang nghut é, ² Garai Gasâng èq hkyin htoq yù luí, mingkân é byùbìng dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhûng é Yhumsîng Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô dng, Yhâng é gyai shogyo nhikmyîn é yanmai, nga-nhúng lé, asik hku é dum hui nhâng mù, rù dui nyi é myit myoqbyù hkyô lé wó nhang é htoq agó, ⁴ nungmoq é matú mauhkung htoq má tô to byi bê nghut é, hkâ-nhám le, a hten a byoq é, agot a-ù a dut é, a hpoí byuq é muí lé le wó nhang é nghut lhê. ⁵ Nungmoq gi, lumjìng kô é yanmai, ló htâng é ahkýing má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm èq upzúng é hui bang nghut akô. ⁶ Haù mù, nungmoq gi, ahkuí razup zo, wuîhke hkyô junghkang jungmó má yón hpuzô é hui kó râ nghut kôlhng, gyai yhang gabú nyi keq. ⁷ Wuîhke hkyô haù pé mai, nungmoq é lumjìng myit gi, jet é hkyô lé wó chyam htoq mù, myi mai jên yù kôlhng htên byoq sê é hîng htoq je gyaú luí, Yesuq Hkrisduq htoq shit é hkûn, hkya-on kungtôn hkyô, hpungwup shingkang eq aróng sitang lé, nungmoq wó kó râ nghut lhê. ⁸ Nungmoq gi, Yesuq lé a myang wú kôlhng, Yhang lé chyitdap bum akô; Ahkuí, nungmoq, Yhang lé a myàng kôlhng, Yhang lé lumjìng kô é nghut mù, a ung htoq taí é eq hpungwup bo é gabú hkyô gi, nungmoq chyáng byíng jup nyi rì. ⁹ Hkâsu mù gà le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjìng myit é akyù lé wó yu nyi kô é nghut rì.

¹⁰ Hkyi yù hkyô haù eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sídiq myit èq jí jí chyun chyun ho gon wú bekô nghut rì. ¹¹ Yhangmoq gi, Hkrisduq wuîhke jamjau hui luí, hpungwup shingkang wó râ nghut é hkyô lé, yhang-

† Yhâng é suí èq hpyùn gyùn é hui gà é gi, Yhâng é suí èq mara chí sân pyám byí é lé gà lhê.

moq má lúng nyi é, Hkrisduq é Woi-nyí mai te taí é hkûn, hkâ-nhám nghut râ eq hkasù é u má nghut râ hkyô lé ho gôn wú bekô nghut rì. ¹² Mauhkung mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut rì. Maumang lagyô pé lháng gi, haù hkyô pé lé gyai wú nau bum akô nghut rì.

Chyoiyúng Nyí Râ Hkyô

¹³ Haù mù luí, zui saí râ matú nungmoq é i-myt lé hen to keq; yhumsing gùng yhumsîng hkang nyi keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyi keq. ¹⁴ Jìno gyô é zoshâng wui su, myoq a bóng shî é pyat má nungmoq nyi tô é hkûn, nungmoq é agè ashop ô nau hkyô lé a châng kut é za, ¹⁵ haù nungmoq lé ji yu é Sù gi, chyoiyúng é su, nungmoq zui saí é hkyô banshoq má chyoiyúng nyi keq. ¹⁶ Hkâsu mù gà le, "Ngò gi, chyoiyúng Sù nghut é yanmai, nungmoq le chyoiyúng nyi keq." †† ga kâ tô rì.

¹⁷ Byù yuq hkangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbìng dng shî má nyi é u lé, Garaí lé gyuq hkunggâ é myit mai asak dui keq. ¹⁸ Hkâsu mù gà le, nungmoq gi, nungmoq é îchyí îwâ pè chyáng mai bo gyó lo é hpau a dap é asak dui hkyô mai, htên byoq sê é ngùn, hing èq hkyi yù huí é a nghut é za, ¹⁹ gumjup é eq mara a bo é sauzo nghut sù, Hkrisduq é hpaù dik é suí èq sheq hkyi yù huí é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bê nghut kôlhng, jihtûm ahkýing shí pé má sheq, nungmoq é matú htoq shit nhang é hui bê nghut rì. ²¹ Yhang lé, shi é mai lhoq dui toq yù mù, hpungwup shingkang bò nhang é Garaí Gasang lé, nungmoq gi, Hkrisduq dng mai lumjìng kô é nghut luí, nungmoq é lumjìng myit eq myit myoqbyù hkyô gi, Garaí Gasâng chyáng nghut nyi bekô nghut rì.

²² Ahkuí kúm, nungmoq gi, haù tengmán hkyô lé châng é dng mai, yhumsing gùng yhumsîng lhoq sân-yúng yù bekô nghut mù, nungmoq é gumang wui lé, lhumzui é dng chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq. ²³ Hkâsu mù gà le, nungmoq gi, htên byoq sê é

†† 1:16 Nhong 11:44-45; 19:2; 20:7

amyui mai dum hkû huí é a nghut é za, Garai Gasâng é, rû dui nyi é eq ru gîng nyi é mungdang dông, htên byoq a sê é amyui mai dum hku é hui bang ru nghut lhê. ²⁴ Hkâsu mù gà le,

"Byù lhunglhâng bang gi, wàhu mhan eq pung ri, yhangmoq banshoq bâng é hpungwup shing kang gi, yò mà é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

²⁵ nghut kôlhâng, haù Yhumsing é mungdang gi, ah-tum abyuq gîng nyi lhê." †

gâ tô ri. Haù gi, nungmoq lé hko kyo bê mungdang nghut lhê.

2 Haù mù luí, i-myit dû é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkangmó pé lé tô pyám keq. ² Asik hku é zonú pé naù lé ô naù gadaù é su, woi-nyí eq sêng é jet é naù ^{††} lé ô naù gadaù nyí keq, haù jâng, nungmoq gi, hau é yanmai, nungmoq é hkyi yù hkyô má wó kô myhâng kó rà nghut lhê. ³ Hkâsu mù gà le, haù Yhumsing gi, gè sù nghut é lé, nungmoq chyam wú bekô nghut ri.

Rû Dui Nyi É Luqgok Eq Hkyin Yù Huí É Byù Myù

⁴ Byu pé mai hkyin htoq pyám kôlhâng, Garai Gasâng é matú hpaudap luí, Yhâng èq hkyin yù huí é, rû dui nyi é Luqgok nghut sù, haù Yhumsing chyáng nungmoq jé lé é hkûn, ⁵ nungmoq le, rû dui nyi é luqgok pé su, woi-nyí eq sêng é yhùm † saí nyi é hui luí, Yesuq Hkrisduq dông mai, Garaì èq hap yù gíng é, woi-nyí eq sêng é hkungga nhông byi rà matú, chyoyiúng é hkyangjong amyù dut bekô nghut ri. ⁶ Hkâsu mù gà le, Chyúmdang má,

"Wú keq, hkyin yù huí é eq hpaudap é htungchyùn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpû é hui rà a nghut." ††

ga taí tô ri. ⁷ Haù mù, lumjíng bang nungmoq é matú gi, luqgok haù hpaudap é nghut lhê. Nghut kôlhâng, a lumjíng bâng é matú gi,

"Haù yhùm saí bang hkyin htoq pyám é luqgok gi, htungchyùn mà é ahkyak dik é luqgok †† dut bê nghut ri." †††

ga le,

⁸ "Byu pé lé, htûng leng rà luqgok eq myit leqbat nhâng rà luq mó cham dut bê nghut ri." †††

ga le, taí tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haù dut rà lé, yhangmoq é matú masat to gû nghut bê nghut ri.

⁹ Nghut kôlhâng, nungmoq gi, mauchut hkaù mai Yhâng é mauhpo maubó shut nungmoq lé wut htoq yù Su é mauhpo muzó lé wó taí pyô kó sháng gaq ga,

† 1:25 Esai 40:6-8 †† Woi-nyí eq sêng é jet é naù gà é gi, Garai Gasâng é mungdang lé taí é nghut lhê. †† Woi-nyí eq sêng é yhùm gà é gi, noqkuq hpúng lé taí nau é nghut lhê. †† 2:6 Esai 28:16

†† Ahkyak é luqgok gà é gi, Hkrisduq lé taí é nghut lhê. ††† 2:7 Hkya-on 118:22 ††† 2:8 Esai 8:14

hkyin yù huí é byuhú, hkohkâm hkyangjong amyù, chyoyiúng é byù myù, Garai Gasang eq sêng é byu pé nghut akô nghut ri. ¹⁰ Nungmoq gi, hí lé byù ra-myù a nghut wú kôlhâng, ahkuí gi, Garai Gasâng é byù myù nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhâng, ahkuí gi, shogyo nhikmyin hkyô lé wó yù bekô nghut ri.

¹¹ Chyitdap é luzúm wuí ê, nungmoq é asak woi-nyí lé majan zân nyi é, yubak mara byíng jup é ô naù gadaù hkyô lé koi pyám keq nghù, gó míng byu pé eq byùbíng pé dông mingkan htoq má nyi é bang nungmoq lé, ngò, wum taí tsuq kat lhê. ¹² Haù a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng èq lé kùm é buinyi má Garaì lé shigyaù kó sháng gaq, a lumjíng shí é byu pé é ahkaù má haù su ge é asak dui hkyô dông nyi yap keq.

Uphkâng Bang Eq Yhumsing Wui É A-ô Má Nyi Râ Hkyô

¹³ Haù Yhumsing é yanmai, byu pé mà é ahko ahkáng wó bang banshoq é a-ô má nyi keq: kô dik é ahkáng ayá wó é hkosêng é a-ô má nghut kôle, ¹⁴ shut é hkyô kut bang lé dam byi rà matú eq jô é hkyô kut bang lé shigyaù rà matú, hkosêng èq nhang tô é mauzaù pé é a-ô má nghut kôle, nyi nyi keq. ¹⁵ Hkâsu mù gà le, ge é hkyô kut é dông, byù nâ pé é a sé a dat é dang lé nungmoq lhoq zím pyám é gi, Garai Gasang ô nau é hkyô nghut lhê. ¹⁶ Lut bê bang dông nyi keq, nghut kôlhâng, agè ashop é hkyô lé nghop pyám rà matú nungmoq é luthkyô lé hkâchùng kó; Garaì Gasâng é dui-nhâng zoshâng wui dông nyi keq. ¹⁷ Yuq hkangmó lé rago za hkunggâ é hkyô shit keq; lumjíng é gumang wui lé chyitdap keq; Garaì Gasang lé gyuq hkunggâ nyi keq; hkoséng lé hkungga keq.

¹⁸ Dui-nhâng zoshâng wui ê, hkungga myit banshoq èq, nungmoq é yhumsing wui é a-ô má nyi keq; ge é eq nú-nhám bâng é a-ô má za a nghut, byuwuí pé é a-ô má le nyi keq. ¹⁹ Hkâsu mù gà le, byù rayuq gi, Garaì Gasang lé bûn nyi sù nghut é yanmai, mara dông a nghut kôlhâng, wuîhke jamjau huí é hkyô lé hpuzô é lé, jân pyám é nghut le gi, hkya-on gíng é sù nghut lhê. ²⁰ Nghut kôlhâng, nungmoq gi, mara kut shut é yanmai, nhuq bat é hkâm zo luí, haù lé jân nyi é nghut le gi, hai aróng wó kó rà lhú? Nghut kôlhâng, nungmoq gi, ge é hkyô kut luí, wuîhke hui zô é lé jân pyám é nghut jâng, haù gi, Garaì Gasâng hí má hkya-on gíng é hkyô nghut lhê. ²¹ Nungmoq gi, haù hkyo é matú ji yù huí é nghut lhê; haí mù gà le, Hkrisduq gi, nungmoq é matú wuîhke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyi-kám pé lé cháng rà dut lhê.

²² "Yhang gi, hai mara le a kut shut, Yhâng é nhut mai mhaù é lé a myàng." §

²³ Yhang gi, rhoi é huí é hkûn, yhangmoq lé a dum taù rhoi; wuîhke hkyô huí é hkûn, kyuq é dang a taí. Haù

§ 2:22 Esai 53:9

kut rã malaî, tengmán é dông jéyáng é Su chyáng, Yhânggùng lé ap pyâm ri. ²⁴ Nga-nhúng gi, yubak mara eq wó shi gang mù, dingmán hkyo é matú asak wó duí kó sháng gaq ga, Yhang gi, sik zîng má, Yhâng-gùng èq yhang, nga-nhùng é yubak mara lé Yhâng-gùng má wun pyám byi bê nghut ri; Yhâng é dàm pê é yanmai, nungmoq gi, lhoq gê byî é hui bekô nghut ri. ²⁵ Hkâsu mù gà le, nungmoq gi, hkyô nghoq byuq é sau pé su dut wú kôlhang, ahkuî, nungmoq gi, haû sau zúng Sû eq nungmoq é asak woi-nyí lé upzúng Su chyáng lhing taû lò bekô nghut ri.

Ikun Myhî Pé Eq Ikun Hpô Pé

3 Ikun myhî pé ê, haû eq rajung za, yhumsing é ikun hpô uphkanq é a-ô má nyi keq; haû hkûn, yhangmoq mâ é rayuq yuq, haû mungdang lé a lumjîng kôlhang, ² yhumsing é asak duí hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsîng myhî é nyi yap é sâmlai dông mai yhang lé wó lhoq lhik yû rã nghut lhê. ³ Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut é dông mai lo é a ge nghut. ⁴ Hau é malaî, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpô é yúng hkyô nghut é nungmoq é i-myt unghkaû mâ é su é yúng hkyô sheq dut rã lhê. ⁵ Hkâsu mù gà le, gó hkûn, Garai Gasâng chyáng myit myoqbyù bang nghut é, chy-oiyúng é myiwe wui gi, yhangmoq gùng lé haû dông mhôn yù yù kut kô é nghut lhê. ⁶ Sarah gi, Abraham é jîno gyo luî, yhang lé yhâng é yhumsîng ga wut é su, yhangmoq gi, ó le ô é yhumsing é ikun hpô uphkanq é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haû eq rajung za, yhumsing é ikun myhî eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haû hkûn, nungmoq é kyûdung dang lé a he-ngik pyám byi rã nghut lhê.

Ge É Kut Luî, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huî lhûm nyi keq; myit wú nô mù, gumang nhiktâng wui su chyttdap lhûm nyi keq; shogyo nhikmyin myit bò luî, i-myt nyhum nyi keq. ⁹ Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haî mù gà le, nungmoq gi, haû pê é matú, shimân jeju muí wó hkam yù kó sháng gaq ga, ji yu é hui kô é ru nghut lhê. ¹⁰ Hkâsu mù gà le,

"Asak duí rã lé chyttdap é eq ge é buinyi pé lé myàng nau é sù ó yuq le, yhâng é shô lé, agè ashop é mai, yhâng é nhutwuî lé, mhaú dang taî é mai, lhoq kâng pyám ra rã nghut lhê.

¹¹ Yhang gi, agè ashop hkyô mai lhing tau mù, ge é kut ra rã nghut lhê; yhang gi, nguínón simsaq hkyô lé hô mù, châng hkat nyi ra rã nghut lhê.

¹² Hkâsu mù gà le, haû Yhumsing é myoqjî gi, dingmán bang lé wú nyi é nghut luî, yhangmoq é kyûdung dang lé, Yhâng é nohkyap èq gyo byî ri;

nghut kôlhang, haû Yhumsing é myoqdong gi, agè ashop hkyô kut bang lé gyè dông myang pyâm ri." † gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang rã lhú?

¹⁴ Nghut kôlhang, dingmán hkyo é matú, nungmoq wuihke jamjau huî le lháng, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâ-gyuq dân kó." ††¹⁵ Nungmoq kúm gi, myit nhiklum má, Hkrisduq lé, Yhumsîng dông jowò byi keq. Nàng wó é myit myoqbyù hkyô lé myí é sù yuq hkangmó lé, haî mù wó é hkyô tû taî kyo rã matú, ayang hen to aq. Nghut kôlhang, nú-nhâm é eq hkunggâ é dông haû lé kut nyi aq; ¹⁶ nungmoq é unghkaû myit san za dut nyi keq, haû hkûn, Hkrisduq dông mai nungmoq wó é ge é a-kyang lé rhoi dang taî é bang gi, yhangmoq lumù gansang é yanmai hoq hpô é hui kó rã nghut lhê.

¹⁷ Garai Gasang ô nau é nghut le gi, agè ashop kut luî jamjau hkâm rã htoq má, ge é kut luî jamjau hkam le gi, je ge é nghut lhê. ¹⁸ Hkâsu mù gà le, nungmoq lé Garai Gasâng chyáng shuí jé shoq, Hkrisduq gi, byu pé é yubak marâ é yanmai, radàm za shî hkâm pyâm bê nghut ri; haû gi, dingmán Sû, a dingmán bâng é matú shî hkâm byî é nghut lhê. Yhang gi, gungdu shî bê nghut kôlhang, haû Woi-nyí má lhoq dui é hui bê nghut ri. ¹⁹ Yhang gi, Woi-nyí dông, htóng lúng tô é woi-nyí pé lé ê hko kyô ri. ²⁰ Woi-nyí haú pé gi, a-nham lé, Noaq é ipyat má wui-sanghpo lé Noaq tsuq nyi é hkûn Garai Gasang myit hîng hîng lánq nyi é u lé, jîno a gyô é bang nghut akô. Wui-sanghpo má wàng mù, wui mai hkyi yù huî é byù shau luî, shit yuq za nghut akô. ²¹ Wui haû gi, ahkuî nungmoq lé le hkyi yu é nghut é baptisma é azông nghut ri; haû gi, gungdu mâ é agot a-û lé huî sêng pyám byî é a nghut é za, sansêng é unghkaû myit mai Garai Gasâng é hí má gididq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luî, hkyi yu é hui kô é nghut lhê. ²² Yesuq Hkrisduq gi, mauhkûng má doq ló luî, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkanq é a-ô má nghut nyi bum akô.

Garai Gasâng É Matú Asak Dui Rã Hkyô

4 Haû mù luî, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau èq yhumsing gùng má gyehking dông wut to keq, haî mù gà le, yhâng é gungdu má hpuzo bê sù gi, mara eq gang bê nghut ri. ² Haû nghut é yanmai, yhang gi, yhang nyi tùm tô é mingkan asak duí hkyô má, agè ashop é xângzo byù ô nau é dông a

† 3:12 Hkya-on 34:12-16 †† 3:14 Esai 8:12

nghut é za, Garai Gasang ô nau é đông asak dui é ru nghut lhê. ³ Hkâsu mù gà le, nungmoq gi, laî lò bê ahkyíng má, a lumjíng shî é byu pé hkyin kut nau é hkyô nghut é, shut é đông nyi zô lhúm nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achag achyut kut é hkyô, ye lhai rà wut jung zoshuq lé yut yut ô nau é hkyô, achag achyut é hparà noq hkyô pé má, ahkyíng luq shoq nyi laî lò bê bang nghut akô. ⁴ Nungmoq gi, ladu lai shoq achag achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri. ⁵ Nghut kôlhang, yhangmoq gi, dui nyi é bang eq shî bê bang lé tarâ jéyáng rà ri rì nghut to Sû lé jihpán shit kyo ra kó rà nghut lhê. ⁶ Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haû gi, gungdu eq séng luí ga jang, yhangmoq gi, byù đông mai tarâ jéyáng é hui rà eq, woi-nyí eq séng luí ga jang, Garai Gasang đông mai asak wó duí rà matú nghut lhê.

⁷ Lhunglhang htuam rà ahkyíng gi, chyáng bê nghut ri. Haû mù luí, nungmoq kyû wó dung kó sháng gaq, bûn gying luí, yhumsing gùng yhumsing hkanng nyi keq. ⁸ Banshoq htoq má ahkyak é gi, rayuq eq rayuq gyai yhang chyitdap lhâm é hkyô nghut lhê, haî mù gà le, chyitdap myit gi, yubak mara myo myo lé wó nghop pyâm é nghut lhê. ⁹ Rayuq eq rayuq, taí nyung nyâng é hkyô a bo é za, rago hkulum lhum keq. ¹⁰ Yuq hkanng mó gi, yhumsing wó hkam yù bê chyunghuq eq rajung za, góbang lé dojaú rà lhê; Garai Gasang jeju chyunghuq ajung jung lé, lhumzui é eq rago chung jai rà lhê. ¹¹ Rayuq yuq taí é nghut jáng, Garai Gasang é mungdang haû eq yhang rajung za taí ra rà nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô eq dojaú ra rà nghut lhê. Haû hpungwup shingkanng eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Huí É Hkyô

¹² Chyitdap é luzúm wuî ê, wuîhke hkyô đông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê đông, hkâgyuq dàn kó. ¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shingkanng eq rahá Yhang htoq shit é hkûn, nungmoq gi, gabú dik é hui kó rà nghut lhê. ¹⁴ Hkrisduq é mying yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gà le, hpungwup shingkanng bo é Woi-nyí nghu é, Garai Gasang é Woi-nyí gi, nungmoq chyáng nyi nyi ri. ¹⁵ Nungmoq mâ é rayuq yuq jamjau huí é nghut le gi, byù sat sù, hkau sù, gotú agè ashop kut sù, góbang é mù má cháng gunjang sù đông jamjau huí é a dut sháng gaq. ¹⁶ Nghut kôlhang, Hkristan rayuq đông nungmoq jamjau huí é nghut le gi, hkâhoq nyí kó, Garai Gasang lé kúm gi, mying hau é yanmai hkya-ôn nyi keq. ¹⁷ Hkâsu

mù gà le, tarâ jéyáng rà ahkyíng gi, jé bê nghut luí, Garai Gasang é ikun byu pé mai hí rà nghut lhê; haû gi, nga-nhúng mai hí é nghut jáng, Garai Gasang é gabú danglù lé a châng é bang gi, hkâsu wá dut lò rà nghut lhê lhú?

¹⁸ "Haû dingmán sù, hkyi yù hui rà wuî é nghut le gi, tarâ a hkunggâ é eq yubak dap é sù gi, hkâsu wá dut rà nghut lhê lhú?" †

gâ tô ri.

¹⁹ Haû nghut mù luí, Garai Gasang ô nau é đông jamjau huí é bang gi, yhumsing gùng lé, lhumzui é Hpân Su chyáng ap byi mù, ge é lé xoq kut nyi ra rà nghut lhê.

Suwún Wuí Eq Zorâm Wuí

5 Nungmoq mâ é hpúng suwún wuî lé, ngò, nungmoq é byinzùm suwún, Hkrisduq é jamjau hkyô pé é saksé nghut sù eq lhoq htoq shit rà nghut é Yhang é hpungwup shingkanng lé bo hkâm rà nghut sù đông mai sang kat kôlé: ² Nungmoq lé ap to bê nghut é Garai Gasang é sau hpúng † lé zúng rém bang dut mù, shuî u bang đông dojaú nyi keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut rà lhê; ngunzè lé a myoqnoq é za, shirông myit mai dojaú rà lhê. ³ Nungmoq é loq má ap byí to bê bang lé a up zô é za, yhangmoq é hí má alik dut nyi keq. ⁴ Haû jáng, Sau zúng Agyi mó ‡ htoq shit é hkûn, nungmoq gi, hpungwup shingkanng bo é, hkâ-nhám le a shum a byuq é janmaú lé myang hap yù kó rà nghut lhê.

⁵ Zorâm wuî ê, nungmoq le, nungmoq htoq ipyat ko bâng é a-ô má nyi keq. Nungmoq lhunglhang bang gi, myit lhoq nyhum é hkyô lé mebu su wut to mù, rayuq eq rayuq dojaú nyi keq, hkâsu mù gà le,

"Garai Gasang gi, nghutbûn é bang lé hkûm zing pyâm kôlhang, myit lhoq nyhum é bang lé jeju byí ri." †

gâ tô ri. ⁶ Haû mù luí, ahkyíng jé jáng Garai Gasang nungmoq lé waq toq sháng gaq, nungmoq gi, Yhang é hpungwup a-tsam mó bo é loq hkaû má, yhumsing myit lé yhumsing lhoq nyhum nyi keq. ⁷ Nungmoq é myit chiq hkyô banshoq lé, Yhang htoq má dú kê pyâm to keq, haî mù gà le, Yhang gi, nungmoq é matú chiq byí nyi sù nghut lhê.

⁸ Yhumsing gùng lé yhumsing hkânng mù, machya nyi keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanngkyi su hkat gadaú jón wún ri. ⁹ Yhang lé htuq htíng pyám mù, lumjíng myit má gingtíng nyi keq, haî mù gà le, mingkan gón mâ é nungmoq é gumang wuî le, rajung zâ é jamjau hkyô pé hui zô nyi kô é lé, nungmoq sê lhê.

¹⁰ Haû mù, jeju banshoq é Garai Gasang gi, Hkrisduq má ahtum abyuq joq nyi é Yhang é hpungwup

† 4:18 Sângghkyang 11:31 †† Sau hpúng gâ é gi, lumjíng bang lé gâ lhê. ‡ Sau zúng Agyi mó gâ é gi, Hkrisduq lé gâ é nghut lhê.

†† 5:5 Sângghkyang 3:34

shingkâng matú nungmoq lé ji yù bê nghut luî, nungmoq razup zo jamjau huî é htâng má, Yhang yhang nungmoq lé gumjup nhâng mù, wum bô nhâng luî, ging ging tíng tíng dut nhâng râ nghut lhê. ¹¹ Haû hpungwup a-tsam banshoq gi, Yhâng chyáng pyat dedu ahtum abyuq rû joq nyî sháng gaq. Amen.

Ló Htâng É Shi-kyám Dang

¹² Lhumzui é gumang nghû ngò sôn yu é Sila èq garúm luî, ngò gi, nungmoq lé myit wum byi dang eq, myit wum byi dang haú pé gi, Garai Gasâng é teng-

mán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gîng nyî keq.

¹³ Babelon má nyi é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm kat ri.

¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyî sháng gaq ô.

2 Petruq

(2 Peter)

1 Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô đông, ngamoq su, hpaû dik é lumjínq hkyô lé hap yù bê băng chyáng dang kyô kat lhê.

² Garai Gasang eq nga-nhông é Yhumsing Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyí sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô

³ Yhâng é hpungwup shingkang eq ge é hkyô đông nga-nhông lé ji yù Sù lé nga-nhông sê é đông mai, Garai Gasâng é hpungwup a-tsam gi, asak duì hkyô eq tarâ hkungga hkyô é matú nga-nhông râ é jung hkanmó lé byi bê nghut ri. ⁴ Haú pé đông mai, Yhang gi, Yhâng é kô dik, hpaû dik é danggidiq pé nga-nhông lé byi bê nghut ri; haú hkûn, nungmoq gi, haú danggidiq pé đông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjínq hkyô má ge é hkyô lé jat yù keq; ge é hkyô má sumsé hpaqchyí lé, ⁶ sumsé hpaqchyí má yhumsing gùng yhumsing hkanq é hkyô lé, yhumsing gùng yhumsing hkanq é hkyô má jân shirang é hkyô lé, jân shirang é hkyô má tarâ hkunggâ é hkyô lé, ⁷ tarâ hkunggâ é hkyô má gumang chyitkâng myit lé, gumang chyitkâng myit má chyitdap myit lé, jat yù keq. ⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut. ⁹ Nghut kôlhang, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luí, laí lò bê yhâng é yubak mara pé mai lhoq sanséng byí é hui bê hkyô lé, tô-my-hi pyám bê sù nghut ri.

¹⁰ Haú mù luí, ngá é gumang wuì ê, nungmoq lé ji yu é hkyô eq hkyin yu é hkyô lé, je riyhang lhoq gingtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut; ¹¹ hau htoq agó, nga-nhông é Yhumsing eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

Chyúmdang Mã É Myiqhtoi Dang

¹² Haú mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gingtíng nyi kô é nghut kôlhang, ngò, nungmoq lé hkâ-nhám le hau pé lé ru lhoq pún nyi râ nghut lhê. ¹³ Shí gungdu má ngò rû dui nyi nyi gi, nungmoq lé lhoq pún kying byí le ge ri nghû, ngò wó myit ri; ¹⁴ haí mù gâ le, nga-nhông é Yhumsing Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyâm to râ nghut é lé sê lhê.

¹⁵ Ngò htoq ló byuq é htâng má, nungmoq, hkâ-nhám le haú pé lé ru wó bûn nyi râ lé myàng nau mù, ngò, wó dut é í shikut nyi râ nghut lhê.

¹⁶ Nga-nhông é Yhumsing Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lhê. ¹⁷ Hkâsu mù gâ le, haú Kô Làm Hkikhkâm Hkyô é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê." † ga taí é htê, Yhâng chyáng jé é hkûn, haú Îwa Garai Gasâng chyáng mã é aróng eq hpungwup shingkang lé Yhang wó hap yù bê nghut ri. ¹⁸ Ngamoq yhang, chyoiyúng bùm má Yhang eq rahá nyi tô é hkûn, htê haú mauhkûng mai htoq lo é lé wó gyô é nghut lhê.

¹⁹ Haú mù luí, myiqhtoi pê dang lé je lhoq ging bê hkyô, ngamoq wó é nghut lhê; haú mù, maubó lô luí, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haú lé, nungmoq gyo mù rago châng kut râ dut lhê. ²⁰ Banshoq htoq má, Chyúmdang mã é myiqhtoi dang gi, haú myiqhtoi pé mai ó le ó lichyúm lhoq htoq yu é đông a nghut é lé, nungmoq sê to râ dut lhê. ²¹ Hkâsu mù gâ le, myiqhtoi dang gi, byù ô nau é đông hkâ-nhám lé a htoq wú é za, haú Chyoiyúng Woi-nyí eq shuí u huí é bang mai, Garai Gasâng chyáng mã é dang taí é ru nghut lhê.

Sará Apyoq Pê É Hkyô

2 Nghut kôlhang, myiqhtoi pyoq pé gi, Israelaq byù haú băng é ahkaû má nyi wú bê nghut lhê, haú eq rajung za, nungmoq é ahkaû má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é

† 1:17 Mht 17:5; Mrk 9:7; Luk 9:35

htoq agó, yhangmoq lé wui yu é, Yhumsing lé lhang he-ngik pyám kó rá nghut lhê. Haû mù, yhangmoq gi, yhumsing gung yhumsing byòdàn tung htên byoq hkyô jé nhâng bekô rá nghut lhê. ² Byù myo myo gi, haû bang é ahoq ahî hkyô má cháng kó rá eq, teng-mán hkyô lé taí hpoi pyám nhâng kó rá nghut lhê. ³ Sará apyoq haû bang gi, yhangmoq myoqnoq é hkyô má, yhangmoq kut htoq tô é mhô-myi dông nungmoq lé mhaû zo kó rá nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhî tô nyi é a nghut.

⁴ Hkâsu mù gà le, Garai Gasang gi, mara kut shut é maumâng pé lé lhang a ha bûn é za, ngaraî ming má hkyô pyám luî, tarâ jéyáng é hui rá hkûn jé shoq, yhangmoq lé tuq tuq chut é dong hkaû má kat tô é nghut lhê. ⁵ Yhang gi, tarâ a hkunggâ é byu pé lé dowuî tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é nghut ri; ⁶ Yhang gi, Sodom eq Gomoraq myuq lé, myi-mhop dut shoq nyhê hkyô pyám é dông mara dam byi luî, tarâ a hkungga bâng chyáng dut lò rá hkyô é azòng kut tô é nghut ri; ⁷ nghut kôlhang, tarâ a chûng bâng é achâq achyut asak ùi hkyô é yanmai myit wui myit hke huî é, haû dingmán sù Lot lé hkyi htoq yu é nghut ri; ⁸ (hkâsu mù gà le, dingmán sù haû gi, nyí hkangmó yhangmoq ahkaû má nyi nyi é nghut luî, tarâ a chûng é muzó hkyô lé, yhang wó myâng wó gyô é yanmai, yhang é dingmán myit má gunjâng é hui sù nghut ri.) ⁹ Haû su nghut é nghut jáng, Yhumsing gi, tarâ hkung-gâ é byu pé lé, wuîhke hkyô mai hkâsu kut hkyi htoq yû rá eq, a dingmán é bang lé, tarâ jéyáng é buinyi jé shoq, dam byí é hkyô lé xoq kut nyi é u má hkâsu kut zuí zing to rá lé sê lhê. ¹⁰ Haû yubak gungshô é htên byoq sê é yut yut ô naù hkyô châng é eq ahko ahkáng lé wú tiq bâng chyáng, haû hkyô hkyak dut rá nghut lhê.

Byù haû bang gi, ngegáng-htu é eq nghutbûn é bang nghut kôluî, mauhkûng bang lé lumù gansâng rá lé a gyuq kó nghut ri; ¹¹ nghut kôlhang, maumang lagyô pé lhang gi, wum je bo é eq a-tsam je bo é nghut kôle, haû Yhumsing é hí má, haû mauhkûng bang lé mara hun é dông lumù gansâng hkyô a wám kut kó nghut ri. ¹² Nghut kôlhang, haû sará apyoq pé gi, yhumsing a sê gyô é hkyô pé lé rhoi dang taí akô. Yhangmoq gi, haû chyup yu é hui luî, lhoq htên pyám é hui rá matú za hku lé lo é, nhik a bo é tân jung dusak dông nghut akô; dusak haû pé su, yhangmoq le, htên byoq byuq kó rá nghut lhê.

¹³ Yhangmoq gi, nò shoq kut bekô nghut é yanmai, nò shoq kut é hui zo kó rá nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô naù hkyô lhoq dik rá matú nghut ri. Yhangmoq gi, nungmoq eq rahá zoshuq pôi kut kô é hkûn, mhaû é lé yhangmoq é ngón hkyô kut kômu, agè agau é eq achâq achyut é bang nghut akô. ¹⁴ Yhangmoq é myoqjí pé má gi, su-myi sulàng lú hkyô byíng zan to

kômu, mara kut é hkyô lé hkâ-nhám le a hkying kó nghut ri; yhangmoq gi, a gingtîng é bang lé mhoq hpyoq yu akô; yhangmoq gi, myoqnoq é hkyô má kûng é bang nghut kômu, nhîng pyám é hui bang nghut akô. ¹⁵ Yhangmoq gi, haû ding é hkyô lé tô pyám to kômu, Beora é yhangzo nghut é, agè ashop hkyô é ahpau lé chyitdap sù Balam é hkyô má châng yông wún bekô nghut ri. ¹⁶ Nghut kôlhang, Balam gi, yhang kut shut é hkyô é yanmai, logúng eq tân mhoq-qshit é hui ri; dang a dat nyo é logúng haû gi, byu é htê dông dang taí lò mù, myiqhtoi hpó a gyíng é hkyô lé hkûm tang pyám ri.

¹⁷ Byù hau bang gi, wui a bo é wuihtung eq, laidûn eq mut tâng ló é nghansoq eq pûng kômu, yhangmoq é matú gi, tuq tuq chut é mauchot hkaû lé lajang to bê nghut ri. ¹⁸ Hkâsu mù gà le, yhangmoq gi, asôm gyáng dang lé taí mù, yubak gungshô é yut yut ô nau é hkyô dông mai, haû shut shai é hkyô má asak ùi nyi é mai asik za hpang htoq lo é bang lé, mhoq hpyoq yû akô nghut ri. ¹⁹ Yhangmoq gi, haû bang lé luthkyô byi rá gidiq byi kô é nghut kôle, yhangmoq gung gi, htên byoq hkyô lhoq htoq é gungsho yut yut ô naù hkyô é jùn dut nyi akô; haî mù gà le, byù rayuq gi, yhumsing lé hai eq up sing le, hai é jùn nghut lhê. ²⁰ Byu pé gi, nga-nhûng é Yhumsing eq hkyi yû Sù nghut é Yesuq Hkris-duq lé sê é dông mai, mingkân é agè ashop hkyô mai wó hpang lut htoq bê nghut kôle, yhangmoq lé hau eq tuí yup tô é dum hui luî, ung pyám é hui kô é nghut jáng, yhangmoq é matú, hí lhê htoq má je wui byuq kó rá nghut lhê. ²¹ Haû dingmán é hkyô lé yhangmoq sé luî, yhangmoq lé ap byí to bê nghut é chyoiyung hkunmó lé tô pyám to mù lhing taù ló byuq kô é htoq má, haû hkyô lé a sê é gi, yhangmoq é matú je gè kó rá nghut lhê. ²² "Hkui gi, yhang hpat tô é lé dum taù zô lhê." gà é eq, "Waq gi, chí pyám byí é htâng, yhang é galhu htum má dum taù lhú lhê." † gà é sanghkyang gi, yhangmoq chyáng dik bê nghut ri.

Haû Yhumsing Jé Lé Râ Buinyi

3 Chyitdap é luzúm wuî ê, shî gi, nungmoq lé ngò í dá nghu rá dàm ká byí kat é laiká nghut lhê. Laiká shî í lhum má, nungmoq é sansêng é i-myt lé lhoq toq rá matú taí pûn kat é laiká nghut lhê. ² Haû gi, chyoiyung myiqhtoi pé mai lai lò bê hkûn taí tô é dang pé eq, nga-nhûng é Yhumsing eq hkyi yû Sù mai, nungmoq é lagyô pé dông byí to bê nghut é hkunmó lé, ngò, nungmoq lé bun nhâng naù luî nghut lhê.

³ Sâng-hi má, ló htâng é buinyi pé má yhumsing é agè ashop ô naù hkyô má cháng luî taí hpoi bang htoq lô rá nghut é lé, nungmoq sê gyô to rá rá nghut lhê.

⁴ Haû bang gi, "'Dum jé lé rá' ga Yhang gidiq byí é gi, hkâmá lhú? Nga-nhûng é îchíyí iwâ pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga taí kó rá nghut lhê. ⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkûng pé joq é eq, myigúng gi, wui mai dut htoq nhâng mù, wui dông

hpan tô é hkyô lé, a sé gûn kut pyâm akô nghut ri.
⁶ Wuì hau èq sheq, haú hkun lhê é mingkan lé dowuì tíng mù, lhoq htên pyâm é nghut lhê. ⁷ Ahkui lhê é mauhkûng pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyi jé shoq, myi má nyhé râ matú, hkunmó hau èq Yhang hkong to bê nghut ri.

⁸ Nghut kôlhang, chyitdap é luzúm wuì ê, haú Yhumsing é hí má, ra-nyí gi, zanwut rahkyíng dông, zanwut rahkyíng gi, ra-nyí dông nghut é hkyô shî lé, hkâtô-myí hí kó. ⁹ Haú Yhumsing gi, Yhâng é danggidiq lé hân a lhoq dik ga byù ra-am myit ngam pyâm é su, nyhâm é Sû a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhíng râ lé za ô nau mù, nungmoq lé myit hîng byí nyi é nghut lhê.

¹⁰ Nghut kôlhang, haú Yhumsing é buinyi gi, hkau sù su a bún nùng má jé râ nghut lhê. Haú buinyi má, mauhkûng pé gi, mying hum htê eq byuq byuq râ nghut lhê; duqbó-gûng pé gi, myí èq lhoq htên pyâm é hui luí, myigùng eq haú mã é joq mijoq gi, nyé gyó byuq râ nghut lhê.

¹¹ Joq mijoq gi, haú hkyô dông lhoq htên pyâm é hui râ nghut é yanmai, nungmoq gi, hkasû é byu pé dut ra râ lhú? Nungmoq gi, haú Garai Gasâng é buinyi lé ho nyi é eq buinyi haú hân za jé râ lé ô nau nyi é hkûn, chyoiyúng é eq tarâ hkunggâ é asak duì hkyô dông nyi ra râ nghut lhê. Buinyi haú gi, mauhkûng pé lé, myí èq lhoq htên pyám luí, duqbó-gûng pé le, lúm nyé luí, nyé yui pyâm é buinyi dut râ nghut lhê. ¹³ Nghut kôlhang,

nga-nhúng gi, Garaí é danggidiq nghut é, dingmán hkyô é yhûm, mauhkûng asik eq myigùng asik lé, myoqbyu nyi é bang nghut lhê.

¹⁴ Haú nghut mù luí, chyitdap é luzúm wuì ê, nungmoq gi, haú hkyô lé myoqbyu é bang nghut kô é yanmai, Yhang é hí má acháq achyut a dut é eq mara hûn râ hkyô a bo é za, Yhang eq nguingón nyí râ hkyô lé gyai yhang shikut nyi keq. ¹⁵ Nga-nhúng é chyitdap gumang Poluq gi, yhang lé, Garai Gasang byí tô é hpaqchyí byéng-yá èq, nungmoq chyáng ká byi bê eq rajung za, nga-nhúng é Yhumsing é myit hîng hkyô gi, hkyi yù hkyô nghut é lé matsing to keq. ¹⁶ Poluq gi, yhang kâ é laiká pé banshoq má, haú hkyô pé eq séng luí rajung za kâ shit tô ri. Yhang é laiká hkaú pé má, ram gi, sê gyo wuì é hkyô pé bo é yanmai, a mhoq wú é bang eq a gingtíng é bang gi, gotú Chyúmdang pé lé lichyúm htaí lhik pyám kô é su, yhangmoq lichyúm htaí lhik pyám kômù, yhumsing htên byoq hkyô kut yu nyi akô nghut ri.

¹⁷ Haú mù luí, chyitdap é luzúm wuì ê, nungmoq gi, shí hkyô lé sê to gù nghut é yanmai, tarâ a chûng bâng é shut shaí hkyo èq nungmoq lé a wó shuí ng-hoq yù râ eq, nungmoq é gaú é jowò mai a wó byit gyó byuq sháng gaq, yhumsing gùng yhumsing upzúng nyí keq. ¹⁸ Nga-nhúng é Yhumsing eq hkyi yù Sû nghut é Yesuq Hkrisduq é jeju eq hpaqchyí hkyô má, nungmoq kô myhang lò kó sháng gaq. Hpungwup shingkang gi, Yesuq Hkrisduq chyáng, ahkuí le, ahtum abyuq le, ru joq nyí sháng gaq ô! Amen.

1 Yohan

(1 John)

Asak Mungdang

1 Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê. ² Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shit bê nghut ê ahtum abyuq é asak haù lé nungmoq lé taí kyô lhê. ³ Ngamoq eq zùm yap é hkyô lé, nungmoq le wó sháng gaq nghû, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê. ⁴ Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byí kat lhê.

Maubó Hkaù Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê. ⁶ Nga-nhúng gi, Yhang eq zùm yap nyi lhê nghû taí kôlhang, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô đông asak a dui é bang nghut ri. ⁷ Nghut kôlhang, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

⁸ Mara a bò nghû nga-nhúng taí é nghut le gi, yhum-sing gùng yhum-sing mhaù pyám luí, haù tengmán hkyô gi, nga-nhúng chyáng a bò nghut ri. ⁹ Nghut kôlhang, nga-nhúng gi, yhum-sing é mara lé yín yu é nghut jáng, Yhang gi, wó lum é sô eq tengmán é sô nghut é yanmai, nga-nhúng é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sân-yúng byi râ nghut lhê. ¹⁰ Nga-nhúng gi, mara a kut shut nghû taí é nghut jáng, nga-nhúng mai Yhang lé mhaù sô nghû chyo pyám é nghut luí, Yhâng é mungdang gi, nga-nhúng má a bò nghut ri.

Hkrisduq Gi, Nga-nhúng Lé Garúm Sô

2 Ngò chyitdap é zo wuê ê, ngò gi, nungmoq mara a kut shut kó sháng gaq nghû, nungmoq lé shí

hkyô ká byí kat lhê. Nghut kôlhang, rayuq yuq mara kut shut é nghut le gi, nga-nhúng é matú haù Íwa chyáng bo taí xoq byí é, Yesuq Hkrisduq gâ é Dingmán Sô lé, nga-nhúng wó lhê. ² Yhang gi, nga-nhúng é yubak marâ é matú, shíhtaí gunglik hkungga nghut nyi ri. Nga-nhúng é yubak marâ é matú baù za a nghut, mingkan gón mâ é byu pê é yubak marâ é matú le nghut nyi ri.

³ Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri. ⁴ Byù rayuq yuq mai, "Ngò gi, Yhang lé rago sê lhê." ga taí kôlhang, Yhang hkyô tô é hkunmó lé a châng kut é nghut jáng, haù yuq gi, byù mhaù nghut luí, tengmán hkyô gi, yhang má a bò nghut ri. ⁵ Ó yuq nghut kôlhang, Garai Gasang é mungdang lé châng kut nyi é nghut jáng, Yhang lé chyitdap é myit gi, haù yuq má gè gè byíng jup bê nghut ri. ⁶ Yhang má asak dui nyi lhê ga taí é sô ó yuq nghut kôlhang, Yesuq kut bê eq rajung za, châng kut râ lhê. Haù hkùn sheq, nga-nhúng gi, Yhang má nghut nyi bê hkyô lé, wó sê lhê.

Hkunmó Asik

⁷ Chyitdap é luzúm wuê ê, ngò gi, nungmoq lé hkunmó asik ká byí kat é a nghut é za, haù sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut nyi ri. ⁸ Nghut kôlhang, ngò gi, nungmoq lé hkunmó asik ká byí kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haù mauchut gi, laí ló byuq luí, haù tengmán é maubó gi, duq nyi gù bê nghut ri.

⁹ Ngò gi, maubó hkaù má nghut nyi lhê ga luí, yhum-sing é gumang lé a jú é sô ó yuq nghut kôlhang, haù mauchut hkaù má ru nghut nyi ashî. ¹⁰ Yhum-sing é gumang lé chyitdap é sô ó yuq nghut kôlhang, haù maubó má asak dui nyi é nghut mù luí, yhang má myit leqbat nhâng râ hkyô haí le a bò nghut ri. ¹¹ Nghut kôlhang, yhum-sing é gumang lé a jú é sô kúm gi, haù mauchut hkaù má nghut nyi luí, haù má sô lhing jón wún ri; haù mauchut gi, yhang lé myoq lhoq chit to byí é yanmai, yhang gi, hká shut e ló nyi é hkyô lé a sé nghut ri.

¹² Chyitdap é zo wuê ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò kê kat é nghut lhê.

¹³ Íwâ pé ê, nungmoq gi, haû sâng-hi mai nyi é Sû lé sé bekô nghut é yanmai, nungmoq lé ngò kê kat é nghut lhê.

Zorâm wui ê, nungmoq gi, haû agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Chyitdap é zo wui ê, nungmoq gi, haû Íwa lé sé bekô nghut é yanmai, nungmoq lé ngò kê kat é nghut lhê.

¹⁴ Íwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê.

Zorâm wui ê, nungmoq gi, wum-o bo é eq, haû Garai Gasâng é mungdang nungmoq chyáng dui nyi é nghut mù, haû agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Mingkan Lé A Chyitdap Râ Hkyô

¹⁵ Mingkan eq mingkan htoq mâ é haî le lé, hkâchyt-dap kó. Byù rayuq yuq, mingkan lé chyitdap é nghut le gi, haû Íwa lé chyitdap é myit, yhâng chyáng a bò nghut ri. ¹⁶ Hkâsu mù gâ le, mingkan htoq má joq é lhunglháng gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haû gi, Íwâ chyáng mai htoq lo é a nghut, haû mingkan mai htoq lo é ru nghut lhê.

¹⁷ Mingkan eq mingkan ô nau hkyô pé gi, laî ló byuq râ nghut lhê; nghut kôlháng, haû Garai Gasâng ô nau é hkyô lé kut é sù gi, ahtum abyuq dui nyi râ nghut lhê.

Hkrisduq É Gye Pé

¹⁸ Chyitdap é zo wui ê, shî gi, ló htâng é ahkýing nghut bê; haû anti-hkrisduq † gi, lé lo nyi ri gâ é lé, nungmoq wó gyô wú bê eq rajung za, ahkuî lháng, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkýing nghut bê hkyô lé wó sé bê nghut ri. ¹⁹ Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlháng, yhangmoq htoq ló byuq bekô nghut é yanmai, yhangmoq rayuq lháng nga-nhúng eq a sêng é hkyô lé tûn shit bê nghut ri.

²⁰ Nghut kôlháng, nungmoq gi, haû Chyoiyúng Sù mai xú but byí é hui †† bekô nghut mù luî, nungmoq banshoq bang haû tengmán hkyô lé sé akô nghut ri. ²¹ Haû tengmán hkyô lé nungmoq a sé kôluî, nungmoq lé ngò kê kat é a nghut; haû hkyô lé nungmoq sé gù nghut luî le, haû mhaû é hkyô gi, tengmán hkyô mai lo é a nghut é lé nungmoq sé gù nghut luî le, nungmoq lé ngò kê kat é nghut lhê. ²² Mhaû é sù gi, ó yuq nghut lhê lhú? Haû Yesuq gi, Hkrisduq a nghut ga he pyâm é sù nghut ri. Haû Íwa eq Yhangzo lé he-ngik é sù gi, anti-hkrisduq yhang nghut nyi ri. ²³ Haû Yhangzo lé he-ngik sù ó yuq nghut kôle, haû Íwa lé sé sù a nghut.

† Anti-hkrisduq nghú é lichyúm gi, Hkrisduq lé gyè kut é sù lé gâ lhê †† Xú but byí é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

Haû Yhangzo lé hap yu é sù kúm gi, haû Íwa lé le sé bê sù nghut lhê.

²⁴ Haû sâng-hi mai nungmoq wó gyô wú bê é hkyô pé lé, nungmoq i-myit má ru bo nyi keq. Haû nghut jáng, nungmoq gi, haû Yhangzo eq Íwâ chyáng nyi nyi râ nghut lhê. ²⁵ Haû gi, nga-nhúng lé Yhang byí tô é ahtum abyuq é asak wó yú râ gâ é danggidiq nghut ri.

²⁶ Ngò gi, nungmoq lé hkyô shuí nghoq shikut nyi bâng é hkyô eq séng luî, nungmoq lé shí gù kê kat é nghut lhê. ²⁷ Nungmoq chyáng kúm gi, Yhâng chyáng mai xú but jeju lé nungmoq wó yú bekô nghut mù luî, mhoqshit râ góyuq a ra lo nghut ri. Nghut kôlháng, haû Yhâng é xú but jeju gi, hkyô hkangmó má nungmoq lé mhoqshit byi mù, haû gi, tengmán nyi é nghut luî, mhaû é hkyô haî le a bo é za, nungmoq lé mhoqshit byí nyi é eq rajung za, Yhâng chyáng nungmoq nyi nyi keq.

²⁸ Chyitdap é zo wui ê, nga-nhúng gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

²⁹ Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasâng mai hkû kat é sù nghut é hkyô lé, nungmoq sé akô nghut ri.

Garai Gasâng É Yhangzô Pé

3 Nga-nhúng gi, haû Garai Gasâng é yhangzô pé ga wut râ hui bê nghut é yanmai, haû Íwâ é chyitdap myit gi, nga-nhúng ahtuq má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Mingkan gi, Yhang lé a sé é yanmai, nga-nhúng lé le a sé nghut ri. ² Chyitdap é luzúm wui ê, ahkuî, nga-nhúng gi, Garai Gasâng é yhangzô pé nghut nyi to kôlháng, nga-nhúng hkâsu dut râ hkyô lé, a tûn shit shi nghut ri. Nghut kôlháng, Hkrisduq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sé lhê; hkâsu mù gâ le, Yhang hkâsu nghut é hkyô lé roq yhang, nga-nhúng myàng râ nghut lhê. ³ Myit myoqbyù hkyô shî lé, Yhâng chyáng má wó tô é bang ó yuq nghut kôle, Yhang sâng-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu laî é sù nghut ri; gè gè ga jang, mara gi, tarâ lu laî é hkyô nghut nyi ri. ⁵ Nghut kôlháng, Yhang gi, nga-nhúng é yubak mara lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bò nghut ri. ⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wui ê, nungmoq lé ó yuq eq le hkyô a shuí nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri. ⁸ Mara kut nyi é sù gi, nat Tsadán chyáng mâ é nghut nyi ri; hkâsu mù gâ le, Tsadán haû gi, sâng-hi mai yhang mara kut nyi bê nghut ri. Haû Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê.

⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haú yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut. ¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum râ lhê gâ é hkyô haú gi, sâng-hi mai nungmoq wó gyô yù bê danglù nghut ri. ¹² Haú agè ashop sù eq le sêng é, yhanggu lé sat pyâm é Ka-in su a ge kut. Yhang gi, haú mù luí yhanggu lé sat pyâm lhê lhú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. ¹³ Ngá é gumang wuê, nungmoq lé mingkân èq a ngui a jú kut kôlhang, hkâmaú kó. ¹⁴ Nga-nhúng gi, nga-nhúng é gumang wuê lé chyitdap é yanmai, shi byuq é mai wó lut luí asak dui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashî nghut ri.

¹⁵ Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq chyáng nghut kôle, ah-tum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhúng é matú Yhâng é asak byí pyám bê lé wú jáng, chyitdap myit hkasû é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byí pyám gíng ri. ¹⁷ Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haú Garai Gasâng é chyitdap myit gi, yhâng chyáng hkâsu wó bê râ lhú? ¹⁸ Chyitdap é zo wuê, nga-nhúng gi, dang nhut shô mai za a nghut, muzó eq tengmán é đông le chyitdap nyi sháng. ¹⁹ Haú hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myit mai nga-nhúng lé mara hun lò hkangmó, Garai Gasâng é hí má nga-nhúng i-myit wó ngón nyí bê nghut ri. ²⁰ Hkâsu mù gâ le, Garai Gasang gi, nga-nhúng myit é htoq má je kô é sù nghut mù, jung hkangmó lé sê nyi ri.

²¹ Chyitdap é luzúm wuê, nga-nhúng é i-myit mai nga-nhúng lé mara a hun é nghut le gi, Garai Gasâng hí má nga-nhúng gyuq kyûm râ hkyô a joq lo nghut ri. ²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô haí lé le kut é yanmai, nga-nhúng dúng é hkyô lhunglhang lé, Yhâng chyáng mai wó yù râ nghut lhê. ²³ Yhang hkunmó hkyô tô é eq rajung za, Yhâng zo Yesuq Hkrisduq é myíng má lumjíng é eq, rayuq eq rayuq chyitdap lhùm é hkyô gi, Yhang hkyô tô é hkunmó yhang nghut bê. ²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haú băng chyáng dui nyi bê nghut ri. Yhang nga-nhúng chyáng dui nyi

bê hkyô lé, nga-nhúng lé Yhang byí tô é Woi-nyí đông nga-nhúng wó sê yu é nghut lhê.

Woi-nyí Pé Lé Gôn Wú Râ Hkyô

⁴ Chyitdap é luzúm wuê, woi-nyí hkangmó lé hkâlumjíng ko, woi-nyí haú pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri. ² Garai Gasâng é Woi-nyí lé nungmoq wó sê yù râ hkyô gi, shí đông nghut lhê: haú Yesuq Hkrisduq gi, gungsho đông jé lé bê ga, yín yu é woi-nyí hkangmó gi, Garai Gasâng chyáng mâ é nghut lhê. ³ Nghut kôlhang, Yesuq Hkrisduq lé a yín yu é woi-nyí hkangmó gi, Garai Gasâng chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wuê, nungmoq gi, Garai Gasâng chyáng mâ é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sù gi, mingkan má nyi to su htoq je kô ri. ⁵ Yhangmoq gi, mingkan eq sêng é bang nghut lhê mù luí, mingkan hkyam đông taí bum akô; mingkan zo wuê le yhangmoq é dang lé gyo byí akô nghut ri. ⁶ Nga-nhúng gi, Garai Gasang eq sêng é bang nghut lhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí ngoq é woi-nyí lé, nga-nhúng sê gam hkoq yù bê nghut ri.

Garai Gasang Gi, Chyitdap Myit

⁷ Chyitdap é luzúm wuê, nga-nhúng gi, rayuq eq rayuq chyitdap lhùm nyi sháng; hkâsu mù gâ le, chyitdap myit gi, Garai Gasâng chyáng mâ é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luí, Garai Gasang lé sé sù nghut ri. ⁸ Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê. ⁹ Garai Gasang gi, Yhang Zô é yanmai nga-nhúng asak wó duí sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tân shit é hkyô nghut ri. ¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak marâ é matú, shíhtaí gunglik hkungga dut sháng gaq ga, Yhang Zo lé nhang kat byí é nghut ri; haú gi, chyitdap myit yhang nghut bê. ¹¹ Chyitdap é luzúm wuê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhum râ dut lhê. ¹² Garai Gasang lé ó yuq èq le, hkâ-nhám lhang myang wú é a nghut; nghut kôlhang, nga-nhúng rayuq eq rayuq chyitdap lhùm nyi é nghut jáng, Garai Gasang gi, nga-nhúng má nyi nyi bê nghut luí, Yhâng é chyitdap myit gi, nga-nhúng má gumjup râ nghut lhê.

¹³ Garai Gasang gi, nga-nhúng lé, Yhâng é Woi-nyí byí to bê nghut é yanmai, Yhâng chyáng nga-nhúng dui nyí bê hkyô lé le, Yhang nga-nhúng má nyí nyí bê hkyô lé le, nga-nhúng sé bê nghut ri. ¹⁴ Haù Íwa gi, Yhang Zo lé mingkân é hkyi yù Sù dut sháng gaq ga nhang kat é hkyô lé, ngamoq myàng luí, saksé hkâm lhê. ¹⁵ Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyí nyí bê nghut luí, yhang le Garai Gasâng chyáng dui nyí bê nghut ri. ¹⁶ Nga-nhúng gi, Garai Gasâng eq nga-nhúng lé chyitdap é hkyô lé, sé luí lumjínng nyí lhê; Garai Gasang gi, chyitdap myit nghut lhê; chyitdap myit má nyí nyí é sù ó yuq nghut kôle, Garai Gasâng chyáng dui nyí bê nghut luí, Garai Gasang le haù yuq má nyí nyí bê nghut ri. ¹⁷ Haù đông mai, chyitdap myit gi, nga-nhúng chyáng gumjup bê nghut luí, nga-nhúng gi, tarâ jéyáng é buinyí má a gyuq a kyum é myit wó yú râ nghut lhê; hkâsu mù gà le, nga-nhúng gi, mingkan shí má Yhang su dut nyí bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haù gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyí lhê. ²⁰ Byù rayuq yuq gi, "Ngò, Garai Gasang lé chyitdap lhê." ga taí kôlhang, yhâng é gumang lé a jú é nghut jáng, haù yuq gi, byù mhaù rayuq nghut ri; hkâsu mù gà le, yhumsing byu-myang é gumang lé lháng a chyitdap é sù gi, a byu-myang é Garai Gasang lé wó chyitdap râ a nghut. ²¹ Garai Gasang lé chyitdap é sù ó yuq le, yhumsing gumang lé le chyitdap râ lhê gà é dang haù gi, nga-nhúng é matú, Yhang mai hkyô tô é hkunmó nghut lhê.

Garai Gasâng É Yhangzo Lé Lumjínng Hkyô

5 Yesuq gi, haù Hkrisduq nghut ri ga lumjínng é sù ó yuq nghut kôle, Garai Gasâng chyáng mai hku kat bê sù nghut ri; íwa lé chyitdap é sù ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyí mù, Yhang hkyô tô é hkunmó pé lé châng kut nyí é nghut le gi, Garai Gasâng é yhangzô pé lé le, chyitdap nyí é hkyô lé, nga-nhúng wó sê yu é yanmai, ³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wôlai mó a nghut. ⁴ Hkâsu mù gà le, Garai Gasâng chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhúng é lumjínng myit gi, mingkan lé nga-nhúng ung pyâm é ongdang hkyô nghut ri. ⁵ Yesuq gi, Garai Gasâng é Yhangzo nghut é lé lumjínng é sù mai lai luí, mingkan lé wó ung pyâm é sù gi, ó yuq wá nghut lhê lhú?

⁶ Haù yuq gi, wui eq sui † mai lé é sù, Yesuq Hkrisduq yhang nghut nyí ri. Yhang gi, wui mai za lé é a nghut,

† Wui eq sui nghu é gi, Yesuq baptisma hkam yu é hkyô eq shí hkâm é hkyô lé taí nau é nghut ri.

wui mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byí ri. ⁷ Hkâsu mù gà le, Woi-nyí le, wui le, sui le, haù sùm lhùm é saksé hkâm akô nghut ri; ⁸ haù sùm lhum gi, rajung za nghut akô. ⁹ Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi, haù htoq je kô nyí ri. Hkâsu mù gà le, Garai Gasang gi, Yhang Zo eq sêng é hkyô lé saksé byí é yanmai nghut ri. ¹⁰ Garai Gasâng é Yhangzo lé lumjínng é sù gi, saksé haù lé yhâng é i-myt má wó bê nghut ri; Garai Gasang lé a lumjínng é sù kúm gi, Yhang lé byù mhaù rayuq ga chyo pyâm bê nghut ri; hkâsu mù gà le, Garai Gasang mai Yhang Zo eq sêng é hkyô saksé hkâm é lé, yhang a lumjínng é yanmai nghut ri. ¹¹ Nga-nhúng lé, Garai Gasang byí é ahtum abyuq é asak gi, saksé haù nghut nyí ri. Asak haù gi, Yhang Zô chyáng bo ri. ¹² Garai Gasâng é Yhangzo lé wó sù gi, asak haù lé wó bê; Yhang Zo lé a wó sù gi, asak haù lé le a wó nghut ri.

Ahtum Abyuq Asak

¹³ Garai Gasang é Yhangzô é myìng lé lumjínng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghu, shí hkyô pé lé ngò ká byí kat é nghut lhê. ¹⁴ Nga-nhúng haù dúng le le, Garai Gasang ô nau é đông nghut jáng gi, Yhang gyo byi râ nghut lhê; haù gi, Yhâng é hí má nga-nhúng a gyuq a kyum wó wâng râ matú nghut ri. ¹⁵ Haù mù, nga-nhúng haù dung kôlhang, Yhang gyo byí é lé nga-nhúng sê é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhumsing é gumang hpó mai shí a gíng é mara kut shut é lé, myang é nghut le gi, haù yuq é matú kyûdung byi râ lhê. Haù hkûn, Garai Gasang gi, haù yuq lé asak byi râ nghut lhê. Haù gi, shí a gíng é mara wó bâng é matú taí é nghut lhê. Shí gíng é mara le joq lhê; nghut kôlhang, hau é matú dung râ lhê nghu, ngò taí nyí é a nghut. ¹⁷ A dingmán é hkyô lhunglháng gi, mara nghut lhê; nghut kôlhang, shí a gíng é mara le joq lhê.

¹⁸ Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gà le, haù Garai Gasâng é Yhangzo gi, haù yuq lé wú zúng nyí é nghut mù luí, haù agè ashop sù gi, haù yuq lé wó záng htung râ a nghut. ¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haù agè ashop su eq up tô é hkyô lé le, sê lhê. ²⁰ Hau htoq agó, Garai Gasâng é Yhangzo jé lé luí, haù tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyí bê eq rajung za, haù tengmán Sù má le nyí nyí bê nghut lhê. Yhang gi, haù tengmán é Garai Gasang eq ahtum abyuq é asak nghut nyí lhê.

²¹ Chyitdap é zo wui ê, hparà lhó pé lé koi pyâm nyí keq.

2 Yohan

(2 John)

¹ Ngò suwún hpó gi, tengmán hkyô má ngò chyt-dap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haû nga-nhông chyáng lúng to luí, ² nga-nhúng eq ahtum abyuq ru joq nyí rã nghut é tengmán hkyô é yanmai, haû tengmán hkyô lé sê é lhunglhâng bang le, nung-moq lé chyt-dap nyi lhê.

³ Haû Íwa Garai Gasang eq Íwâ é Yhangzo Yesuq Hkrisduq chyáng mã é jeju, shogyo nhikmyin hkyô eq nguínón hkyô gi, haû tengmán hkyô eq chyt-dap hkyô mã, nga-nhúng eq rahá joq nyi sháng gaq.

⁴ Haû Íwa mai nga-nhúng lé hkunmó hkyô tô é eq rajung za, nung zô pé ra-am gi, haû tengmán hkyô mã châng nyi é hkyô lé, ngò wó sê é yanmai, gyai yhang gabú nyi lhê. ⁵ Chyt-dap é hpô-myhí ê, nga-nhúng rayuq eq rayuq chyt-dap lhum sháng nghû, ahkuí, ngò, nang lé dùng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhum a nghut.

⁶ Yhang hkyô tô é hkunmó eq rajung za, nga-nhông cháng kut é nghut jáng gi, chyt-dap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyt-dap myit bo nyi rã matú nghut lhê.

⁷ Hkâsu mù gâ le, Yesuq Hkrisduq gi, gungsho đông jé lé é hkyô lé a yín yu é, mhaú zô é byù myo myo gi, mingkan htoq mã jón wún bekô nghut ri; haû sù é byù gi, haû mhaú zo sù eq anti-hkrisduq dut rã nghut lhê.

⁸ Nungmoq zui saí bê muzó é akyû lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhumsing gùng sidiq nyi keq.

⁹ Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haû mhoqshit é dang lé ru châng nyi é sù kúm gi, haû Íwa lé le, Yhangzo lé le, wó bê sù nghut ri.

¹⁰ Mhoqshit é dang haû lé a wun é byù rayuq yuq, nungmoq chyáng jé lé é nghut le gi, haú yuq lé nung-moq é yhúmhaú mã hkâwâng nhâng kó; yhang lé hkâlhom xoq yù kó. ¹¹ Hkâsu mù gâ le, haú yuq lé lhom xoq yu é sù gi, yhâng é agè ashop é muzó má lòm bê sù nghut ri.

¹² Ngò gi, nungmoq lé ká byí kat rã hkyô myo myo joq kôlhang, laiká hkyap eq kajung-chi lé a kâm chùng naù. Nga-nhông é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum rã lé myit myoqbyu nyi lhê.

¹³ Hkyin yù huí é náng nhâ é yhangzô pé gi, nang lé shi-kyâm kat akô nghut ri.

3 Yohan

(3 John)

1 Ngò suwún hpó gi, haû tengmán hkyô má ngò chytidap é, ngá é chytidap luzúm Ge-u lé dang kyô kat lhê.

² Chytidap é luzúm hpó ê, ngò gi, haû náng é asak woi-nyí nyi-ngón yuqyo nyi é eq rajung za, nàng ngu-ingón wángzán râ eq hkyô hkat hkangmó má, nyi-ngón yuqyo nyi sháng gaq nghû, kyûdung byí kat lhê.

³ Hkâsu mù gâ le, ngò gi, gumang wuì ra-am, ngá chyáng lé jé mù, haû tengmán hkyô má nàng lhumzui é hkyô lé le, haû tengmán hkyô má nàng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai nghut lhê. ⁴ Haû tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotû gabú hkyô a wó lo nghut ri.

⁵ Chytidap é luzúm hpó ê, haû gumang wuì gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri. ⁶ Yhangmoq gi, haû noqkuq hpúng mâ é bang lé, náng é chytidap myit eq séng luí taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm luí, dé kat é nghut jáng, ge é muzó jizó kut é nghut bê. ⁷ Hkâsu mù gâ le, yhangmoq gi, Hkrisduq é myìng hau é matú htoq ló kôluí, a lumjìng bâng chyáng mai haí lháng a hap yù kó nghut ri. ⁸ Haû mù luí, nga-nhúng gi, haû tengmán hkyô é matú rahá za wó chôm zui saí sháng gaq, haû sù é byu pé lé lhom hkûlum yù râ lhê.

⁹ Ngò gi, haû noqkuq hpúng lé laiká ká byí kat bê nghut lhê; nghut kôlhang, haû ushuq kut nau é sù Diotrehpi gi, ngamoq lé a lhom hap yù nghut ri. ¹⁰ Haû mù luí, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyí kyo râ nghut lhê; yhang gi, haû hkyô lé myit a dik shí é nghut mù luí, yhang yhang le gumang wuì lé a lhom hkûlum yù, lhom hkûlum yù naù bang lé le, yhang mai hkûm zing pyám luí, yhangmoq lé haû noqkuq hpúng mai hkat htoq pyâm ri.

¹¹ Chytidap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng mâ é nghut bê; agè ashop é hkyô kut é sù gi, Garai Gasang lé a myàng shí é sù nghut ri.

¹² Demetri ge é hkyô lé, yuq hkangmó mai le, haû tengmán hkyô èq le, saksé hkám byí akô nghut ri; ngamoq le, yhang ge é hkyô lé saksé hkám byí lhê; haû ngamoq hkâm é saksé gi, têng é hkyô nghut é lé, nàng sê lhê.

¹³ Ngò gi, nang lé kê kat ra hkyô myo myo joq kôlhang, kâjung eq kâjung-chi dông a kê kat naù lo.

¹⁴ Ngò gi, a myáng má, nàng eq myang huí lhum râ lé myit myoqbyu tô lhê. Haû hkûn sheq, ngá-nhik myoq-dong hkyûm myang nyo lhum râ nghut lhê.

¹⁵ Nàng nguingón yuqyo nyi sháng gaq; shí mâ é luzúm wuì gi, nang lé shi-kyâm kat akô nghut ri. Nàng le, haû mâ é luzúm wuì lé, myìng du htau luí bo shi-kyâm byi laq.

Yude

(Jude)

1 Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng èq ji yù mù, chytidap é hui luí, Yesuq Hkrisduq èq upzúng é hui bâng chyáng dang kyô kat lhê.

² Shogyo nhikmyin hkyô, nguingón hkyô eq chytidap hkyô gi, nungmoq chyáng agùn agó joq nyi sháng gaq ô!

Garai A Wó Bâng É Yubak Mara

³ Chytidap é luzúm wuî ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjíng hkyo é matú nungmoq htuq htíng rã dut é lé, myit wum byi rã hkyô ká rã dut é lé, ngò byu-myang ri.

⁴ Hkâsu mù gâ le, haù mara dam byí é hui zo rã hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo èq htaí lhik pyám kê é htoq agó, Yhang za nga-nhúng é Yhumsíng nghut sù eq Ahko ahkáng lhunglháng wó sù, Yesuq Hkrisduq lé he-ngik pyám akô nghut ri.

⁵ Nungmoq kúm gi, shí pé banshoq lé sê to gù nghut kôlhang, ngò mai nungmoq lé taí pún nau é hkyô gi, a-ô mã é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq yù kôlhang, a lumjíng é bang lé gi, htâng má dum lhoq htên pyám é nghut lhê. ⁶ Hau htoq agó, haù yhumsing é ayá lé tô pyám luí, yhumsing é nyi jowò lé pyám tô é maumâng pé lé, Yhang gi, haù tarâ jéyáng é hui rã Buinyi mó jé shoq, ahtum abyuq é toqjâng tuí èq tui luí, mauchut hkaù má lhúng tô é nghut lhê. ⁷ Haù eq rajung za, Sodom eq Gomoraq myuq eq hau é awui ayàm mã é wà pé mã é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyi zô lhùm é hkyô kut kê é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri. ⁹ Nghut kôlhang, haù maumang lagyo agyi Mihkaelaq lháng gi, Mosheq é gùng eq séng luí, haù nat zau eq dang rhâng lhùm é hkùn, yhang lé rhoi é dông mara hùn dang a wám taí é za, "Nang lé, haù Yhumsíng nhik-yo sháng gaq!" ga

za taí ri. ¹⁰ Nghut kôlhang, byù haù bang gi, yhangmoq a sê gyô é hkyô pé lé rhoi dang taí pyám akô nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé má lháng, yhumsing gùng lé lhoq htên yu akô nghut ri.

¹¹ Yhangmoq gi, dingnyé wó rã! Hkâsu mù gâ le, yhangmoq gi, Ka-in † kut é agè ashop é hkyô dông cháng kê é yanmai le, akyù wó rã matú, Balam †† shut é dông bo shut kê é yanmai le, Kora † é gumlau toq hkyô kut kômù, yhang su htên byoq byuq é hui kê é yanmai le nghut ri.

¹² Yhangmoq gi, nungmoq é chytidap zoshuq poí má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kê é hkùn, yhumsing gùng lé za yhumsing lhoq gyí yu é sau zúng bang nghut akô; yhangmoq gi, lai èq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shí é, xung nám lhê é siggâm pé su nghut akô. ¹³ Yhangmoq gi, yhumsing é hoq jung lé, tsù-myup su htoq nhang é, haù wuimau mã é kê é wuìlhêng pé eq, tuq tuq chut é mauchut hkaù má tarâ jéyáng hui rã matú, ahtum abyuq tô to huí é, yông wún é kyí pé su nghut akô.

¹⁴ Byù haù bang eq séng luí, Adam mai byùxik nyhit xik má nyi é Eruk, myiqhtoi htoi tô é gi, "Wú keq, haù Yhumsíng gi, Yhâng é chyoiyúng bang mun mun sen sen eq rahá gyó lé lo nyi bê nghut ri. ¹⁵ Yhang gyó lé lo é gi, yuq hkangmó lé tarâ jéyáng rã matú eq, haù tarâ a hkunggâ é lhunglhâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htên pé banshoq lé le, mara byi rã matú nghut lhê." gâ ri. ¹⁶ Byù haù bang gi, put dang taí é bang eq mara hùn dang taí é bang nghut akô; yhangmoq gi, yhumsing ô nau é agè ashop hkyô cháng kê é htoq agó, yhumsing gùng yhumsing nghutbùn é dang taí é eq yhumsing maiwáng zat é dông, góbang lé owaq é bang nghut akô.

Hkam Jân Rã Hkyô

¹⁷ Nghut kôlhang, ngò chytidap é luzúm wuî ê, nungmoq gi, haù nga-nhúng é Yhumsíng Yesuq Hkrisduq é lagyô pé mai te taí tô é dang lé, bùn nyi keq. ¹⁸ Hkâsu mù gâ le, yhangmoq gi, "Haù ló htâng é ahkýing pé

† Ka-in gi, yhanggu lé sat sù nghut lhê. Apùn 4:1-8 †† Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35 † Kora gi, Garaí byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

má, tarâ a hkunggâ é yhumsîng ô nau é hkyô dông châng é, rhoijap-dap dang taî é byu pé nyi to râ nghut lhê." ga, nungmoq lé taî wú kô é nghut lhê. ¹⁹ Byù haú bang gi, nungmoq lé gam hkoq é bang, mingkan hkyô lé baú za châng é bang, haú Woi-nyí a bo é bang nghut akô.

²⁰ Nghut kôlhang, ngò chytđap é luzúm wuí ê, nungmoq gi, haú Chyoiyúng Woi-nyí má kyúđung é dông, nungmoq é chyoiyúng é lumjîng hkyô má, yhumsing gùng yhumsîng lhoq kô yu nyi keq. ²¹ Ahtum abyuq é asak lé wó yú râ matú, haú nga-nhûng é Yhumsîng Yesuq Hkrisduq é shogyo nhikmyin hkyô lé lánq uchyang, nungmoq gi, Garai Gasâng é chytđap myit má, yhumsing gùng yhumsîng nyi nyi keq.

²² Lumjîng hkyô má úng-âng é bang lé, shogyo nhikmyin nyi keq; ²³ góbang lé gi, myi mai she htoq yú mù,

hkyi yù keq; dum, góbang lé gi, sidiq myit èq shogyo nhikmyin hkyô tûn shit mù, haú gungshô é achag achyut dap é yhangmoq é mebu lé chaq nyi keq.

Hkya-on Kungtôn Dang

²⁴ Nungmoq lé, a lingbat shoq wó upzúng luí, nungmoq lé, mara hûn râ hkyô a bo é za, gabú dik é dông mai Yhang é hpungwup shingkang bo é myoq hí má wó shuí shit é, nga-nhûng é hkyi yù Sû, rayuq za nghut é Garai Gasâng chyáng, hpungwup shingkang, hkikhkam hkyô, hpungwup a-tsam eq ahkáng ayá gi, nga-nhûng é Yhumsîng Yesuq Hkrisduq dông mai, laî lò bê ipyat pé má le, ahkuí pyat má le, pyat dedu ahtum abyuq má le, rujoq nyi sháng gaq ô! Amen.

Shing-rán

(Revelation)

Dang-hi Hpóng

1 Yesuq Hkrisduq é shing-rán shî gi, adê myáng má dut lò râ hkyô pé lé, Yhâng é dui-nhâng zoshâng wuì lé tân shit nhâng râ matú, Garai Gasâng èq Yesuq Hkrisduq Yhang lé byí tô é nghut lhê. Yhang gi, Yhâng é maumang lagyo lé nhang kat luí, Yhâng é dui-nhâng zoshâng Yohan lé, shing-rán haû sé nhang ri. ² Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za sak-sé hkâm kyô é nghut ri. ³ Haû ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luí, haû má kê tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mà é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mà é nyhit woi-nyí chyáng mai le, ⁵ lhumzuí é saksé nghut sù, shi byuq é mai sâng-hi dui toq é zomún dut sù, myidàm htoq mà é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyí sháng gaq.

Nga-nhúng lé chytidap luí, Yhâng é suí èq, nga-nhúng lé, nga-nhúng é mara pé mai lhoq lhut byí é eq, ⁶ Yhâng é Garai Gasang eq Îwa lé dojaú râ matú, nga-nhúng lé, mingdán byu pé eq hkyangjông pé † dut nhang é Su chyáng, duqwup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut luí, myoqjí hkgangmó gi, Yhang lé myàng kó râ nghut lhê; haû Yhang lé htaû rot bang †† lháng, myàng kó râ nghut lhê;

haû myidàm htoq mà é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haû dông nghut sháng gaq! Amen.

⁸ "Ngò gi, Alhpa eq Omega ‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o

† Htoq Ló 19:6 †† Htau rot bang gâ é gi, Yesuq tapzîng má jên to huí é hkûn, Yhâng é namcham má lham èq htaû é bang lé gâ lhê. ‡ Alhpa eq Omega gi, Grik laiká myhí mà é sâng-hî cham eq ló htâng cham nghut lhê; haû taí nau é gi, rû dui nyi sù gâ é nghut lhê.

a-tsam dik shoq bò Sù nghut lhê." ga, haû Yhumsîng Garai Gasang taí ri.

Byu Yhangzo Su Dut Su É Hkyô

⁹ Yesuq é, wuîhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Pat-mo zínlóng má nyi nyi é nghut lhê. ¹⁰ Haû Yhumsîng é Buinyi †† má, ngò gi, Woi-nyí èq shuí moq byuq ló é nghut mù, "Nàng myang é eq rajung za, chyúmding ralhum má ká luí, Ehpesu, Samurna, Pergamu, Htuati-ra, Sardi, Hpiladehpi eq Ladoki wà pé má joq é, ¹¹ noqkuq hpúng nyhit lhûm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haû ngo lé nyo nyi é htê yhumsîng lé wú râ matú, ngò, gùng lhing kat é nghut lhê. Ngò gi, gùng lhing kat é hkûn, hîng myi-kok tsungjang nyhit lhum lé le, ¹³ myi-kok tsungjang haú pê é agùng má, byu yhangzo su dut é Sù rayuq nyi tô é lé le, myang kat ri; haú yuq gi, hkyigoq htoq jé é buhîng wut to luí, wànggàng má hîng wànggò le wut tô ri. ¹⁴ Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjí gi, myishâm su duq nyi ri. ¹⁵ Yhâng é hkyí gi, myi bungghkyûng má jên yu é jet é gyi su dut ri; Yhâng é htê gi, wuì myo myo mying hûm é htê su gâ ri. ¹⁶ Yhâng é loqyo loq má gi, kyí nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng bui su tso nyi ri.

¹⁷ Yhang lé myang é hkûn, ngò gi, shî gùng su, Yhâng é hkyí wang má lêng leq tô é nghut lhê. Haú hkûn, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtûm nghut lhê. ¹⁸ Ngò gi, dui nyi Sù le nghut lhê; Ngò gi, shî bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shî hkyô eq momíng é zoqshi pé lé chûng Su nghut lhê.

¹⁹ Haû mù, nàng myang é lé le, ahkui dut é hkyô eq htàngnùng le dut lò râ hkyô lé le, kê to aq. ²⁰ Nàng myang é, Ngá é loqyo loq mà é kyí nyhit cham eq hîng myi-kok tsungjang nyhit lhûm é zaú tô é hkyo é lichyúm gi, isu nghut lhê. Kyí nyhit cham gi, noqkuq hpúng nyhit lhûm é maumang lagyo nyhit yuq nghut

†† Yhumsîng é Buinyi gâ é gi, yuban nyí lé gâ lhê.

ri; myi-kok tsungjang nyhit lhum gi, noqkuq hpúng nyhit lhum nghut ri.

Ehpesu Myuq Mã É Noqkuq Hpúng Lé Kâ Kat É Laiká

2 Ehpesu myuq mã é noqkuq hpúng é maumang lagyo lé isu nghû kâ kat aq:

Haû yhâng é loqyo loq má kyí nyhit cham chûng luí, hîng myi-kok tsungjang nyhit lhûm é gyoro má sô nyi Su é dang gi, ² 'Ngò gi, nàng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haû lagyo a nghut kôhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê. ³ Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, ngú byuq é hkyô a bò nghut ri.

⁴ Nghut kôhang, nàng gi, náng é sâng-hi lhê é chyitdap myit lé tô pyâm é yanmai, ngò, nang lé mara hûn râ hkyô joq ri. ⁵ Nàng hká mai byit gyó é lé, myit bun aq! Myit lhîng luí, sâng-hi nàng kut é muzó pé lé, kut aq. Nàng myit a lhîng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyám byi râ nghut lhê. ⁶ Nghut kôhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhum bo ashî nghut ri.

⁷ Gyo râ nohkyap dap sù gi, haû Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haû Garai Gasâng é hparadisú má joq é asak sikgâm mã é ashi zo râ ahkáng, Ngò byi râ nghut lhê.' gâ ri.

Samurna Myuq Mã É Noqkuq Hpúng Lé Kâ Kat É Laiká

8 Samurna myuq mã é noqkuq hpúng é maumang lagyo lé isu nghû kâ kat aq:

Haû Sâng-hi eq Jihtûm nghut é eq, shi byuq luí, asak dum dui Su é dang gi, ⁹ 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôhang, Yudaq byù nghut lhê gâ é bang taí hpoí é hkyô lé le, Ngò sê lhê. ¹⁰ Nàng hui zo râ nghut é wuîhke hkyô lé, hkâ-gyuq. Ngò, nungmoq lé taí kyo kôlé, haû nat Tsadán gi, nungmoq lé chyam wú é dông, nungmoq chyáng mã é ra-am lé, htóng má hkyô pyám râ nghut lhê; hau htâng, nungmoq gi, raxê nyí tup zing-rí é hui zo kó râ nghut lhê. Shî shoq lhumzui nyi aq, haû hkûn, Ngò, nang lé, asak janmaú byi râ nghut lhê.

¹¹ Gyo râ nohkyap dap sù gi, haû Woi-nyí mai noqkuq hpúng pé lé taí é hkyô lé, gyô yù sháng gaq. Í dâm nghû râ shi é hkyô † gi, wó ung é sù lé, wó záng htung râ a nghut.' gâ ri.

† Í dâm nghû râ shi é hkyô gâ é gi, ngaraí ming wang é lé gâ lhê.

Pergamu Myuq Mã É Noqkuq Hpúng Lé Kâ Kat É Laiká

12 Pergamu myuq mã é noqkuq hpúng é maumang lagyo lé isu nghû kâ kat aq:

Haû shamsó í shut dap é shâm wó Su é dang gi, ¹³ 'Nàng nyi é jowò lé, Ngò sê lhê; haû gi, Tsadán é hkohkâm-tanghkuq joq é jang nghut ri. Nghut kôhang, nàng gi, Ngá myíng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzui é saksé hpó Antipa sat huí é hkûn lháng, nàng Ngo lé lumjîng é hkyô lé, a he-ngik pyám nghut ri.

¹⁴ Nghut kôhang, Ngò, nang lé mara hûn râ hkyô ratsuí joq ashî; hkâsu mù gâ le, hparà lhô pé lé tîng byí é zoshuq zô é eq, ashop é dông gungsho zùm yap é mara kut shut râ matú, Israelaq byu pé lé mhoq hpyoq râ hpaqchyí, Balak lé mhoq byí é Balam é mhoqshit hkyô lé myhik zing é byu pé, náng chyáng nyi ri. ¹⁵ Haû eq rajung za, haû Nikola é chángzô pé mhoqshit é hkyô lé myhik zing é byu pé le, náng chyáng nyi ri.

¹⁶ Haû mù luí, myit lhîng aq! Haû a nghut jáng, Ngò gi, náng chyáng hân jé lé mù, haû Ngá nhut mai htoq é sham eq yhangmoq lé zan râ nghut lhê.

¹⁷ Gyo râ nohkyap dap sù gi, haû Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myíng asik kâ tô é luqgok hpyû racham lé le, Ngò byi râ nghut lhê, lhom hap yu é sù za sheq, myíng haû lé sé râ nghut lhê.' gâ ri.

Htuatira Myuq Mã É Noqkuq Hpúng Lé Kâ Kat É Laiká

18 Htuatira myuq mã é noqkuq hpúng é maumang lagyo lé isu nghû kâ kat aq:

Haû myishâm su duq nyi é myoqjí eq jet é gyi su dut é hkyí dap é Sû, Garai Gasâng é Yhangzô é dang gi, ¹⁹ 'Náng é a-kyang, chyitdap myit, lumjîng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui saí é hkyô lé le, Ngò sê lhê.

²⁰ Nghut kôhang, yhumsing gùng yhumsíng myiqh-toi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wui lé, ashop é dông gungsho zùm yap râ eq hparà lhô pé lé tîng byí é zoshuq zo râ hkyô lé mhoqshit luí, yhangmoq lé hkyô shuí ngoq ri. ²¹ Ngò gi, yhang lé, ashop é dông gungsho zùm yap é hkyô mai myit lhîng râ ahkýing byi kôhang, yhang gi, a myit lhîng naû nghut ri. ²² Haû mù, Ngò gi, yhang lé, jamjau hui râ yhupchong má dú lhez pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhîng kô é za a nghut jáng, wuîhke jamjau mó hui zo nhâng râ nghut lhê. ²³ Ngò gi, yhang zô pé lé sat pyám râ nghut lhê; haû hkûn, Ngò gi, myit nhiklhûm eq myit é hkyô lé sé Sû nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi râ nghut é lé le, haû noqkuq hpúng pé banshoq wó sé kó râ nghut lhê. ²⁴ Mhoqshit hkyô haû lé a châng é eq

Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotû wôlai Ngò jat byi râ a nghut. ²⁵ Ngò jé lé é jé shoq, nungmoq wó tô é lé za myhik zing nyi keq.

²⁶ Wó ung é eq Ngò ô nau é hkyô lé jhtûm jé shoq châng é sù lé gi,

"Yhang gi, yhangmoq lé, shamtoq dumbáng èq up † râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê." ††

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. ²⁸ Ngò gi, yhang lé, haû bó-myhû byi râ nghut lhê. ²⁹ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Sardi Myuq Mã É Noqkuq Hpúng Lé Kâ Kat É Laiká

3 Sardi myuq mã é noqkuq hpûng é maumang lagyo lé isu nghû kâ kat aq:

Haû Garai Gasâng é woi-nyí nyhit woi-nyí eq kyí nyhit cham lé chûng Su é dang gi, 'Ngò gi, náng é a-kyang lé sê lhê; nàng gi, asak dui nyi sù ga kôlhang, shi byuq sù nghut ri. ² Gyíng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâ-su mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri. ³ Haû mù, nàng hkâsu kut wó hap yu é eq wó gyô yu é hkyô lé, myit bun aq; haû dông cháng luí, myit lhîng aq. Nàng a bûn gyíng é nghut le gi, Ngò hkau sù su lé râ nghut luí, nàng gi, Ngò hkâ u lé râ lé, sé râ a nghut.

⁴ Nghut kôlhang, Sardi myuq má, yhumsing é mebu lé agot a-û a kut é byù ra-am nyi akô. Haú bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô. ⁵ Wó ung é sù gi, haú bang su, hpyu é mebu myang wut râ nghut lhê. Ngò gi, haú yuq é myíng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyo pê é hí má le, haú yuq é myíng lé, Ngò yín yû râ nghut lhê. ⁶ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Hpiladehpi Myuq Mã É Noqkuq Hpúng Lé Kâ Kat É Laiká

7 Hpiladehpi myuq mã é noqkuq hpûng é maumang lagyo lé isu nghû kâ kat aq:

Haû chyoyúng é eq tengmán é, Dawiq hkokkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhî é Su é dang gi,

⁸ 'Nàng kut é muzó pé lé, Ngò sê lhê. Wú aq, ó yuq le a wó myhî é hkum ralhum, Ngò náng hí má hpông to byi lhê. Nàng gi, wum-o ratsuí za bò kôlhang, Ngá é dang

gyo luí, Ngá é myíng lé a he-ngik pyâm é hkyô lé, Ngò sê lhê. ⁹ Haû tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gâ é byù mhaû pé lé, Ngò, náng é hkyí wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê. ¹⁰ Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yû râ nghut lhê.

¹¹ Ngò gi, a myáng má jé lé lô râ nghut lhê. Náng é janmaú lé, ó yuq èq le a wó yu pyám byi sháng gaq, nàng wó tô é pé lé myhik zing nyi aq. ¹² Wó ung é sù lé gi, Ngá é Garai Gasâng é noqkuq yhûm mã é hkungz-ling mó dut nhâng râ nghut lhê. Haú yuq gi, hkâ-nhám le haû mai dum htoq lô râ a nghut. Ngò gi, Ngá é Garai Gasâng é myíng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myíng lé le, Ngá é myíng sik lé le, yhâng chyáng kâ tap byi râ nghut lhê. ¹³ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Ladoki Myuq Mã É Noqkuq Hpúng Lé Kâ Kat É Laiká

14 Ladoki wà mó mã é noqkuq hpûng é maumang lagyo lé isu nghû kâ kat aq:

Haû lhumzuí é eq tengmán é saksé nghut é, Garai Gasang hpan tô é lé up é, Amen gá Su é dang gi, ¹⁵ 'Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jâng gú, nye jáng jâng nye dut râ lé, Ngò ô nau ri. ¹⁶ Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê. ¹⁷ "Ngò gi, wó sù nghut lhê; ngò gi, sutzè gyai wó bê nghut luí, haí lháng a ra lo." ga nàng taí ri. Nghut kôlhang, nàng gi, wuîhke jamjau hui sù, asho awui dut sù, myùng sù, myoqjít sù eq achîn dut sù nghut é lé, nàng a sé myhi-nhung. ¹⁸ Haû mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyú lé le, nàng myoq wó myâng sháng gaq, náng é myoqjí má kat râ matú, myoq chi lé le, nàng, Ngá chyáng mai wui yù râ matú, Ngò, nang lé hpaqchyí byi lhê.

¹⁹ Ngò chyitdap é bang lé gi, tan luí, mhoqshit lhê.

Haû mù, nàng gi, hân bûn gyíng luí, myit lhîng aq.

²⁰ Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é htê lé wó gyo luí, hkum hpóng byí é nghut jáng, Ngò gi, wàng mù, haú yuq eq rahá zo shuq râ nghut lhê; haú yuq le, Ngò eq rahá zo shuq râ nghut lhê.

²¹ Ngò gi, ùng luí, Ngá Wa eq rahá Yhâng é hkokhâm-tanghkuq má zung é eq rajung za, wó ung é sù lé gi, Ngò eq rahá Ngá é hkokhâm-tanghkuq má zung râ ahkáng, Ngò byi râ nghut lhê. ²² Gyo râ

† Shamtoq dumbáng èq up gâ é gi, ahko ahkáng banshoq wó luí, up é lé gâ lhê. †† 2:26-27 Hkya-on 2:9

nohkyap dap é sũ gi, haũ Woi-nyí mai noqkuq hpũng pé lé taí é hkyô lé, gyô yù sháng gaq.' gâ é nghut ri." gâ ri.

Mauhkũng Htoq Má Hkohlâm-tanghkuq Joq É Hkyô

4 Hau htâng má, ngò wú kat le, mauhkũng má hkum ralhum bóng tô é lé myang ri. Ngò sâng-hĩ dàm wó gyô é tut htê su gâ é danghtê ngo lé taí é gi, "Shĩ má doq lò aq, htângnùng má dut lò rã hkyô pé lé, Ngò, nang lé tũn shit bã." gâ ri. ² Haũ hkũn jáng yhang, ngò gi, Woi-nyí má moq byuq ló luĩ, mauhkũng htoq má hkohlâm-tanghkuq ralhum joq é lé myàng ri; tanghkuq haũ má, byù rayuq zung tô ri. ³ Haũ má zung to Su é isâm gi, huhpé eq ne yúng lungsêng su dut ri. Huĩ nyuĩ lungsêng su dut é woqgan síng-yang gi, haũ hkohlâm-tanghkuq má hkông lhĩng tô ri. ⁴ Hkohlâm-tanghkuq hau é lhĩnghkyuq má, hkohlâm-tanghkuq gotũ í xe myĩ lhum le joq to luĩ, hpyu é mebu wut mù, ulhum má hĩng janmaũ tsũng tô é suwún í xe myi yuq gi, haũ má zung tô bum akô. ⁵ Haũ hkohlâm-tanghkuq mai, lhap hpyat é, mying hũm é eq maugum gũm é pé dut htoq lo ri. Haũ hkohlâm-tanghkuq hí má, myi-kok nyhit lhum le duq tô ri; haũ pé gi, Garai Gasâng é woi-nyí nyhit woi-nyí nghut ri. ⁶ Hau htoq agó, san zã é myoqjãm su dut mã é wuĩ-nhông le, haũ hkohlâm-tanghkuq hí má dĩng tô ri.

Haũ hkohlâm-tanghkuq agũng mã le, lhĩnghkyuq mã le, hĩ-u nunghtáng lhĩnghkyuq myoqjí dap é dui é dusak myĩ du nyi tô ri. ⁷ Dui é dusak sâng-hĩ du gi, hkanghkyi su dut ri; í du nghũ rã du gi, nohtó su dut ri; sũm du nghũ rã dũ é myoqdong gi, byu myoqdong su dut ri; myĩ du nghũ rã du gi, dãng wún é zunbung su dut ri. ⁸ Dui é dusak myĩ du haũ gi, du hkangmó dùng hkyuq lhum lhum dap é htoq agó, lhĩnghkyuq má myoqjí kôm dap luĩ, dùng hkaũ mã lháng dap ri. Yhangmoq, nyĩ myĩn hkã-nhãm a no loshoq taĩ nyi kô é gi, "A-nham pyat le, ahkuĩ pyat le, htang pyat mã le, rũ nyi nyi é, haũ wum-o a-tsam dik shoq bò Sũ Yhumsĩng Garai Gasang gi,

chyoiyúng, chyoiyúng, chyoiyúng nyi ri." gâ akô. ⁹ Haũ dui é dusak myĩ du gi, hkohlâm-tanghkuq mã zung é, pyat dedu ahtum abyuq dui nyi Su chyáng, hpungwup shingkang, aróng eq jeju bun hkyô byĩ é hkangmó, ¹⁰ haũ suwún í xe myi yuq gi, hkohlâm-tanghkuq mã zung é, pyat dedu ahtum abyuq dui nyi Su é hí má, ngóm gop luĩ, Yhang lé noqkuq akô. Yhangmoq gi, yhangmoq é hkohlâm-janmaũ lé, haũ hkohlâm-tanghkuq hí má hkyut to mù, taĩ kô é gi,

¹¹ "Ngamoq é Yhumsĩng eq Garai Gasang ê, nyi mi-nyĩ, joq mijoq lé, Nãng hpan to bê nghut luĩ, haũ pé gi, Nãng ô nau é dõng hpan tô é hui bê nghut mù, nyi to joq tô bũm bê nghut é yanmai,

Nãng gi, hpungwup shingkang, aróng eq hpungwup a-tsam lé, hap yù gĩng Sũ nghut ri." gâ akô.

Chyúmding Eq Sauzo

5 Hau htâng, ngò gi, hkohlâm-tanghkuq mã zung to Su é loqyo loq mã, í shut é laikã kê to é, dizik nyhit lhum tap tô é chyúmding le myang ri. ² Hau htoq agó, a-tsam mó bo é maumang lagyo rayuq gi, "Haũ dizik pé lé hí pyám rã eq chyúmding lé hpóng rã gi, ó yuq wá gĩngdãn lhê lhú?" ga luĩ, htê mó eq wut taĩ nyi é lé le, ngò myang ri. ³ Nghut kôlhãng, mauhkũng htoq mã le, myigũng htoq mã le, myigũng ô mã le, haũ chyúmding lé wó hpóng rã eq ahkaũ mã wó wũ rã byù rayuq lháng a nyi nghut ri. ⁴ Haũ chyúmding lé hpóng mù, ahkaũ mã wũ rã gĩngdãn é byù rayuq hkãl-háng a nyi é yanmai, ngò gyai yhang ngau pyãm é nghut lhê. ⁵ Haũ hkũn, haũ suwún wuĩ mã é rayuq, ngo lé taí é gi, "Hkã-ngaũ! Wũ aq, haũ Yudaq byuhũ mã é Hkanghkyi nghu é, haũ Dawiq é Amyit nghut Sũ gi, ùng bê nghut luĩ, haũ chyúmding eq haũ mã é dizik nyhit lhum lé wó hpông lhê." gâ ri.

⁶ Hau htâng, haũ dui é dusak myĩ du eq suwún wui é agũng mã é, hkohlâm-tanghkuq agũng mã, sat hui bê su dut é Sauzo radu yap tô é lé, ngò myang ri. Sauzo haũ gi, hkyuĩ nyhit lhum eq myoqjí nyhit lhum dap ri. Myoqjí haũ nyhit lhum gi, myidãm htoq gón mã nhang htoq kat é, Garai Gasâng é woi-nyí nyhit woi-nyí nghut ri. ⁷ Haũ Sauzo gi, lé mù, hkohlâm-tanghkuq mã zung to Su é loqyô mã é chyúmding lé yu ri. ⁸ Haũ chyúmding lé yu é hkũn jáng, haũ dui é dusak myĩ du eq suwún í xe myi yuq gi, Sauzô é hí má ngóm gop akô. Yhangmoq yuq hkangmó gi, tĩng eq sãn-yúng bãng é kyũdung dang gã é namngón jung byĩng mui tô é hĩng góm pé le chung bum akô nghut ri. ⁹ Yhangmoq gi, "Nãng gi, haũ chyúmding lé yù rã eq hau é dizik pé lé hpóng rã gĩngdãn Sũ nghut ri.

Haĩ mù gã le, Nãng gi, sat hui bê nghut luĩ, byuhũ hkangmó mai le, myĩng hkangmó mai le, byù myũ hkangmó mai le, mingdãn hkangmó mai le, Garai Gasâng é matú,

Nãng é suĩ eq byù pé lé wui hpyit yũ bê nghut ri.

¹⁰ Nga-nhũng é Garai Gasang lé dojaũ rã matú, Nãng gi, yhangmoq lé, mingdãn byu pé eq hkyangjõng pé dut nhãng bê nghut luĩ,

yhangmoq gi, myidãm htoq mã up kó rã nghut lhê." ga luĩ, mahkõn sik ralhum hkõn akô nghut ri.

¹¹ Haũ hkũn, ngò wú kat le, haũ hkohlâm-tanghkuq lhĩnghkyuq mã le, dui é dusak pé eq suwún wui é lhĩnghkyuq mã le, nyi tô bum é maumang lagyo ajũm ayò mun mun sen sên é htê lé wó gyô ri. ¹² Yhangmoq gi,

"Haũ sat hui bê Sauzo gi, hpungwup a-tsam, sutzè, hpaqchyĩ byéng-yá, wum-o, aróng sitang, hpungwup shingkang eq hkya-on kungtõn hkyô lé, hap yù gĩng ri."

ga luĩ, htê mó eq ton bum akô nghut ri.

¹³ Hau htoq agó, mauhkũng htoq mã nyi é, myigũng htoq mã nyi é, myigũng ô mã nyi é, wuiming mã nyi é, hpan to huĩ é lhunglháng gi,

"Hkya-on kungtôn hkyô, aróng sitang, hpungwup shing kang eq hpungwup a-tsam gi, haû hkohkâm-tanghkuq má zung tô é Sû eq Sauzô chyáng, pyat dedu ahtum abyuq ru joq nyî sháng gaq ô!" ga luî, ton nyi bùm kô é lé, ngò wó gyô ri. ¹⁴ Haû dui é dusak myî du gi, "Amen" ga taí jang, haû suwún wuî gi, ngóm gop luî noqkuq akô nghut ri.

Dizik Nyhit Lhôm É Hkyô

6 Haû Sauzo gi, dizik nyhit lhum mâ é sâng-hî lhum lé hpông kat é hkûn, ngò myang é nghut lhê. Hau htâng, haû dui é dusak myî du mâ é radu gi, maugum su gâ é htê mó èq, "Lé aq." gâ é lé, ngò wó gyô ri. ² Ngò wú kat é hkûn, ngá é myoq hí má myang hpyû radu nyi tô é lé myang ri! Haû má jî to sù gi, lai rahpu chung tô é htoq agó, yhang lé, janmaú ralhüm tsûng to byî luî, ûng budang wó râ matú ûng sù rayuq dông htoq ló ri.

³ Haû Sauzo gi, í lhum nghû râ dizik lé hpông kat é hkûn, haû í du nghû râ dui é dusak gi, "Lé aq." ga taí é lé, ngò wó gyô ri. ⁴ Hau htâng, myang nè radu htoq lo ri; haû má jî tô é sù gi, myidàm htoq mâ é nguingón simsaq hkyô lé wup yù râ eq, byù yhangchang rayuq eq rayuq sat lhum nhâng râ a-tsam byî é hui sù nghut luî, yhang lé shâm mó rahkyam le byî to bê nghut ri.

⁵ Haû Sauzo gi, sùm lhum nghû râ dizik lé hpông kat é hkûn, haû sùm du nghû râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haû má jî tô é sù gi, yhang é loq má jàng rahpu chung to ri. ⁶ Haû hkûn, "Ra-nyî é zuihpau gi, sungso rabyé, ra-nyî é zuihpau gi, muk-yo guq sum byé nghut lhê; haû tsanlun xù eq tsi-byiq wing lé kúm gi, hkâlhoq hten kó." gâ é htê, haû dui é dusak myî du hkaû mai htoq ló é su gâ é lé, ngò wó gyô ri.

⁷ Haû Sauzo gi, myî lhum nghû râ dizik lé hpông kat é hkûn, haû myî du nghû râ dui é dusak gi, "Lé aq." ga taí é lé, ngò wó gyô ri. ⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haû má jî to su é myiing gi, Shî hkyô gâ ri; Moming le, yhang é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhum-sing hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri. ¹⁰ Yhangmoq gi, "Chyoiyung é eq tengmán é, ahko ahkáng lhunglháng wó é Yhumsing ê, myidàm htoq má nyi é byu pé lé, ngamoq é sui manglat dam a byî é eq tarâ a jéyáng é za, hkâ-myháng jé shoq nyi nyi râ lhú?" ga, htê mó èq garu bum akô. ¹¹ Haû hkûn, yhangmoq yuq hkangmó gi, bu hpyû hîng radung dung hut é hui luî, yhangmoq su sat hui râ bang, yhangmoq é byinzùm dui-nhâng zoshâng wuî nghut é

gumang wuî sat huî ngap é hkûn jé shoq, razup zim za nyi shi keq ga taí é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haû u lé, layàng mó le nún lo ri; haû bui gi, saumaú noq èq woq é pán su noq byuq ri; haû lhamó lhum gón gi, sui su ne byuq ri; ¹³ maihpáng gâm lé, laì mó èq lo mut nhùn kat é hkûn, a myhíng shî é maihpáng-shi yoq gyó é su, mauhkung mâ é kyî pé gi, myidàm htoq má byit gyó lo bum ri. ¹⁴ Haû mauhkung gi, laiká lé dîng lhôm é su htot pyâm é hui luî, bùm hkang bùm mó eq zinlóng lhumjup pé gi, yhang é jowò mai huî pyâm é huî ri.

¹⁵ Haû hkûn, haû myidàm htoq mâ é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang, ¹⁶ haû bùm pé eq luqgok pé lé, "Ngamoq é gùng htoq má gyó ke kó laq! Haû hkohkâm-tanghkuq má zung to Su é myoq hí mai le, haû Sauzô é nhikmo-yô é hkyô mai le, ngamoq lé haq pyám kó laq. ¹⁷ Hkâsu mù gâ le, haû Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lhú?" ga garû taí bum akô nghut ri.

144,000 Yuq Masat Lhôm Tap Hui Kô É Hkyô

7 Hau htâng má, maumang lagyo myi yuq gi, maumyî myi chyûn má yap to mù, myigùng htoq má le, wuî ming htoq má le, siggâm pé má le, laì a hik sháng gaq ga, myi shut mâ é laì lé zuî zing to kô é lé, ngò myang ri. ² Haû hkûn, haû dui nyi é Garai Gasâng é masat lhôm chung é maumang lagyo gotú rayuq gi, buihtoq hkyam mai htoq lé lo é lé, ngò dum myang ri. Yhang gi, haû myigùng eq wuî ming lé lhoq hten râ ahkáng wó tô é maumang lagyo myi yuq haû lé, ³ "Nga-nhông é Garai Gasâng dui-nhâng zoshâng wui é ngelang má, ngamoq mai masat lhôm a tap byi byi gi, haû myigùng, wui ming eq siggâm pé lé hkâlhoq hten shi kó." ga htê mó èq wut taí kat ri. ⁴ Haû hkûn, masat lhôm tap huî é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

⁵ Masat lhôm tap huî yu é,
Yudaq up mâ é bang gi, 12,000 yuq,
Rubin up mâ é bang gi, 12,000 yuq,
Gat up mâ é bang gi, 12,000 yuq,
⁶ Ashe up mâ é bang gi, 12,000 yuq,
Nahtali up mâ é bang gi, 12,000 yuq,
Manase up mâ é bang gi, 12,000 yuq,
⁷ Simeon up mâ é bang gi, 12,000 yuq,
Lewiq up mâ é bang gi, 12,000 yuq,
Yishahka up mâ é bang gi, 12,000 yuq,
⁸ Zebulun up mâ é bang gi, 12,000 yuq,
Yosep up mâ é bang gi, 12,000 yuq,
Ben-yamyin up mâ é bang gi, 12,000 yuq,
nghut bum akô.

Bu Hpyû Hîng Wut Bâng É Hkyô

⁹ Hau htâng, ngò wú kat é hkûn, mingdán hkanmó mai le, byuhú hkanmó mai le, byù myû hkanmó mai le, myíng chângjup mai le, lé é bang, ó yuq lháng a ung nghap é byù moq mó gi, haû hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hîng wut luî, yhangmoq é loq má byùm-haq chung tô bùm kômù,

¹⁰ "Hkyi yù hkyô gi, haû hkohkâm-tanghkuq má zung tô é nga-nhûng é Garai Gasang eq Sauzo chyáng mâ é nghut ri ô!"

ga luî, htê mó èq garû bum akô nghut ri. ¹¹ Haû mau-mang lagyo lhunglhang bang gi, haû hkohkâm-tanghkuq é lîngghkyuq má le, suwún wuî eq dui é dusak myí du é lîngghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹² "Amen! Hkya-on kungton hkyô eq hpungwup shingkang,

hpaqchyî byéng-yá eq jeju bun hkyô, aróng, hpungwup a-tsam eq wum-o gi, nga-nhûng é Garai Gasang chyáng pyat dedu ahtum abyuq ru joq nyí sháng gaq ô!

Amen!"

ga taî bum akô.

¹³ Haû hkûn, suwún wuî mâ é rayuq gi, "Shî bu hpyû hîng wut é bang gi, ô pé lhú? Yhangmoq gi, hkâmai lé é bang nghut akô lhú?" ga ngo lé myí ri.

¹⁴ Ngò gi, "Suwún hpó ê, nàng sê lhê." nghû tû taí jáng, yhang gi, "Shí bang gi, haû wuîhke jamjau mó mai wó lut htoq lô luî, yhangmoq é bu hîng lé, haû Sauzô é sui má chí hpyû yù bê bang nghut akô. ¹⁵ Haû mù, yhangmoq gi, Garai Gasang é hkohkâm-tanghkuq hí má nyi mù, Yhâng é noqkuq yhûm má, nyí, myín Yhang lé dojaú nyí kô é nghut lhê; haû hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi râ † nghut lhê.

¹⁶ Yhangmoq gi, hkâ-nhám le, zòmut wuîshit hui râ a nghut lo; bui lhap é le, hkyíng hkyíng nyé é le, yhangmoq lé wó záng râ a nghut. ¹⁷ Hkâsu mù gâ le, haû hkohkâm-tanghkuq agùng mâ é Sauzo gi, yhangmoq é sau-rém sù dut râ nghut luî, Yhang gi, yhangmoq lé, asak wuîbúm jé shoq shuî ê râ nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga taî ri.

Nyhit Lhum Nghû Râ Dizik Eq Namngón Jung Nyhê É Hîng Góm

8 Haû Sauzo gi, nyhit lhum nghû râ dizik lé hpông kat é hkûn, mauhkûng htoq má hkyíng hkum rawuí kô zîm byuq ri.

² Haû hkûn, Garai Gasang é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

† Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyi mù, yhangmoq lé upzúng nyí râ gâ é nghut lhê.

³ Namngón jung nyhê é hîng góm chung é mau-mang lagyo gotû rayuq gi, haû hkungga gyap yàm má lé yap tô ri. Haû hkohkâm-tanghkuq hí má é hîng hkungga gyap má, sân-yúng bang banshoq é kyûdung dang eq rahá nhông byi râ matú, namngón jung gyai myo shoq, yhang lé byi tô ri. ⁴ Haû namngón jûng é myihkau gi, sân-yúng bâng é kyûdung danghtê eq rahá, maumang lagyo haû yuq é loq mai Garai Gasang chyáng hkyang rot lô bê nghut ri. ⁵ Hau htâng, mau-mang lagyo haû yuq gi, góm lé yù mù, hkungga gyap mâ é myi lhoq pyíng yù luî, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut râ hen akô nghut ri.

⁷ Sân-hí yuq nghû râ maumang lagyo gi, yhâng é tut lé mut kat ri; haû hkûn, sui nyó é likwò eq myi htoq lô mù, haû lé myidàm htoq má lhoq hkyô kat jáng, maumyí sum tú mâ é ratú eq siggâm sum tú mâ é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghû râ maumang lagyo gi, yhâng é tut lé mut kat ri; haû hkûn, myi dap tô é bùm mó su é lé, wuîshuq lung-aû má dú hkyô kat ri. Wuîshuq lung-aû sum tú mâ é ratú gi, sui dut byuq bê nghut ri; ⁹ wuîshuq lung-aû mâ é dui jung sum tú mâ é ratú gi, shi byuq luî, wuî-sanghpo pé sum tú mâ é ratú gi, htên byuq bê nghut ri.

¹⁰ Sum yuq nghû râ maumang lagyo gi, yhâng é tut lé mut kat ri; haû hkûn, myihu dùm su duq é kyí mó racham gi, mauhkûng mai byit gyó lô mù, wuîlàng sum tú mâ é ratú eq wuîbúm pê htoq má lo gyó záng ri. ¹¹ Kyí hau é myíng gi, Kyí Kyí Hko gâ é nghut ri. Wuîlàng sum tú mâ é ratú hkô byuq luî, wuî haû hkô byuq é yanmai byù myo myo shi byuq bekô nghut ri.

¹² Myi yuq nghû râ maumang lagyo gi, yhâng é tut lé mut kat ri; haû hkûn, bui sum tú ratú, lhamó sum tú ratú, kyí sum tú ratú gi, hten luî, haû pê é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³ Ngò wú nyi le, zunbung radu gi, maulat má dang wún mù, "Gotû maumang lagyo sum yuq èq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luî, htê mó èq garû taî ri.

9 Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyí racham lé, ngò myang ri. Haû nik dik htûm é Lasang-dông é zoqshi gi, kyí haû lé byi tô ri. ² Kyí haû gi, nik dik htûm é Lasang-dong lé hpông kat é hkûn, myi bungghkyûng mó mai htoq lo é myihkau dùm sù é myihkau gi, dong haû mai htoq lo ri. Nik dik htûm é Lasang-dong haû mâ é myihkau dum é yanmai, bui eq maulat gi, mauchut byuq bê nghut ri. ³ Myihkau dùm haû mai dinggám pé htoq lô mù, myidàm

htoq má gyó lé akô; myidàm htoq mâ é gogok é a-tsam sũ é a-tsam le, yhangmoq lé byí to bê nghut ri.

⁴ Myidàm htoq mâ é wàhu pé lé le, mhan-haq hpoqnoq pé lé le, siggâm pé lé le a lhoq htên é za, yhum-sing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taí tô ri.

⁵ Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shî-nò jamjau gi, gogok èq pat hkûn no hpû é su yhang nghut ri. ⁶ Haú buinyi pé má, byu pé gi, shî hkyô hô kôlhang, myàng kó râ a nghut; shî nau dik kôlhang, haú shî hkyô gi, yhangmoq chyáng mai hpaq râ nghut lhê.

⁷ Dinggám haú pé gi, majan zan râ matú buí tô é myang pé su dut akô. Yhangmoq é ulhum má gi, hîng janmaú sũ é tsung tô é htoq agó, yhangmoq é myoq-dong gi, byu myoqdong su dut bum akô nghut ri.

⁸ Yhangmoq é xâm gi, myiwe wui é xâm su dut luí, yhangmoq é zui gi, hkanghkyi zui su dut ri. ⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jûm eq myanglhêng pé mying hûm é htê su gâ ri. ¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri.

¹¹ Yhangmoq é hkohkâm gi, nik dik htâm é Lasang-dong mâ é maumang nghut ri; haú é mying gi, Hebre myíng dong Abadon ga, Grik myíng đông Apolion † gâ ri.

¹² Sâng-hî lhum dingnyé gi, laí ló byuq bê nghut ri; nghut kôlhang, dingnyé í lhum jé lô shirâ nghut lhê.

¹³ Haú hkyuq yuq nghû râ maumang lagyo gi, yhang é tut mut kat ri. Haú hkûn, Garai Gasâng é hí má joq é hîng hkungga gyap é hkyuí myí lhum mai htê htoq lo é gi, ¹⁴ "Uhprat wui mó lâng má tuí lhûng tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taí é lé, ngò wó gyô ri.

¹⁵ Haú hkûn, xângzo byù sum tú mâ é ratú lé sat pyám râ matú, ahkyíng, buinyi, lhôhkyap, zanwut lé, rì rì hen to bê nghut é haú maumang myi yuq lé nhang kat bê nghut ri. ¹⁶ Myang ji jî é gyè jum gi, byù du sen í hkyîng bo é hkyô lé, ngò wó gyô ri.

¹⁷ Ngò, shing-rán myang é má, myang jûm eq haú pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyi pé é ulhum su dut luí, yhangmoq é nhut mai, myi, myihkau eq hang pé htoq lo ri. ¹⁸ Haú yhangmoq é nhut mai htoq lo é myi, myihkau eq hang gâ é wúm ihkyup sũm jûng é yanmai, xângzo byù sum tú ratú gi, sat hui bekô nghut ri. ¹⁹ Myang haú jum é sho-myi gi, lhangmui su dut luí, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haú sũm jung mai wó lut luí, myit gyô tô é xângzo byu pé gi, yhangmoq é loq pê èq zui saí é

† Apolion gâ é lichyúm gi, lhoq hten lhoq hpyoq sũ gâ é nghut ri.

muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luqgok, sik pê é alhô lé le, noqkuq é hkyô lé a tô pyám shi kó nghut ri. ²¹ Hau htoq agó, yhangmoq gi, byù sat é mù mai le, myoqheq hpaqchyí mù mai le, ashop é đông gungsho zùm yap é hkyô mai le, hkaú é mai le, myit a lhîng shi kó nghut ri.

Maumang Eq Laiká Ding É Hkyô

10 Hau htâng, ngò gi, wum-o bo é maumang lagyo gotû rayuq, mauhkûng mai gyó lé lo é lé myang é nghut lhê. Yhang lé gi, mhut èq htup yup to luí, yhang é u htoq má woqgan síng-yang gyân tô ri; yhang é myoqdong gi, bui su dut luí, yhang é hkyí gi, myi zîng su dut ri. ² Yhang é loq má gi, hpông tô é laiká ding zo ralhum chung tô ri; yhang é loqyo hkyí gi, wuìshuq lung-aú má nang, yhang é loqpaí hkyí gi, myigùng htoq má nang to luí, ³ hkanghkyi mying é htê su ga, htê mó èq garû kat ri. Yhang garu kat jáng, maugum htê nyhit lhum tũ gũm kat ri. ⁴ Haú maugum htê nyhit lhum tũ gũm kat é hkûn, ngò ká râ da jáng, "Haú maugum htê nyhit lhum tũ gũm é hkyô lé zaú pyám aq; haú pé lé hkâkâ to." ga, mauhkûng mai danghtê htoq lo é lé ngò wó gyô kat ri.

⁵ Haú hkûn, wuìshuq lung-aú eq myigùng htoq má nang yap tô é lé, ngò myang é maumang lagyo haú gi, yhang é loqyo loq lé mauhkûng shut tu toq kat ri.

⁶ Haú mù, yhang gi, mauhkûng eq haú má nyi é lhunglháng lé le, myidàm htoq eq haú má nyi é lhunglháng lé le, wuìshuq lung-aú eq haú má nyi é lhunglháng lé le, hpan tô é, pyat dedu ahtum abyuq dui nyi Su é mying lé lang luí, dakam é gi, "Ahkyíng ratsuí le, lhoq myáng nyí lo râ a nghut! ⁷ Nghut kôlhang, Garai Gasang mai Yhang é dui-nhâng zoshâng wui nghut é myiqhtoí pé lé taí to bê é danglù eq rajung za, Yhang é zaú tô é hkyô gi, nyhit yuq nghû râ maumang lagyo èq yhang é tut lé mut myhîng é buinyi pé má, shit râ nghut lhê." gâ ri.

⁸ Hau htoq agó, ngò wó gyô wú bê mauhkûng mâ é htê, ngo lé dum taí é gi, "Haú wuìshuq lung-aú eq myidàm htoq má nang yap tô é maumang lagyo loq má hpông tô é laiká ding lé, è yù aq." gâ ri.

⁹ Haú mù, ngò gi, ê luí, laiká ding zo haú, ngo lé byi râ matú maumang lagyo haú lé ê dung le, yhang gi, "Shî lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-î su yhang chui râ nghut lhê." gâ ri. ¹⁰ Haú mù, ngò gi, laiká ding zo haú lé, maumang lagyo é loq mai yù mù, zô é nghut lhê; haú hkûn, ngá é nhut má gi, byo-î su yhang chuí nghâm ri; nghut kôle, bàn zô kat é hkûn, ngá é wam hkaú má hkô bê nghut ri. ¹¹ Haú hkûn, "Nàng gi, byù myû myo myo eq séng luí le, mingdán myo myo eq séng luí le, myíng ahú hú eq séng luí le, hkohkam pé myo myo eq séng luí le, myiqhtoí dum htoi ra râ nghut lhê." ga, ngo lé taí kyô ri.

Saksé Í Yuq É Hkyô

11 Ké râ jung dumbáng su dut é jàm-yang rahkat ngo lé byi luí, ngo lé taí é gi, "É mù, haú Garai Gasâng é noqkuq yhùm lé le, hkungga gyap lé le, kê wú luí, haú má noqkuq é bang lé nghap wú aq. ² Nghut kôlhang, shinggan mâ é wàng lé gi, a kê é za lhaí pyâm to aq; hkâsu mù gâ le, haú gi, tûngbaú pé lé byí to bê nghut lhê. Yhangmoq gi, haú chyoiyúng myuq lé, lhamó myixe í hkyap tup chôm nang kó râ nghut lhê. ³ Hau htoq agó, ngò gi, ngá é saksé í yuq lé a-tsam byi râ nghut luí, yhangnhik gi, ji mebu wut [†] mù, buinyi 1260 nyí tup myiqhtoi htoi kó râ nghut lhê." gâ ri. ⁴ Yhangnhik gi, haú myidàm Yhumsing é hí má yuq tô é tsanlun gâm í gâm eq myibung tsungjang í lhum nghut ri. ⁵ Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám râ nghut lhê. Yhangnhik lé kâm zing-ri é sù gi, haú su kut sat pyâm é hui zo râ nghut lhê. ⁶ Yhangnhik gi, yhangnhik myiqhtoi htoi nyi é buinyi pé má mau a wò râ matú, mauhkûng lé myhî pyám râ a-tsam wó akô; hau htoq agó, wui pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyó byi râ a-tsam le, wó akô nghut ri.

⁷ Yhangnhik gi, saksé ban hkâm é hkûn, haú nik dik htùm é Lasang-dong mai htoq lo é tân jung dusak gi, yhangnhik lé htim mù, ûng luí, sat pyám râ nghut lhê. ⁸ Yhangnhik é mâng lé gi, danglhîng dông Sodom eq Egutuq gâ é, yhangnhik é Yhumsing lé le, tapzîng má jén sat pyâm é myuq mó é hkyô gùng má, leq to râ nghut lhê. ⁹ Haú hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám râ matú a gyo kô é za, sum nyí èq rahkyuí tup chôm wú nyí kó râ nghut lhê. ¹⁰ Myidàm htoq má nyi é bang gi, yhangnhik shi byuq é yanmai gabú nguínón luí, rayuq eq rayuq chyunghuq byí lhùm é dông ngón poí kut kó râ nghut lhê. Hkâsu mù gâ le, myiqhtoi haú nhik gi, myidàm htoq má nyi nyi é bang lé, wuîhke jamjau byí lai bê su nhik nghut akô.

¹¹ Nghut kôlhang, sum nyí èq rahkyuí tup laí é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bûm bekô nghut ri. ¹² Haú hkûn, "Shî má doq lò keq." ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq lò bekô nghut ri.

¹³ Haú u lé yhang, layàng mó nún lô luí, myuq hkaú raxê tú mâ é ratú gi, htên gyop byuq bê nghut ri. Hau htoq agó, byù nyhit hkyíng yuq shi byuq bê nghut luí, myit gyó tô é bang gi, gyai yhang gyuq nán bûm kômù, mauhkûng mâ é Garai Gasang lé hkyá-on shi-gyaú bum akô nghut ri.

¹⁴ Í lhum nghû râ dingnyé gi, laí byuq bê nghut ri; sùm lhum nghû râ dingnyé gi, jé râ za nghut bê.

[†] Ji mebu wut gâ é gi, iyon yôn é lé gâ lhê.

Nyhit Lhum Nghû Râ Tut Mut É Hkyô

¹⁵ Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi,

"Mingkan htoq mâ é mingdán gi, nga-nhûng é Yhum-sing eq Yhâng é Hkrisduq é mingdán dut bê nghut luí,

Yhang gi, pyat dedu ahtum abyuq up nyi râ nghut lhê."

gâ ri. ¹⁶ Haú hkûn, yhumsing é hkohkâm-tanghkuq má zûng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang taí kô é gi,

¹⁷ "Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsing Garai Gasang é!

Nàng gi, hpungwup a-tsam mó chûng mù, up nyi bê nghut é yanmai, ngamoq, Nang lé jeju hkyá-on lhê.

¹⁸ Byù myû pé gi, nhikjum yo bùm kôluí, Náng é nhik-mo-yo hkyô gi, jé bê nghut ri.

Shî bê bang lé, tarâ jéyáng râ eq, Náng é dui-nhâng zoshâng myiqhtoi pé lé le,

Náng é sân-yúng bang lé le, Náng é myíng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri." gâ akô.

¹⁹ Haú hkûn, mauhkûng htoq má, Garai Gasâng é noqkuq yhùm hpông to luí, Yhâng é noqkuq yhúmhaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myíng hûm é, maugum gûm é, layàng nún é, likwò mó gyó é pé dut htoq lo ri.

Myiwe Myhí Eq Manjung É Hkyô

12 Hau htoq agó, mauhkûng má limik kumlhá mó htoq shit é gi: myiwe myhí rayuq gi, buí lé wut chûng mù, lhamó má hkyí ke luí, kyí raxe í cham dap é janmaú lé, yhâng é ulhum má tsûng tô ri. ² Yhang gi, zogûng dut tô é nghut luí, zo hkû râ matú, zohkû-nò no nyi é yanmai, gyai yhang ngau garû nyi ri. ³ Hau htâng, mauhkûng má gotû kumlhá dum htoq shit é gi: gyai kô é manjung nè mó ^{††} radu gi, ulhum nyhit lhum eq hkyuí raxê lhum dap luí, yhâng é ulhum hkangmó má janmaú tsûng tô ri. ⁴ Yhâng é sho-myi gi, mauhkûng mâ é kyí sum tú mâ é ratú lé shûm tsing yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má lág yap tô ri. ⁵ Myiwe myhí haú gi, mingdán banshoq lé shamtoq dumb-áng èq up râ nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri. ⁶ Myiwe myhí haú gi, yhâng é matú Garai Gasang la-jâng to byí é yoso hkaú má hpang wang ê bê nghut ri; haú jowò má, yhang gi, 1260 nyí tup lhom baú é hui râ nghut lhê.

^{††} Manjung nè mó gâ é gi, Tsadán lé taí nau é nghut lhê.

⁷ Mauhkûng htoq má majan htoq bê nghut ri. Mihkaelaq eq yhâng é maumang lagyô pé gi, manjung lé majan é zan kôluí, haû manjung eq yhâng é maumâng pé le, tau zân akô. ⁸ Nghut kôlhang, yhang-moq gi, a ûng kômù, mauhkûng mâ é yhangmoq nyi jowò lhoq hpyuq pyám bekô nghut ri. ⁹ Haû mingkan gón lé hkyô shuí ngoq é, natzau eq Tsadán ga é, a-nham lhê é lhangmuì nghut é manjung mó haû gi, yhâng é maumang pé eq rahá myidàm htoq má dú hkyô pyâm é hui bê nghut ri.

¹⁰ Haû hkûn, mauhkûng htoq má htê mó dông taí é lé, ngò wó gyô é gi,

"Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le,

Yhâng é Hkrisduq é ahko ahkáng le, jé bê nghut ri. Hkâsu mù gà le, nga-nhûng é Garai Gasâng é hí má, nga-nhûng é gumang wuì lé,

nyí, myín mara hun nyi é sù gi, dú hkyô pyâm é hui bê nghut ri.

¹¹ Yhangmoq gi, haû Sauzô é suí é yanmai le, yhang-moq saksé hkâm é mungdâng é yanmai le, yhang lé ung pyám bekô nghut luí, shi byuq é jé shoq yhumsing asak lé a ha kó nghut ri.

¹² Haû mù luí, mauhkûng eq haû má nyi é bang ê, gabú nyí keq!

Nghut kôlhang, myidàm htoq eq wuishuq lung-aû gi, dingnyé wó ri;

hkâsu mù gà le, haû natzau gi, yhâng é ahkyíng yàm-yoq tot za ru joq alô nghut é lé sê é yanmai,

nhikmo-yô é èq, nungnhik chyáng gyó lé lô bê nghut ri."

gâ ri.

¹³ Haû manjung gi, myidàm htoq má dú hkyô kat huí é lé myàng luí, haû yuqzo hku é myiwe myhí lé zing-rí ri. ¹⁴ Myiwe myhí haû gi, lhangmuì chyáng mai wó lut luí, yhang é matú lajâng tô é yoso má wó dang jé mù, ahkyíng ralhüm, ahkyíng í lhum, ahkyíng rawuí hkup † lhum baú nyi é hui sháng gaq ga, zùn mó é dùng í lhum byí é huí ri. ¹⁵ Haû hkûn, haû lhangmuì gi, myiwe myhí haû lé wó lhoq myhú pyám shoq ga, myiwe myhí é nunghtáng má, yhâng é nhut mai wuì mó lêng í é wuì lhoq htoq kat ri. ¹⁶ Nghut kôlhang, manjung nhut mai lhoq htoq kat é wuì mó lêng haû lé, myigùng gi, yhâng é nhut há mù myui pyám byí é dông, myiwe myhí haû lé garúm yu ri. ¹⁷ Haû mù, manjung haû gi, myiwe myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri. ¹⁸ Manjung haû gi, wuishuq lung-aû yàm má yap tô ri.

† Ahkyíng ralhüm, ahkyíng í lhum, ahkyíng rawuí hkup gâ é gi, "razàn, í zân, lhamó hkyuq hkyap" lé gâ é nghut lhê; haû gi, 1260 nyi nghut ri.

Tân Jung Dusak Radu Wuishuq Lung-aû Mai Htoq Lo É Hkyô

13 Haû hkûn, haû wuishuq lung-aû mai tân jung dusak radu htoq lo é lé, ngò myàng ri. Dusak haû má, hkyuí raxê lhum eq ulhum nyhit lhum dap to luí, yhâng é hkyuí pé má gi, janmaú raxê lhum tsúng to mù, ulhum hkangmó má gi, Garaí aróng lhoq hpoi é myìng dap tô bum ri. ² Ngò myang é tân jung dusak haû gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haû manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haû lé ap byí ri. ³ Tân jung dusak hau é ulhum ralhüm gi, shí râ í é dàm dap huí é su dut kôlhang, damhkô haû gi, yâ ge pyám bê nghut luí, mingkan gón gi, mauhong byuq kômù, yhâng htâng châng bùm bekô nghut ri. ⁴ Manjung gi, tân jung dusak lé ahko ahkáng ap byí é yanmai, byu pé gi, manjung haû lé noqkuq é htoq agó, tân jung dusak haû lé le, noqkuq kômù, "Ó yuq wá, tân jung dusak shí du su dut ri l hú? Ó yuq wá, yhang lé wó zan ûng râ l hú?" ga bum akô.

⁵ Gyáng dang taí râ eq Garaí aróng lhoq hpoi dang taí râ nhut gi, tân jung dusak haû lé byi to bê nghut é htoq agó, lhamó myí xe í hkyap tup, yhâng é ahko ahkáng lé chûng râ ahkáng wó bê nghut ri. ⁶ Yhang gi, yhâng nhut hpóng mù, Garaí Gasâng aróng lé lhoq hpoi dang taí é htoq agó, Garaí Gasâng é myìng eq nyi jowò lé le, mauhkûng htoq má nyi é bang lé le, lumù gansang é sù nghut ri. ⁷ Haû sân-yúng bang lé majan zân ung yù râ a-tsam, yhang lé byi bê nghut ri. Hau htoq agó, byuhú hkangmó lé le, byù myù hkangmó lé le, myíng hkangmó lé le, mingdán hkangmó lé le, up râ ahkáng, yhang lé byi bê nghut ri. ⁸ Haû sat hui bê Sauzo eq sêng é asak jihpán laiká buk má, mau htoq xâng hkun mai, myìng a kê lhôm é, myidàm htoq má nyi é lhunglhâng bang gi, haû tân jung dusak lé noqkuq kó râ nghut lhê.

⁹ Gyo râ nohkyap dap sù gi, gyô yù sháng gaq.

¹⁰ Shúm zung é hui râ sù gi, shúm zung é hui râ za nghut lhê.

Sham èq sat é hui râ sù gi, sham èq sat é hui râ za nghut lhê. ††

Haû mù, sân-yúng bang gi, hkam jân é hkyô eq lhumzui hkyô bò kó râ nghut lhê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotû radu ‡ myigùng mai htoq lo é lé myang ri. Yhang gi, sauzô é hkyuí su dut é hkyuí í lhum yuq ri; nghut kôlhang, yhang gi, manjung su ga dang nyo ri. ¹² Yhang gi, tân jung dusak hí lhê dù é ahko ahkáng lhunglhâng lé, haû du é hí má chûng mù, shí râ í é damhkô ge byuq é tân jung dusak haû lé, haû mingkan eq mingkan htoq

†† Chyúmding ra-am má gi, Byù rayuq yuq lé, shúm kut é sù gi, shúm zung é hui râ nghut lhê. Sham èq byù sat é sù gi, sham èq sat é hui râ nghut lhê, ga bo tô ri. ‡ Tân jung dusak gotû radu gâ é shí gi, myiqhtoi pyoq lé gá nau é nghut lhê.

má nyi é bang lé noqkuq nhang ri. ¹³ Hau htoq agó, yhang gi, byu pê é myoq hí má, mauhkûng mai myigùng shut myi lé lhang wó lhoq hkyô é, limik kumlhá mó kut shit ri. ¹⁴ Yhang gi, tân jung dusak hí lhê dû é hí má, kumlhá háu pé kut râ ahkáng wó é yanmai, myidàm htoq má nyi é bang lé mhoq hpyoq yû luî, haû shâm damhkô dap kôlhàng, dui nyi é tân jung dusak haû lé, hkunggâ é đông, yhangmoq lé, yhang é alhô saí nhang ri. ¹⁵ Yhang gi, haû tân jung dusak hí lhê dû é alhô lé, soq wó mut kat byí é a-tsam lé wó yû sù nghut ri; haû mù, alhô haû gi, dang wó taí luî, yhang lé a noqkuq é bang lé, sat hui nhang ri. ¹⁶ Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yû nhang ri. ¹⁷ Haú hkûn, haû tân jung dusak é mying, a nghut jáng, yhang mying é masat námbat dap sù mai lai luî, ùng é, wui é hkyô, ó yuq le wó kut râ a nghut.

¹⁸ Hpaqchyí byéng-yá gi, shí má bo râ ri. Hpaqchyí bô sù gi, haû tân jung dusak é námbat lé sôn wú sháng gaq; hkâsu mù gà le, haû gi, byù rayuq é námbat nghut lhê. Yhang é námbat gi, 666 nghut ri.

Sauzo Eq 144,000 Yuq É Hkyô

14 Hau htàng, ngò wú kat le, haû Sauzo gi, Zi-un bùm má yap tô é lé myang ri; Yhang mying eq Yhang Wâ é mying lé, yhumsing é ngelang má kê tap tô é byù 144,000 yuq le, Yhang eq rahá yap tô bùm ri. ² Haú hkûn, ngò gi, wui pé mying hùm é htê eq mau-gum mó gûm é htê su gà é htê, mauhkûng mai htoq lo é lé wó gyô ri. Ngò wó gyô é htê haû gi, tíng bat bang, yhangmoq é tíng lé bat myhîng é htê su gà ri. ³ Yhangmoq gi, haû hkohkâm-tanghkuq é hí má le, dui é dusak myí du eq suwún wui pê hí má le, mahkôn sik lé hkôn akô nghut ri. Haû myidàm htoq mai hkyi yû huí é byù 144,000 yuq mai lai luî, ó yuq le, mahkôn haû lé a wó mhoq sê yû kó nghut ri. ⁴ Haú bang gi, myiwe wui eq gungsho a zum é bang nghut luî, yhangmoq gi, zorâm jet pé nghut bum akô. Yhangmoq gi, haû Sauzo hká shut é le hká shut châng é bang nghut akô. Yhangmoq gi, byu pê chyáng mai wui yu é hui luî, sâng-hi myhîng é ashi lé su, haû Garai Gasang eq Sauzo lé ap byí é hui akô nghut ri. ⁵ Yhangmoq é nhut má, mhaû é hkyô hái le a taí kó; yhangmoq chyáng mara hûn râ hkyô le a bò kó nghut ri.

Maumang Sum Yuq É Hkyô

⁶ Hau htàng, maumang lagyo gotû rayuq gi, maulat má dâng wún é lé ngò myang ri; yhang gi, haû mingkan htoq má nyi é, mingdán hkangmó mâ é bang, byuhú hkangmó mâ é bang, myíng hkangmó mâ é bang, byù myû hkangmó mâ é bang lé, hko kyo râ ahtum abyuq é gabú danglù wó ri. ⁷ Yhang gi, "Garai Gasang, tarâ jéyáng râ ahkyíng jé bê nghut é yanmai, Yhang lé gyuq hkungga luî, Yhang é hpung-wup a-tsam lé shigyaú keq. Haû mauhkûng eq

myigùng, wuìshuq lung-aû eq wuìbúm pé hpan tô é Sû lé, noqkuq keq." ga luî, htê mó èq taí ri.

⁸ Í yuq nghû râ maumang lagyo gi, htàng má châng lé mù, "Haû mingdán pé † lhunglhang lé, yhang kut shut é ashop é đông gungsho zum yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

⁹ Sum yuq nghû râ maumang lagyo gi, yhangnhik é htàng má châng lé mù, "Haû tân jung dusak eq yhang é alhô lé, noqkuq luî, yhumsing é ngelang má nghut nghut, loq má nghut nghut, yhang é masat lhô lé tap yu é sù, ó yuq nghut kôle, ¹⁰ Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haû chyoiyúng maumang lagyo pé hí má le, Sauzô é hí má le, yhang gi, duq nyi é myi eq hang èq zing-rí é hui zo râ nghut lhê. ¹¹ Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haû tân jung dusak eq yhang é alhô lé, noqkuq é bang eq yhang mying é masat lhô tap yû sù é matú gi, nyí, myín, no râ ahkyíng wó râ a nghut." ga luî, htê mó èq taí ri. ¹² Garai Gasâng é jep é tarâ cháng luî, Yesuq lé lhumzuí nyi é bang nghut é, sâng-yúng bang gi, hkam shirang é hkyô bò râ lhê.

¹³ Hau htàng, "Ahkuí mai gi, haû Yhumsing má shí é sù, hkungsô wó nyi ri nghû kê to aq." gà é htê, mauhkûng mai htoq lo é lé, ngò wó gyô ri.

Haú hkûn, haû Woi-nyí gi, "Nghut rô, yhangmoq kut é muzó é akyû gi, yhangmoq htàng cháng râ nghut é yanmai, yhangmoq gi, yhumsing zuí ngú é muzó mai myang hkying bekô râ nghut lhê." ga taí ri.

Myidàm Htoq Mã É Kyôshi Shû É Hkyô

¹⁴ Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq háu má Byu Yhangzo su dut é byù rayuq zung tô ri; Yhang é ulhum má gi, hîng janmaú tsúng to luî, Yhang é loq má gi, htoq é zaiyik ralhum chung tô ri. ¹⁵ Haú hkûn, gotû maumang lagyo gi, noqkuq yhùm mai htoq lô mù, "Haû myidàm htoq mã é kyôshi gi, myhîng zan to bê nghut luî, kyôshu yoq jé bê nghut é yanmai, náng é zaiyik chûng mù, yik shû yû aq." ga, haû mhut htoq má zung tô é Sû lé, htê mó èq taí garú kat ri. ¹⁶ Haû mù, mhut htoq má zung tô é Sû gi, Yhang é zaiyik lé, myigùng htoq má dú hkyô kat luî, myidàm htoq mã é kyôshi lé, ban shû yû bê nghut ri.

¹⁷ Maumang lagyo gotû rayuq gi, mauhkûng htoq mã é noqkuq yhùm mai htoq lo ri; haú yuq le, htoq é zaiyik ralhum chung tô ri. ¹⁸ Haû, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mã é tsibiyiq shi gi, myhîng bê nghut é yanmai, náng é htoq é zaiyik yû mù, tsibiyiq shipaû háu pé lé, yâm tsíng yû aq." ga, htê mó èq taí garú kat ri. ¹⁹ Maumang lagyo haû gi, yhang é zaiyik lé, myidàm htoq mã dú hkyô kat mù, haú mã é tsibiyiq shi pé lé yâm tsíng yû luî, Garai Gasang nhikmo-yô é tsibiyiq wing pyik jang mó má hut

† *Mingdán pé gà é gi, a lumjîng bang lé gà é nghut lhê.*

kat bê nghut ri. ²⁰ Myuq shinggan mâ é tsibiyiq wing pyik jang haú má, tsibiyiq shi haú pé lé nâng nyhoq luî, tsibiyiq wing pyik jang haú mai suí yui htoq lo é gi, myang lunghtúng myháng jé shoq jé lô mù, 180 déng † kô we shoq yui lô bê nghut ri.

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

15 Ngò gi, mauhkûng má gotû limik kumlhá joq é lé, dum byu-myang ri; haú gi, wúm nyhit lhum chung é maumang lagyo nyhit yuq nghut ri; wúm haú pé gi, ló htâng é wúm pé nghut ri; hkâsu mù gà le, Garai Gasang nhikmo-yô é hkyô gi, haú gû mai bàn râ nghut lhê. ² Hau htoq agó, myi eq nyhò tô é myoqjàm wuì-nhông su dut é lé le, ngò myang ri; haú tân jung dusak eq yhâng é alhô lé le, yhâng mying é námbat lé le, wó ung pyám bê bang gi, wuì-nhông yàm haú má yap tô bum akô; yhangmoq gi, Garai Gasang byí é tíng pé lé chung to kôluî, ³ Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsîng Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

⁴ Yhumsîng ê, Nàng lé a gyuq a hkungga râ eq Náng myíng lé a lhoq gyaú râ gi, ó yuq wá nyi râ lhú?

Hkâsu mù gà le, Nàng za chyoiyúng é Sû nghut ri.

Nàng kut é dingmán hkyô gi, tân shit bê nghut é yanmai,

byù myù lhunglhang gi, Náng hí má lé noqkuq kó râ nghut lhê."

gâ akô nghut ri.

⁵ Hau htâng, ngò wú kat le, mauhkûng má, saksé zúm joq é noqkuq yhûm bóng tô é lé, myang ri. ⁶ Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbó é nú nhám mebu wut luî, yhangmoq é wànggàng má hîng hpyihit baíyup tô akô nghut ri.

⁷ Haú hkûn, haú dui é dusak myí du mâ é radu gi, pyat dedu ahtum abyuq dui nyi é Garai Gasâng é nhikmo-yo hkyô byíng tô é hîng góm nyhit lhum, haú mau-mang lagyo nyhit yuq lé byí ri. ⁸ Garai Gasâng é hpungwup shingkan eq hpungwup a-tsâm é yanmai, haú noqkuq yhûm gi, myihkau byíng zan to bê nghut luî, haú maumang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wâng kó nghut ri.

Garai Gasâng É Nhikmo-yo Hkyô Bo É Góm Nyhit Lhum

16 Hau htâng, maumang lagyo nyhit yuq lé, "Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat

keq." ga, noqkuq yhûm mai htê mó èq taí é lé, ngò wó gyô ri.

² Haú hkûn, sânghî yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haú tân jung dusak é masat lhò dap é eq yhâng é alhô lé noqkuq é bâng chyáng, achaq achyt é eq hkê-nho dik é, yapjeq ana dap tô bum bê nghut ri.

³ Í yuq nghû râ maumang lagyo gi, yhâng é góm lé, wuishuq lung-aú má hut hkyô kat ri; haú gi, shí bê byù rayuq é sui su dut byuq é htoq agó, haú má lúng é dui jung lhunglhang gi, shi byuq bê nghut ri.

⁴ Sum yuq nghû râ maumang lagyo gi, yhâng é góm lé, wuilàng pé eq wuibúm pé má hut hkyô kat jáng, haú pé gi, sui dut byuq bê nghut ri. ⁵ Haú hkûn, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rû nyi nyi é Chyoiyúng Sû ê,

Nàng haú su kut jéyáng bê nghut é yanmai, Nàng gi, tengmán Sû nghut ri;

⁶ hkâsu mù gà le, yhangmoq gi, Náng é sân-yúng bang eq myiqhtoí pé é sui lé, lhoq htoq pyám beko nghut luî,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri."

gâ ri. ⁷ Haú hkûn, haú hkungga gyap mai,

"Nghut rô! Wum-o a-tsam dik shoq bò Sû Yhumsîng Garai Gasang ê, Nàng jéyáng é hkyô pé gi, tengmán é eq dingmán é nghut ri."

ga le, taí kat é htê lé, ngò dum wó gyô ri.

⁸ Myi yuq nghû râ maumang lagyo gi, yhâng é góm lé, bui é ahtoq má hut hkyô kat é hkûn, bui gi, byu pé lé myí èq nyhê kyuq râ ahkáng wó bê nghut ri. ⁹ Haú mù, yhangmoq gi, nyé dik é èq nyhê kyuq é hui zo luî, wúm shí pé lé up nyi é Garai Gasâng é myíng lé nhîng akô; haú-í yhang hpuzo kôlhang, yhangmoq gi, myit le a lhîng kó, Garai Gasang lé le a shigyaú kó nghut ri.

¹⁰ Ngo yuq nghû râ maumang lagyo gi, yhâng é góm lé, tân jung dusak é hkohkâm-tanghkuq htoq má hut hkyô kat jáng, yhâng é mingdán gi, mauchut tuq dut byuq bê nghut ri. Mingbyû wuì gi, yhumsing é shô lé lháng, ngat tân bum shoq shî-nò jamjau hui zo kôluî, ¹¹ yhangmoq no hpû é eq jeq é ana dap é yanmai, mauhkûng mâ é Garai Gasang lé nhîng akô; haú-í yhang hpuzo kôlhang, yhangmoq gi, yhangmoq kut é hkyô mai myit a lhîng shi kó nghut ri.

¹² Hkyuq yuq nghû râ maumang lagyo gi, yhâng é góm lé, Uhprat wuì mó lîng má hut hkyô kat jáng, wuilàng haú gi, kân byuq luî, haú buihtoq hkyam mâ é hkohkam pé, lé lô râ hkyô dong bê nghut ri. ¹³ Haú hkûn, po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoí pyoq pé é nhut mai htoq lô kô é bang nghut akô. ¹⁴ Woi-nyí haú pé gi, nat gâng pé é woi-nyí nghut luî, limik kumlhá pé kut shit kômù, haú wum-o a-tsam dik shoq bò Sû Garai Gasâng é buinyi mó má majan

† 180 déng gi, Grik pé é stadia 1600 kô bo ri.

zan rã matú, mingkan gón mã é hkohkam pé lé lhoq tsíng yù rã ga, htoq e ló akò nghut ri.

¹⁵ "Wú keq, Ngò gi, hkau sũ su jé lé é nghut lhê! Su hí mã gungchĩn a so rã eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyĩ luĩ, gyíng gyíng kut nyi é sũ gi, hkungsô wó nyi ri." †

¹⁶ Haũ mù, nat haũ bang gi, hkohkam pé lé, Hebre myíng dông Armagedon gã é jowò mã, rahá ji tsíng tã akò nghut ri.

¹⁷ Nyhit yuq nghũ rã maumang lagyo gi, yhãng é góm lé, maulat mã hut hkyô kat ri; haũ hkũn, haũ no-qkuq yhũm mã é hkohkãm-tanghkuq mai, "Bàn bê!" gã é htê mó htoq lo ri. ¹⁸ Hau htoq agó, lhap hpyat é, myíng hũm é, maugum gũm é eq layàng mó nũn é pé dut htoq lo ri. Myidãm htoq mã, xãngzo byũ lé nyi é hkũn mai, layàng haũ su nũn é eq haũ-ĩ htan é gi, a joq wú shĩ é nghut lhê. ¹⁹ Haũ mù, haũ myuq mó gi, sũm hkyam byak goq byuq luĩ, mingdãn pé mã é myuq pé le, gyop byuq bê nghut ri. Garai Gasang gi, Babelon myuq mó lé le myit bun luĩ, Yhãng é nhikmo-yô é tsiby-iq wing byíng shoq bo é góm lé shuq nhãng bê nghut ri. ²⁰ Zinlóng hkangmó gi, hpang byuq bê nghut luĩ, bũm pé le byuq byuq bê nghut ri. ²¹ Haũ hkũn, myĩ xê joĩ kô laĩ é likwò mó gi, mauhkũng mai byu pé htoq mã wo gyó gyũn ri; likwò wúm gi, gyai yhang wũihke jam-jaũ é wúm nghut é yanmai, byu pé gi, Garai Gasang lé nhĩng bum akò nghut ri.

Shiwa Myhĩ Mó É Hkyô

17 Haũ góm nyhit lhum chung tã é maumang lagyo nyhit yuq mã é rayuq gi, lé lô mù, "Lé aq, haũ wuĩ myo myô pê htoq mã zung tã é shiwa myhĩ mó lé dam byi rã hkyô, ngò, nang lé tũn shit bá.

² Myidãm htoq mã é hkohkam pé gi, yhang eq rahá ashop é dông gungsho zũm yap é hkyô kut shut kôluĩ, myidãm htoq mã nyi é bang gi, yhang kut shut é myi-we yuqgè nyi zô lhũm hkyo é tsibyiq wing lé shuq wut bũm bekò nghut ri." ga luĩ, ngo lé taĩ ri.

³ Haũ mù, maumang lagyo haũ gi, Woi-nyĩ mã, ngo lé yoso shut shuĩ wang e ló ri. Haũ ulhum nyhit lhum eq hkyuĩ raxê lhum dap luĩ, taĩ hpoĩ é myíng kôm dap tã é, zam zam ne é tân jung dusak htoq mã zung tã é myiwe myhĩ rayuq lé, ngò myang ri. ⁴ Myiwe myhĩ haũ gi, me me dut é eq zam zam ne é mebu wut luĩ, hĩng, lungsẽng, palhé pê èq mhôn chung ri; yhãng é loq mã gi, yhãng é myiwe yuqgè nyi zô lhũm hkyo é agot a-ũ hkyô eq achayut é zè pé byíng tã é hĩng góm ralhum chung tã ri.

⁵ *NIK DIK É HKYÔ, MYIDÂM HTOQ MÃ É ACHAQ ACHYUT HKYÔ PÉ EQ SHIWA MYHĨ PÉ É YHÃNGNU, BABELON MYUQ MÓ.*

gã é myíng gi, yhãng é ngelang mã kã tap tã ri. ⁶ Myi-we myhĩ haũ gi, sãn-yũng bãng é sui eq Yesuq é saksé hkãm bãng é sui shuq wut tã é lé, ngò myang ri.

Haũ mù, ngò gi, gyai yhang maũ byuq é nghut lhê.

⁷ Haũ hkũn, maumang lagyo haũ ngo lé taĩ é gi, "Nàng, haĩ mù maũ lhê lhũ? Myiwe myhĩ haũ eq,

† Dang shĩ hkun gi, Yesuq taĩ é dang nghut lhê.

yhang jĩ tã é, ulhum nyhit lhum eq hkyuĩ raxê lhum dap é tân jung dusak é zaũ tã é hkyô lé, ngò, nang lé taĩ kyo rã nghut lhê. ⁸ Nàng myàng é tân jung dusak haũ gi, hí hkũn nyi wú bê, ahkuĩ a nyi lo, nghut kôlhang, nik dik htũm é Lasang-dong mai htoq lô mù, htên byoq é hui rã nghut lhê. Mau htoq xãng hkun mai, asak jihpãn laiká buk mã myíng a kã tã é, myidãm htoq mã nyi é bang gi, tân jung dusak haũ lé myàng kô é hkũn, maũ byuq bũm kó rã nghut lhê. Hkãsu mù gã le, haũ gi, nyi wú bê, ahkuĩ a nyi lo, nghut kôlhang, dum lé rã nghut é yanmai nghut ri.

⁹ Hpaqchyĩ byéng-yá bo é nyan gi, shĩ mã rã ri. Haũ ulhum nyhit lhum gi, myiwe myhĩ zung é bũm nyhit lhum nghut ri; hau htoq agó, hkohkãm nyhit yuq le nghut ri. ¹⁰ Ngo yuq gi, byit gyó byuq bê; rayuq gi, ahkuĩ nyi to ashĩ; myit tã é rayuq gi, a jé lé shi nghut ri; haũ yuq jé lé é hkũn, yhang gi, ahkyíng razup zo za wó nyĩ rã nghut lhê. ¹¹ Hĩ hkũn nyi wú bê, ahkuĩ a nyi lo dut é tân jung dusak haũ gi, shit yuq nghũ rã hkohkãm nghut ri. Yhang gi, haũ nyhit yuq eq sẽng é yanmai, yhãng é htên byoq hkyô shut e ló rã nghut lhê.

¹² Haũ nàng myàng é hkyuĩ raxê lhum gi, mingdãn a myang yũ shĩ é hkohkãm raxê yuq nghut ri; nghut kôlhang, yhangmoq gi, haũ tân jung dusak eq rahá za, hkyíng hkum rahkum kô hkohkãm ayá lé wó yũ kó rã nghut lhê. ¹³ Yhangmoq gi, myit myoqbyũ hkyô ralhum za nghut kômũ, yhangmoq é a-tsam eq ahko ahkáng lé, haũ tân jung dusak lé byi kó rã nghut lhê. ¹⁴ Yhangmoq gi, haũ Sauzo lé majan chôm zan kó rã nghut lhê; nghut kôlhang, Sauzo haũ gi, yhumsing pê é Yhum-sĩng eq hkohkam pê é Hkohkãm nghut é yanmai, yhangmoq lé ung pyám rã nghut lhê. Haũ Sauzo eq rahá nghut é bang gi, ji yũ huĩ é bang, hkyin yũ huĩ é bang eq lhumzuĩ é bang nghut akò." gã ri.

¹⁵ Hau htãng, maumang lagyo haũ ngo lé dum taĩ é gi, "Nàng myang é, shiwa myhĩ zung tã é wuĩ pé gi, byũ myũ pé, byũ ajũm ayò pé, mingdãn pé eq myíng lhumjup nghut ri. ¹⁶ Haũ nàng myang é tân jung dusak eq hkyuĩ raxê lhum gi, shiwa myhĩ haũ lé a jú kut kó rã nghut luĩ, yhãng é sutzè banshoq shang yu pyám byi mù, mebu lháng a dap loshoq achĩndum kut to kó rã nghut lhê; hau htoq agó, yhãng é sho lé zo luĩ, myĩ èq nyhê hkyô pyám kó rã nghut lhê. ¹⁷ Hkãsu mù gã le, Garai Gasang gi, haũ bang mai, i-myt rahkat zã èq, yhumsing é a-tsam, haũ tân jung dusak lé byi rã myit, yhangmoq lé kat byi Sũ nghut ri. Haũ mù, yhangmoq gi, Garai Gasãng é mungdang lhoq dik é hkũn jé shoq, haũ su kut kó rã nghut lhê. ¹⁸ Nàng myang é myiwe myhĩ haũ gi, myidãm htoq mã é hkohkam pé lé up zô é myuq mó nghut ri." gã ri.

Babelon Lêng Gyop É Hkyô

18 Hau htãng, maumang lagyo gotũ rayuq mauhkũng mai gyó lo é lé, ngò myang ri. Yhang gi, ahko ahkáng mó wó é nghut luĩ, haũ myidãm htoq lé, yhãng é hpungwup èq duqbó to byĩ ri. ² Yhang, htê mó o mó èq garũ taĩ kat é gi,

"Babelon myuq mó gi, lêng gyop bê, lêng gyop bê!
Myuq haû gi, nat gânğ pê é yhâm eq agè ashop é nat
hkanğmó é hkyûng dut byuq é htoq agó,
a sansêng é eq achag achyut é nghoq pé nyi é sùt dut
byuq bê nghut ri.

³ Hkâsu mù gâ le, haû byù myû lhunğháng gi, yhang
kut shut é ashop é dônğ gunğsho zùm yap é hkyo é
nhik lhoq yô é tsibiyiq wing shuq wut bùm bekô nghut
ri.

Haû myidàm htoq mâ é hkohkam pé gi, yhang eq myi
shut lànğ shut hkyô kut bekô nghut é htoq agó,
myidàm htoq mâ é hpugá wuiloq gá bang gi, yhâng é
ladu lai shoq nğón kùn é hkyo é yanmai, sutzè wó bôm
bekô nghut ri."

gâ ri.

⁴ Hau htânğ, mauhkûng mai htoq lo é htê gotû lé
ngò dum wó gyô é gi,

"Ngá é byu pé ê, myuq hau é mara pé má nungmoq a
bo lom râ matú le,

yhâng é wúm pé lé nungmoq a hui zo kó râ matú le,
haû mai hân hpang htoq lò keq;

⁵ Hkâsu mù gâ le, yhâng é mara gi, mauhkûng htung
shoq bum zang to bê nghut luî,

Garai Gasang gi, Yhâng é a dínğmán é hkyô lé myit
bun bê nghut ri.

⁶ Yhang kut byî é eq rajung za, yhang lé tau kut byi
keq; Yhang kut bê muzó eq rajung za, yhang lé í tú taû
kut keq.

Yhang nyhó byî é góm má, í tú taû nyhó byi keq.

⁷ Yhang gi, yhumsing gùnğ lé yhumsing lhoq gyaú yû
luî, ladu lai shoq nğón kùn nhang é í,

wuîhke jamjau hkyô eq iyon hkyô myo myo, yhang
lé taû byi keq.

Hkâsu mù gâ le, yhang gi, yhâng é myit má,
'Ngò gi, hkohkâm myhí nghut lhê; ngò gi, chuimó a
nghut;

hkâ-nhám le iyon hui râ a nghut.' ga gumrong nyi ri.

⁸ Haû mù luî, yhâng é wúm nğhu é shî hkyô, iyon
hkyô eq mutmó gyó hkyô gi,

ra-nyí bui má za, yhâng chyáng jé râ nghut lhê.

Hau htoq agó, yhang gi, myî èq nyhê hkyô pyâm é lé
hui râ nghut lhê;

hkâsu mù gâ le, yhang lé jéyáng é, haû Yhumsing
Garai Gasang gi, wum-o a-tsam bò Sû nghut ri.

⁹ Haû yhang eq rahá myiwe yuqgè nyi zô lhum hkyô
kut shut é eq yhâng é ladu lai shoq nğón kùn hkyô má
bo lom é, haû myidàm htoq mâ é hkohkam pé gi,
yhang lé nyhê hkyô é myihkau lé myàng kôjáng,
ngaubyi ngau-nhap eq iyon yôn é huî bùm kó râ nghut
lhê. ¹⁰ Yhangmoq gi, yhang no jamjaû nyi é lé wú gyuq
kôluî, we we má yap to kômù,

'Hkik é myuq mó, a-tsam bo é Babelon gi, dínğnyé wó
ri-nhung!

Dínğnyé wó ri-nhung! Hkyíng hkum ralhum má za,
dam byî é hkyô gi, nánğ chyáng jé bu-nhung!
ga luî, taî garu kó râ nghut lhê.

¹¹ Myidàm htoq mâ é hpugá byu pé gi, yhang é yan-
mai, ngaubyi ngau-nhap é eq iyon yôn é hui kó râ

nghut lhê; hkâsu mù gâ le, yhangmoq é gai zè lé, ó
yuq le a wuî byi lo kô é yanmai nghut ri. ¹² Gai zè haû
pé gi, hîng, nğùn, lungsêng eq palhé, nú-nhâm é pán,
me me dut é pán, lai hkyíng eq zam zam ne é pán;
namnğón jung sik ajung jung, maguí zû lé saî é, gùloq
hpaû jung sik lé saî é, gyi lé saî é, shamtoq lé saî é, luq
hpyû lé saî é jung ajà jà nghut ri. ¹³ Hau htoq agó,
changhpyik gâm, xunmân, namnğón jung, mura,
loban, tsibiyiq wing, tsanlun xû, mún eq sunğsô, no-
jûng eq sau, myang eq myanğlhêng pé; byù é gunğdu
eq esak pé nghut ri.

¹⁴ Yhangmoq gi, 'Nànğ myit ô nau nyi é hkyô pé gi,
nánğ chyáng mai gânğ ló byuq bê nghut ri. Nànğ wó é
sùt é hkyô eq hkikhkam é hkyô pé banshoq gi, byuq
byuq bê nghut luî, hkâ-nhám le dum wó taû yû râ a
nghut.' ga taî kó râ nghut lhê. ¹⁵ Gai zè haû pé lé ung
luî, yhâng chyáng mai sutzè wó yu é byù pé gi, yhang
hpuzô é jamjau hkyô lé wú gyuq kô é yanmai, we we
má yap to kômù, ngaubyi ngau-nhap eq iyon yon
uchyang,

¹⁶ 'Nú-nhâm é pán, me me dut é pán eq zam zam ne é
mebu wut luî, hîng, lungsêng eq palhé pé lé

mhôn tô é myuq mó gi, dínğnyé wó ri-nhung!
Dínğnyé wó ri-nhung!

¹⁷ Hkyíng hkum rahkum má za, haû-í yhang wó é
sutzè pé htên byoq byuq bu-nhung!
ga taî kó râ nghut lhê.

Wuî-sanghpo agyi yuq hkanğmó eq wuî-sanghpo
mai jón wún é bang banshoq, wuî-sanghpo hkânğ
bang eq wuîshuq lung-aû mai wam baú hkyô wó yu é
bang banshoq gi, we we má yap to kômù, ¹⁸ myuq haû
nyé gyó nyi é myihkau lé myàng kôjáng, 'Myuq mó shî
eq pûng é myuq gi, hkâmá joq shirâ lhú?' ga taî garu
kó râ nghut lhê. ¹⁹ Yhangmoq gi, yhumsing é ulhum
má hpuilhup kyaq gyun mù, ngaubyi ngau-nhap eq iy-
on yon uchyang,

'Myuq mó gi, dínğnyé wó ri-nhung! Dínğnyé wó ri-
nhung!

Wuîshuq lung-aû má wuî-sanghpo pé wó é bang gi,
yhâng é sutzè pé é yanmai, sutzè wó bum akô.

Nghut kôlháng, hkyíng hkum rahkum má za, htên by-
oq hkyô gi, yhâng chyáng jé bu-nhung!

²⁰ Mauhkûng ê, yhang é yanmai hkye gabú aq! Sân-
yúnğ bang, lagyo pé eq myiqhtoî pé ê, hkye gabú keq!

Hkâsu mù gâ le, yhang, nungmoq lé kut é eq rajung
za, Garai Gasang gi, yhang lé jéyáng bê nghut ri.'
ga taî kó râ nghut lhê." gâ ri.

²¹ Hau htânğ, wum-o a-tsam mó bo é maumang
lagyo rayuq gi, luqluí long mó sù é luqgok racham waq
toq yû mù, wuîshuq lung-aû má dú hkyô kat luî, taî é
gi,

"Haû Babelon myuq mó gi, haû su kut wum kat dú
hkyô pyâm é hui râ nghut luî,

hkâ-nhám le dum myàng râ a nghut lo.

²² Haû tíng bat é bang, dat gó dat ye é bang, sampyí
mut é bang eq tut mut é bânğ é htê lé,

nánğ chyáng hkâ-nhám le dum wó gyo lo râ a
nghut.

Loq hpaqchyí ajung jung kúng é byù lé, náng chyáng hkâ-nhám le dum myàng lo râ a nghut.

Luqluí luí é htê lé, náng chyáng hkâ-nhám le dum wó gyo lo râ a nghut.

²³ Haû myibung duq é myishâm lé, náng chyáng hkâ-nhám le dum wó duq lo râ a nghut.

Myisik lusik é htê lé, náng chyáng hkâ-nhám le dum wó gyo lo râ a nghut.

Náng é hpugá byû pé gi, mingkân é byù mó pé nghut ri.

Náng é myoqheq hpaqchyí èq mingdán banshoq mâ é bang lé, hkyô shuí ngoq bê nghut ri.

²⁴ Haû myiqhtoí pê é sui, sân-yúng bâng é sui eq myidàm htoq má sat hui bang banshoq é sui pé gi, yhang chyáng chyat byu-myàng bê nghut ri." gâ ri.

Haleluya!

19 Hau htâng, mauhkûng htoq má, byù ajùm ayò garû é htê mó su gâ é lé, ngò wó gyô é gi, "Haleluya! †

Hkyi yù hkyô eq hpungwup shingkang, a-tsam gi, nga-nhûng é Garai Gasang eq sêng é nghut lhê.

² Hkâsu mù gâ le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mâ é bang lé, haû yhang é ashop é dông gungsho zùm yap é hkyo èq mara kut shut nhang é shiwa myhí mó lé, mara byi luí,

Yhang é dui-nhâng zoshâng wuì é sui yuichyîn dam byi bu-nhung ô!" gâ ri.

³ Dum radàm, yhangmoq taí garu kô é gi,

"Haleluya!

Myuq hau é myihkau gi, pyat dedu ahtum abyuq ru ìng doq nyi sháng gaq ô!" gâ bum akô nghut ri.

⁴ Haû suwún í xe myi yuq eq dui é dusak myí du gi, haû hkohkâm-tanghkuq má zung tô é Garai Gasang lé paí gop luí, noqkuq uchyang,

"Amen, Haleluya!"

ga, taí garû bum akô.

⁵ Haû hkûn,

"Garai Gasâng é dui-nhâng zoshâng wuì nghut é, yhang lé gyuq hkunggâ é tiq ko banshoq bang ê!

Nga-nhûng é Garai Gasang lé, hkya-on kungtôn keq ô."

gâ é htê, haû hkohkâm-tanghkuq mai htoq lo ri.

⁶ Hau htâng, byù ajùm ayo é htê su ga, wuì myo myo mying hûm é htê su ga, maugum mó é htê su ga, taí garû é htê lé ngò wó gyô é gi,

"Haleluya!

Hkâsu mù gâ le, wum-o a-tsam dik shoq bò Sû nga-nhûng é Yhumsîng Garai Gasang gi, up nyi ri.

⁷ Nga-nhûng gi, ngón gabú luí, Yhang é hpungwup shingkang lé lhoq gyaú sháng ô!

Hkâsu mù gâ le, haû Sauzo myiháng poí gi, jé bê nghut luí, Yhang é myisik gi, rì rì mhôn to bê nghut ri.

⁸ Sân-yúng duq wik nú-nhâm é mebu le, wut râ matú, Yhang lé byí to bê nghut ri."

gâ ri. (Nú-nhâm é mebu haû gi, sân-yúng bang kut é dingmán é muzó nghut ri.)

⁹ Hau htâng, maumang lagyo gi, ngo lé, "Haû Sauzô é myiháng zoshuq poí má ji yu é hui bang gi, hkungsô wó nyi ri." nghû ká aq." ga taí luí, "Dang shí pé gi, Garai Gasâng é tengmán mungdang yhang nghut lhê." ga xoq taí ri.

¹⁰ Haû hkûn, ngò gi, yhang lé noqkuq râ nghû, yhang é hkyí wang má paí gop kat é nghut lhê. Nghut kôlhang, yhang gi, "Haû su hkâkut! Ngò gi, nàng eq haû Yesuq é saksé lé hkâm é náng gumang wuì eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoí htoí é Woi-nyí é myit dông nghut ri." ga, ngo lé taí hkûm ri.

Myang Hpyû Jí To Su É Hkyô

¹¹ Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haú má jì tô é gi, Lhumzui eq Tengmán

gâ é Sû nghut ri. Yhang gi, tengmán é dông tarâ jéyáng luí, majan zan Sû nghut ri. ¹² Yhang é myoqjí gi, myishâm su dut mù, Yhang é ulhum má gi, janmaú

myo myo tsûng tô ri. Yhang mai lai luí, ó yuq le a bo sê é myìng, Yhang chyáng kê tap tô ri. ¹³ Yhang gi, sui má

jum yù bê nghut é buhîng radung wut to luí, Yhang é myìng gi, Garai Gasâng é mungdang gâ ri. ¹⁴ Haû

mauhkûng gyè pé gi, hpyu é eq sanséng nú-nhâm é mebu wut mù, myang hpyû ji kôluí, Yhang htâng má

châng bum akô nghut ri. ¹⁵ Byù myû haú pé lé zan râ matú, htoq é shâm gi, Yhang é nhut mai htoq lo ri.

Yhang gi, yhangmoq lé, shamtoq dumbáng èq up râ nghut lhê. Yhang gi, wum-o a-tsam dik shoq bò Sû

Garai Gasâng é nhikmo-yô é tsibyiq shi pyik jang má, yhangmoq lé pyik râ nghut lhê. ¹⁶ Hkohlkam pê é

Hkohlkam eq yhumsing pê é Yhumsîng gâ é myìng gi, Yhang é buhîng eq Yhang é tangbaú má kê tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat mâ é nghoqzô pé ban-

shoq lé, "Lé keq, Garai Gasâng é zoshuq poí mó matú, lé zup zing keq; ¹⁸ haû hkûn, nungmoq gi, hkohlkam pê

é, gyezaû pê é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jùn pé

é, byù mó byù zo pé lhunglhâng é gungsho pé lé, myàng zo kó râ nghut lhê." ga, htê mó èq wut garû taí

ri.

¹⁹ Hau htâng, haû tân jung dusak eq myidàm htoq mâ é hkohlkam eq yhangmoq é gyezô pé gi, haû

myang htoq má jì to Sû eq Yhang é gyezô pé lé, majan zan râ matú chôm zîng bùm kô é lé, ngò myang ri.

²⁰ Nghut kôlhang, haû tân jung dusak gi, chyup yu é hui bekô nghut ri; hau htoq agó, haû tân jung dusak é

masat lhô lé hkam yù luí, yhang é alhô lé noqkuq é bang lé, mhaú zo râ matú, tân jung dusak hau é gung-

† Haleluya gâ é gi, Hebre myíng dông, "Yhumsîng Garai Gasang lé hkya-on kungton lhê" gâ é dang nghut ri.

lik đông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duì gù dú hkyô kat é hui bekô nghut ri. ²¹ Haû myit gyó tô é bang gi, myang gûng má jî to Su é nhut mai htoq lo é sham èq sat pyâm é hui bekô nghut luî, nghoq pé lhunglhang gi, haû bang é gungsho lé, gyi gyi dau dau myàng zô bùm bekô nghut ri.

Rahkyîng Zàn

20 Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhang é loq má chûng mù, mauhkûng mai gyó lé lo é lé, ngò myang ri. ² Yhang gi, natzau eq Tsadán nghut é, a-nham lhê é lhangmuì gâ é manjung lé, zanwut rahkyîng lhûng to râ matú, chyup tuî yû bê nghut ri. ³ Haû mù, maumang lagyo haû gi, rahkyîng zàn a byíng shî é gyoro má, manjung haû, byù myû pé lé a wó mhaû zo sháng gaq ga, nik dik htûm é Lasang-dong má yhang lé dú hkyô hâng kat luî, zoq myhî to mù, hau é ahtoq má dizik htûng tô ri. Haû rahkyîng zàn lai eq, yhang lé, ra yoq zo hpông htoq kat ra râ nghut lhê.

⁴ Ngò gi, haû tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haû Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bang é sobyô pé lé, ngò myang ri. Haû bang gi, haû tân jung dusak eq yhang é alhô lé a no-qkuq é htoq agó, yhumsing é ngelang eq loq má hau é masat lhô lé a htûng tap yû bang é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri. ⁵ Haû gi, sâng-hî dâm dum dui toq é hkyô nghut ri. (Shi byuq bê myit gyó tô bang gi, rahkyîng zàn haû a byíng byíng wó dum dui toq kó râ a nghut.) ⁶ Sâng-hî dâm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû râ shi é hkyô gi, haû bang lé up râ ahkáng wó é a nghut; haû bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lhê.

Tsadán Htên Byoq Huî É Hkyô

⁷ Rahkyîng zàn haû lai jáng, Tsadán gi, htóng mai nhang htoq kat é hui luî, ⁸ majan zan râ matú, myidâm htoq myi chyûn má nyi é, Goga eq Magoga gâ é byù myû pé lé mhaû shuí tsíng yû râ ga, htoq ê râ nghut lhê. Byù haû bang gi, wuishuq lung-aû yàm mâ é se-muî myhó myo kó râ nghut lhê. ⁹ Yhangmoq gi, maumyî htunghtáng hkap shoq chôm yán doq lò kômù, haû Garai Gasâng é byu pé nyi é dap nghut é, Garai Gasang chyitdap é myuq lhînghkyuq mã, lé lóm tô bùm bekô. Nghut kôlhang, mauhkûng mai myi gyó lô luî, yhangmoq lé nyhê hkyô pyám bê nghut ri. ¹⁰ Haû tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má,

yhangmoq lé mhoq hpyoq yu é natzau haû le dú hkyô pyâm é hui bê nghut ri. Yhangmoq gi, nyí, myín, pyat dedu ahtum abyuq wuîhke jamjau hui zô nyi kó râ nghut lhê.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq hpyû mó ralhum eq haû má zung tô é Sû lé, ngò myang ri. Haû mauhkûng eq myigùng gi, Yhâng é hí mai hpang lô bê nghut mù, yhangnhik é matú jowò a joq lo nghut ri. ¹² Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotú laiká buk le, hpông tô ri. Haû shi byuq bê bang gi, yhumsing kut é eq rajung za, laiká buk pé má kê tô é đông, tarâ doqdan é huî bùm bekô nghut ri. ¹³ Haû hkûn, wuîshuq lung-aû gi, yhang má lúng tô é, shi byuq bê bang lé ap byi luî, haû shi é hkyô eq Moming le, yhangnhik chyáng lúng tô é, shi byuq bê bang lé ap byi akô nghut ri; yuq hkangmó gi, yhumsing kut é eq rajung za tarâ doqdan é hui bekô nghut ri. ¹⁴ Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haû gi, î dâm nghû râ shi é hkyô nghut lhê. ¹⁵ Asak jihpán laiká buk mã, mying a bo é sù ó yuq nghut kôle, myi nhông haû má dú hkyô kat é hui bekô nghut ri.

Yerusalem Asik

21 Hau htâng, mauhkûng asik eq myigùng asik lé, ngò myang ri; hkâsu mù gâ le, hí lhê é mauhkûng eq myigùng gi, laí lô byuq bê nghut luî, wuîshuq lung-aû le, dum joq râ a nghut lo. ² Haû hkûn, Chyoiyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yû luî, Garai Gasâng chyáng mã é nghut mù, mauhkûng mai gyó lé lo é lé, ngò myang ri. ³ Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuí, Garai Gasâng é nyi jowò gi, xângzo byu pé eq rahá nghut luî, Yhang gi, yhangmoq eq rahá nyi nyi râ nghut lhê. Yhangmoq gi, Yhâng é byu pé dut râ nghut luî, Garai Gasang yhang, yhangmoq eq rahá nyi mù, yhangmoq é Garai Gasang dut râ nghut lhê. ⁴ Garai Gasang gi, yhangmoq é myoq mã é ngaubyi lhunglhang lé, sut pyám byi râ nghut lhê. Htângnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô nghû é joq râ a nghut lo; hkâsu mù gâ le, hí lhê é hkyô pé gi, laí lô byuq bê nghut ri." gâ ri.

⁵ Haû hkohkâm-tanghkuq má zung to Sû gi, "Wú aq, jung hkangmó lé, Ngò asik kut nyí bê nghut lhê." ga taí luî, "Shî lé kê to aq, hkâsu mù gâ le, dang shí pé gi, lunging é dang eq tengmán é dang nghut lhê." ga taí ri.

⁶ Hau htoq agó, Yhang gi, "Haû pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htáng Sû le nghut lhê. Wuî shit sù lé gi, ahpau a dúng é za, asak wuîbúm mã é uchyam lé, Ngò byi huq

râ nghut lhê. ⁷ Wó ung é sù ó yuq nghut kôle, Garaí é silí wunlí haú pé banshoq lé sîng râ nghut mù, Ngò gi, yhang é Garai Gasang dut luí, yhang gi, Ngá zo dut râ nghut lhê. ⁸ Nghut kôlhâng, gyuq myit bò bang, a lumjîng bang, achâq achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lhunglhâng é jowò gi, haú hang myi duq nyi é nhông nghut râ nghut lhê. Haú gi, í dâm nghû râ shi é hkyô nghut ri." ga ngo lé taí ri.

⁹ Ló htâng é wúm nyhit jung byîng tô é góm nyhit lhum chung tô é maumang lagyo nyhit yuq mâ é rayuq gi, lé mù, "Lé aq, haú Sauzô é yhangmyi gâ é myisik lé, ngò tân shit râ nghut lhê." ga ngo lé taí ri. ¹⁰ Hau htâng, yhang gi, ngo lé Woi-nyí mai bùm my-hâng mó ralhum má shuí jé luí, Garai Gasâng chyâng mâ é nghut mù, mauhkûng mai gyó lé lo é, haú Chy-oiyúng Myuq gâ é Yerusalem lé tân shit ri. ¹¹ Myuq haú gi, Garai Gasâng é hpungwup shing kang hû é htoq agó, haú maubó gi, hpaú dik é huhpé lungsêng su dut luí, myoqjâm su sân-yúng ri. ¹² Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myú raxe í hu é myîng lé, hkum haú pé má kâ tap to bum ri. ¹³ Hkum haú pé gi, buih-toq hkyam shut sôm lhum, buiwàng hkyam shut sôm lhum, maupyí shut sôm lhum, mautsûng shut sôm lhum kut hpông tô ri. ¹⁴ Myuq xêwâm haú gi, awang raxe í lhùm èq hi tô é nghut luí, awang haú pé má, Sauzô é lagyo raxe í yuq é myîng dap tô bum ri.

¹⁵ Haú ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hîng jâm-yang ralhum chung tô ri. ¹⁶ Myuq haú gi, myi chyûn dut mâ é nghut luí, hîng hpyang làm hpyang rawuí wuí za dut mâ é nghut ri. Maumang haú gi, myuq lé jâm-yang hau èq kê wú é hkûn, hîng hpyang, làm hpyang, myhâng hpyang banshoq 1400 déng † kô bo ri; ¹⁷ yhang gi, haú byù kê é jung eq wuí é maumang lagyo é kê jung lé chûng mù, myuq xêwâm lé kê wú é hkûn, rasho myí xê myi dúng bo ri. ¹⁸ Myuq xêwâm haú gi, huhpé lungsêng èq saí é nghut ri; myuq gi, hîng gyîng èq saí é nghut mù, myoqjâm su yhang sân-yúng ri. ¹⁹ Myuq xêwâm haú é awang pé gi, hpau jung lungsêng ajung jûng èq mhôn tô é nghut ri. Sâng-hî lhum gi, huhpé lungsêng èq, í lhum nghû râ gi, nila (mauhkûng nyùi su dut jung) lungsêng èq, sôm lhum nghû râ gi, mahuya (noq é isâm myo jung) lungsêng èq, myí lhum nghû râ gi, myaq (huí nyùi nyùi é jung) lungsêng èq, ²⁰ ngo lhum nghû râ gi, nyháú myoqjí su dut jung lungsêng èq, hkyuq lhum nghû râ gi, pate-mya (nè é jung) lungsêng èq, nyhit lhum nghû râ gi, huí muí muí é su dut jung lungsêng èq, shit lhum nghû râ gi, myek-yoi (wuimau nyùi su dut jung) lungsêng èq, gaú lhum nghû râ gi, utohpaya (bó huí hui é jung) lungsêng èq, raxê lhum nghû râ gi, mahuya nyùi lungsêng èq, raxe ralhum nghû râ gi, wakintu (mhan-haq nyùi eq mauhkûng nyùi nyhô tô é

su dut é jung) lungsêng èq, raxe í lhum nghû râ gi, (me me dut é jung) htihtu-nila lungsêng èq mhôn tô ri. ²¹ Haú myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saí é nghut ri. Haú myuq é hkyô mó gi, hîng jet èq saí é nghut luí, myoqjâm su duq san é hkyô nghut ri.

²² Ngò gi, myuq haú má noquq yhûm joq é lé a myàng, hkâsu mù gâ le, haú wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noquq yhûm nghut nyi é yanmai nghut ri. ²³ Haú Garai Gasâng é hpungwup shing kang gi, myuq haú má duqbó byí é htoq agó, Sauzo gi, myuq hau é myi-bung nghut é yanmai, myuq haú má gi, bui eq lhamó tsô byi a ra nghut ri. ²⁴ Haú byù myú pé gi, myuq haú duqbó é hkaú má hkyô wó so kó râ nghut lhê; haú myidâm htoq mâ é hkohkam pê gi, yhangmoq é hkikhkâm hkyô lé, myuq haú má yù lé kó râ nghut lhê. ²⁵ Myuq haú má gi, myín nghû é a joq é yanmai, myuq hkum myhî é le joq râ a nghut lo. ²⁶ Haú byù myú pé é hpungwup shing kang eq aróng lé, myuq haú má yu lé kó râ nghut lhê. ²⁷ Myuq haú má, a sansêng é hkyô haí le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wàng râ a nghut; haú Sauzô é asak jihpán laiká buk má myîng bo é bang za wó wàng râ nghut lhê.

Asak Wuí Mó Lâng

22 Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaú mâ é hkyô mó gûng dông yui lô é, myoqjâm su sân-yúng é asak wuí mó lâng lé, maumang lagyo haú, ngo lé tân shit ri. ² Wuilàng í hpoq é má, ashi raxe í myú zuí é asak shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haú pé mâ é ahaq pé gi, byù myú pé lé yâ gè râ matú nghut ri. ³ Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyi râ nghut mù, Yhâng é dui-nhâng zoshâng wuí gi, Yhang lé noquq dojaú kó râ nghut lhê. ⁴ Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é myîng kâ tap é hui kó râ nghut lhê. ⁵ Myín nghû é le joq râ a nghut lo. My-ibung duqbó byí é le, bui tsô byí é le, yhangmoq ra kó râ a nghut lo, hkâsu mù gâ le, haú Yhumsîng Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

⁶ Maumang haú gi, ngo lé, "Dang shí pé gi, lumgîng é dang eq tengmán é dang nghut lhê. Myiqhtoí pê é woi-nyí lé up é Yhumsîng Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wuí lé tân shit râ matú, Yhâng é maumang lagyo lé nhang kat é nghut ri." ga taí ri.

† 1400 déng gi, Griik pé é stadia 12000 kô nghut ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô râ nghut lhê! Laiká shî má bo é myiqhtoi dang pé lé châng kut é sù gi, hkungsô wó nyi ri." † gâ é lé, ngò wó gyô ri.

⁸ Haú hkyô pé lé wó myâng wó gyô é sù gi, ngò Yohan nghut lhê. Ngò gi, haú hkyô pé lé wó myâng wó gyô é hkún, ngo lé, shí hkyô pé tún shit é maumang lagyô é hkyí wang má noqkuq râ matú paí gop é nghut lhê. ⁹ Nghut kôlhang, yhang gi, ngo lé, "Haú su hkâkut! Ngò gi, nàng eq le, nàng é gumang myiqhtoi pé eq le, laiká shî mâ é mungdang pé lé châng kut é lhungl-hâng bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

¹⁰ Hau htâng, yhang gi, "Laiká shî má bo é myiqhtoi dang pé lé, hkâzaú to lo, hkâsu mù gâ le, haú ahkýng gi, chyâng lò bê nghut ri. ¹¹ A dingmán é sù gi, a dingmán é dông xoq kut nyí sháng gaq; a sansêng é sù gi, a sansêng é dông xoq dut nyí sháng gaq; dingmán é sù gi, dingmán é dông xoq kut nyí sháng gaq; chyoiyúng é sù gi, xoq chyoiyúng nyí sháng gaq." ga ngo lé taí kyô ri.

¹² "Wú keq, ngò gi, a myáng má jé lé lô râ nghut lhê! Ngò gi, yuq hkangmó lé, yhumsíng kut é eq rajung za byi râ shigyaú chyunghuq chung tô lhê. ¹³ Ngò gi, Alhpa eq Omega nghut lhê, Sâng-hi eq Jihtùm nghut lhê, Sâng-hi Awang eq Ló Htáng Sù le nghut lhê.

¹⁴ Asak shigâm má jé râ eq myuq hkaú shut hkúmdong mai wó wang jé râ ahkáng wó yú shoq, yhums-

† Dang shí hkun gi, Yesuq taí é nghut lhê.

ing é buhîng lé chî sân é bang gi, hkungsô wó nyi ri.

¹⁵ Shinggan má gi, hkui dông nyi é bang, myoqheq hpaqchyí kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaú é hkyô lé ô naú luí châng kut é bang lhungl-hâng nyi bum akô nghut ri.

¹⁶ Ngò, Yesuq gi, haú noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haú duqbó é Bó-myhû le nghut lhê." †† gâ é lé, ngò wó gyô ri.

¹⁷ Haú Woi-nyí eq myisik gi, "Lé aq!" gâ akô. Haú wó gyô é sù gi, "Lé aq!" ga sháng gaq. Wuí shit sù ó yuq nghut kôle, lé sháng gaq; shuq nau é sù ó yuq nghut kôle, ahpaú byi a ra é asak wui lé, shuq sháng gaq.

¹⁸ Laiká shî má bo é myiqhtoi dang pé lé wó gyô é bang yuq hkangmó lé, ngò sidiq byí é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shî má kê tô é wúm pé lé jé nhâng râ nghut lhê. ¹⁹ Myiqhtoi laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kê tô é asak shigâm eq chyoiyúng myuq mâ é yhang eq sêng é gû lé, yu pyám byi râ nghut lhê.

²⁰ Shí hkyô pé lé saksé hkâm byí é Sù gi, "Nghut bê, Ngò gi, a myáng má jé lé lô râ nghut lhê." ga taí ri.

Amen. Yhumsíng Yesuq ê, lé lô aq ô!

²¹ Haú Yhumsíng Yesuq é jeju gi, Garai Gasâng é byu pê chyáng joq nyí sháng gaq ô! Amen.

†† Dang shí hkun gi, Yesuq taí é nghut lhê.